




Itlajtōl Totajtsi Dios

Southeastern Puebla Nahuatl New Testament



Contents

San Mateo	1
San Marcos	50
San Lucas	81
San Juan	132
Hechos	169
Romanos	215
1 Corintios	234
2 Corintios	252
Gálatas	264
Efesios	271
Filipenses	278
Colosenses	283
1 Tesalonicenses	288
2 Tesalonicenses	292
1 Timoteo	294
2 Timoteo	300
Tito	304
Filemón	307
Hebreos	308
Santiago	322
1 San Pedro	327
2 Pedro	332
1 Juan	335
2 Juan	340
3 Juan	341
Judas	342
Apocalipsis	344

Itlajtol Totajtsi Dios
New Testament in Nahuatl, Southeastern Puebla (MX:npl:Nahuatl,
Southeastern Puebla)

copyright © 2011 Wycliffe Bible Translators, Inc.

© 2011, Wycliffe Bible Translators, Inc. All rights reserved.

Language: Nahuatl, Southeastern Puebla

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Nahuatl, Southeastern Puebla

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright information.

You do not sell this work for a profit.

You do not change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

ISBN 978-1-5313-0493-5

PDF generated on 21 Sep 2016 from source files dated 21 Sep 2016
4d269f11-cca1-521d-b89a-6683ffdc9c2

This print-on-demand edition of Scripture is designed, produced, and provided at cost by the Digital Bible Society. This is made possible through partnerships with the Bible League of Canada, Open Doors International and other missions and translation agencies. We are deeply grateful for the sacrifices made in translating this edition of Scripture and the generosity of others in making this Bible available to you.

To order additional copies of this Bible or hundreds of translations like it or to learn more about our ministries and the mission of Scripture distribution in every language, we invite you to visit www.DBS.org (USA), www.BibleLeague.ca (Canada), and www.OpenDoors.org (Europe). May God bless your work in sharing and teaching these Scriptures, until, as it is written, the earth is *“filled with the knowledge of the glory of the LORD, as the waters cover the sea.”* (Habakkuk 2:14)

N Kualitlájtolí non Okijkuilo San Mateo

Yejwah ninteh intokah iwejkatatawah n Cristo Jesús

(Lc. 3:23-38)

¹Ninteh iwejkatatawah n Cristo Jesús, non walewatok itech David iwa noijki walewatok itech Abraham.

²Abraham ita n Isaac.

Isaac ita n Jacob,

iwa Jacob ita n Judá iwan oksikimeh ikniwah.

³Ipilwah n Judá non okimpixki iwan Tamar, omonotsayah Fares iwa Zara.

Fares ita n Esrom,

iwa n Esrom ita n Aram.

⁴Aram ita n Aminadab.

Aminadab ita n Naasón.

Naasón ita n Salmón.

⁵Salmón iwa n Rahab okipixkeh inkone non itoka Booz.

Booz iwa n Rut okipixkeh inkone non itoka Obed.

Obed ita n Isaf.

⁶Isaf ita n rey David.

N rey David ita n Salomón. Imamá n Salomón okatka isiwa n Urías.

⁷Salomón ita n Roboam.

Roboam ita n Abías,

iwa Abías ita n Asá.

⁸Asá ita n Josafat.

Josafat ita n Joram,

iwa Joram ita n Uzias.

⁹Uzias ita n Jotám.

Jotám ita n Acaz,

iwa Acaz ita n Ezequías.

¹⁰Ezequías ita n Manasés.

Manasés ita n Amón,

iwa Amón ita n Josías.

¹¹Josías ita n Jeconías. Jeconías iwan ikniwah otlakatkeh itech tonatijmeh ijkuak n israelitas okinwikatokah kan tlali de Babilonia.

¹²Satepa de okinwikakeh Babilonia,

Jeconías ita n Salatiel,

iwa Salatiel ita n Zorobabel.

¹³Zorobabel ita n Abiud.

Abiud okatka ita n Eliaquim,

iwa Eliaquim ita n Azor.

¹⁴Azor ita n Sadoc.

Sadoc ita n Aquim,

iwa Aquim ita Eliud.

¹⁵Eliud ita n Eleazar.

Eleazar ita n Matán,

iwa Matán ita n Jacob.

¹⁶Jacob ita n José.

José omonamikti iwan María.

María okatka imamá n Jesús non tejwah tikixmatih kemi Cristo.

¹⁷Opanokeh májtlaktli iwa n nawi (14) iwejkaixwiwah n Abraham asta otlakatiko David. Iwa satepa májtlaktli iwa n nawi (14) iwejkaixwiwah ijkuak ok onemia n David asta ijkuak okinwikakeh kan tlali de Babilonia. Iwa satepa ok májtlaktli iwa n nawi (14) iwejkaixwiwah ijkuak okinwikakeh n Israelitas kan tlali de Babilonia asta ijkuak otlakatiko n Cristo.

Otlákatki Cristo Jesús
(Lc. 2:1-7)

¹⁸Ijkí otlamochi ijkuak otlákatki n Cristo Jesús. María, imamá Jesús, yokichixtoka tonati para monamiktis iwan José. Pero ijkuak ayamó omonamiktiayah, María yokatka kókoxti ika konetl ika iweletilis n Espiritu Santo. ¹⁹José ya monamiktiskia iwan María, * iwa kemi kuali tlakatl, ye amo okinek kipijpinatis n María, yika okimoli kikajkawas san ichtaka. ²⁰Ye okimoliaya ijkó kichiwas, pero se íángel n Totajtsi Dios okimonextili ijkuak otejemiktoka iwa okili:

—José, iwejkaixwi n David, amo ximawi tikselis n María kemi mosiwa. N konetl non kichixtok wits ika iweletilis Espiritu Santo. ²¹María kipias se konetl, iwa te tiktlalilis itoka JESÚS, Ye kinmakixtis itlakaikniwah de intlajtlakolwah.

²²Nochi ni opanok para mamochiwa tlan okijto Totajtsi Dios ijkuak okijkuilo n tiotlajto:

²³Se íchpochtli kipias ijtik se konetl,

iwa kitlakatilis,

iwa kitlalilis itoka Emanuel.

Emanuel kijtosneki: Dios kajki towah.

²⁴Ijkuak José ojsak, okichi tlan okinawati íángel Totajtsi Dios, iwa okiseli n María kemi isiwa. ²⁵Yejwah mach okochiah sansikah, asta ijkuak yotlákatki n konetl.

Iwa José okitlalili itoka Jesús.

2

Sikimeh ixtlamatkeh owalajkeh okitlajpalokoh n Cristo

¹Jesús otlákatki itech altepetl de Belén non kajki kan tlali de Judea. Itech nonteh tonatijmeh Herodes* ye n rey. Ijkuakó owalajkeh kan ik kisa tonati sikimeh ixtlamatkeh. Yejewah okalakikoh Jerusalén, ²iwa otlajtlankeh:

—¿Kanin kajki inrey n judíojeht non yotlakatiko? Kan ik kisa tonati otiktakeh isitlal, yika otonwalajkeh otikweyijkachiwahokoh.

³Ijkuak n rey Herodes okikak nochi ni, omomojti, iwa nochteh n tlakah de Jerusalén noiwa omomojtijkeh. ⁴Ijkuakó n rey Herodes okinmoololo nochteh n tiopixkeh non tlayakantokoh iwa non kitemachtiah n tlanawátili, iwa okintlajtlani kani tlakatis n Cristo.

⁵Iwa yejewah okilijkeh:

—Tlakatis itech altepetl de Belén, non kajki kan tlali de Judea, ijkó okijkuilo n profeta:

⁶Te Belén non tika itech tlali de Judá, te maya titsijsikitsi, te okachi tiweyijkatitos.

Motech kisas se weyi tlanawati,

non kinyakanas nopilwah, n tlakah de Israel.

Mi. 5:2

⁷Ijkuakó Herodes san ichtaka okínnotski n ixtlamatkeh, iwa okinyektlajtlani tlan tonati oneski non sítlali. ⁸Otlanki okintflanki mawiah Belén, iwa okinmili:

—Xiwhah ompa, iwa xiyektlajtlanikah kanin kajki non konetl, iwa ijkuak nonkajsiskeh, sanima technawatikih ne noiwa nias nikweyijkachiwati.

⁹Ijkuak n ixtlamatkeh okikakeh tlan okinnawati n Herodes, oonewakeh Belén. Iwa n sítlali non okitakeh kan ik kisa tonati, otlayakantia iwa omoketsato kan kajki n konetl.

¹⁰Ijkuak n ixtlamatkeh okitakeh n sítlali, satlawel oyolpakeh. ¹¹Iwa ijkuak okalakeh itech kali, okitakeh n konetl iwan imamá María. Omotolojkeh inawak iwa okiweyijkachijkeh n konetl. Satepa okintlajpojeht inkaxajtsiswah iwa okitliokolijkeh oro, kópali iwa ajwíalístli non itoka mirra. ¹²Satepa, Dios okinnawatih ijkuak otejemiktokah, iwa okinmili ayakmó mamokopakah kan Herodes, iwa n ixtlamatkeh omokopkeh incha itech ok se ojtli.

José, María iwa n konetl Jesús, choloah para Egipto

* ¹:19 Ijkuak n judíojeht kisentlaliah monamiktiskih mokawah kemi yomonamiktijkeh. Yika, tla ayakmó monamiktiah kipiah mokajkawaskeh ika se amatl, maya ayamó omonamiktiayah, porke nin kompromiso weyi kijtosneki para n judíojeht. Xikamapoa Mateo 19:3-9. ²:1 Non okachi wejweyijteht tlanawatijkeh itech nin tlali kintokayotiah 'Herodes', non kijtosneki 'se weyi tlanawati'.

¹³ Ijkuak n ixtlalamatkeh yomokopkeh incha, se íángel Toteko Dios okimonextili n José ijkuak otejemiktoka, iwa okili:

—José, ximewa, xikonana n konetl iwa imamá, iwa xicholo kan tlali de Egipto. Ompa ximokawakah asta ijkuak ne nimitsnawatis xiwalnokopakah. Herodes kitemojtinemis n konetl para kimiktis.

¹⁴ San nima non yúali, José omejtewak, okónanki n konetl iwa imamá, iwa okinwík Egipto. ¹⁵ Iwa ompa omokajkeh asta ijkuak Herodes omikki. Ijkó otlamochi kemi okijto n Toteko ijkuak okijkuiulo n profeta, iwa okijto: “De Egipto oníknotski Nokone.” *Os. 11:1*

Herodes otlanawati makinmiktikah n kokoneh

¹⁶ Ijkuak Herodes okitak okikajkayajkeh n ixtlalamatkeh, satlawel okuálanki, iwa otlanawati makinmiktikah nochteh n kokoneh non sikin otlakatkeh iwa asta non ya kipiah ome xiwitl, nochteh non ochantitokah Belén iwa non ik ompa ochanchiwayah. Herodes ijkó okiyejekoliaya ika tlan okilijkeh n ixtlalamatkeh. ¹⁷ Ijkó otlamochi kemi okijkuiulo n profeta Jeremías:

¹⁸ Nochteh non ochantitoka Ramá okikakeh ijkuak chikawak ochokayah iwa omoy-olkokoayah.

Raquel okojsajtsitokah,
iwa amo okinekia moyolsewis,
ken okinmiktijkeh ipilwah.

Jr. 31:15

José mokopa Nazaret

¹⁹ Ijkuak Herodes yomikki, se íángel Toteko okimonextili n José ijkuak otejemiktoka ompa Egipto iwa okili:

²⁰ —Ximewa, xikwika n konetl iwa imamá, iwa ximokopa kan tlali de Israel, porke yomikeh non okinekia kimiktiskah n konetl.

²¹ Ijkuakó José omejki, okiwík n konetl iwa imamá para Israel. ²² Ijkuak José okima Arquelao otlanawatjtoka Judea ipatka ita n Herodes, omaujki yas ompa. Iwa oyá Galilea kemi okinawatijkeh ijkuak otejemik. ²³ Ijkuak ompa okalakitoh, omochantitoh Nazaret. Ijkó omochi tlan okijkuiulojkeh n profetas, Jesús kitokayotiskah Nazareno.

3

Juan Bautista tlamachtia kan tlaltejtéyinki

(Mr. 1:1-8; Lc. 3:1-9, 15-17; Jn. 1:19-28)

¹ Itech nekateh tonatijmeh, Juan Bautista owala kan tlaltejtéyinki de Judea, ote-lapowiko itlajtöl Dios, ² iwa okimiliaya n tlakah:

—Ximoyolpatla inawak Dios, ya walajsi n tonati ijkuak Dios pewas tlanawatis.

³ Isaías okitene Juan iwa okijto:

Se tlájtoli tsajtsi kan tlaltejtéyinki:

“Xikmajmanilikah se ojtli n Toteko,

Xiktlapokah se ojtli milaktik.”

Is. 40:3

⁴ Itlakeh n Juan ochijchitoka ika itsojmio n kameyo, iwa omotlajkoilpiaya ika se kuit-laxtli. Okinkuaaya chapulimeh iwa nékuitli non onka itech tepetl.* ⁵ Miakeh okonkakah n Juan. Iwa amo oyaya san de Judea, noiwa non ochajchantitokah inakastla n río Jordán.

⁶ Iwa ijkuak okinmokuityayah intlajtlakolwah, Juan okinkuaatekiaya ijtik río Jordán.

⁷ Ijkuak Juan okitak miakeh fariseos† iwa saduseos‡ owalayah inawak makinkuaateki, ya okinmili:

* 3:4 Se nasareo amo oweletia okikuaaya san de nochi nion okoniaya vino. Xikamapoa Nm. 6:1-5, Jue. 13:4,7-14. Juan nasareo iwa Jesús nazareno. Xikamapoa Mt. 11:18,19. † 3:7 Fariseos: se partido de akimeh okitlakitayah iwa satlawel okimopantayah itlanawatil Moisés iwa nochi tlan yejwah okajxitilijkah. Iwa okintokitayah n oksikimeh makitlakitakah tlan yejwah otlamachtayah. ‡ 3:7 Saduseos: se partido non amo okineltokayah ke non yomikkeh oksepa moyolitiskah.

—¡Nomejwah kemi nonkoameh! ¡Akin onomechili noncholoskeh de n temojti tlaijy-owilistli non wits nomopah! ⁸Xikchiwakah tlan kuali ijkó motas milák yononmoyolkopkeh. ⁹Iwa amo xikyeyekolikah weletis nonkijtoskeh: “Tejwah titepilwah de Abraham.” De milajka nomechilia asta ninteh temeh, Dios weletis kinkopas ipilwah n Abraham. ¹⁰N acha ya tlantitok iwa sa mochixtok para nomechnelwayotsontekis. Porke nomejwah amo kuali tlakilo nonkitemakah, yika nomechtsontekiskeh iwa nomechtlamotlaskeh ijtik tletl. ¹¹Milák, ne nomechkuaatekia ika atl porke yononmoyolkopkeh, pero walmuikas ok se Akin okachi weletini ke ne, iwa ne amo ni tlawel kuali para nikkaktojtomas. Ye nomechkuaatekis ika Espiritu Santo iwa ika tletl. ¹²Akin wits satapa, kinxexelos n kualteh iwa non amo kualteh. N kualteh kinmakixtis, pero non amo kualteh kinkajkawas ijtik tletl non amayik sewis.

Juan Bautista kikuaatekia n Jesús

(Mr. 1:9-11; Lc. 3:21-22)

¹³Se tonati Jesús okiski de Galilea iwa okalakito kan río Jordán, para makikuaateki n Juan. ¹⁴Pero Juan amo okinekia kikuaatekis n Jesús, iwa okili:

—¿Tikneki ne manimitskuaateki? ¡Amó, yej tejwatsi techkuaateki!

¹⁵Pero Jesús okinankili:

—Axa ijkó xikchiwa, moneki tiktlakitaskeh tlan Dios otlanawati.

Ijkuakó Juan okili kualiká, ¹⁶iwa okikuaateki. Ijkuak Jesús okiski de ijtik atl, okitak owalmotlapo n ilwikak iwa Iespíritu n Dios owaltemok ipan Jesús kemi se palomatsi. ¹⁷Iwa itech ilwikak omokak se tlájtoli non okijtoaya:

—Ye nin Nokone non saikpanoa niktlasojtla, iwa satlawel nechyolpaktia.

4

N amokualitlakatl okinekia matlajtlakolchiwa n Jesús

(Mr. 1:12-13; Lc. 4:1-13)

¹Satapa, n Espiritu okiwik n Jesús kan amaka chanti para n amokualitlakatl kitoktis matlajtlakolchiwa.

²Jesús amo otlakua ome póali tonati iwa ome póali yúali, ompa kan amaka chanti, iwa satapa owalxitlatlak. ³Ijkuakó n amokualitlakatl tekajkaya omijkuani inawak Jesús iwa okili:

—Tla milák Te Ikone Dios, xikinnawati ninteh temeh mamokopakah paj.

⁴Pero Jesús okinankili:

—Itlajkuilol Dios kijtoa: “N tlakatl amo san ika paj yolitok, yej noiwa ika nochi tlájtoli non Dios kijtoa.”

⁵Satapa n amokualitlakatl okiwik n Jesús kan Jerusalén, okitlejkolti ikpak n Weyi Tiopa ⁶iwa okili:

—Tla milák Te Ikone Dios, ximotlamotla, porke itlajkuilol Dios kijtoa:

Dios kinnawatis iangelwah mamitsmatsakuilikah,

para amo tikmomakati ika itla tletl.

Sal. 91:11

⁷Jesús okili:

—Itlajkuilol Dios noiwa kijtoa: “Amo xikyeyeko Moteko Dios.”

Dt. 6:16

⁸Sa iksemi n amokualitlakatl okiwik n Jesús ipan se tepetl non okachi wejka, iwa ompa okimititi nochteh n talmeh kan tlanawatiah n tlaltikpaktlakah ika nochi inweyilis, ⁹iwa okili:

—Nochi ni nimismakas, tla techweyijkachiwas iwa timotlankuaketsas nonawak.

¹⁰Ijkuakó Jesús okili:

—¡Xio, satanásl, porke itlajkuilol Dios kijtoa: “Xikweyijkachiwa Moteko Dios, iwa sanwel Ye tiktekichiwilis.”

¹¹Ijkuakó n amokualitlakatl okikakajte n Jesús, iwa sikimeh ángelteh omijkuaniykeh okitekichiwilikoh.

Jesús pewa kitemachtia n kualitlájtole kan tlali de Galilea

(Mr. 1:14-15; Lc. 4:14-15)

¹² Ijkuak Jesús okima n Juan Bautista otsaktoka, oyá kan tlali de Galilea. ¹³ Okiski de Nazaret, iwa oyá ochanchiwato kan se altepetl non itoka Capernaúm, non kajki itempa n weyi atl de Galilea, itech talmeh de Zabolón iwa de Neftalí. ¹⁴ Ijko otlamochi tlan Dios okijto ijkuak okijkuilo n tiotlajto Isaías:

¹⁵ Talmeh de Zabolón iwa Neftalí,
ojtli non panotok inakastla n atl,
ik nepa lado de n río Jordán,
tlali de Galilea kan chanchiwah non amo judfojteh.

¹⁶ N tlakah non ochanchiwayah kan tlatleyua,
okitakeh se weyi tláwili.

Akimeh omokajkeh iwa okinmokemih itlasekawilo n mikflistli,
axa se tláwili okinmonextli.

Is. 9:1-2

¹⁷ Ijkuakó, Jesús opé tlamachtia, iwa okimiliaya:

—Ximoyolpatlakah, porke ya walajsi n tonati ijkuak Dios pewas tlanawatis.

Jesús kinnotsa nawi michmajkeh

(Mr. 1:16-20; Lc. 5:1-11)

¹⁸ Se tonati Jesús onejentiaya itempa n atl de Galilea, iwa okinmitak ome iknimeh, Simón akin okinotsayah Pedro iwa ikni Andrés. Yejwah omichmajtokah porke yejwah michmajkeh, ¹⁹ iwa Jesús okinmili:

—Xiwikih nowa, iwa ya nonkinmichmaskeh tlakah.

²⁰ Yejwah sa nima okinkajtejkeh inmichayawah iwa oyajkeh iwan Jesús.

²¹ Jesús ok onejentiaya itempa n atl, iwa okachi tlayakapa okinmitak ok ome iknimeh, Jacobo iwa Juan, itelpochwah n Zebedeo. Yejwah okintlajtlamanilijtokah inmichayawah ijtik se barka iwan inta. Jesús okínnotski, ²² iwa yejwah sa nima okikakajtejkeh inbarka iwa inta, iwa oyajkeh iwan Jesús.

Jesús kinmachtia miakeh tlakah

(Lc. 6:17-19)

²³ Jesús onemia itech nochteh n altepemeh de Galilea, otlamachtijtiaya itech sinagogas iwa okinmatiltiaya n kualitlájto de Dios iwa okimiliaya kenomi moneki timoyekuikaskah. Iwa okimpajtiaya n tlakah de nochi kokólistli iwa de nochi tlan okinkokoaya. ²⁴ Itech nochi tlali de Siria, omoma tlan Jesús okichiwaya, okwalinwikilijkeh nochteh akimeh otlaijyowiyah ika miak kokólistli:

non satlawel okinkokoaya inkuerpo,
akimeh okimpiayah espíritus amokualteh,
akimeh omimikiah
iwa akimeh amo oweletiah onejnemiah.

Jesús nochteh okimpajtiaya. ²⁵ Opé yawih iwan Jesús miakeh tlakah de Galilea, Decápolis, Jerusalén, Judea iwa akimeh ochanchiwayah ik nepa lado de río Jordán.

5

Jesús tlamachtia ipan tepetl

(Lc. 6:20-23)

¹ Ijkuak Jesús okinmitak omooolojkeh miakeh tlakah, otlejkok ipan tepetl iwa ompa otmotlali. Ijkuakó itlamachtijkawah omijkuanijkeh inawak. ² Ye opé kinmachtia:

³ —Mapakikah non yolyámankeh, porke yejwah kinmaxkatiliskeh kan Dios tlanawatijtos.

⁴ Mapakikah akimeh tlaijyowiah, porke Dios kinyolsewis.

⁵ Mapakikah non moikneliah, porke Dios kinmaxkatilis n taltípkaktli.

⁶ Mapakikah akimeh kinekih ika nochi inyolo nochi mamochiwa ika milajkachiwálistli, porke Dios kinmakas tlan kitlajtlanih.

⁷ Mapakikah non teiknomatih, porke Dios noiwa kimiknomatis.

⁸ Mapakikah non yolchipawakeh, porke yejwah kitaskeh Totajtzi Dios.

⁹Mapakikah non teyolsewiah, porke yejwah kinnotsaskeh impilwah Dios.

¹⁰Mapakikah akimeh kintotojtokah por kichiwah tlan Dios kineki, porke inmaxka n ilwikak kan Dios tlanawatia.

¹¹Mapakikah ijkuak fiero kintenewah, kintotojtokaskeh iwa kinwikaltiskeh por necht-lakitah. ¹²Ijkuakó xipakikah porke nonkiseliskeh se weyi tlatliokólili kan ilwikak. Ijkó noiwa okintlaijyowiltijkeh n profetas non yonenkeh ijkuak nomejwah ayamó ononkatkah.

N istatl iwa n tláwili

(Mr. 9:50; Lc. 14:34-35)

¹³Nomejwah yononmochijkeh istatl itech nin tlatlípkaktli. Pero tla n istatl ayakmó tlapuyeya, ¿tlan ika tlapuyeyas? Mach ok kualí, sa kitepewah kala iwa nochteh kitlajtlaksah.

¹⁴Nomejwah non tláwilteh itech nin tlatlípkaktli. Amo weletis motlaatis se altepetl non kajki ipan se tepetl. ¹⁵Amaka kimilintia se kandil iwa kitlaatis itlampa se kajo, yej kitlalia tlakpak para makintlawili nochteh non kateh ijtik kali. ¹⁶Ijkó noiwa, nomejwah xikintlawilikah n tlakah para makitakah nomejwah nonkichiwah tlan kualí, ijko n tlakah kitaskeh tlan kualí nonkichiwah. Ijkó yejwah kiweyijkachiwaskeh Nomotajtsi Dios non kajki ilwikak.

Jesús kitemachtia itlanawatil Moisés

¹⁷Amo xikmolikah oniwala onikpojpoloko n tlanawatílistli noso intlajkuilol n profetas. Amo oniwala onikimpojpoloko, yej oniwala para mamochiwa tlan kijtoa. ¹⁸De milajka nomechilia, n ilwikak iwan tlatlípkaktli pojpoliwiskeh, pero nochi tlan ijkuilitok, maya tlan okachi tsijtsikitsi, saman mochiwas. ¹⁹Yika, akin amo kintlakita seme de ninteh tlanawátelteh, maya amo okachi ipati, iwa ijko kitemachtia, non tlakatl kitaskeh kemi se non amo okachi ipati kan Dios tlanawatia. Pero tla aka kintlakitas nochteh n tlanawátelteh iwa kinmacthis oksikimeh makintlakitakah, yetos weyi kan Dios tlanawatia. ²⁰Ne nomechilia, tla amo nonkichiwah tlan Dios kineki, amo nonkalakiskeh ilwikak kan Dios tlanawatia. Moneki nonkiyekchiwaskeh nochi ni, iwa amo tlan okitemachtijkeh n fariseos iwa non kitemachtiah intlanawatil.

Jesús tlamachtia ijkuak se kualani

(Lc. 12:57-59)

²¹Xikilnamikikah yowejka Moisés okinmilijkah nomotatawah: “Amo xitemikti, porke akin temiktis trato kitlajtlakolmakaskeh.” ²²Ne nomechilia: Nochi akin kikualankaita se ikni, moneki makitlajtlakoltikah. Iwa akin kilia ikni amo kipia ikuatetex, kitlajtlakolmakaskeh kan Sanedrín.* Noiwa akin kinotsa ikni tikuatlapolojtok, yas miktla ijtik tletl.

²³Noiwa, tla ya tio tiktemakati motlamanal itech artal iwa tikilnamiki amo timowika iwan mokni, ²⁴ompa xikkawa motlamanal iyakapa n artal iwa achto xio ximotlapojpolwiti iwa mokni. Ijkuakó ya weletis tiwalmokopas kan artal iwa tikyektemakas motlamanal.

²⁵Tla aka mitsteilia iwa kijtoa itla tikwikilia, ximoyekkawa íwa, para amo mamitstemakti imak tekiwa, tlamó n tekiwa tlanawatis mamitstsakuakah. ²⁶De milajka nimit-silia, amo tikisas de ompa asta ijkuak yotiktlaxtla nochi tlan mitstlajtlanilia.

Amo matimomekatikah

²⁷Nomejwah yononkikakeh tlan achto omijto: “Amo xikinpatatla siwameh.” Éx. 20:14; Dt. 5:18 ²⁸Ne nomechilia, nochi tlakatl non kelewia se siwatl non amo iaxka, kijtosneki yokimomekati itech iyolo.

²⁹Noiwa, tla moixtololo non kajki moyekma mitstoktia xitlajtlakolchiwa, wejka xiktlamotla. Okachi kualí xikpolo itla de mokuerpo, iwa amo nochi mokuerpo makontlamotlakah miktla. ³⁰Iwa tla momayekma mitstoktia xitlajtlakolchiwa, xikmotekili iwa wejka xikontlamotla. Okachi kualí xikpolo itla de mokuerpo, iwa amo nochi mokuerpo makontlamotlakah miktla.

* 5:22 Sanedrín: nin grupo kemi de 50 tlayakankeh okimajmanayah n tetajmeh non tlaixkomakah ijkuak kinteliiah akimeh amo okitlakitayah itlanawatil Moisés.

Amo matimosiwakajkawakah

(Mt. 19:9; Mr. 10:11-12; Lc. 16:18)

³¹ 'Moisés okijkuilo: "Akin mosiwakajkawa, moneki makimaka isiwa se amatl non makichijto kikajkawa isiwa." Dt. 24:1-4 ³² Ne nomechilia: tla se tlakatl kikajkawa isiwa, maya isiwa amo kema onomekati, non tlakatl kitopejtok isiwa mamomekatijtinemi. Iwa akin monamiktia iwa non siwatl, san kimomekatijtok.

Matikchiwakah tlan tiksentlaliah

³³ 'Nomejwah yononkikakeh yowejka Dios okinmili nomotatawah: "Tla itla yotiksentalili Dios, moneki tikchiwas." ³⁴ Axa Ne nomechilia, amitla xiksentalilikah: nion por ilwikak, porke Dios ompa yayantitok. ³⁵ Nion xiksentalilikah por nin tlaltikpaktli, porke ompa kan Dios kinsewijtok ikxiwah. Nion xiksentalilikah por Jerusalén, porke non altepetl iaxka n Weyi Rey. ³⁶ Nion amo ximotlajtolsentlali por motsonteko, porke amo tiweletis tiktlilewiltis nion tikistayaltis nion se motsonkal. ³⁷ Tla itla nonkichiwaskeh san xikijtokah tla "ejé", "ejé", noso tla "amó", "amó", porke nochi tlan amo milák nonkajxtiliskeh, walewatok itech amokualitlakatl.

Amo matikmokopilikah ijkuak techtoktiah tlan amo kuali

(Lc. 6:29-30)

³⁸ 'Nomejwah yononkikakeh kan Moisés okijkuilo: "Tla aka mitskopinilia moixtololo, makikopinilikah ye noiwa. Tla aka tetlantepewa, makitlantepewakah ye noiwa." Éx. 21:23-25; Lv. 24:20 ³⁹ Pero axa Ne nomechilia: Amo xikmokopilikah ijkuak itla amo kuali nomechtoktiah. Jej, tla aka mitsixtlatsinia xikkawili mamitsixtlatsini iojkatia moixko. ⁴⁰ Tla aka mitsteilia para mitsixtilis motlake, xikkawili noiwa mamitsixtili mokoto. ⁴¹ Iwa tla aka mitstoktia xikwikili itlamamal se kilómetro, te xikwikili ome kilómetro. ⁴² Akin mitstlajtlanilis itla, xikmaka. Iwa akin mitstlanewilis itla, xiktlaneti.

Matikintlasojtlakah non techkokoliah

(Lc. 6:27-28, 32-36)

⁴³ 'Noiwa yononkikakeh tlan yomijto: "Xiktlasojtla non mitstlasojtla, iwa xikkokoli non mitskokolia." ⁴⁴ Pero Ne nomechilia: Xikintlasojtlakah akimeh nomechkokoliah, iwa xiktlajtlanilikah Dios makintiochiwa akimeh nomechtotojtokah. ⁴⁵ Ijkó nomejwah nonyetoskeh ipilwah n Totajtsi Dios non kajki ilwikak. Ye kichiwa makisa n tonati impa non kichiwah tlan kuali iwa kichiwah tlan amo kuali. Iwa kualtitlani n kiawitl impa n kualteh tlakah iwa n tlakah non amo kualteh. ⁴⁶ Porke tla nomejwah nonkintlasojtlah sanwel akimeh nomechtlasojtlah, ¿tlan tlaxtláwili nonkiseliskeh ika noni? N tominoolojkeh noijkó kichiwah. ⁴⁷ Iwa tla san nonkintlajpaloah nomokniwah, ¿amo nonkichiwah tlan oksikimeh kichiwah? Non amo kixmatih Dios, noijkó kichiwah. ⁴⁸ Nomejwah xiyetokah non milajkameh, ijkó kemi Nomotajtsi Dios non kajki ilwikak.

6

Kenomi tikchiwaskeh ijkuak titetlatliokoliah

¹ Ijkuak nomejwah nonkichiwaskeh itla kuali, amo xiktematiltikah ixpa n tlakah, porke tla ijkó nonkichiwah, Dios ayakmó nomechmakas nomotlatliokolil kan ilwikak. ² Yika, ijkuak itla tikintliokolis n próbesteh, amo xiktematiltijtinemi kemi kichiwah non kipiah ome imixko. Jejwah kinekih makinmitakah itech sinagogas iwa itech ojtli jejwah milák kitemoah Dios, iwa ijkó kuali matlajtokah de jejwah. Pero de milajka nomechilia, Dios mach ok itla kintliokolis nonteh tlakah. ³ Pero ijkuak te itla tiktetliokolis, amaka xiktlapowi.* ⁴ Ijkó motlatliokolil yetos san ichtaka, iwa Dios n Teta non kita nochi tlan tikchiwa san ichtaka, Ye mitsmakas motlatliokolil.

Jesús tlamachtia kenomi timotiotsajtsiliskeh

(Lc. 11:2-4)

* 6:3 N griego kijtoa: Amo makimati moopochma tlan kichiwa momayekma.

⁵ 'Ijkuak nomejwah nonmotiotsajtsilisek, amo xikchiwahak tlan kichiwah n íxkopteh, yejwah kiwilitah makinmitakah ijkuak motiotsajtsiliah. Yika motiotsajtsiliah mokekekeh itech sinagogas iwa itech ojmech kan panoah miakech tokniwah. Quali xikmatikah, san ijko kipiasek intlattliokolil. ⁶ 'Ijkuak timotiotsajtsilis, xikchiwa moselti. Xikalaki mocha, ximokaltsakua iwa ompa ximotlapowi san ichtaka iwa n Dios Motajtsi, iwa Ye mitsmakas tlan tiktlajtlanilis san ichtaka.

⁷ 'Iwa ijkuak nonmotiotsajtsilisek, amo san ompa xikojpatilijtokah nomotlajtol kemi kichiwah non amo kixmatih Dios, yejwah kimoliah tla san ompa kojpatilijtoskeh intlajtol, Dios okachi kinkakis. ⁸ Nomejwah amo xikchiwahak kemi yejwah kichiwah, porke Totajtsi Dios ya kimatok tlan nomechpoloa achto de nonkitlajtlanilisek. ⁹ Yika, nomejwah ijko moneki ximotiotsajtsilikah:

Totajtsi Dios non timoistika ilwikak,
nochipa makiyektenevakah motoka.

¹⁰ Xiwalmuika xitlanawatiki,
mamochiwa tlan Tejwatsi tikmonekiltia itech nin tlaltikpaktli,
ijko kemi mochiwa kan ilwikak.

¹¹ Techmaka nochi tonati tlan tikmomajsewesekeh.

¹² Techintlapojpolwili totlajtlakolwah,
ijko kemi tejwah noiwa tikintlapojpolwiah akimech techtoktiah tlan amo quali.

¹³ Amo xiktekawili matechyohtilana n tlajtlakoli,
yej techmakixti imak n amokualitlakatl.

¹⁴ 'Tla nomejwah nonkintlapojpolwiah non nomechtoktiah tlan amo quali, Nomotajtsi non kajki ilwikak noiwa nomechtlapojpolwis. ¹⁵ Pero tla amo nonkintlapojpolwiah n tlakah, noiwa Nomotajtsi amo nomechtlapojpolwis.

Jesús tlamachtia kenijki se mosawas

¹⁶ 'Ijkuak nomejwah nonmosawaskeh, amo xiiknotlachiakah kemi kichiwah non íxkopteh. Yejwah iknotlachiah san para makinmitakah mosaujtokeh. Ne nomechilia, sanwel noni yetos intlattliokolil. ¹⁷ Yika, ijkuak te timosawas, ximotejtema iwa ximixami, ¹⁸ para amaka makimati kox timosaujtok. Sanwel Dios Motajtsi, Akin kimati nochi tlan se kitlatijtok itech iyolo, Ye kimati timosaujtok iwa mitsmakas motlatliokolil.

Tlan milák ipati

(Lc. 12:33-34)

¹⁹ 'Amo xikoololokah miak tomi itech nin tlaltikpaktli kan tlakuakualoa iwa tlapoxkawi, iwa n ichtekeh techankalakah iwa tetlachtekiah. ²⁰ Yej xikoololokah itech ilwikak tlan milák ipati. Ompa amo weletis kuakualoa iwa amo poxkawi, nion ichtekeh weleti kalakih. ²¹ Kan kajki tlan momejwah nonkimoliah ipati, ompa kajki nomoyolo.

Toixtololowah kitlawiliah tokuerpo

(Lc. 11:34-36)

²² 'Nomoixtololowah katech kemi se tláwili non kitlawiliah nomokuerpo. Yika, tla nomoixtololowah chipawatokeh, quali kitlawilijtoskeh nochi nomokuerpo. *Job 31:1*

²³ Pero tla nomoixtololowah tlajtlakolchiwah, nochi nomokuerpo kajki kan tleyua. Iwa tla motlawil ayakmo tlawia, kijtosneki nonkatech kan sentleyua, ¡saikpanoa tliiktiket yetos non sentleyuálistli nomotech!

Amo matikimpiakah ome toteko

(Lc. 16:13)

²⁴ 'Amaka tlakatl weletis kintekitilis ome inteko, porke se kitlawelitas iwa non ok se kitlasojtlas, noso se kitlakitas iwa non ok se mach kitlakitas. Amaka weletis kimopantis Dios tla satlawel momijmiktia para kitlawelpias tomi.

Dios kimmokuitlawia ipilwah

(Lc. 12:22-31)

²⁵ Yika nomechilia: Amo ximotekipachokah por tlan nonkimomajsewiskah noso tlan nonkoniskah para ika nonyolitoskeh, noso tlan nonkonakiskeh. ¿Amo okachi ipati nomoyolilis ke nomotlakual, iwa amo okachi ipati nomokuerpo ke nomotlakah? ²⁶ Xikinmitakah n totomeh non patlantinemih, yejwah amo tookah nion pixkah, iwa nion amitla kitlaatiah. Iwa Nomotajtsi Dios non kajki ilwikak kintlakualtia. ¿Iwa nomejwah okachi nomopati ke n totomeh! ²⁷ ¿Tla aka de nomejwah satlawel motekipachoa, yolitos ok se tonati?

²⁸ ¿Iwa tleka nomejwah saikpanoa nonmotekipachoa por nomotlakah? Xikinmitakah kenomi moskaltiah n xochimeh, yejwah amo tekutih iwa nion motlajtsomiah. ²⁹ Iwa Ne nomechilia nion rey Salomón non saikpanoa omoyektlakentiaya, owéletki omotlakenti kemi ninteh xochimeh. ³⁰ Iwa tla Dios ijko kitlakentia se xochitl non axa selistok tlajtlala iwa mostla kichichinoah ijtik tletl, ¿okachi miak kichiwas por nomejwah akimeh nonkipiah achitsi tlaneltokálistli! ³¹ Yika, amo ximotekipachokah nion xikmolikah: “¿Tlan tikmoma-jsewiskah? noso ¿tlan tikoniskah? noso ¿tlan tikonakiskeh?” ³² Porke nochteh non amo kixmatih Dios kitemolijtinemih kenomi kipiaskah nochi ni, pero nomejwah nonkipiah se Nomotajtsi non kajki ilwikak, iwa Ye ya kimatok tlan nomechpoloa. ³³ Nomejwah moneki achto xikchiwakah tlan Dios nomechnawatia iwa xikchiwakah tlan Ye kimonekiltia. Iwa ijko Dios nomechmakas nochi tlan nomechpolos. ³⁴ Yika, amo ximotekipachokah kenomi nontlanexiliskah, porke mostla ok se welta nonmotekipachoskeh. Nochi tonati saman yetos itla tlan ika weletis nonmotekipachoskeh.

7

*Amo xitepojoakah**(Lc. 6:37-38, 41-42)*

¹ Amo xikimpojoakah oksikimeh, ijko noiwa amo manomechpojoakah nomejwah. ² Porke ijko kemi nomejwah nonkimpojoaskeh oksikimeh, ijko nomechpojoaskeh. Iwa ijko kemi nomejwah nontlatamachiwah, noiwa ijko nomechtamachiwaskeh. ³ ¿Tleka tikitilia n tlajsoltsintli non kajki ijtik iixtololo mokni, iwa amo tikita n tláktontli non kajki ijtik moixtololo? ⁴ ¿Kenijki weleti tikilia mokni: “Techkawili manimitskixtili n tlajsoltsintli non tikpixtok ijtik moixtololo,” iwa te ok tikpixtok se tláktontli ijtik moixtololo! ⁵ ¿Ixkoptli! Achto xikmokixtili n tláktontli non tikpixtok ijtik moixtololo, iwa ijko weletis tiyektlachias iwa weletis tikkixtilis n tlajsoltsintli non kipixtok mokni ijtik iixtololo.

⁶ Tlan tiochitok iwa chipawak, amo xikinmakakah n chichimeh, amo kichiwa onewaskeh nomopah iwa nomechkuajkuaskeh. Nion xikinmakakah n koskameh patiojkeh n pitsomeh porke san kintlajtlaksaskeh.

*Xiktlajtlanilikah Dios tlan nomechpoloa iwa Ye nomechmakas**(Lc. 11:9-13; 6:31)*

⁷ Xiktlajtlanilikah tlan nomechpoloa iwa nomechmakaskeh. Xiktemokah tlan nomechpoloa iwa nonkajsiskeh, xitenotsakah kan kaltentli iwa nomechtlatlapoliskeh. ⁸ Yika, akin itla kitlajtlani, kiselia. Iwa akin itla kitemoa, kajsi. Iwa akin tenotsa kan kaltentli, kitlatlapoliah.

⁹ ¿Akin tlakatl weletis kimakas ikone se tetl ijkuak kitlajtlanilis se paj? ¹⁰ Nos, ¿weletis kimakas se koatl ijkuak kitlajtlanilis se michi? ¹¹ Maya nomejwah amo nonkualteh, nonweleti nonkinmakah nomopilwah tlan kual, ¿okachi Nomotajtsi Dios non kajki ilwikak, weletis nomechmakas tlan kual tla nonkitlajtlaniliskah!

¹² Xikchiwakah iwan oksikimeh ijko kemi nomejwah nonkinemih makchiwakah nomowah, ye tlan moneki xikchiwakah. Ye ni itlanawatil Moisés iwa nochi tlan okijkuijkeh n profetas.

*N kaltentli non tsopijtik**(Lc. 13:24)*

¹³ Xikalakikah kan ik kaltentli non tsopijtik, porke patlawak n kaltentli iwa kuyawak n ojtli non tewika kan moixpoloah, iwa miakeh ik ompa yajtokeh. ¹⁴ Pero n kaltentli iwa n ojtli non tewika kan nochipa se yolitos, saikpanoa tsopijtik iwa san sikimeh kajsí non ojtli.

Se kuawitl moixmati ika tlan kitlakiltia
(Lc. 6:43-44)

¹⁵ Ximotlachilikah inmak nekateh tiotlajtolteh tekajkayajkeh, non motlakentiah kemi yetoskiah ichkameh, pero ik inmijtik kokoyomeh tekuanimeh. ¹⁶ Nomejwah weletis nonkinmixmatischeh ika tlan kichiwah, porke amo motekih uvas itech witsmeh, nion se tlátsmoli weleti kitemakas igos. ¹⁷ Ijkó kiné, nochi kualí kuawitl, kitemaka kualí itlakilo, iwa n kuawitl non ayakmó kualí, amo kualí itlakilo kitemaka. ¹⁸ Se kualí kuawitl amo weletis kitemakas amo kualí itlakilo, iwa se kuawitl non ya palantok amo weletis kitemakas kualí itlakilo. ¹⁹ Nochi kuawitl non amo kitemaka kualí itlakilo, motsojtsonteki iwa se kitlamotla ijtik tletl. ²⁰ Yika nomejwah weletis nonkinmixmatischeh ika tlan kitlakiltiah.

Amo nochteh kalakiskeh kan Dios tlanawatia
(Lc. 13:25-27)

²¹ Amo nochteh akimeh nechiliah: “¡Noteko, Noteko!”, kalakiskeh kan Dios tlanawatia. Sanwel akimeh kichiwah tlan kimonekiltia Notajtsi non kajki ilwikak. ²² Ittech neká tonati, miakeh nechiliskeh: “¡Noteko, Noteko!, tejwah otitetlapowijkeh ika Motoka iwa ika Motoka otikinkixtijkeh espíritus amokualteh, noiwa ika Motoka otikinchijkeh miakeh milagros.” ²³ Ijkuakó Ne nikinmilis: “¡Ayik onomechixma! ¡ik nepa xiwiah, tlajtlakolchijkeh!”

Ome tlakah non okichijchijkeh inkal
(Lc. 6:47-49; Mr. 1:22)

²⁴ Ijkó kiné, akin nechkaki iwa nechtlakita, ye kemi se tlakatl non kipia kualí itlalnami-
ilis, iwa okichijchi ikal itech tetl. ²⁵ Owala chikawak kiawitl, iwa opé motleloa miak atl iwa se ejekatl temojti omotlawitekia ipan non kali, pero amo owetski, porke kualí otlakxilitoka itech tetl. ²⁶ Iwa akin nechkaki iwa amo nechtlakita, ye kemi se tlakatl amo ixtlamati iwa okichijchi ikal san itech xali. ²⁷ Owala chikawak kiawitl, iwa opé motleloa miak atl iwa se ejekatl temojti omotlawitekia ipan non kali, iwa non kali owetski iwa nochi opojpoliwik.

²⁸ Ijkuak Jesús otlanki okintlapowí, n tlakah san omotlajtlachialtijkeh kenomi ok-
inmachiya. ²⁹ Porke itlajtol n Jesús otlanawatiya de milajka, iwa amo kemi non kitemachtiah intlanawatil.

8

Jesús okipajti se tlakatl non okipiaya lepra
(Mr. 1:40-45; Lc. 5:12-16)

¹ Ijkuak Jesús otetek de kan tepetl, miakeh tlakah oyajkeh íwa. ² Ijkuakó se tlakatl non okipiaya lepra owalmijkuani inawak Jesús, omotlankuaketski iwa okili:

—Noteko, tla tikmonekiltia, techchipawa.

³ Jesús okitlali ima ipan non kócoxki iwa okili:

—Nikmonekiltia. ¡Ximochipawa!

Ijkuak Jesús ijko okijto, owalpajtik n kócoxki de ikokolis. ⁴ Jesús okili:

—Xikkaki, amaka xikmatilti, sanwel xio kan tiópixki, iwa xiktemaka motlatliokolil kemi ijkitoa itlanawatil Moisés, para ijko makimatikah yotimochipa de mokokolis.

Jesús kipajti itlákau se kapita romano
(Lc. 7:1-10)

⁵ Ijkuak Jesús okalak kan altepetl de Capernaúm, ompa owalmijkuani se kapita romano, ⁶ iwa okili:

—Noteko, se notlakewal sa wetok nocha, yotitikak iwa kualo nochi ikuerpo.

⁷ Jesús okinankili:

—Nias nikpajtiti.

⁸ N kapita okinankili:

—Tejwatsi, ne amitla nopati kemi para tikalakis nocha. Sanwel xikijto, “mapajti,” iwa notlakewal walpajtis. ⁹ Porke ne noiwa nikpia akin nechnawatia, iwa ne noiwa nikinnawatia sikimeh soldadojtech. Iwa tla aka niknawatia mawia, yawi. Iwa tla ok se niknawatia mawiki, wits. Noiwa tla se notlakewal niknawatia makichiwa itla, kichiwa.

¹⁰ Ijkuak Jesús okikak tlan okili n kapita, omotlajtlachialti iwa okinmili non iwa oyayah:

—De milajka nomechilia, amo nikkajsitika nion se tlakatl itech nochi n tlali de Israel, non satlawel manechneltoka kemi nin tlakatl nechneltoka. ¹¹ Ne nomechilia miakeh walewaskeh de kan ik kisa tonati iwa de kan ik kalaki tonati, iwa motlamajsewiskeh iwan Abraham, Isaac iwa Jacob ompa ilwikak kan Dios tlanawatia. ¹² Pero n tepilwah non ompa moneki yetoskiah, kinkixtiskah kala kan sentleyua, iwa ompa chokaskeh iwa tlanetsoniskah.

¹³ Ijkuakó Jesús okili n kapita:

—Ximokopa mocha, iwa mamochiwa kemi otikneltokak.
Iwa non ora itlakewal n kapita owalpajtik.

Jesús kipajtia imona n Pedro

(Mr. 1:29-31; Lc. 4:38-39)

¹⁴ Jesús oyá icha n Pedro, iwa ompa okajsito imona n Pedro wetok ika miak totonik.

¹⁵ Jesús okimakitiski, iwa n totonik okiski. San nima n siwatl omej iwa opé kitekichiwiilia.

Jesús kimpajtia miakeh kokoxkeh

(Mr. 1:32-34; Lc. 4:40-41)

¹⁶ Ijkuak otleyuak, okwalinwikilijkeh n Jesús miakeh non okimpiayah espíritus amokualtech. Iwa ika itlajto okinkixti n espíritus amokualtech iwa okimpajti nochteh non omokokoayah. ¹⁷ Ijkó otlamochi tlan okijkuilo n tiotlajto Isaías, ijkuak okijto: “Ye otechpajti de nochi tokokolis iwa de nochi tlan otechkokoaya.” *Is. 53:4*

Non kinekiah nemiskah iwan Jesús

(Lc. 9:57-62)

¹⁸ Ijkuak Jesús okitak miakeh tlakah okiyawalojtokah, okinnawati itlamachtijkawah makikojchalwikah n lago. ¹⁹ Pero se tlamachti omijkuani ixpa Jesús iwa okili:

—Tlamachti, nias mowa san kan ik tejwatsi tias.

²⁰ Jesús okinankili:

—N ostomeh mochantiah ijtk inkuyok, iwa n totomeh kipiah intepajsol, pero Ne Non onimochi ni tlakatl amo nikpia kan nimosewis.

²¹ Iwa seme de itlamachtijkawah okili:

—Noteko, achto techonkawili maniktooka nota.

²² Pero Jesús okili:

—Xiwiki nowa, iwa xikinkawa non miktokeh makintookakah inmikenwah.

Jesús kitlakawaltia n ejekatl iwa n atl

(Mr. 4:35-41; Lc. 8:22-25)

²³ Jesús iwa itlamachtijkawah otlejkokah itech barka iwa oyajkeh.

²⁴ San nima owala se ejekatl chikaktik iwa n atl opé motlatlawiteki itech barka iwa opé atemi. Pero Jesús okochtoka.

²⁵ Ijkuakó itlamachtijkawah okiixxitoh, iwa okilijkeh:

—¡Toteko, techmakixti! ¡Tiapolak tokeh!

²⁶ Ye okinmili:

—¿Tleka nonmomojtiah? ¡Wel achitsi nomotlaneltokalis!

Jesús owalmóketeki iwa okitlakawaltia n ejekatl iwa n atl, iwa san owaltlamoka.

²⁷ Omotlajtlachialtijkeh iwa okijtoayah:

—¡Akí nin tlakatl, porke asta n ejekatl iwa n atl kitlakitah!

Jesús kimpajtia ome tlakah non okimpiayah espíritus amokualtech

(Mr. 5:1-20, Lc. 8:26-39)

²⁸ Jesús okalakito inakastla n lago, itech tlalmeh de gadarenos. Ome tlakah non okimpiayah demóniojtech owalkiskah kan ik tooktokeh non yomikah iwa okinamikikoh.

Jejwah saikpanoa otemomojtiayah, yika amaka opanoaya itech neká ojtlí. ²⁹ Iwa opé tsajtsih:

—¿Tlan tikneki towah Jesús Tekone de Dios? ¿Otiwala otechtlaijowiltiko maya ayamó walajsi n iksemi tonati?

³⁰ Ik ompa okintlakualtijtokah sikimeh pitsomeh. ³¹ Iwa n espíritus amokualteh okitlat-lautijkeh n Jesús:

—Tla techkixtis, techtitlani inmijtik pitsomeh.

³² Ijkuakó Jesús okinmili:

—Xiwiah.

N espíritus amokualteh okiskeh iwa okalakeh inmijtik nekateh pitsomeh. Iwa n pitsomeh omokajkawatoh ijtik atl iwa omijmikeh.

³³ Non okintlakualtijtokah n pitsomeh ocholojkeh, iwa ijkuak okalakitoh kan altepetl opé tetlapowiah de nochi tlan otlamochi, iwa nekateh ome tlakah non okimpiayah espíritus amo kualteh. ³⁴ Ijkuakó nochteh n tlakah de Gadara okitatoh n Jesús, iwa ijkuak okitakeh, okitlatlautijkeh makinkajtewa intlalwah.

9

Jesús kipajtia se tlakatl non oikximijmiktoka

(Mr. 2:1-12; Lc. 5:17-26)

¹ Ijkuakó Jesús otlejkok itech se barka iwa okikojchalwi n lago, iwa owalmókopki kan altepetl de Capernaúm kan Ye ochantitoka. ² Sikimeh tlakah okiwalikiliayah se tlakatl n Jesús. Ye owetotiwalaya ipan ikochpetl porke oikximijmiktoka. Ijkuak Jesús okimitak kenijki otlaneltokayah nonteh tlakah, okili n kócoxki:

—Ximoyolchikawa nokone, motlajtlakolwah ya tlapojpolwitokeh.

³ Ijkuakó sikimeh non kitemachtiah itlanawatil Moisés okimolijkeh: “Kixpanawia Dios ika tlan okijto. Ye tlaajtoa kemi yetoskia Dios.” ⁴ Jesús okimatia tlan okimoliayah itech inyolo, yika okinmili:

—¿Tleka nonkimoliah tlan amo kuali itech nomoyolo? ⁵ ¿Tlan okachi amo owi se kijtos: “Motlajtlakolwah ya tlapojpolwitokeh”, noso: “Ximewa iwa xinejnemi”? ⁶ Pero xikmatikah, Ne Non onimochi ni tlakatl, nikpia tekiwajyotl itech nin tlahtípkaktli para nikintlapojpolwis intlajtlakolwah n tlakah.

Ijkuakó okili n tlakatl non oikximijmiktoka:

—Ximewa, xikajkokui mopetl iwa xio mocha.

⁷ N kócoxki owalmóketski iwa oyá icha. ⁸ Ijkuak n tlakah okitakeh ya nejnemi n kócoxki, omomojtijkeh iwa opé kiweyijkachiwah Dios, porke okinmák tekiwajyotl n tlakah.

Jesús kinotsa Mateo mayeto itlamachtijkau

(Mr. 2:13-17; Lc. 5:27-32)

⁹ Ijkuak Jesús yokistiaya de Capernaúm, okitak se tlakatl non itoka Mateo. Ye okololoaya impuesto para n tekiwa de Roma. Jesús okili:

—Xiwiki nowa.

Mateo owalmóketski, iwa oyá iwan Jesús.

¹⁰ Satepa, Jesús iwa itlamachtijkawah otlakuajtokah icha n Mateo. Miakeh tominoololokeh iwa oksikimeh tlahtlakolejkeh noiwa ompa otlakuajtokah inwah. ¹¹ Ijkuak sikimeh fariseos okitakeh n Jesús otlakuajtoka inwah, okinmilijkeh itlamachtijkawah:

—¿Tleka nomotlamachti tlakua iwan tominoololokeh iwan tlahtlakolejkeh?

¹² Jesús okinkak iwa okinmili:

—Akimeh amo mokokoah mach kinekih se tepajti, yej non mokokoah. ¹³ Xiwiah iwa kuali xikkajsikamatikah tlan kijtosneki itlajkuilol Dios: “Ne nikneki xiteiknomatikah iwa amo techinmiktilikah yolcameh.” Os. 6:6 Porke amo onikinnotsako n yolchipawakeh, yej n tlahtlakolejkeh para ayakmó matlajtlakolchiwahak.

Kitlajtlaniah n Jesús tleka sikimeh mosawah iwa oksikimeh amó

(Mr. 2:18-22; Lc. 5:33-39)

¹⁴ Ijkuakó itlamachtijkawah n Juan Bautista omijkuaniykeh inawak Jesús iwa okitlajtlani-jkeh:

—¿Tleka tejwah iwa n fariseos timosawah iwa motlamachtijkawah, amó?

¹⁵ Jesús okinmili:

—¿Kox weletis moyolkokojtoskeh itlatlalwilwah n novio ijkuak ye ok kajki inwah? Wits tonati ijkuak n novio ayakmó yetos inwah, ijkuakó mosawaskeh.

¹⁶ ¹ Amaka kitlamanilia se itlake non ya wewe ika se yankuik tsótsoli, porke n yankuik tsótsoli mokototsoa iwa kitsomonia n tlakemil non ya wewetsi, iwa okachi weyi tsononi.

¹⁷ Nion amaka kitlalia n yankuik vino itech se kuilambre ya wewetsi, porke tla ijkó nonkichiwah n kuilambre tsononis. Ijkuakó n vino toyawi iwa n kuilambre sa motlamotla. Yika, xiktalalikah n yankuik vino itech se yankuik kuilambre, ijkó san ken ome wejkawaskeh.

*Ichpoch n Jairo iwa n siwatl non okitelkoli itlake n Jesús
(Mr. 5:21-43; Lc. 8:40-56)*

¹⁸ Ijkuak Jesús ijkó okinmiliytoka n tlakah, owala se tlayákanki de se sinagoga,* omotlankuaketski ixpa n Jesús, iwa okili:

—Nochpoch tlamitsi omikki, pero tla tejwatsi tiwits nocha iwa tiktlalis moma ipa, moyolitis.

¹⁹ Jesús omóketski, Ye iwa itlamachtijkawah oyajkeh icha non tlayákanki.

²⁰ Ijkuakó se siwatl non yokipiaya májtaktli iwa n ome xiwitl kócoxki ika esmilawálistli, omijkuani ik ikuitlapan n Jesús iwa okitempantelkoli itlakeh. ²¹ N siwatl okimoliaya: “Tla san niktompantelkolis itlake, niwalpajtis.” ²² Jesús omókopki, okitak n siwatl iwa okili:

—Ximoyolchikawa nokone, motlaneltokalis omitspajti.

Itech non ora n siwatl opajtik.

²³ Ijkuak Jesús okalakito icha n tlayákanki, okinmitak n tlapitskeh, iwa non otetlajpalotoh sa tlawel omopajsolojtokah. ²⁴ Ijkuakó Jesús okinmili:

—Xikisakah, nin takotsi amo omikki, san kochtok.

N tlakah san okiwetskakeh n Jesús. ²⁵ Pero ijkuak Jesús okinkixti nochteh, okalak iwa okonmakitski n takotsi, iwa ye owalme. ²⁶ Iwa tlan otlamochi omoma itech nekateh talmeh.

Jesús kimpajtia ome tlakah non amo tlachiah

²⁷ Ijkuak Jesús okistiaya de ompa, ome tlakah non amo tlachiah okitokayah iwa okitsajtsilijtiayah:

—¡Techiknomati lkone n rey David!

²⁸ Ijkuak Jesús okalak itech kali, nonteh tlakah non amo otlachiyah okajsitoh. Jesús okintlajtlani:

—¿Nonkineltokah weletis nomechpajtis?

Yejwah okilijkeh:

—Ejé Tejwatsi.

²⁹ Ijkuakó Jesús okintelkoli inmixtololowah iwa okinmili:

—Mamochiwa ijkó kemi nomejwah nonkineltokah.

³⁰ Iwa yejwah owaltlachixkeh. Jesús kuali okinnajawati:

—Xikkakikah, amaka xikilikah.

³¹ Pero ijkuak owalkiskeh, opé sentetl tetlapowiah tlan Jesús okichi inwah.

Jesús kipajtia se tlakatl non amo tlajtoa

³² Ijkuak yejwah okistiayah, sikimeh tlakah okwalikilijkeh n Jesús se tlakatl non amo tlajtoaya. Ye okipiaya se espíritu amokuali. ³³ Ijkuak Jesús okikixti n espíritu amokuali, n tlakatl owaltlajto. N tlakah sa tlawel omotlajtlachialtijkeh iwa okimoliayah:

—Amayik ijkó motikah itech tlali de Israel.

³⁴ Pero n fariseos okijtoayah:

* 9:18 Sinagoga: se kali kan omoololoyah n judíojteh nochi sábadó

—Kinkixtia espíritus amokualteh ika itekiwajyo n amokualitlakatl.

Jesús kinmiknomati n tlakah

³⁵ Jesús onentinemia itech nochteh n wejweyi altepemeh iwa itech altepetsitsinteh iwa okinmacthiaya n tlakah itech insinagogas. Okitematiltiaya n kualitlájtol, iwa okimpajtiaya n tlakah de nochi inkokolis iwa inkualolis. ³⁶ Ijkuak Jesús okimitak n tlakah, okimiknoma ken sa tlawel osotlawatokah iwa oyetokah inselti kemi ichkameh non amo kipiah tlajpixki non kinyakanas. ³⁷ Ijkuakó okinmili itlamachtijkawah:

—Onkateh miakeh tlakah non moneki makikakikah notlajtol, pero amo onkateh miakeh tlakah akimeh moneki makitematiltikah notlajtol. Onka miak tekittl para mopixkas, pero amo onkateh miakeh akimeh pixkaskeh. ³⁸ Yika, xiktlahtlanilikah Dios n Tekowa de kan se pixkas, makintitlani miakeh tekitkeh para mapixkakah.

10

Jesús kimpejpena májtlaktli iwa n ome itlamachtijkawah

(Mr. 3:13-19; Lc. 6:12-16)

¹ Jesús okinnotski májtlaktli iwa n ome (12) itlamachtijkawah iwa okinmák tekiwajyotl para makinkixtikah espíritus amokualteh iwa para makimpajtikah n tlakah de nochi kokólistli iwa kualólistli. ² Yejwah ninteh intokah n májtlaktli iwa ome itlamachtijkawah. Ahto okínotski n

Simón non noiwa itoka Pedro
iwa ikni Andrés,
Jacobo itelpoch Zebedeo
iwa ikni Juan,

³ Felipe,
Bartolomé,
Tomás,
Mateo n tominoololo,
Jacobo ipiltsi n Alfeo,
Tadeo,

⁴ Simón, non tewa Kananista, iwa Judas Iscariote non satepa okitemakti n Jesús.

Jesús kintitlani itlamachtijkawah

(Mr. 6:7-13; Lc. 9:1-6)

⁵ Jesús okintitlanki ninteh májtlaktli iwa ome itlamachtijkawah iwa okinnajawati:

—Amo xiwiah kan amo judfojteh, nion xikalakikah kan altepemeh de Samaria. ⁶ Sanwel xikintemojtiwiah n tlakah de Israel non moixpolojtinemih kemi ichkameh. ⁷ Xiwiah, iwa xikinmatiltijtiwiah yoajsiko n tonati ijkuak Dios pewas nomechnawatis. ⁸ Xikimpajtikah n kokoxkeh, xikinyolitikah non yomikkeh, xikinchipawakah akimeh kipiah lepra, iwa xikinkixtikah espíritus amokualteh. San ijki ononkiselijkeh, san ijki xiktemakakah.

⁹ Amo xikwikakah tomi, ¹⁰ nion nomotlaxkal. Sanwel se nomotlakah xikwikakah. Amo xikinwikakah oksikimeh nomokakkuah, nion nomobasto, porke akin tekiti kimotlanilia itlakual.

¹¹ Ijkuak nonkalakitiweh itech se weyi altepetl noso altepetsintli, xiktemokah aka kuali tlakatl non manomechyekseli icha. Ompa ximokalotjtokah asta ijkuak nonyaskeh ok se altepetl. ¹² Iwa ijkuak nonkalakiskah itech se kali, xontetlajpalokah. ¹³ Tla n chanejkeh nomechyekseliyah, kiseliskah nomoyowsewili, pero tla amo nomechyekseliyah, nomoyowsewili mokopas nomowah. ¹⁴ Iwa tla amo nomechseliyah nion kikakah nomotlajtol, xikisakah de non kali noso de non altepetl iwa ximoixxitsejtselokah. ¹⁵ De milajka nomechilia, itech iksemi tonati, Dios okachi kitlajiyowiltis non altepetl ke non ochantitokah itech altepemeh de Sodoma iwa Gomorra.

Non kineltokah Dios kintlawelilah

(Mr. 13:9-13; Lc. 21:12-19)

¹⁶ ¡Techkakah! Ne nomechtitlani kemi ichkameh intsalko kokoyomeh. Quali xi-
ijsatokah kemi koameh pero noiwa xiyetokah non yolyamankeh kemi palomajtsitsinteh.
¹⁷ Quali ximotlachilikah, porke n tlakah nomechtemaktiskeh innak tekiwajkeh, iwa
nomechtsonwitekiskeh kan sinagogas. ¹⁸ Por non nechneltokah, nomechkawatiweh ixpa
n wejweyi tekiwajkeh iwan wejweyi tlanawatijkeh. Ijkó nomejwah nonkitetlapowiskeh
notlajtol inmixpah, iwa inmixpa non amo judfojteh. ¹⁹ Pero ijkuak nomechtemakaskeh
innak tekiwajkeh, amo ximotekipachokah tlan nontlajtoskeh noso tlan nonkijtoskeh.
Porke itech non ora Dios momechilis tlan nonkijtoskeh. ²⁰ Amo nomejwah nontlajtoskeh,
vej lespiritu Nomotajtsi akin tlajtos nomotech.

²¹ 'N teikni kitemaktis ikni makimiktikah, iwa n teta kitemaktis ikone makimiktikah.
N tepilwah kinmixnamikiskeh intajwah iwa kintemaktiskeh makinmiktikah. ²² Nochteh
nomechkokoliskeh por nonkitematiltiah Notoka, pero akin kixikos nochi, Dios kimaxitis.
²³ Ijkuak nomechtotojtokaskeh itech se altepetl, xicholokah iwa xiwiah kan ok se. De
milajka nomechilia: mach tlamis nonpapanotinemiskeh itech nochteh n altepemeh de
Israel, porke achto nikalakiki Ne Non onimochi ni tlakatl.

²⁴ 'Se momachti amo kixpanawia itlamachti iwa se tlakéwali amo kixpanawia iteko. ²⁵ Se
momachti yolpaki ijkuak motlami kemi itemachti, iwa n tlakéwali kemi iteko. Tla itech se
kali, n teta kitokayotiah beelzebú, ¡noiwa ichantlakawah ijko kinnotsaskeh!

Akin moneki tikmawiliskeh

(Lc. 12:2-9)

²⁶ 'Yika, amo xikinmawilikah n tlakah. Porke nochi tlan tlatitok satepa nesis, iwa nochi
tlan amo momati saman momatis. ²⁷ Tlan nomechilia de yuak, nomejwah xiktematiltikah
ijkuak tlanestok. Iwa tlan Ne nomechilia ichtaka, xiktematiltikah chikawak. ²⁸ Amo
xikinmawilikah akimeh weletis nomechmiktiskeh, porke maya manomechmiktikah,
mach weletis kixpoloskeh nomoalma. Vej xikiimakajisikah Dios Akin weletis kixpolos
nomokuero iwa nomoalma kan miktla.

²⁹ 'Omeh tototsitsinteh monamakah ika se tomi, pero nion se de yejwah weleti wetsi ixko
tlali tla Totajtsi Dios amo kitekawilia. ³⁰ Noiwa Dios quali kimatok kech tsónkali nonkipiah
itech nomotsonteko. ³¹ Yika, amo ximomojtikah, porke nomejwah okachi nomopatih ke
miakeh tototsitsinteh.

Moneki se matlajto de Cristo teixpa

(Lc. 12:8-9)

³² 'Tla aka kijtos inmixpa n tlakah, Ne Iteko, Ne noiwa nikijtos ye noaxka ixpa n Notajtsi
non kajki ilwikak. ³³ Iwa tla aka kijtos teixpa, amo nechixmati, Ne noiwa nikijtos ixpan
Notajtsi non kajki ilwikak amo nikixmati.

N tlakah moxeloskeh por Cristo Jesús

(Lc. 12:51-53; 14:26-27)

³⁴ 'Amo xikmolikah Ne onikwalík yolsekilistli. Amó, vej Ne onikwalík tlanetéwili. ³⁵ Ne
oniwala para n tepiltsi kixnamikis ita, n teichpoch kixnamikis ina, iwa n montli kixnamikis
imona. ³⁶ Nomokokolikniwah yetoskeh non chanchiwh nomowah. *Miq. 7:6*

³⁷ 'Akin kitlasojtla ita noso ina okachi ke Ne, amo makimoli nika iwa. Iwa akin kitlasojtla
ipiltsi noso ichpoch okachi ke Ne, amo makimoli nika iwa. ³⁸ Iwa akin amo kinekis kiselis
tlaijyowilistli itech inemilis iwa amo kinekis nowan yas,* mach keman yetos noaxka.
³⁹ Akin kimalwia inemilis kixpolos, pero akin kipolos inemilis por nechneltoka, kajsis n
milájka nemilistli.

Tlatliokólitel

(Mr. 9:41)

⁴⁰ 'Akin nomejwah nomechselia, Ne nechselia, iwa akin Ne nechselia, noiwa kiselia Akin
onechaltflanki. ⁴¹ Akin kiselia se tiotlajto, kiselis itlatliokolil kemi non kiselia n tiotlajto.
Iwa akin kiselia se tlakatl non kichiwa tlan Dios kineki, kiselis itlatliokolil kemi ye. ⁴² Iwa

* 10:38 N griego kijtoa: Xikonana mokrus iwa xiwiki nowa.

akin kitliokolis maya san siki atl, seme de ninteh notlamachtijkawah tsitsikitikeh, de milajka nomechilia amo kipolos itlatliokolil.

11

Juan Bautista kintitlani ome itlamachtijkawah kan Jesús

(Lc. 7:18-35)

¹Ijkuak Jesús yokinnajawati tlan kichiwaskiah n májtłaktli iwa ome itlamachtijkawah, oyajki de ompa. Iwa kan okalakito opé tetlapowia de itlajtol Dios itech nonteh altepemeh.

²Ijkuak Juan otsaktoka, okima tlan okichiwaya n Cristo iwa okintítłanki ome itlamachtijkawah. ³Iwa okitlajtlanitoh:

—¿Tejwatsi non tiwalaskia, noso tikchiaskeh ok se?

⁴Jesús otlanankili:

—Xiwich iwa xikilikah n Juan nochi tlan nonkitah iwa nonkikakih. ⁵Xikilikah,

non amo tlachiah ya tlachiah,

n koxomeh, ya kuali nejnemih

iwa non okipayah lepra, yochipawakeh.

Non amo otlakakiah, ya tlakakih,

non omikkeh, yomoyolitijkeh,

iwa n próbesteh kinmatiltiah n kualitłájtoli de Dios.

⁶Miak pakłistli kypias non kimawistetepewa por Ne.

⁷Ijkuak itlamachtijkawah n Juan oyajkeh, Jesús okintłapowi de Juan non ompa okatkah, iwa okinmili:

—¿Tlan ononkitatoh kan amaka chanti? ¿Se akatl non kolinia n ejekatł? ⁸¿Tlan para ononyajkeh? ¿Ononkitatoh se tlakatl non okonakiaya itlake non kuali? Nomejwah kuali nonkimatokeh, n tlakah non konakiah kuali intlakeh kateh incha n reyes. ⁹Pero ¿tleka ononkiskeh? ¿Ononkitatoh se tiotłajto? Milák, ye okachi weyi ke se tiotłajto. ¹⁰Itlajkuilol Dios tlajtoa de Juan ijkuak kijtoa:

Ne niktitlani notlatematilti sa matlayakana,

para mamitsmajmanili n ojtli.

Mal. 3:1

¹¹De milajka nomechilia asta axa itech nin tlaltłkpkaktli amo onka ok se tlakatl kemi Juan Bautista. Pero non okachi tsijtsikitsi non kajki ilwikak kan Dios tlanawatia, ye okachi weyi ke Juan.

¹²Ijkuak owala Juan Bautista iwa asta axa, itlajtol Dios chikawak nejntok itech nin tlali. Iwa non okachi mochijchikawah yejwah kalakih kan Dios tlanawatia. ¹³Nochteh n profetas iwa itlajkuilol Dios otlajtojkeh de Juan. ¹⁴Iwa tla nonkinekih nonkineltokaskeh, Juan ye n profeta Elías non walaskia.

Mal. 4:5

¹⁵¡Akin de milajka kipia inakas, makajsikamati!

¹⁶Nomejwah axa nonnemih kemi n pípilteh non motlaliah iwa nonmawiltiah tiánkistli, iwa kintsajtsiliah oksikimeh, ¹⁷iwa kinmiliah: “Otomachtłapichilijkeh iwa amo ononmijtotijkeh. Otomechtłakuikilijkeh se tlakuikali teyolkoko iwa amo ononchokakeh.” ¹⁸Porke owala Juan, non amo otlakuaya nion okonia vino, iwa nomejwah ononkijtojkeh kipia se espíritu amokuali. ¹⁹Otlanki Ne oniwala Non onimochi ni tlakatl. Ne nitlakua iwa nikoni vino iwa nomejwah nonkijtoah tlawel niáplastli iwa nitłáwanki. Noiwa nonkijtoah nimowika iwan tlajtlakolejkeh iwa n tominoolojkeh. Pero ixtlamatilis Dios moixmati ika tlan kichiwah ipilwah akimeh kitlakitah.

¡Non miálmasteh!

(Lc. 10:13-15)

²⁰Ijkuakó Jesús opé kinmajwa n tlakah non ochantitokah itech altepemeh kan okinchi miakeh milagros. Porke n tlakah non ompa ochantitokah mach omoyolpatlayah inawak Dios.

²¹—¡Miálmasteh tlakah de altepetł de Corazín! ¡Nonpróbesteh tlakah de Betsaida! Tla n milagros non omochijkeh nomonawak mochiwaskiah itech altepemeh de Tiro iwa

Sidón, yowejka moyolpatlaskiah, iwa nonmotlakentiskiah ika nomotlakeh wapaktik iwa nonmokuatlekonexwiskiah. ²² Pero ijkuak ajsiki n iksemi tonati ijkuak Dios kintlajtlakoltis, nomejwah tlakah de Corazín iwa Betsaida, okachi nontlajiyowiskeh ke non de Tiro iwa Sidón. ²³ Iwa nomejwah tlakah de Capernaúm, ¿non kimoliah nonyaskeh ilwikak? ¿Sanenka! Nomejwah nonyaskeh miktla. Porke tla kan altepetl de Sodoma mochiwaskiah n milagros non omochijkeh nomonawak, non weyi altepetl asta axa yetoskia. ²⁴ Pero Ne nomechilia, ijkuak kalakiki n iksemi tonati ijkuak Dios kintlajiyowiltis, nomejwah tlakah de Capernaúm okachi nomechtlajiyowiltiskeh ke n tlakah de Sodoma.

Xiwikih nonawak iwa ximosewikah
(Lc. 10:21-22)

²⁵ Non tonati, Jesús okijto:

—Tlasojkamati miak Notajtsi, Tejwatsi Ti Tekowa de ilwikak iwa de nin tlaltíkpaktli, porke nochi ni otikintlaatili n ixtlamatkeh iwan teajsikamatkeh iwa otikinnextili non tsitsikitiheh. ²⁶ Ijkó Notajtsi, ijkó Tejwatsi satlawel omitspakti.

²⁷ ¹Notajtsi yonechmaktili maniknawati nochi tlan onka. Amaka nechixmati kemi ikone Dios, sanwel Notajtsi. Nion amaka kixmati Notajtsi, sanwel Ne iwa nekateh tlakah akimeh Ne nikneki makixmatikah. ²⁸ Xiwikih nonawak nonnochteh akimeh tekitiheh chikawak iwa yononsotlawakeh, iwa Ne nomechsewis. ²⁹ Xikwikakah notlamamal, iwa xikchiwakah tlan Ne nikchiwa, porke Ne niyolyámanki iwa niteiknoma. Iwa nonkajsiskeh yolsewílistli itech nomoyolo. ³⁰ Porke n tekitl non Ne nikneki xikchiwakah amo owi se kitlakitas, iwa tlan Ne nomechnawatia, noiwa amo tesotla.

12

Itlamachtijkawah n Jesús miawatekih itech sábadó ijkuak mosewia n judíos
(Mr. 2:23-28; Lc. 6:1-5)

¹ Se sábadó ijkuak mosewia n judíos, Jesús iwa itlamachtijkawah opajpanotiyah kan ik tlatooktok. Itlamachtijkawah owalxitlatlakeh iwa opé miawatekih, okoxkeh n xinatsintli iwa opé kikuah. ² Ijkuak n fariseos okimitakeh, okilijkeh n Jesús:

—Xikinmita, motlamachtijkawah kichijtokeh tlan amo techkawilia totlanawatil matchiwakah itech sábadó.

³ Pero Jesús okinmili:

—¿Ayamó nonkiamapoaheh tlan okichi n rey David keman owalxitlatlak ye iwa non oyayah íwa? ⁴ Okalakeh ikal Dios, iwa David iwa non iwa oyayah okinkuajkeh n pameh tlatiochíwalteh non okinmanilijkah Dios. Nonteh pameh mach para kinkuaskia yejwah, yej sanwel n tiopixkeh. ⁵ ¿Noso ayamó nonkiamapoaheh tlan kijtoa itlanawatil Moisés, n tiopixkeh noiwa itech nochi sábadó ijkuak moneki se mamosewi, tekitiheh kan Weyi Tiopa? Yejwah mach mosewiah non tonati, iwa maya tekitiheh, amo kichiwah tlajtlákoli. ⁶ Pero Ne nomechilia, axa nika nika Ne Non okachi niweyijkatitok ke n Weyi Tiopa. ⁷ Nomejwah amo nonkajsikamatih tlan kijtosneki itlajkuilol Dios: “Ne nikneki xiteiknomatikah iwa amo san xipewakah technimiktilikah yolkameh.” Os. 6:6 Amo nonkintlajtlakoltiskiah non amo tlajtlakolejkeh. ⁸ Quali xikmatikah Ne Non onimochi ni tlakatl nitlanawatia itech sábadó.

Jesús kipajtia se tlakatl non omapitswak
(Mr. 3:1-6; Lc. 6:6-11)

⁹ Jesús oyá de ompa iwa okalakito kan se sinagoga. ¹⁰ Ompa okatka se tlakatl non omapitswak, iwa kemi n fariseos okitlajtoltemoliayah n Jesús para ika weletis kiteiliskeh, okitlajtlanijkeh:

—¿Motekawilia mamotepajti itech n sábadó ijkuak moneki se mamosewi?

¹¹ Jesús okinnankili:

* 12:4 pameh tlatiochíwalteh: Nochi sábadó n tiopixkeh okinkuayah n pameh non otlaatitokah itech Weyi Tiopa iwa okintlaliyah oksikimeh yankuikah.

—Tla aka de nomejwah kipia se ichka non moposojwia itech sábadó, ¿amo konkixtia?
¹²¡Okachi ipati se tlakatl ke se ichka! Yika, tejwah kema weletis tikchiwaskeh tlan kuali ipan sábadó.

¹³Ijkuakó Jesús okili n tlakatl:

—Xikmilawa moma.

Iwa ijkuak okimila ima, opajtik iwa omoka kuali kemi non ok se ima. ¹⁴N fariseos okiskeh iwa opé motlatlalwiah para kipojpoloskeh n Jesús.

Dios kipejpena n Jesús

¹⁵Ijkuak Jesús okima tlan okinekiah kitoktiskeh, oyá de ompa, iwa miakeh tlakah oyajkeh iwa. Jesús okimpajtiaya nochteh non omokokoayah, ¹⁶iwa okinnajawatiaya amo makijtokah Akin Ye. ¹⁷Ijkó otlamochi kemi okijkuilo n tiotlajto Isafas:

¹⁸Nika kajki notékিপano Akin Ne onkípéjpenki,
 notlasoj Akin kiyolpaktia noalma.

Niktalís Noespíritu itech Ye,
 iwa Ye kinmatiltis nochteh n tlaltikpaktlakah kenijki kipiah de yeknemiskeh.

¹⁹Amo mokualanijtos nion tsatsajtsis,
 nion amaka kikakis itlajtol itech ojtli.

²⁰Nion se akatl non yoxámanki kipostekis,
 iwa n tláwili non san achitsi xotlatok, amo kisewis,
 asta mamochiwa nochi tlan kuali kemi Ye kineki.

²¹Iwa itech Itoka, nochteh non amo judfojtech inawak moyolchikajtoskeh. Is. 42:1-4

Kiteiliah n Jesús iweletilis walewatok de beelzebú

(Mr. 3:19-30; Lc. 11:14-23; 12:10)

²²Ijkuakó okwalikilijkeh n Jesús se tlakatl non amo otlachiaya nion otlajtoaya iwa okipiaya se espíritu amokuali. Jesús okipajti, iwa n tlakatl owaltláchixki iwa owaltlajto.

²³Nochteh n tlakah omotlajtlachialtijkeh iwa okijtoayah:

—¿Yetos ni, ikone n rey David?

²⁴Keman n fariseos ijko okikakeh, okijtojkeh:

—Nin tlakatl kinkixtia n espíritus amokualteh ika iweletilis beelzebú, non kinnawatia n espíritus amokualteh.

²⁵Jesús okimatia tlan yejwah okimoliayah, yika okinmili:

—Tla n tlakah de se país pewas momijmiktiskeh san yejwah, non país pojpoliwis. Iwa tla se altepetl noso se familia noiwa pewa moxexeloa, sa nima xitinis. ²⁶Ijko noiwa, tla satanás iselti kinkixtijtok n espíritus amokualteh, san ye inewia moixnamiki iwa san nima pojpoliwis. ²⁷Tla nomejwah nonkijtoah Ne nikinkixtia espíritus amokualteh ika iweletilis beelzebú, ¿akin kinmaka weletlistli nomotlamachtijkawah ijkuak kinkixtiah espíritus amokualteh? Yika, yejwah makijtokah kox milák noso amo milák tlan nomejwah nonkijtoah. ²⁸Pero tla Ne nikinkixtia n espíritus amokualteh ika iweletilis Iespíritu Dios, noni kijosneki Dios yopé tlanawatia nomonawak.

²⁹¿Weletis aka kalakis icha n se tlakatl non chikaktik iwa kixixtilis tlan kipia? Sanwel tla achto kijlipia, ijkuakó ya weletis kitlachtekis.

³⁰¡Akin amo kajki nowa, nechixnamiki. Iwa akin amo nowa pixka, tlaxixititsa.

³¹Yika nomechilia, Dios nomechintlapojpolwilis nochteh nomotlajtlakolwah iwa nochi tlan fiero nonkijoskeh. Pero akin fiero kitenewas n Espíritu, Dios ayik kitlapojpolwis.

³²Iwa akin fiero nechtenewa Ne Non onimochi ni tlakatl, kitlapojpolwiskeh, pero akin fiero kitenewas n Espíritu Santo, ayik kitlapojpolwiskeh, nion axa, nion satepa.

Se kuawitl moixmati ika tlan kitemaka

(Lc. 6:43-45)

³³Se kuali kuawitl kitemaka kuali itlakilo, tla n kuawitl amo kuali, noiwa kitemaka itlakilo amo kuali. Nochi kuawitl moixmati ika tlan kitemaka. ³⁴¡Nomejwah nonkichiawah ken koameh! ¿Kenomi weletis nonkijoskeh tlan kuali, tla nomejwah amo non kualteh? Porke tlan kitemitijtok toyolo ye tlan tikijtoah. ³⁵Se kuali tlakatl kixixtia tlan kuali

kitlaatitok itech iyolo. Pero n tlakatl amo kuali, kikixtia tlan amo kuali kitlaatitok itech iyolo. ³⁶Ne nomechilia, itech iksemi tonati, ijkuak Dios tlaixkomakas, nochteh nomejwah nonkimokuitiskeh nochi tlájtoli tlan amo kuali ononkijtojkeh. ³⁷Porke ika tlan tikijtoa mitstlajtlakolmakaskeh, iwa kijtoskeh kox titlajtlakole noso amó.

Kitlajtlaniliah Jesús se milagro

(Mr. 8:11-12; Lc. 11:29-32)

³⁸Ijkuakó sikimeh tlamachtijkeh iwa n fariseos okilijkeh n Jesús:

—Tlamachtí, tiknekih tikitaskes se milagro.

³⁹Jesús okinnankili:

—N tlakah tlajtlakolchijkeh kitlajtlanih se milagro. Pero mach ok nikinmititis ok se, sanwel tlan yopanok n profeta Jonás. ⁴⁰Iwa ijko kemi Jonás okatka eyi tonati iwa eyi yúali ijtik se weyi michi, noiwa Ne Non onimochi ni tlakatl, niyetos eyi tonati iwa eyi yúali ijtik tlali. ⁴¹N tlakah non ochantitokah Nínive moyolitiskeh itech iksemi tonati, iwa nomechtlajtlakoltiskeh porke yejwah okikajkeh n Jonás iwa omoyolpatlakeh ijkuak okinmatilti itlajtol Dios. Axa Ne Non nika nika, okachi weyi ke Jonás. ⁴²Noiwa n reina non walewatok kan tlali de Sabá moketsas itech iksemi tonati iwa nomechtlajtlakoltis, porke wejka owalewak okikakiko n Salomón, non satlawel ixtlamati, pero nika ka se non okachi weyi ke Salomón.

N espíritu amokuali non walmokopa

(Lc. 11:24-26)

⁴³Ijkuak se espíritu amokuali kisa ijtik se tlakatl, nentinemi kan tlawakah kitemojtinemi kan mosewis, iwa ken amo kajsí ⁴⁴kimolia: “Nimokopas oksepa itech neká tlakatl kan oníkisi.” Iwa ijkuak mokopa, konajsi n tlakatl kemi se kali kan amaka chanchiwa, kuali ichpantok iwa tlaajachitok. ⁴⁵Satapa yawi kualinnotsati chikome espíritu non okachi amokualteh, iwa nochteh kalakih ijtik non tlakatl iwa mochantiah. Satapa non tlakatl mokopa okachi amokuali. Ijko mochiwaskeh n tlajtlakolejkeh non axa nentinemih.

Imamá iwa ikniwah n Jesús

(Mr. 3:31-35; Lc. 8:19-21)

⁴⁶Jesús ok okintlapowijtoka n tlakah, imamá iwan ikniwah oajsito kan Ye okatka pero omokajkeh kala, porke okinekiah motlapowiskeh íwa. ⁴⁷Ijkuakó se tlakatl okilito:

—Jesús, momamá iwa mokniwah kateh kala iwa kinekih motlapowiskeh mowa. Mt. 13:55

⁴⁸Pero Jesús okinankili:

—¿Akin nomamá, iwa akimeh nokniwah?

⁴⁹Okinmajpilwi itlamachtijkawah iwa okijto:

—Yejwah ninteh nomamá iwa nokniwah. ⁵⁰Akin kichiwa tlan kimonekiltia Notajtsi Dios non kaji ilwikak, ye nokni, nowelti iwa nomamá.

13

Se tlakatl non otook

(Mr. 4:1-9; Lc. 8:4-8)

¹Non tonati Jesús okiski kan okalotitoka iwa omotlalito itempa n lago. ²Ken miaktikeh omooolojkeh, Jesús omonek tlejkos ipan se barka iwa omotlali, iwa nochteh n tlakah omokajkeh itempa n lago. ³Jesús opé kinmacthia ika tlapoálisteh, iwa okinmiliaya:

—Se tlakatl oyá iwa otook. ⁴Ijkuak otook, siki xínachtli owetski ojtentli, iwa owalajkeh n totomeh iwa okikuajkeh. ⁵Oksiki owetski kan tlateyo, kan san pánixko okipiaya tlali. Non xínachtli sa nima oixwak porke n tlali amo tilawak. ⁶Pero ijkuak okiski n tonati, okuitlawik, iwa ken amo wejkatla omonelwayoti, owaki. ⁷Oksiki owetski kan tlawitstla, omoskalti n witstli iwa n tlátoktli oijyomik. ⁸Pero siki xínachtli owetski kan kuali tlali, iwa kuali otlaaki. Siki tlátoktli okitemák se sientos, oksiki eyi póali (60), iwa oksiki sempóali iwa n májtlaktli (30) por se xínachtli. ⁹Akin pipia inakas, makajsikamati.

Jesús kinmilia tleka ijko tlamachtia

(Mr. 4:10-12; Lc. 8:9-10)

¹⁰ Ijkuakó itlamachtijkawah n Jesús omijkuanijkeh inawak, iwa okitlajtlanijkeh:

—¿Tleka tikintlapowia n tlakah ika tlapoálistli?

¹¹ Jesús okinnankili:

—Dios nomechkawilia xikmatikah kenomi tlanawatia kan ilwikak, pero n oksikimeh amo kinkawilia makimatikah. ¹² Yika, akin kipia okachi, okachi kimakaskeh, iwa akin amitla kipia, nochi kikixtiliskeh. ¹³ Yika, Ne nikitlapowia ika tlapoálisteh, porke maya tlachiah amo kitah, iwa maya tlakakih amo kikakih nion kajsikamatih. Ez. 12:2 ¹⁴ Yika, intech mochiwa tlan okijto n profeta Isaías:

Maya miak matlakakikah, amo kajsikamatiskeh;

maya kuali matlachiakah amitla kajsiskeh.

¹⁵ Porke ninteh tlakah oyoltlakuawakeh, omonakastsajtsakeh para amo tlakakiskeh,

iwa okintsajtsakeh inmixtololowah

para amo matlachiakah

nion matlakakikah ika innakaswah,

nion kajsikamatih ika inyolo,

para moyolpatlaskeh nonawak

iwa manikimpajti.

Is. 6:9-10

¹⁶ Mapakikah nomoixtololowah porke tlachiah, mapakikah nomonakaswah porke tlakakih. ¹⁷ De milajka nomechilia, miakeh profetas iwa tlakah yolchipawakeh okinekia kitaskeh tlan axa nomejwah nonkitah, iwa amo okitakeh. Okinekia kikakiskeh tlan axa nonkikakih, iwa amo okikakeh.

Jesús kinmajsikamatilia kewan se tooka

(Mr. 4:13-20; Lc. 8:11-15)

¹⁸ Kuali xikkakikah tlan kijtosneki ijkuak otook se tlakatl. ¹⁹ Akimeh kikakih itlajtol Dios iwa amo kajsikamatih, nonteh kemi n xínachtli non owetski itempa ojtli, wits n diablo iwa kinkixtilia itlajtol Dios non omotook itech inyolo. ²⁰ N xínachtli non owetski intsalko temeh, yejwah non kikakih itlajtol Dios iwa sa nima kiseliah ika miak pakílistli. ²¹ Pero ken amo omonelwayoti, amo tlaxikoah. Ijkuak pewah tlaijyowiah noso kintotojtokah por okiselijkeh itlajtol Dios, walmosotlawah iwa kikawah. ²² N xínachtli non owetski kan tlawitsla, kijtosneki non kikakih itlajtol Dios, pero okachi kintekipachoa tlan onka itech nin tlaltikpaktili iwa n tomi pewa kinmixkajkayawa. Nochi ni kijyomiktia itlajtol Dios iwa ayakmó kikawilia matlaaki. ²³ Pero n xínachtli non omotook itech kuali tlali, noni kijtosneki akin kikakih itlajtol Dios iwa kajsikamatih, iwa miak tlaakih. Siki xínachtli kitemaka mákuili poali (100) xínachtli, oksiki eyi póali (60), iwa oksikimeh kitemakah sempóali iwa n májtlaktli (30), por se xínachtli.

N sasaliksakatl non moskaltia itsalko tlátoktli

²⁴ Jesús okinmili ok se tlapoálistli:

—Ijko noiwa tlamochiwa ilwikak kan Dios tlanawatia, kemi se tlakatl non okitook itlala kuali xínachtli. ²⁵ Pero ijkuak itlakawah okochtokah, owala se tlakatl non okikokoliaya n tekowa, iwa okitookili sasaliksakatl itsajtsalko n trigo, iwa ocholo. ²⁶ Ijkuak n tlátoktli omoskalti iwa omiawatik n trigo, noiwa omoskalti miak sasaliksakatl. ²⁷ Ijkuakó itlakawah okilitoh n tekowa: “Tejwatsi otikontook kuali xínachtli motlala. ¿kan ik okiski n sasaliksakatl?” ²⁸ N tekowa okinmili: “Se tlakatl non nechkokolia ijki okichi.” Ijkuakó itlakawah okilijkeh: “¿Tikneki matikwiwitlatih n sasaliksakatl?” ²⁹ Pero inteko okinmili: “Amó, porke tla nonkiwiwitlaskeh n sasaliksakatl, weletis noiwa nonkiwiwitlaskeh notrigo. ³⁰ Okachi kuali xikkawakah mamoskaltikah sansikah asta ijkuak motlatekis. Ijkuakó nikinnawatis n tlatekeh: “Acho xikololokah n sasaliksakatl, xikijilpikah para mochichinos; iwa n trigo kuali mamotlaati.”

Se xinatsintli de mostaza
(Mr. 4:30-32, Lc. 13:18-19)

³¹Jesús noiwa okinnmili ok se tlapoálistli:

—Itech ilwikak kan Dios tlanawatia, noiwa kemi se xinatsintli de mostaza non se tlakatl okitook itlala. ³²Nin xinatsintli ye n okachi tsijtsikitsi itech nochteh n xínachteh, pero ijkuak moskaltia, okachi weyi ke se tlátookali, iwa motlami kemi se kuawitl iwa n tototsintsinteh motepajsoaltiah itech.

N levadura
(Lc. 13:20-21)

³³Jesús okinnmili ok se tlapoálistli:

—Kan Dios tlanawatia noiwa kemi n levadura non se siwatl okinenelo ika eyi tlatamachíwali* arina, iwa kualtsi okisama nochi n textli. 1 Co. 5:6

Jesús okijto tleka otlamachiya ika tlapoálisteh
(Mr. 4:33-34)

³⁴Nochi ni Jesús okintlapowiaya n tlakah ika tlapoálisteh, iwa tla amo ika tlapoálisteh, amo okintlapowiaya. ³⁵Ijkó omochi tlan okijkuilo n profeta:

Nitlajtos ika tlapoálisteh,

niktematiltis tlan amaka okimatia desde ijkuak Dios okichijchi n tlatlákaptli. Sal. 78:2

Tlan kijtosneki itlapoalis n sasaliksakatl

³⁶Jesús okinnmakah nochteh non ompa okatkah. Ijkuakó okalak itech kali iwa sanima omijkuanjkech itlamachtijkawah iwa okilijkeh:

—Techajsikamatiltih tlan kijtosneki itlapoalis n sasaliksakatl.

³⁷Ijkuakó Jesús okinnankili:

—Ne Non onimochi ni tlakatl, Ne onitook n kuali xínachtli. ³⁸N tetlala ye n tlatlákaptli. N kuali xínachtli kijtosneki yejwah iaxkawah Dios, iwa n sasaliksakatl, yejwah ipilwah n diablo. ³⁹Non tekokolía ye n diablo akin okitook n sasaliksakatl. N tlapixkalo kijtosneki n iksemi tonati. Iwa akimeh tlatekiskech yejwah n ángelteh. ⁴⁰Yika, ijko kemi mowiwitla n xiwitl non amo kuali iwa mochichino, ijko tlamochiwas ijkuak tlamis nin tlatlákaptli. ⁴¹Ne Non onimochi ni tlakatl nikintitlanis noangelwah, iwa kinmoololokiwah kan kateh noaxkawah akimeh kichiwah tlajtlákoli iwa akimeh kintoktia oksikimeh makichiawah noiwah. ⁴²Iwa kinkajkawaskeh ijtk tletl kan chokaskeh iwa tlanetsoniskeh. ⁴³Ijkuakó non yolchipawakeh, tsotlaniskeh kemi n tonati ompa kan tlanawatia Totajtsi. ¡Akin kipia inakas, makajsikamati!

N tomi non tlapachitok

⁴⁴Itech ilwikak kan Dios tlanawatia, noiwa kemi se xoktsi non kipia tomi non tlapachitok tetlala. Ijkuak se tlakatl konajsi non tomi oksepa kitlaatia, iwa ika miak pakilistli yawi kinamaka nochi tlan kipia iwa kiko n tlali kan okajsik non xoktsi.

N perla non miak ipati

⁴⁵Noiwa itech ilwikak kan Dios tlanawatia kemi se tlasémanki non kintemojtinemi perlas non patiojkeh, ⁴⁶iwa ijkuak kajsi se perla non patio, motlanajnamakia iwa kiko n perla.

N michayatl

⁴⁷Noiwa itech ilwikak kan Dios tlanawatia kemi se michayatl non michmajkeh kontlamotlah ijtk atl iwa kinmoololoa nochi michimeh. ⁴⁸Ijkuak n michayatl yotenki, n michmajkeh kikixtiah itempa n atl iwa pewa kimpajpenah n michimeh. Non kualteh michimeh konintlaliah ijtk chikimeh, iwa non amo kualteh kintlamotlah. ⁴⁹Ijko tlamochiwas ijkuak ajtsiki n iksemi tonati. Kiskaskeh iangelwah Dios iwa kinxexeloskeh n tlajtlakolejkeh iwan

* 13:33 eyi tlatamachíwali kemi omepóali (40) litro

yo milajkameh. ⁵⁰ Iwa n tlajtlakolejkeh kintlamotlaskeh ijtik tletl, kan chokaskeh iwa tlanetsoniskeh.

Tlan yankuik iwa tlan ya wewe

⁵¹ Ijkuakó Jesús okintlajtlaní:

—¿Nonkajsikamatih nochi tlan nomechilijtok?

Yejwah okilijkeh:

—Ejé, tikkajsikamatih.

⁵² Ijkuakó Jesús okinmili:

—Ijkuak se tlamachtí non kitemachtia n tlanawátíli kimomachtia kenomi Dios tlanawatia kan ilwikak, mochiwa kemi se chane, ika tlan kitlatijtok kimati kikixtia itla yankuik iwa itla ya wewe.

⁵³ Ijkuak Jesús otlan ki okintlapowi nochi ni, oyá de ompa.

Jesús kan altepetl de Nazaret

(Mr. 6:1-6; Lc. 4:16-30)

⁵⁴ Okalakito kan ialtépeu. Ompa opé tlamachtia kan sinagoga, iwa n tlakah omotlajtlachialtiayah iwa okimoliayah:

—¿Kan okajsik nochi non ixtlamatílistli? ¿Kenomi weleti kinchiwa ninteh milagros!

⁵⁵ ¿Amo ye ipiltsi n kuaujxinki? ¿Amo imamá itoka María? ¿Amo ye ikni n Jacobo, José, Simón iwa n Judas? ⁵⁶ Amo nika chanti iweltiwah. ¿Kan okikuito nochi tlan kimati?

⁵⁷ Yika, n tlakah omokuejsoayah. Pero Jesús okinmili:

—San kan yetos kitlakitah se profeta, pero itech ialtépeu iwa icha, amaka kitlakita.

⁵⁸ Iwa amo okinchi miakeh milagros itech ialtépeu, porke amo nochteh okineltokaya.

14

Kimiktiah n Juan Bautista

(Mr. 6:14-29; Lc. 9:7-9)

¹ Itech nekateh tonatijmeh Herodes* Antipas n Tetrarca non otlanawatijtoka Galilea, okima tlan Jesús okichiwaya, ² iwa okinmili itlakawah:

—Neká tlakatli, ye n Juan non otlakuaatekiaya, non yomoyoliti, yika weleti kinchiwa wejweyi milagros.

³ Herodes yotlanawatijka makikitskikah n Juan iwa makiiijlpikah ika kadena. Ijko okitokti n Juan porke okiliaya mach kualí tlan okichijtoka iwan ikuñada Herodías, isiwa ikni Felipe. ⁴ Juan okiliaya n Herodes:

—Tlajtlákoli tinepanitos iwan mokuñada.

⁵ Herodes okinekia kimiktis n Juan, pero okinmawiliaya n tlakah porke nochteh okimatiah Juan profeta. ⁶ Pero ijkuak omoxiujtíli Herodes Antipas, ichpoch n Herodías, omijtoti inmixpa nochteh n tlatlálwilteh, iwa satlawel okiwelitak n Herodes. ⁷ Ompa Herodes okimák itlajtol, kimakas san tlan ye kitlajtlanilis. ⁸ Ijkuakó n íchpochtli achto omotlapowi iwan imamá iwa sanima okili n Herodes:

—Techmaka itsonteko n Juan Bautista itech se tlakualkaxitl.

⁹ Semi omoyolkoko n rey ijkuak okikak tlan okitlajtlanili n íchpochtli. Pero ken okimák itlajtol inmixpa nochteh itlatlálwilwah, otlanawati makimakakah tlan okitlajtlanki. ¹⁰ Iwa otlanawati makikechtsontekitih n Juan kan otsaktoka, ¹¹ sanima okualikilijkeh itsonteko n Juan itech se tlakualkaxitl iwa okimaktijkeh n íchpochtli, iwa n íchpochtli okimaktili ina.

¹² Satepa owalajkeh itlamachtijkawah n Juan iwa okiwikakeh ikuerpo. Okitookatoh, iwa otlan ki okimatiltitoh n Jesús.

Jesús kintlakualtia mákuili mil tlakah

(Mr. 6:30-44; Lc. 9:10-17; Jn. 6:1-14)

* 14:1 Non okachi wejweyjítikeh tlanawatijkeh itech nin tlali kintokayotiah Herodes, non kijosneki 'se weyi tlanawati', nochteh non otlanawatijtiwalayah omonotsaya Herodes.

¹³ Ijkuak Jesús okima tlan okitoktijkeh n Juan, otlejkok itech se barka iwa oyá iselti kan amaka kikuejsoskia. Pero ijkuak n tlakah okimatkeh, owalkiskeh iwa oyajkeh okajsitoh nejnentiwih. ¹⁴ Ijkuak Jesús otemok itech barka, okinmitak miakeh tlakah, okimiknoma iwa okimpajti n kokoxkeh. ¹⁵ Ijkuak opé tiotlati, itlamachtijkawah omijkuanijkeh iwa okilijkeh:

—Yotiotlatik, iwa ik nika amaka chanti. Xikintitlani nochteh mawiah itech altepemeh, makimokowitih tlan kikuaskeh.

¹⁶ Jesús okinmili:

—Mach moneki mawiah, xikintlamakakah nomejwah.

¹⁷ Yejwah okilijkeh:

—Sanwel tikpiah mákuili pameh iwa ome michimeh.

¹⁸ Jesús okinmili:

—Nika techalinwikilikah.

¹⁹ Otlanawati mamotlajtlalikalikah ipan xiwitl. Jesús okinmónanki n mákuili pameh iwa n ome michimeh. Ontlachixki ilwikak iwa omotlasojkama inawak Dios, okintlajkotlápanki n pameh iwa okinmaktili itlamachtijkawah makinxejxelilikah. ²⁰ Nochteh otlakuajkeh iwa kuali oijixwikeh. Iwa okintetemitijkeh májtlaktli iwa ome chikimeh ika patlatlapanali.

²¹ Kemi mákuili mil tlakah otlakuajkeh, ixkoya n siwameh iwa n pípiteh.

Jesús nejnemi ixko atl

(Mr. 6:45-52, Jn. 6:16-21)

²² Satepa, Jesús okinnawati itlamachtijkawah matlejkokah itech barka iwa sa matlayakanakah makiojchalwikah n lago, ijkuak Ye ok kinmakawaskia n tlakah. ²³ Satepa, ijkuak yokinmaakah n tlakah, Jesús otlejkok ipan tepetl omototsajtsilito iselti. Ijkuak otleyuak ompa okatka iselti. ²⁴ N barka yotlantia iya itlajko n lago. N atl omotlawitekia itech barka porke n ejekatl okimixnamiktiwalaya. ²⁵ Sa kualka ijkuak ok tleyua, Jesús onejentiaya ixko atl iwa okinmajsito itlamachtijkawah. ²⁶ Iwa ijkuak itlamachtijkawah okitakeh nejnentiwits ixko atl, omomojtijkeh iwa otsajtsikeh:

—¡Se ekawitl!

²⁷ Pero Jesús okínnotski iwa okinmili:

—¡Ximoyolchikawakah, Ne Ni Jesús!

²⁸ Ijkuakó Pedro okili:

—Noteko, tla milák Tejwatsi, xitlanawati maninejnemi ixko atl iwa manimitsajtsi.

²⁹ Iwa Jesús okili:

—Xiwiki.

Ijkuakó Pedro owaltemok de kan barka iwa opé nejnemi ixko atl, iwa konajsiskia n Jesús.

³⁰ Pero ijkuak okimachili chikawak oejekatoka, omaujki iwa opé apolaki. Ijkuakó otsajtsik:

—¡Noteko, techmakixti!

³¹ Sannima Jesús okimakitskijtiwetski iwa okili:

—¡Amo tiyektlaneltoka!, ¿amo techneltoka?

³² Ijkuak otlejkokeh itech barka, n ejekatl omóketski. ³³ Ijkuakó, itlamachtijkawah omotlankuaketskeh iyakapa n Jesús iwa okilijkeh:

—Milák, Tejwatsi Ikone Dios.

Jesús kimpajtia kokoxkeh itech Genesaret

(Mr. 6:53-56)

³⁴ Ijkuak otlankeh okojchalwijkeh n lago de Galilea, oajsito kan tlali de Genesaret. ³⁵ Ijkuak n tlakah non ik ompa ochantitokah okixmatkeh n Jesús, sentetl okitematiltijkeh iwa okwalinwikilijkeh nochteh n kokoxkeh. ³⁶ Okitlatlaujtayah makinkawili maya san makitempantelkolikalikah itlakeh, iwa akimeh okitempantelkoayah itlakeh opajtiah.

¹ Ijkuakó sikimeh fariseos iwa non kitemachtiah n tlanawatílistli non owalajkeh de Jerusalén, omijkuanijkeh inawak Jesús iwa okilijkeh:

² —Motlamachtijkawah kixpanawiah tlan otechititijkeh totatawah. Yejwah amo momajtekiah ijkuak kikuah paj kemi otechmachtijkeh totatawah.*

³ Pero Jesús okintlajtlaní:

—¿Tleka noiwa nomejwah nonkixpanawiah itlanawatil Dios, iwa okachi nonkimopantiah tlan yowejka okichiwayah nomotatawah? ⁴ Dios okijto: “Xiktlakita mota iwa mona”, iwa “akin fiero kitenewas ita noso ina, kualí makimiktikah.” *Éx. 21:17* ⁵ Pero nomejwah nonkijtoah se tlakatl weletis kilis ita noso ina: “Mach weletis nimitspalewis, porke tlan nikpíxtok, yoníxelo para Dios.” ⁶ Ijkuak nomejwah íjkó nonkijtoah, kijosneki mach ok moneki se kimpalewis n tetajmeh. Nomejwah íjkó nonkijtlakoah itlanawatil Dios porke nonkichiwayah tlan yowejka okichiwayah nomotatawah. ⁷ ¡Íxkopteh! Yompa tlan onomechilih n profeta Isafas ijkuak okijto:

⁸ Ninteh tlakah ika inkamak kijtoah nechtlakitah, pero amo nechtlakitah ika inyolo.

⁹ Sanenka nechweyijkatlalah, porke tlan kitemachtiah, san itlanawatil n tlakah.

Is. 29:13

¹⁰ Ijkuakó Jesús okínnotski n tlakah iwa okinmili:

—Techkakikah iwa xikkajsikamatikah tlan nomechilis: ¹¹ Amo kiyolijtlakoa n tlakatl tlan kalaki itech ikamak, yej teyolijtlakoa tlan kisa itech ikamak n tlakatl.

¹² Ijkuakó itlamachtijkawah n Jesús omijkuanijkeh inawak iwa okilijkeh:

—¿Yotikma n fariseos okualankeh ijkuak okikakeh tlan otikijto?

¹³ Pero Ye okinnankili:

—Nochi tlatookali non amo okitookak Notajtsi non kajki ilwikak, kiwiwtlaskeh ika nochi inelwayo. ¹⁴ Xikinkawakah, yejwah noiwa amo tlachiah iwa kinyakanah oksikimeh kemi yejwah. Tla se non amo tlachia kiyakanas ok se kemi ye, san ken ome wetsiskeh itech tékochtli.

¹⁵ Ijkuakó Pedro okili n Jesús:

—Techajsikamatilti non tlapoálistli.

¹⁶ Jesús okijto:

—¿Nomejwah noiwa ayamó nonkajsikamatih? ¹⁷ ¿Amo nonkajsikamatih nochi tlan kalaki íjtit ikamak se tlakatl, kalaki san íjtit itlax, iwa satepa kisa kala? ¹⁸ Pero tlan kisa íjtit ikamak se tlakatl, kisa íjtit iyolo, iwa ye tlan kijtlakolia iyolo. ¹⁹ Porke íjtit iyolo n tlakatl kisa tlan amo kualí kiyejekolia, ijkuak

temiktia, noso

momekatia, noso

tlajtlakolchijtinemi ika ikuerpo,

tlachteki,

kisentlalia tlan amo milák,

noso tepojpoa.

²⁰ Nochi ni ye tlan kinmijtlakolia inyolo n tlakah, pero tla se tlakatl amo moyekmapaj-paka ijkuak tlakua, noni amo kiyolijtlakoa.

Se siwatl de Canaán kineltoka n Jesús

(Mr. 7:24-30)

²¹ Ijkuakó Jesús okiski de ompa, iwa oyá kan talmeh de Tiro iwa Sidón. ²² Se siwatl de Canaán non ik ompa ochantitoka owala kojtsajtsitiwits inawak Jesús iwa okili:

—¡Noteko, tekone de David, techiknomati! Nochipoch kipia se espíritu amokuali iwa sa ik panao kitlajiyowiltia.

*

15:2 N fariseos okajxitilijkeh itlanawatil Moisés se tlanawatili: achto de se tlakuas kipia se momajtekis miak welta.

²³ Jesús mach okinankili. Ijkuakó itlamachtijkawah omijkuanjekhe inawak iwa okitlat-lautijkeh:

—Xikpalewi neká siwatl porke kojtsajtsitiwits tokuitlapah.

²⁴ Jesús okijto:

—Dios onechaltítlanki sanwel manikimpalewiki n tlakah de Israel non moixpolojtine-mih kemi ichkameh.

²⁵ Pero n siwatl omijkuani iwa omotlankuaketski ixpa n Jesús iwa okili:

—¡Noteko, techpalewi!

²⁶ Iwa Jesús okili:

—Amo kualí se kinkixtilis intlakual n pípilteh iwa makinmakakah n chichimeh.

²⁷ N siwatl okinankili:

—Milák tlan tikijtoa Noteko, asta n chichimeh kikuah n kamapáyaxtli non wetsi itlampa mesa keman tluajuatokeh intekowajkeh.

²⁸ Ijkuakó Jesús okili:

—¡Siwatl, kema weyi motlaneltokalis! Mamochiwa kemi te tikneki.

Ijkuakó, ichpoch non siwatl owalpjatik non ora.

Jesús kimpajtia miakeh kokoxkeh

²⁹ Jesús okiski de ompa iwa oyá itempa n lago de Galilea. Otlanki otlejkok ipan se tepetl iwa ompa omotlali. ³⁰ Ijkuakó, miakeh tlakah okalakitoh inawak Ye, iwa okinwikilijkeh non koxomeh, non amo tlachiah, non oikximijmiktokah, non amo otlajtoayah, iwa miakeh oksikimeh kokoxkeh.

Okintlalijkeh ikxitle n Jesús, iwa Ye okimpajti. ³¹ Ijkuakó n tlakah omotlajtlachialtiayah ken okitakeh akimeh amo otlajtoayah otlajtojkeh, non oikximijmiktokah opajtikeh, non koxomeh onejenkeh iwa non amo otlachiyah otlachixkeh. Iwa nochteh opé kiweyijkatlaliah iwa motlasojkamatih inawak Dios de Israel.

Jesús kintlakualtia nawi mil tlakah

(Mr. 8:1-10)

³² Ijkuakó Jesús okonínnotski itlamachtijkawah iwa okinmili:

—Semi nikinmiknomati ninteh tlakah, porke yopanokeh eyi tonati nowa iwa amo kipiah tlan kikuaskeh. Amo nikneki nikintitlanis incha maapismiktiwiah, amo kichiwa wetsitiweh itech ojtli.

³³ Ijkuakó itlamachtijkawah n Jesús okilijkeh:

—Ik nika amaka chanchiwa. ¿Kan tikkuitiweh tlákuali para tikintlakualtiskeh nochteh ninteh tlakah?

³⁴ Jesús okintlajtlani:

—¿Kech paj nonkipiah?

Yejwah okinankilijkeh:

—Chikomeh pameh iwa kanaj kechmeh michintsinteh.

³⁵ Ijkuakó Jesús okinnawati mamotlajtlalikalikah ipan tlali. ³⁶ Jesús okinmónanki n chikome pameh iwa n michimeh iwa omotlasojkama inawak Dios. Otlanki okintlajtlajkotlapanki iwa okinmajmák itlamachtijkawah makinxejxelikalikah nochteh n tlakah. ³⁷ Nochteh otlakuajkeh iwa kualí oixwikeh. Iwa tlan ayakmó okikuajkeh okoolojkeh iwa okintetemitijkeh chikome chikimeh. ³⁸ Kemi nawi mil tlakah otlakuajkeh, ixkoya n siwameh iwa n pípilteh. ³⁹ Satepa Jesús okinmaaka nochteh n tlakah, otlejkok itech se barka iwa oyá kan tlali de Magdala.

¹N fariseos iwa n saduseos okinekia kitlajtoltlapololtiskeh n Jesús, yika okitatoh iwa okitlajtlanihijkeh makinnextili se milagro de ilwikak. ²Pero Ye okinmili:

—Ijkuak waltiotlati, nomejwah nonkijtoah: “Mostla kualtsi tonas ken tlachichilewi itech ilwikak”, ³iwa ijkuak tlanesi nonkijtoah: “Axa ejekas iwa kiawis, ken tlachichilewi iwa tlamixtentok.” ¡Íxkopteh! Nomejwah nonweletih nonkiyejekoliah tlan nonkitah itech ilwikak, pero amo nonweletih nonkitah tlan tlamochijtok itech ninteh tonatijmeh. ⁴Ninteh tlakah amo kualteh iwa mekatánajteh kinekih kitaskeh se milagro, pero amo kitaskeh ok se milagro, sanwel tlan yopanok n profeta Jonás.

Okinkakajte iwa oyá.

Jesús kijtoa intlamachtilis n fariseos mach milák

(Mr. 8:14-21)

⁵Ijkuak itlamachtijkawah n Jesús otlankeh okochalwijkeh n lago, okualilnamikeh kiwikaskiah itla paj. ⁶Ijkuakó Jesús okinmili:

—Techkakakah, ximotlachilikah de inlevadura n fariseos iwa n saduseos.

⁷Itlamachtijkawah opé kimoliah:

—Ijkó techilia porke amo otikwalikakeh paj.

⁸Pero Jesús san nima okajsikama iwa okinmili:

—¿Tleka nomechtekipachoah amo nonkipiah paj? ¡Nomejwah amo miak nomotlanel-tokalis! ⁹¿Ayamó nonkajsikamatih nion ayakmó nonkilnamikih n mákuili pameh non onikinxejxelili n mákuili mil tlakah, iwa ok kech chikiwitl ononkoolojkeh? ¹⁰¿Noiwa ayakmó nonkilnamikih n chikome pameh non onikinxejxelili n nawi mil tlakah, iwa ok kech chikiwitl ononkoolojkeh? ¹¹¿Tleka amo nonkajsikamatih amo onitlajtojtoka de paj, ijkuak onomechili ximotlachilikah de inlevadura n fariseos iwa n saduseos?

¹²Ijkuakó yejwah okajsikamatkeh Jesús amo okinmilijka mamotlachilikah de inlevadura n paj, yej de intlamachtilis n fariseos iwa n saduseos.

Pedro kijtoa Jesús Ye n Cristo

(Mr. 8:27-30; Lc. 9:18-21)

¹³Ijkuak Jesús okalakito kan tlali de Cesarea de Filipino, okintlajtlani itlamachtijkawah:

—¿Tlan kimoliah n tlakah de Ne Non onimochi ni tlakatl?

¹⁴Yejwah okinankilijkeh:

—Sikimeh kijtoah Tejwatsi ti Juan Bautista, oksikimeh kijtoah Tejwatsi ti Elías, iwa oksikimeh kijtoah Tejwatsi ti Jeremías noso aka ok se profeta.

¹⁵Ijkuakó Jesús okinmili:

—Iwa nomejwah, ¿tlan non kimoliah, Akin Ne?

¹⁶Simón Pedro okinankili:

—Tejwatsi Ti Cristo, ikone Dios non yolitok.

¹⁷Ijkuakó Jesús okili:

—Xiyolpaki te, Simón, ipiltsi Jonás, porke amaka de nin tlatlípaktli omitsnextili, yej Notajtsi Dios non jakki ilwikak. ¹⁸Iwa Ne nimitsilia, te ti Pedro, iwa ipan non teti* nichijchiwas notiopa, iwa nion ichikawalis non tlanawatia kan kateh non yomikkeh weletis kitlanis. ¹⁹Ne nimitsinmakas n yabejteh† de ilwikak kan Dios tlanawatia. Iwa nochi tlan tikilpis itech nin tlatlípaktli ya ilpitok kan ilwikak, iwa nochi tlan tiktojtomas itech nin tlatlípaktli, ya tojtontok kan ilwikak.

²⁰Ijkuakó Jesús okinnawati itlamachtijkawah amaka makilikah Ye n Cristo.

Jesús kinmilia kenomi mikkis

(Mr. 8:31—9:1; Lc. 9:22-27)

* 16:18 Is. 28:16 Kipia: Xikitakah, Ne niktaliala itech Sión se tetl non ika moikxitlanwiskeh, se tetl non kintoktis mawetsikah; akin tlaneltokas inawak, ayik mopijpinatis. † 16:19 Mateo 18:18: Ne nomechilia, tlan nomejwah nonkilpiskeh itech nin tlatlípaktli, noiwa ilpitok kan ilwikak, iwa tlan nomejwah nonkitojtomaskeh itech nin tlatlípaktli, noiwa tojtontok kan ilwikak.

²¹ Ijkuakó Jesús opé kinmilia itlamachtijkawah omonekia yas Jerusalén, iwa ompa chikawak kitlajjowiltiskeh n tetajmeh tlayakankeh n tiopixkeh tlayakankeh iwa non kitemachtiah n tlanawatflistli. Noiwa okinmili kimiktiskeh, pero ipan eyi tonati moyolitis.

²² Ijkuakó Pedro okiwík n Jesús ixkoya, iwa opé kajwa:

—¡Noteko, amo Dios makimonekilti! ¡Ayik ijko ximochiwa!

²³ Pero Jesús omókopki iwa okili n Pedro:

—¡Xio kan ayakmó nimitsitas, satanás! ¡San techtsatsakuilia! Porke amo mitstekipachoa tlan Dios kimonekiltia, yej mitstekipachoa tlan kinekih n tlakah itech nin tlaltfipaktli.

²⁴ Satepa Jesús okinmili itlamachtijkawah:

—Tla aka kineki wits nonawak, ayakmó makichiwa san tlan ye kineki. Yej, makixiko nochi tlan panos iwa mawiki nowa, maya makimiktikah itech se krus. ²⁵ Porke akin kinekis kipalewis inemilis, kipolos. Tla aka kipoloo inemilis por ne, kajsis inemilis. ²⁶ Porke mach itla ipati tla se tlakatl kimotlanilia nochi tlan onka itech nin tlaltfipaktli, iwa satepa mikki iwa kipolos ialma. Porke mach itla onka itech nin tlaltfipaktli tlan ika weletis kitlaxtlawas ialma. ²⁷ Porke Ne Non onimochi ni tlakatl niwits ika iweyijkachiwalis Notajtsi iwa n ángeltech, ijkuakó sejse niktaxtlawis ika tlan okichi. ²⁸ De milajka nomechilia, sikimeh non nika kateh amo mikiskeh asta ijkuak nechitaskah Ne Non onimochi ni tlakatl, iwa pewas nitlanawatis.

17

Jesús moixpatla

(Mr. 9:2-13; Lc. 9:28-36)

¹ Chikwase tonati satepa, Jesús okiwík n Pedro, iwa ome iknimeh, Jacobo iwa n Juan kan se tepetl wejkapa. ² Ompa inyakapah, Jesús omoixpatlak. Ixkotsi otsotlandia kemi n tonati iwa itlake omókopki istak kemi tláwili. ³ Sa nima owalmonextijkeh Moisés iwa n Elías. Omotlapowijtokah iwan Jesús. ⁴ Ijkuakó Pedro okili n Jesús:

—Noteko, ¡san kuali nika tikateh! Tla tikmonekiltia tkinchijchivas-keh eyi akákaltech, se para Tejwatsi, se para Moisés iwa ok se para Elías.

⁵ Pedro ok otlajtojtoka ijkuak se mextli okinmokenti ika itlasekawilo. Iwa de kan mextli omokak se lájtoli non okijto:

—Ye ni Nokone non niktlasojtla, non Ne onikpejpenki xikkakikah itlajtol.

⁶ Ijkuak itlamachtijkawah okikakeh, saikpanoa omomojtijkeh iwa omotlankuaketskeh asta okitelkoto n tlali ika inmixkuak. ⁷ Ijkuakó Jesús owalmijkuani innawak, okommintelko iwa okinmili:

—Ximoketsakah, amo ximomojtikah.

⁸ Ijkuak owaltlajtlachixkeh ayakmaka okitakeh, sanwel Jesús iselti.

⁹ Ijkuak owaltemotiwalayah itech tepetl Jesús okinnawati:

—Amaka xikmatiltikah tlan ononkitakeh, asta ijkuak Ne Non onimochi ni tlakatl, nimikis iwa oksepa nimoyolitis.

¹⁰ Ijkuakó itlamachtijkawah okitlajtlanjkeh:

—¿Tleka non kitemachtiah n tlanawatflistli kijtoah Elías achto wits?

¹¹ Jesús okinnankili:

—Milák, Elías achto wits iwa ye kiyektlalis nochi. ¹² Pero Ne nomechilia Elías yowitsa, iwa n tlamachtijkeh mach okineltokakeh porke amo okiyekixmatkeh, yej okitoktijkeh san tlan yejwah okinekeh. Ijko noiwa nechtlajjowiltiskeh Ne Non onimochi ni tlakatl.

¹³ Ijkuakó itlamachtijkawah okajsikamatkeh Jesús okintlapowiaya de Juan Bautista.

Jesús kipajtia se télpochtli non omimikia

(Mr. 9:14-29; Lc. 9:37-43)

¹⁴ Ijkuak okalakitoh kan omooolojkah n tlakah, owalmijkuani se tlakatl inawak Jesús, omotlankuáketski iyakapa iwa okili:

¹⁵—Noteko, xikiknomati nopiltsi, mimiki iwa saikpanoa tlaijyowia, ya miak welta wetsi itech tletl iwa ijtik atl. ¹⁶Onikinwalikili motlamachtijkawah, iwa mach weletih kipajtiah.

¹⁷Jesús okinnankili:

—¡Nomejwah mach nontlaneltokah iwa mach nontetlakitakeh! ¡Asta kemia niyetos nomowah iwa nomechxikojtos! Techalikilikah nika n télpochtli.

¹⁸Ijkuakó Jesús okajwak n amokuali espíritu iwa okinawati makikajkawa n télpochtli, iwa sa nima n télpochtli owalpajtik.

¹⁹Satapa itlamachtijkawah omotlapowitoh ixkoya iwa n Jesús. Iwa okitlajtlanjikheh:

—¿Tleka tejwah amo otiwetlekeh otikkixtijkeh non espíritu amokuali?

²⁰Jesús okinmili:

—Porke ayamó miak nontlaneltokah. De milajka nomechilia tla nonkipiaskiah tlaneltokálistli maya san kemi se xínatsintli de mostaza, nonkiliskiah nin tepetl: “Ximoachiwa iwa nepa ximomanati.” N tepetl moijkuaniskia. Nochi weletiskiah nonkichiwasikah.

²¹*

Jesús oksepa kinmilia kenomi mikkis

(Mr. 9:30-32; Lc. 9:43-45)

²²Se tonati kema omoolojkeh kan tlali de Galilea, Jesús okinmili itlamachtijkawah: Ne Non inomochi ni tlakatl nechtemaktiskeh inmak tekiwajkeh, ²³iwa yejwah nechmiktiskeh, pero ipan eyi tonati nimoyolitis. Ninteh tlájtoltleh okinyolkoko itlamachtijkawah.

Jesús kitlaxtlawa impuesto para n Weyi Tiopa de Jerusalén

²⁴Ijkuak Jesús iwa itlamachtijkawah okalakitoh Capernaúm, non tlakobraroah impuesto para n Weyi Tiopa oyajkeh okitatoh n Pedro iwa okitlajtlanjikheh:

—¿Nomotlamachtitlaxtlawa impuesto para n Weyi Tiopa?

²⁵Pedro otlanankili:

—Ejé, kitlaxtlawa.

Iwa ijkuak Pedro okalak ijtik kali, Jesús okitlajtlani:

—¿Kenomi tikita, Simón? ¿N wejweyi tlanawatijkeh kintlaxtlawaltiah impuesto non nika chantitokeh noso non amo nika chanti?

²⁶Pedro okinankili:

—Non amo de nika.

Jesús okili:

—Ijkó kiné non nika chanchiwa amo kipiah kitlaxtlawaskeh. ²⁷Ijkó para amo matikinkualanikah, xio kan lago, ximichma iwa n michi non achto tikkixtis, xikkamatlapo iwa ompa tikajsis se tomi non ika xiktalaxtlawa noimpuesto iwa moimpuesto.

18

¿Akin okachi weyijkatitok?

(Mr. 9:33-37; Lc. 9:46-48)

¹Ijkuakó itlamachtijkawah n Jesús omijkuanijkeh inawak, iwa okitlajtlanjikheh:

—¿Akin okachi weyi itech ilwikak kan Dios tlanawatia?

²Jesús okínotski se chokotsi, iwa okontlali tlatlajkotia, ³iwa okijto:

—De milajka nomechilia, tla amo nonmokopah kemi ninteh pípilteh iwa nonkichiawah kemi yejwah, amo nonkalakiskeh ilwikak kan Dios tlanawatia. ⁴Yika, akin yetos yolyá-manki kemi nin chokotsi, ye okachi yetos weyi itech ilwikak kan Dios tlanawatia. ⁵Iwa akin kiselia se chokotsi kemi ni itech Notoka, kijosneki Ne nechselia.

Ximotlachilikah amo kichiwa nontlajtlakolchivaskeh

(Mr. 9:42-48; Lc. 17:1-2)

⁶Tla aka kitoktis mawetsi itech tlajtlákoli, seme de ninteh tsitsikitikheh akin nechneltokah, okachi kuali makilpilikah itech ikech se weyi tetl iwa makonkajkawakah kan weyi

* 17:21 Itech non okachi yowejkajkeh tlajkuúfolteh mach nesi nin bersíkulo. Kijtoa: v 21 Nin amokuali espíritu sanwel weleti mokixtia ijkuak se mosawa (ayuna) iwa ijkuak se motiotsajtsilia. Mr. 9:29.

atl kan okachi tlawejkatla. ⁷¡Míálmasteh tlaltikpaktlakah! Ken sa tlawel onka miak tlan ika se wetsis itech tlajtlákoli, nochipa ijkó yetos. Pero ¡mialma!, neká tlakatl akin kitoktis aka ok se mawetsi itech tlajtlákoli.

⁸‘Yika, tla moma noso mokxi mitstoktia xiwetsi itech tlajtlákoli, xikmotekili iwa wejka xikontlamotla. Okachi kuali tla tikalakis ilwikak tiixkitepo noso timatepo iwa amo ika ome momawah noso ika ome mokxiwah mamitsontlakawakah ijtk tletl non ayik sewis. ⁹Iwa tla moixtololo mitstoktia xiwetsi itech tlajtlákoli, xikmoxitili iwa wejka xikontlamotla. Okachi kuali xikalaki ilwikak san ika se moixtololo, iwa amo tiajsitok ika ome moixtololowah mamitsontlamotlakah miktla kan mimilikatok tletl.

N ichka non opolika

(Lc. 15:3-7)

¹⁰‘Amo xikintlawelitalakah seme de ninteh pípilteh. Ne nomechilia, kan ilwikak iangelwah ninteh pípilteh nochipa kateh ixpan Notajtsi non kajki ilwikak. ¹¹*

¹²‘¿Kenomi nonkintah? Tla se tlakatl kimpia se sientio iichkawah, iwa kipoloa se, ¿amo kinkajtewa n nawi póali iwa n káxtoli iwa n nawi (99) ichkameh kan tepeyo iwa kontemoa non opoliwik? ¹³Iwa tla okajsik iichkatsi non opolika, okachi paki ke por non oksikimeh ichkameh non amo opolikah. ¹⁴Ijkó noiwa Totajtsi non kajki ilwikak amo kineki mapoliwi non se de ninteh pípilteh.

Kenomi tiktlapojpolwiskeh se tokni

(Lc. 17:3)

¹⁵‘Tla mokni itla mitstoktis, xiktlapowi iselti iwa xikkajsikamatilti itlajtlakol. Tla omitskak, yotikmotlanili iwa timoyekwikas oksepa íwa. ¹⁶Pero tla amo kineki mitskakis, xiknotsa ok se noso ome tokniwah, iwa ijkuak non moyekkawaskeh yejwah makikakikah tlan ye omitstokti. ¹⁷Tla nion yejwah kinkaki, xikinmoololo nochteh n tokniwah, iwa tla nion tokniwah kinkaki, xikita mokni kemi non amo kineltoka Dios noso kemi se non koololo impuestos para roma.

¹⁸‘Ne nomechilia, tlan nomejwah nonkilpiskeh itech nin tlaltípkaktli, noiwa ilpitos kan ilwikak, iwa tlan nomejwah nonkitojtomaskeh itech nin tlaltípkaktli, noiwa tojtontos kan ilwikak. Mt. 16:19

¹⁹‘Noiwa nomechilia: tla itech nin tlaltípkaktli non momeh nonmoyektlapowiah para nonkitlajtlaniskeh itla Notajtsi non kajki ilwikak, Ye nomechmakas tlan nonkitlajtlaniliskeh. ²⁰Porke kan ome noso eyi moololoah ika Notoka, ompa nika inwah.

²¹Ijkuakó Pedro omijkuani inawak Jesús iwa okitlajtlani:

—Noteko, ¿kech welta moneki maniktlapojpolwi nokni, tla itla nechtoktia? ¿Asta chikome welta?

²²Jesús okinankili:

—Amo nimitsilia xiktlapojpolwi san chikome welta, yej eyipóali iwan májtlaktli iwa chikomeh welta xiktlapojpolwi.†

Se tetlakéwale non amo okinek tetlapojpolwis

²³‘Yika, itech ilwikak kan Dios tlanawatia, kemi se rey, non okinekia makikipilikah tlan okiwikiliayah itlakawah. ²⁴Okualikilijkeh se itlakewal non okiwikiliaya sien sentenario.‡

²⁵ Kemi non tlakéwale amo okiapiaya tlan ika kitlaxtlawilis tlan okiwikiliaya, n rey otlanawati makinamakakah non tetlakéwale sansikah iwa isiwa, ipilwah iwa nochi tlan okiapiaya para ika makimokopili tlan okiwikiliaya. ²⁶Ijkuakó itetlakewal omotlankuaketski iyakapa n rey iwa okitlatlanti: “Noteko, techonmochiali iwa nimitstlaxtlawilis nochi tlan nimitswikilia.” ²⁷N rey okiknoma, iwa okitlapojpolwili nochi tlan okiwikiliaya iwa okikawili mawia. ²⁸Pero ijkuak okiski non tetlakéwale, okinamik se itlakaikni non

* 18:11 Nin bersikulo amo nesi itech non okachi yowejkajkeh tlajkuiflotleh iwa nesi kan Lucas 19:10 Porke Ne Non onimochi ni tlakatl, oniwala onikinmakixtikto non moixpolojtinemih. † 18:22 N griego kijtoa: ‘eyi póali iwa n májtlaktli chikome welta’. Para yejwah kijtosneki: nochipa. ‡ 18:24 se sentenario ipati mil samano de tektil.

okiwikiliaya tlan se kitlani itech se tonati. Okikitski kan itoskak iwa opé kitoskapatska iwa okiliaya: “¡Techoxlaxtlawili tlan techwikilia!”²⁹ Ijkuakó itlakaikni omotlankuáketiski iyakapa iwa okitlatlauti: “Techonchia iwa nimitstlaxtlawilis tlan nimitswikilia.”³⁰ Pero ye mach okinek kichias, yej okitsakuato para makitlaxtlawili nochi tlan okiwikiliaya.³¹ Ijkuak n oksikimeh tekitkeh okimatkeh, miak okinyolkoko iwa okilitoh n rey nochi tlan otlamochi.³² Ijkuakó n rey otlatitlanki makinotsatih itlakewal iwa okili: “¡Semi amo tikuali! Ne onimitstlapojpolwili nochi tlan otechwikiliaya por otomotlatlauti nonawak.³³ Omonekia te noiwa tikiknomatiskia neká tokni, ijkó kemi ne onimitsiknoma.”³⁴ Ijkuakó n rey sa tlawel okuálanke, iwa otlanawati makitsakuatih iwa makikajkawakah asta ijkuak nochi makitlaxtlawili.

³⁵ Jesús noiwa okinmili:

—Notajtsi non kajki ilwikak, noiwa ijkó kitoktis akin amo kinekis kitlapojpolwis aka ikni ika nochi iyolo.

19

Amo se mamosiwakajkawa

(Mr. 10:1-12; Lc. 16:18)

¹ Ijkuak Jesús otlanki okintlapowi, oyá de Galilea, okikojchalwi n río Jordán iwa okalakito kan tlali de Judea. ² Miakeh okitokakeh n Jesús, iwa ompa okimpajti non omokokoayah.

³ Ijkuakó sikimeh fariseos omijkuanijkeh inawak Jesús porke okinekiah kitlajtoltlapoltiskih iwa okitlajtlanjkeh:

—¿Kuali kajki tla se tlakatl kikajkawa isiwa san por ayakmó kuali mowikah?

⁴ Jesús okinnankili:

—¿Ayamó nonkiamapoah itlajkuilol Dios?, itech ipewayá n tlaltfipaktli, Dios okinchijchi “tlakatl iwa siwatl.”⁵ Noiwa okinmili: “Yika n tlakatl kikawas ita iwa ina iwa moseitilis iwa isiwa, iwa yejwah ome mochiwaskeh san se.”⁶ Ijkó kiné, yejwah ayakmó ome, yej sanwel se. Yika, tlan Dios yokiseitili, amaka makinxexelo.

⁷ Ijkuakó n fariseos okitlajtlanjkeh:

—¿Tleka kiné Moisés okitekawili mamosiwakajkawa se tlakatl, iwa makimajmanili isiwa se amatl kan makijto kikajkawa?

⁸ Jesús okinmili:

—Moisés okitekawili ximosiwakajkawakah, porke yokixmatiah tlakuawak nomoyolo; pero achto amo ijkó okatka. ⁹ Ne nomechilia, sanwel tla isiwa omomekati, weletis itlákau kikajkawas isiwa. Porke akin mosiwakajkawa iwa monamiktia iwan ok se siwatl kijtosneki san kinomekatijtok.

¹⁰ Itlamachtijkawah n Jesús okilijkeh:

—Tla milák amo kuali se mosiwakajkawas, okachi kuali amo se mamonamikti.

¹¹ Ijkuakó Jesús okinnankili:

—Amo nochteh weletih kajsikamatih nin tlájtoli, yej sanwel non Dios kimpalewia makkajsikamatikah. ¹² Onkateh tlakah otlakatkeh eunucos.* Oksikimeh okintoktijkeh eunucos. Iwa oksikimeh nemih kemi eunucos porke kinekiah tekitiskih para Dios. Akin kinekis kiselis nin tlájtoli, makiseli.

Jesús kintiochiwa n kokoneh

(Mr. 10:13-16; Lc. 18:15-17)

¹³ Ijkuakó okwalinwikilijkeh n Jesús sikimeh kokoneh para makintlali imawah impah iwa makintiochiwa, pero itlamachtijkawah opé kinmajwah non okwalinwikayah. ¹⁴ Pero Jesús okinmili:

—Xikinkawilikah n kokoneh mawikih nonawak iwa amo xikintsakuilikah, porke akimeh yolyamankeh kemi kokoneh kalakiskih ilwikak kan Dios tlanawatia.

¹⁵ Jesús okintlali imawah ipan kokoneh iwa satepa oyá de ompa.

* 19:12 Eunucos: se tlakatl non amo weleti kimpia ipilwah

Se télpochtli tominyo motlapowia iwan Jesús

(Mr. 10:17-31; Lc. 8:18-30)

¹⁶Se télpochtli omijkuani inawak Jesús iwa okitlajtlani:

—Kuali tlamachtli, ¿tlan moneki manikchiwa, para nikpias nemflistli non ayik tlami?

¹⁷Jesús okinankili:

—¿Tleka techtlajtlania tlan kuali? Sanwel onka se non de milajka kuali, iwa Ye Dios.

Pero tla tikneki tiyolitos, xikintlakita n tlanawátilteh.

¹⁸N télpochtli okili n Jesús:

—¿Katliejmeh?

Jesús okinankili:

—Amo xitemikti,
amo ximomekati,
amo xitlachteki,
amo xixolopijti.

¹⁹Xiktlakita mopapá iwa momamá,
iwa xiktlasojtla mokni ijkó kemi te timotlasojtla.

²⁰N télpochtli okinankili:

—Nochi noni nikchijtiwits, ¿tlan okachi nechpoloa manikchiwa?

²¹Jesús okili:

—Tla de milajka tikneki ti yetos ti kuali tlakatl, xiknamaka nochi tlan tikpia iwa n tomi xikintlakoli n próbesteh. Ijkó tiktlawelpias weyi tlahtlálwili kan ilwikak. Iwa tias nowa.

²²Keman n télpochtli okikak tlan Jesús okili, oyá omoyolkokojtia porke okitlawelpiaya.

²³Ijkuakó Jesús okinmili itlamachtijkawah:

—De milajka nomechilia, okachi owi kalakis itech ilwikak kan Dios tlanawatia se non kitlawelpia tomi. ²⁴Oksepa nomechilia, okachi amo owi panos se “kameyo”[†] kan ik ixtololo n akuxa, iwa amo se non kipia tomi maweleti makalaki kan Dios tlanawatia.

²⁵Ijkuak itlamachtijkawah okikakeh nin tlájtoli, omotlajtlachialtijkeh iwa okimoliayah:

—Tla ijkó, ¿akin weletis momakixtis?

²⁶Jesús okintlajtlatak iwa okinmili:

—N tlaltikpaktlakah amo weleti kichiwah, pero Dios nochi weleti kichiwa.

²⁷Ijkuakó Pedro okili:

—Noteko, tejwah otikkajtejkeh nochi tlan otikpiayah iwa mowah tikateh. ¿Tlan tikpiaskeh?

²⁸Jesús okinnankili:

—De milajka, nomechilia, ijkuak ajsiki n tonati ijkuak nochi moyankuilis, Ne Non onimochi ni tlakatl nimoyantis, iwa ompa nitlanawatis ika mawistflistli. Ipan non tonati nomejwah akimeh nonwitseh nowah, noiwa nonmoyantiskeh itech májtlaktli iwa ome (12) siyajteh. Ompa nonkinmixkomakaskeh n májtlaktli iwa n ome (12) tribus de Israel. ²⁹Iwa nochteh akimeh okikakajtejkeh incha, inmikniwah, inweltiwah, intajwah, impilwah noso intlalwah por tetlapowijtinemih notlajtol, kiseliskeh okachi de nochi tlan okikakajtejkeh, iwa mach ayik mikiskeh yej nochipa yolitoskeh. ³⁰Pero non axa tlayakantokeh, yejwah yetoskeh iksemi, iwa non axa kateh sa iksemi, yejwah tlayakantoskeh.

20

Sikimeh tetlakéwalteh

¹Itch ilwikak kan Dios tlanawatia, noiwa kemi se tekowa non okisi san kualka okintlakewato sikimeh tlakah makitlatekilitih itlala. ²Iwa omoyekka iwan tetlakéwalteh kintlaxtlawiskia se denario* itech non tonati, iwa okintflanki matekilitih.

[†] 19:24 Sikimeh tlajkuilolteh kipiah n tlájtoli ‘de kameyo’ porke n michmajkeh kipiah se tomawak riata non okichijhijkeh ika itsojmio n kameyo. Nawi itlamachtijkawah achto yejwah michmajkeh iwa okitekiltiyah non riata non yejwah okitokayotijkeh kameyo. * 20:2 Denario: se tomi non okitlaniah ijkuak otekitia se tonati.

³ Satepa n tekowa okiski kemi las nueve de kuinal, iwa okinmitak tiánkistli sikimeh tlakah non omajxilijtokah. ⁴ Iwa okinmili: “Xiwhia notlala xitekititih iwa nomecheyekt-laxtlawis.” Iwa yejwah oyájkheh.

⁵ Oksepa okiski kemi tlajko tonati, noiwa kemi las tres de tiotlak, iwa okintlakewato oksikimeh.

⁶ Iwa kemi las sinko de tiotlak, oksepa okinmajsik oksikimeh non omajxilijtokah, iwa okintlajtlani: “¿Tleka nika ononmokajkeh interojtonati iwa amo onontekititoh?” ⁷ Yejwah okinankilijkeh: “Porke amaka otechtlakeh.” Ijkuakó ye okinmili: “Nomejwah noiwa xitekititih kan nouvaskuaujyo.”

⁸ Ijkuak otlejyuaq, inteko okili itlakewal non okinnawatiaya n tlakah: “Xikinnotsa n tlakéwalteh iwa xikintlaxtlawi. Acho xikintlaxtlawi non okalakeh sa iksemi, iwa satepa non ocho okalakeh.” ⁹ Ijkuakó owalajkeh n tetlakéwalteh non okalakeh kemi las sinko de tiotlak, iwa sejse okiseli se denario. ¹⁰ Satepa, ijkuak owalajkeh akimeh kuinal opé tekutih, yejwah okimolijkeh chamo okachi kintlaxtlawiskiah. Pero yejwah noiwa okiselijkeh se denario.

¹¹ Yika, ijkuak okiselijkeh intlaxtlawil opé mokejsoah iwan tekowa, ¹² iwa okilijkeh: “Nekateh tlakah non otekitekeh sanwel se ora, otikintlaxtlawi kemi tejwah, non otikxikolijkeh nochi n tektil ixko tonati.” ¹³ Pero n tekowa okonili se de yejwah: “Noknitsi, ne amo nimitstlachtekijtok. ¿Amo otimokajkeh tiklaniskia se denario itech nin tonati?”

¹⁴ Xikonana modenario iwa xiajti. Ne nikneki niktalaxtlawis non sa iksemi okalak tlan te onimitsmák. ¹⁵ ¿Mach amo weletis nikchiwas ika tlan noaxka tlan ne nikneki? Noso, ¿tixikojmiki por kuali ni tlakatl?” ¹⁶ Pero non axa amitla impati, satepa kinweyijkatlaliskeh, iwa non axa kinweyijkatlaliah, ijkuakó kinmitaskeh kemi amitla impati.

Jesús oksepa kinmilia kenomi mikkis

(Mr. 10:32-34; Lc. 18:31-34)

¹⁷ Ijkuak Jesús oyaya Jerusalén, ixkoya okinwík n májtlaktli iwa ome (12) itlamachtijkawah iwa okinmili:

¹⁸ —Xikkakikah, axa tiawih Jerusalén, iwa Ne Non onimochi ni tlakatl nechtemaktiskeh inmak tiopixkeh non tlayakantokeh, iwa n tlamachtijkeh de intlanawatil non nechtlajtlakoltiskeh para manechmiktikah. ¹⁹ Nechtemaktiskeh inmak n tlakah non amo judíojteh para manechpíjpinawikah iwa manechwitekikah. Yejwah nechmiktiskeh itech krus, pero ipan eyi tonati nimoyolitis.

Imamá n Jacobo iwa n Juan motlatlaujtia inawak Jesús

(Mr. 10:35-45)

²⁰ Ijkuakó isiwa n Zebedeo iwa itelpochwah, omijkuaniykeh ixpa Jesús iwa omotlankuaketskeh. N siwatl omotlatlaujti inawak. ²¹ Jesús okitlajtlani:

—¿Tlan tikmonekiltia?

N tena okili:

—Nimitstlatlaujtia xitlanawati ninteh ome nopilwah mamoyantikah monakastla, se ik moyekma iwa ok se kan ik moopochma, keman tejwatsi pewas titlanawatis.

²² Jesús okinankili:

—Nomejwah amo nonkimatih tlan nonkitlajtlanih. ¿Weletis nontlajiyowiskeh kemi ne nitlajiyowis?

Yejwah okinankilijkeh:

—Ejé, tiweletiskeh.

²³ Jesús okinmili:

—Milák, nomejwah nontlajiyowiskeh, pero sanwel Notajtsi weletis kijtos akin moyayantis ik noyekma noso noopochma, iwa amo Ne. Porke Ye yokimpéjpenki akimeh ompa moyayantiskeh.

²⁴ Ijkuak n májtlakteh itlamachtijkawah ijko okikakeh, okualankeh iwan nonteh ome iknimeh. ²⁵ Pero Jesús okinnotski iwa okinmili:

—Nomejwah kual nonkinmatih n tekiwajkeh non tlanawatiah itech nin tlaltl'kaptli, kinnawatiah n tlakah, iwa n wejweyi tlanawatijkeh kinmapixtokeh ika intlanawatilis.
²⁶ Pero nomejwah amo ijkó nonkichiwaskeh. Akin kinakis nomowa moweyijkatlalis, achto makintekitili oksikimeh. ²⁷ Akin kinakis tlayakantos, achto mamochiwa nomotlakewal.
²⁸ Ijkó kemi Ne Non onimochi ni tlakatl amo oniwala manechtekitilikah, yej oniwala onitekikito iwa nimotemakas manechmiktikah iwa ijkó miakeh mamomaxixtikah.

Jesús kimpajtia ome tlakah non amo tlachiah

(Mr. 10:46-52; Lc. 18:35-43)

²⁹ Ijkuak yejwah yokistiyah de Jericó, miakeh tlakah oyajkeh iwan Jesús. ³⁰ Itempa n ojtli oewatokah ome tlakah non amo otlachiyah. Ijkuak yejwah okikakeh Jesús ik ompa opanotiaya, oksajtsilijkeh chikawak:

—¡Tejwatsi, ikone n David, techiknomati!

³¹ N tlakah okoninmajwayah pero yejwah okachi otsajtsiah:

—¡Tejwatsi, ikone n David, techiknomati!

³² Ijkuakó Jesús omóketski, okínnotski n tlakah non amo otlachiyah iwa okintlajtlani:

—¿Tlan nonkinekih manomechchiwili?

³³ Yejwah okilijkeh:

—Tejwatsi, tiknekih titlachiaskeh.

³⁴ Jesús okinmiknoma, iwa okintelkoli inmixelolowah. San nima owaltlachixkeh, iwa okitokakeh n Jesús.

21

Jesús kalaki Jerusalén kemi Rey

(Mr. 11:1-11; Lc. 19:29-40; Jn. 12:12-19)

¹ Ijkuak ya onkalakiah Jerusalén, okalakitoh kan altepetl de Betfagé, non kajki inakastla n olivostepetl. Jesús okintitlanki ome itlamachtijkawah, ² iwa okinmili:

—Xiwiwah kan neká altepetl non kajki tlayakapa. Ompa nonkajsiweh se burra ilpitok iwa ikonetsi. Xikintojtomakah iwa techalinwikilikah. ³ Iwa tla aka nomechtlajtlania tleka nonkintojtomah, xikilikah Toteko Jesús kintekitiltis, iwa san nima kintekopilis.

⁴ Ijkó otlamochi para mamochiwa tlan okijto n profeta Zacarías:

⁵ Xikinmilikah n tlakah de Sión:

“Xikitakah, Nomorey wits nomonawak,

yolyámanki, iwa tlejkotiwits ipan se burrojtsi,

ikonetsi se yolkatl non tlamama.”

Zac. 9:9

⁶ Ijkuakó itlamachtijkawah oyajkeh iwa okichijkeh kemi Jesús okinnawati. ⁷ Okualikakeh n burra iwa ikonetsi, iwa ika intlakenwah okipejpechtijkeh. Iwa Jesús otlejkok ipan burrojtsi. ⁸ Iwa miakeh tlakah oyayah iwan Jesús, okinsoayah intlakenwah itech ojtli. Oksikimeh okintekiah imamayowah n kuameh iwa okinsoayah itech ojtli. ⁹ N tlakah non otlayakanayah, iwa non oyayah tlakuilapa otsajtsitiayah chikawak:

—¡Hosanna! ¡Matehmakixti ikone n rey David! ¡Tiochitok akin wits itech Itoka n Toteko Dios! ¡Hosanna kan ilwikak!

¹⁰ Ijkuak Jesús okalak Jerusalén, nochteh n tlakah omopajsolojkeh, iwa okijtoayah:

—¿Akin nin tlakatl?

¹¹ Iwa n tlakah okijtoayah:

—Ye n profeta Jesús, non de Nazaret de Galilea.

Jesús okwalinkixti n tlasemankeh itech Weyi Tiopa

(Mr. 11:15-19; Lc. 19:45-48; Jn. 2:13-22)

¹² Jesús okalak kan Weyi Tiopa iwa okinkixti nochteh non otlakojtokah iwa non otlana-makatokah. Okinxitronkopili inmesajwah non okipatlayah tomi, iwa non okinnamakayah palomajtsitsinteh. ¹³ Iwa okinmili:

—Itech itlajkuilol Dios kijtoa: “Nocha kinotsaskeh kali kan motiotsajtsiliah.”

Is. 56:7

'Pero nomejwah yononkikopkeh se kali kan motlaatiah ichtekkeh.

Jr. 7:11

¹⁴ Kan Weyi Tiopa omijkuaniykeh inawak non amo otlachiyah iwa non amo oweletiah onejnemiah, iwa Jesús okimpajti. ¹⁵ Pero ijkuak n tiopixkeh non tlayakantokeh iwa non kitemachtiah n tlanawatili, okimitakeh n milagros non okinchiwaya Jesús, iwa okinkakeh otsajtsiah n chochokomeh: “¡Hosanna ikone n David!”, okualankamikeh. ¹⁶ Iwa okilijkeh n Jesús:

—¿Tikkaki tlan kijtoah ninteh?

Jesús okinnankili:

—Ejé, nikinkaki, pero ¿mach ayamó nonkiamapoah itlajkuilol Dios kan kijtoa?

Otikchi mamitsweyilikah n pípilteh,

iwa n kokoneh non ok chichih.

Sal. 8:2

¹⁷ Ijkuakó Jesús okiski de Jerusalén iwa oyá kan altepetl de Betania iwa ompa omoka non yúali.

Jesús iwa se igoskuawitl

(Mr. 11:12-14, 20-26)

¹⁸ Kuinal, ijkuak otlejkoaya Jerusalén, owalxitlatlak. ¹⁹ Ijkuakó okitak se igoskuawitl non okatka iselti itempa n ojtli, Ye okitlatemolito pero amo okajsik nion se igos, yej san tekil omoxiujyoti. Ijkuakó Jesús okili n igoskuawitl:

—¡Ayik xiktemaka igos!

Iwa n igoskuawitl sa nima owaki. ²⁰ Ijkuak itlamachtijkawah okitakeh, omotlajtlachialtiykeh iwa okitlajtlaniykeh n Jesús:

—¿Kenomi n igoskuawitl sa nima owaki?

²¹ Jesús okinnankili:

—De milajka nomechilia, tla nonkipiah tlaneltokálistli, amo sanwel nonkichiwaskeh ijko, yej noiwa weletis nonkiliseh nin tepetl: “Ximoachiwa iwa ximotlamotlati ijtik weyi atl”, iwa ijko tlamochiwas. ²² Iwa nochi tlan nonkitlajtlaniykeh itech nomototsajtsilis, nonkiseliseh tla nonkineltokah ijko mochiwas.

Itlanawatilis Jesús

(Mr. 11:27-33; Lc. 20:1-8)

²³ Ijkuakó Jesús okalakito kan Weyi Tiopa de Jerusalén iwa ijkuak otlamachtijtoka, owalmijkuaniykeh inawak sikimeh tiopixkeh non tlayakantokeh iwa sikimeh tetajmeh non tlayakantokeh kan Weyi Tiopa iwa okitlajtlaniykeh:

—¿Akin omitstekiawjtlati?

²⁴ Jesús okinnankili:

—Ne noiwa nomechtlajtlanis, iwa tla nonnechnankiliseh, ijkuakó Ne noiwa nomechilis akin onechtekiawjtlati. ²⁵ Techilikah, ¿akin okinawati n Juan matlakuaateki? ¿Okinawati Dios noso okinawatiykeh n tlakah?

Ijkuakó yejwah opé moichtakatlatlapowiah:

—Tla tikijtoskeh Dios okinawati, Ye techilis: “¿Tleka kiné amo ononkineltokakeh?”

²⁶ Iwa tla tikijtoskeh san tlakah okinawatiykeh, matikinmawilikah n tlakah, porke nochteh kimatokeh Juan se profeta.

²⁷ Iwa okinankilijkeh n Jesús:

—Mach tikmatih.

Jesús noiwa okinnankili:

—Ne noiwa mach nomechilis akin onechnawati ijko manikchiwa.

N tlakatl iwa ome itelpochwah

²⁸ Jesús okinmili:

—Kenomi nonkitah. Se tlakatl okimpiaya ome itelpochwah, iwa se okili: “Nokone, xitekititi kan uvaskuajyo.” ²⁹ Itelpoch okinankili: “¡Amo nias!” Pero satepa omoyolkopki iwa oyá. ³⁰ Otlanki n teta noiwa okinawati non ok se itelpoch, iwa ye okinankili: “Ejé, nias.” Pero mach oyá. ³¹ ¿Akin okichi tlan okinekia n teta?

Nochteh okijtojkeh:

—Non okitlakitak.

Ijkuakó Jesús okinmili:

—De milajka nomechilia n tominoolojkeh iwa n awilsiwameh, yejwah achto kalakiskeh kan Dios tlanawatia. ³² Porke Juan Bautista owala onomechmachtiko kenijki kineki xinemikah Totajtsi Dios, iwa nomejwah amo ononkineltokakeh. Pero n tominoolojkeh non achto otlachtekiah iwa n awilsiwameh okineltokakeh. Iwa maya ijko ononkitakeh, nomejwah amo ononmoyolpatlakeh nion satepa ononkineltokakeh.

Sikimeh tetlakéwalteh amo kualteh
(Mr. 12:1-12; Lc. 20:9-19)

³³ 'Xikkakikah ok se tlapoálistli: Se tekowa okintookak uvas itech itlala iwa nochi okikorralti. Okichijchi se atékochtli kan kimpatskas n uvas, noiwa okichijchi se torre wejkapá kan teljkos iwa kimokuitlawis iuvaskuajyo.

'Satepa okinkajtewili sikimeh impartidariojwah iwa oyá wejka. ³⁴ Ijkuak oajsiko n tonati para motlakeh, okintítlanki sikimeh itlakawah para makikuitih tlan ye iaxka. ³⁵ Pero impartidariojwah okinmokitskilijkeh itlakawah n tekowa. Se de yejwah okiwitekeh, ok se okimiktijkeh iwa ok se okimojmotlakeh ika tetl. ³⁶ Satepa n tekowa okintítlanki okachi miakeh itlakawah, pero n partidarios noiwa ijko okintoktijkeh.

³⁷ 'Sa iksemi, okintítlanili ipiltsi iwa okimoli: "Nopiltsi moneki kitlakitaskeh." ³⁸ Pero ijkuak n partidarios okitakeh ipiltsi n tekowa okimolijkeh: "Ye ni akin kimokawis tlan iaxka ita, matikmiktikah iwa tikmokawiskeh tlan kiaxkatiskeh." ³⁹ Iwa n partidarios okikitskijkeh ipiltsi n tekowa, okwalkixtijkeh de itlal iwa okimiktijkeh. ⁴⁰ Ijkuak wits n tekowa de non uvas, ¿tlan kintoktis nonteh partidarios?

⁴¹ Yejwah okinankilijkeh:

—Kinmijmiktis nonteh amo kualteh partidarios, iwa ilawerta kinmaktilis oksikimeh partidarios non kiyekmakaskeh tlan iaxka ijkuak motekis n uvas.

⁴² Jesús okinmili:

—¿Ayamó nonkiamapoah itlajkuilol Dios kan kijtoa?:

N tetl non kalchijchijkeh ik nepa lado okitlakaltechojkeh, yomókopki non okachi tetlakxilia.

Ijko okichi Toteko,

iwa techtlajtlachialtia.

Sal. 118:22-23

⁴³ 'Yika, ayakmó nonkalakiskeh kan Dios tlanawatia, yej axa kinkawiliskeh makalakikah non de wejka nonkichiawah tlan kimonekiltia Dios. ⁴⁴ Akin wetsis ipan nin tetl mopopostekis, pero tla n tetl wetsis ipan se, san semi kikuejkuechos.

⁴⁵ Ijkuak n tiopixkeh non tlayakantokeh iwa n fariseos okinkakeh ninteh tlapoálisteh, okajsikamatkeh yejwah okinmilijtoka. ⁴⁶ Ijkuakó okinekiah kikitskiskeh n Jesús, pero okinmawiliayah n tlakah, porke n tlakah okineltokayah Jesús Ye profeta.

22

Kan monamiktiah
(Lc. 14:15-24)

¹ Jesús oksepa opé kintlapowia ika tlapoálistli iwa okinmili:

² —Itech ilwikak kan Dios tlanawatia, noiwa kemi tlan okichi se rey itech se ilwitl ijkuak okinamikti itelpoch. ³ N rey okintítlanki itlakawah makinnotsatih itlatlalwilwah, pero yejwah mach okinekeh oyajkeh. ⁴ Oksepa okintítlanki oksikimeh itlakawah iwa okinawatia: "Xikinmilikah notlatlalwilwah ya kajki n tlákuali. Yonikinmikti notorojwah iwa oksikimeh noyolkawah non okachi tojtomawakeh, iwa yotlatetekakeh, sa mawalmuikakah nika itech ilwitl." ⁵ Pero yejwah mach owalajkeh. Se otekinito itlala, ok se otlasemanato. ⁶ Iwa oksikimeh okinkitskijkeh itlakawah n rey, okinwitekeh iwa okinmiktijkeh. ⁷ Ijkuakó n rey sa tlawel okuálanki, iwa okinnawati isoldadojwah makinmijmiktiti nekateh temiktijkeh iwa makinchichinilikah inmaltépeu. ⁸ Otlanki okinmili itlakawah: "Nochi ya kajki, pero notlatlalwilwah non achto onikintlalwi amo yejwah walaskiah. ⁹ Xiawah itech ojtli iwa xikintlalwikah nochteh akimeh nonkinmajsiskeh, iwa mawikih nika itech ilwitl."

¹⁰ Itlakawah n rey okinmoololojkeh nochteh n tlakah non okinmajsikeh itech ojtli, non kualteh iwa non amo kualteh. Ijkó nochi n kali kan monamiktulo otenki.

¹¹ Ijkuakó n rey okinmitato non otlakuajtakah. Okitak se tlakatl non amo otlakentitoka kemi omonekia matlakentito itech non ilwitl. ¹² Iwa n rey okitlajtlani: “Noknitsi, ¿kenijki otikalak iwa amo titlakentitiwits kemi moneki itech nin ilwitl?”

Pero n tlakatl amo otlanankili. ¹³ Ijkuakó n rey okinmili n tetlamakakeh: “Xikijilpikah iwa xikontlamotlakah kan tleyua, ompa chokas iwa tlanetsonis.” ¹⁴ Porke Dios kinnotsa miakeh tlakah, pero san sikimeh kimpejpenah.

Kitlajtlaniah n Jesús kox kualti se kitlaxtlawilis impuesto n César
(Mr. 12:13-17; Lc. 20:20-26)

¹⁵ Ijkuakó n fariseos oyayajkeh iwa omotlatlalwitoh kenijki kichiwaskeh mamotlapololti itech tlan kijtoa n Jesús iwa ijko weletis kiteiliskeh. ¹⁶ Yika n fariseos okintitlankeh itlamachtijkawah iwa sikimeh non omowikayah iwan Herodes para makilitih:

—Tlamachti, tikmatokeh Tejwatsi tiktemachtia tlan milák, iwa titlamachtia kenomi moneki se yetos kemi Dios kineki. Amo timotlachilia nion mitstekipachoa mamitskakikah.

¹⁷ Techonili: ¿Kox kualti se kitlaxtlawilis impuesto para n weyi tlanawati César, noso amó?

¹⁸ Pero Jesús okinatiah san okiyejyekojtokah iwa okinmili:

—Íxkopteh, ¿tleka nonnechyejyekoah? ¹⁹ Techititakah se tomi non ika nonkitlaxtlawah impuesto.

Yejwah okititijkeh se denario. ²⁰ Iwa Ye okintlajtlani:

—¿De akin ixko iwa tlan ijkuilitok?

²¹ Yejwah okinankilijkeh:

—De César.

Ijkuakó Jesús okinmili:

—Xikmakakah n César tlan iaxka n César, iwa xikmakakah Dios tlan iaxka Dios.

²² Ijkuak okikakeh tlan okinmili, omotlajtlachialtijkeh. Ayakmitla okilijkeh iwa oyayajkeh.

N saduseos kitlajtlaniah n Jesús kox moyolitiskah non yomikkeh
(Mr. 12:18-27; Lc. 20:27-40)

²³ Non tonati sikimeh saduseos non kijtoa ke non yomikkeh ayakmó moyolitiah, omijkuanijkeh inawak Jesús iwa okitlajtlanjkeh:

²⁴ —Tlamachti, Moisés okijto tla se tlakatl mikki iwa amo kinkajtewa ipilwah iwan isiwa, n teikni moneki monamiktis iwan iknosiwatl iwa ijko ijkuak kimpiaskeh impilwah, yetoskeh inmaxka non yomikki. ²⁵ Towah ochanchiwayah chikome iknimeh tlakah. Non teteachka omonamikti iwa omikki. Kemi amo okimpixkeh impilwah, okika isiwa, iwa ok se ikni non kualtoka omonamikti iwan iknosiwatl. ²⁶ Pero ye noiwa omikki, iwa non ipan eyi iknimeh noiwa omonamikti iwan iknosiwatl, pero noiwa omikki. Ijkó n chikomeh iknimeh omonamiktijtjajkeh iwan non siwatl, pero nochteh omiktiajkeh. ²⁷ Sa iksemi noiwa omikki n siwatl. ²⁸ Axa, keman moyolitiskah non yomikkeh, ¿de akin yetos tesiwa, tla iwa n chikome iknimeh omonamikti?

²⁹ Jesús okinmili:

—Nomejwah nonmotlapololtijtokeh porke amo nonkajsikamatih itlajkuilol Dios nion iweletilis. ³⁰ Ijkuak moyolitiskah, n tlakah iwa n siwameh mach ok monamiktiskah, porke yetoskeh kemi iangelwah Dios ompa ilwikak. ³¹ Pero ken ya timotlapowijtokeh moyolitiskah n mikemeh, ¿mach ayamó nonkiamapoaah tlan Dios onomechili? Ye okijto: ³² “Ne Dios de Abraham, Dios de Isaac iwa Dios de Jacob.” Ye amo Dios de non yomikkeh, Ye Dios de akimeh yolitokeh. Éx. 3:6

³³ Ijkuak nochteh okikakeh, omotlajtlachialtijkeh de kenomi okinmachtia.

Non okachi weyi itlanawatil Dios
(Mr. 12:28-34)

³⁴ N fariseos omoololojkeh ijkuak okimatkeh n Jesús okinkamatsak n saduceos. ³⁵ Seme de yejwah non okitemachtia n tlanawátili okinekia kiyeyyekos n Jesús iwa okitlajtlani:

³⁶—Tlamachti, ¿katlie tlanawátili okachi weyi kijosneki?

³⁷Jesús okili:

—“Xiktlasojtla Moteko Dios ika nochi moyolo, ika nochi moalma iwa ika nochi motlalamikilis.” ³⁸Ye nin tlanawátili non okachi tlayakantok iwa okachi weyi kijosneki. ³⁹Iwa onka ok se tlanawátili non kimoiknitia iwa kijtoa: “Xiktlasojtla mokni kemi te timotlasojtla.” ⁴⁰Ninteh ome tlanawátileh kitlakxiliah itlanawatil Moisés iwa intlamachtilis n profetas.

Jesús kintlajtlania n fariseos akin ikone n Cristo

(Mr. 12:35-37; Lc. 20:41-44)

⁴¹Ijkuak n fariseos ok omooolojkeh, ⁴²Jesús okintlajtlani:

—¿Tlan nonkimatih de Cristo? ¿Cristo akin ikone? ¿Akin ita Cristo?

Yejwah okilijkeh:

—Walewatok de n rey David.

⁴³Ye okinmili:

—Tla ijko, ¿kenijki David por n Espiritu okínotski Noteko? Porke n rey David okijto:

⁴⁴Toteko Dios okili Noteko:

“Ximotlali noyekma,

asta manikintlali akimeh mitskokoliah itlampa mokxiwah.”

Sal. 110:1

⁴⁵Tla inewia David kinotsa Noteko n Cristo, ¿kenomi Cristo weletis yetos ikone n David?

⁴⁶Iwa amaka owéletki okinankili nion se tlájtoli, iwa desde non tonati, mach ok aka omixewi itla okitlajtlani.

23

Jesús kintlajtlakoltia n tlamachtijkeh iwa n fariseos

(Mr. 12:38-40; Lc. 11:37-54; 20:45-47)

¹Ijkuakó Jesús okinmili n tlakah iwa itlamachtijkawah:

²—Non kitemachtiah n tlanawátili iwa n fariseos kimoliah san yejwah weleti kajsikamatih tlan kijtoa itlanawatil Moisés. ³Ijko kiné, xikchiwakah nochi tlan nomechmachtiah, pero amo xikchiwakah tlan yejwah kichiwah. Porke yejwah mach kichiwah tlan kitemachtiah. ⁴Yejwah kinmamaltiliah n tlakah miakeh tlanawátileh non satlawel owijkeh non yejwah okajxitilijkeh. Iwa kintoktiah n tlakah makimamajtiwah, pero yejwah nion ika se inmajpil kinekih kinwikaskeh. ⁵Teixpa kichiwah tlan kuali san para makinmitakah n tlakah. Iwa ijtk sikimeh kajajtsinteh okinwikayah n májtaktli tlanawátileh (diez mandamientos) iwa okinmopilitiliah itech inmixkuak iwa itech inmah. Noiwa okiwilitayah motlakentiseh ika intlakeh weyak. *Éx. 13:1-16; Dt. 6:4-9, 11:13-21*

⁶Kimpaktiah moyayantiseh tlayakapa kan tlatlakualo, noiwa kan sinagogas kiwilitah moyayantiseh kan nochteh makinmitakah. ⁷Kinekih makinyektlajpalokah iwa makinnotsakah “tlamachtijkeh” itech ojtlí iwa itech tiánkistli.

⁸Pero nomejwah amo xikmokawilikah manomechnotsakah tlamachti, porke non nochteh nonmikinimeh iwa nonkipiah san se Nomotlamachti. ⁹Iwa amaka xikilikah padre itech nin tlatlaktli, porke nonkipiah san se Padre non kajki ilwikak. ¹⁰Nion xikmokawilikah manomechnotsakah “tlayakankeh”, porke sanwel Cristo nomechyakana. ¹¹Akin kinekis tlayakantos nomonawak, achto manomechtekichiwi. ¹²Porke akin inewia moweyilia, satepa moiknomatinemis, pero akin amo moweyilia, kiweyijatlaliskeh.

¹³¡Miálmasteh, tlamachtijkeh iwa fariseos, íxkopteh!, porke nonkintsakuiliah n tlakah para amo makalakikah itech ilwikak kan Dios tlanawatia. Nomejwah amo nonkalakih nion nonkinkawiliah makalakikah akimeh kinekih kalakiseh. ¹⁴*

* 23:14 Nin bersikulo amo nesi itech non okachi yowejkajkeh tlajkuulolteh iwa kijtoa: ¡Miálmasteh de nomejwah tlamachtijkeh iwa fariseos íxkopteh!, nomejwah nonteixkajayajkeh porke nonkinkixtiliah tlan inmaxka n iknosiwameh, iwa satepa satlawel nomotiotsajtsiliah para manomechitakah nik satlawel non kichiwah tlan kualí. Yika nomejwah okachi nomechtalajyowiltiseh.

¹⁵ ¡Miálmasteh tlamachtijkeh iwa fariseos, íkopteh! Nomejwah non nentinemih itech nochi n tlaltípkaktli para aka nonkichiwaltiskeh makitlakita nomotlamachtis, iwa ijkuak yononkimotlanilijkeh, nonkikopah ome welta okachi amokuali ke nomejwah iwa ijko makimotlanili n miktla.

¹⁶ ¡Miálmasteh, tlayankehe ixpojpóyakteh! Nomejwah nonkijtoah: “Akin motlajtolsentlalia por n Weyi Tiopa amitla ipati, pero tla motlajtolsentlalia por n ‘oro’ non kajki itech Weyi Tiopa, moneki makichiwa tlan yokijto.” ¹⁷ ¡Tsonwewemeh ixpojpóyakteh! ¿Tlan okachi ipati: N oro, noso n Weyi Tiopa, non kitiochiwa n oro? ¹⁸ Noiwa nonkijtoah: “Akin motlajtolsentlalia por n artal, amitla ipati, pero tla motlajtolsentlalia por n tlamánali non kajki ipan artal, moneki makichiwa tlan yokijto.” ¹⁹ ¡Tsonwewemeh ixpojpóyakteh! ¿Tlan okachi ipati, n tlamánali non kajki ipan artal, noso n artal non kitiochiwa n tlamánali? ²⁰ Akin motlajtolsentlalia por n artal, noiwa motlajtolsentlalia por nochi tlan kajki itech. ²¹ Iwa akin motlajtolsentlalia por n Weyi Tiopa, noiwa motlajtolsentlalia por Akin chantitok itech. ²² Iwa akin motlajtolsentlalia por n ilwikak, motlajtolsentlalia por iyayan Totajtsi Dios, iwa por Akin ewatok itech.

²³ ¡Miálmasteh, tlamachtijkeh iwa fariseos, íkopteh! Nomejwah nonkiaxkatiliah Dios nomodiesmo de nomomenta, nomoanis iwa nomokomino, pero mach nonkichiwah tlan okachi weyi kijtosneki inawak Dios, kemi xiyeknemikah, xiteiknomatikah iwa xiknel-tokakah Dios. Ye ni tlan moneki nonkichiwaskeh, pero tlan nonkitemakatiwitseh ijko xiktemakatiwiah. ²⁴ ¡Teyakankeh ixpojpóyakteh, nomejwah nonkitsetjseloah n atl para makitseko n moyotl pero nonkitoloah se kameyo!

²⁵ ¡Miálmasteh, tlamachtijkeh iwa fariseos, íkopteh!, porke nonkipopoah san ixko nomovaso iwa nomoplato, pero ik tlajitk tentokeh ika tlan amokuali, ika tlachtékílistli iwa n tomináptli. ²⁶ Fariseo ixpojpóyaktli, achto xikijtipopoa n vaso iwa n plato, ijko noiwa mochipawas kala.

²⁷ ¡Miálmasteh, tlamachtijkeh iwa fariseos, íkopteh!, porke nomejwah kemi miktékochteh non kinmistayaliah pero ik tlajitk tentokeh ika iomiowah n miktel iwa nochi tlan yoiytlakawik. ²⁸ Ijko nomejwah inyakapah n tlakah nonmotah nonyekmilajkameh, pero ijtik nomoyolo non íkopteh iwa non pitsitikeh.

²⁹ ¡Miálmasteh, tlamachtijkeh iwa fariseos íkopteh!, nomejwah nonkinchijchiwiliah intekoch n profetas iwa nontlayekmajmanah kan tooktokeh n kualteh tlakah non yomikkeh. ³⁰ Iwa nonkijtoah: “Tla tejwah tietoskiah ijkuak onemiah totatawah, amo tikimpalewiskiah makinmiktikah n profetas.” ³¹ Ika tlan nonkijtoah, nomonewiah nonkinextiah nontepilwah de akimeh okinmiktijkeh n profetas. ³² ¡Iwa axa sa poliwi xikyakatlamikah tlan okipewaltijkeh nomotatawah!

³³ ¡Koameh! ¡Nomejwah ken tliikoameh! ¿Kenijki nonkichililiseh nomotlaxtlawil non nomechmakaskeh miktla? ³⁴ Yika, Ne nikintitlanis, profetas, ixtlamatkeh iwa tlamachtijkeh. Pero nomejwah sikimeh nonkinmiktiseh iwa nonkinkrusifikaroskeh, iwa oksikimeh nonkinwitekiseh kan nomosinagogas iwa nonkintotojtokatinemiseh itech se noso ok se altepetl. ³⁵ Yika, nomechtlajtlakoltiseh de inmikilis nochteh n tlakah yolchipawakeh, desde Abel asta Zacarías ikone n Berequías, akin nomejwah ononkimiktijkeh itlajkotia n Weyi Tiopa iwa n artal. ³⁶ De milajka nomechilia, nochi nin tlajjyowilistli wetsiki itech ninteh tlakah.

*Jesús kichokilia n Jerusalén
(Lc. 13:31-35)*

³⁷ ¡Jerusalén, Jerusalén, te tikinmiktia n profetas iwa tikinmojmotla ika tetl non kintitlani Dios! ¡Miake welta oniknekia nikinmoololos mopilwah kemi n siwapio kinmoololoa ipiotsitsiwah itlampa ijaswah, pero amo otiknek! ³⁸ Yika, axa nomo Weyi Tiopa mokawas saijki iwa iselti. ³⁹ Porke ayakmó nonnechitaskeh asta maajsiki n tonati ijkuak nonkijtoskeh: “Matiochito Akin wits itech Itoka n Toteko Dios.”

24

N Weyi Tiopa de Jerusalén kixixititsaskeh

(Mr. 13:1-2; Lc. 21:5-6)

¹Ijkuak Jesús okiski de kan Weyi Tiopa, itlamachtijkawah omijkuanijkeh inawak iwa opé kiititiah kenomi omajmantoka n Weyi Tiopa. ²Jesús okinmili:

—¿Nonkitah nochi ni? De milajka nomechilia, mach ok mokawas nion se tetl ipan ok se tetl. Nochi kixixititsaskeh.

Ijki tlamochiwas ijkuak ya pojpoliwiti n tlaltípkaktli

(Mr. 13:3-23; Lc. 21:7-24; 17:22-24)

³Ijkuak Jesús oewatoka kan Olivostepetl, itlamachtijkawah omijkuanijkeh inawak iwa okitlajtlanjkeh:

—Techili, ¿kermania ijko tlamochiwas, iwa tlan monextis ijkuak ya tiwalmuikas iwa kermania ya tlajtlamis nin tlaltípkaktli?

⁴Jesús okinnankili:

—Ximotlachilikah, amaka manomechkajkayawa, ⁵porke miakeh witseh itech Notoka iwa kijtoskeh: “Ne Ni Cristo”, iwa miakeh kinkajkayawaskeh. ⁶Nomejwah nonkikakiskeh onka guerra iwa motlapowiskeh yetos guerra. Pero amo ximomojtikah, porke ijko tlamochiwas, pero ayamó tlamis n tlaltípkaktli. ⁷Porke se país momakas iwa n ok se, iwa se altepetl momakas iwa n ok se. Yetos apisotl, iwa sentetl tlalolinis. ⁸Pero ijkuak ijko tlamochiwas, sikin pewa n tlaijyowlistli.

⁹Ijkuakó nomechtemaktiskeh para manomechtlaijyowiltikah iwa nomechmiktiskeh. Nochteh n tlaltípkaktlakah nomechkokoliskeh por nonnechneltokah. ¹⁰Ijkuakó miakeh ayakmó kineltokaskeh Dios, mokokoliskeh iwa motejtemaktiskeh. ¹¹Monextiskeh miakeh profetas tekajkayajkeh iwa miakeh kinkajkayawaskeh. ¹²Momiakilis n tlajtlákoli, yika miakeh ayakmó tetlasojtlaskeh. ¹³Pero akin nochi kixikos, momakixtis. ¹⁴Iwa ijkuak nin kualitlajtoli non techilia kenomi Dios tlanawatia, motetlapowis itech nochi n tlaltípkaktli para nochteh makimatikah. Iwa ijkuakó, tlamis n tlaltípkaktli.

¹⁵Ijkuak nomejwah nonkitaskeh tlan pitsotik moketos kan Weyi Tiopa. Makajsikamati akin kiamapoa tlan okijkuilo n profeta Daniel, —akin kikaki makajsikamati—, ¹⁶akimeh yetoskeh kan tlali de Judea, macholotiwetsikah kan tepemeh. ¹⁷Akin yetos ikpak ikal, amo mawaltemo makixiktiki itla, ¹⁸iwa akin yetos itlala amo mawalmokopa icha makikuiki ikoto. ¹⁹¡Miálmasteh n siwameh non itech non ora makixixtokah konetl noso matlachichitijtokah! ²⁰Ximotiotsajtsilikah tla nonchoslokeh, amo mayeto itech sewaya nion itech sábado, ²¹porke n tlaijyowílistli yetos satlawel temojti non ayamaka ijko okitak desde ijkuak omonexti n tlaltípkaktli, iwa ayik oksepa ijko tlamochiwas. ²²Iwa tla nonteh tonatijmeh amo motsikitsintilisikah, amaka yolitoskia, pero Dios kintsikitsintilis nonteh tonatijmeh por akimeh Ye yokinmopejpeni.

²³Ijkuakó tla se nomechilis: “Xikitakah, nika kajki n Cristo” noso, “nepa” amo xikneltokakah. ²⁴Porke monextiskeh cristos iwa profetas tekajkayajkeh, iwa kinchiwaskeh wejweyi señales iwa milagros non ayik motikateh, kinkajkayawaskeh n tlakah iwa kinekiskiah asta akimeh Dios yokimpéjpenki. ²⁵Xikilnamikikah tlan Ne yonomechmatiltijka. ²⁶Yika, tla se nomechilia: “Xikitakah nepa ka kan tlaltejtéyinki”, amo xiwiah, noso: “Xikitakah, nepa tlaatitok”, amo xikneltokakah. ²⁷Porke ijko kemi ijkuak tlamijmilini mota kan ik kisa tonati asta kan kalaki tonati, ijko tlamochiwas ijkuak niwalmokopas Ne Non onimochi ni tlakatl. ²⁸Iwa san kan ik yetos n miketl ompa moololoskeh n tsojpilomeh.

Jesús walmokopas

(Mr. 13:24-37; Lc. 21:25-33, 17:26-30, 34-36)

²⁹Sa nima ijkuak yopanokeh nonteh tonatijmeh de tlaijyowílistli temojti, n tonati walsewis, n metsi ayakmó tlawis. Is. 13:10 N sítlalteh wetsiskeh, iwa n chikawálistli non kajki ilwikak bibiokas. Is. 34:4 ³⁰Ijkuakó motas itech ilwikak noneskayo Ne Non onimochi

* 24:15 Xikitakah Dan. 9:27.

nitlakatl. Iwa nochteh n tlaltikpaktlakah mawiskeh. Iwa nechitaskeh Ne Non onimochi nitlakatl, niwits ipan mexтли de ilwikak ika miak weletlistli iwa mawistlistli. ³¹Iwa ijkuak kipitsaskeh n trompeta kintitlanis iangelwah iwa kinmoololos nochteh n tlakah non Ye yokinmopejpenili itech nochi n tlaltikpaktli.

³²Xikkajsikamatikah tlan kijtosneki nin tlapoálistli: Ijkuak imamayowah n igoskuawitl seliah iwa pewa moxiujyotiah, nomejwah nonkimatokeh ya pewas n tonala. ³³Yika, ijkuak nochi ni nonkitaskeh, xikmatikah ya tlamochiwas. ³⁴De milajka nomechilia, nochi ni tlamochiwas achto de maixpoliwikah n tlakah non yolitokeh itech ninteh tonatijmeh. ³⁵N ilwikak iwa n tlaltikpaktli pojpoliwiskeh, pero notlajtol mach pojpoliwis.

³⁶Pero n tonati iwa n ora ijkuak ijko tlamochiwas amaka kimati, nion ángelteh non kateh ilwikak, nion Ne, yej sanwel Notajtsi kimatok.

³⁷Iwa ijko kemi opanok ijkuak onemia n Noé, ijko yetos noiwa ijkuak niwits Ne Non onimochi ni tlakatl. ³⁸Itech nekateh tonatijmeh ijkuak ayamó owalaya n chikawak kiawitl, n tlakah otlakuayah, okoniah, omonamiktiayah iwa okinmijtlaniah ichpokameh, asta n tonati ijkuak Noé okalak kan weyi arka. ³⁹Mach okajsikamatkeh asta ijkuak okinmajsiko non kiawitl temojti iwa nochteh okinwik. Ijko noiwa tlamochiwas ijkuak niwalmuikas, Ne Non onimochi ni tlakatl. ⁴⁰Itech non tonati, ome tlakah yetoskeh intlala. Se kiwikaskeh iwa ok se kikajtewaskeh. ⁴¹Ome siwameh testoskeh. Se kiwikaskeh iwa ok se kikajtewaskeh.

⁴²Xiijtsatokah, porke amo nonkimatih kemia walmuikas Nomoteko. ⁴³Pero xikkajsikamatikah tlan nomechilia: tla se chane kimatiskia tlan oras kalakiki n ichtek, ye ijsatoskia iwa amo kitekawiliskia aka makalaki icha para makitlachteki. ⁴⁴Ijko nomejwah noiwa xiijtsatokah, porke Ne Non onimochi ni tlakatl niwalkalakiki ijkuak nomejwah mach nonnechchiah.

*N tetlakéwali tetlakitak iwa non amo tetlakita
(Lc. 12:41-48)*

⁴⁵N tekowa kipejpena se tetlakéwali yekmilajka iwa tetlakitani, ye kinawatia makinmokuilaw n oksikimeh tlakéwalteh iwa makintlakualti ipan ora. ⁴⁶¡Miak paklistli kipia neká tlakéwale non iteko kualajsi kichijtok tlan okinawati! ⁴⁷De milajka nomechilia, iteko kitlalis makinawati nochi tlan kipia. ⁴⁸Pero tla se amo kuali tetlakéwale, kimolia: “Noteko ok wejkas”, ⁴⁹iwa pewa kintlajjowiltia n tetlakéwalteh, iwa tlakuajtinemi iwa konitinem iwan tlawankeh. ⁵⁰Ijkuak n tekowa walmokopa itech tonati ijkuak itlakau amo kichia, iwa itech se ora ijkuak ye amo kimati, ⁵¹kitlajjowiltis chikawak iwa kititlanis kan kateh n íxkopteh. Ijkuakó chokas iwa tlannetsonis.

25

N májtlakteh ichpokameh

¹Itech ilwikak kan Dios tlanawatia, ye kemi omochijkeh májtlakteh ichpokameh non okinmonankeh intlawilwah iwa okinamikitoh n novio. ²Mákuili ichpokameh kuali intlalanamikilis iwa mákuili amó. ³Non amo tlanamikilisejkeh, okinwikakeh intlawilwah pero mach okiwikakeh oksiki aseite. ⁴Pero n ichpokameh tlanamikilisejkeh, ixkoya okiwikakeh oksiki aseite para intlawilwah. ⁵Kemi n novio owejkawaya, nochteh n ichpokameh okinkitski kochílistli, iwa okochtlamilajkeh. ⁶Kemi ik tlajkoyuak aka owaltsajtsik: “¡Ompa wits n novio, xikonnamikitihi!” ⁷Ijkuakó nochteh n ichpokameh omejtewakeh iwa opé kinyektalialah intlawilwah. ⁸Iwa n mákuilteh ichpokameh non amo tlanamikilisejkeh okinmilijkeh non tlanamikilisejkeh: “Techonmakakah siki nomoaseite, porke totlawilwah ya sejeujtokeh.” ⁹Pero n ichpokameh non tlanamikilisejkeh okinmilijkeh: “Amó, porke tla tomechmakaskeh, mach ok techajxilis nion nomejwah mach nomechajxilis. Okachi kuali xiwiah kan monamaka iwa xikmokowikah.” ¹⁰Pero ijkuak n mákuilteh okikoatoh inmaseite, n novio owalkalakiko. N ichpokameh non omotlatlalijkah okalakeh iwa n novio kan monamiktilo iwa owalmotsak n kaltentli. ¹¹Satapa okalakikoh non amo tlanamikilisejkeh iwa omotlatlautiayah: “¡Noteko, Noteko, techtlatlapoli!” ¹²Pero ye okinnankili: “De milajka nomechilia, ne amo nomechixmati.”

¹³ Ijkuakó Jesús okinmili:

—Xijsatokah nomejwah, porke amo nonkimatih tlan tonati nion tlan ora niajsiti.

Tlapodlistli itech tomi
(Lc. 19:11-27)

¹⁴ Itech ilwikak kan Dios tlanawatia, noiwa tlamochiwa kemi se tlakatl non ya onewaskia wejka. Okínnotski itlakawah iwa okinmajmakatewak itomi makitekilitikah.

¹⁵ Seme de yejwah okimák mákuili sentenario, ok se okimák ome sentenario, iwa non ok se okimák san se sentenario. N tekowa okinmajmaktili itomi kemi ye okiyejekoli weletis kitekilitiskeh, iwa onewak. ¹⁶ Non okinseli mákuili sentenarios, opé tlasemana ika non tomi iwa okíntlanki ok mákuili sentenario. ¹⁷ Noiwa non okimakakeh ome, okíntlanki ok ome sentenario. ¹⁸ Pero non okimakakeh sanwel se sentenario, okitlalpacho iwa okitlaati n tomi non okimák iteko.

¹⁹ Miakeh tonatijmeh satepa, omokopato inteko, iwa okintlajtlani itlakawah tlan okichijkeh ika itomi. ²⁰ Achto okalak non okiselijka mákuili sentenario, iwa okimaktili iteko ok mákuili sentenario iwa okili: “Noteko, tejwatsi otechmák mákuili sentenario, xikita onikíntlanki ok mákuili.” ²¹ Iteko okili: “Kuali otikchi, te kuali tlakéwale iwa titetlakitak. Te kuali otiktekitilti tlan san achitsi onimitsmák, ne nimitsmakas okachi miak. Axa, xikalaki iwa xiyolpaki nowa.” ²² Noiwa omijkuani non okiselijka ome sentenario iwa okjito: “Noteko, tejwatsi otechmák ome sentenario, xikita onikíntlanki ok ome sentenario.”

²³ Iteko okili: “Kuali otikchi, te kuali tlakéwale iwa titetlakitak. Te kuali otiktekitilti tlan san achitsi onimitsmák, ne nimitsmakas okachi miak. Axa, xikalaki iwa xiyolpaki nowa.” ²⁴ Omijkuani noiwa non okiseli sanwel se sentenario, iwa okili: “Noteko, nikmatok tikuejsi iwa tipixka kan amo titooka, iwa titlaoololoa kan amo otitlatepe. ²⁵ Yika, onímauji iwa oniktalalpacho motomi. Axa nika ka tlan moaxka.” ²⁶ Iteko okinankili: “Amo tikuali tlakéwale iwa titlátsijki, kuali yotikmatoka nipixka kan amo nitooka, iwa nitlaoololoa kan amo nitlatepewa. ²⁷ Okachi kuali tikonkawaskia notomi kan banko, iwa ijkuak nimokopaskia, nikselsikia notomi ika ikoneyo. ²⁸ Xikkixtilikah n tomi, iwa xikmaktilikah non kimpia májtlaktli sentenario.” ²⁹ Porke akin kipia, kimakaskeh okachi, iwa okachi kitlawelpias. Pero akin achitsi kipia, nochi kikixtiliskeh tlan san achitsi kipia. ³⁰ Iwa nin tlakéwale non amitla iteki, xixixtikah kala kan tleyua. Ompa chokas iwa tlanetsonis.

Dios kinmixkomakaki nochteh n tlaltikpaktlakah

³¹ Ijkuak Ne Non onimochi ni tlakatl niwalmuikas ika nomawistilis iwan nochteh noangelwah, ijkuakó nimoyayantis ika nochi nomawistilis. ³² Iwa nochteh n tlaltikpaktlakah moololoskeh noyakapa, iwa Ne nikinxexelos ijko kemi se tlájpixki kinxexeloa n ichkameh iwa n tentsomeh. ³³ Nikintlalis n ichkameh ik noyekma iwa n tentsomeh ik noopochma. ³⁴ Ijkuakó Ne n Rey nikinmilis non kateh ik noyekma: “Xiwikih nomejwah, non Notajtsi onomechtiuchi. Xikselikah nochi tlan nomechaxkatiliskeh kan ilwikak non Dios onomechmajmanili desde ijkuak okichijchi n tlaltikpaktili. ³⁵ Porke onixitlatlak iwa ononnechtlakualtijkeh, oniamijmik iwa ononnechatlitijkeh, iwa maya amo ononnechixmatiah, ononnechkalotijkeh. ³⁶ Amo onikpiaya notlake iwa ononnechtlakentijkeh, onimokokoaya iwa ononnechtlajpalotah. Ijkuak onitsaktoka, ononnechitatoh.” Is. 58:6-10; Ez. 18:7; He. 13:3; Stg. 1:27, 2:15-16

³⁷ Ijkuakó tlanankiliskeh n yolmilajkameh iwa kijtoskeh: “Toteko, ¿kermania otimitsitakeh otixitlatlak iwa otimitslakualtijkeh?, noso ¿otiamikkia iwa otimitsatlitijkeh? ³⁸ Noso ¿maya amo otimitsixmatiah, otimitskalotijkeh, noso amo otikpiaya tlan tikonakis iwa otimitslakentijkeh? ³⁹ Noso, ¿kermania otimokokoaya, noso otitsaktoka iwa otimitsontlajpalotah?” ⁴⁰ Ijkuakó nikinnankilis: “De milajka nomechilia, ijkuak nomejwah ijki ononkinchiwilijkeh nokniwah non okachi amitla impati, Ne ononnechchiwilijkeh.”

⁴¹ Ijkuakó nikinmilis non kateh ik noopochma: “Ximoachiwakah nonawak, nomejwah amo nonkualteh, xiwiah ijtik tletl non ayik sewis, non Dios okichijchi para n diablo iwa iangelwah. ⁴² Porke onixitlatlak iwa amo ononnechtlakualtijkeh, oniamijmik iwa amo ononnechatlitijkeh. ⁴³ Amo ononnechixmatiah iwa amo ononnechkalotijkeh, amo

onikpiaya tlan nikonakis iwa mach ononnechtlakentijkeh, onimokokoaya iwa onitsaktoka iwa amo ononnechtlajpalotoh.” ⁴⁴Ijkuakó yejwah nechiliskeh: “Toteko, ¿kemia otimitsitakeh otixitlatlak noso otiamikia, noso amo otikpiaya kan timokalotis, noso amo otikpiaya motlake, noso otimokoko, noso otitsaktoka iwa amo otimitspalewijkeh?” ⁴⁵Ijkuakó nikin-nankilis: “De milajka nomechilia, ijkuak nomejwah amo ononkinchiwilijkeh nokniwah non okachi amitla impati, Ne amo ononnechchiwilijkeh.”

⁴⁶Ninteh kintitlaniskeh kan nochipa tlaijyowijtoskeh, iwa n yolmilajkameh yolitoskeh semijjak.

26

Motlatlalwiah kenomi kimiktiskeh n Jesús

(Mr. 14:1-2; Lc. 22:1-2; Jn. 11:45-53)

¹Ijkuak Jesús otlaniki okintlapowi, okinmili itlamachtijkawah:

²—Nomejwah ya nonkimatokeh, poliwi sa ome tonati pewas n ilwitl de Paskua. Ne Non onimochi ni tlakatl nechtemaktiskeh manechkrusifikarokah.

³Ijkuakó n tiopixkeh non tlayakantokeh, non kitemachtiah n tlanawátili, iwa n tetajmeh non tlayakantokeh kan Weyi Tiopa, omooolojkeh icha n Caifás. ⁴Ompa omotlatlalwijkeh kenomi kitlajtlakolmamaltiskeh n Jesús iwa ijko kikitiskiskeh iwa kimiktiskeh. ⁵Noiwa okimoliayah:

—Amo tikkitskiskeh itech ilwitl de Paskua, porke san tikimpajsoloskeh n tlakah.

Se siwatl kikuaxawilia ajwiálistli n Jesús

(Mr. 14:3-9; Jn. 12:1-8)

⁶Kan altepetl de Betania, Jesús okatka icha n Simón non achto okipiaya lepra. ⁷Ijkuakó se siwatl okualikaya se itekontsi tentok ika ajwiálistli non satlawel patio. Omijkuani kan otlaquajtoka Jesús iwa okitekili ajwiálistli ipan itsonteko. ⁸Ijkuak ijko okitakeh itlamachtijkawah okualankeh iwa okijtojkeh:

—¿Tleka san okawilti? ⁹Weletiskia monamakaskia patio, iwa n tomi tikinmakaskiah non próbesteh.

¹⁰Jesús okinkak iwa okinmili:

—Amo xikkuejsokah nin siwatl, ye okichi tlan kuali. ¹¹N próbesteh nochipa yetoskeh nomowah, pero Ne, amo nochipa nonnechpixtoskeh. ¹²Nin siwatl, ijkuak onecht-lalili ajwiálistli itech nokuerpo, yotlayektlali para ijkuak nechtookaskeh. ¹³De milajka nomechilia, itech nochi n tlaltípkaktli kan motetlapowis nin kualitlájtoli, noiwa motlapowiskeh tlan okichi nin siwatl, iwa ijko se kilnamikis.

Judas Iscariote kitemaktia Jesús

(Mr. 14:10-11; Lc. 22:3-6)

¹⁴Ijkuakó Judas Iscariote seme de n májtlaktli iwa n ome itlamachtijkawah, oyá kan tiopixkeh non tlayakantokeh ¹⁵iwa okinmili:

—¿Kech nonnechmakaskeh tla nonnechmaktilis n Jesús?

Yejwah okitamachijkeh sempóali iwa n májtlaktli (30) platajtomí. ¹⁶Ijkuakó, Judas Iscariote okitemoliaya kenomi kitemaktis Jesús.

N tlamachtijkeh kimajmanah n tlákuali de Paskua

(Mr. 14:12-25; Lc. 22:7-23; Jn. 13:21-30; 1 Co. 11:23-26)

¹⁷Itech ipewayá n ilwitl de Paskua ijkuak mokua n paj non amo kipia levadura, itlamachtijkawah n Jesús omijkuaniykeh inawak, iwa okitlajtlaniykeh:

—¿Kani tikmonekiltia matikchijchiwatih n tlákuali de Paskua?

¹⁸Ye okinmili:

—Xiwiah Jerusalén icha n se tlakatl iwa xikilikah: “N Tlamachtí kijtoa: Noora ya walajsitwiwits, iwa mocha nikmomajsewis n tlákuali de Paskua iwan notlamachtijkawah.”

¹⁹Itlamachtijkawah okichijkeh kemi Jesús okinnawati, iwa okimajmankeh n tlákuali de Paskua.

²⁰ Ijkuak otleyuak, Jesús omotlali inakastla n mesa iwa n májtlaktli iwa ome itlamachtijkawah. ²¹ Ijkuak otlakuajtakah okinmili:

—De milajka nomechilia, seme de nomejwah nechtemaktis.

²² Yejwah tlawel omoyolkokojkeh, iwa sejse opé kitlajtlania:

—Noteko, ¿kox ne nimitstemaktis?

²³ Jesús okinnankili:

—Akin tlapalao nowa, ye akin nechtemaktis. ²⁴ Milák, Ne Non onimochi ni tlakatl nikpia de nimochiwas kemi kijtoa itlajkuilol Dios, pero ¿mialma n tlakatl non nechtemaktis! Okachi kuali non tlakatl amo tlakatiskia.

²⁵ Ijkuakó Judas non kitemaktiskia n Jesús okili:

—Rabí*, ¿kox ne nimitstemaktis?

Jesús okinankili:

—Te yotikijto.

²⁶ Ijkuak otlakuajtakah, Jesús okónanki paj iwa omotlasojkama inawak Dios, iwa ijkuak yokitlajtlápanki, okinmák itlamachtijkawah iwa okinmili:

—Xikmomajsewukah, ye nin nokuerpo.

²⁷ Ijkuakó okónanki n kopa, iwa omotlasojkama inawak Dios. Okimpanoltili itlamachtijkawah iwa okinmili:

—Nonnochteh xikonikah, ²⁸ ye nin noesso non ika nimotlajtolsenkawa nomowah, nin noesso motoyawas para miakeh makintlapojpolwilikah intlajtlakolwah. ²⁹ De milajka nomechilia: Ayakmó nikonis iayo n uvas, asta neká tonati ijkuak oksepa tikmosepanmajsewiskeh n yankuik vino, nepa ilwikak kan Notajtsi tlanawatia.

Jesús kijtoa Pedro kijtos amo kixmati

(Mr. 14:26-31; Lc. 22:31-34; Jn. 13:36-38)

³⁰ Satepa, ijkuak yotlankeh okitlakuikakeh se salmo oyájkeh kan Olivostepetl.

³¹ Ijkuakó Jesús okinmili:

—Nin yúali nochteh nonkikawaskeh nomotlaneltokalis, porke itech itlajkuilol Dios ijkuilolitik: “Nikniktis n tlájpixki, iwa ichkameh moxexeloskeh.” Zac. 13:7 ³² Pero keman nimoyolitis, Ne nitlayakanas Galilea.

³³ Ijkuakó Pedro okinankili:

—Maya nochteh mamitspinawilikah ne amo nipinawas.

³⁴ Ijkuakó Jesús okili:

—De milajka nimitsilia, axa itech nin yúali achto de tlakuikas n kaxtil, te yotikijto eyi welta amo techixmati.

³⁵ Pedro okijto:

—Maya mowa manechmiktikah, amayik nikijtos amo nimitsixmati.

Iwa nochteh itlamachtijkawah noiwa ijkó okijtojkeh.

Jesús motiotsajtsilia kan werto de Getsemaní

(Mr. 14:32-42; Lc. 22:39-46)

³⁶ Satepa Jesús oyá iwan itlamachtijkawah kan se werto non itoka Getsemaní, iwa okinmili:

—Nika ximotlajtlalikah, Ne nepa nio nimotiotsajtsiliti.

³⁷ Iwa okiwik n Pedro, iwa itelpochwah n Zebedeo, Jacobo iwa n Juan iwa opé moyolkokoa iwa yoltelini. ³⁸ Iwa Jesús okinmili:

—Satlawel nimoyolkokoa mach ok nikxikoa, nikmachilia kemi nimikis, nika ximokawakah xijsatokah nowa.

³⁹ Jesús oyá ok achitsi tlayakapa, ompa omotlankuáketski asta okitelko n tlali ika ixkuak iwa omotiotsajtsiliaya:

—Notajtsi, tla weletis amo manitlajjowi. Pero amo mamochiwa kemi Ne nikneki, yej kemi Tejwatsi tikmonekiltia.

* 26:25 Rabí kijtosneki tlamachtli

⁴⁰ Satepa omókopki kan itlamachtijkawah, iwa okinmajsito kochtokeh, iwa okili n Pedro: —¿Nion se ora ononweletkeh ononmijisatokah nowa? ⁴¹ Xiisatokah iwa ximotiotsajtsilikah, para amo xiwetsikah itech tlajtlákoli. De milajka nomechilia, nomoespíritu mochikajtok, pero nomokuerpo amo chikawak.

⁴² Jesús oksepa omotiotsajtsilito iwa okijto:

—Notajtsi, tla weletis tikachiwas nin tlaijyowflistli xikachiwa, pero mamochiwa tlan Tejwatsi tikmonekiltia.

⁴³ Ye oyá kan itlamachtijkawah, iwa okinmajsito kochtokeh porke satlawel okochmikiah iwa inmixtololowah omotsakuayah. ⁴⁴ Ok se welta okinkajteh iwa oyá omotiotsajtsilito ya eyi welta, iwa oksepa omotiotsajtsili ijkó kemi achto. ⁴⁵ Otlanki okinmajsito itlamachtijkawah iwa okinmili:

—Xikochikah iwa ximosewikah. Yoajsiko n ora, iwa Ne Non onimochi ni tlakatl nechtemaktiskeh inmak tlajtlakolejkeh. ⁴⁶ ¡Ximewakah, tiawih! ¡Ompa wits akin nechtemaktis!

Kikitskiah n Jesús

(Mr. 14:43-50; Lc. 22:47-53; Jn. 18:2-11)

⁴⁷ Jesús ok otlajtojtoka ijkuak okalakiko n Judas, seme de itlamachtijkawah. Miakeh okinyakantiwalaya ika espadaiteh iwa kuameh. Ninteh okwalintitlankeh n tiopixkeh non tlayakantokeh iwa n tetajmeh non tlayakantokeh kan Weyi Tiopa.

⁴⁸ Judas non okitemakti n Jesús, yokinmilijka:

—Akin ne nikixtennamikis, Ye n Jesús, ¡xikkitskikah!

⁴⁹ Sannima omijkuani inawak Jesús iwa okili:

—¡Panolti Rabí!

Iwa okiixtennamik. ⁵⁰ Jesús okinankili:

—Noknitsi, xikchiwa tlan otikchiwako.

Ijkuakó n tlakah omijkuaniykeh inawak Jesús iwa okikitskijkeh.

⁵¹ Ijkuakó Pedro okwalkixti iespada iwa okinakastek itlákau n weyi tiópixki Caifás.

⁵² Ijkuakó Jesús okili:

—Xiktlaati moespada, porke akimeh kiwikah iespada, noiwa ika espada kinmiktiskeh.

⁵³ ¿Mach amo tikmati weletis niktajtlanilis Notajtsi iwa axa Ye nechalintitlanilis eyipóali iwa n májtlaktli mil ángeles? ⁵⁴ Tla ijkó, ¿kenomi mochiwas tlan ijkuilitok, kan kijtoa ijkó tlamochiwas?

⁵⁵ Ijkuakó Jesús okinmili n tlakah:

—¿Tleka ononchkitskikoh ika espada iwa ika kuawitl kemi niyetoskia ni tlajtlakole? Nochi tonati onitlamachtiaya nomonawak kan Weyi Tiopa, iwa ayik ononchkitskijkeh.

⁵⁶ Pero nochi ni panoa para mamochiwa tlan okijtojkeh n profetas itech tiotlajkufloli.

Ijkuakó nochteh itlamachtijkawah n Jesús okikakajteykeh iwa ochocholojkeh.

Kiwikah n Jesús kan Sanedrín

(Mr. 14:53-65; Lc. 22:54-55, 63-71; Jn. 18:12-14, 19-24)

⁵⁷ Akimeh okikitskijkeh n Jesús okiwikakeh ixpa n weyi tiópixki Caifás, kan omooolojkeh non kitemachtiah n tlanawatflistli iwa n tetajmeh non tlayakantokeh kan Weyi Tiopa.

⁵⁸ Pedro san wejka okitokaya n Jesús asta kan patio icha n Caifás, okalak iwa omotlalito iwan tlamokuitlawijkeh de n Weyi Tiopa iwa ijkó kitas tlan tlamochiwaskia.

⁵⁹ N tiopixkeh non tlayakantokeh, iwa nochteh non de Sanedrín[†] okitemoliayah kenomi kitlajtlakolmamaltiskeh, iwa ijkó weletis kitlajtlakoltiskeh iwa kimiktiskeh. ⁶⁰ Pero amitla okajsikeh tlan ika kiteiliskeh, maya miakeh okijtokoh tlan amo milák. Pero sa iksemi owalajkeh ok ome, ⁶¹ non okijtokoh:

—Nin tlakatl okijto: “Ne niweletis nikxixitinis itiopa n Dios, iwa ipan eyi tonati oksepa nikajkokuis.”

⁶² Ijkuakó n weyi tiópixki Caifás omóketski, iwa okitlajtlani n Jesús:

[†] 26:59 Sanedrín: nin grupo kemi de 50 tetajmeh non tlaixkomakah ijkuak kinteiliah akimeh amo kualitlakitah itlanawatil Moisés.

—¿Amo titlanankilis? ¿Milák tlan ninteh kijtojtokeh?

⁶³ Pero Jesús amo otlanankili. Ijkuakó n Caifás oksepa okitlajtlani:

—Nimitsnawatia ika itoka Totajtsi Dios non yolitok, techili kox Te Ti Cristo, Ikone Dios.

⁶⁴ Jesús okinankili:

—Ejé, te yotikijto. Iwa Ne nomechilia nomejwah nonnechitaskeh Ne Non onimochi ni tlakatl niewatos iyekma Dios Weletini, iwa nonnechitaskeh niwaltetmotiwits de ilwikak ipan mexтли.

⁶⁵ Ijkuakó n weyi tiópixki Caifás, omotlakentsomoni iwa okijto:

—¡Nin tlakatl okixpanawi Dios ika itlajtol! Mach ok moneki aka makiteili, nomonewiah yononkikakeh kenijki okixpanawi Dios. ⁶⁶ ¿Tlan nonkijtoah?

Yejwah okijtojkeh:

—Tlajtlakole, moneki mamikki.

⁶⁷ Ijkuakó okiixchijhawijkeh, okitekilmakakeh, iwa oksikimeh okixtlajtlatsinijkeh ⁶⁸ iwa okijtoayah:

—Tla Te Ti Cristo, ¡xikyeyekoli akin omitsmák!

Pedro okijto mach kixmati n Jesús

(Mr. 14:66-72; Lc. 22:56-62; Jn. 18:15-18, 25-27)

⁶⁹ Pedro oewatoka kala, ijkuakó se iteska n Caifás omijkuani iwa okili n Pedro:

—Te noiwa otinemia iwan Jesús non de Galilea.

⁷⁰ Pedro amo okimokuiti iwa inmixpa okijto:

—Amo nikmati tlan tikijtoa.

⁷¹ Pedro yokistiaya itech kaltentli, iwa ok se iteska okitak, iwa okinmili n oksikimeh:

—Nin tlakatl noiwa onemia iwan Jesús de Nazaret.

⁷² Pedro oksepa amo okimokuiti, iwa asta okisentlali itlajtol:

—Mach nikixmati non tlakatl.

⁷³ Satepa sikimeh omijkuaniykeh inakastla n Pedro iwa okilijkeh:

—Milák, te seme de yejwah, porke ijko titlajtoa.

⁷⁴ Ijkuakó n Pedro opé tlawikaltia iwa okisentlali:

—De milajka, ne mach nikixmati non tlakatl.

Sanima otlakuik n kaxtil. ⁷⁵ Ijkuakó Pedro okilnamik tlan Jesús yokilijka: “Keman ayamó tlakuika n kaxtil, te yotikijto eyi welta amo techixmati.”

Otlanki Pedro okiski iwa otlawelchokak.

27

Jesús ixpa n Pilato

(Mr. 15:1; Lc. 23:1-2; Jn. 18:28-32)

¹ Ijkuak otláneski, nochteh n tiopixkeh non tlayakantokeh iwa n tetajmeh non tlayakan-tokeh kan Weyi Tiopa, omoolojkeh iwa okisepantlalijkeh kitemaktiskeh n Jesús para makimiktikah. ² Okijilpijkeh iwa okiwikakeh kan Poncio Pilato n gobernador non walewa de Roma.

Mikki n Judas

³ Ijkuak Judas non okitemakti n Jesús, okima okitlajtlakoltijkeh n Jesús, okiyolkua iwa oyá innawak n tiopixkeh non tlayakantokeh iwa n tetajmeh non tlayakantokeh kan Weyi Tiopa, iwa okinkopilito n sempóali iwa n májtlaktli (30) platajtomí, ⁴ iwa okinmili:

—Onikchi se weyi tlajtlákoli porke onomechmakti se tlakatl iwa amitla okitewikiliaya.

Pero yejwah okinankilijkeh:

—¡Tejwah amo toteki! ¡Ompa te xikita!

⁵ Ijkuakó Judas okitlamotlak n tomi ijtik n Weyi Tiopa, iwa omokechpiloto.

⁶ N tiopixkeh non tlayakantokeh okoolojkeh n tomi iwa okijtojkeh:

—Mach weletis tiktlaliskeh nin tomi ijtik kaxa kan kitlaliah n tomi, porke ika okitlaxt-lajkeh imikilis se tlakatl.

⁷ Satepa omoyekakjeh kikoaskeh ika non tomi se tlali, non itoka Xoktsinchijchi para kipiaskhe se lojar kan kintookaskeh non amo de ompa. ⁸ Yika, non tlali asta axa kinotsah Éstlali. ⁹ Ijkó omochi tlan okijto n profeta: “Okonankeh n sempóali iwa n májtlaktli (30) platajtomimeh. Ijkó kemi n judíojteh okitlalilijkeh ipati. Zac. 11:12-13

¹⁰ Iwa ika non tomi, okikojkeh n tlali non itoka Xoktsinchijchi, ijkó kemi onechnawati n Toteko.” Jr. 19:1-13

Pilato kitlatsintokia n Jesús
(Mr. 15:2-5; Lc. 23:3-5; Jn. 18:33-38)

¹¹ Okiwikakeh n Jesús ixpa n gobernador Pilato, iwa ye okitlajtlani:

—¿Te ti Rey de judíos?

Jesús okinankili:

—Ejé, ijkó kemi yotikijto.

¹² N tiopixkeh non tlayakantokeh iwa n tetajmeh non tlayakantokeh kan Weyi Tiopa opé kiteiliah, pero Jesús mach itla okijto. ¹³ Ijkuakó n Pilato okili:

—¿Amo tikkaki nochi tlan yejwah mitsteiliah?

¹⁴ Pero Jesús amitla okinankili, yika n gobernador Pilato mach okimatia tlan kijtos.

Kitemaktiah n Jesús para makimiktikah
(Mr. 15:6-20; Lc. 23:13-25; Jn. 18:38—19:16)

¹⁵ Nochi xiwitl itech ilwitl de Paskua n gobernador okikajkawaya seme de non tsaktokheh, san akin okipejpenayah n judíojteh. ¹⁶ Itech nonteh tonatijmeh, otsaktoka se tlakatl non itoka Barrabás non sentetl okixmatiah. ¹⁷ Iwa ken miakeh oolololitokah, Pilato okintlajtlani:

—¿Akin nonkinekih manikkajkawa, Barrabás noso n Jesús, non kinotsah Cristo?

¹⁸ Pilato okimatia okimaktijkeh porke oxikojmikah inawak Jesús.

¹⁹ Ijkuak Pilato oewatoka kan tlaixkomaka, isiwa otlatitlanki makilitih: “Amitla xiktokti non tlakatl yolchipawak, porke axa onitlajiyowi keman oniktejemik.”

²⁰ Pero n tiopixkeh non tlayakantokeh iwa n tetajmeh okintlatlalwijkeh n tlakah makitlajtlanilikah n Pilato, makikajkawa n Barrabás iwa makimikti n Jesús. ²¹ Pilato okintlajtlani:

—¿Katlie de ninteh omeh nonkinekih manikkajkawa?

Yejwah okilijkeh:

—¡N Barrabás!

²² Pilato oksepa okintlajtlani:

—¿Iwa tlan niktoktis n Jesús, non kinotsah Cristo?

Nochteh otlanankilijkeh:

—¡Xikkrusifikaro!

²³ Pilato okinmili:

—¿Tleka, tlan okichi?

Pero yejwah okachi okojsajtsiah:

—¡Xikkrusifikaro!

²⁴ Ijkuak Pilato okitak amo oweletia kintlakawaltis n tlakah, iwa okachi opé mokiejsoah, otlatitlanki makualikilikah atl iwa omomapajpak inyakapah nocteh iwa okijto:

—Ne mach nitlajtlakole tla nonkimiktiah nin tlakatl yolchipawak, ompa nomejwah xiktakah.

²⁵ Iwa nocteh n tlakah otlanankilijkeh:

—¡Mawetsi ieszso topah iwa ipan topilwah!

²⁶ Ijkuakó Pilato okinkajkawili n Barrabás, iwa otlanawati makitsonwitekikah n Jesús, iwa okinmaktili n tlakah para makikrusifikarokah.

N soldados kipijpinawiah n Jesús

²⁷ Satepa isoldadojwah n Pilato okiwikakeh n Jesús kan palasio, iwa ompa okiyawalokjeh. ²⁸ Niman okitlakenkixtijkeh, iwa okikentilijkeh se kapa chichiliktik. ²⁹ Okichijchijkeh

se korona ika wisttli iwa okitlalilijkeh itech itsonteko. Noiwa okimakitskiltijkeh se akatl kan imayekma. Omotlankuaketsayah iyakapa, okipijpinawiyah, iwa okijtoayah:

—¡Timitsweyijkatlalialh Rey de judíos!

³⁰Noiwa okichijchawiyah, iwa ika n akatl non okimakitskiltijkeh, okikuawijwitekiah.

³¹Ijkuak otlanki okipijpinawijkeh, okikixtilijkeh n kapa chichiliktik iwa okikonakiltijkeh itlake iwa okiwikakeh okikrusifikarotoh.

Kikrusifikaroah n Jesús

(Mr. 15:21-32; Lc. 23:26-43; Jn. 19:17-27)

³²Ijkuak yokistiayah de Jerusalén, okinamikeh itech ojtli se tlakatl de Cirene, non itoka Simón, iwa okitoktijkeh makimamali ikrus n Jesús.

³³Okalakitoh kan se lojar non itoka Gólgota non kijtosneki: Miketsontekomatl. ³⁴Ompa okimakakeh makoní vino nelitok ika chichik xiwitl. Pero ijkuak Jesús okiyeko, mach okonik. Sal. 69:22

³⁵Satepa, okikrusifikarojkeh n Jesús, n soldadojteh okimolijkeh matikawiltikah itlake, san akin kitlanis. Ijkó otlamochi tlan okijto n tiotlajto: okimotlatlanilijkeh notlakenwah iwa okinmoxexelilijkeh. ³⁶Otlanki ompa omotlajtlalijkeh iwa okimokuitlawijtokah. ³⁷Iwa ik ikuatsontla okijkuilojkeh tleka okimiktijkeh: “Ye ni n Jesús, Rey de Judíos.”

³⁸Noiwa okinkrusifikarojkeh ome ichtekah inajnakastla, se kan iyekma iwa n ok se kan iopochma. ³⁹Iwa non ik ompa opanoayah fiero okitenewayah iwa omokuawiwixoayah, ⁴⁰iwa okiliayah:

—¿Amo te, otikijto tikxijxitinis n Weyi Tiopa, iwa ipan eyi tonati oksepa tikajkokuis? ¡Monewia ximopalewi! ¡Tla milák Te Ikone Dios, xitemo de kan krus!

⁴¹Noiwa n tiopixkeh non tlayakantokah, n tetajmeh non tlayakantokah kan tiopa iwa non kitemachtiah n tlanawátli, okipijpinawiyah iwa okiliayah:

⁴²—Okinmakixti oksikimeh, pero Ye inewia amo weleti momakixtia. Tla milák Ye n Rey de Israel, matemo de kan krus iwa tikneltokaskeh. ⁴³Omosenmák imak Dios, axa Dios makimakixti tla de milajka kitlasojtla, porke Ye okijto: “Ne Ikone Dios.” ⁴⁴N ichtekah non okinkrusifikarojkeh iwan Jesús noiwa fiero okitenewayah.

Mikki n Jesús

(Mr. 15:33-41; Lc. 23:44-49; Jn. 19:28-30)

⁴⁵Ijkuakó otleuyak itech nonteh talmeh, ik tlajko tonati iwa asta las tres. ⁴⁶Kemi las tres Jesús otsajtsik chikawak:

—Elí, Elí ¿lama sabaktani? —noni kijtosneki: Notajtsi, Notajtsi, ¿tleka otechkajte noselti?

⁴⁷Sikimeh non ompa okatkah, okikakeh iwa okijtojkeh:

—Nin tlakatl kinotok n profeta Elías.

⁴⁸Ijkuakó seme de weywh omotleo okipolakito siki esponja itech vinagre, iwa ika se akatl okonmák makoní n Jesús. ⁴⁹Pero oksikimeh okijtojkeh:

—Xikkawa, tikitaskah kox wits kimakixtiki n profeta Elías.

⁵⁰Jesús oksepa otsajtsik chikawak, iwa omikki. ⁵¹Iwa sa nima otlajkotsáyanki n tsótsoli non kajki ijtik Weyi Tiopa iwa owaltlalólí, iwa n temeh otlajtlapankeh. ⁵²N tékochtah owalmotlapojkeh iwa miakeh non yomikkeh non okitlakitakeh Dios, omoyolitijkeh. ⁵³Iwa ijkuak Jesús omoyoliti, noiwa miakeh omoyolitijkeh iwa okalakeh Jerusalén, iwa miakeh okimitakeh.

⁵⁴Ijkuak n kapita iwa nochteh non iwa okimokuitlawijtokah n Jesús, okimachilijkeh otlalólí iwa okitakeh nochi tlan opanotoka, sa tlawel omomojtijkeh iwa okijtojkeh:

—¡Milák, nin tlakatl okatka Ikone Dios!

⁵⁵Noiwa ompa okatkah sikimeh siwameh non san wejka okonitokah. Ninteh siwameh owalajkeh de Galilea iwa okipalewijtiwalayah n Jesús. ⁵⁶Ompa inwah okatkah n María de

Magdala, María inmamá n Jacobo iwa n José, noiwa ompa okatka inmamá itelpochwah n Zebedeo.*

Kitookah n Jesús

(Mr. 15:42-47; Lc. 23:50-56; Jn. 19:38-42)

⁵⁷Ijkuak yotleyuatoka, okalakiko José non owalewatoka de Arimatea. Ye okipiaya miak tomi. Nin tlakatl okineltokaya n Jesús. ⁵⁸Nin José okitato n Pilato iwa okitlajtlanili ikuerpo Jesús. Iwa Pilato otlanawati makimaktilikah. ⁵⁹José okontemowi ikuerpo n Jesús, okimemelo ika se tlakemittl chipawak ⁶⁰iwa okitlalito kan se yankuik tékochtli non okikoyonijkeh itech tetl. Satepa, okitentsak ika se weyi tetl tankachtik iwa oyá.

⁶¹Ompa oewatokah iyakapa n tékochtli, María non owalewatoka de Magdala iwa non ok se María.

Kiyekmokitlawiah n tékochtli kan okitookakeh n Jesús

⁶²Non ok se tonati, n tiopixkeh non tlayakantokeh sansikah iwa n fariseos, okitatoh n Pilato ⁶³iwa okilijkeh:

—Otimitsonitakoh tejwatsi, porke otikilnamikah ijkuak oyolitoka neká tekajkaya, okijto ipan eyi tonati moyolitis. ⁶⁴Yika tejwah tiknekih xitlanawati makimokuitlawijtokah eyi tonati n kúyoktli kan okitookakeh n Jesús. Amo kichiwa itlamachtijkawah yaskeh yuak kikixtitiweh, iwa satepa kijtojinemiskah yomoyoliti. Tla ijkó tlakajkayawaskeh okachi techjtlakos.

⁶⁵Pilato okinmili:

—Nomejwah nonkimpiah nomotlamokuitlawijkeh, xikinwikakah iwa xikmokitlawitih n tékochtli.

⁶⁶Yejwah okiyektentsakuatoh n miketékochtli, iwa itech non tetl okipepechilijkeh se seyo. Iwa ompa okinkajtejkeh sikimeh inlamokuitlawilwah.

28

Jesús moyolitia

(Mr. 16:1-8; Lc. 24:1-12; Jn. 20:1-10)

¹Ijkuak yopanok n sábadó ijkuak mosewia n judíos, iwa yotlanestiwalaya n domingo, ipewayá n samano, María de Magdala iwa non ok se María owalajkeh okitakoh n miketékochtli. ²Sannima chikawak otlalólinki, porke se iángel Toteko Dios owaltemok de ilwikak, iwa okalakito kan miketékochtli, okaachi n tetl non ika otentsaktoka iwa ipan omotlali. ³Ixko n ángel otsotlania kemi ijkuak tlamijmilini, iwa itlake satlawel istaktik kemi tesiwitl. ⁴Ijkuak n tlamokuitlawijkeh okitakeh, sa tlawel omomojtijkeh iwa asta opé bibiokah iwa omokajkeh kemi yetoskia yomikkeh.

⁵Pero n ángel okinmili n siwameh:

—Amo ximomojtikah. Ne kualí nikmatok nomejwah nonkitemoah Jesús, non okikrusi-fikarojkeh. ⁶Mach ok nika kajki, Ye yomoyoliti ijkó kemi okijtojka. Xiwikih, xikitakih kan achto owilantoka. ⁷Xiajtiwetsikah, xikinmilitih itlamachtijkawah Ye yomoyoliti de kan kateh non yomikkeh. Iwa Ye tlayakanas Galilea iwa ompa nonkitaskeh. Ye nin tlan omonekia nomechilis.

⁸Ijkuakó n siwameh owalkikistiwetskeh de kan tékochtli, majmaujtiwih pero noiwa ika pakílistli. Omotlelojkeh okinmatiltitoh itlamachtijkawah. ⁹Ijkuakó Jesús okinmonextili iwa okintlajpalo. N siwameh omijkuanijkeh inawak, okikxinawajtekeh iwa okiweyij-kachikeh. ¹⁰Iwa Jesús okinmili:

—Amo ximawikah. Xikinmilitih nokniwah mawiah Galilea, iwa ompa nechitaskeh.

Kiseliah tomi n tlamokuitlawijkeh para matlakajkayawakah

¹¹Ijkuak n siwameh oyayah kinmatiltitiweh itlamachtijkawah n Jesús, sikimeh non okimokuitlawijtokah n miketékochtli, okalakitoh Jerusalén iwa okinmatiltitoh n tiopixkeh non tlayakantokeh nochi tlan otlamochi. ¹²N tiopixkeh non tlayakantokeh omoololojkeh

* 27:56 inna itlamachtijkawah n Jesús, yejwah n iknimeh Jacobo iwa n Juan

iwa n tetajmeh non tlayakantokeh kan Weyi Tiopa iwa ompa okimolijkeh tlan kichi-waskeh. Okinmakakeh miak platajtomí inlamokuitlawilwah. ¹³Noiwa okinmilijkeh:

—Nomejwah xikjtokah itlamachtijkawah n Jesús owalajkeh yuak, iwa ijkuak nomejwah ononkochtokah, okichtekikoh n kuerpo. ¹⁴Iwa tla n gobernador kimatis, amo ximotekipa-chokah, tejwah timotlapowiskeh iwan ye.

¹⁵Ijkuakó n tlamokuitlawijkeh okiselijkeh tomi iwa okichijkeh kemi okinnawatijkeh. Iwa n judíojteh asta axa ye noni tlan tetlapowiah.

Jesús kintitlani itlamachtijkawah matetlapowikah de n kualitlájtohi

(Mr. 16:14-18; Lc. 24:36-49; Jn. 20:19-23)

¹⁶Ijkó, n májtlahtli iwa n se (11) itlamachtijkawah oyájkeh Galilea, ipan tepetl kan Jesús okinmili mawiah. ¹⁷Iwa ijkuak okitakeh n Jesús, okiweyijkatlalijkeh, maya sikimeh mach okineltokayah kox Ye n Jesús. ¹⁸Jesús omijkuaní innawak iwa okinmili:

—Notajtsi onechmaktih nochi para Ne manitlanawati itech ilwikak iwa itech tlaltípkaktli. ¹⁹Axa, xiwiah iwa xikinmachtikah nochteh n tlaltípkaktlakah para mamochiwakah notlamachtijkawah, iwa xikinkuaatekikah itech itoka Totajtsi, itech itoka Ikone, iwa itech itoka n Espíritu Santo. ²⁰Xikinmachtikah makiyektlakitakah nochi tlan yonomechnawati, iwa xikilnamiktokah Ne nochipa niyetos nomowah, asta matlami n tlaltípkaktli.

N Kualitlájtolí non Okijkuilo San Marcos

Juan Bautista tlamachtia kan amaka chanti

(Mt. 3:1-12; Lc. 3:1-9, 15-17; Jn. 1:19-28)

¹ Ijki opé n kualitlájtolí de Cristo Jesús Ikone Totajtsi Dios.

² N profeta Isaías okijkuilo:

Ne niktlayanaltis akin tlatematiltijtiyas moyakapa, mamitsyejektlaliliti n ojtli.

³ Mokaki se tlájtoli chikawak non tetsajtsilia kan amaka chanti:

“Xikyektlalilikah iwa xikmilawakah iojwiu n Toteko.”

Is. 40:3

⁴ Juan otlanonotinemía kan amaka chanti iwa okinmiliaya n tlakah ayakmó makichiwakah tlan amokuali iwa mamokuaatekikah, para makintlapojpolwilikah intlajtlakolwah.

⁵ Nochteh non de Judea iwa de Jerusalén, okualkakah n Juan iwa okinmokuitiayah intlajtlakolwah, iwa ye okinkuaatekiaya ijtik río Jordán.

⁶ Itlake n Juan ochijchitoka ika itsojmio n de kameyo, iwa omotlajkoilpiaya ika se kuftlaxtli, ye sanwel okinkuaya chapulimeh iwa nékuitli. ⁷ Ijkuak oteplapowiaya okijtoaya:

—Nokuitlapa wits se tlakatl okachi weletini ke ne, Akin ne mach ni tlawel kualí kemi para nimotolos nikaktojtomas. ⁸ Milák, ne onomechkuaateki ika atl, pero Ye nomechkuaatekis ika n Espiritu Santo.

Juan kikuatekia n Jesús

(Mt. 3:13-17; Lc. 3:21-22)

⁹ Itech nonteh tonatijmeh, Jesús owala de Nazaret, non kajki kan tlali de Galilea, iwa n Juan okikuateki kan río Jordán. ¹⁰ Ijkuak Jesús owálkiski ijtik atl, okitak owalmotlapo n ilwikak iwa n Espiritu owaltemotiwalaya ipan Ye kemi se palomatsi. ¹¹ Iwa kan ilwikak owalmokak se tlájtoli:

—Te Tinokone non niktlasojtla, iwa monawak niyolpaki.

N satanás okinekia matlajtlakolchiwa n Jesús

(Mt. 4:1-11; Lc. 4:1-13)

¹² Satepa n Espiritu okiwik n Jesús kan amaka chanti.

¹³ Iwa Jesús ompa omoka ome póali tonati, kan nentinemih n yolcameh tekuanimeh, iwa n amokualitlakatl okinekia matlajtlakolchiwa. Iwa n ángelteh okitekichiwiiliayah.

Jesús pewa kitematiltia itlajtol Dios kan tlali de Galilea

(Mt. 4:12-17; Lc. 4:14-15)

¹⁴ Satepa ijkuak yotsaktoka n Juan, Jesús oyá kan tlali de Galilea, okitematiltito n kualitlájtolí de Dios. ¹⁵ Iwa Jesús okijtoaya:

—Yoajsiko n tonati, keman Dios pewas tlanawatis. Xikpatlakah nomonemilis. Ayakmó xikchiwakah tlan amokuali, yej xikneltokakah n kualitlájtolí.

Jesús kinnotsa nawi michmajkeh

(Mt. 4:18-22; Lc. 5:1-11)

¹⁶ Se tonati ijkuak Jesús opajpanotiaya itempa n weyi atl de Galilea, okitak n Simón iwa ikni Andrés okitlamotlayah inmichayawah porke yejwah michmajkeh. ¹⁷ Jesús okinmili:

—Xiwikih nonawak, axa nonkinmichmaskeh tlakah.

¹⁸ Ijkuakó yejwah san nima okualinkakajtejkeh inmichayawah iwa oyajkeh iwan Jesús.

¹⁹ Jesús onéjnenki okachi tlayakapa iwa ompa okimitak n Jacobo iwa ikni Juan, itelpochwah n Zebedeo. Yejwah okintlamanilijtokah inmichayawah itech se barka.

²⁰ Jesús okínnotski, iwa yejwah okikakajtejkeh inta Zebedeo ijtik barka iwa itlakawah, iwa onewakeh iwan Jesús.

Jesús okipajti se tlakatl non okipiaya se espíritu amokuali

(Lc. 4:31-37)

²¹ Satepa okalakitoh kan altepetl de Capernaúm, iwa itech sábadó keman mosewia n judíos*, Jesús okalak kan sinagoga† iwa opé tlamachtia. ²² N tlakah omotlajtlachialtiayah ijkuak okikakiah itlamachtilis, porke okinmachiya ika chikawak itekiwajyo, iwa amo kemi non kitemachtiah n tlanawatlistli. ²³ Ompa kan sinagoga de Capernaúm, se tlakatl non okipiaya se amokuali espíritu, owaltsajtsitewak:

²⁴ —¿Tlan tikneki towah, Jesús de Nazaret? ¿Otiwala otechpojpoloko? Ne nimitsixmati, Te titiochipawak inawak Dios.

²⁵ Jesús okajwak n espíritu amokuali, iwa okili:

—¡Xiktsakua mokamak iwa xikkawa non tlakatl!

²⁶ Ijkuakó n espíritu amokuali okitokti n tlakatl mamimiki, otlanki owaltsajtsitewak chikawak iwa okikakajte. ²⁷ Nochteh omomojtijkeh iwa omotlajtlaniayah:

—¿Tlan kijtosneki ni? ¿Kualika se yankuik tlamachtlistli? ¡Nin tlakatl chikawak tlanawatia porke asta n espíritus amokualteh, kitlakamatih ijkuak Ye kinnawatia!

²⁸ San nima omoma itech nochi n tlali de Galilea tlan Jesúsokichi.

Jesús kipajtia imona n Simón Pedro

(Mt. 8:14-15; Lc. 4:38-39)

²⁹ Ijkuak okiskeh de kan sinagoga, Jesús, Jacobo iwa Juan oyajkeh icha n Simón iwa n Andrés. ³⁰ Imona n Simón okipiaya chikawak totonik, yika, okimatiltijkeh n Jesús. ³¹ Jesús oonmijkuani kan imona n Simón, okimakitski iwa okewalti. Non ora n siwatl owalpjatik, iwa san nima opé kintekichiwiilia.

Jesús kimpajtia miakeh kokoxkeh

(Mt. 8:16-17; Lc. 4:40-41)

³² Ijkuak okalak tonati iwa opé tleyua, okwalinwikilijkeh n Jesús nochteh n kokoxkeh iwa non okimpixtokah espíritus amokualteh. ³³ Iwa nochteh non ochantitokah itech non altepetl, omoololojkeh kaltempa. ³⁴ Jesús okimpajtih miakeh kokoxkeh. Noiwa okinkixti miakeh espíritus amokualteh iwa amo okinkawiliaya matlajtokah, porke yejwah okixmatiah.

Jesús kitemachtia n kualitlájtolí innawak n tlakah de Galilea

(Mt. 4:23-25; Lc. 4:42-44)

³⁵ Kualka, ijkuak ok otleuyatoka, Jesús omejki iwa oyá iselti omotlotsajtsilito kan amaka ochantitoka. ³⁶ Simón iwa n tlakah non inwah oyayah, okitemotoh n Jesús. ³⁷ Iwa ijkuak okajsikeh okilijkeh:

—Nochteh mitstemojtinemih.

³⁸ Pero Ye okinmili:

—Tiawih kan oksikimeh altepemeh, matikinmatiltitih n kualitlájtolí, porke ika no, Ne oniwala.

³⁹ Yika, Jesús okintlapowiaya de itlajtol Dios itech nochteh n sinagogas de Galilea iwa okinkixtiaya espíritus amokualteh.

Jesús kipajtia se tlakatl non okipiaya lepra

(Mt. 8:1-4; Lc. 5:12-16)

⁴⁰ Se tlakatl non okipiaya lepra itech inakayo omijkuani inawak Jesús, omotlankuáketski iwa okili:

—Tla tikmonekiltia weletis techchipawas de nokokolis.

⁴¹ Jesús okiknoma n kócoxki, okitelko iwa okili:

—Ne nikmonekiltia. ¡Ximochipawa!

⁴² Ijkuak ijko okijto n Jesús, ikokolis n kócoxki okiski, iwa owalchipawak. ⁴³ Sanima Jesús okimaaka n tlakatl pero okinawati:

⁴⁴ —Kuali xikkaki tlan nimitsilis, amaka itla xiktlapowi, sanwel xio inawak n tiópixki, iwa xiktemaka por mochipawalis tlan Moisés otlanawati, para n tiópixkeh makimatikah te yotimochipa de mokokolis.

* 1:21 Sábado: se tonati ijkuak amitla kichiwa, san omoololoayah kan sinagoga † 1:21 sinagoga: se kali kan omoololoayah n judíojeteh nochi sábadó

⁴⁵ Pero ijkuak oyá n tlakatl, opé kintlapowia nochi tlan omochi. Yika, Jesús ayakmó oweletia okalakia teixpa itech altepemeh, yej san kalpa omokawaya, iwa miakeh tlakah de oksikimeh altepemeh owalayah inawak.

2

Jesús kipajtia se tlakatl non osentitikak

(Mt. 9:1-8; Lc. 5:17-26)

¹ Kech tonati satepa, Jesús oksepa omókopki Capernaúm. Iwa ijkuak omoma ye okalakito ijtik se kali, ² miakeh tlakah oomoolojkeh. Iwa ayakmó oakiah n tlakah itech kaltentli, Jesús okinmatiltiaya n kualitlájtolli. ³ Ijkuakó nawi tlakah okwalikilijkeh n Jesús se tlakatl non osentitikak. ⁴ Amo oweletkeh okikalakijkeh itech kali kan Jesús okatka, porke miaktikeh tlakah ompa oomoolojkeh. N tlakah okikuatlapojkeh n kali iwa ik ompa okitemowijkeh n kócoxki ika nochi ikaujtlapech. ⁵ Ijkuak Jesús okitak nonteh tlakah milák okineltokayah, okili n kócoxki:

—Nokone, nimitstlapojpolwia de motlajtlakolwah.

⁶ Pero sikimeh non kitemachtiah n tlanawatflistli non ompa oewatokah, omokuatlapow-ijkeh: “¿Tleka ijko tlajtoa nin tlakatl?, tlajtoa kemi Ye yetoskia Dios, porke amaka weleti kintlapojpolwia n tlakah de intlajtlakolwah, sanwel Totajtsi Dios.” ⁸ Inewia Jesús okimatia tlan okiyejekoliah non kitemachtiah n tlanawatflistli, iwa okinmili:

—¿Tleka ijko nonkiyejekoliah itech nomoyolo? ⁹ ¿Tlan okachi amo owi se kilis n kócoxki: “Yonimitsintlapojpolwili motlajtlakolwah”, noso: “Ximewa, xikonana mokuaujtlapech iwa xio?” ¹⁰ Yika, axa nomechnextilis Ne Non onimochi nin tlakatl, nikpia weletflistli ipan nin tlaltlfpaktli para nikintlapojpolwis n tlakah de intlajtlakolwah.

Ijkuakó okili non osentitikak:

¹¹ —Te nimitsilia, ximewa, xikajkokui mokuaujtlapech iwa xiajti mocha.

¹² Ijkuakó n kócoxki san nima owalme, okónanki ikaujtlapech iwa inmixpa nochteh, onewak. Yika, nochteh omotlajtlachialtijkeh, okiweyijkachijkeh Dios, iwa okijtojkeh:

—¡Ayik otikitakeh itla ijko!

Jesús kinotsa n Leví

(Mt. 9:9-13; Lc. 5:27-32)

¹³ Okachi satepa Jesús oksepa opajpanotiaya itempa n weyi atl de Galilea. Iwa ijkuak nochteh n tlakah oomoolojkeh inawak, opé kinmachtia itlajtol Dios. ¹⁴ Ijkuak ik ompa opajpanotiaya, okitak n Leví ipiltsi n Alfeo, oewatoka kan okiseliaya impuesto para n tekiwa romano iwa Jesús okili:

—Xiwiki nowa.

Leví owalmóketski iwa oyá iwan Jesús.

¹⁵ Satepa Jesús otlakuato icha n Leví, iwa miakeh tominoolojkeh iwa n oksikimeh tlajtlakolchijkeh noiwa otlakuatoh, omotlalijkeh kan mesa sansikah iwan Jesús iwa itlamachtijkawah. ¹⁶ Pero ijkuak non kitemachtiah n tlanawatflistli iwa n fariseos okitakeh n Jesús otlakuajitoka iwan tominoolojkeh iwan tlajtlakolchijkeh, okinmilijkeh itlamachtijkawah:

—¿Tleka nomotlamachti tlakua iwa koni iwan tominoolojkeh iwan tlajtlakolchijkeh?

¹⁷ Ijkuak Jesús okinkak okinmili:

—N tlakah non chikawakeh amo kimotlakewiah se tepajti, yej akimeh mokokoah. Ne amo oniwala onikinnotsako non kualteh, yej onikinnotsako n tlajtlakolchijkeh.

Kitlajtlaniah n Jesús kenijki se mosawa

(Mt. 9:14-17; Lc. 5:33-39)

¹⁸ Se tonati itlamachtijkawah n Juan iwa itlamachtijkawah n fariseos omosaujtokah. Sikimeh tlakah owalajkeh okitakoh n Jesús iwa okitlajtlanjikkeh:

—¿Tleka itlamachtijkawah n Juan iwa itlamachtijkawah n fariseos mosawah*, iwa motlamachtijkawah amo mosawah?

¹⁹Jesús okinnankili:

—¿Kox weletis mosawaskeh n tlatlálwilteh itech se monamiktlo ijkuak n novio kajki inwah? Tla n novio kajki inwah, n tlatlálwilteh, mach weletis mosawaskeh. ²⁰Pero ajsiki tonati ijkuak n novio mach ok inwah yetos, ijkuakó mosawaskeh.

²¹'Amaka kitlamanilia itlake non ya wewe ika se yankuik tsótsoli, porke n yankuik tsótsoli mokototsoa iwa kitsomonia n tlakemítl non ya wewe. Ijkuakó n tlakemítl, okachi weyi tsomoni. ²²Nion amaka kitlalia n yankuik vino íjtik se kuilambre ya wewetsi. Porke n yankuik vino kitsomonia n kuilambre non ya wewetsi, ijkuakó n vino toyawi iwa n kuilambre tsomoni. Yika, n vino non yankuik, moneki mamotlali itech yankuik kuilambre.

Itlamachtijkawah n Jesús miawatekih itech sábadó ijkuak mosewia n judíos

(Mt. 12:1-8; Lc. 6:1-5)

²³Se sábadó ijkuak mosewia n judíos, Jesús iwa itlamachtijkawah opajpanotiyah kan ik tlatootokta, iwa itlamachtijkawah opé miawatekih. ²⁴Ijkuakó n fariseos okilijkeh:

—Xikita tlan kichijtokeh motlamachtijkawah, mach para itla kichiwaskeh itech sábadó.

²⁵Jesús okinnmili:

—¿Ayamó nonkiamapoahtlan okichi n David ijkuak owalxítlatlak, ye iwa non inwah oyayah? ²⁶Itech tonatijmeh ijkuak Abiatar weyi tíópíxki, David okalak ichan Dios iwa okikua n paj non tlatiochíwali, non sanwel n tíópíxkeh weleti kikuah. Pero David okikua iwa asta okinmájmák makikuakah non inwa oyayah.

²⁷Jesús noiwa okinnmili:

—Dios okichijchi n sábadó para makintiochiwa n tlakah, iwa amo okichijchi n sábadó para makinawatikah n tlakah. ²⁸Yika, Ne Non onimochi ni tlakatl níknawatia n sábadó.

3

Jesús kipajtia se tlakatl non omapitswak

(Mt. 12:9-14; Lc. 6:6-11)

¹Jesús oksepa okalak kan se sinagoga, iwa ompa okalak se tlakatl mapitswak. ²Iwa sikimeh fariseos sa okonitokah n Jesús kox kipajtiskia non tlakatl itech sábadó ijkuak mosewia n judíos, iwa íjkó weletis kiteiliseh. ³Jesús okili n tlakatl non omapitswak:

—Ximoketsa tlayakapa.

⁴Otlanki okintlajtlani n fariseos:

—¿Techkawilia matikchiwakah tlan kuali itech sábadó noso matikchiwakah tlan amokuali? ¿Techkawilia matitepalewikah noso matitemiktikah?

Yejwah mach otlanankilijkeh. ⁵Ijkuakó Jesús okuálanke iwa omoyolkoko, ken ot-lakuawatokah inyolo n fariseos. Iwa okili n kókokxi:

—Xikmilawa moma.

N kókokxi okimila ima, iwa opajtik. ⁶Ijkuakó n fariseos owalkiseh de ompa iwa opé motlatlalwiah iwan sikimeh itekitwah n Herodes* para kimiktiseh n Jesús.

Jesús tlapajtia inakastla n atl de Galilea

⁷Jesús iwa itlamachtijkawah oyajkeh itempa n atl de Galilea, iwa miaktikeh tlakah oyajkeh inwah. N tlakah owalayah de Galilea iwa de Judea, ⁸de Jerusalén, de Idumea, ik nepa lado n río Jordán, iwa de n talmeh de Tiro iwa Sidón. Ninteh tlakah, ijkuak okimatkeh nochi tlan Jesús okichiwaya, owalajkeh inawak. ⁹Ijkuakó Jesús okinnawati itlamachtijkawah sa makitlatlalilitih se barka, iwa íjkó amo makipajpatsokah n tlakah. ¹⁰Porke Jesús miaktikeh yokimpajtika, yika n kokoxkeh okipajpatsmiktiyah ken okinekiahtitelkoskeh. ¹¹Iwa ijkuak n espíritus amokualteh okitayah n Jesús, owetsiah íkxítla iwa otsajtsiah:

* 2:18 Mosawah kijosneki ayunar * 3:6 Non okachi wejweyijtiketlanawatijkeh de nin tlali kintokayotiah 'Herodes', non kijosneki 'se weyi tlanawati'.

—¡Te, Ti Tekone de Dios!

¹² Pero Jesús okinkamatsakuaya para amo makiteixmatiltikah teixpa.

Jesús kimpejpena májtlaktli iwa ome itlamachtijkawah
(Mt. 10:1-4; Lc. 6:12-16)

¹³ Satepa Jesús otlejkok itech se tepetl, iwa ompa okinmopejpenili akimeh Ye okinek, iwa yejwah owalajkeh inawak. ¹⁴ Ijkó okimpéjpenki májtlaktli iwa ome itlamachtijkawah para mayetokah nochipa iwan Ye, iwa para kintitlanis makitetlapowitih n kualitlájtolli. ¹⁵ Iwa okinmák weletlistli para makinkixtikah espíritus amokualteh. ¹⁶ Yejwah ninteh n májtlakteh iwa ome akimeh okimpéjpenki:

Simón akin noiwa okitlalili itoka Pedro,

¹⁷ Jacobo iwa ikni

Juan itelpochwah n Zebedeo, akimeh Jesús okintokayoti Boanerges, noni kijtosneki kuejsijkeh,

¹⁸ Andrés,

Felipe,

Bartolomé,

Mateo (noiwa itoka Leví),

Tomás,

Jacobo itelpoch Alfeo,

Tadeo,

Simón non onemia iwan Kananistas,†

¹⁹ iwa n Judas Iscariote non satepa okitemakti n Jesús.

Kiteiliah Jesús iweletilis walewatok de beelzebú
(Mt. 12:22-32; Lc. 11:14-23, 12:10)

²⁰ Satepa Jesús okalak itech se kali iwa oksepa omooolojkeh miaktikeh tlakah iwa asta ayakmó oweletiah otlakuayah. ²¹ Ijkuak okimatkeh non ken okitayah n Jesús, owalajkeh okinotsakoh, porke okimoliayah chamo yokuatlapolo.

²² Noiwa non kitemachtiah n tlanawatlistli akimeh owalajkeh de Jerusalén, okijtoayah:

—Nin tlakatl kipia iweletilis beelzebú iwa ika non weletlistli kinkixtia n espíritus amokualteh.

²³ Ijkuakó Jesús okínnotski mawalmijkuanikah inawak iwa opé kinmajsikamatiltia ika tlapoálistli, iwa okinmili:

—¿Kenomi weletis n satanás san ye inewia kualkixtis n satanás? ²⁴ Tla se país xexelitos, ayik pankisas, ²⁵ iwa tla itech se familia nochteh xexelitokeh, mach wejkawas non familia.

²⁶ Porke tla n satanás inewia moixnamiki iwa moxexeloa, ayakmó kiplas weletlistli iwa pojpoliwis.

²⁷ Amaka weletis kalakis icha n se tlakatl chikawak para kitlachtekis, tlamo achto kijilpia iwa ijkuakó ya weletis kitlachtekis.

²⁸ De milajka nomechilia Dios weletis kintlapojpolwis akimeh kichiwah tlajtlákoli, ²⁹ pero akin fiero kitenewas n Espiritu Santo, ayik kitlapojpolwiskeh iwa nochipa yetos tlajtlakole.

³⁰ Jesús ijko okijto porke yejwah okijtojkeh Ye kipia se espíritus amokuali.

Imamá iwa ikniwah n Jesús
(Mt. 12:46-50; Lc. 8:19-21)

³¹ Ijkuakó imamá iwa ikniwah n Jesús, okalakikoh kan otlamachtijtoka. Pero san kaltempa omokajkeh iwa otlatitlankeh makinotsatih. ³² Ijkuakó, non okiyawalojtokah n Jesús, okilijkeh:

—Momamá, mokniwah iwa moweltiwah kateh kala iwa mitsontemoah.

³³ Pero Ye okinnankili:

—¿Akin nomamá iwa akimeh nokniwah?

³⁴ Otlanki, Jesús okintlajtlatak non ompa okiyawalojtokah iwa okijto:

† 3:18 Ninteh Kananistas yejwah de se partido non okinekiah mixkoyantiskeh inawak gobierno romano.

—Nikan kateh nomamá iwa nokniwah, ³⁵nochteh akimeh kichiwah tlan Dios kimonek-iltia, ye nokni, nowelti iwa nomamá.

4

Se tlakatl non otook

(Mt. 13:1-9; Lc. 8:4-8)

¹Jesús oksepa opé tlamachtia itempa n atl de Galilea, iwa miakeh tlakah omoolojkeh inawak. Okatkah miaktikeh, yika Jesús otlejkok itech se barka iwa itech omotlali. N tlakah omokajkeh itempa n atl para kikakiskeh. ²Ijkuakó Ye opé kinmachtia ika miakeh tlapoálisteh. Iwa okinmiliaya:

³—Kuali xikakikah tlan nomechilis: Se tlakatl otookato. ⁴Ijkuak otook, siki xínachtli owetski inakastla n ojtli, iwa n totomeh owalajkeh iwa okikuajkeh. ⁵Oksiki xínachtli owetski kan tlateyo iwa niman oixwak porke n tlali amo weltilawak. ⁶Pero ijkuak okiski n tonati, owaki, porke amo wejkatla omonelwayoti. ⁷Oksiki xínachtli owetski intsalko witsmeh, iwa n witsmeh omoskaltijkeh iwa okijyomiktijkeh, yika n tlatookali mach otlaaki. ⁸Oksikimeh xinachteh owetskeh itech kuali tlali, iwa ijkuak oixwakeh, kualtsi omoskaltijkeh, iwa miak otlaaki. Siki okitemák sempóali iwa n májtaktli (30) por se xínachtli, oksiki okitemák eyi póali (60), iwa oksiki okitlakilti se sientio.

⁹Ijkuakó okinmili:

—¡Akin de milajka kipia inakas, makajsikamati!

Jesús kinmachtia itlamachtijkawah ika tlapoálisteh

(Mt. 13:10-17; Lc. 8:9-10)

¹⁰Satepa, ijkuak yokikakajtejkah n Jesús, sikimeh non ok omokajkeh iwan májtaktkeh iwa me itlamachtijkawah, okitlajtlanijkeh tlan kijtosneki n tlapoálistli de non otook. ¹¹Jesús okinmili:

—Nomejwah Dios yonomechmatilti tlan yowejkah otlaatitokah, pero n oksikimeh amó. Yejwah okinmachi ika tlapoálisteh. ¹²Yika, maya matlachiakah amo makitakah, iwa maya matlakakikah amo mateajsikamatikah, sanwel kinmajsikamatiltis tla moyolpatlaskeh iwa kitlajtlaniliskeh Dios makintlapojpolwi.

Is. 6:9-10

Jesús kinmajsikamatiltia n tlátoktli

(Mt. 13:18-23; Lc. 8:11-15)

¹³Jesús noiwa okinmili:

—¿Amo nonkajsikamatih nin tlapoálistli? ¿Kenomi nonkinmajsikamatiskeh n oksikimeh tlapoálisteh? ¹⁴Akin tooka ye kemi akin tetlapowia n kualitlájto. ¹⁵Onkateh tlakah kemi n xínachtli non owetski inakastla n ojtli, kikakih n kualitlájto iwa keman okikakeh, wits sataná iwa kinyolkixtilia n kualitlájto. ¹⁶Oksikimeh tlakah kemi n xínachtli non owetski itech tlateyo, kikakih n kualitlájto iwa kiseliah ika pakílistli. ¹⁷Pero kemi amo yektlakxilitokeh, mach wejkwah, porke ijkuak pewa tlaijyowiah por n kualitlájto, san nima wetsih. ¹⁸Oksikimeh kemi n xínachtli non owetski itsalko witsmeh, yejwah kikakih n kualitlájto, ¹⁹pero okachi kintekipachoa tlan onka itech nin tlatípkaktli, iwa kinekih kitlawelpiaskeh tomi. Yika, nochi ni kinyolijtlakoa iwa ayakmó kinkawilia mamotenexti Dios intech yejwah. ²⁰Pero akimeh kikakih n kualitlájto iwa kiyekseliah, yejwah kemi n xínachtli non owetski itech kuali tlali, sikimeh kemi n xínachtli non kitemakah sempóali iwa n májtaktli xínachtli por se xínachtli, oksikimeh kemi n xínachtli non kitemaka eyi póali, iwa n oksikimeh kemi n xínachtli non kitemaka se sientio.

N tláwili

(Lc. 8:16-18)

²¹Jesús noiwa okinmili:

—Ijkuak nonkimilintiah se tláwili, ¿mach nonkitlaatia itlampa se kama noso itlampa se kajo? Nonkimilintiah iwa nonkitlaliah tlakpak para matlawi. ²²Yika, nochi tlan tlaatitok monextis iwa nochi tlan amo momati saman momatis. ²³¡Akin de milajka kipia inakas, makajsikamati!

²⁴ Jesús noiwa okinmili:

—Xikitakah nomejwah akimeh nonkikakah nin tlájtoli. Ijkó kemi nomejwah nonk-intlatamachiwiliskesh oksikimeh, nomechtamachiwiliskesh iwa okachi nomechmakaskeh. ²⁵ Porke akin kipia, okachi kimakaskeh, iwa akin amo kipia, kikixtiliskesh tlan san achitsi kipia.

N xínachtli non moskaltia
(Mt. 25:14-30; Lc. 19:11-27)

²⁶ Jesús noiwa okijto:

—Kan Dios tlanawatia, kemi akin kitepewa xínachtli itech tlali. ²⁷ Tla yas kochiti nochi yúali, iwa tla mewas noso amo mewas nochi kualka, n tlátoktli kisentoka moskaltijti, pero ye mach kimati kenijki moskaltia. ²⁸ Inewia n tlali kiskaltia n tlátoktli, achto ixwa iwa moxiujyotia, tlami miawati iwa iksemi tlaaki. ²⁹ Ijkuak n tlátoktli yochikawak, kitekih porke yoajsiko n tonati para motekis.

N xinatsintli de mostaza
(Mt. 13:31-32; Lc. 13:18-19)

³⁰ Satepa Jesús noiwa okinmili:

—¿Ika tlan tlájtoli nomechititis kan Dios tlanawatijtk? Noso, ¿ika tlan tlapoálistli weletis nomechixmatiltis? ³¹ Kan Dios tlanawatia kemi se xinatsintli de mostaza ijkuak kitlalpachoah. Nin xinatsintli okachi tsijtsikitsi de nochteh n xinachtsitsinteh. ³² Pero, ijkuak se kitlalpachoa, ixwa iwa moskaltia okachi weyi ke nochteh n tlátokteh, iwa itech wejweyijtkesh imamayowah n totomeh motepajsoltiah itlampa itlasekawilo.

Jesús ijki otemachtia
(Mt. 13:34-35)

³³ Ika miakeh tlapoálisteh Jesús okinmachtia n kualitlájtoli asta kan yejwah okajsikamatiah. ³⁴ Nochipa okintlapowayah ika tlapoálisteh, pero ijkuak sa Ye omokawaya iwan itlamachtijkawah, nochi okinmajsikamatiltia.

Jesús kitlakawaltia n atl iwa n ejekatl
(Mt. 8:23-27; Lc. 8:22-25)

³⁵ Non tonati ijkuak yotlajkajtk Jesús okinmili itlamachtijkawah:

—Matikojchalwikah n lago.

³⁶ Ijkuak yokinmakajkeh n tlakah, itlamachtijkawah okiwikakeh n Jesús itech barka, iwa oksikimeh barkas inwah oyajkeh. ³⁷ Ijkuakó owalmokajka se ejekatl chikaktik iwa n atl opé motlatlamotla ijtk barka iwa opé atemi. ³⁸ Jesús okochtoka tlakuitlapa iwa okimokpalti se íkpali, iwa itlamachtijkawah okijxititoh iwa okilijkeh:

—¡Tlamachtli! ¡Xiijsa, tiapolakih!

³⁹ Ijkuakó Jesús owalme iwa okitlakawalti n ejekatl, iwa okili n atl:

—¡Ximoyekmana!

Iwa n ejekatl omóketski iwa nochi san owaltlamoka. ⁴⁰ Otlanki Jesús okinmili itlamachtijkawah:

—¿Tleka satlawel nonmawih? ¡Ayamó nontlaneltokah!

⁴¹ Pero yejwah satlawel omaujtokah iwa omotlajtlaniayah.

—¿Akin nin tlakatl, asta n ejekatl iwa n atl kitlakitah?

5

Jesús kinkixtilia espíritus amokualteh se tlakatl de Gadara
(Mt. 8:28-34; Lc. 8:26-39)

¹ Jesús iwa itlamachtijkawah okalakitoh ik nepa lado de n lago, kan tlali de Gadara. ² Ijkuak Jesús otemok de kan barka, san nima okinamikiko se tlakatl non okipiaya se espíritus amokuali. Nin tlakatl owálkiski intsalko n miketékochteh, ³ ken ompa ochantitoka. Amaka oweletia okilpiaya nion ika kadena. ⁴ Miak welta yokimaijilpijka iwa okixi-ijilpijka ika kadenajteh, pero ye okinkokototsaya iwa amaka oweletia okitlakawaltia. ⁵ Tlajka iwa n yuak otsajtsitinemia ik tepeyo iwa kan tooktokeh non yomikkeh, iwa san

ye inewia omokojkojtinemia ika tetl. ⁶ Pero ijkuak okonitak n Jesús ok wejka tlantiwits, omotlelojtitikiski iwa omotlankuaketsato inawak, ⁷ iwa chikawak okili:

—¡Tlan tikneki nowa, Jesús Ikone Dios non weyijkatitok! Nimitstlatlaujtia ika Itoka n Dios, amo techtlaifyowilti.

⁸ Ijkó okijto porke Jesús yokilijtoka:

—¡Espíritu amokuali, xikkawa nin tlakat!

⁹ Iwa Jesús okitlajtlani:

—¿Tlan timotoka?

Ye otlanankili:

—Ne notoka Miaktikeh, porke timiakeh.

¹⁰ Iwa n espíritu amokuali okitlatlaujti n Jesús, amo makintilani wejka. ¹¹ Iwa kemi miakeh pitsomeh ik ompa otlakuajtinemiah ikxitla n tepetl, ¹² n espíritu amokualteh okitlatlaujtikeh n Jesús:

—Techttilani matikalakikah inmijtik nekateh pitsomeh.

¹³ Ijkuakó Jesús okitekawili, iwa n espíritu amokualteh owalkiskeh ijtik non tlakatl iwa okalakeh inmijtik nonteh pitsomeh. N pitsomeh okistewakeh iwa omoatlanwitoh ijtik weyi atl iwa omikkeh. Ninteh pitsomeh okatkah kemi ome mil.

¹⁴ Ijkuakó n tlajpikkeh de nonteh pitsomeh ochocholojtewakeh iwa oyajkeh otetlapowitoh ik tetlala iwa kan weyi altepetl nochi tlan otlamochi. Iwa miakeh tlakah okitakoh okitlatlaujtia n Jesús mach okikawili, yej okili: ¹⁵ N tlakah de non altepetl okalakitoh kan Jesús, iwa okitakeh n tlakatl non okimpiaya espíritu amokualteh. Nin tlakatl yoewatoka, yotlakentitoka iwa ika kualiti itlanamikilisi, iwa n tlakah omaujkeh. ¹⁶ N tlakah akimeh okitakeh tlan otlamochi, otetlapowijkeh tlan omochi neká tlakatl non okimpiaya espíritu amokualteh, iwa tlan omochijkeh n pitsomeh. ¹⁷ Ijkuakó okitlatlaujtikeh n Jesús mawia de ompa.

¹⁸ Ijkuak Jesús otlejkok itech barka, n tlakatl non okimpiaya espíritu amokualteh, okitlatlaujtia n Jesús makiwika. ¹⁹ Pero Jesús mach okikawili, yej okili:

—Xiajti mocha, iwa xikinmatilti mochanikniwah nochi tlan Dios okichi mowa, iwa kenijki omitsiknoma.

²⁰ N tlakatl oyá icha, iwa opé tetlapowia kan altepemeh de Decápolis nochi tlan Jesús okichi por ye, iwa nochteh omotlajtlachialtiayah.

Ichpoch n Jairo iwa ok se siwatl non okitelkoli itlake n Jesús

(Mt. 9:18-26; Lc. 8:40-56)

²¹ Ijkuak Jesús oksepa owalmókopki itech barka ik nepa lado de n lago, miaktikeh tlakah okinamikikoh, iwa Ye ompa omoka inwah. ²² Ijkuakó owala se tlayákanki de kan sinagoga, non omonotsaya Jairo. Ijkuak okitak n Jesús omotlankuaketski ikxitla, ²³ iwa okitlatlaujti:

—Nochpoch ya tlatlantok, xiwiki nocha xikintlaliliki momawah ipan nochpoch, ijkó pajtis iwa yolitos.

²⁴ Ijkuakó Jesús oyá iwan Jairo, iwa miakeh tlakah oyayah inwa. Yejwah okipajpatsoayah n Jesús.

²⁵ Noiwa ompa oyaya se siwatl non yokiwikaya májtlatkli iwa ome xiwitl kócoxki ika esmilawálistli. ²⁶ Ye satlawel yotlajiyowijka inmak tepajtijkeh, iwa yomotomintlamijka, pero mach opajtia yej okachi oowijtiayah. ²⁷ Ijkuak okima tlan Jesús okichiwaya, omijkuuanijtia ik ikuitlapa, iwa ik intsalko n tlakah okitempantelkoli itlake n Jesús. ²⁸ Porke okimoliayah: “Tla san niktelkolis itlake, nipajtis.” ²⁹ Ijkuakó iesmilawalis owalwak iwa san nima ye okimachili opajtik. ³⁰ Non ora Jesús okimachili ichikawalis aka okipajti, yika oontláchixki ik ikuitlapa iwa okintlajtlani n tlakah:

—¿Akin okitelko notlake?

³¹ Ijkuakó itlamachtijkawah okilijkeh:

—Miakeh tlakah techpajpatsojtiwitseh iwa Tejwatsi titlajtlani “¿Akin okitelko notlake?”

³² Pero Jesús okiixtemo akin okitelko. ³³ Ijkuakó n siwatl kemi okimatia ye okitelko, ika mawilistli omotlankuaketsato ikxitla n Jesús, iwa okili tlan omochiwaya. ³⁴ Jesús okili:

—Nokone, motlaneltokalis omitspajti. Xiajti ika pakílistli, porke axa yotipajtik de motlajjowilis.

³⁵ Jesús ok otlajtojtoka, ijkuak okalakikoh sikimeh tlakah de icha n Jairo iwa okilijkeh:

—Mochpotsi yomikki, ¿tlan ok para tikkuejsa n tlamachti?

³⁶ Pero Jesús san okinkak iwa okili n Jairo:

—Amo ximawi, sanwel xitlaneltoka.

³⁷ Iwa Jesús mach okitekawili mawia aka ok se, sanwel Pedro, Jacobo iwa ikni Juan.

³⁸ Ijkuak okalakito icha n tlayákanki Jairo, Jesús okinmitak n tetlajpalojkeh saikpanoa ochokatokah iwa otsajtsiah. ³⁹ Ijkuakó Ye okalak iwa okinmili:

—¿Tleka nonmopajsoloah iwa nonchokah? N ichpotsintli mach omikki, sanwel kochi.

⁴⁰ Nochteh san okiwetskakeh. Ijkuakó Jesús nochteh okwalinkixti. Sanwel okínnotski íwa itajwah n takotsi iwa itlamachtijkawah. Okalakeh kan okatka n takotsi. ⁴¹ Ijkuakó Jesús okimakitski n takotsi iwa okili:

—Talita, kumi —noni kijtosneki: ¡Takotsi, Ne nimitsilia, ximewa!

⁴² San nima, n takotsi owalme iwa opé nejnemi, iwa nochteh non okitakeh omotlajtlachialtijkeh. N takotsi okipiaya májtlaktli iwa ome xiwitl. ⁴³ Pero Jesús okinnawati amaka makimatiltikah tlan otlamochi, iwa okinnawati itajwah makitlakualtikah n takotsi.

6

Jesús yawi Nazaret kan omoskalti

(Mt. 13:53-58; Lc. 4:16-30)

¹ Jesús okiski de Capernaúm iwa oyá Nazaret kan omoskalti, iwa itlamachtijkawah oyajkeh íwa. ² Iwa ijkuak oajsiko n sábadó ijkuak mosewia n judíos, Jesús opé tlamachtia kan sinagoga. Miakeh tlakah non okikakeh omotlajtlachialtijkeh iwa okijtojkeh:

—¿Kan okikuito nin tlakatl nochi tlan kimati? ¿Iwa kenomi ika imawah weleti kinchiwa milagros? ³ ¿Amo Ye ni n karpintero, ipiltsi n María, iwa ikniwah Jacobo, José, Judas iwa Simón? ¿Iwa amo nika chantitokeh iweltiwah?

N tlakah okitlawelitayah iwa mach okineltokayah. ⁴ Ijkuakó Jesús okinmili:

—Sentetl kiseliah se profeta, pero kan omoskalti noso non ken kita iwa ichanikniwah mach kiseliah.

⁵ Yika, Jesús mach okichi nion se milagro ompa kan omoskalti. Sanwel okintlalili imawah ipan sikimeh kokoxkeh iwa okimpajti. ⁶ Jesús san omotlajtlachialti ijkuak okimitak amo okineltokayah.

Jesús kintitlani itlamachtijkawah matetlapowitih itlajtol Dios

(Mt. 10:5-15; Lc. 9:1-6)

Satepa Jesús otlamachtijtinemía ik nonteh altepemeh. ⁷ Jesús okínnotski májtlaktli iwa ome itlamachtijkawah, iwa ojomeh okintítlanki matetlapowitih de itlajtol Dios iwa okichi makinkixtikah espíritus amokualteh. ⁸ Iwa okinnawati amitla makiwikakah, nion inmantajkostal nion intlaxkal, nion itla tomi, sanwel se kuawitl. ⁹ Iwa inkakkuah, iwa amo makinwikakah oksikimeh intlakenwah. ¹⁰ Noiwa okinmili:

—Ijkuak nonkalakitiweh itech se kali, ompa ximokawakah asta ijkuak nonkikawaskeh non altepetl. ¹¹ Iwa tla kana nonkalakitiweh iwa amo nomechseliah nion kinekíh nomechkakiseh, xikisakah iwa ximoikxitsejtselokah, para makimatikah mach kualí tlan okichijkeh.

¹² Ijkuakó yejwah okiskeh iwa okinmiliayah n tlatikpaktlakah, makipatlakah innemilis iwa ayakmó matlajtlakolchiwah. ¹³ Noiwa okinkixtiayah espíritus amokualteh, iwa okinxawiliayah aseite n kokoxkeh iwa okimpajtiayah.

Kimiktiah n Juan Bautista

(Mt. 14:1-12; Lc. 9:7-9)

¹⁴ N rey Herodes Antipas Primero okima tlan okichiwaya n Jesús, ken nochteh omotlapowiyah de Ye. Iwa Herodes okijto:

—Juan Bautista yomoyoliti de kan kateh non yomikkeh, yika kipia non weletílistli.

¹⁵ Oksikimeh okijtoayah:

—Ye n profeta Elías.

Oksikimeh okijtoayah:

—Ye se profeta kemi non yowejkajkeh profetas.

¹⁶ Ijkuak Herodes ijkó okima, okijto:

—Ye n Juan, akin ne onitlanawati makikechtsontekikah, iwa axa yomoyoliti.

¹⁷ Herodes otlanawatijka makikitskikah n Juan iwa makitsakuakah, ken okilijka amokuali kimomekatijtos ikuñada Herodías. ¹⁸ Juan Bautista okiliaya n Herodes:

—Tlajtlákoli tikpixtos isiwa mokni Felipe.

¹⁹ Yika n Herodías okikokoliaya n Juan iwa okinekia makimiktikah, pero mach okimatia kenomi kichiwas. ²⁰ Noiwa Herodes okimatia Juan ye kualitlakatl iwa yolmilajka, iwa okimawiliaya. Yika mach okikawiliaya n Herodías itla makitokti. Maya Herodes amo okiyekajsikamatia tlan Juan otlamachtiaya, okiwelitaya tlan okijtoaya.

²¹ Oajsiko se tonati ijkuak Herodes okitlami xiwitl. Iwa okintlalwi matlatlakuakih n tlanawatijkeh de ipalasio, isoldado tlayakanwah noiwa n tekiwajkeh de Galilea. ²² Itech non ilwitl ichpoch n Herodías omijtoti inmixpa n tlatlálwilteh iwa saikpanoa okiwilitakeh nochteh. Ijkuakó Herodes okili n íchpochtli:

—Techtlajtlanili san tlan tikneki iwa ne nimitsmaktilis.

²³ Iwa okisentlali kimaktilis san tlan ye kitlajtlaniliskia, maya kitlajtlaniliskia tlajko itekiwajyo. ²⁴ N íchpochtli okitlajtlanito ína:

—¿Tlan niktalajtlanilis n Herodes?

Ína okili:

—Xiktalajtlanili itsonteko n Juan Bautista.

²⁵ San nima n íchpochtli oyá kan Herodes iwa okili:

—Techmaka axa san nima itsonteko n Juan Bautista itech se teposkaxitl.

²⁶ N rey Herodes satlawel omoyolkoko. Pero kemi ye okisentlali inmixpa nochteh itlatlalwilwah kimaktilis n íchpochtli san tlan ye kineki, ayakmó owéletki omotlajtolpatlak.

²⁷ Totokatijjak okinawati se soldado, mawia kan otsaktoka Juan makikechtsontekiti iwa makiwalikili itsonteko n Juan. ²⁸ N soldado oyá kan otsaktoka n Juan, okikechtsontek iwa okimaktoliko n íchpochtli itsonteko n Juan itech se teposkaxitl, iwa n íchpochtli okimaktili ína.

²⁹ Ijkuak itlamachtijkawah n Juan okimatkeh tlan otlamochi, okikuitoh ikuerpo n Juan iwa okitookakeh.

Jesús kintlakualtia mákuili mil tlakah

(Mt. 14:13-21; Lc. 9:10-17; Jn. 6:1-14)

³⁰ Ijkuak omokopatoh de okitetlapowito n kualitlajtoli, n itlamachtijkawah omoseitlijkeh iwan Jesús. Okimatiltijkeh tlan okichijkeh, iwa tlan okitemachtijkeh. ³¹ Iwa Jesús okinmili:

—Xiwikih, matimosewitih kan amaka nemi.

Ken miaktikeh owalayah inawak, iwa asta mach ok omajxiliayah tlakuaskeh. ³² Yika, Jesús iwa itlamachtijkawah oyajkeh itech se barka kan amaka chantitok. ³³ Pero ijkuak yoyayah, miakeh tlakah okimitakeh iwa okimixmatkeh. Ijkuakó miakeh tlakah de nonteh altepemeh okintokakeh iwa okalakitoh achto kan Jesús iwa itlamachtijkawah onajsiskiah.

³⁴ Ijkuak Jesús owaltemok de kan barka, okimitak miakeh tlakah non sa okichixtokah iwa okimiknoma, ken okimitak kemi ichkameh non kipiah akin kinyakanas. Iwa san miak opé kinmachtia. ³⁵ Ijkuak yotlajkajtik, itlamachtijkawah n Jesús owalajkeh inawak iwa okilijkeh:

—Yotlajkajtik, iwa ik nika amaka chanti. ³⁶ Xikinmakawa n tlakah mawiah tetlala iwa kan altepemeh non amo wejka kateh iwa makimokowitih tlan kimomajsewiskeh.

³⁷ Pero Jesús okinnankili:

—Nomejwah xikintlakualtikah.

Yejwah okijtojkeh:

—¿Tikneki matikkoatih paj ika ome siento denario*, iwa matikintlamakakah nochteh?

³⁸ Jesús okintlajtlani:

—¿Kechmeh pameh nonkimpiah? Xiwiah xiktatih.

Ijkuak okimatkeh kechmeh pameh okimpiayah, okilikoh:

—Tikimpiah mákuili pameh iwa ome michimeh.

³⁹ Ijkuakó Jesús otlanawati mamoololokah iwa mamotlajtlalikah ipan xiwitl non kualtsi selistok. ⁴⁰ Iwa nochteh n tlakah omoolojkeh de mamajkuili póali iwa oksikimeh de tlatlajko siento. ⁴¹ Ijkuakó Jesús okinmónanki n mákuili pameh iwa ome michimeh, oontláchixki ilwikak iwa omotlasojkama inawak Dios iwa okintlajtlápanki n pameh, iwa okinmajmák itlamachtijkawah makinxejelilikah n tlakah. Ijko noiwá okichi iwa ome michimeh, iwa okinxejelili nochteh n tlakah. ⁴² Nochteh otluakajkeh iwa kuali oixwikeh. ⁴³ Satepa okoolojkeh tlan amo okikuajkeh iwa okitetemijtjkeh májtlakti iwa ome chikimeh ika pantlapanalteh iwa michimeh. ⁴⁴ Mákuili mil tlakah otluakajkeh.

Jesús nejnemi ixko atl

(Mt. 14:22-27; Jn. 6:15-21)

⁴⁵ Satepa Jesús okintítlanki itlamachtijkawah itech se barka, iwa okinmili sa makichiati kan altepetl de Betsaida, porke Ye ok kinmakawaskia n tlakah. ⁴⁶ Iwa ijkuak yotlanki okinmaaka, omototsajtsilito kan tepetl. ⁴⁷ Ijkuak otleyuak, n barka yotlajkotlantiayah itech lago. Jesús omoka iselti ixko tlali, ⁴⁸ iwa okimitak satlawel yokinsotla n barka porke n ejekatl okimixnamikiyalaya. San kualta Jesús okwalintokaya nejnenti ixko atl iwa okinmajsito itlamachtijkawah iwa yokinekia kimpanawis. ⁴⁹ Ijkuak yejwah okitakeh nejnenti ixko atl, okimolijkeh chamo se temomojti okinmonextili iwa otsajtsikeh. ⁵⁰ Nochteh okitakeh iwa omomojtjkeh. Pero Ye okinmotski iwa okinmili:

—¡Ximoyolchikawakah, amo ximomojtikah, Ne Ni Jesús!

⁵¹ Ijkuakó Jesús oontlejkok itech barka kan itlamachtijkawah, iwa n ejekatl san owalmoka. Yejwah satlawel omotlajtlachialtijkeh, ⁵² porke ayamó okajsikamatiah tlan okitakeh ijkuak Jesús okinmiakili n pameh ken oyoltlakuawatokah.

Jesús okimpajti non omokoaayah itech tlali de Genesaret

(Mt. 14:34-36)

⁵³ Ijkuak okalakitoh Genesaret, ompa inakastla n lago okilpijkeh n barka. ⁵⁴ Ijkuak yejwah owaltetemokeh, n tlakah san nima okixmatkeh n Jesús. ⁵⁵ Yika, itech nochi non tlali omotletlelojkeh iwa okwalinwikiliayah inkokoxkawah, kan okikakiah Jesús. ⁵⁶ Iwa sentetl kan Ye oyaya, itech wejweyi noso tsitsikitikeh altepemeh, noso ik tetlala, n tlakah okinkixtiayah inkokoxkawah itech ojtli, iwa okitlatlaujtiayah makinkawili maya san makitempantelkolikah itlake para mapajtikah. Nochteh non okitelkolyayah itlake opajtiyah.

7

Tlan kijtlakolia iyolo se tlakatl

(Mt. 15:1-20)

¹ Ijkuakó n fariseos iwa sikimeh non kitemachtiah n tlanawatílistli owalajkeh de Jerusalén, omoolojkeh iwa okitatoh n Jesús. ² Yejwah okitakeh sikimeh itlamachtijkawah n Jesús otluquayah iwa amo omomajtekiayah asta inmatlankwah kemi yejwah okichiwayah. ³ Porke n fariseos iwa nochteh n judíojteh saikpanoa okitlakitayah tlan okinmachtijkah intatawah. Amo tlakuah tla amo achto momapajpakah miak welta asta kan inmatlankwah. ⁴ Keman onmokopayah tiánkistli, amo otluquayah tla amo achto moyekmapajpakah. Iwa kimpiah oksikimeh tlamachtílisteh, kemi ninteh: trato kimpajpakah n xikalteh, n káxilteh, iwa n axoktsimeh. ⁵ Yika n fariseos iwa non kitemachtiah n tlanawatílistli owalajkeh okitlajtlanjkeh n Jesús:

* 6:37 Denariokjtosneki se tomi tlan tloxotla itech se tonati

—¿Tleka motlamachtijkawah amo kitlakitah n tlanáwatili non otechmachtijkah to-tatawah? ¿Tleka ijkuak tlakuah amo momapajpakah kemi tejwah?

⁶Jesús okinnankili:

—Mach omotlapololti n profeta Isafás ijkuak okijto nomejwah nonmíxkopteh, iwa ijki okijkuiolo:

Ninteh tlakah ika inkamak kijtoah nechtlasojtlah.

Pero amo nechtlakitah ika inyolo.

⁷Sanenka nechweyijkachiwah,

porke tlan kitemachtiah sanwel intlanawatilwah n tlakah.

Is. 29:13

⁸Porke nomejwah nonkikawah tlan Dios technawatia matikchiwahakah iwa san nonkitlakitah tlan okichiwayah nomotatawah.

⁹Jesús noiwa okinmili:

—Nomejwah ik nepa nonkontlakaltechoah itlanawatil Dios, iwa okachi nonkimopantiah tlan yowejka okichiwayah nomotatawah. ¹⁰ Moisés okijto: “Xiktlakita mopapá iwa momamá.” Noiwa okijto: “Akin fiero kitenewa ipapá noso imamá, makimiktikah.” ¹¹ Pero nomejwah nonkijtoah kualiká tla aka kilia ita noso ina: “Ayakmó nimitspalewis, porke tlan nimitsmakaskia yonixelo para niktemakas tiopa.” ¹² Iwa tla aka ijko kijtoa, nomejwah nonkikawiliah ayakmó moneki makimpalewi itajwah. ¹³ Ijko kiné, nomejwah nonkixpanawiah itlanawatil Dios, iwa san nonkinchijtiwitseh tlan okichiwayah nomotatawah. Iwa oksiki kemi ni, nonkichiwah.

¹⁴Jesús oksepa okinnotski n tlakah mawikih inawak, iwa okinmili:

—Techkakikah non nochteh iwa xikajsikamatikah: ¹⁵ Tlan kikua se tlakatl, amo ye tlan kijtlakolia iyolo, yej tlan kisa de itech iyolo n tlakatl, ye noni tlan kijtlakolia iyolo. ¹⁶ Tla nonkinekih nonkajsikamatiskah, xikkasikamatikah.

¹⁷ Satepa, ijkuak Jesús okinkajteh n tlakah iwa okalak itech kali, itlamachtijkawah okitlajtlanilijkeh makinmajsikamatilti tlan okijtojka. ¹⁸ Ye okinmili:

—¿Nomejwah noiwa amo nonkajsikamatih? ¿Amo nonkajsikamatih tlan kalaki ijtik se tlakatl amo ye tlan kijtlakolia iyolo? ¹⁹ Porke mach kalaki itech iyolo, yej kalaki san kan itlax, iwa satepa kisa kanik ikuitlaxkolwah.

Ika noni okinek okijto nochi tlákua chipawak. ²⁰ Noiwa okijto:

—Tlan kisa ijtik iyolo se tlakatl, noni kijtlakolia iyolo. ²¹ Porke de ijtik iyolo n tlakatl, kisa tlan amo kuali,

awilnemi,

tlachteki,

temiktia,

²² momekatijtinemi,

tominápišti,

kichiwa tlan amokuali,

tlakajkayawa,

kichiwa tlajtlákoli,

xíkojtli,

xolópijtli,

moweyijkachiwa iwa mach kimati tlakaki.

²³ Nochteh ninteh amo kualteh tlamachílisteh kisah inmijtik inyolo n tlakah iwa kinyolijtlakoa.

Jesús kipajtia ichpoch se siwatl de Canaán

(Mt. 15:21-28)

²⁴ Jesús oyá kan talmeh de Tiro iwa Sidón. Okalak kan se kali, iwa amo okinekia aka makimati kan okatka, pero mach owéletki okinmotlatili. ²⁵ Se siwatl non ichpoch okipiaya se espíritu amokuali, okima kan Jesús okatka iwa owala inawak iwa omotlankuáketски ikxitla. ²⁶ Nin siwatl de Grecia iwa itajwah owalewatokah de sirofenicia. Okitlatlaujtiko n Jesús makikixtili n espíritu amokuali non ichpoch okipiaya. ²⁷ Pero Jesús okili:

—Xikinkawa achto maixwikah n tepilwah, porke amo kuali matikinkixtilikah intlakual iwa matikinmakakah n chichimeh.

²⁸N siwatl okinankili:

—Milák, Noteko, pero noiwa n chichimeh non nemih itlampa mesa kikuah n kamapáyaxtli non kitepewah n tepilwah.

²⁹Ijkuakó Jesús okili:

—Kuali tlan otikijto, ya weletis tias. N espíritu amokuali yokikakajte mochpoch.

³⁰Ijkuak n siwatl okalakito icha, okajsito ichpoch wetok itech ipetl, iwa n espíritu amokuali yokikakajte.

Jesús kipajtia se tlakatl non amo otlakakia nion otlajtoaya

³¹Jesús, oksepa okiski de kan tlali de Tíro, iwa opanok kan tlali de Sidón iwa ijko okalakito kan weyi atl de Galilea, iwa omoka itech tlalmeh de Decápolis. ³²Ompa okiwikilijkeh se tlakatl kamapojpólóchtli iwa amo otlakakia, iwa okitlatlautijkeh n Jesús makitlalili ima itech non kócoxki. ³³Jesús ixkoya okimowikili, okinkalaki imajpilwah ijtik inakaswah, iwa ika ichijcha okitelkoli inenepil n tlakatl. ³⁴Otlanki oontláchixki ilwikak, oelsijsiwik iwa okijto:

—¡Efatá! —noni kijtosneki: ¡Ximotlapo!

³⁵San nima, inakaswah owalmotlapojkeh, iwa inenepil opajtik iwa opé yektlajtoa. ³⁶Iwa Jesús okinnawati amaka makitlapowikah, pero yejwah okachi otetlapowiyah.

³⁷Nochteh san omotlajtlachialtiayah iwa okijtoayah:

—Semi kuali nochí tlan okichi, kichiwa matlakakikah non amo otlakakiah, iwa matlajtokah non amo oweletiah otlajtoaya.

8

Jesús kintlakualtia nawi mil tlakah

(Mt. 15:32-39)

¹Se tonati miakeh tlakah omoolojkeh inawak Jesús, iwa amo okipiyah tlan kimomajsewiskeh. Ijkuakó Jesús okínnotski itlamachtijkawah iwa okinmili:

²—Satlawel nikinmiknomati ninteh tlakah, porke ya kipiah eyi tonati nika kateh nowa, iwa mach kipiah tlan kikuaskeh. ³Tla nikintitlanis mawiah incha iwa ayamó tlakuah, weletis ik nonka wetsiteweh, porke sikimeh owalajkeh de wejka.

⁴Itlamachtijkawah okinankilijkeh:

—Ik nika amaka chanti, ¿kan tikkuitiweh paj para tikintlakualtiskeh?

⁵Jesús okintlajtlani:

—¿Kech pameh nonkimpiah?

Yejwah okilijkeh:

—Chikome.

⁶Jesús otlanawati mamotlajtlalikalik nochteh n tlakah itech tlali. Ijkuakó Ye okinmónanki n chikome pameh iwa omotlasojkama inawak Dios. Otlanki okintlajtlápanki iwa okinmaktili itlamachtijkawah, iwa yejwah okinxejxelilijkeh nochteh n tlakah. ⁷Noiwa okimpixtokah sikimeh michintsitsinteh, iwa Jesús okintiochi, iwa otlanawati makinxejelokah. ⁸Nochteh otlakuajkeh iwa kuali oixwikeh, iwa tlan ayakmó okikuajkeh okoolojkeh iwa okintetemitijkeh chikome chikimeh. ⁹Non otlakuajkeh okatkah kemi nawi mil. Satepa Jesús okinmaaka. ¹⁰Iwa Ye otlejkek itech se barka iwa itlamachtijkawah, iwa oyajkeh kan tlali de Dalmanuta.

N fariseos kitlajtlaniliah n Jesús makinnextili se milagro

(Mt. 16:1-4; Lc. 12:54-56)

¹¹Ijkuakó n fariseos owalajkeh inawak Jesús iwa opé motlatlajtolkopah íwa. Yejwah okitlajtlaniliah makinnextili se milagro de ilwikak san para kiyeyjekoskeh. ¹²Jesús oelsijsiwik iwa okinmili:

—¿Tleka nonkitlajtlanilh se milagro? De milajka nomechilia nomejwah mach nonkitaskeh nion se milagro de ilwikak.

¹³ Ijkuakó okinkakajte iwa oksepa otlejkok itech barka, iwa opanok ik nepa lado de n lago de Galilea.

Jesús kinmilia itlamachtilis n fariseos mach milák
(Mt. 16:5-12)

¹⁴ Itlamachtijkawah n Jesús okilkajkeh kiwikaskeh n tlákuali itech barka iwa sanwel okiwikayah se paj. ¹⁵ Ijkuakó Jesús okinmili:

—Ximotlachilikah de inlevadura n fariseos iwa de ilevadura n Herodes.

¹⁶ Itlamachtijkawah n Jesús opé kimoliah:

—Ijkí techilia porke amo otikwalikakeh paj.

¹⁷ Pero Jesús okima tlan okimoliayah iwa okinmili:

—¿Tleka non kimoliah amo ononkualikakeh nomopáj? ¿Amo nonkitah nion nonkajsikamatih? ¿Ok nonyoltakuawatokeh? ¹⁸ ¿Nonkimpiah nonmoixtololowah iwa nomonakaswah, iwa amo nontlachiah nion nontlakakih? ¿Ayakmó nonkilnamikih? ¹⁹ Xikilnamikah ijkuak onikintlakualti mákuuli mil tlakah san ika mákuuli paj, ¿kechmeh chikimeh ononkoololjkeh ika pantlapanalteh?

Yejwah okinankilijkeh:

—Májtlahtli iwa ome chikimeh.

²⁰ —Iwa ijkuak onikintlakualti nawi mil tlakah san ika chikome paj, ¿kech chikimeh ononkoololjkeh ika pantlapanalteh?

Yejwah okijtojkeh:

—Chikome.

²¹ Jesús oksepa okinmili:

—¿Tleka kiné ayamó nonkajsikamatih?

Itech altepetl de Betsaida Jesús kipajtia se tlakatl non amo otlachiaya

²² Satepa okalakitoh Betsaida, ompa okualikilijkeh n Jesús se tlakatl non amo otlachiaya iwa okitlatlautijkeh ipan makintlalili imawah. ²³ Jesús okimatflanki n kócoxki iwa okixixti de altepetl. Ika ichijcha okinsiwili ixtololowah iwa okintlali imawah ipa, iwa okitlajtlani kox itla okitaya. ²⁴ Ye opé tlachia, iwa okijto:

—Nikinmita tlakah kemi yaskiah miskimeh, pero nejnentiwih.

²⁵ Jesús oksepa okintlalili imawah ipan ixtololowah iwa okili matlatlachia, san nima n tlakatl oyektláxixki iwa opajtik. Iwa nochi kuali yokitaya. ²⁶ Ijkuakó Jesús okitflanki icha iwa okili:

—Amo xikalaki kan altepetl, nion aka xikmatilti.

Pedro okijto Jesús Ye n Cristo
(Mt. 16:13-20; Lc. 9:18-21)

²⁷ Satepa Jesús iwa itlamachtijkawah oyajkeh kan altepemeh de Cesarea itech tlali de Filipo. Iwa ijkuak oyayah itech ojtli okintlajtlani:

—¿Akin Ne, kimoliah n tlakah?

²⁸ Yejwah otlanankilijkeh:

—Sikimeh kijtoah Tejwatsi ti Juan Bautista, oksikimeh kijtoah Tejwatsi ti Elías noso ok se profeta.

²⁹ Ijkuakó Jesús okintlajtlani:

—Iwa nomejwah tlan nonkijtoah, ¿Akin Ne?

Pedro okili:

—Tejwatsi Ti Cristo.

³⁰ Pero Jesús okinnawati:

—Amaka xikmatiltikah.

Jesús kitematiltia imikilis
(Mt. 16:21-23; Lc. 9:22)

³¹ Ijkuakó Jesús opé kinmachtia:

—Ne Non onimochi ni tlakatl nitlajiyowis miak iwa nechixnamikiskeh n tetajmeh non tlayakantokeh kan tiopa, iwa n tiopixkeh non tlayakantokeh iwa non kitemachtiah n tlanawatlistli nechmiktiskeh, pero ipan eyi tonati nimoyolitis.

³²Jesús ijko okinmili para makajsikamatikah. Ijkuakó Pedro okiwik ixkoya n Jesús iwa opé kajwa. ³³Pero Jesús omókopki iwa okintlajtlatak itlamachtijkawah, opé kajwa n Pedro iwa okili:

—¡Xio de nika, satanásl, porke amo mitstekipachoa tlan Dios kimonekiltia, yej tlan kintekipachoa n tlakah.

Kenomi se weletis yetos itlamachtijkau n Jesús

(Mt. 16:24-28; Lc. 9:23-27)

³⁴Ijkuakó Jesús okínnotski n tlakah iwa itlamachtijkawah iwa okinmili:

—Tla aka kinekis yetos notlamachtijkau, ayakmó makichiwa san tlan ye kineki, yej mawiki nonawak maya makimiktikah por nechtlakita. ³⁵Yika, akin kinekis mopalewis san ye inewia moixpolos. Pero akin kimiktiah por nechtlakita iwa por kitetlapowia itlajtol Dios, Ye kimakixtis. ³⁶Porke ¿tlan ipati tla se tlakatl kitlani nochi tlan onka itech nin tlaltikpaktli iwa kixpooa ialma? ³⁷¿Kech weletis kitlaxtlawas se tlakatl para makimakixti ialma? ³⁸Yika, akin pinawa de Ne iwa de notlajtol inmixpa ninteh tlakah tlajtlakolchijkeh iwa mekatánajteh, noiwa Ne Non onimochi ni tlakatl nipinawas de ye ijkuak niwalmuikas itech iweyijkachiwalis Notajtsi iwa iangelwah.

9

¹Jesús noiwa okinmili:

—¡De milajka, nomechilia: sikimeh akimeh nika kateh mach mikiskeh asta ijkuak kitaskeh ya tlanawatjtok Dios ika nochi iweletilis!

Jesús moixpatla

(Mt. 17:1-13; Lc. 9:28-36)

²Chikwase tonati satepa, Jesús oyá kan se tepetl, iwa sanwel okinwik n Pedro, Jacobo iwa n Juan, iwa ompa inyakapa, Jesús omoixpatlak. ³Itlake otsótlanki iwa omókopki istaktik kemi tesiwitl non amaka weletiskia ijko kikawaskia, maya kitlawelpakaskia. ⁴Noiwa okitakeh Elías iwan Moisés non omotlapowijtokah iwan Jesús. ⁵Ijkuakó Pedro okili n Jesús:

—Tlamachtí, sa kualí nika tikateh. Matikinchiwijwakah eyi akákalteh, se moaxka, se iaxka Moisés iwa ok se iaxka Elías.

⁶Itlamachtijkawah saikpanoa omomojtijkeh, yika n Pedro mach okimatia tlan okijtoaya. ⁷Ijkuakó owaltemok se mexтли iwa okinkemelo. Itech non mexтли omokak se tlájtoli non okijtoayah:

—Ye ni Nokone non niktlasojtla, xikkakikah.

⁸San nima otlatlachixkeh ik nowia, iwa ayakmaka okitakeh, sanwel okitakeh n Jesús.

⁹Iwa ijkuak owaltemoayah ikpak tepetl, Jesús okinnawati itlamachtijkawah:

—Amaka xikmatiltikah tlan ononkitakeh, asta ijkuak Ne Non onimochi ni tlakatl manimoyoliti.

¹⁰Yika, okitlaatiijkeh nin tlájtoli maya omotlajtlaniayah tlan kijtosneki moyolitis oksepa.

¹¹Ijkuakó, okitlajtlaniijkeh n Jesús:

—¿Tleka kijtoah non kitemachtiah n tlanawatlistli achto wits Elías?

¹²Jesús okinnankili:

—Milák, Elías achto wits, iwa kiyektlalis nochi. ¿Iwa tlan kijtoa itlajkuilol Dios de Ne Non onimochi ni tlakatl? Kijtoa satlawel nitlajiyowis iwa n tlakah nechtlawelitaskeh. Is. 53:3 ¹³Pero Ne nomechilia Elías yowitsa, iwa n tlakah okitoktijkeh san tlan yejwah okinekeh, ijko kemi ijkuilitok mochiwaskia.

Jesús kipajtia se télpochtli non okipiaya se espíritu amokuali

(Mt. 17:14-21; Lc. 9:37-42)

¹⁴Ijkuak okalakikoh kan okatkah miakeh tlakah, okinmajsitoh non oksikimeh itlamachtijkawah. Sikimeh non kitemachtiah n tlanawatlistli non omokualanijtokah iwan

yejwah. ¹⁵ N tlakah satlawel omotlajtlachialtijkeh ijkuak okitakeh n Jesús iwa omotlelojkeh okitlajpalotoh. ¹⁶ Ijkuakó Jesús okintlajtlani:

—¿Tleka nonmonanankiliah iwa n nekateh?

¹⁷ Iwa se tlakatl okijto:

—Tlamachti, nika onimitswalikili nopiltsi, porke kipia se espíritu amokuali non amo kikawilia matlajto. ¹⁸ Iwa san kan yetos, n espíritu amokuali kitlamotla, iwa kitoktia makamapoposojkisa. Noiwa manejnetsonikah itlanwah iwa kisentititsa. Yonikintlatlaujtih motlamachtijkawah makixitlikah n espíritu amokuali pero mach oweletkeh.

¹⁹ Jesús okinmajwak itlamachtijkawah:

—¡Nomejwah mach nonnechneltokah! ¿Asta kemia n nomechxikojtos? ¡Xikualikakah nika n télpochtli!

²⁰ San nima okiwickakeh n télpochtli inawak Jesús, iwa ijkuak n espíritu amokuali okitak n Jesús, okitokti n télpochtli mamotlalwiteki, omotlalmemelo iwa okitokti makamapoposojkisa. ²¹ Ijkuakó Jesús okintlajtlani n teta:

—¿Yowejka ijkó mochijtiwits mopiltsi?

N teta okinankili:

—Desde chokotsi. ²² Iwa miak welta kitlamotla itech tletl iwa kualchiwa ijtik atl porke kineki kimiktis. Yika, tla Tejwatsi weletis techpalewis, techiknomati iwa techpalewi.

²³ Jesús okili:

—¿Tleka techtlajtlania kox niweletis? Nochi weletis mochiwas para akin nechneltoka.

²⁴ Ijkuakó ita n télpochtli owaltsajtsik:

—¡Nitlaneltoka, pero techpalewi para okachi manitlaneltoka!

²⁵ Ijkuak Jesús okitak opé moololoah miakeh tlakah, okijto:

—Te espíritu amokuali non tiktoktia n télpochtli amo matlajto nion matlakaki, Ne nimitsnawatia xikkajkawa n télpochtli iwa ayakmó oksepa xiwalmokopa itech.

²⁶ N espíritu amokuali otsajtsik iwa okitokti n télpochtli oksepa mamimiki, iwa okikakajte n télpochtli kemi non yomikki. N tlakah okijtoayah yomikki n télpochtli. ²⁷ Pero Jesús, okimakitski n télpochtli iwa okipalewi mamoketsa.

²⁸ Otlanki Jesús okalak ijtik se kali, iwa itlamachtijkawah okintlajtlanjkeh.

—¿Tleka tejwah amo otiweletkeh otikkixitijkeh n espíritu amokuali?

²⁹ Jesús okinmili:

—Ninteh espíritus amokualteh sanwel mokixtia ika miak tiotsajtsílistli.

Jesús oksepa kinmilia kenomi mikkis

(Mt. 17:22-23; Lc. 9:43-45)

³⁰ Ijkuak oyajkeh de ompa, opanokeh ik Galilea. Pero Jesús mach okinekia aka makimati, ³¹ porke okinmachtijtoka itlamachtijkawah:

—Ne Non onimochi ni tlakatl nechtemaktiskeh inmak n tlaltikpaktlakah, iwa nechmik-tiskeh, pero ipan eyi tonati nimoyolitis.

³² Pero itlamachtijkawah mach okajsikamatiah tlan Jesús okinmiliaya, iwa okimawiliayah kitlatlajtlaniskeh.

Non okachi weyijkatitok

(Mt. 18:1-5; Lc. 9:46-48)

³³ Ijkuakó okalakitoh Capernaúm, iwa ijkuak yokatkah ijtik kali, Jesús okintlajtlani itlamachtijkawah:

—¿Tlan ononkimolijtiwalayah itech ojtli?

³⁴ Pero mach okinankilijkeh. Itch ojtli omokualanijtiwalayah porke okinekia kima-tiskeh akin okachi weyijkatitok. ³⁵ Ijkuakó Jesús omotlali, iwa okínnotski n májtlaktli iwa ome itlamachtijkawah, iwa okinmili:

—Akin kinekis kinyakanas oksikimeh, achto matetlakita iwa makipalewi san akin yetos.

³⁶ Satepa Jesús okónnotski se chokotsi iwa okontlali tlatlajkotia, otlanki okimonapalolti iwa okinmili:

³⁷—Akin kiselía se chokotsi kemi ni itech Notoka, Ne nechselia, iwa akin nechselia amo san Ne nechselia, yej noiwa kiselía Dios Akin onechaltflanki.

Akin amo techtlawelita kajki towah

(Mt. 10:42; Lc. 9:49-50)

³⁸ Ijkuakó Juan okili n Jesús:

—Tlamachtí, otiktakeh se tlakatl non okinkixtiaya espíritus amokualteh itech Motoka. Tejwah otikilijkeh ayakmó ijko makichiwa, porke ye amo nemi towah.

³⁹ Pero Jesús okinmili:

—Amo xiktlakawaltikah, porke akin kichiwa se milagro itech Notoka, mach weletis fiero nechtenejtinemis. ⁴⁰ Porke akin amo techtlawelita, kajki towah. ⁴¹ Akin nomechtliokolis maya san se xikali atl itech Notoka nomejwah akimeh iaxkawah n Cristo. De milajka nomechilia ye kiselis itlaxtlawil.

Matimotlachilikah amo kichiwa tiwetsiskeh itech tlajtlácoli

(Mt. 18:6-9; Lc. 17:1-2)

⁴² Akin kitoktis matlajtlakolchiwa se akin nechnehtoka, okachi kualí makikechilpilikah se weyi tetl iwa makontlamotlakah ijtik weyi atl. ⁴³ Tla moma mitstoktia xikchiwa tlajtlácoli, xikmotekili, okachi kualí xikalaki kan ilwikak timatepo, iwa amo tiajsitok mamitsontlamotlakah miktla, kan ayik sewis n tletl. ⁴⁴*

⁴⁵ Iwa tla mokxi mitstoktia xikchiwa tlajtlácoli, xikmotekili. Okachi kualí xikalaki kan ilwikak ti ikxitepo iwa amo tiajsitok mamitsontlamotlakah miktla. ⁴⁶†

⁴⁷ Iwa tla moixtololo mitstoktia xikchiwa tlajtlácoli, xikmokixtili. Porke okachi kualí xikalaki ilwikak san ika se moixtololo, iwa amo tiajsitok mamitsontlamotlakah miktla, ⁴⁸ kan okuilimeh ayik mikkih iwa n tletl ayik sewi.

⁴⁹ Porke nochteh n tlakah mopuyeliskeh ika tletl. ⁵⁰ N istatl satlawel kualí, pero tla n istatl mach ok puyak, ¿kenomi weletis ika nontlapuyeliskeh? Nomejwah xiyetokah kemi n istatl non kualí iwa ximoyekwikakah.

10

Jesús kitemachtia amo se mamosiwakajkawa

(Mt. 19:1-12; Lc. 16:18)

¹ Jesús okiski de Capernaúm iwa oyá kan tlali de Judea ik nepa lado de n río Jordán. Ompa oksepa omoolojkeh miakeh tlakah inawak, iwa Ye opé kinmachtia kemi nochipa okichiwaya. ² Ijkuakó sikimeh fariseos omijkuanijkeh inawak Jesús para kitlajtoltlapololtiskeh iwa okitlajtlanjkeh:

—¿Kox kualí tla se tlakatl kikajkawa isiwa?

³ Jesús okinnankili:

—¿Tlan onomechnawati n Moisés?

⁴ Yejwah otlanankilijkeh:

—Moisés okitekawili mamosiwakajkawa n tlakatl tla kimajmanilia se amatl kan kijtoa kikajkawas.

⁵ Ijkuakó Jesús okinmili:

—Moisés onomechmák non tlanawátili porke satlawel ononyoltlakuawatokah. ⁶ Pero itech ipewayá n tlaltlfpaktli, Dios okinchijchi “tlakatl iwa siwatl”. ⁷ “Yika n tlakatl kikajtewas ita iwa ina iwa moseitilis iwan isiwa, ⁸ iwa san ken ome mochiwaskeh se.” Yika ayakmó yetoskeh ome, yej san se. ⁹ Yika, tlan Dios yokiseitili, amaka makinxexelo.

¹⁰ Ijkuak yokatkah itech kali, itlamachtijkawah okitlajtlanjkeh makinmajsikamatilti tlan okimilijka n fariseos. ¹¹ Jesús okinmili:

* ^{9:44} N bersikulo 44 amo nestok itech non okachi yowekajkeh itlajkuilolwah Dios. † ^{9:46} N bersikulo 46 amo nestok itech non okachi yowekajkeh itlajkuilolwah Dios.

—Akin kikajkawa isiwa iwa monamiktia iwan ok se, nin tlakatl san kimomekatijtok iwa tlajtlakolchijtok inawak non achto isiwa, ¹² iwa tla n siwatl kikajkawa iokich iwa monamiktia iwa ok se, nin siwatl noiwa san momekatijtok.

Jesús kintiochiwa n pípilteh

(Mt. 19:13-15; Lc. 18:15-17)

¹³ Ijkuakó okwalinwikilijkeh n Jesús sikimeh pípilteh, para makintlalili imawah impah, pero itlamachtijkawah opé kinmajwah akimeh okwalinwikiliayah n pípilteh. ¹⁴ Ijkuak Jesús okimitak, okuálanki iwa okinmili itlamachtijkawah:

—Xikinkawilikah n pípilteh mawikih nonawak, iwa amo xikintsakuilikah, porke akimeh yolyamankeh kemi pípilteh kalakiskah kan Dios tlanawatijtok. ¹⁵ De milajka nomechilia, akin amo kikawilis Dios matlanawati itech iyolo kemi se chokotsi kimokawilia, non tlakatl ayik kalakis kan Dios tlanawatijtok.

¹⁶ Jesús okinmonapaloltiayah n pípilteh iwa okintiochiwaya ijkuak okintlaliliayah imawah impah.

Se telpochtli non kitlawelpia tomi motlapowia iwan Jesús

(Mt. 19:16-30; Lc. 18:18-30)

¹⁷ Ijkuak Jesús yoyaya de ompa, okalakiko se tlakatl, omotlankuáketski inawak iwa okili: —Kuali tlamachtli, ¿tlan nikchiwas para nikpías n semijkak nonemilis?

¹⁸ Jesús okili:

—¿Tleka techilia nikuali? Sanwel onka se Akin kuali, iwa Ye Dios. ¹⁹ Ya tikinmixmati n tlanawatlisteh:

“Amo xitemikti,
amo ximomekati,
amo xitlachteki,
amo xixolopijti,
amo xitekajkayawa,
iwa xikintlakita motajwah.”

²⁰ N telpochtli okinankili:

—Tlamachtli, nochi noni ya nikchijtiwits desde ni telpochtli.

²¹ Jesús okitlasojkaitak iwa okili:

—Ok se mitspoloa tikchiwas: xiknemakati nochi tlan tikpia, iwa n tomi, xikinxejelili non amitla kipiah, ijko tiktlawelpias kan ilwikak, iwa tiwits nowa.

²² Pero ijkuak ijko okikak, n telpochtli omoyolkokojtia porke saikpanoa okitlawelpiayah.

²³ Ijkuakó Jesús okonimitak non okiyawalojtokah iwa okinmili itlamachtijkawah:

—¡Kema owi kalakiskah kan Dios tlanawatia akimeh kitlawelpiah!

²⁴ Ninteh tlájtoltah san okintlajtlachialti itlamachtijkawah, pero Jesús oksepa okinmili:

—Nopilwah, ¡owi kalakiskah kan Dios tlanawatijtok akimeh kintlawelyoltiana n tomi!

²⁵ Okachi amo owi panos kan ixtololo n akuxa se riata* iwa amo se non kitlawelpia tomi makalaki kan Dios tlanawatijtok.

²⁶ Ijkuak okikakah tlan okijto, okachi omotlajtlachialtijkeh iwa okimoliayah:

—Tla ijko, ¿akin weletis kalakis ilwikak?

²⁷ Jesús okimixtlajtlatak iwa okinmili:

—N tlakah kimoliskah ayik weletis kichiwaskeh, pero Dios nochi weleti kichiwa.

²⁸ Ijkuakó Pedro opé kilia n Jesús:

—Noteko, tejwah otikkakajtejkeh nochi tlan otikpiayah, iwa otimitswaltokakah.

²⁹ Jesús okinankili:

—De milajka nomechilia, akin kikawa icha, ikniwah, iweltiwah, itajwah, ipilwah, noso ialtépeu por kitetlapowia n kualitlájto, ³⁰ kiselis axa itech nin tlaltípkaktli okachi de se sientto: kalmeh, ikniwah, iweltiwah, itajwah, iwa itlalwah, maya noiwa kitotojtokaskeh,

* 10:25 Sikimeh tlajkuufoleth kipiah n tlájtoli ‘de kameyo’ porke n michmajkeh kipiah se tomawak riata non okichijhijkeh ika itsojmio n kameyo. Nawi itlamachtijkawah achto michmajkeh iwa okitekitaliayah non riata non yejwah okitokayotijkeh ‘kameyo’.

iwa itech non ok se tlaltikpaktli, mach ok ayik mikkis yej nochipa yolitos. ³¹ Pero miakeh non axa moweyiliah, satepa ayakmó weyijkatitoskeh, iwa miakeh non axa amo moweyiliah satepa kinweyijkatlaliskeh.

Jesús oksepa kinmilia kenomi mikkis

(Mt. 20:17-19; Lc. 18:31-34)

³² Yoixtlejkotiayah Jerusalén, iwa Jesús okinyakantiaya itlamachtijkawah. Yejwah omotlajtlachaltijkeh iwa oyayah ika miak mawilistli. Ijkuakó Jesús oksepa okintlapowi n májtlaktli iwa ome itlamachtijkawah iwa opé kinmilia tlan mochiwaskia. ³³ Iwa okinmili:

—Xikitakah, axa tiixtlejkotiwih Jerusalén, kan Ne Non onimochi ni tlakatl nechtemaktiskeh innak tiopixkeh non tlayakantokeh iwa non kitemachtiah n tlanawatlistli. Yejwah nechtlajtlakoltiskeh iwa nechtemaktiskeh innak n tlakah non amo judíojeteh para manehmiktikah. ³⁴ Ompa nechpijpinawiskeh, nechchijchawiskeh, nechtsonwitekiskeh iwa nechmiktiskeh, pero ipan eyi tonati nimoyolitis.

Jacobo iwa n Juan motlatlaujtiah inawak Jesús

(Mt. 20:20-28)

³⁵ Ijkuakó Jacobo iwa n Juan, itelpochwah n Zebedeo, owalajkeh inawak Jesús iwa okilijkeh:

—Tlamachtli, timitsontlatlaujtiah techonchiwili tlan timitsontlajtlaniliskeh.

³⁶ Ijkuakó Ye okinmili:

—¿Tlan nonkinekih manomechchiwili?

³⁷ Iwa yejwah okinankilijkeh:

—Techonkawili matimotlalikh monajnakastla kan titlanawatijtos, se ik moyekma iwa ok se ik moopochma.

³⁸ Ijkuakó Jesús okinmili:

—Nomejwah mach nonkimatih tlan nonkitlajtlanih. ¿Weletis nontlajjyowiskeh kemi Ne ntlajjyowis?, noso ¿weletis nonmokuatekiskeh kemi Ne nimokuatekis?

³⁹ Yejwah okinankilijkeh:

—Tiweletiskeh.

Jesús okinmili:

—De milajka nomejwah nontlajjyowiskeh iwa nontlaxikoskeh kemi Ne. ⁴⁰ Pero mach Ne Akin kijos akin motlalis ik noyekma noso ik noopochma, yej Notajtsi kinmaktilis akimeh Ye yokimpéjpenki.

⁴¹ Ijkuak non ok májtlakteh itlamachtijkawah ijki okikakeh, okualankeh iwan Jacobo iwa n Juan. ⁴² Pero Jesús okinnotski iwa okinmili:

—Nomejwah kual nonkimatokeh itech wejweyi altepemeh, akimeh kintekiwajtlaliah pewa mosijsiniah innawak n tlakah de nonteh altepemeh, iwa akimeh tlayakantokeh chikawak pewa tlanajawatiah. ⁴³ Pero nomowah amo ijko yetos. Akin kinekis nomonawak moweyijkatlalis, moneki achto makimpalewi oksikimeh, ⁴⁴ iwa tla aka de nomejwah kineki tlayakantos nomonawak, moneki makintekitili oksikimeh. ⁴⁵ Porke nonewia Ne Non onimochi ni tlakatl amo oniwala para manechtekitilikah yej para nikintekitilis oksikimeh iwa para nimotemakas manehmiktikah para ika noni niktlatlawas intemakixtilis miakeh.

Jesús kipajtia n Bartimeo se tlakatl non amo otlachiaya

(Mt. 20:29-34; Lc. 18:35-43)

⁴⁶ Ijkuakó Jesús iwa itlamachtijkawah okalakitoh Jericó. Iwa ijkuak yokistiyah de Jericó, miakeh tlakah oyayah inwah. Ijkuakó se non amo otlachiaya akin itoka Bartimeo, ipiltsi n Timeo, oewatoka itempa n ojtli omotominijtlanjitoka. ⁴⁷ Iwa ijkuak okikak Jesús de Nazaret ik ompa opanotiaya, opé kitsajtsilia:

—¡Jesús, Ikone n David techiknomati!

⁴⁸ Miakeh okajwayah makitsakua ikamak, pero ye okachi otsajtsia:

—¡Ikone n David, techiknomati!

⁴⁹ Ijkuakó Jesús omóketski, iwa otlatlanki makinotsatih.

Yejwah okinotsatoh non amo otlachiaya iwa okilijkeh:

—¡Ximoyolchikawa! Ximoketsa. ¡Jesús mitsnotsa!

⁵⁰N kócoxki okontlamotlak ikoto, omoketewak iwa omijkuani inawak Jesús. ⁵¹Ijkuakó Jesús okitlajtlani:

—¿Tlan tikmonekiltia manimitstokti?

Ye okinankili:

—Tlamachti, nikneki nitlachias.

⁵²Jesús okili:

—Ya weletis timuikas, por otechneltokak yotipajtik.

San nima non amo otlachiaya owaltláchixki iwa oyá iwan Jesús.

11

Jesús kalaki Jerusalén kemi Rey

(Mt. 21:1-11; Lc. 19:28-40; Jn. 12:12-19)

¹Ijkuak ya onkalakiah Jerusalén, ayakmó wejka de Betfagé iwa Betania, iyakapa n olivostepetl, Jesús okintftlanki ome itlamachtijkawah, ²iwa okinmili:

—Xiwiah Betfagé, non kajki nepa tlayakapa, iwa san nima kan nonkalakitiweh nonkajsitiweh ilpitok se burro non ayamaka itech tlejkotika. Xiktojtomakah iwa techalikilikah.

³Iwa tla aka nomechtlajtlania tleka nonkitojtomah, xikilikah, n Toteko kimonekiltia, iwa san nima kitekopilis.

⁴Itlamachtijkawah oyajkeh iwa okajsitoh n burro ilpitok inakastla n kaltentli itech ojtli, iwa okitojtonkeh.

⁵Iwa sikimeh non ompa okatkah okimilijkeh:

—¿Tlan nonkichijtokeh? ¿Tleka nonkitojtomah n burro?

⁶Yejwah okinnankilijkeh kemi Jesús okimilijka, iwa okinkawilijkeh mawiah.

⁷Okiwikakeh n burrojtsi ixpa Jesús, iwa okipejpechtilijkeh ika inkotonwah iwa Jesús otlejok itech. ⁸Miakeh okisojkeh intlakeh itech ojtli, iwa oksikimeh okintsojtsontekiah inmamayowah n kuaujmeheh iwa okinsojsóayah itech ojtli.

⁹Nochteh non otlayakantiayah iwa non owalayah tlakuitlapa, opé tsajtsih:

—¡Hosanna!* ¡Tlatiochíwali Akin wits itech Itoka n Toteko Dios!

Sal.

118:26 ¹⁰¡Dios makitiochiwa Akin ya tlanawatis kemi otlanawati n totata David! ¡Hosanna! ¡Maweyijkachito Totajtsi Dios non moitstika ilwikak!

¹¹Jesús okalakito Jerusalén iwa milaktik okalakito kan Weyi Tiopa. Satepa ijkuak sentetl yotlajtlachiato, oyá kan altepetl de Betania iwa n májtlaaktli iwa ome itlamachtijkawah porke yotleyuatoka.

Jesús kitlawelajwa se igoskuawitl non amo otaakia

(Mt. 21:18-19)

¹²Ijkuak owalmostlatik okiskeh de Betania iwa Jesús owalxitlatlak itech ojtli. ¹³Iwa san wejka okonitak se igoskuawitl non kualtsi oxopiawatoka. Oyá okitlatemolito, pero amitla okajsik, sanwel ixuijyo ken ayamó owalajsia n tonati ijkuak tlaaki. ¹⁴Ijkuakó Jesús okili n igoskuawitl:

—¡Ayik makikuakah motlakilo!

Iwa itlamachtijkawah otlakaktokah.

Jesús kualinkixtia n tlasemankeh kan Weyi Tiopa

(Mt. 21:12-17; Lc. 19:45-48; Jn. 2:13-22)

¹⁵Ijkuak okalakitoh Jerusalén, Jesús oyá kan Weyi Tiopa iwa opé kualinkixtia akimeh ompa otlanamakatokah iwa otlakojtokah. Okinxitronkopili inmesajwah akimeh otomintlapatlatokah iwa insiyajwah akimeh okinemakatokah palomajtsinteh. ¹⁶Iwa amo okitekawiliaya aka makitlajkomilawa n Weyi Tiopa ika itla itlamamal. ¹⁷Iwa ijki okinmachiaya:

* 11:9 Kijtosneki ¡Techpalewil

—Itech itlajkuilol Dios kijtoa: “Nocha kinotsaskeh kali kan motiotsajtsiliskeh nochteh n tlaltikpaktlakah”, pero nomejwah yononkikopkeh se kúyoktli de ichtekheh.

¹⁸N tiopixkeh non tlakantokeh iwa non kitemachtiah n tlanawatfistli okimatkeh tlan Jesús okichi kan Weyi Tiopa, iwa opé kitemoliah kenijki weletis kimiktiskeh. Yejwah okimawiliayah porke nochteh n tlakah de non altepetl omotlajtlachialtiayah de itlamachtilis. ¹⁹Iwa ijkuak owaltiotlatik, Jesús iwa itlamachtijkawah okiskeh de Jerusalén.

Waki n igoskuawitl non amo otlaakia

(Mt. 21:20-22)

²⁰Ijkuak owalmostlatik, iwa opanokeh kan igoskuawitl, okitakeh yowaka asta inelwayo. ²¹Ijkuakó Pedro okualilnamik, iwa okili n Jesús:

—Tlamachtli, xikita, n igoskuawitl non otikajwak yowaki.

²²Jesús okinnankili:

—Xitlaneltokakah inawak Dios. ²³De milajka nomechilia, tla aka kilis nin tepetl: “Ximoachiwa iwa ximomanati itech weyi atl”, iwa ika nochi iyolo kineltoka milák mochiwas, ijko tlamochiwas. ²⁴Yika nomechilia: Nochi tlan nonkitlajtlaniskeh itech nomotiotsajtsilis, xikneltokakah kemi yaskia yononkiselijkeh, iwa Totajtsi Dios nomechmaktilis. ²⁵Iwa ijkuak non motiotsajtsiliskeh, tla aka nonkikokoliah, xiktlapojpolwikah, ijko noiwa Nomotajtsi Dios non kajki ilwikak manomechtlapojpolwi. ²⁶Tla nomejwah amo nontetlapojpolwiah, Nomotajtsi non kajki ilwikak, noiwa amo nomechtlapojpolwis de nomotlajtlakolwah.

Iweletilis n Jesús

(Mt. 21:23-27; Lc. 20:1-8)

²⁷Satepa oksepa omokopkeh Jerusalén. Iwa ijkuak Jesús otlajtlachixtinemia itech n Weyi Tiopa, omijkuaniykeh inawak n tiopixkeh non tlakantokeh, non kitemachtiah n tlanawatfistli iwa n tetajmeh non tlakantokeh kan tiopa, ²⁸iwa okitlajtlaniykeh:

—¿Akin omitsmák tekiwajyotl para ijko tikchiwas?

²⁹Jesús okinnankili:

—Ne noiwa nomechtlajtlanis, iwa tla nonnechnankiliskeh, Ne nomechilis akin onechmák nin tekiwajyotl. ³⁰¿Akin okinawati n Juan matlakuaateki, Dios noso n tlakah? Technankilikah.

³¹Ijkuakó san yejwah opé motlatlajtolkopah, iwa okimoliayah:

—Tla tikiliskeh Dios okinawati, Ye techilis: “Tla ijko, ¿tleka mach ononkineltokakeh?”

³²Amo weletis tikiliskeh san tlakah okinawatijkeh.

Yejwah okinmawiliayah n tlakah porke nochteh okimatiah Juan milák ye se profeta.

³³Yika, otlanankilijkeh:

—Amo tikmatih.

Ijkuakó Jesús okinmili:

—Ne noiwa mach nomechilis akin onechmák nin tekiwajyotl.

12

Sikimeh tekitkeh amokualteh

(Mt. 21:33-46; Lc. 20:9-19)

¹Ijkuakó Jesús opé kintlapowia ika tlapoálisteh iwa okinmili:

—Se tlakatl okintojtook uvaskuauymeh itech itlala iwa nochi oksatsak. Otlanki okichijchi se tanke kan kimpatskas n uvasteh noiwa okichijchi se torre para kimokuitlawis itlatok.

²Satepa, itlala okinkajtewili makimokuitlawikah sikimeh uvastekitkeh para makitekitlikah, iwa oyá wejka. ³Ijkuak oajsiko n tonati para motekis n uvas, n tekowa okitfítlanki se itlakewal para makintlajtlaniliti n uvastekitkeh tlan iaxka. ⁴Pero yejwah okikitskijkeh iwa okiwitekeh, iwa okonewaltijkeh mapijpilkati. ⁵N tekowa okontfítlanki ok se itlakewal. Pero nin itlakewal okimojmotlakeh ika tetl, okikuatlapankeh iwa okiwijwiktalijkeh. ⁶N tekowa oksepa okontfítlanki ok se itlakewal, iwa nin itlakewal okimiktijkeh. Satepa okintitlantiah oksikimeh, sikimeh okinwitekeh iwa oksikimeh okinmiktijkeh.

⁶ 'Iwa iksemi sa ipiltsi omokawaya, non san ye se itlasoj, iwa okintitlanili porke okimoliaya: "Nopiltsi, kema kitlakitaskesh." ⁷ Pero nekateh uvastekitkeh okimolijkeh: "Ye ni akin kimokawis noch; matikmiktikah iwa tejwah tikmokawiskeh tlan kiakxkatiliskesh." ⁸ Iwa okikitskijkeh, okimiktijkeh iwa okontlamotlatoh kala.

⁹ Ijkuakó Jesús okintlajtlani:

—Axa ¿tlan nonkiyejekoliah kichiwas n tekowa de non lawerta? Wits kinmiktiki nonteh tekitkeh, iwa ilawerta kinmaktilis oksikimeh.

¹⁰ 'Mach ayamó nonkiamapoah itlajkuilol Dios kan kijtoa:

N tetl non kalchijchijkeh ik nepa okontlakaltechojkeh, yomochiwako n tetl non okachi tetlakxili.

¹¹ Ye nin tlan Toteko okichi, iwa techtlajtlachialtia.

Sal. 118:22-23

¹² Ijkuakó okitemoliayah kenijki kitsakuaskeh n Jesús, porke okajsikamatiah non tlapoálistli yejwah okinmili. Pero yejwah okinmawiliayah n tlakah, yika okikajkeh n Jesús iwa oyajkeh.

Kitlajoltiah n Jesús kox kuali ka se kitlaxtlawas impuesto
(Mt. 22:15-22; Lc. 20:20-26)

¹³ Satepa okintitlanilijkeh n Jesús sikimeh fariseos iwa sikimeh itekitwah n Herodes, para kitlajoltlapololtiskesh iwa ijko weletis kitlajtlakoltiskesh. ¹⁴ Yejwah okitakoh n Jesús iwa okilijkeh:

—Tlamachtí, tikmatokeh Tejwatsi tinemi ika moyolo chipawak iwa tikijtoa tlan milák iwa amo timotlachilia ijkuak mitskakah, yej titemachtia tlan milák. ¿Kox kuali matiktaxt-lawakah impuesto inawak César? ¿Tikpiah tiktlaxtlawaskeh noso amó?

¹⁵ Pero ken Jesús yokimatia íxkopteh, yika okinmili:

—¿Tleka nonkinekih manimotlapololti? Techalikilikah se platajtomí manikita.

¹⁶ Yejwah okititijkeh n platajtomí, iwa ijkuak Jesús okitak, okintlajtlani:

—¿Akin ixko iwa akin itoka nika ijkuilitok?

Yejwah okilijkeh:

—De César.

¹⁷ Ijkuakó Jesús okinmili:

—Xikmakakah n César tlan iaxka n César, iwa xikmakakah Dios tlan iaxka n Dios.

Yejwah san omotlajtlachialtijkeh kenijki otlanankili.

N saduseos kitlajtlaniah n Jesús kox oksepa se moyolitís
(Mt. 22:23-33; Lc. 20:27-40)

¹⁸ Ijkuakó owalajkeh sikimeh saduseos inawak Jesús. Ninteh saduseos kijtoa non yomikkeh ayakmó moyolitiah, yika okitlajtlanjkeh:

¹⁹ —Tlamachtí, Moisés otechmachtih, tla se tlakatl non ya kipia isiwa mikki, iwa amo okímpixki ipilwah iwan isiwa, se ikni moneki monamiktis iwan iknosiwatl. Ijko non yomikki ya kimpías ipilwah. ²⁰ Yowejka okatkah chikome iknimeh. Non teteachka omonamikti pero omikki iwa nion se ikone okikajtewili isiwa. ²¹ Ijkuakó itsoyo omonamikti iwan iknosiwatl, pero noiwa omikki iwa amo okikajtewili nion se ikone n iknosiwatl, iwa noiwo omochi non ipan eyi iknimeh. ²² Ijko n chikome iknimeh omonamiktijtijkeh iwa non siwatl, pero nion se okikajtewili se ikone. Sa iksemi noiwa omikki n siwatl.

²³ Axa, ijkuak moyolitiskesh non yomikeh, ¿de akin yetos tesiwa?, porke n chikome iknimeh omonamiktijtijkeh iwa non siwatl.

²⁴ Ijkuakó Jesús okinnankili:

—Nomejwah nonkuatlapolojtokeh, porke mach nonkajsikamatih itlajkuilol Dios nion iweletilis. ²⁵ Porke ijkuak non yomikeh moyolitiskesh, mach ok monamiktiskesh nion kintemakaskeh impilwah mamonamiktikah, porke yetoskeh kemi ángelteh non kateh ilwikak. ²⁶ Pero tla nomejwah nonnechtlajtlanjtokeh kox moyolitiah non yomikkeh, ¿mach ayamó nonkiamapoah itlajkuilol Moisés, kan techmatiltia kenijki Dios okitlapowi n Moisés itech n tlátsmoli non otlatlatoka? Dios okili n Moisés: "Ne Idios Abraham,

Isaac, iwa Jacob.” ²⁷ ¡Dios mach Dios de akimeh yomikkeh, yej de akimeh yolitokeh!, yika nomechilia nomejwah nonkuatlapolojtinemih. Éx. 3:6

*Non okachi weyi itlanawatil Dios
(Mt. 22:34-40)*

²⁸ Seme non kitemachtia n tlanawatflistli, keman okikak Jesús kuali okinnankili n saduseos non okinekia mamotlajtoltlapololti. Omijkuan inawak Jesús iwa okitlajtlani:

—¿Katlie itlanawatil Dios okachi weyi kijtosneki?

²⁹ Jesús okinankili:

—N tlanawátili non okachi weyi kijtosneki, ye ni: “Xikkaki Israel, n Totajtsi Dios sanwel Ye se.”

³⁰ “Xiktlasojtla Moteko Dios ika nochi moyolo, ika nochi moalma, ika nochi motlalnamik-
ilis iwa ika nochi mochikawalis.” ³¹ Iwa non ipan ome tlanawátili noiwa kijtoa: “Xiktlasojtla mokni kemi te timotlasojtla.” Amo onkateh oksikimeh tlanawátilteh okachi wejweyih kemi ninteh ome.

³² Ijkuakó n tlamachti okili:

—Kuali ka, Tlamachti. Milák tlan tikijtoa: Sanwel onka se Dios, iwa amo onka ok se kemi Ye. ³³ Tikpiah tiktlasojtlaskeh Dios ika nochi toyolo, ika nochi totlalnamikilis, ika nochi toalma iwa ika nochi tochikawalis, iwa tiktlasojtlas mokni, kemi te timotlasojtla, ika noni okachi tikyolpaktiah Dios iwa amo ijkuak titlamanah noso tikchichinoah se yolkatl.

³⁴ Jesús okikak nin tlamachti otlanankili kemi akin ixtlamati, yika okili:

—Te amo tika wejka kan Dios tlanawatijtok.

Ijkuakó, ayakmaka omixewi kitlajtlanis itla n Jesús.

¿Akin Ikone?

(Mt. 22:41-46; Lc. 20:41-44)

³⁵ Jesús otlamachtijtoka kan Weyi Tiopa iwa okijto:

—¿Kenomi kijtoa non kitemachtiah n tlanawatflistli, Cristo Ikone n rey David? ³⁶ Porke inewia n David okijto ijkuak n Espiritu Santo okitlajtolýákanki:

Toteko Dios okili n Noteko:

“Ximotlali ik nomayekma,

asta manikintlali moikxitla akimeh mitskokoliah.”

Sal. 110:1

³⁷ Tla inewia n David kinotsa Noteko n Cristo, ¿kenomi n Cristo weletis yetos ikone n David?

Iwa tlawelmiakkeh tlakah okikakiah n Jesús ika pakílistli.

Jesús kinteilia n tlamachtijkeh de itlanawatil Moisés

(Mt. 23:1-36; Lc. 11:37-54; 20:45-47)

³⁸ Itech itlamachtilis n Jesús okijtoaya:

—Ximotlachilikah inmak non kitemachtiah n tlanawatflistli, porke kiwilitah nemiskeh ika kuajkualteh tlakemeh weweyakeh, noiwa kiwilitah makintlajpalokah teixpa iwa makintlakitakah miak. ³⁹ Yejwah kiwilitah moyayantiskeh tlayakapa itech sinagogas iwa itech ilwimeh, ⁴⁰ iwa kintlakijxiltialih n iknosiwameh, iwa para kinmixtlaatiskeh intlajtlakolwah saikpanoa motiotsajtsiliah. Yejwah kiseliskeh okachi weyi tlaijyowílistli.

N iknosiwatl non okitemák nochi tlan okipiaya

(Lc. 21:1-4)

⁴¹ Se tonati Jesús oewatoka iyakapa n kaxajtomi kan Weyi Tiopa de Jerusalén, iwa okintlajtlatoka kenijki okontlaliayah tomi ijtik kaxa. Miakhe non okitlawelpiyah, okontlaliyah miak tomi. ⁴² Ijkuakó owala se probe iknosiwatl iwa okonintlali ome tomimeh de kobre, non amo miak impati. ⁴³ Ijkuakó Jesús okínnotski itlamachtijkawah iwa okinmili:

—De milajka nomechilia, nin probe iknosiwatl, okachi okitemák iwa amo kemi oksikimeh. ⁴⁴ Porke nochteh okitemakakeh tlan ayakmó kitekitiltiah, pero nin iknosiwatl, okitemák nochi tlan ika panotoskia.

13

Jesús okijto n Weyi Tiopa de Jerusalén kixixititsaskeh

(Mt. 24:1-2; Lc. 21:5-6)

¹ Keman Jesús okistiaya de kan Weyi Tiopa, se itlamachtijkau okili:

—¡Tlamachti, xikoninmita ninteh wejweyi temeh, iwa kuajkualteh n kalmeh!

² Jesús okinankili:

—¿Tikinmita nochteh ninteh wejweyijtikeh kalmeh? Mach ok mokawas nion se tetl ipan ok se. Nochi kixixititsaskeh.

Ijkí tlamochiwas ijkuak ya pojpoliwiti n tlaltípkaktli

(Mt. 24:3-28; Lc. 21:7-24; 17:22-24)

³ Ijkuakó Jesús iwa itlamachtijkawah oyajkeh kan olivostepetl, non mokawa iyakapa n Weyi Tiopa de Jerusalén. Iwa ijkuak Jesús omosewijtoka, Pedro, Jacobo, Juan iwa Andrés okiichtakatlajtlanitoh:

⁴ —Weletis techilis, ¿kermania ijko tlamochiwas? ¿Iwa tlan achto techmonextilis ijkuak ya pewas ijko tlamochiwas?

⁵ Jesús opé kinmilia:

—Kuali ximotlachilikah, amaka manomechkajkayawa. ⁶ Porke miakeh witseh iwa kijtoskeh: “Ne Ni Cristo”, iwa miakeh kinkajkayawaskeh.

⁷ Ijkuak nonkikakiskeh sentetl itech nin tlaltípkaktli momijmiktilo, amo ximomojtikah saman ijko tlamochiwas. Pero ayamó tlajtlamis n tlaltípkaktli. ⁸ Porke se nasiun momakas iwa ok se nasiun, iwa se gobierno momakas iwa ok se gobierno. Sentetl tlalolinis iwa yetos apisotl, ijko pewas n tlaijyowfílistli, kemi se siwatl ijkuak pewa kitsopitia itlax iwa ya tlakatis ikone.

⁹ Ximotlachilikah nomonewiah, porke nomechtemaktiskeh innak tekiwajkeh, iwa nomechsonwitekiskeh kan sinagogas. Nomejwah nonkalakitiweh innawah gubernadormeh iwa reyes por nonnechtlakitah, ijko weletis nontetlapowiskeh de Ne. ¹⁰ Pero achto moneki mamotematilti n kualitlajtoli itech nochi n tlaltípkaktli. ¹¹ Iwa ijkuak nomechtemaktiweh inawah tekiwajkeh, amo ximotekipachokah nion xikmolikah tlan nonkijtoskeh. Nomejwah xikijtokah tlan Dios nomechilis, amo nomejwah nontlajtoskeh, yej n Espíritu Santo Akin tlajtos. ¹² N teikni kitemaktis ikni makimiktikah, iwa n teta kitemaktis ipiltsi makimiktikah, iwa n tepilwah kinmixnamikiskeh intajwah iwa kinmik-tiskeh. ¹³ Nochteh nomechkokoliskeh ken nonnechtlakitah, pero akin mochijchikawas iwa kixikos nochi, momakixtis.

¹⁴ Pero ijkuak nonkitaskeh tlan teyolijtlakoa moketos kan Weyi Tiopa, kan amo moneki yetos, ijkuakó akimeh yetoskeh Judea, macholokah kan tepemeh. Dan.

^{9:27, 12:11} Akin kiamapoas makajsikamati, ¹⁵ iwa itech non tonati, akin yetos ikpak ikal amo mawaltemo makixixitiki itla; ¹⁶ iwa akin yetos itlala amo mawalmokopa icha makikuiki itlake. ¹⁷ Miálmasteh, n siwameh akimeh itech nonteh tonatijmeh yetoskeh kokoxkeh de konetl noso akimeh kimpiaskeh impilwah non ok chichih! ¹⁸ Ximotiotsajtsilikah, para ijkuak ijko tlamochiwas amo mayeto itech sewaya. ¹⁹ Porke itech nekateh tonatijmeh yetos tlaijyowfílistli satlawel temojti, kemi ayik motika desde ijkuak Dios okichijchi nin tlaltípkaktli, nion mach ayik oksepa ijko tlamochiwas. ²⁰ Iwa tla Toteko Dios amo kintsik-itsintiliskia nonteh tonatijmeh de tlaijyowfílistli, amaka makisaskia. Pero okintsikitsintili porke kintlasojtla iaxkawah, non Ye okimpéjpenki.

²¹ Ijkuakó, tla aka nomechilia: “Xikitakah nika ka n Cristo”, noso “Xikitakah, nepa ka”, amo xikneltokakah. ²² Porke monextiskeh tlakah tekajkayajkeh non kijtoskeh yejwah cristos iwa profetas. Yejwah kinchiwaskeh milagros noso kinnextiskeh neskáyolteh para tekajkayawaskeh, iwa tla weletis noiwa asta akimeh Dios yokinnmopejpenili kinkajkayawaskeh. ²³ Pero ¡kuali ximotlachilikah! Ne yonomechnejmachi.

Jesús oksepa walmokopas

(Mt. 24:29-35, 42-44; Lc. 21:25-36)

²⁴ Itech nekateh tonatijmeh, ijkuak yopanok n tlaijyowilistli, n tonati walsewis iwa n metsi ayakmó techtlawilis. ²⁵ N sitlalteh walwetsiskeh de ilwikak, iwa n chikawálisteh non kateh ilwikak bibiokaskeh. ²⁶ Ijkuakó nonnechitaskeh Ne Non onimochi ni tlakatl niwaltemotiwits itech mexkli ika weyi weletilistli iwa weyfilistli. ²⁷ Tlamis nikwalintitlanis noangelwah makinmoololokih non Ne onikinpéjpenki de n nawi ejekameh itech nin tlaltfipaktli asta n ilwikak.

²⁸ Xikajsikamatikah tlan onomechmächti de n igoskuawitl: ijkuak imamayowah seliah, iwa pewa mokopinah, nomejwah nonkimatih ya ajsiki n tonala. ²⁹ Ijkó noiwa, ijkuak nonkitaskeh ya pewa ijkó tlamochiwa, xikmatikah Ikone n Totajtsi Dios ya walkalakiki. ³⁰ De milajka nomechilia nochi ni tlamochiwas achto de mijmikiskeh n tlakah de ninteh tonatijmeh. ³¹ N ilwikak iwa n tlaltfipaktli pojpoliwiskeh pero tlan Ne yonikjito saman mochiwas.

³² N tonati iwa n ora ijkuak ijkó tlamochiwas, amaka kimati, nion ángelteh non kateh ilwikak, nion Ikone n Totajtsi Dios. Sanwel Totajtsi kimati.

³³ Yika nomejwah xiijsatokah, xiyektlachixtokah iwa ximotiotsajtsilijtokah, porke mach nonkimatih kemania kalakiki non tonati. ³⁴ Ni tlamochiwas kemi ijkuak se tlakatl yawi wejka, pero ijkuak ya oonewas, achto kinnajawatijtewah itlakawah makimokuitlawilikah icha, kinmajmakatewa inteki iwa n kaltentlamokuitlawi kilia mayektlamokuitlawi. ³⁵ Yika nomejwah xiijsatokah, porke mach nonkimatih kemania ajsiki n tekowa de non kali, kox tiótlaki, tlajkoyuak noso kualka ijkuak tlakuika n kaxtil, ³⁶ amo kichiwa walkalakiki iwa nomechajtsiki nonkochtokeh. ³⁷ Tlan nomejwah nomechilia, noiwa nochteh nikinmilia: Xiijsatokah.

14

Motlatlalwiah kenijki kikitskiskeh n Jesús

(Mt. 26:1-5; Lc. 22:1-2; Jn. 11:45-53)

¹ Sa ome tonati opolitoka para n ilwitl de Paskua, ijkuak n judíojtch kikuah n paj non amo kipia levadura. N tiopixkeh non tlayakantokeh iwa n tlamachtijkeh de itlanawatil Moisés, okitemoliayah kenijki tlakajkayawaskeh para kikitskiskeh n Jesús iwa kimiktiskeh. ² Pero okimoliayah:

—Amo tikkitskiskeh itech ilwitl de Paskua, para amo matikimpajsolokah n tlakah.

Se siwatl kikuaxawilia ajwiálistli n Jesús

(Mt. 26:6-13; Jn. 12:1-8)

³ Jesús okatka Betania icha n Simón non achto okiapiyah lepra. Ijkuak Jesús oewatoka kan mesa, owala se siwatl non okwalikaya se tekontsi tentok ika ajwiálistli de nardo non satlawel patío. Okitlápanki n tekontsi iwa n ajwiálistli okikuaxawili n Jesús. ⁴ Sikimeh non ompa okatkah okualankeh iwa okimolijkeh:

—¿Tleka san okixpolo nin ajwiálistli? ⁵ Weletiskia monamakaskia ika eyi siento denariojtomi, para ika se kimpalewiskia n próbesteh.

Iwa okualantokah iwa.

⁶ Pero Jesús okijto:

—Xikkawakah; ¿tleka nonkikuejsoah? Tlan onechchiwili satlawel kuali. ⁷ Porke n próbesteh nochipa nonkimpixtoskeh nomowah, iwa weletis nonkimpalewiskeh san ijkuak nonkinekiskeh. Pero Ne amo nochipa nonnechpixtoskeh nomowah. ⁸ Nin siwatl okichi tlan owéletki, porke yonechajwiali para ijkuak nechtookaskeh. ⁹ De milajka nomechilia itech nin tlaltfipaktli kan motetlapowis n kualitlájtoli de Dios, noiwa sentetl motetlapowis tlan okichi nin siwatl, iwa ijkó se kilnamikis.

Judas Iscariote kitemaktia n Jesús

(Mt. 26:14-16; Lc. 22:3-6)

¹⁰ Ijkuakó Judas Iscariote, seme de n májtlahtek iwa ome itlamachtijkawah, oyá omotlatlapowito iwan tiopixkeh non tlayakantokeh para kinmaktilis n Jesús. ¹¹ Ijkuak okikakeh

tlán okimilito, opakeh, iwa omokajkeh kimakaskeh tomi. Ijkuakó Judas opé kitemolia kermania okachi kuali para kinmaktilis n Jesús.

*N tlákuali non mokua itech ilwitl de Paskua
(Mt. 26:17-29; Lc. 22:7-23; Jn. 13:21-30; 1 Co. 11:23-26)*

¹² Itech ipewayi n ilwitl de Paskua ijkuak mokua n paj non amo kipia levadura, ijkuak noiwa okimiktiayah n ichkakonetl itech ilwitl de Paskua, itlamachtijkawah n Jesús okitlajtlanjkeh:

—¿Kani tikmonekiltia matimitsmajmanilitih n tlákuali de Paskua?

¹³ Ijkuakó okintítlanki ome itlamachtijkawah iwa okinmili:

—Xiwiah kan altepetl, ompa nonkitaskeh se tlakatl non kimamajti se axoktsi. Xiwiah kan ik ye yawi, ¹⁴ iwa kan kalakis, xikilikah n tekowa: “N tlamachtí tlajtlani: ¿Katlie n kali kan nikmomajsewis n tlákuali de Paskua iwa notlamachtijkawah?” ¹⁵ Ye nomechititis se weyi kuarto non kajki tlakpak. Non ya tlamajmantok. Ompa xikmajmanakah n tlákuali non tikmomajsewiskeh.

¹⁶ Itlamachtijkawah oyajkeh iwa okalakitoh kan altepetl. Yejwah otlaajsikeh ijko kemi Jesús okinmili, iwa okimajmankeh n tlákuali de Paskua.

¹⁷ Ijkuak owaltiotlatik, Jesús okalakito iwa n májtlakteh iwa ome itlamachtijkawah itech non kali. ¹⁸ Iwa ijkuak otlakuajtokah kan mesa, Jesús okinmili:

—De milajka nomechilia non seme, akin tlakuajtok nowa, nechtemaktis.

¹⁹ Ijkuakó yejwah omoyolkokojkeh, iwa se por se opé kitlajtlania:

—¿Ne nimitstemaktis?

Iwa ok se noiwa okijto:

—¿Noso ne nimitstemaktis?

²⁰ Jesús okinmili:

—Seme de non májtlakteh iwa n ome, akin tlapalojtok itech noplato. ²¹ De milajka nomechilia, Ne Non onimochi ni tlakatl nimochiwas kemi kijtoa itlajkuilol Dios, pero jprobe n tlakatl non nechtemaktis! Okachi kuali amo tlakatiskia.

²² Ijkuak otlakuajtokah, Jesús okónanki n paj, omotlasojkama inawak Dios, okitlajkotlá-panki iwa okinmák makimomajsewikah iwa okinmili:

—Xikmomasewikah nin paj, ye ni nokuerpo.

²³ Otlanki okónanki se kopa, iwa ijkuak yomotlasojkama inawak Dios. Okinmaktili itlamachtijkawah iwa nochteh okonikeh. ²⁴ Iwa okinmili:

—Ye ni noesso non ika timotlajtolsenkawa, nin noesso motoyawas para miakeh makintlapojpolwikah. ²⁵ De milajka nomechilia, ayakmó nikonis iayo n uvas, asta neká tonati ijkuak nikonis n yankuik vino kan Dios tlanawatijtok.

*Pedro kijtos amo kixmati n Jesús
(Mt. 26:30-35; Lc. 22:31-34; Jn. 13:36-38)*

²⁶ Keman okitlakuikakeh se salmo, oyajkeh kan olivostepetl. ²⁷ Iwa ompa Jesús okinmili: —Nochteh nomejwah nonnechkakajtewaskeh nin yúali, porke itech itlajkuilol Dios kijtoa: “Nikmiktis n tlájpixki, iwa n ichkameh moxexeloskeh.” Zac. 13:7 ²⁸ Pero ijkuak nimoyolitis, nomechyakantias para Galilea.

²⁹ Ijkuakó Pedro okili:

—Malki nochteh mamitskakajtewakah, ne amo nimitskakajtewas.

³⁰ Jesús okili:

—De milajka nimitsilia, nin yúali, achto de tlakuikas n kaxtil ome welta, ijkuakó te yotikijto eyi welta amo techixmati.

³¹ Pedro okachi omotlajtolchijchika iwa okili:

—Malki mowa manechmiktikah, mach ayik nikijtos amo nimitsixmati.

Noiwa n oksikimeh itlamachtijkawah ijko okijtojkeh.

*Jesús motiotsajtsilia kan werto de Getsemani
(Mt. 26:36-46; Lc. 22:39-46)*

³² Satepa oyajkeh kan se lojar non itoka Getsemaní, iwa n Jesús okinmili itlamachtijkawah:

—Nika ximotlalikah, Ne nio nimotiotsajtsiliti.

³³ Ijkuak Jesús omotiotsajtsilito okinwík n Pedro, Jacobo iwa n Juan, iwa ompa opé moyolkokoa iwa omotekipachoaya. ³⁴ Niman okinmili:

—Satlawel nimoyolkokoa, asta nikmachilia nomikilis. Nika ximokawakah iwa xijsatokah.

³⁵ Iwa n Jesús onéjnenki okachitsi tlayakapa, omotlankuáketski asta okitelko n tlali ika ixkuak, iwa okitlatlaujti Dios, tla Ye okimonekiltiaya amo makikawili matlajiyowi itech non ora. ³⁶ Iwa itech itiotsajtsilis okijto:

—Abba, Notajtsi, Tejwatsi nochi weleti tikchiwa; xikachiwa nin tlajiyowílistli non wits notech, pero amo mamochiwa kemi Ne nikneki, yej kemi Tejwatsi tikmonekiltia.

³⁷ Otlanki omókopki kan eyi itlamachtijkawah iwa okinmajsito kojkochokeh, iwa okili n Pedro:

—Simón, ¿tikochtok? ¿Nion se ora amo otixkiko tijsatok? ³⁸ Xijsatokah iwa ximotiotsajtsilikah, para amo manomechyltilana n tlajtlákoli. Nomoespíritu kineki kichiwas tlan kuali, pero nomokuerpo amo tlaxikoa.

³⁹ Jesús oksepa omotiotsajtsilito iwa okejpatili itiotsajtsilis. ⁴⁰ Ijkuak omokopato, oksepa okinmajsito kochtokeh, porke okochmikiah. Iwa amo okimatiah tlan kinankiliskesh.

⁴¹ Omokopato ipan eyi welta iwa okinmili:

—¿Ok non kochtokeh iwa ok nonmosewiah? ¡Xijsakah! Yoajsiko n ora, Ne Non onimochi ni tlakatl nechtemaktiskesh inmak tlajtlakolchijkeh. ⁴² ¡Ximewakah, tiawih! Ompa wits akin nechtemaktis.

Kikitskiah n Jesús

(Mt. 26:47-56; Lc. 22:47-53; Jn. 18:2-11)

⁴³ Jesús ok otlajtojtoka ijkuak okalakiko n Judas, seme de n májtlakteh iwa ome itlamachtijkawah. Judas okwalinwikaya miakeh tlakah non okinmakitskijtiwalayah espadas iwa kuaujme. Ninteh tlakah okwalintitlankeh n tiopixkeh non tlayakantokeh, non kitemachtiah n tlanawatílistli iwa n tetajmeh non tlayakantokeh kan tiopa. ⁴⁴ Judas non yokiichtakatemakatoka yokinmilijka:

—Akin ne nikixtennamikis, ye n Jesús, xikkitskikah iwa kuali xikmokitlawijtiwiah.

⁴⁵ Ijkuak Judas okalakito inawak Jesús, okili:

—Tlamachtí.

Iwa okiixtennamik. ⁴⁶ Ijkuakó okikitskijkeh n Jesús, iwa okiwikakeh.

⁴⁷ Pero seme de itlamachtijkawah n Jesús, okualkópinki iespada iwa okinakastsontek se itlakewal n tiópixki non okachi otlayakantoka. ⁴⁸ Ijkuakó Jesús okinmili n tlakah:

—¿Ononwalajkeh ononnechkitskikoh ika espadajteh iwa ika kuawitl kemi niyetoskia nitlachtek? ⁴⁹ Nochi tonati onitlamachtia nomonawak kan Weyi Tiopa, iwa ayik ononnechkitskijkeh. Pero moneki tlamochiwas kemi kijtoah n tiotlajkufloli.

⁵⁰ Ijkuakó nochteh itlamachtijkawah n Jesús ochocholojkeh iwa okikakajtejkeh iselti.

Se télpochtli non ocholo xipetstik

⁵¹ Se télpochtli non okikuitlapantokatiaya n Jesús iwa okemelitiaya san ika se mantajtsótsoli, noiwa okikitskijkeh, ⁵² pero ye okinmoxolkopinili iwa okinkakajtewili imantajtsótsol iwa ocholo xipetstik.

Jesús inawak Sanedrín

(Mt. 26:57-68; Lc. 22:54-55, 63-71; Jn. 18:12-14, 19-24)

⁵³ Ijkuakó okiwikakeh n Jesús inawak n tiópixki non okachi tlayakantok. Iwa ompa omooolojkeh nochteh n tetajmeh non tlayakantokeh kan Weyi Tiopa, iwa non kitemachtiah n tlanawatílistli. ⁵⁴ Iwa Pedro san wejka okiichtakatokatia n Jesús asta okalakito kan ipatio n tiópixki non okachi tlayakantok. Ompa omotlali iwan tlamokuitlawijkeh de n Weyi Tiopa, omototonijtokah inakastla n tlékuili.

⁵⁵N tiopixkeh non tlayakantokeh iwa n nochteh non de n Sanedrín* okitemoliayah tlan ika kitlajtlakolmamaltiskeh n Jesús iwa ijko weletis kimiktiskeh. Pero amitla okajsiyah. ⁵⁶Miakeh okijtoayah tlan amo milák, iwa mach san se intlajtol okipiyah. ⁵⁷Ijkuakó sikimeh owalmokeketskeh iwa opé kiteiliah n Jesús iwa ijki okijtoayah:

⁵⁸—Tejwah otikkakeh ijkuak okijto: “Ne nikxixinis nin Weyi Tiopa non okichijchijkeh n tlakah, iwa ipan eyi tonati nikajkokuis ok se Weyi Tiopa non amo aka tlakatl kimachijchivas.”

⁵⁹Malki ijko okijtoayah mach san se intlajtol okipiyah.

⁶⁰Ijkuakó n tiópixki non okachi otlayakantoka omoketsato tlatlajko iwa okitlajtlani n Jesús:

—¿Amitla tikijtos de tlan ninteh mitsteiliah?

⁶¹Jesús amitla okinankili. Iwa n tiópixki non okachi otlanawatiaya oksepa okitlajtlani:

—¿Te ti Cristo, Ikone n Totajtsi Dios Non tiochitok?

⁶²Jesús okinankili:

—Milák, Ne. Iwa nomejwah nonnechitaskah Ne non onimochi ni tlakatl niewatos iyekma n Dios weletini, iwa satepa niwalmuikas itech mexтли de ilwikak.

⁶³Ijkuakó n tiópixki non okachi otlayakantoka omotlakentsomoni iwa okijto:

—¿Tlan ok para tikinnekah oksikimeh makijtokih tlan okijto? ⁶⁴¡Nomejwah yononkikakeh, Ye tlajtoa kemi yetoskia Dios! ¿Axa, tlan nonkijtoah?

Nochteh okitlajtlakoltijkeh iwa okijtojkeh kuali makimiktikah.

⁶⁵Ijkuakó sikimeh opé kiixchijchawiah, okixtsakuayah, okiixwitekiah. Iwa okiliayah:

—¡Axa, xikyeyekoli akin omitsmák!

Iwa n tlamokuitlawijkeh de kan tiopa okiixtatsiniayah.

Pedro okijto mach kixmati n Jesús

(Mt. 26:69-75; Lc. 22:56-62; Jn. 18:15-18, 25-29)

⁶⁶Pedro omoketoka tlatsintla kan patio, iwa owala iteska n tiópixki non okachi otlayakantoka. ⁶⁷Ye okitak n Pedro inakastla n tlékuili, okisentlajtlatak iwa okili:

—Te noiwa otinemia iwan Jesús de Nazaret.

⁶⁸Pedro mach okimokuiti iwa okijto:

—Amo nikixmati, iwa amo nikmati tlan tikijtoa.

Ijkuakó okiski kaltempa, iwa se kaxtil owaltlakuikak. ⁶⁹Satepa, iteska n tiópixki oksepa okitak n Pedro iwa opé kinmilia n oksikimeh:

—Nin tlakatl seme de yejwah.

⁷⁰Pero n Pedro oksepa mach okimokuiti. Iwa okachi satepa, non ompa okatkah oksepa okilijkeh n Pedro:

—De milajka te seme de yejwah, porke noiwa ti galileo, iwa titlajtoa kemi yejwah tlajtoa.

⁷¹Ijkuakó n Pedro opé tlawijwikaltia, omotlajtolchijchika iwa okijto:

—¡Ne mach nikixmati non tlakatl akin nomejwah nonkitenewah!

⁷²Ijkuakó n kaxtil oksepa owaltlakuikak, iwa n Pedro okilnamik tlan Jesús okilijka: “Ijkuak n kaxtil tlakuikas ome welta; te eyi welta yotikijto amo nikixmati.” Nima n Pedro opé senchoka.

15

Jesús inawak Pilato

(Mt. 27:1-2, 11-14; Lc. 23:1-5; Jn. 18:28-38)

¹Semi san kwalka, n tiopixkeh non tlayakantokeh, iwa n tetajmeh non tlayakantokeh kan Weyi Tiopa iwa non kitemachtiah n tlanawatflistli iwa nochteh non okimajmanayah n

* 14:55 Sanedrín: nin grupo kemi 50 kimajmanah n tetajmeh non tlaixkommakah ijkuak kinteiliah akimeh amo kitlakitah itlanawatil Moisés.

Sanedrín^{*}, omoololokeh iwa omotlapowijkeh tlan kitoktiskiah n Jesús. Satepa okimailpijkeh iwa okimaktilitoh n Pilato. ²Pilato okitlajtlani:

—¿Te tirey de judíojeteh?

Jesús okinankili:

—Ijkó kemi tejwatsi yotikijto.

³ Pero n tiopixkeh non tlayakantokeh san de miak okiteiliayah. ⁴ Pilato oksepa okitlajtlani Jesús:

—¿Amitla tikijtos de nochi tlan yejwah mitsteiliah?

⁵ Pero Jesús amo otlanankili iwa n Pilato san omotlajtlachialti.

Kitemaktiah Jesús makimiktikah

(Mt. 27:15-26; Lc. 23:13-25; Jn. 18:38—19:16)

⁶ Nochi xiwitl itech ilwitl de Paskua, Pilato trato okikajkawaya seme de non tsaktokkeh, san akin okitlajtlaniayah. ⁷ Iwa ompa otsaktoka Barrabás iwa sikimeh itlakaikniwah, ninteh okintsakeh ken otemiktijkeh keman omototojtokakeh iwan gobierno. ⁸ Ijkuakó, miakeh oyajkeh kan Pilato iwa okilijkeh makichiwa kemi nochi xiwitl kichijtiwits. ⁹ Iwa Pilato okinmili:

—¿Nonkinekih manikkajkawa n Rey de judíojeteh?

¹⁰ Pilato okiyekmatia n tiopixkeh non tlayakantokeh okimaktijkeh n Jesús porke oxikojmikiah. ¹¹ Pero n tiopixkeh non tlayakantokeh okintlaltalwijkeh n tlakah para makitlajtlanilikah n Pilato makikajkawa Barrabás. ¹² Ijkuakó Pilato oksepa okintlajtlani:

—¿Tlan nonkinekih manikchiwa iwa nin tlakatl akin nomejwah nonkinotsah Rey de n judíojeteh?

¹³ Yejwah oksepa otlanankilijkeh iwa okojsajtsikeh:

—¡Xikkрусifikaro!

¹⁴ Pilato okinmili:

—¿Tleka? ¿Tlan amokuali okichi?

Pero yejwah okojsajtsikeh okachi chikawak:

—¡Xikkрусifikaro!

¹⁵ Pero ken Pilato okinekia mokawas kuali inwa n tlakah, okikajka n Barrabás, otlanki otlanawati makitsonwitekikah n Jesús, iwa okinmaktili para makikрусifikarokah.

N soldadojeteh kipijpinawiah n Jesús

(Mt. 27:27-31; Jn. 19:1-5)

¹⁶ Ijkuakó n soldadojeteh okiwikakeh n Jesús kan ipatio n palasio iwa ompa okinmoololokeh nochteh n soldadojeteh. ¹⁷ Okonakiltijkeh itlake morado, iwa okitlalilijkeh se korona non okichijchiwilijkeh ika witstli. ¹⁸ Otlanki opé kajawiltlajpaloah:

—¡Timitsweyiliah Rey de judíojeteh!

¹⁹ Iwa okikuawijwitekiah ika se akatl, okiixchijchawiyah iwa omotlankuaketsayah inawak iwa okiweyiliayah. ²⁰ Ijkuak yotlanki okipijpinawijkeh, okikixtilijkeh n kapa morado iwa okonakiltijkeh itlake. Otlanki okiwikakeh okikрусifikarotoh.

Kikрусifikaroah n Jesús

(Mt. 27:32-44; Lc. 23:26-43; Jn. 19:17-27)

²¹ Simón de Cirene inta n Alejandro iwa n Rufo, owalmokopaya de itlala, iwa ijkuak opajpanotiaya ik ompa n soldadojeteh okitoktijkeh makiwikili ikrus n Jesús.

²² Okiwikakeh n Jesús kan tepeyotl non okiliayah Gólgota non kijtosneki Miketson-tekamatl. ²³ Ompa okimakakeh vino nelitok ika mirra pero amo okonik. ²⁴ Ijkuak yokikрусifikarokah n Jesús, n soldadojeteh okinmotlatlanilijkeh itlakenwah para kitaskeh tlan kimowikiliskiah.

²⁵ Okikрусifikarokkeh kualka, kemi las nueve. ²⁶ Iwa ik ikuatsontla okipepechilijkeh se tlajkuñoli kan onestoka tleka okikрусifikarokkeh, iwa okijtoaya: “N Rey de Judíos.”

* 15:1 Sanedrín: nin grupo kemi de 50 kimajmanah n tetajmeh non tlaixkomakah ijkuak kinteiliah akimeh amo kitlakitah itlanawatil Moisés.

N ome ichtekeh

(Mt. 27:38-44; Lc. 23:39-43)

²⁷Noiwa okinkrusifikarokkeh ome ichtekeh inajnakastla n Jesús, se kan iyekma iwa ok se kan iopochma. ²⁸†

²⁹Iwa akimeh ik ompa opanoyah omokuawiwixoyah, okiwijwikaltiyah iwa okiliyah: —¿Amo Te otikijto tikxixititsas n Weyi Tiopa iwa ipan eyi tonati oksepa tikchijchik-waskia?, ³⁰axa monewia ximopalewi iwa xiwaltemo de non krus.

³¹Ijkó noiwa n tiopixkeh non tlayakantokeh iwa non kitemachtiah n tlanawatlistli, okipijpinawiyah iwa okimoliyah:

—Oksikimeh okimpalewi, pero ye inewia, mach weleti mopalewia. ³²Tla milák Ye n Cristo, n Rey de Israel, mawaltemo de kan krus para matikitakah ijkuakó tikneltokaskeh. Iwa non okrusifikaritokah inajnakastla noiwa fiero okitenewaya.

Mikki n Jesús

(Mt. 27:45-56; Lc. 23:44-49; Jn. 19:28-30)

³³Ijkuak oajsiko tlajko tonati, itech nochi non tlali otleyuak asta las tres. ³⁴Iwa itech non ora Jesús owaltsajtsik chikawak iwa okijto:

—Eloi, Eloi, ¿lama sabaktani? —noni kijtosneki: Nodios, Nodios, ¿tleka otechkakajteh noselti?

³⁵Sikimeh ijkuak okikakeh, okijtojkeh:

—¡Xikkakikah!, kinotok n profeta Elías.

³⁶Ijkuakó se omotlelo okisiawato se esponja itech vinagre. Okiyakailpi itech se akat! iwa okonmák n Jesús makoni, iwa okinmili n oksikimeh:

—Matikitakah kox n profeta Elías wits kitemowiki.

³⁷Ijkuakó n Jesús owaltsajtsik chikawak, iwa omikki. ³⁸San nima n kortina de n Weyi Tiopa owaltlajkotsáyanki. ³⁹Iwa n soldado tlayákanki romano non omoketoka iyakapan Jesús, ijkuak okitak kenijki otsajtsik iwa owalmik, okijto:

—¡Milák, nin tlakatl ye Ikone Dios!

⁴⁰Noiwa sikimeh siwameh san wejka oontlachixtokah. Ompa okatkah María de Magdala, María inmamá n iknimeh José iwa n Jacobo non tsoyotl, iwa n Salomé. ⁴¹Ninteh siwameh oyayah iwan Jesús iwa okimpalewiyah ijkuak okatka Galilea. Noiwa ompa okatkah oksikimeh siwameh non otlejkokeh Jerusalén iwan Jesús.

Kitookah n Jesús

(Mt. 27:57-61; Lc. 23:50-56; Jn. 19:38-42)

⁴²Ijkuak otioatlatik, nochteh yomotlatlalijtokah para n sábadó. ⁴³Ijkuakó owala n José de n alpetetl Arimatea, akin tewa okatka de n Sanedrín. Ye noiwa okichiaya ijkuak pewas tlanawatis Dios, omoyolchika iwa okitlatlaujtito n Pilato makimaktili ikuerpo n Jesús. ⁴⁴Pilato omotlajtlachialti ijkuak okima Jesús yomikki, ijkuakó okónnotski n soldado tlayákanki romano iwa okiyektlajtlani kox milák yomikki n Jesús. ⁴⁵Ijkuak n soldado tlayákanki okili yomikki, n Pilato okimaktili n José ikuerpo n Jesús. ⁴⁶Ijkuakó José okitemowi n kuerpo de kan krus iwa okikekemelo ika se tlakemilt de lino, non ye okiko. Otlanki okitlalito ikuerpo n Jesús kan se miketékochtli non okichkuakeh ipan tetl, iwa ika se weyi tetl tankachtik iwa patlaktik okitentsakeh n miketékochtli. ⁴⁷María de Magdala iwa María imamá n José okitakeh kan okiwankeh n Jesús.

16

Jesús moyolitia

(Mt. 28:1-10; Lc. 24:1-12; Jn. 20:1-10)

¹Ijkuak yopanok n sábadó, María de Magdala, María imamá n Jacobo, iwa n Salomé. Okikojkeh ajwíalstli para kixawiliskiah ikuerpo n Jesús. ²Iwa san kwalka, ijkuak yotlatlanestiwalya n domingo, oyajkeh kan miketékochtli. ³Iwa okimolijtiyah:

—¿Akin techachiwilis n tetl non kitantsaktok n miketékochtli?

† 15:28 N bersíkulo 28 amo nesi itech non okachi yowekajkeh tlajkuulfoleh.

⁴ Pero ijkuak oajsitoh, okitakeh n weyi tetl non okitentsaktoka n miketékochtli, mach ok ompa okatka. ⁵ Ijkuak n siwameh okalakeh kan miketékochtli, okitakeh ik inyekma se télpochtli ewatok ika itlake weyak iwa istak, iwa omomojtjkeh. ⁶ Pero ye okinmili:

—Amo ximomojtikah, nomejwah nonkitemoah n Jesús de Nazaret akin okikrusifikarok-
jkeh. Pero Ye yomoyoliti. Ayakmó nika ka. Xikitakah kan owilantoka. ⁷ Xiwiah xikin-
matiltitih itlamachtijkawah iwa n Pedro: “Jesús tlayakanas Galilea, ompa nonkitaskeh ijko
kemi Ye yonomechili.”

⁸ Ijkuakó n siwameh okistewakeh de kan miketékochtli, porke omomojtjkeh iwa sa
obibiokatokah, iwa amaka itla okilijkeh porke omawiah.

Jesús kimonextilia n María de Magdala

(Jn. 20:11-18)

⁹ Jesús omoyoliti non domingo kualka, iwa achto okimonextili n María de Magdala,
ye akin Jesús okinkixtili chikome espíritus amokualteh. ¹⁰ Ye oyá okinmatiltito akimeh
onemiah iwan Jesús, iwa okimajsito moyolkokojtokeh iwa chokatokah. ¹¹ Pero ijkuak
okinmili yokitak n Jesús yolitok, yejwah mach okineltokakeh.

Jesús kinmonextilia ome de n májtlakteh iwa ome itlamachtijkawah

(Lc. 24:13-35)

¹² Jesús omoixpatlak iwa satepa okinmonextili ome itlamachtijkawah non oyayah
intlala.

¹³ Ninteh noiwa okinmatiltitoh n oksikimeh itlamachtijkawah non tewa onemiah iwan
Jesús, pero mach okineltokakeh tlan yejwah okimilijkeh.

Jesús kintitlani itlamachtijkawah makitetlapowika n kualitlájtol

(Mt. 28:16-20; Lc. 24:36-49; Jn. 20:19-23)

¹⁴ Satepa Jesús okinmonextili n májtlakteh iwa n se itlamachtijkawah ijkuak otlakuaj-
tokah. Ye okinmajwak por amo okineltokakeh iwa por okitlakuawaltijkeh inyolo ijkuak
oksikimeh okimilijkeh Ye yomoyoliti.

¹⁵ Iwa okinmili:

—Xiwiah ipan nochi n tlaltíkpaktli iwa xikinmatiltikah itlajtlo Dios nochteh n tlaltik-
paktlakah. ¹⁶ Akin kineltokas notlajtlo iwa mokuatekis momaxitis, pero akin amo
nechneltokas Dios amo kitlapojpolwis. ¹⁷ Iwa akimeh nechneltokaskeh kinchiwaskeh we-
jweyi milagros: Itech Notoka kinkixtiskeh espíritus amokualteh, tlajtoskeh ika yankuikah
tlájtoltah, ¹⁸ iwa tla kinkitskiskeh koameh noso tla koniskeh itla beneno, amitla kintoktis.
Kintlaliskeh inmah ipan kokoxkeh iwa kimpajtiskeh.

Jesús tlejko ilwikak

(Lc. 24:50-53)

¹⁹ Satepa, ijkuak Toteko Jesús yotlanki okintlapowi itlamachtijkawah, otlejkok ilwikak
iwa omoyayanti iyekma n Totajtsi Dios. ²⁰ Satepa, itlamachtijkawah n Jesús sentetl
oyajkeh otetlapowitoh de n kualitlájtol. Iwa n Toteko okimpalewiaya ika neskayolteh
tlan tetlajtlachialti okinchiwayah.

N Kualitlájtoli non Okijkuilo San Lucas

Lucas kontlajkuililia n weyixtok Teófilo

¹ Miakeh omochijchikajkeh okijkuilojkeh nochi tlan otlamochi tonawak. ² Ijkó kemi otechtlapowijkeh akimeh okitakeh ika inmixelolowah tlan otlamochijtiwalaya desde ijkuak opé motetlapowiah n kualitlájtoli. ³ Ne noiwa yonikmomachti iwa onitlajtlantínenki kenijki opé, iwa onikmoli kuali manimitsontlajkuilili kemi moneki tejwatsi tionweyixtok Teófilo. ⁴ Ijkó, okachi xikyekmati tlan milák tlan achto yomitsmachtijkah.

N ángel Gabriel kitematiltia tlakatis n Juan Bautista

⁵ Ijkuak Herodes* otlanawatijtoka Judea, ochantitoka se tiópixki non itoka Zacarías, ye tewa iwan tiopixkeh de Abías. Isiwa n Zacarías itoka Elisabet. Ye ojojpaixwi n tiópixki Aarón.† ⁶ Zacarías iwa isiwa Elisabet oyolmilajkanemiah inawak n Totajtsi Dios, iwa okichiwayah nochi tlan okijtoaya itlanawatil n Toteko. ⁷ Pero mach okimpiayah impilwah, porke Elisabet mach oweletia okimpiaya, iwa san ken omeh yokatkah tetajtsisinteh.

⁸ Se tonati, Zacarías iwa intiopixkaikniwah kichiwaskiah n tekitl ijtik Weyi Tiopa, iwa ken yomotekpankah, okipejpenke n Zacarías para makichiwa n tekitl ijtik Tiopa inawak Dios, kemi Abías okichijtiwalaya. ⁹ Yejwah omotlatlaniah para kichichinoskeh n kópali. Zacarías otlátlanki iwa otlapopochwi kan iartal Toteko. ¹⁰ Ijkuak Zacarías otlapopochwijtoka ijtik Weyi Tiopa, nochteh n tlakah omotiotsajtsilijtokah kala. ¹¹ Ijkuakó se iángel Toteko okimonextili n Zacarías, nin ángel omoketoka iyekma n artal kan kichichinoah n kópali. ¹² Ijkuak Zacarías okitak n ángel, omotlajtlachialti iwa ayakmó okima tlan kichiwas iwa satlawel omaujki. ¹³ Pero n ángel okili:

—Zacarías, amo ximawi, porke Dios yokikak motiotsajtsilis, iwa mosiwa Elisabet kiplias se konetl, iwa te tiktlalilis itoka Juan. ¹⁴ Te satlawel tiyolpakis, iwa miakeh tlakah noiwa yolpakiskeh ijkuak tlakatis non konetl, ¹⁵ porke mokone satlawel weyijkatitos inawak Dios. Ayik konis vino nion tlan tewinti, iwa tentos de Espíritu Santo desde ijkuak yetos ijtik inanyo Elisabet. ¹⁶ Iwa kichiwas mamoyolkopakah miakeh tlakah de Israel inawak Inteko Dios. ¹⁷ Ye achto moteixpantiti inawak Toteko ika iespíritu iwa iweletilis n tiotlajto Elías. Kichiwas mamoyekwikakah n tetajmeh iwa impilwah. Iwa kinmititis non amo tetlakitah, matetlakitakah, ijko kinyolkopas n tlakah para makiselikah n Toteko.

¹⁸ Zacarías okitlajtlani n ángel:

—¿Kenomi nikmatís tlan otikijto milák?, ne ya nitetajtsi iwa nosiwa ya tenantsi.

¹⁹ N ángel okinankili:

—Ne Gabriel, iwa niktekitilia Totajtsi Dios. Ye onechaltlanki manimitsiliki ninteh kualitlájtoltel. ²⁰ Pero axa, kemi amo otikneltokak tlan onimitsili, mach weletis titlajtos asta matlakati mokone, iwa nochi ni ijko mochiwas ijkuak ajsiki n tonati.

²¹ Iwa kemi Zacarías yowejkajtoka ijtik Weyi Tiopa, n tlakah non kala okichixtokah opé motekipachoah tleka amo owalkisaya. ²² Ijkuak Zacarías owálkiski, amo owéletki okintlapowi, ijkuakó okajsikamatkeh itla okimonextili ijtik tiopa. Ye sa okinmanotsaya porke ayakmó oweletia otlajtoaya.

²³ Ijkuak Zacarías otlanki okichi iteki ijtik Tiopa, oyá icha. ²⁴ Satepa Elisabet omoka kócoxki de konetl, iwa mákuili mestli mach okiski de icha, iwa okimoliaya: ²⁵ “Axa n Noteko onechchiwili tlan kuali ika itlasojtlalis, para ayakmó manehpijpinawikah por amo oniweletia onikpiaya nokone.”

N ángel Gabriel kitematiltia tlakatis n Jesús

²⁶ Ijkuak Elisabet yokipiaya chikwase mestli kócoxki de konetl, n Totajtsi Dios okitlanki iángel Gabriel mawia Galílea itech se altepetl non itoka Nazaret, ²⁷ para makitlajpaloti se

* 1:5 N okachi wejweyijtekeh tlanawatijkeh itech nin tlali kintokayotiah ‘Herodes’, non kijtosneki ‘se weyi tlanawati’.

† 1:5 Abías se weyi tiópixki.

íchpochtli non itoka María. Ye yokisentlalijka monamiktis iwan se tlakatl non itoka José, nin José ojojpaixwi n Rey David. ²⁸ N ángel okalak kan okatka María iwa okili:

—¡Xipaki! Dios satlawel omitstiochi. N Toteko kajki mowa.

²⁹ Pero ijkuak María okitak n ángel, saikpanoa omotlajtlachialti iwa mach okimatia tlan kijtos, iwa okimoliaya tleka ijko okitlajpaloaya. ³⁰ Ijkuako n ángel okili:

—María, amo ximawi, porke Dios yolpaki monawak. ³¹ ¡Xikkakil, axa timokawas tikókoxti de konetl, iwa non konetl tiktlalilis itoka Jesús. ³² Ye saikpanoa weyijkatitos, iwa kinotsaskeh Tekone de non Weyijkatitok. Dios Toteko kitlalis mayeto Rey ijko kemi otlanawati David iwejkatata. ³³ Ye nochipa kinawatijtos n país de Israel, iwa itlanawatil mach ayik pojpoliwis.

³⁴ Ijkuako María okitlajtlani n ángel:

—¿Kenomi manikpia nokone, ne ayamó nikpia nookich?

³⁵ N ángel okinankili:

—N Espíritu Santo walmuikas motech, iwa iweletilis n Totajtsi Dios mitsmokemis kemi se mexтли. Yika, n konetl non te tikpías yetos yolchipawak iwa kinotsaskeh Tekone de Dios.

³⁶ Mopríma Elisabet, maya ya tenantsi, noiwa kípías se konetl. Ijko kiné, non okiliayah ayik weletis kípías ikone axa ya kókoxti de konetl iwa ya kípía chikwase mestli. ³⁷ Porke Totajtsi Dios nochi weleti kichiwa.

³⁸ Ijkuako María okili:

Ne iteska n Totajtsi Dios. Mamochiwa nowa ijko kemi yokijto.

Ijkuako n ángel owálkiski.

María kontlajpaloa ipríma Elisabet

³⁹ Itech nonteh tonatijmeh, María oyá totokatijjak okitlajpaloto ipríma Elisabet. Ye ochantitoka itech se altepetl non kajki itech tepeyo de Judea. ⁴⁰ Ijkuak oajsito itech non altepetl, María okalak icha n Zacarías, iwa okitlajpalo n Elisabet. ⁴¹ Ijkuak Elisabet okikak itlajtol n María, ikone n Elisabet otsékuinki ijtik inanyo, iwa Elisabet otenki ika n Espiritu Santo. ⁴² Ijkuako Elisabet ika pakílistli okualnankili chikawak:

—¡Dios omitstiochi okachi ke nochteh n siwameh, iwa n konetl non tikpías, Dios yokitiochi! ⁴³ ¿Akin ne, para manehontlajpaloki imamá n Noteko? ⁴⁴ Porke san nima ijkuak onikak otechtlajpalo, nokone otsékuinki ijtik nonanyo ika pakílistli. ⁴⁵ ¡Tlawel xiyolpaki, ken otikneltokak nochi tlan Toteko yokijto!

⁴⁶ Ijkuako María okili:

Ika nochi noyolojtsi nikweyilia Noteko,

⁴⁷ iwa miak niyolpaki inawak Dios, Notemakixti.

⁴⁸ Porke onechítak kemi iteska, iwa ken niyolyámanki, Dios onechiknoma, iwa desde axa nochteh n tlaltikpaktlakah nechiliseh niyolpakiliso.

⁴⁹ Porke Dios weletini okinchi notech wejweyi milagros.

¡Ye yolchipawak!

⁵⁰ N Totajtsi Dios nochipa kinmiknomatis akimeh kitlakitah.

⁵¹ Ye okinexti iweletilis ika tlan okichi, kimpjpinawia akimeh kimatih moweyiliah.

⁵² N wejweyi tekiwajkeh okinkixtili intlanawatil, iwa okinweyijkatlali akimeh san moiknomatih.

⁵³ Iwa non amitla okipiayah okinmák nochi tlan kuali, iwa akimeh okipiayah tomi amitla okinmák.

⁵⁴ Ye okipalewi itlakewal Israel, mach okilka kiknomatis,

⁵⁵ ijko kemi yowejka okimilijkeh totatawah,

Abraham iwa nochteh iojpa ixwiwah nochipa kintlasojtlaskia.

⁵⁶ María omoka iwan Elisabet kemi eyi mestli, iwa satepa omókopki icha.

Tlakati n Juan Bautista

⁵⁷ Satepa oajsiko n tonati, ijkuak Elisabet okípixki ikone. ⁵⁸ Iwa ijkuak non ik ompa ochanchiwaya iwa non ken kita n Elisabet okimatkeh Toteko Dios satlawel okiknoma, okitlajpalotoh iwa opakeh íwa. ⁵⁹ Ijkuak owalchikometik okisirkursidarotoh n konetl, iwa okinekia kitlaliliskeh itoka Zacarías, kemi ita. ⁶⁰ Pero imamá okijto:

—¡Amó, tiktaliliskeh itoka Juan!

⁶¹ Non ompa okatkah okilijkeh:

—¿Tleka ijko tikneki tiknotsas? nochteh non ken tikinmita, amaka ijko itoka.

⁶² Ijkuakó, okimanotskeh n Zacarías iwa okitlajtlanjikeh kenijki okinekia kitlaliliskeh itoka n konetl. ⁶³ Pero Zacarías okimatlájtlanki makimakakah itla tlan ipa tlajkuilos, iwa ijki okijkuilo: “Juan yetos itoka.” Iwa san okintlajtlachialti. ⁶⁴ Non ora Zacarías owaltlajto, iwa opé kiweyijkachiwa Dios. ⁶⁵ Iwa nochteh non ik ompa ochantitokah omaujkeh, iwa non ochantitokah itech tepeyo de Judea, omotlapowiyah de nochi tlan otlamochi. ⁶⁶ Iwa nochteh non okikakiah, okimoliayah:

—¿Tlan kichiwas non chokotsi keman motlamiti tlakatl?

Porke okajsikamatiah n Toteko okatka íwa.

Itlakuikal Zacarías

⁶⁷ Zacarías, ipapá n chokotsi otenki de Espíritu Santo iwa ijki okijto:

⁶⁸ Maweyijkachito n Toteko Dios de Israel, porke okinmakixtiko ialtepeikniwah.

⁶⁹ Ye otechaltitlanili se chikaktik temakixti, se non iwejkaixwi n Rey David itékkiti n Totajtsi Dios.

⁷⁰ Ijko kemi Dios yokijtojka ya wejkwitl ijkuak iprofetajwah yolchipawakeh otechmatiltijkeh:

⁷¹ Ye techpalewiskia inmak akimeh techkokolia iwa inmak akimeh techtlawelitalh.

⁷² Noiwa okijto kinmiknomatiskia totatawah iwa ayik kilkawaskia tlan okisentlali kichiwaskia.

⁷³ Ye ni tlan Totajtsi Dios okisentlali iwa totata Abraham:

⁷⁴ Ye okisentlali techpalewiskia de inmak akimeh techkokoliah, para amo matimawikah ijkuak tiktektiliskeh,

⁷⁵ matiyetokah tiyolchipawakeh iwa timilajkameh inawak Dios, asta ijkuak timikiskeh.

⁷⁶ Iwa te, nokone, mitsnotsaskeh profeta de n Totajtsi Dios non weyijkatitok.

Porke te tias iyakapa n Totemakixti para matlaneltokakah inawak,

⁷⁷ iwa tikinmatiltis itlakaikniwah, kintlapojpolwis de intlajtlakolwah, iwa ijko weletis momakixtiskeh.

⁷⁸ Porke n Totajtsi Dios kintlapojpolwia ken milák kintlasojtla.

Iwa kemi kinmiknomati kinwaltitlanilis n Temakixti non wits de ilwikak,

⁷⁹ para kintlawilis akimeh nemih kan tleyua iwa akimeh kateh kan itlasekawilo n mikílistli, Is. 9:2

⁸⁰ N chokotsi Juan omoskaltiaya iwa iespíritu omochikajtiaya. Omochantito kan amaka chanti iwa opé kintlapowia itlajtol Dios asta ijkuak omoteititi innawak n tlakah de Israel.

2

Jesús tlakati (Mt. 1:18-25)

¹ Itech nekateh tonatijmeh, n weyi tlanawati romano Augusto César, otlanawati mamomachotikah itech nochteh n altepemeh kan otlanawatiaya n Romanos, ² ye ni n sikinika senso, omochi ijkuak Cirenio gobernador kan tlali de Siria. ³ Nochteh oyayah inmaltepeu para ompa momachotiskeh itech senso. ⁴ Yika, José okiski de Nazaret, tlali de Galilea, iwa oyá kan tlali de Judea, altepetl de Belén, ompa otlákatki n rey David, porke José oyá iojpaixwi n rey David. ⁵ José iwa María sansikah oyajkeh Belén, para momachotiskeh itech senso. María yokatka kokoxki de konetl iwa ya monamiktiskia iwan José. ⁶ Ijkuak

yejwah okatkah Belén, oajsiko n tonati para tlakatis n konetl. ⁷Iwa ompa otlákatki non sikinika ikonetsi. Iwa n María okikemelo ika tlakemeh iwa okitekak itech se kajo non okipiaya sakatl non ompa otlakuayah n yolkameh. Ompa otlákatki n konetl porke ayakmó lojar itech kali kan tekalotiah.

N ángelteh iwan tlajpíxkeh

⁸Amo wejka de Belén okatkah sikimeh tlajpíxkeh non okinmokuilawijtokah in-michkawah itech tlajtlala. ⁹Ijkuakó okinmonextili se iángel Toteko, iwa itlawilnextilis okintlawili, iwa n tlajpíxkeh satlawel omomojtjkeh. ¹⁰Pero n ángel okinmili:

—Amo ximomojtikah, porke ne onomechmatiltiko se kualitlájtohi, non kinyolpaktis nochteh n tlaltikpaktlakah. ¹¹Axa itech ialtépeu n David yotlákati se Temakixti, Ye Cristo Toteko. ¹²Nonkajsitiweh n konetl kemelitika ika tsósolteh, iwa wetotika kan kintlamakah n yolkameh.

¹³Itech non ora inakastla non ángel, owalmonextijkeh miaktikeh ángelteh de ilwikak non okitlakuikiliyah Dios iwa ijki okijtoayah:

¹⁴¡Maweyijkatito Dios kan ilwikak,

iwa itech tlaltikpaktili mayetokah ika yolsewílistli nochteh akimeh kiyolpaktiah n Totajtsi Dios!

¹⁵San nima, ijkuak n ángeles omokopkeh ilwikak, n tlajpíxkeh opé motlalwiah:

—Matiwiah Belén, matikitatih tlan otlamochi, tlan Toteko otechmatiltiko.

¹⁶Yejwah omotlelojtíwetskeh iwa okajsitoh n María iwa n José, iwa n konetl wetotika kan kintlamakah n yolkameh. ¹⁷Ijkuak okitakeh n konetl, opé tetlapowiah tlan yokinmatiltijka n ángel, ¹⁸iwa nochteh omotlajtlachialtijkeh ijkuak okikakiah tlan okijtoayah n tlajpíxkeh.

¹⁹Pero María nochi ni okitlaati itech iyolo, iwa nochipa okilnamikia nochi tlan otlamochi.

²⁰Satepa n tlajpíxkeh omokopkeh kan okatkah in-michkawah, okiweyijkachiwayah iwa okitlakuikilijtiayah n Totajtsi Dios por nochi tlan okikakeh iwa okitakeh, ijko kemi okinmili n ángel.

N konetl Jesús kiteixpantiah kan Weyi Tiopa

²¹Ijkuak ochikometik de otlákatki n konetl, okisirkunsidaroykeh, iwa okitlalilijkeh itoka JESÚS, ijko kemi n ángel achto yokilijka n María ijkuak ayamó kókoxxi de konetl.

²²Ijkuak opanokeh n tonatijmeh de omochipajkeh, ijko kemi kijtoa itlanawatil Moisés, yejwah okiwikakeh n konetl kan Weyi Tiopa de Jerusalén para kiteixpantiskah inawak Toteko Dios.

Lv. 12:8 ²³Ijko okichijkeh porke itech itlajkuilol n Toteko Dios kijtoa: “Nochi konetl tlakatl teteachka, yetos tlapejpénili xpan Toteko Dios.”

²⁴Noiwa okintemakakeh ome espiritomeh noso ome kokolotsitsinteh para makinmiktikah ipan artal, ijko kemi kijtoa itlanawatil Toteko. *Lv. 12:8*

²⁵Itech nekateh tonatijmeh, ochantitoka Jerusalén se tlakatl non itoka Simeón. Ye yomilajka iwa miak okimopantiaya Dios iwa okichiaya matlakati non kimpalewis n tlakah de Israel. Iwa n Espíritu Santo okatka itech Simeón, ²⁶iwa yokimatiltijka amo mikiskia tla amo achto kitaskia n Cristo, Akin Toteko Dios kualtitlanis. ²⁷N Espiritu okili n Simeón mawia kan Weyi Tiopa. Ijkuakó José iwa n María okiwikakeh n konetl Jesús kan Weyi Tiopa para kichiwaskeh kemi kijtoa itlanawatil Moisés. ²⁸Simeón okinapalo n konetl iwa okiweyijkachi Totajtsi Dios, iwa okijto:

²⁹Noteko, axa ya weletis techkawilis manimiki ika yolsewílistli, porke yotikchi tlan otechilijka, ne onia se motékitki.

³⁰Ken yonikitak ika noixtololowah motemakixtilis,

³¹Akin yotiktlati inmixpah nochteh n tlaltikpaktlakah.

³²Ye se tláwili non kintlawilis non amo judfojteh,

iwa kichiwas maweyijkatito mopueblo Israel.

³³José iwa n María san omotlajtlachialtijkeh ijkuak okikakeh nochi tlan Simeón okijtoaya de n konetl. ³⁴Otlanki n Simeón okintiochi iwa okili n María imamá n Jesús:

—¡Xikkaki! Dios okitlati mokone para miakeh de Israel non amo kineltokaskeh moixpoloskeh pero akimeh kineltokaskeh, momakixtiskah. Ijkuak moteititis kemi Cristo

miakeh mach kiseliskeh, ³⁵iwa ijkó momatis tlanón kiyejyekoliah n tlakah itech inyolo. Iwa te María noni mitstlajiyowiltis, kemi mitstsoptoniliskia se tepostlatekini itech moyolo.

³⁶Noiwa ompa okatka se siwatl profeta non ya tena iwa itoka Ana, ye teichpoch de Fanuel, iwa Fanuel iwejkaixwi n Aser. Ana omonamikti wel ok ichpotsintli, pero ijkuak yokiwikayah chikome xiwitl sansikah, iokich omikki. ³⁷Yika omoka iknosiwatl, iwa yokipiaya nawi póali iwa n nawi xiwitl. Ixmostla oyaya tiopa, tlajka iwa n yuak okitekichiwiiliaya n Toteko, ika itiotsajtsilis iwa ika imosawalis. ³⁸Ana noiwa okalakito itech non ora iwa opé kiweyijkachiwa Dios. Iwa opé tetlapowia de n konetl Jesús, nochteh n tlakah de Jerusalén okichixtokah mawiki n Cristo para kinmakixtis.

N chokotsi Jesús iwa itajwah walmokopah Nazaret

³⁹Satepa, ijkuak yokichijkeh nochi tlan kijtoa itlanawatil n Toteko, owalmokopkeh inmaltepeu de Nazaret, itech tlalmeh de Galilea. ⁴⁰Iwa n chokotsi Jesús omoskaltiaya, omochikawayá iwa okachi oixtlamatia, iwa Totajtsi Dios okachi okitiochiwaya.

N chokotsi Jesús mokawa itech Weyi Tiopa de Jerusalén

⁴¹Itajwah n Jesús nochi xiwitl oyayah Jerusalén itech ilwitl de Paskua. ⁴²Ijkuak Jesús okípixki májtlaktli iwa ome xiwitl, Ye iwa itajwah oyajkeh Jerusalén, kemi nochi xiwitl okichiwayah. ⁴³Ijkuak yotlanki n ilwitl, yejwah owalmokopayah para incha, pero n chokotsi Jesús omoka Jerusalén, iwa nion María nion José okitakeh kox n chokotsi omoka. ⁴⁴Itajwah okiyejyekoliah chamo Jesús okwalintokaya iwan oksikimeh non ompa owayah, yejwah onejnenkeh se tonati. Satepa opé kitemoah inchokotsi inwah non ken okinmitayah iwa non okinmixmatayah, ⁴⁵amo kanaj okajsikah, yika omokopkeh okitemotoh Jerusalén.

⁴⁶Iwa eyi tonati satepa, okajsitoh itech Weyi Tiopa de Jerusalén. Ye oewatoka tlatlajkotia de kan oewatokah non kitemachtiah n tlanawatflistli, okinkaktoka iwa okintlajtlaniaya.

⁴⁷Nochteh non okikakiah, omotlajtlachialtiyah porke Ye satlawel oixtlamatia, iwa porke kual okinnankiliaya.

⁴⁸Ijkuak itajwah okitakeh omotlajtlachialtijkeh, iwa imamá okili:

—Nokone, ¿tleka ijkó otechtokti? Mota iwa ne, satlawel otimomojtijkeh, ken amo kanaj otimitsajtsiah.

⁴⁹Ijkuakó Jesús okinmili:

—¿Tleka ononnechtemoayah? ¿Mach amo nonkimatih nikpia niktekichiwilis Notajtsi?

⁵⁰Pero yejwah mach okajsikamatkeh tlan okinmili.

⁵¹Ijkuakó Jesús omókopki Nazaret inwah, ompa okintlakitaya itajwah. Pero María nochi noni okitlaatiaya itech iyolo. ⁵²N chokotsi Jesús okachi omoskaltijtiaya, iwa okachi oixtlamatia. Okipaktiaya n Totajtsi Dios iwa n tlakah okiseliah.

3

Juan Bautista tlamachtia kan amaka chanti

(Mt. 3:1-12; Mr. 1:1-8; Jn. 1:19-28)

¹Ijkuak César Tiberio yokiwikaya káxtoli xiwitl kemi weyi tekiwa itech Roma, Poncio Pilato okatka gobernador de Judea, Herodes Antipas gobernador de Galilea, iwa ikni Felipe gobernador de Iturea iwa Traconite, iwa Lisnias okatka gobernador de Abilene. ²Anás iwa n Caifás okatkah weyi tiopixkeh, yejwah otlayakantokah. Itech nonteh tonatijmeh, Dios okitlapowi n Juan ipiltsi n Zacarías, yika Juan otetlapowiaya kan amaka chanti. ³Juan onentinemia itech nochteh altepemeh non okatkah itempa n río Jordán. Ye okinmiliaya makipatlakah innemilis iwa mamokuatekikah para Dios makintlapojpolwi de intlajtlakolwah. ⁴Ijkó omochi kemi ijkuilitok itech itlajkuilol n profeta Isaías:

Se tlájtoli mokaki chikawak kan amaka chanti:

“Xikyektlalilikah iojwiu n Toteko, Xikmilawakah iojwiu.

⁵Kan tlawewejkatla, xikixmanakah, nochi tepemeh iwa n tepetsinteh noiwa nonkinmixmanaskeh,

n ojmech nenekuiltikeh xikinmilawakah,
iwa n ojmech kan tlalchikototolonka noiwa xikinmixmanakah.

⁶Iwa nochteh n tlaltikpaktlakah kitaskeh kenomi techmakixtis Dios.” *Is. 40:3-5*

⁷Miakeh tlakah owalayah inawak Juan, para makinkuaateki iwa ye okimiliaya:

—¡Nomejwah kemi nonkoameh! ¿Akin onomechili nonmakisaskeh imak tlaijyowilistli temojti non nomopah wits? ⁸Xikchiwakah tlan kuali para mamota milák yononmoy-olkopkeh inawak Dios, iwa amo xikmolikah: “Tejwah titepilwah de Abraham.” De milajka nomechilia, Totajtsi Dios weletis kinkopas ninteh temeh ipilwah n Abraham. ⁹N acha kajki inakastla n kuawitl, iwa nochi kuawitl non amo kitemaka kuali itlakilo, motsontekis iwa motlamotlas ijtik tletl.

¹⁰N tlakah okitlajtlaniayah:

—¿Tlan tikchivaskeh?

¹¹Juan okinnankili:

—Akin kipia ome itlakeh makitliokoli se akin amo kipia. Iwa akin kipia tlan kikuas, makitliokoli akin amo kipia tlan kikuas.

¹²Noiwa omokuaatekikoh sikimeh tominoolojkeh inawak Juan, iwa okitlajtlaniyeh:

—Tlamachti, ¿tlan moneki matikchiwakah?

¹³Juan okinmili:

—Amo okachi xikinkobrarokah san tlan machotitok.

¹⁴Noiwa sikimeh soldadojtech okitlajtlaniyeh:

—Tejwah, ¿tlan tikchivaskeh?

Juan okinmili:

—Amaka itla xikkixtilikah, nion aka xikteilikah tla amitla okichi iwa xipakikah ika nomotlaxtlawil.

Kemi n tlakah sa okichixtokah mawiki n Cristo, yejwah okimoliayah chamo Juan ye n Cristo. ¹⁶Yika Juan okinmili:

—Ne nomechkuaatekia ika atl, pero satepa wits se tlakatl Akin nomechkuaatekis ika n Espíritu Santo iwa ika tletl. Ye okachi weletini, iwa ne mach ni tlawel kuali kemi para nikaktojtomas. ¹⁷Ye kualika itech ima tlan ika kichipawas n trigo. N trigo non yokichipa kitlaatis, iwa itlajsol n trigo kontlamotlas ijtik tletl non ayik sewis.

¹⁸Ijki, iwa ika oksikimeh tlamachtijkeh, Juan Bautista okinmatiltiaya n kualitlájtolli.

¹⁹Noiwa okajwak n gobernador Herodes Antipas; porke okimosiwati ikuñada Herodías. Nin Herodías okatka isiwa n Felipe, ikni n Herodes. Juan noiwa okajwak Herodes ika tlan amo kuali okichijtinemia. ²⁰Peró Herodes mach okinek okikak tlan okiliaya n Juan, yej okichi tlan amokuali, iwa otlanawati makitsakuakah n Juan.

Juan kikuatekia n Jesús

(Mt. 3:13-17; Mr. 1:9-11)

²¹Juan okinkuaatekiaya miakeh tlakah, iwa se tonati noiwa okinkuaateki n Jesús. Ijkuak Jesús omotiotsajtsilijtoka, n ilwikak owalmotlapo, ²²iwa n Espíritu Santo owaltemok ipan Jesús kemi se palomatsi, iwa itech ilwikak owalmokak se tlájtolli non okijtoaya:

—Te Ti Nokone non saikpanoa niktlasojtla, iwa monawak niyolpaki.

Iwejkatawaw n Jesús

(Mt. 1:1-17)

²³Ijkuak Jesús okipiaya kemi sempóali iwa n májtlaktli xiwitl opé tetlapowia de itlajtol n Totajtsi Dios. N tlakah okijtoayah Jesús oyá ipiltsi n José, iwa n

José ikone n Elí,

²⁴Elí ikone Matat, iwa

Matat ikone n Leví,

Leví ikone Melqui, iwa

Melqui ikone n Jana,

Jana ikone n José, iwa n

²⁵José ikone Matatías,

Matatías ikone n Amós, iwa n

Amós ikone Nahúm,

- Nahúm ikone n Eslí, iwa n
 Eslí ikone n Nagai,
²⁶ Nagai ikone Maat, iwa n
 Maat ikone Matatías,
 Matatías ikone n Semei, iwa n
 Semei ikone Joséc,
 Joséc ikone Judá, iwa n
²⁷ Judá ikone Joanán,
 Joanán ikone n Resa, iwa n
 Resa ikone Zorobabel,
 Zorobabel ikone n Salatiel, iwa n
 Salatiel ikone Neri,
²⁸ Neri ikone Melquí, iwa n
 Melquí ikone n Adí,
 Adí ikone Cosam, iwa n
 Cosam ikone n Elmadam,
 Elmadam ikone n Er, iwa n
²⁹ Er ikone Josué,
 Josué ikone n Eliezer, iwa n
 Eliezer ikone Jorim.
 Jorim ikone Matat, iwa
 Matat ikone n Leví,
³⁰ Leví ikone n Simeón, iwa n
 Simeón ikone n Judá.
 Judá ikone José, iwa n
 José ikone n Jonán,
 Jonán ikone n Eliaquim, iwa n
³¹ Eliaquim ikone Melea.
 Melea ikone Mainán, iwa n
 Mainán ikone Matata.
 Matata ikone Natán, iwa n
 Natán ikone n David.
³² David ikone Isaí, iwa n
 Isaí ikone Obed,
 Obed ikone Booz, iwa n
 Booz ikone Salmón.
 Salmón ikone n Naasón, iwa n
³³ Naasón ikone n Aminadab.
 Aminadab ikone n Admín, iwa n
 Admín ikone Esrom.
 Esrom ikone n Fares,
 Fares ikone n Judá, iwa n
³⁴ Judá ikone n Jacob.
 Jacob ikone Isaac, iwa n
 Isaac ikone n Abraham.
 Abraham ikone n Taré, iwa n
 Taré ikone Nacor,
³⁵ Nacor ikone n Serug, iwa n
 Serug ikone n Ragau.
 Ragau ikone n Peleg, iwa n
 Peleg ikone n Heber.
 Heber ikone n Sala, iwa n
³⁶ Sala ikone n Cainán.
 Cainán ikone n Arfaxad, iwa n
 Arfaxad ikone n Sem.
 Sem ikone Noé, iwa n
 Noé ikone n Lamec.

- ³⁷ Lamec ikone Matusalén, iwa
 Matusalén ikone n Enok.
 Enok ikone n Jared, iwa n
 Jared ikone n Mahalaleel.
 Mahalaleel ikone n Cainán, iwa n
³⁸ Cainán ikone n Enós.
 Enós ikone n Set, iwa n
 Set ikone n Adán, iwa n
 Adán ikone Dios.

4

Jesús kitlanilia n diablo
 (Mt. 4:1-11; Mr. 1:12-13)

¹ Ijkuak Jesús owalmokopato kan río Jordán, Ye yotentiwalaya de n Espiritu Santo, iwa n Espiritu okiwik kan amaka chanti. ² Ompa omoka ome póali tonati, iwa n diablo okinekia matlajtlakolchiwa. Itech nonteh ome póali tonati Jesús amitla okimomajsewi, iwa satepa owalxitlatlak. ³ Ijkuakó n diablo okili:

—Tla milák Te Ikone Dios, xikili nin tetl mamokopa paj.

⁴ Jesús okinankili:

—Itlajkuilol Dios kijtoa: “N tlakatl amo san ika paj yolitos.”*

⁵ Otlanki n diablo okiwik n Jesús kan se tepetl wejkapá, iwa okimititi nochteh n altepemeh de nin tlaltfkapaktli. ⁶ Iwa n diablo okili n Jesús:

—Ne nikchiwas xiknawati nochi tlan onka itech nin tlaltfkapaktli iwa tiweyixtos intech. Porke nochi noaxka, iwa weletis nikmaktilis san akin ne niknekis. ⁷ Tla timotlankuaketsas nonawak iwa techweyilis, nochi yetos moaxka.

⁸ Ijkuakó Jesús okinankili:

—Itlajkuilol Dios kijtoa: “Xikweyijkachiwa Moteko Dios, iwa sanwel Ye tiktekichiwilis.”

Dt. 6:13

⁹ Otlanki okiwik n Jesús kan altepetl de Jerusalén, okitlejkolti ikpak n Weyi Tiopa kan okachi wejkapá iwa okili:

—Tla milák Te Ikone Dios, ximokajkawa ixko tlali, ¹⁰ porke itlajkuilol Dios kijtoa:

Dios kinnawatis iangelwah mamitsmokuilawikah.

¹¹ Yejwah mitsmatsakuilisek

para amo ximoikxitlanwi ika tetl.

Sal. 91:11-12

¹² Jesús okinankili n diablo:

—Itlajkuilol Dios noiwa kijtoa: “Amo xikyejyeko n Dios Moteko.”

Dt. 6:16

¹³ Ijkuak n diablo ayakmó okajsik kenijki weletis kiyejyekos n Jesús, okikakajte kech tonati.

Jesús pewa tlamachtia kan tlali de Galilea
 (Mt. 4:12-17; Mr. 1:14-15)

¹⁴ Jesús omókopki Galilea ika iweletilis n Espiritu, iwa sentetl omotlapowiyah tlan Jesús okichiwaya. ¹⁵ Otlamachtia itech insinagogajwah n judíojeteh, iwa nochteh akimeh okikakiah, kualí omotlapowiyah de Ye.

Jesús kan altepetl de Nazaret
 (Mt. 13:53-58; Mr. 6:1-6)

¹⁶ Ijkuakó Jesús oyá Nazaret kan omoskalti. Non sábadó[†] okalakito kan sinagoga,[‡] kemi nochipa okichiwaya, iwa owalmóketiski para kinamapoilis itlajkuilol Dios. ¹⁷ Ompa okimaktlijkeh itlajkuilol n profeta Isaías,[§] iwa ijkuak Jesús okimila, okajsik kan ijkuilitok: ¹⁸ Iespiritú n Noteko notech kajki,

* 4:4 Yej noiwa ika itlajtol Dios Dt. 8:3. † 4:16 sábadó: tonati ijkuak nochteh non de Judea omosewiyah. ‡ 4:16 sinagoga: se kali kan omoolooyah n judíojeteh nochi sábadó. § 4:17 itlajkuilol n profeta Isaías: se tiotlajtolamatl kemi memeloli non amo kipia capítulo nion bersíkulo. Jesús okimomachtí miak welta n tiotlajtolamatl n profeta Isaías, iwa ijko owéletki okinmajsik ninteh tlajtolteh san nima.

ken Ye inewia onechpéjpenki para manikinmatilti n kualitlájtoli non amitla kipiah, onechaltítlanki manikinyolchikawaki akimeh moyolkokoah, iwa manikinmatilti kinkixtiskeh non tsaktokeh; iwa manikinmixtlajtlapo akimeh amo tlachiah, iwa manikinpalewi akimeh tlaijyowiah,

¹⁹ iwa maniktematilti yoajsiko n tonati keman Dios kintiochiwas nochteh akimeh witseh inawak. Is. 61:1-2

²⁰ Otlanki Jesús okimemelo n tiotlajkuilolamatl, okimaktili akin tlapalewia itech non sinagoga iwa omotlali. Iwa nochteh non ompa okatkah, san okitlajtlatakeh, ²¹ ijkuakó Jesús opé kinnmilia:

—Nin tonati nomoixpa yomochi tlan kijtoa itlajkuilol Dios.

²² Nochteh non ompa okatkah kualitlájtoli otlajtoayah de Jesús iwa omotlajtlachialtiayah kenijki okinmatiltiayah n kualitlájtoli. Iwa omotlajtlaniayah:

—¿Amo ye ipilti n José?

²³ Jesús okinmili:

—Kualitlájtoli nomenjwah nonkinekih nonnechakitiskeh nin tlájtoli: “Tlapajti, ¡ximopajti te monewial”, noiwa nonnechiliskeh: “Tlan otikmatkeh otikchi Capernaúm, noiwa xikchiwa nika itech moaltepeu.”

²⁴ Iwa okinmili:

—De milajka nomechilia, nion se profeta kiyekseliah kan ialtépeu. ²⁵ Ijkuak oyolitoka n profeta Elías, okatkah miakeh iknosiwameh itech nochi tlali de Israel, itech nonteh tonatijmeh eyi xiwitl iwa n tlajko mach okiawik, iwa okatka miak apisotl itech nonteh talmeh, ²⁶ pero Elías mach okititlankeh inawak seme de nonteh iknosiwameh, yej sanwel inawak se iknosiwatl non ochantitoka kan altepetl de Sarepta, itech tlali de Sidón. ²⁷ Noiwa ijkuak oyolitoka n profeta Eliseo, okatkah miakeh kokoxkeh de lepra itech nochi tlali de Israel, pero amaka de yejwah opajtik, sanwel Naamán non owalewatoka itech tlali de Siria.

²⁸ Ijkuak okinkakeh ninteh tlájtoltel, nochteh non okatkah kan sinagoga, okualankamikeh. ²⁹ Owalmoketiwetskeh iwa okwalkixtijkeh n Jesús de itech non altepetl, iwa okiwikakeh itempa n tepetl non itech ochijchitoka inmaltépeu, para kontlamotlaskeh.

³⁰ Pero Jesús opanok intlajkotiah iwa oyá.

Jesús kipajtia se tlakatl non okipiaya se espíritu amokuali

(Mr. 1:21-28)

³¹ Ijkuakó Jesús okalakito Capernaúm non kajki itech tlali de Galilea, iwa nochi sábado oontlamachtiaayah kan sinagoga. ³² N tlakah omotlajtlachialtiayah ika itlamachtilis porke okinnonotsaya kemi akin kipia tlanawatílistli.

³³ Ompa kan sinagoga okatka se tlakatl non okipiaya se espíritu amokuali, non owaltsajtsitewak:

³⁴ —Techkawa, ¿tleka timokalakia towah, Jesús de Nazaret? ¿Otiwala otechpojpoloko? Ne nimitsixmati, Te tiyolchipawak inawak Dios.

³⁵ Jesús okajwak n espíritu amokuali, iwa okili:

—¡Xiktsakua mokamak, iwa xikisa de non tlakatl!

N espíritu amokuali okitlalwitek n tlakatl inyakapah nochteh iwa okiski, iwa amitla okitokti. ³⁶ Nochteh omotlajtlachialtijkeh, iwa omotlatlajtlaniayah:

—¿Tlan weletílistli kipia itlajtol? ¡Nin tlakatl ika weyi tlanawátilli kinnawatia n espíritus amokualteh iwa yejwah kisah!

³⁷ Iwa omotlapowiayah de Jesús itech nonteh talmeh.

Jesús kipajtilia imona n Pedro

(Mt. 8:14-15; Mr. 1:29-31)

³⁸ Ijkuakó Jesús okiski de kan sinagoga iwa oyá icha n Simón Pedro. Ijkuak okalak icha okitlapowijkeh imona n Pedro omokokoaya ika chikawak totonik. ³⁹ Jesús omotolo inawak n siwatl iwa okinawati n totonik makisa. N totonik okiski iwa imona n Pedro owalme iwa opé kintekichiwilia.

Jesús kimpajtia miakeh kokoxkeh

(Mt. 8:16-17; Mr. 1:32-34)

⁴⁰ Ijkuak okalak tonati, nochteh akimeh okimpiayah inkokoxwah okwalinwikilijkeh n Jesús, iwa Ye okintlaliliaya imawah impah n kokoxkeh iwa okimpajtiaya. ⁴¹ Miakeh de nonteh kokoxkeh okimpiayah espíritus amokualteh, iwa ijkuak okisayah otsajtsiah iwa okijtoayah:

—Te Ikone Dios.

Pero Jesús okinmajwaya n espíritus amokualteh iwa amo okinkawiliaya matlajtokah, porke yejwah okimatiah Ye n Cristo.

Jesús kitemachtia n kualitlájtolí kan tlali de Galilea

(Mr. 1:35-39)

⁴² Ijkuak otláneski, Jesús okiski de kan altepetl iwa oyá iselti kan amaka onemia. Pero n tlakah okitemojkeh, iwa ijkuak okajsitoh, okinekih kitsakuiliskeh para amo makinkakajtewa. ⁴³ Pero Jesús okinmili:

—Nikpia nitetlapowiti de kan tlanawatia Dios ika n kualitlájtolí intech oksikimeh altepemeh, ken ika ye onehaltitlanki Dios.

⁴⁴ Iwa Jesús otlamachtijtinemia itech sinagogas de Galilea.

5

Jesús kinmonochia sikimeh michmajkeh

(Mt. 4:18-22; Mr. 1:16-20)

¹ Se tonati Jesús oyá itempa n lago de Genesaret, iwa miakeh tlakah asta omotojtopewayah inawak ken okinekih kikakiskeh itlajtol Dios. ² Jesús okoninmitak ome barkas san ijkeh itempa n atl, porke n michmajkeh otetemekah iwa okimpaktokah inmichayawah.

³ Ijkuakó Jesús otlejok itech seme de nonteh barkas iaxkawah n Simón, iwa okitlatlaujti makijkuani ok achitsi kan tlawejkatla. Otlanki Jesús omotlali ijtik n barka iwa opé kinmachtia akimeh omoololokkeh itempa n atl. ⁴ Ijkuak Jesús yotlanki okintlapowi, okili n Simón:

—Xikijkuani n barka kan okachi tlawejkatla, xikonintlamotlakah nomomichayawah iwa ompa ximichmaakah.

⁵ Simón okinankili:

—Tlamachtí, interojyúali yotikyeyekojkeh timichmaaskeh iwa nion se michi otikkitskijkeh, pero tla Tejwatsi titlanawatia, ye nikonchiwas.

⁶ Ijkuak okontlamotlakeh inmichayawah, saikpanoa miakeh michimeh okinkitskijkeh iwa inmichayawah opé kokotokah. ⁷ Ijkuakó okoninmanotskeh sikimeh michmajkeh non ik ompa okatkah itech ok se barka, para makimpalewikih. Yejwah okimpalewikoh, iwa okintemitijkeh inbarkajwah ika miak michimeh iwa asta yoapolakiah. ⁸ Ijkuak Simón Pedro okitak nochi ni, omotlankuáketski iyakapa n Jesús iwa okili:

—Noteko, amo xiwalmijkuani nonawak, porke ne nitlajtlakole.

⁹ Simón ijko okijto porke Ye iwa non inwah okatka satlawel okinmojtih ijkuak okitakeh senmiatikkeh michimeh okinkitskijkeh. ¹⁰ Noiwa n Jacobo iwa n Juan, itelpochwah n Zebedeo non otekitiah iwa n Simón, saikpanoa omomojtijkeh. Pero Jesús okili n Simón:

—Amo ximawi, axa te ayakmó timichmas, yej pewas tikinmichmas tlakah.

¹¹ Ompa, san nima ijkuak okwalinkixtijkeh inbarkajwah itempa n atl, okikakajtejkeh nochi iwa oyajkeh iwan Jesús.

Jesús kipajtia se tlakatl non okipiaya lepra

(Mt. 8:1-4; Mr. 1:40-45)

¹² Ijkuak Jesús okatka itech se altepetl, okalakiko se tlakatl non okipiaya lepra. Iwa ijkuak okitak n Jesús, omotlankuáketski iyakapa asta okitelkoto n tlali ika ixkuak, iwa ijki okitlatlaujti:

—Noteko, tla Tejwatsi tikmonekiltia, weletis techchipawas de nokokolis.

¹³ Ijkuakó Jesús okitelko n kócoxki iwa okijto:

—Nikmonekiltia. ¡Ximochipawa!

Ijkuak ijko okijto, isawawah n kócoxki san owalpolikeh. ¹⁴Otlanki Jesús okinawati amaka makimatilti, iwa okili:

—Xio ximoteixpantiti inawak n tiópixki, iwa xiktemaka tlan Moisés otlanawati por mochipawalis. Ijko nochteh makimatikah yotimochipa de kokokolis.

¹⁵Yika nochi tlan Jesús okichiwaya san kan ik yetos okachi omomatia, iwa miakeh tlakah omoooloayah para kikakiskeh itlajtol iwa para makimpajti. ¹⁶Pero Jesús omoixkoyantiaya, iwa oyaya kan amaka okitaya iwa ompa onmotiotsajtsiliaya.

Jesús kipajtia se tlakatl non osentitikak

(Mt. 9:1-8; Mr. 2:1-12)

¹⁷Se tonati, Jesús otlamachtijtoka iwa ik ompa oewatokah sikimeh fariseos iwa sikimeh tlamachtijkeh de intlanawatil. Yejwah owalajkeh de nochteh altepsetsinteh de Galilea, de Judea iwa de Jerusalén. Iwa ika ichikawalis Dios, Jesús okimpajtiaya n kokoxkeh. ¹⁸Ijkuakó okalakikoh sikimeh tlakah non okualikayah itech ikuaujtlapech se tlakatl non osentitikak. Ijkuak okalakitoh itech kali kan Jesús otlamachtijtoka, yejwah okitemoliayah kenijki kikalakiskeh iwa kitlaliskeh iyakapa n Jesús. ¹⁹Pero mach oweletkeh okikalakijkeh, porke miakeh tlakah okatkah kaltempa. Ijkuakó otlejkokeh ikpak kali, okikuatlapojkeh, iwa ik ompa okitemowijkeh n kócoxki ika nochi ikuaujtlapech, iwa tlatlajkotia okitlalijkeh, kan okatka n Jesús. ²⁰Ijkuak Jesús okitak kenijki ninteh tlakah okineltokakeh, okili n kócoxki:

—Tlakatl, nimitstlapojpolwia de motlajtlakolwah.

²¹Ijkuakó non kitemachtiah n tlanawatilistli iwa n fariseos opé mokuatlapowiah: “¿Akí nin tlakatl non ika itlajtol kixpanawijtok n Totajtsi Dios?” Amaka weleti kintlapojpolwia tlajtlákolteh, sanwel Totajtsi Dios.

²²Pero Jesús okimatia tlan yejwah omokuatlapowijtokah, iwa okinmili:

—¿Tleka ijko nonkimoliah itech nomoyolo? ²³¿Tlan okachi amo owi se kijtos: “Motlajtlakolwah ya tlapojpolwitokeh”, noso okachi owi se kijtos: “Ximewa iwa xinejnemi”?

²⁴Yika xikmatikah, Ne Non onimochi ni tlakatl nikpia weletflistli itech nin tlatlákpaktili para nikintlapojpolwis tlajtlakolteh.

Ijkuakó okili n kócoxki:

—Ne nimitsilia, ximewa, xikonana mokuaujtlapech iwa xiajti mocha.

²⁵Inmixpah, n kócoxki owalmóketski, okajkok ikuaujtlapech iwa oyá icha kiweyijkachijti Dios. ²⁶Iwa nochteh non ompa okatkah omotlajtlachialtijkeh iwa okiweyijkachijkeh Totajtsi Dios, iwa ika miak mawilistli okijtojkeh:

—Nin tonati otikinmitakeh wejweyi neskayolteh.

Jesús kinotsa n Leví

(Mt. 9:9-13; Mr. 2:13-17)

²⁷Satepa, Jesús okiski de ompa iwa okitak se tominoololo non omonotsaya Leví. Ye oewatoka kan motlaxtlawa impuesto de Roma, iwa Jesús okili:

—Xiwiki nowa.

²⁸San nima n Leví omóketski, okikakajte nochi iwa oyá iwan Jesús.

²⁹Satepa, Leví okichi se weyi ilwitl para Jesús, iwa miakeh tominoololjkeh iwa n oksikimeh tlakah otlakuajtakah inwah. ³⁰Pero n fariseos iwa n tlamachtijkeh de intlanawatilis, opé kimpojpoah itlamachtijkawah n Jesús, iwa okimilijkeh:

—¿Tleka nontlakuah iwa nonkonih iwan tominoololjkeh iwa n tlajtlakolchijkeh?

³¹Jesús okinnankili:

—N tlakah chikawakeh amo kimotlakewiah se tlapajti, yej non kokoxkeh. ³²Ne amo onikinnotsako non yekmilajkameh. Ne onikinnotsako n tlajtlakolchijkeh, para mamoyolpatlakah inawak Dios.

Jesús otlamachtij kenijki se mosawas

(Mt. 9:14-17; Mr. 2:18-22)

³³Ijkuakó yejwah okitlajtlanjkeh n Jesús:

—¿Tleka itlamachtijkawah n Juan iwa itlamachtijkawah n fariseos nochipa mosawah iwa motiotsajtsiliah, pero motlamachtijkawah nochipa tlakuah iwa konih?

³⁴ Jesús okinnankili:

—¿Kox weletis nonkitoktiskeh aka mamosawa itech se monamiktilo ijkuak n novio kajki íwa? ³⁵ Witseh tonatijmeh ijkuak kinkixtiliskeh n novio, ijkuakó mosawaskeh.

³⁶ Noiwa okinmili nin tlapoálistli:

—Amaka kitlamanilia itlake non ya wewe ika se yankuik tsótsoli. Porke tla ijko kichiwa, okachi kijtlakoa itlake, porke n yankuik tsótsoli mokototsoa iwa mach kinamiki. ³⁷ Nion amaka kitlalia yankuik vino itech se kuilambre ya wewe. Porke tla se ijko kichiwa, n yankuik vino kitsomonia n kuilambre, iwa san ken omeh pojpoliwih. ³⁸ Yika, moneki se kitlalis n yankuik vino itech yankuik kuilambre, iwa ijko san ken omeh wejkwaskeh. ³⁹ Iwa amaka kineki konis n yankuik vino ijkuak yokonik n vino non yowejka tlatitok, porke kijtoa: “N vino non yowejka tlatitok okachi kuali.”

6

Itlamachtijkawah n Jesús miawatekih se sábado

(Mt. 12:1-8; Mr. 2:23-28)

¹ Se sábado ijkuak mosewia n judíos, Jesús iwa itlamachtijkawah opajpanotiyah kan ik tlatooktok, itlamachtijkawah opé tlakuatejtekih, okimaxotomayah iwa okikuayah itliolyo n tlátoktli. ² Ijkuakó sikimeh fariseos okintlajtlanjekheh:

—¿Tleka nonkichiwah tlan amo moneki se makichiwa itech sábado?

³ Jesús okinnankili:

—¿Ayamó nonkiamapoah tlan okichi n David iwa non iwa oyayah, se tonati ijkuak owalxitlatlakeh? ⁴ David okalak ijtk ikal Dios iwa okinmónanki n tlatiochiwalpameh. Otlanki okinkuah, iwa okinmajmák noiwa akimeh oyayah iwa, maya ninteh pameh sanwel n tiopixkeh okinkawiliayah makinkuakah.*

⁵ Noiwa okinmili:

—Ne Non onimochi ni tlakatl noiwa niknawatia n sábado.

Jesús kipajtia se tlakatl non omapitswak

(Mt. 12:9-14; Mr. 3:1-6)

⁶ Ok se sábado ijkuak mosewia n judíos, Jesús okalak itech sinagoga iwa opé tlamachtia. Ompa okatka se tlakatl non opitswak imayekma. ⁷ N fariseos iwa n tlamachtijkeh, sa okitokatinemial n Jesús para kitaskeh kox kipajtiskia non tlakatl itech sábado iwa ijko weletis kiteiliskeh. ⁸ Pero Jesús okimatia tlan yejwah okiyejyekoliayah, iwa okili n tlakatl non okipiaya imayekma pitswak:

—Ximoketsa iwa xiwiki nika tlatlajkotia.

N tlakatl omijkuani iwa omoketsato tlatlajkotia. ⁹ Ijkuakó Jesús okinmili non ompa okatkah:

—Ne nikneki nomechtlajtlanis: ¿Tlan moneki se kichiwas itech sábado, tlan kuali noso tlan amokuali? ¿Tikpalewiskeh mayolito se tokni, noso tejwah tikmiktiskeh?

¹⁰ Ijkuakó Jesús okintlajtlatak nochteh non okiyawalojtokah, iwa okili n tlakatl:

—Xikmilawa moma.

N tlakatl okimila ima, iwa san nima owalpajtik. ¹¹ N fariseos okualankamikeh, iwa opé kimoliah tlanón kitoktiskeh n Jesús.

Jesús kimpejena májtlaktli iwa ome itlamachtijkawah

(Mt. 10:1-4; Mr. 3:13-19)

¹² Itech nekateh tonatijmeh, Jesús otlejkok itech se tepetl iwa omotiotsajtsilito in-teroyjuali. ¹³ Ijkuak otláneski, okínnotski itlamachtijkawah iwa okimpéjpenki májtlaktli

* 6:4 pameh tlatiochiwalteh: Nochi sábado n tiopixkeh okinkuayah n pameh non otlaititokah itech Weyi Tiopa iwa okintlaliyah oksikimeh yankuikheh.

iwa ome (12) de yejwah, iwa okintlalili intoka apóstoles.† ¹⁴ Yejwah ninteh akimeh okimpéjpenki:

Simón, akin Jesús noiwa okitlalili itoka Pedro, iwa ikni
 Andrés;
 Jacobo iwa n
 Juan;
 Felipe iwa n
 Bartolomé,
¹⁵ Mateo,
 Tomás,
 Jacobo ipiltsi n Alfeo;
 Simón akin okitokayotiyah Zelote, iwa n
¹⁶ Judas ikni n Jacobo; iwa n
 Judas Iscariote, akin satepa kitemaktiskia n Jesús.

Jesús kinmachtia miaktikeh tlakah
 (Mt. 4:23-25)

¹⁷ Jesús otemok itech tepetl iwa itlamachtijkawah, iwa omoketsatoh ixtlawak. Noiwa ompa okatkah miakeh tlakah non owalajkeh de nochteh n altepemeh de Judea, de Jerusalén, de Tiro, iwa Sidón. Yejwah owalajkeh okikakikoh n Jesús iwa para makimpajti de inkokolis. ¹⁸ Noiwa okimpajtiaya akimeh okimpiayah espíritu amokualteh. ¹⁹ Nochteh okinekia kitelkoskeh n Jesús, porke ika iweletilis okimpajtiaya.

Xiyolpakikah
 (Mt. 5:1-12)

²⁰ Ijkuakó Jesús okintlajtlatak itlamachtijkawah iwa okinmili:
 —Miak yolpakílistli nonkipiah nomejwah akimeh non próbesteh, porke nonkipiah tlan nomoaxka kan Dios tlanawatijtok.

²¹ 'Miak yolpakílistli nonkipiah nomejwah non axa nonxitlatlah, porke satepa non-mixwiskeh.

'Miak yolpakílistli nonkipiah akimeh axa nonchokah, porke satepa nonwetskaskeh.

²² 'Miak yolpakílistli nonkipiaskeh ijkuak nomechkokoliskeh, ijkuak nomechtotoj-tokaskeh, ijkuak nomechwijwikaltiskeh iwa ijkuak nomechtlawelitaskeh por nonnechnel-tokah Ne Non onimochi ni tlakatl. ²³ Xiyolpakikah itech non tonati iwa xiwetskakah, porke yetos weyi nomotlaxtlawil kan ilwikak, porke intatawah akimeh asta axa tlajtlakolchiwah, noijkó okintlajjowiltijkeh n profetas.

²⁴ 'Pero miálmasteh nomejwah akimeh nonkitlawelpiah tomi, porke yononmopaktijkeh kemi ononkinekeh.

²⁵ 'Miálmasteh akimeh axa nonmixwitokeh, porke satepa nonmapismikiskeh.

'Miálmasteh akimeh axa nonwetskah porke satepa nonchokaskeh ika neyolkócoli.

²⁶ 'Non miálmasteh ijkuak nochteh n tlakah ayakmó kimatiskeh kenomi nomechwey-iliskeh. Porke intatawah akimeh asta axa kichiwah tlajtlakóli noijkó satlawel okinweyili-ayah n profetas tekajayajkeh.

Jesús tlamachtia matikintlasojtlakah akimeh techkokoliah
 (Mt. 5:38-48; 7:12)

²⁷ 'Pero nomejwah akimeh nonnechtlakitah, Ne nomechilia: Xikintlasojtlakah akimeh amo nomechtlasojtlah, iwa xikinchiwilikah tlan kual akimeh nomechkokoliah. ²⁸ Noiwa xiktajtlanilikah Dios makintiochiwa akimeh nomechwijwikaltiah, iwa ximotiotsajtsilikah por akimeh fiero nomechtenewah. ²⁹ Tla aka mitsixtlatsinia, xikkawili noiwa mamit-sixtlatsini ojkatia, iwa tla aka mitsixtilia mokoto, xikkawili makiwika noiwa mokamisa.

³⁰ Akin mitstlajtlanilia itla, xikmaka, iwa tla aka mitsixtilia itla, ayakmó xiktajtlanili.

³¹ Xikchiwahak tlan kual, ijkó kemi nomejwah nonkinekih makichiwahak tlan kual nomowah.

† 6:13 apóstoles kijtosneki tlatitlanilith iwa tlatematiltijkeh

³² Tla nomejwah nonkintlasojtlah sanwel akimeh nomechtlasojtlah, amo kuali tlan nonkichiawah. Porke non amo kixmatih Dios noijkó kichiawah. ³³ Tla nonkinchiwiliah tlan kuali sanwel akimeh nomechchiwiliah tlan kuali, amo kuali tlan nonkichiawah. N tlajtlakolchijkeh noijkó kichiawah. ³⁴ Noso tla aka nonkitlanetiah itla, porke non kimoliah satepa ye noiwa nomechmakas itla, amo kuali tlan nonkichiawah. Noiwa n tlajtlakolchijkeh kintlanetiah akimeh iwa mowikah, porke kimatokeh ok se tonati noiwa kintlanetiskeh. ³⁵ Ne nomechilia: Xikintlasojtlakah akimeh nomechkokoliah, iwa xikinchiwilikah tlan kuali iwa xiktetlanetikah. Iwa amo xikchiakah itla manomechmakakah. Tla ijkó nonkichiwaskeh, nonkiseliskeh weyi nomotlaxtlawil. N Totajtsi Dios nomechyekselis kemi ipilwah, porke Ye kinmiknomati akimeh amo motlasojkamatih innawak iwa akimeh tlajtlakolchiwah. ³⁶ Xiteiknomatikah ijkó kemi Nomotajtsi teiknomati.

Amo xitepojpoakah

(Mt. 7:1-5)

³⁷ Amo xikimpojpoakah oksikimeh, ijkó Dios amo nomechpojpoas. Amo xitetlajtlakoltikah ijkó Dios amo nomechtlajtlakoltis. Xitetlapojpolwikah iwa Dios nomechtlapojpolwis. ³⁸ Xitetlatliokolikah iwa Dios nomechtlatliokolis. Ye nomechmakas se kuali tlatamachíwale, tejtélinki, tetentok iwa kitsonewiltis. Dios nomechkopilis ijkó kemi nomejwah ononkitemakakeh.

³⁹ Jesús noiwa okinmili nin tlájtoli:

—¿Se non amo tlachia weletis kiyakanas ok se kemi ye? ¿Amo motekochwiskeh san ken omeh? ⁴⁰ Se akin momachtia amo okachi kimati ke itlamachtli. Pero tla kimokawilia makimachtikah, motlamiti kemi itlamachtli.

⁴¹ ¿Kenijki weleti tikita n tlajtsoltsintli non kipixtok mokni kan ixtololo, iwa amo tikita n tláktsonntli non tikpixtok te kan moixtololo? ⁴² Iwa tla amo tikita n tláktsonntli non tikpixtok kan moixtololo, ¿kenijki timixewia tikilia mokni: “Noknitsi, manimitsonkixtili n tlajtsoltsintli non tikpixtok kan moixtololo”? ¿Íxkoptlii, achto xikmokixtili n tláktsonntli non tikpixtok kan moixtololo, iwa ijkó ya weletis tiyektlachias para weletis tikixtilis n tlajtsoltsintli non kipixtok mokni kan iixtololo.

Se kuawitl moixmati ika tlan kitlakiltia

(Mt. 7:17-20; 12:33-35)

⁴³ Se kuali kuawitl, amo weletis kitemakas amokuali itlakilo. Nion se amokuali kuawitl weletis kitemakas kuali itlakilo. ⁴⁴ Yika, nochi kuawitl moixmati ika itlakilo, porke amo motekih igos de kan witsmeh, nion tikintekih uvasteh de kan tlatsmolteh. ⁴⁵ Noiwa n kuali tlakatl, ijkuak tlajtoa kitenkixtia tlan kuali kitlaatijtok itech iyolo. Iwa n tlakatl amokuali kinmijtoa tlájtoltel amokualteh porke tlan amokuali kajki itech iyolo. Nochi tlan kitenkixtia se tlakatl, ye noni tlan kipixtok itech iyolo.

N kali non omoyekhijchi iwa n kali non amo omoyekhijchi

(Mt. 7:24-27)

⁴⁶ ¿Tleka nonnechnotsah, “Noteko, Noteko”, iwa amo nonkichiawah tlan Ne nomechilia? ⁴⁷ Axa nomechajsikamatiltis kenomi nonkixmatischeh n tlakatl non milák wits nonawak, iwa nechkaki iwa kitlakita notlajtol. ⁴⁸ Ye kemi se tlakatl akin omokalti. Achto otlachkuak tlawejkatla iwa ikal okitlajtlaxxili ipan tetl. Ijkuak owala n kiawitl, n atepiatl omomiakili iwa opé kitsinwiteki n kali, pero n kali amo owetski porke otlakxilitoka ipan tetl. ⁴⁹ Pero akin nechkaki iwa amo kichiwa tlan nikijtoa, noni kemi se tlakatl akin okichijchi ikal itech tlali iwa amo kuali okitlakxili. Ijkuak omomiakili n atepiatl, okitsinwitek n kali iwa san nima owetski.

7

Jesús kipajtia itlakewal se soldado romano tlayákanki

(Mt. 8:5-13; Jn. 4:43-54)

¹ Ijkuak Jesús otlaniki okinmachtli n tlakah, okalakito Capernaúm. ² Ompa ochantitoka se soldado romano tlayákanki non okiapiaya se itlakewal non satlawel okitlanekiliaya non

yomiktoka. ³ Ijkuak n tlayákanki okikak omotlapowiyah de Jesús, okintítlanki sikimeh tetajmeh non tlayakantokeh kan tiopa para makitlatlaujtíth makipajtiliki itlakewal. ⁴ Yejwah okalakikoh inawak Jesús iwa okilijkeh:

—Kuali ka tla tikpalewis nin tlayákanki romano, ⁵ porke maya amo israelita, ye satlawel kitlasojtla topaís, iwa ye inewia otlanawati matechchijchiwilikah se tosinagoga.

⁶ Ijkuakó Jesús oyá inwah. Pero ijkuak ya onkalakiah itech kali, n tlayákanki romano okintítlanki sikimeh itlakaikniwah makilitíth n Jesús:

—Noteko, tla amo weletis tias nocha, amo ximotekipacho, porke ne mach ni tlawel kuali para nimitsompanoltis íjtik nocha. ⁷ Yika, mach onimixewi onimitstemoto nonewia. Sanwel xikijto “Mapajti”, iwa ye walpajtis. ⁸ Porke ne nojki nikpia akin nechnawatia, iwa nojki nikimpia sikimeh soldadojtech akimeh nikkinnawatia. Tla seme de yejwah nikilia mawia, yawi; iwa tla ok se nikilia mawiki, wits; iwa ijkuak niknawatia notlakewal makichiwa itla, kichiwa.

⁹ Ijkuak Jesús okikak, omotlajtlachialti non tlayákanki romano, iwa okinchikoitak non okwaltokayah iwa okijto:

—De milajka nomechilia, itech nochi país de Israel mach nikkajsitika aka non satlawel matlaneltoka kemi ye.

¹⁰ Ijkuak n tlakah non okintítlankeh omokopkeh icha n tlayákanki romano, okajsitoh n tlakéwale yopajtik.

Jesús kiyolitia ipiltsi se iknosiwatl

¹¹ Okachi satepa, Jesús oyá kan se altepetl non itoka Naín, iwa itlamachtijkawah iwa oksikimeh tlakah oyayah íwa. ¹² Ijkuak Jesús yonkalakia itech non altepetl, okimitak sikimeh tlakah non okiwikayah kitookatiweh se miketl. Ye ikone se iknosiwatl non sanwel se ipiltsi okípíxki, iwa miakeh okiwikayah kitookatiweh. ¹³ Ijkuak Toteko okitak n iknosiwatl okiknoma, iwa okili:

—Ayakmó xichoka.

¹⁴ Ijkuakó Jesús omijkuaní iwa okitelko ikaja n miketl, iwa non okimamajtiayah omoketskeh. Iwa Jesús okili n miketl:

—Télpochtli, Ne nimitsilia: ¡Ximoketsa!

¹⁵ San nima n télpochtli non omiktoka, owalmotlali iwa opé tlajtoa, iwa Jesús okimaktili ina. ¹⁶ Ijkuak íjkí okitakeh, nochteh omaujkeh iwa opé kiweyijkachiwah Dios, iwa okijtoayah:

—Se weyi profeta yomonextiko tonawak.

Noiwa okijtoayah:

—N Totajtsi Dios yowala okipalewiko ialtépeu.

¹⁷ Itech nochi n tlali de Judea iwa n altepemeh non kiyawalojtokeh omoma tlan Jesús okichi.

Juan Bautista kintitlani ome itlamachtijkawah kan Jesús

(Mt. 11:2-19)

¹⁸ Itlamachtijkawah n Juan okimatiltijkeh nochi tlan otlamochijtoka, iwa ye okínnotski ome itlamachtijkawah, ¹⁹ iwa okintítlanki inawak Jesús para makitlajtlanitíth kox Ye n Cristo Akin walaskia, noso kichiasiah ok se. ²⁰ N tlakah non okintítlanki n Juan okalakitoh inawak Jesús iwa okilijkeh:

—Juan Bautista otechaltítlanki matimitstlajtlanikíh kox Tejwatsi Akin walaskia, noso tikchiaskeh ok se.

²¹ Itech non ora ijkuak yejwah okalakitoh, Jesús okimpajti miakeh kokoxkeh de inkokolis, intlajiyowilis, iwa okinkixtiliaya espíritus amokualteh. Noiwa miakeh non amo otlachiyah okinmák intlachialis. ²² Ijkuakó Jesús okinmili:

—Ximokopakah kan Juan iwa xikilikah tlan yononkitakeh iwa ononkikakeh. Xik-matiltikah:

non amo otlachiyah, ya tlachiah,

non amo onejnemiah, ya nejnemih;

non okipiayah lepra, yopajtikeh;
 non amo otlakakiah, ya tlakakih.
 Non yomikkeh, moyolitiah,
 iwa n próbesh kinmatiltiah n kualitlájtohi.
²³ Miak pakílistli kípías akin nechnehtokah.

Jesús tlajtoa de Juan Bautista

²⁴ Ijkuak oyajkeh itlamachtijkawah n Juan, Jesús opé kintlapowia n tlakah non ompa okatkah de Juan Bautista:

—¿Tlan ononkitatoh kan amaka chantí? ¿Ononkitatoh se akatl non okoliniaya n ejekatí?

²⁵ ¿Tlan ononkitatoh? ¿Ononkitatoh se tlakatl non yektlakentitok? Nomejwah nonkimatih akimeh moyektlakentiah, chantitokeh incha n reyes. ²⁶ ¿Tlan ononkitatoh? ¿Ononkitatoh se profeta? Milák, ye se profeta, iwa okachi weyijkatitok ke oksikimeh profetas. ²⁷ Ye de akin tlajtoa itlajkuilol Dios:

Ne niktlayakanaltis akin tlatematiltijtias moyakapa para mamitsmajmanili n ojti.

Mal. 3:1; Is. 40:3

²⁸ De milajka nomechilia amo otlakati ok se okachi weyijkatitok ke Juan, pero akin kimokawilia Dios makiyakana okachi weyijkatitos ke Juan.

²⁹ Ijkuak okikakeh nochi ni, nochteh n tlakah iwa n tominoolojkeh non okiselijkah itlakuatekilis n Juan, okajsikamatkeh Dios yekmilajka. ³⁰ Pero n fariseos iwa n tlamachtijkeh de intlanawatilis, amo okiselijkeh itlakuatekilis n Juan. Okixnamikeh tlan Totajtsi Dios okinekia kichiwaskia inwah. ³¹ Iwa okinmili:

—¿Kenomi motah n tlakah itech ninteh tonatijmeh? ¿Kenomi akimeh inyalis? ³² Mota kemi pípilteh non mawiltia tiánkistli iwa motsatsajtsiliah: “Otomechtlapichilijkeh ika akatlapítsali iwa amo ononmijtotijkeh; otomechintlakuikilijkeh tlakuikalteh teyolkokojkeh iwa amo ononchokakeh.” ³³ Owala n Juan Bautista, ye amo okikuaya paj nion okoniaya vino, iwa nomejwah nonkijtoah kipia se amokuali espíritu. ³⁴ Satepa oniwala Ne Non onimochi ni tlakatl, iwa Ne nitlakua iwa nikoni, iwa nomejwah nonkijtoah Ne niápiístli iwa tlawel nikoni, nimowikatinemi iwan tlajtlakolchijkeh iwan tominoolojkeh. ³⁵ Pero akin de milajka kajsikamati tlan Dios kimonekiltia, kinextia itech tlan kichiwa.

Se siwatl kixawilia ajwiálistli n Jesús icha n Simón n fariseo

³⁶ Se fariseo, non itoka Simón, okontlalwi n Jesús matlakuati icha. Jesús oyá icha iwa omoyayanti inakastla n mesa. ³⁷ Ijkuakó se siwatl tlajtlakolchi itech non altepetl, okima Jesús otlakuajtoka iwan fariseo. Okalakito ika se itekontsi tentika ika ajwiálistli.

³⁸ Chokati, omotlali ikxítla n Jesús iwa ika ixayo opé kinsiawilia ikxiwah. Otlanki ika itsonkal okinwajwachili ikxiwah. Okintennamik iwa okinxajxawili n ajwiálistli. ³⁹ Ijkuak n fariseo non okitlalwi n Jesús okitak tlan okitoktijtoka non siwatl, okimoli: “Tla nin tlakatl yetoskia n profeta, kimatiskia aki nin siwatl non kixitelkojtok, porke nin siwatl, ye tlajtlakolchi.” ⁴⁰ Ijkuakó Jesús okili n fariseo:

—Simón, nikneki nimitsilis itla.

N Simón okinankili:

—Kuali ka, Tlamachti, techili.

⁴¹ Jesús okili:

—Se tlakatl non okitetlanetiaya tomi, okintlaneti tomi ome tlakah. Se okiwikiliaya mákuili siento denariojtomi, iwa n ok se san tlajko siento denariojtomi. ⁴² Iwa kemi amo oweletiah okikopiliayah itomi, san ken omeh okintlapojpolwili tlan okiwikiliayah. Axa monewia techili, ¿katlie de ninteh ome okachi okitlasojtlak?

⁴³ Simón okinankili:

—Ne nikijtoa, akin okachi miak okitlapojpolwili.

Jesús okili:

—Milák kemi otikyejyekoli.

⁴⁴ Otlanki Jesús okonitak n siwatl, iwa okili n Simón:

—¿Tikita nin siwatl? Onikalak mocha, iwa amo otechmák atl para nokxiwah. Pero nin siwatl, ika ixayo onechixipajpak iwa ika itsonkal onechinwajwachili. ⁴⁵ Te amo otechixtennamik, pero nin siwatl desde onikalakiko opé nechixitennamiki. ⁴⁶ Te amo otechkuaxawili aseite. Pero nin siwatl onechxawili ajwiak pajtl ipan nokxiwah. ⁴⁷ Yika nimitsilia, nochte itlajtlakolwah ya tlapojpolwitokeh ken miak oteblasojtlak. Pero akin san achitsi kitlapojpolwiah san achitsi tetlasojtla.

⁴⁸ Otlanki Jesús okili n siwatl:

—Motlajtlakolwah ya tlapojpolwitokeh.

⁴⁹ Iwa n tlatlálwilteh non otlakuajtokah iwa Jesús, opé moichtakatlapowiah:

—¿Akin nin tlakatl, non kintlapojpolwia tlajtlakolejkeh?

⁵⁰ Jesús okili n siwatl:

—Motlaneltokalis yomitsmakixti, xiajti ika yolsekwlitli.

8

N siwameh non okipalewiyah n Jesús

¹ Okachi satepa, Jesús otlamachtijitjinemia itech miakeh altepemeh. Ye okintlapowijtinemia de n kualitlájto de Dios. N májtlakteh iwa ome tlatematiltijkeh iwa oyayah. ² Noiwa oyayah iwan Jesús sikimeh siwameh non Ye okimpajtika de miak kokólisteh iwa de espíritus amokualteh. Inwah oyaya n María de Magdala, akin Jesús okinkixtilijka chikome espíritus amokualteh. ³ Noiwa ompa oyaya n Juana, isiwa n Chuza, akin okitaya nochi tlan okipiaya n Herodes, iwa n Susana, iwa n oksikimeh siwameh non okipalewiyah n Jesús ika tlan okipiayah.

Se tlakatl non otook

(Mt. 13:1-9; Mr. 4:1-9)

⁴ Miakeh tlakah owalkiskeh de inmaltépeu okitatos n Jesús; iwa ijkuak omoolojkeh, Jesús okintlapowi ika tlapoálisteh, iwa okinmili:

⁵ —Se tlakatl otookato, iwa ijkuak okitepejtoka xínachtli, siki owetski inakastla n ojtli, akimeh ik ompa opanoayah okitlajtlaksakeh iwa n totomeh okikuajkeh. ⁶ Oksiki xínachtli owetski kan tlateyo, iwa ijkuak oixwak niman owaki ken amo okipiaya kuichawálistli. ⁷ Oksiki xínachtli owetski intsalko witsmeh, iwa n witsmeh non inwah omoskaltiyah okimijyomiktijkeh. ⁸ Pero oksiki xínachtli owetski itech kualitlali; iwa ijkuak omoskalti, kualtisi otlaki, iwa okitlakilti se sientos por se xínachtli.

Ijkuak Jesús otlanki okintlapowi, otlajto chikawak iwa okinmili:

—¡Akin de milajka kipia inakas, makajsikamati!

Jesús kinmajsikamatiltia itlamachtijkawah ika tlapoálisteh

(Mt. 13:10-17; Mr. 4:10-12)

⁹ Ijkuakó itlamachtijkawah n Jesús okitlajtlanjek tlan kijtosneki non tlapoálistli.

¹⁰ Jesús okinmili:

—Dios yonomechkawili xikajsikamatikah kenomi Ye tlanawatia. Pero non oksikimeh nikintlapowia ika tlapoálisteh. Yika, maya tlachiah, amitla kitah, iwa maya tlakakih amo kajsikamatih.

Jesús kinmajsikamatiltia n tlapoálistli de n xínachtli

(Mt. 13:18-23; Mr. 4:13-20)

¹¹ 'Ye ni tlan kijtosneki n tlapoálistli: N xínachtli kijtosneki itlajtol n Totajtsi Dios. ¹² N xínachtli non owetski inakastla n ojtli, yejwah n tlakah akimeh kikakih itlajtol Dios, pero wits n diablo iwa kinyolkixtilia para amo makineltokakah iwa Dios amo makinmakixti. ¹³ N xínachtli non owetski kan tlateyo, yejwah akimeh kiseliah ika pakilistli itlajtol Dios, pero ken amo nelwayojkeh, san kech tonati tlaneltokah inawak Dios, pero ijkuak kinyejyekoa n diablo, mosotlawah iwa kikawah Dios. ¹⁴ N xínachtli non owetski intsalko witsmeh, kijtosneki akimeh kikakih itlajtol Dios, pero amo kimokawiliah makin yakana, yej okachi kintekipachoa inteki. Kinekih kitlawelpiaskeh tomi iwa satlawel kinekih mopaktiskeh, yika itech tlan kichiwah ayik kitenextiah itlasojtlalis Dios. ¹⁵ Pero n xínachtli non owetski

itech kuali tlali, yejwah akimeh ika kuali inyolo kikakih n kualitlajtoli iwa kitlakitah, kimokawiliah makin yakana Dios iwa ijko weletih kitenextiah itlasojtlalis.

N tlapodlistli de n tlawili

(Mr. 4:21-25)

¹⁶ Amaka kimilintia se tlawili iwa tlami kitlalia itlampa se chikiwitl noso itlampa se kama, yej kontlalia tlakpak para makintlawili akimeh kalakih itech kali. ¹⁷ Yika, nochi tlan tlaatitok monextis, iwa tlan amo momati saman momatis.

¹⁸ Ijko kiné, kuali xikkajsikamatikah, akin kajsikamati kenijki Dios tlanawatia, kinex-tiliskeh okachi, iwa akin kijtoa san achitsi yokajsikama kitoktiskeh makilkawa tlan achitsi yokajsikamatka.

Imamá iwa ikniwah n Jesús

(Mt. 12:46-50; Mr. 3:31-35)

¹⁹ Ijkuako imamá iwa ikniwah n Jesús okalakitoh kan otlamachtijtoka, pero amo oweletkeh okalakeh inawak porke miakeh tokniwah ompa okatkah. ²⁰ Ijkuako aka okilito n Jesús:

—Momamá iwa mokniwah kateh kaltempa, iwa kinekih mitsitaskeh.

²¹ Pero Jesús otlanankili:

—Akimeh kikakih itlajtol Dios iwa kitlakitah, yejwah nomamá iwa nokniwah.

Jesús kitlakawaltia n ejekatl iwa n atl

(Mt. 8:23-27; Mr. 4:35-41)

²² Se tonati Jesús otlejkok itech se barka iwa itlamachtijkawah, iwa okinmili:

—Matikojchalwikah n lago.

Iwa nochteh oyajkeh, ²³ pero ijkuak okikojchalwijtokah n lago, Jesús okochki. Iwa owalajsiwetsiko se ejekatl chikaktik non okiatemitiaya n barka iwa yoapolakia. ²⁴ Ijkuako itlamachtijkawah n Jesús okiixxititoh iwa okilijkeh:

—¡Tlamachti, Tlamachti! ¡Tiapolaktokeh!

Jesús owalmóketski iwa okintlakawalti n ameméloteh iwa n ejekatl; iwa nochi san owaltlamoka. ²⁵ Satepa Jesús okinmili itlamachtijkawah:

—¿Kanin kajki nomotlaneltokalis?

Pero yejwah omotlajtlachialtijkeh, omomojtijkeh iwa omotlatlajtlaniayah:

—¿Akí nin tlakatl, porke asta ejekatl iwa n atl kitlakita?

Se tlakatl non okimpiaya miakeh espíritu amokualteh

(Mt. 8:28-34; Mr. 5:1-20)

²⁶ Yejwah okalakitoh kan tlali de Gadara, non kajki ik nepa lado n lago, iyakapa n Galilea. ²⁷ Ijkuak Jesús owaltemok de kan barka, se tlakatl de non altempetl owalmijkuani inawak. Nin tlakatl yowejka okimpiaya espíritu amokualteh. Amo omotlakentiaya nion ochanchitoka itech kali, yej san intsalko miketékochteh. ²⁸ Ijkuak nin tlakatl okitak n Jesús, omotlankuáketski iyakapa iwa opé tsajtsi:

—¿Tlan tikneki nowa, Jesús, Ikone n Totajtsi Dios non weyijkatitok? Nimitstlatlaujtia amo techtlajjowilti.

²⁹ Ijko okijto porke Jesús okinawatijtoka n amokuali espíritu makisa de ijtik non tlakatl. Miak welta n espíritu amokuali yokimoaxkatijka non tlakatl, iwa n tlakatl okimaijilpiayah iwa okikxiiijilpiayah ika kadenajteh para amo macholo, pero ye okinkojkotonaya iwa n espíritu amokuali okichololitiaya kan amaka chanti. ³⁰ Jesús okitlajtlani:

—¿Tlan timotoka?

Otlanankili:

—Miaktikeh.

Ijko okijto porke miaktikeh espíritu amokualteh okatkah ijtik. ³¹ Iwa nonteh espíritu amokualteh okitlatlaujtia n Jesús amo makintitlani miktla. ³² Ik ompa otlakuajtinemiah miakeh pitsomeh, iwa n espíritu amokualteh okitlajtlaniijkeh n Jesús makinkawili

makalakikah inmijtik; iwa Jesús okinkawili. ³³ Ijkuakó n espíritus amokualteh okikakajejkeh n tlakatl iwa okakalakitoh inmijtik n pitsomeh, iwa nochteh nonteh pitsomeh okistewakeh iwa onmokajkawatoh ijtik atl iwa omijmikeh.

³⁴ Ijkuak n tlakah non okinmokuitalawijtokah n pitsomeh okitakeh tlan otlamochi, omotlelojkeh otetlapowitoh itech altepetl iwa ik tetlala. ³⁵ Iwa miakeh tlakah oyajkeh okitatosh tlan otlamochi. Iwa ijkuak okalakitoh kan Jesús, okitakeh n tlakatl non itech okiskeh n espíritus amokualteh. Ye yoewatoka ikxitle n Jesús, yokonakijtoka itlake, porke yotlanamik, iwa nochteh omaujkeh. ³⁶ Iwa akimeh okitakeh, okintlapowijkeh oksikimeh kenijki opajtik n tlakatl non okimpiaya espíritus amokualteh. ³⁷ Ijkuakó, nochteh n tlakah de Gadara opé kitlatlaujtiah n Jesús mawia de ompa, ken satlawel omawiah. Yika Jesús oteljkok itech barka iwa oyá. ³⁸ N tlakatl non itech okiskeh n espíritus amokualteh okitlatlaujti n Jesús makiwika, pero Jesús okinawati mamokawa iwa okili:

³⁹—Ximokopa mocha, iwa xiktetlapowi nochi tlan Dios okichi mowa.
N tlakatl oyá, iwa otetlapowi nochi tlan Jesús okichi íwa.

*Ichpoch n Jairo iwa n siwatl non okitempantelko itlake n Jesús
(Mt. 9:18-26; Mr. 5:21-43)*

⁴⁰ Ijkuak Jesús omokopato, miakeh tlakah okiselijkeh ika paklistli, porke nochteh sa okichixtokah. ⁴¹ Ijkuakó oajsiko se tlayákanki de n sinagoga non itoka Jairo. Ye omotlanuáketski iyakapa n Jesús iwa okitlatlaujti mawia icha, ⁴² porke sanwel se itakotsi okipiaya iwa yomiktoka, iwa sikin okipiaya májtlaktli iwa ome xiwitl. Ijkuak Jesús yoyaya icha n Jairo, miakeh tlakah okikuitlapantokakeh iwa sa okipajpatsoayah.

⁴³ Iwa intlajkotiah n tlakah noiwa oyaya se siwatl non yokipiaya májtlaktli iwa ome xiwitl ika esmilawálistli, iwa amaka oweletia okipajtiaya. ⁴⁴ N siwatl omijkuanijtia ikuitlapa n Jesús iwa okitempantelkoli itlake, iwa san nima iesmilawalis omóketski.

⁴⁵ Ijkuakó Jesús otlájtlaniki:
—¿Akin onechtelko?

Kemi nochteh okijtoayah amo okimatiah akin okitelkojka, Pedro okijto:

—Tlamachti, nochteh n tlakah mitspajpatsojtiwitseh iwa mitstojtopejtiwitseh, iwa Te titlajtiani: “¿Akin onechtelko?”

⁴⁶ Pero Jesús okijto:

—Aka onechtelko, porke onimachili notech okiski nochikawalis.

⁴⁷ Ijkuak n siwatl okitak Jesús yokimatia akin okitelkojka, bibiokatiwits omotlanuáketsato iyakapa. Iwa inmipah nochteh n tlakah okimokuiti tleka okitlakentelko n Jesús iwa kenijki san totokatijjak owalpajtik. ⁴⁸ Ijkuakó Jesús okili n siwatl:

—Nokone, axa yotipajtik porke otitlaneltokak. Xio ika paklistli.

⁴⁹ Jesús ok otlajtojtoka ijkuak okalakiko se itlakewal n Jairo non okiliko:

—Motakotsi yomikki, ayakmó xiktekimaka n Tlamachti.

⁵⁰ Pero ijkuak Jesús okikak tlan okiliko n tlakatl, okili n Jairo:

—Amo ximawi, te xitlaneltoka, iwa motakotsi pajtis.

⁵¹ Ijkuak Jesús okalakito icha n Jairo. Amo okitekawili makalakikah oksikimeh, sanwel Pedro, Jacobo, Juan iwa itajwah n takotsi. ⁵² Nochteh omoyolkokojtokah iwa okichokilijtokah n takotsi. Pero Jesús okinmili:

—Amo xichokakah; n takotsi mach omikki, sanwel kochi.

⁵³ Pero n tetlajpalojkeh n okiwetskakeh n Jesús porke okimatokah n takotsi yomikki.

⁵⁴ Ijkuakó Jesús okimajktski n takotsi iwa okili:

—Takotsi, ximewa.

⁵⁵ N takotsi omoyoliti iwa owalme; iwa n Jesús otlanawati makitlakualtikah. ⁵⁶ Itajwah n takotsi san omotlajtlachialtikah. Pero Jesús okinnawati amaka makilikah tlan otlamochijka.

9

Jesús kintitlani itlamachtijkawah

(Mt. 10:5-15; Mr. 6:7-13)

¹Jesús okinmoololo májtlakteh iwa ome itlamachtijkawah iwa okinmák weletflistli iwa tlanawatflistli para makinkixtikah n espíritus amokualteh iwa makimpajtikah kokoxkeh. ²Satapa okintitlanki makitematiltiti itlajtol Dios, iwa makinpajtikah kokoxkeh. ³Iwa okinmili:

—Amitla xikwikakah kan ik nonyaskeh, nion nomobasto, nion nomomantajkostal, nion nomotlaxkal, nion nomotomi, sanwel se nomotlakeh. ⁴Ijkuak nonkalakitiweh itech se kali, ompa ximokalotikah asta ijkuak non kisaskeh de non altepetl. ⁵Iwa kan amo nomechseliskeh, kixisakah de ompa iwa ximoikxitsejtselokah para makinteilikah por amo onomechselijkeh.

⁶Ijkó kiné, itlamachtijkawah n Jesús otetlapowijtnemiah n kualitlájtoli itech nochteh n altepemeh, iwa okimpajtiayah kokoxkeh.

Herodes okikak tlan kichiwa Jesús

(Mt. 14:1-12; Mr. 6:14-29)

⁷N rey Herodes Antipas Primero okima nochi tlan Jesús okichiwaya; iwa amo okimatia tlan kimolis, porke sikimeh okijtoayah Juan Bautista omoyolitijka. ⁸Oksikimeh okijtoayah Elías n profeta akin oksepa yomonextiko, iwa oksikimeh okijtoayah chamo yomoyoliti se improfeta totatawah. ⁹Pero Herodes okijto:

—Ne nonewia onitlanawati makikechtsontekikah n Juan. ¿Akin yetos non tlakatl non satlawel kitenewah?

Iwa Herodes okitemoliaya kenijki kixmatis.

Jesús kintlakualtia mákuili mil tlakah

(Mt. 14:13-21; Mr. 6:30-44; Jn. 6:1-14)

¹⁰Ijkuak n májtlakteh iwa ome tlatematiltijkeh omokopatoh, okitlapowijkeh n Jesús tlan okichijkeh, iwa oyajkeh kan amaka kinkuejsoskia, amo wejka de Betsaida. ¹¹Pero ijkuak n tlakah okimatkeh kan okatka n Jesús, okajsitoh, iwa Ye okinseli iwa okintlapowi kenijki Dios tlanawatia iwa okimpajti n kokoxkeh.

¹²Ijkuak yotlejtlepuyawatoka, n májtlaktli iwa n ome tlatematiltijkeh onmopachojkeh inawak Jesús iwa okilijkeh:

—Xikintitlani n tlakah mamosewitih, mawiah itech altepemeh noso tetlala makimotemoliti n tlakah kimomajsewiskeh, porke nika amitla onka.

¹³Pero Jesús okinmili:

—Nomejwah xikintlakualtikah.

Yejwah okilijkeh:

—Sanwel tikimpiah mákuili pameh iwa ome michimeh. Axa, tla mokoati itla tlákuali, tikintlakualtiskeh.

¹⁴Ompa okatkah kemi mákuili mil tlakah. Pero Jesús okinmili itlamachtijkawah:

—Xikinmilikah mamoololokah iwa mamotlajtlalikah de tlatlajko sientio.

¹⁵Ijkó okichijkeh itlamachtijkawah, iwa nochteh omotlajtlalijkeh. ¹⁶Ijkuakó Jesús okinmónanki n mákuili pameh iwan ome michimeh. Oajkotláchixki ilwikak iwa omotlasojkama inawak Totajtsi Dios, sanima okintlajtlápanki n pameh iwa okinmaktili itlamachtijkawah makinxejxelilikah nochteh n tlakah. ¹⁷Nochteh otlakujkeh iwa kuali oixwikeh. Satapa itlamachtijkawah okoolojkeh n paj tlatlapánali tlan omoka, iwa okintemitijkeh májtlaktli iwa ome chikimeh.

Pedro kijtoa Jesús Ye n Cristo

(Mt. 16:13-19; Mr. 8:27-29)

¹⁸Se tonati ijkuak Jesús omotiotsajtsilijtoka iselti, itlamachtijkawah okalakito kan Ye. Jesús okintlajtlani:

—¿Akin Ne? ¿Tlan kimoliah n tlakah?

¹⁹Yejwah okinankilijkeh:

—Sikimeh kijtoah Tejwatsi ti Juan Bautista, oksikimeh kijtoah Tejwatsi ti Elías, iwa oksikimeh kijtoah Tejwatsi tiprofeta non ya wejkawitl omikki iwa axa omoyoliti.

²⁰ Ijkuakó, Jesús okintlajtlani:

—Iwa nomejwah, ¿tlan nonkimoliah?

Pedro okili:

—Tejwatsi Ti Cristo Akin Dios okwaltítlanki.

²¹ Pero Jesús okinnawati amaka makimatiltikah.

Jesús kinmilia kenomi mikkis

(Mt. 16:20-28; Mr. 8:30—9:1)

²² Jesús noiwa okinmili itlamachtijkawah:

—Ne Non onimochi ni tlakatl moneki nitlajjowis, iwa nechtlawelitaskeh n tetajmeh non tlakantokeh kan Weyi Tiopa, iwa n tiopixkeh non tlakantokeh, iwa non kitemachtiah n tlanawatílistli, nechmiktiskeh. Pero ipan eyi tonati nimoyoliti.

²³ Satepa nochteh okinmili:

—Tla aka kineki yetos notlamachtijkau, ayakmó makichiwa san tlan ye kineki, yej moneki nochipa manechtlakita, maya makitlajjowiltikah n tlakah. ²⁴ Akin kinekis kimaxixtis iyolilis kixpolos, pero akin kixpolos iyolilis por nechtematiltia, kimaxixtis. ²⁵ Porke, ¿tlan ipati tla se tlakatl kimotlanilia nochi n tlaltikpaktli pero ye moixpoloa noso yawi miktla? ²⁶ De milajka nomechilia, tla aka pinawa nonawak iwa kipinawilia notlajtol, noiwa Ne Non onimochi ni tlakatl nikmopinawilis ijkuak niwits kemi Rey, ika iweyijkachiwalis Notajtsi iwan íangelwah. ²⁷ De milajka nomechilia sikimeh non nika kateh amo mikiskeh tlamo achto kitaskeh Dios matlanawati.

Ixko Jesús otsótlanki

(Mt. 17:1-8; Mr. 9:2-8)

²⁸ Kemi chikweyi tonati satepa, Jesús oyá kan se tepetl omotiotsajtsililo iwa okiwik n Pedro, Jacobo iwa n Juan. ²⁹ Iwa ijkuak Jesús omotiotsajtsilijtoka, okipatlak ixko iwa itlakeh oistaktiak iwa otsotlania. ³⁰ Ijkuakó owalmonextijkeh ome tlakah non omotlapowijtokah iwan Jesús. Yejwah okatkah Moisés iwa Elías. ³¹ Iwa okinyawalojtoka se tlawilnextílistli, iwa okiliayah n Jesús kenijki kimiktiskiah kan altepetl de Jerusalén. ³² Pedro iwan oksikimeh satlawel okochmikiah, pero ijkuak owaltlajtlachixkeh, okitakeh iweyijkachiwalis Jesús iwan ome tlakah non okatkah íwa. ³³ Ijkuak nekateh tlakah yokikakajtewayah n Jesús, Pedro okili:

—Tlamachti, ¡Sa kuali nika tikateh! Matikinchiychiwakah eyi akákalteh, se moaxka, se iaxka Moisés iwa ok se iaxka Elías.

Pedro mach okimatia tlan okijtoaya. ³⁴ Ijkuak Pedro ok otlajtojtoka, se mextli owaltemok iwa okinkemelo, iwa satlawel omomojtijkeh. ³⁵ Ijkuakó itech mextli owalmokak se tlájtoli non okijtoaya:

—Ye ni Nokone non saikpanoa niktlasojtla: xikkakikah tlan Ye nomechilis.

³⁶ Ijkuak n tlájtoli san owalmoka, okitakeh n Jesús sa iselti. Yejwah san otlamatokah, iwa amaka okilijkeh tlan okitakeh asta satepa.

Jesús kipajtia se télpochtli non okipiaya se espíritu amokuali

(Mt. 17:14-21; Mr. 9:14-29)

³⁷ Ijkuak owalmostlatik Jesús iwa itlamachtijkawah otemokeh de kan tepetl, iwa miakeh tlakah okinamikitoh n Jesús. ³⁸ Ijkuakó se tlakatl non owalaya intlajko n tlakah, okualtsajtsili n Jesús:

—Tlamachti, nimitstlatlaujtia xikonitaki nopiltsi, porke sanwel ye nikpia. ³⁹ Se espíritu amokuali kimoaxkatia iwa kitsajtsitia; kitoktia mamimiki iwa kitoktia makixixti posoktli itech ikamak. Semi kitlajjowiltia iwa owi kikajkawa. ⁴⁰ Yonikintlatlaujti motlamachtijkawah makixixtilikah n espíritu amokuali, pero mach oweletkeh.

⁴¹ Jesús okijto:

—¡Satlawel amo nonteneltokakeh iwa nontlajtlakolchijkeh! ¿Asta kemia moneki maniyeto nomowah iwa manomechxikojo? Techalikili nika mopiltsi.

⁴² Pero ijkuak n telpochtli yomijkuanijtiaya inawak Jesús, n espíritu amokuali okitlal-witek iwa opé kitsejtseloa. Ijkuakó n Jesús okitlawelajwak n espíritu amokuali, okipajti n telpochtli iwa okimaktili ita. ⁴³ Iwa nochteh omotlajtlachialtijkeh ika iweletilis n Totajtsi Dios.

Oksepa Jesús kinmilia kenomi mikkis
(Mt. 17:22-23; Mr. 9:30-32)

Ijkuak nochteh omosentlajtlachialtijtokah, Jesús okinmili itlamachtijkawah:

⁴⁴ —Kuali xikkakikah tlan nomechilis: Ne Non onimochi ni tlakatl nechtemakaskeh inmak n tlaltikpaktlakah.

⁴⁵ Pero itlamachtijkawah mach okajsikamatiah tlan okimiliaya porke ayamó owalajsia n tonati para makajsikamatikah, iwa omawiah kitlajtlaniskeh tlan kijtosneki tlan okimilijka.

Jesús kinmilia akin okachi weyijkatitok kan Dios tlanawatijtok
(Mt. 18:1-5; Mr. 9:33-37)

⁴⁶ Ijkuakó itlamachtijkawah n Jesús opé motlatlajtolkopah, okinekih kimatiskeh akin okachi weyijkatitok, ⁴⁷ pero Jesús yokimatia tlan omokuatlapowijtokah itlamachtijkawah. Ijkuakó okimonapalolti se chokotsi iwa okontlali inakastla ⁴⁸ iwa okinmili:

—Akin kiselia se chokotsi itech Notoka, Ne nechselia, iwa akin Ne nechselia, noiwa kiselia akin onechaltitlanki. Porke akin amitla ipati nomonawak, ye akin okachi weyixtos.

Akin kajki towah amo techixnamiki
(Mr. 9:38-40)

⁴⁹ Ijkuakó Juan okili:

—Tlamachti, otiktakeh se tlakatl akin okinkixtiaya espíritus amokualteh itech Motoka. Pero tejwah otiknawatijkeh ayakmó ijkó makichiwa, porke amo nemi towah.

⁵⁰ Pero Jesús okinmili:

—Amo xiktlakawaltikah, porke akin amo techixnamiki, kajki towah.

Jesús kinmajwa n Jacobo iwa n Juan

⁵¹ Yowalajsia n tonati ijkuak Jesús tlejkoskia ilwikak. Omoyolchika iwa okónanki ojtli para Jerusalén. ⁵² Jesús okintlayakanalti ome itlamachtijkawah kan se altepetl de Samaria makitemoliti kan mokalotis. ⁵³ Pero n tlakah de Samaria amo okinekeh okiselijkeh, porke okimatkeh Jesús oyaya Jerusalén. ⁵⁴ Ijkuak itlamachtijkawah Jacobo iwa n Juan, okitakeh amo okinekih kinselisekeh, okilijkeh n Jesús:

—Tejwatsi, ¿tikneki matitlanawatikah mawetsi tletl de ilwikak para makimpojpolo, ijkó kemi okichi n profeta Elías?

⁵⁵ Jesús okonimitak, okinmajwak iwa okinmili:

—Nomejwah mach nonkimatih tlan espíritu nomotech kajki. ⁵⁶ Porke Ne Non onimochi ni tlakatl amo oniwala para nikipojpolos n tlaltikpaktlakah, yej oniwala para nikinmakixtis.

Akimeh okinekih kitlakitaskah n Jesús
(Mt. 8:18-22)

⁵⁷ Ijkuak oyayah itech ojtli, se tlakatl okili n Jesús:

—Noteko, nikneki nias mowa san kanik timuikas.

⁵⁸ Jesús okili:

—N ostomeh kipiah kan motlaatiskeh, iwa n totomeh kipiah intepajsol. Pero Ne Non onimochi ni tlakatl mach nikpia kan nimosewis.

⁵⁹ Jesús okili ok se tlakatl:

—Xiwiki nowa.

N tlakatl okili:

—Noteko, achto techonkawili maniktookati nota.

⁶⁰ Jesús okinankili:

—Xikinkawa akimeh ok miktokah makintookatih akimeh yomikkeh, pero te, xitetlapowi kenomi Dios tlanawatia.

⁶¹ Ijkuakó ok se tlakatl okili n Jesús:

—Noteko, ne nikneki nias mowah, pero achto techonkawili manimomakawati íwan nochanejkawah.

⁶² Pero Jesús okili:

—Akin kitlalia ima itech arado iwa ontlachia ik ikuitlapa, ye mach weletis kalakis kan tlanawatia Totajtsi Dios.

10

Jesús kintitlani eyi póali iwan májtłaktli iwa ome itlamachtijkawah

¹ Satepa Jesús okimpéjpenki eyi póali iwa n májtłaktli iwa ome (72) itlamachtijkawah, iwa ojomeh okintítłanki sa matlayakanakah itech nochteh n altepemeh kanik Ye panoskia.

² Iwa okinmili:

—Onkateh miakeh akimeh moneki makalakikah kan Totajtsi tlanawatia, pero amo miakeh akimeh kitematiltiskeh nin kualitłájtoli. Yika, xiktłajtlaniłikah Totajtsi Dios makintitlani oksikimeh tekítkehe para makitematiltiki nin kualitłájtoli.* ³ Xiwiah nomejwah, Ne nomechtitlani kemi nonmichkatsitsinteh intłajko kokoyomeh. ⁴ Amo xikwikakah nomomantajkostal nion nomotomi, nion nomokakkuah; iwa amo ximoketsakah itech ojtli san para aka nonkitłajpaloskeh. ⁵ Ijkuak nonkalakitiweh itech se kali, achto xitetłajpalokah iwa xikjtokah: “Xiyolseutokah.” ⁶ Tla ompa chantitok se kualitłakatl, nomoyolsewilis mokawas íwa. Pero tla amaka kiselia nomoyolsewilis, oksepa mokopas nomowah. ⁷ Ximokawakah itech se kali, iwa xikmomasewikah iwa xikonikah tlan nomechmakaskeh, porke akin tekiti kiselia itłaxtlawil, iwa amo san xipapanotinemikah. ⁸ Ijkuak nonkalakitiweh itech se altepetl iwa nomechseliah, xikmomajsewikah san tlan nomechmakaskeh. ⁹ Xikimpajtikah n kokoxkeh non ompa nonkinmajsitihew, iwa xikinmilikah: “Yoajsiko n tonati ijkuak Dios pewas tlanawatis.” ¹⁰ Pero tla nonkalakitiweh itech se altepetl iwa amo nomechseliah, xiwiah itech ojtli iwa xikjtokah: ¹¹ “Nochi n póktłali de nomoaltepeu non omoka itech tokakuah, tiktsejtseloah nomoyakapah para xikmatikah mach kualitlan nonkichiłtokeh. Pero kualitlan xikmatikah ya walajsi n tonati para Dios pewas tlanawatis nomonawak.” ¹² Ne nomechilia, itech neká tonati ijkuak Dios tlayektłalis, n tlakah de non altepetl kiseliskeh okachi tłaijyowílistli ke non okiselijkeh n tlakah de Sodoma.

Jesús kinnonotsa n tlakah non amo tetlakitah
(Mt. 11:20-24)

¹³ ¡Miálmasteh tlakah de n altepetl de Corazín!

¡Miálmasteh tlakah de Betsaida! Porke tla itech altepemeh de Tiro iwa Sidón mochiwaskiah n milagros non yomochijkeh nomoixpa, n tlakah de ompa yowejka kitlakitaskiah Dios. Iwa kinmokentiskiah intłakenwah tlılikeh iwa wajwapawakeh. Iwa yejwah kimotlaliliskiah tlekonextli ipan intsonteko. ¹⁴ Yika, itech neká tonati ijkuak Dios tlayektłalis, nomejwah nonkiseliskeh okachi weyi tłaijyowílistli ke non okiselijkeh n tlakah de Tiro iwa Sidón. ¹⁵ Iwa nomejwah tlakah de Capernaúm, ¿nonkiyejekoliah nomechajkokuiskeh ilwikah? ¡Amó!, yej nomechonkajkawaskeh miktla.

¹⁶ Akin nomechkaki nomejwah, Ne nechkaki, iwa akin nomechtlawelita, Ne nechtlawelita, iwa akin Ne nechtlawelita noiwa kitlawelita Akin onechalítłanki.

Walmokopah n eyi póali iwa n májtłakteh iwa ome itlamachtijkawah

¹⁷ N eyi póali iwa n májtłaktli iwa n ome itlamachtijkawah omokopatoh ika miak pakílistli iwa okijtoayah:

—Tejwatsi, asta n espíritus amokualteh techtlakitah ijkuak tiktenewah Motoka.

¹⁸ Jesús okinmili:

—Milák, Ne onikitak kenijki n diablo owetsiko de ilwikah kemi ijkuak tłapejpetłani.

¹⁹ ¡Techkakikah! Ne yonomechmák weletílistli para nonkintłajtlaksaskeh koameh iwa kolomeh, iwa nonmakisaskeh imak iweletilis n diablo, iwa mach ok itla nomechtoktis.

* 10:2 N griego kijtoa: Onka miak tlakilo, pero n tekítkehe amo miakeh. Yika, xiktłajtlaniłikah Dios makualintitlani tekítkehe matlaoolokih.

²⁰ Pero amo xipakikah porke nomechtlakitah n espíritus amokualteh, yej xipakikah porke nomotokah ya ijkuilitok ilwikak.

Jesús yolpaki

(Mt. 11:25-27; 13:16-17)

²¹ Itech non ora, n Espiritu Santo okiyolpakti n Jesús, iwa okijto:

—Notajtsi nimitsweyijkachiwa, Toteko de ilwikak iwan tlaltípkak, porke otikinmajsikamatilti akimeh amitla kimatih iwa amo akimeh kimoliah ixtlamatih. Nimotlasojkamati Notajtsi, porke Tejwatsi ijkó otikmonekilti.

²² ¹Notajtsi yonechmaktili nochi tlan onka. Amaka kimati Akin Tekone, sanwel Notajtsi. Iwa amaka kimati Akin Notajtsi, sanwel n Tekone kimati iwa akimeh Ye kinekis kinmixmatiltis.

²³ Ijkuakó Jesús okintlajtlatak itlamachtijkawah iwa okinmili:

—¡Xipakikah nomejwah porke weletih nonkitah ika nomoixtololowah tlan axa panotok!

²⁴ Ne nomechilia miakeh profetas iwa wejweyi tlanawatijkeh okinekia kitaskeh tlan nomejwah axa nonkitah, iwa mach okitakeh; okinekia kikakiskeh tlan nomejwah axa nonkikakih, iwa mach okikakeh.

N kuali tlakatl samaritano

²⁵ Ijkuakó se non kitemachtia n tlanawatílistli okinek kiyeyjekos n Jesús iwa okitlajtlani:

—Tlamachtí, ¿tlan moneki manikchiwa iwa ijkó niyolitos nochipa kan ilwikak?

²⁶ Jesús okinankili:

—¿Tlan ijkuilitok itech n tlanawatílistli? ¿Kenijki tikkajsikamati?

²⁷ N tlamachtí okinankili:

—“Xiktlasojtla Motajtsi Dios ika nochi moyolo,

ika nochi moalma,

ika nochi mochikawalis

iwa ika nochi motlalnamikilis,

iwa xiktlasojtla se tokni kemi te timotlasojtla.”

²⁸ Ijkuakó Jesús okili:

—Kuali otitlanankili. Tla ijkó tikchiwas, tiyolitos nochipa kan ilwikak.

²⁹ Pero n tlamachtí okinekia mokawas kuali teixpa, iwa oksepa okitlajtlani n Jesús:

—¿Akin nokni?

³⁰ Ijkuakó Jesús okinankili:

—Se tlakatl owaltemoaya de Jerusalén para Jericó, iwa itech ojtli okitlachtekijkeh, iwa asta itlake okixitlijkeh. Okitekilmakakeh iwa okiwijwilantewakeh.

³¹ Satepa, se tiópixki opajpanotiaya itech non ojtli, iwa ijkuak okitak n tlakatl non ompa owilantoka, san okipanawi. ³² Noiwa ik ompa opajpanotiaya se levita, iwa ijkuak okitak non owilantoka noiwa san okipanawi. ³³ Pero se tlakatl de altepétl de Samaria akin noiwa opajpanotiaya itech non ojtli, ijkuak okitak n tlakatl non owilantoka okinoma.

³⁴ Ijkuakó omijkuani inawak n kócoxki, iwa opé kipajtía ika chiawak iwa ika oktli kan okikojkakah, iwa okikekemelo ika tsótsoli. Otlanki okitlejkolti itech iburro, okiwík kan tekalotiah iwa ompa okimokuitlawi. ³⁵ Ipan ok se tonati, ijkuak n samaritano yonewaya, okinkixti ome denariojomimeh iwa okinmaktili n tekowa itech kali kan mokalotiah, iwa okili: “Xikmokuitlawi nin tlakatl, iwa tla monekis itla okachi, nimitstlaxtlawilijtejos ijkuak nimokopati.” ³⁶ Axa, techili ¿katie de ninteh eyi tlakah omochi ikni n tlakatl non okitlachtekijkeh?

³⁷ N tlamachtí okili:

—Akin oteknoma.

Jesús okili:

—Te noiwa ijkó xikchiwa.

Jesús okintlajpaloto n Marta iwa n María

³⁸ Jesús iwa itlamachtijkawah onejnenkeh okachi tlayakapa, iwa okalakitoh kan se altepetsintli. Ompa, se siwatl non itoka Marta okiseli n Jesús itech icha. ³⁹ Marta okiapiya

se iwelti non itoka María akin omotlaliko ikxitla n Jesús para kikakis itlajtol. ⁴⁰ Pero Marta okachi okitekipachoaaya iteki, omijkuani inawak Jesús iwa okili:

—Noteko, ¿amo techita nimotekimiktijtok iwa nowelti amo nechpalewia? Xikili manechpalewi.

⁴¹ Pero Jesús okinankili:

—Marta, Marta, mitstekipachoa moteki iwa timotekimiktia, ⁴² pero sanwel onka itla tlan okachi ipati. María yokipéjpenki, iwa amaka weletis kikixtilis.

11

Jesús tlamachtia kenomi se weletis motiotsajtsilis

(Mt. 6:9-15; 7:7-11)

¹ Se tonati Jesús omotiotsajtsilijtoka, iwa ijkuak otlanki omotiotsajtsili, se itlamachtijkau okili:

—Tejwatsi, techmacthi kenijki timotiotsajtsiliskeh, ijko kemi Juan Bautista okinmacthi itlamachtijkawah.

² Jesús okinmili:

—Ijkuak non motiotsajtsiliskeh, ijki xikijtokah:

Totajtsi Dios non timuistika ilwikak,

nochipa makiyekteneawah motoka.

Xiwalmuika xitlanawatiki.

Mamochiwa tlan Tejwatsi tikmonekiltia itech nin tlaltikpaktli, ijko kemi mochiwa kan ilwikak.

³ Techmaka nochi tonati tlan tikmomajsewiskeh.

⁴ Techintlapojpolwili totlajtlakolwah, ijko kemi tejwah noiwa tikintlapojpolwiah akimeh techtoktiah tlan amokuali.

Iwa amo xiktekawili matechyoltlana tlan amokuali.

⁵ Jesús noiwa okinmili:

—Matikijtokah, se de nomejwah yawi ik tlajko yuak ichan se non íwa mowika iwa kilia: “Noknitsi, techintlaneti eyi pameh, ⁶ porke se non iwa nimowika onechtlajpaloko, ye wejka wits iwa amo nikpia tlan nikmakas makimomajsewi.” ⁷ Iwa neká tlakatl waltlanankilis ijtik icha: “Amo techkuejsolo, yoniktepacho nokalte iwa ne iwa n nopilwantsitsiwah yotimotejtekakeh. Ayakmó weletis itla nimitsmakati.” ⁸ Ne nomechilia, n chane maya amo kinekiskia mewas, mewas kimakati tlan kitlajtlanilijtok. Pero amo por iwa mowika, yej para ayakmó makikochkuejsolo. ⁹ Yika, Ne nomechilia:

Xiktlajtlanilikah Dios, iwa Ye nomechmakas;

xiktemokah, iwa nonkajsiskeh;

xitlakakalatsakah, iwa nomechtlatlapoliskeh.

¹⁰ Porke akin kitlajtlani, kiselial;

iwa akin tlatemoa, tlaajsi;

iwa akin tlakakalatsa, kitlatlapoliah.

¹¹ ¿Kox onka aka de nomejwah non mamixewi makimaka ichokotsi se koatl, ijkuak ichokotsi kitlajtlanilia se michi? ¹² ¿Noso ijkuak kitlajtlanilia se téksistli, makimaka se kolotl? ¹³ Nomejwah mach nonkualteh, iwa nonkinmakah tlan kuali nomopilwah, ¿amo nonkiyejyekoliah Nomotajtsi non kajki ilwikak nomechmakas n Espiritu Santo tla nonkitlajtlaniliskeh?

Kiteiliah n Jesús iweletilis walewatok de n diablo

(Mt. 12:22-30; Mr. 3:19-27)

¹⁴ Jesús okikixtilijtoka se espíritu amokuali se tlakatl, non amo okikawiliaya matlajto, ijkuak n espíritu amokuali okiski, n tlakatl owaltlajto. Nochteh n tlakah omotlajtlachialti-jkeh ijkuak ijki okitakeh, ¹⁵ pero sikimeh okijtojkeh:

—Nin tlakatl kinkixtia n espíritus amokualteh ika iweletilis n tlayákanki demonio non itoka beelzebú.

¹⁶ Oksikimeh okinekia kiyejyekoskeh iwa okitlajtlaniliayah makinnextili se neskayotl de ilwikak. ¹⁷ Pero Jesús okimatia tlan omokuatlapowijtokah, yika okinmili:

—Nochteh n tekiwajkeh tla moxexeloah, san nima pojpoliwi; iwa ijkuak moxexeloa itech se kali, san nima moixpoloa. ¹⁸ Ijkó noiwa, tla satanáš inewia moixnamiki, iwa iespíritus amokualteh, ¿kenijki wejkawas iweletilis? Ne ijki nomechilia ken nomejwah nonkijtoah Ne nikinkixtia n espíritus amokualteh ika iweletilis n satanáš; ¹⁹ pero tla milák yaskia kemi nonkijtoah, ¿akin kinmaka weletlistli nomotlatitlanilwah para makinkixtikah n espíritus amokualteh? Yika, innewiah kixnextiah nomejwah nonkuatlapolojtokeh. ²⁰ Pero tla Ne nikinkixtia n espíritus amokualteh ika iweletilis Dios, noni kijtosneki Ye yotlanawatiko nononawak.

²¹ Ijkuak se tlakatl chikaktik kipixtok iespada iwa kimokuitlawijtok icha, nochi tlan kitlaatijtok amaka weletis kikixtilis. ²² Pero tla walkalaki ok se tlakatl okachi chikaktik ke ye iwa kitlanis, ijkuakó kikixtilis iespada non ika omopalewiaya iwa kikixtilis nochi tlan iaxka.

²³ Akin amo kajki nowa, nechixnamiki, iwa akin amo nowa tlaoololoa, tlaxixinia.

N espíritu amokuali non walmokopa

(Mt. 12:43-45)

²⁴ Ijkuak se espíritu amokuali kikajkawa se tlakatl, nemi kan amaka chanti kitemojtinemi kan mosewis. Pero ijkuak amo kajsi, kimolia: “Nimokopas nocha, kan onkiskisi.” ²⁵ Iwa ijkuak non amokuali espíritu walmokopa, kualajsi n tlakatl kemi yaskia se kali non sikin okichpankeh iwa otlaajachijkeh. ²⁶ Ijkuakó n espíritu amokuali yawi kinnotsatih chikome espíritus okachi amokualteh ke ye, iwa nocteh mochantiah ijtik non tlakatl, iwa non tlakatl mokopa okachi amokuali ke achto.

Akimeh kipiah milák yolkpaklistli

²⁷ Ijkuak Jesús otlajtojtoka, se siwatl non ik ompa okatka, okijto chikawak:

—¡Miak yolkpaklistli kipia n siwatl non omítspixki iwa omitschichiti!

²⁸ Pero Jesús okijto:

—¡Okachi kuali yolkpilisojkeh akimeh kikakih itlajtol Dios iwa kitlakitah!

Non amo kineltokah n Jesús kitlajtlaniliah se ixneskayotl

(Mt. 12:38-42; Mr. 8:12)

²⁹ N tlakah opé kiyawaloah n Jesús, iwa Ye opé kinmilia:

—N tlakah amokualteh de ninteh tonatijmeh nechtlajtlaniliah se milagro. Pero mach ok nikinmakas ok se, sanwel non yokinnextili n profeta Jonás. ³⁰ Porke ijko kemi Jonás omochi kemi se neskayotl intech n tlakah de Nínive, ijko noiwa Ne Akin onimochiwako ni tlakatl nimochiwas kemi se neskayotl para n tlakah de ninteh tonatijmeh. ³¹ Itech neká iksemi tonati ijkuak Ne nikintlajtlakoltis nocteh n tlakah, n reina de Sabá non walewatok ik tlatsintla majkokuis impah n tlakah de ninteh tonatijmeh iwa kintlajtlakoltis, porke ye wejka owalewak, okiakiko n Salomón non satlawel ixtlamati. Iwa non axa nika kajki, se Akin okachi weyijkatitok ke Salomón. ³² Noiwa n tlakah de Nínive majkokuiskeh iwa nomechtlajtlakoltiskeh. Porke n tlakah de Nínive omoyolkopkeh inawak Dios ijkuak Jonás okinmatilti itlajtol, pero axa nika kajki se Akin okachi weyijkatitok ke Jonás.

Toixtolowah intlawilis tokuerpo

(Mt. 5:15; 6:22-23)

³³ Amaka kimilintia se tláwili iwa tlami kitlaatia itlampa se kajo, yej kitlalia tlakpak para makintlawili akimeh walkalakah itech kali. ³⁴ Nomoixtolowah kemi yaskiah tláwilteh itech nomokuerpo. Tla nomoixtolowah kualteh, noiwa nochi nomokuerpo kipia tláwili, pero tla amo kualteh moixtolowah, nomokuerpo kajki itech tleyuálistli. ³⁵ Ximotlachili, amo kichiwa n tláwili non axa tikpixtok walmokopas tleyuálistli. ³⁶ Yika, tla nochi mokuero kipia tláwili, iwa amo kipia tleyuálistli, nochi weletis tikyekitas kemi ijkuak se tláwili mitstlawilia.

Jesús kinteilia non kitemachtiah n tlanawatlistli iwa n fariseos
(Mt. 23:1-36; Mr. 12:38-40; Lc. 20:45-47)

³⁷ Ijkuak Jesús otlanki otlajto, se fariseo okitlalwi matlakuati icha. Jesús oyajki icha n fariseo iwa omotlali kan mesa. ³⁸ N fariseo omotlajtlachialti ijkuak okitak Jesús mach omomajteki kemi yejwah omomajtekiayah ijkuak otlakuayah. ³⁹ Pero Toteko Jesús okili:

—Nomejwah fariseos, nonkichipawah san ixko n kaxitl iwan tlamana, pero ijtik nomoyolo nonkiwilitah nontlachtekiskeh iwa nonkichiwah tlan amo kuali. ⁴⁰ ¡Tsontewewemeh! Dios okichijchi tlan onka ik kala iwa tlan onka ik tlajitik. ⁴¹ Tla nonkinekiskeh nonyetoskeh nonchipawakeh, xikintlatliokolikah n próbesteh.

⁴² ¡Miálmasteh fariseos! Nomejwah nonkitemakah nomodiesmo de nomoyerbabuena, de nomoruda iwa de nochi tlan nonkitookah. Pero amo nonkichiwah tlan Dios kimonekiltia nion nontetlasojtlah ijko kemi Ye tlanawatia. Nochi ni moneki xikchiwakah iwa amo xikkawakah tlan kuali ya nonkichiwtitseh.

⁴³ ¡Miálmasteh nomejwah fariseos!, porke nonkiwilitah nonmotlaliskeh ijtik n sinagoga kan motlaliah non satlawel kintlakitah, iwa nonkiwilitah manomecheyektalajpalokah teixpa.

⁴⁴ ¡Miálmasteh akimeh non kitemachtiah n tlanawatlistli iwa fariseos, íxkopteh!, nomejwah kemi miketékochteh non amo motah, iwa n tlakah mach kimatih kox nomopah tlaksatokeh.

⁴⁵ Seme de non kitemachtiah n tlanawatili okili n Jesús:

—Tlamachti, ika tlan tikijtoa, noiwa tejawah techpijpinatia.

⁴⁶ Pero Jesús okijto:

—¡Miálmasteh noiwa nomejwah tlamachtijkeh de nomotlanawatill, porke nonkinmaltilih n tlakah miakeh tlanawatilteh non mach kinxikoah, iwa nomejwah nion ika se nomomajpil nonkinekih nonkintelkoskeh.

⁴⁷ ¡Nonmiálmasteh!, porke nonkinyekchijchiwiliah inmiketekochwah n profetas, pero san innewiah nomotatawah okinmiktijkeh. ⁴⁸ Yika, ijkuak nonkinyekchijchiwiliah intekochwah nonkiteajsikamatiltiah nomejwah nonkiyekitah tlan okichijkeh nomotatawah, porke yejawah okinmiktijkeh n profetas.

⁴⁹ Yika, Dios kemi nochi kimati okijto: “Nikintitlanilis profetas iwa tlatematiltijkeh, iwa sikimeh de yejawah kinmiktiskeh iwa oksikimeh kintotojtokaskeh.” ⁵⁰ Porke n tlakah de ninteh tonatijmeh impah wetsis n tlajtlákoli de inmikilis nochteh n profetas non okinmiktijkeh desde ipewayá n tlaltlákpatli, ⁵¹ desde imikilis n Abel asta imikilis n Zacarías, akin okimiktijkeh ijtik n Weyi Tiopa, iyakapa n artal. Yika nomechilia Dios kintlaxtlawaltis desde imikilis Abel asta Zacarías.

⁵² ¡Miálmasteh de nomejwah tlamachtijkeh akimeh nonkixmatih nomotlanawatill! Porke amo nonkinkawiliah n tlakah makajsikamatikah tlan Dios technawatia, nion nomejwah mach nonkinekih nonkajsikamatiskéh. Nion amo nonkinkawiliah oksikimeh makajsikamatikah.

⁵³ Ijkuak Jesús okinmili ninteh tlájtoltel, non kitemachtiah n tlanawatlistli iwa n fariseos opé kualanih iwa san tlan okajsiah opé kitlatlajtlaniah. ⁵⁴ Yejawah san okiyejekoayah porke okinekiah makijto itla tlan ika weletis kiteiliskeh.

12

Jesús kinmilia itlamachtijkawah mamotlachilikah de n fariseos íxkopteh

¹ Se tonati opé moololoah miaktikeh tlakah asta omopajpatsoayah, iwa Jesús opé kinmilia itlamachtijkawah:

—Ximotlachilikah de n fariseos íxkopteh. ² Porke nochi tlan nonkiichtakachiwaskeh momatis, iwa tla non kimoliah amaka kimatis, saman momatis. ³ Yika, nochi tlan ononkijtojkeh kan tleyua, momatis kan tlanestok, iwa nochi tlan ononkijtojkeh san ichtaka, saman momatis.

Akin moneki tikiimakajsiskesh

(Mt. 10:28-31)

⁴ 'Nokniwah non satlawel nomechtlasojtla, amo xikinmawilikah akimeh weletis nomechmiktiskesh. Pero satepa ayakmitla weletis nomechtoktiskesh. ⁵ Ne nomechilis akin moneki tikiimakajsiskesh: xikiimakajsikah n Totajtsi Dios Akin satepa de kimiktia n kuerpo noiwa kipia weletiflistli para kititlanis miktla. Ye xikiimakajsikah.

⁶ 'Monamakah mákuili tototsitsinteh san ika ome tomi. Pero maya ijkó, n Totajtsi Dios amo kinmilkawa nion seme de yejwah. ⁷ Iwa Dios kimatok kech tsónkali nonkipixtokeh itech nomotsontekoh. Yika amo ximawikah, porke nomejwah okachi miak nomopati ke n tototsitsinteh.

Akimeh amo pinawah tetlapowiskesh teixpa de itlajtol Cristo Jesús

(Mt. 10:32-33; 12:32; 10:19-20)

⁸ 'Ne nomechilia, akin teixpa kijtoa nechixmati, Ne noiwa nikijtos inmixpah iangelwah Dios ye noaxka. ⁹ Pero tla aka kijtos inmixpah n tlakah amo nechixmati, Ne noiwa nikijtos inmixpah iangelwah Dios amo nikixmati.

¹⁰ 'Iwa akin fiero tlajtos de Ne Non onimochi ni tlakatl, weletis kitlapojpolwiskeh. Pero akin fiero kitenewa n Espíritu Santo, mach kipias tlapojpolwlistli.

¹¹ 'Ijkuak nomechwikaskeh kan sinagogas, noso innawak tekiwajkeh noso innawak wejweyi tlanawatijkeh, amo manomechtekipacho tlan ika non mopalewiskeh noso kenomi non tlanankiliskesh. ¹² Porke ijkuak monekis xitlajtokah, n Espíritu Santo nomechilis tlan nonkijtoskeh.

Amo matechixkajkayawa n tomi

¹³ Se tlakatl non ompa okatka okili n Jesús:

—Tlamachtli, xikili nokni makixexelo tlan otechkajteiwili tota.

¹⁴ Jesús okili:

—Tlakatl, ¿akin onechtlatli kemi teyektlali noso tlaxejxelo nomonawak?

¹⁵ Noiwa okinmili:

—¡Kuali ximotlachilikah! Amo xikmokawilikah manomechyoltlana n tomi, porke n tlakatl amo kipia nemfistli san por kipia miak tomi.

¹⁶ Ijkuakó opé kinmilia nin tlapoálistli:

—Okatka se tlakatl non satlawel okipiaya tomi, iwa itlalwah saikpanoa otlatlakia.

¹⁷ Ijkuakó n tlakatl opé mokuatlapowia: “¿Tlan nikchiwas? ¡Amo nikpia kan niktlaatis tlan okitlakiltijkeh notlalwah!” ¹⁸ Iwa okimoli: “Ya nikmatok tlan nikchiwas. Nikinixixinis kan oniktlatiaya notliol iwa tlan noaxka, iwa nikinchiwas oksikimeh okachi wejweyi. Ompa niktlaatis nochi tlan okitlakiltijkeh notlalwah iwa nochi tlan nikpia. ¹⁹ Iwa nikilis noyolo: Noyolojtsi, ya tikpia miak tlan ika tipanotos miak xiwitl. Axa, sa ximosewi, xitlakua, xikoni, iwa xipaki.” ²⁰ Pero Dios okili: “¡Tlakatl, tsontewewel! Nin yúali timikkis, iwa nochi tlan tiktlaatijtok ¿akin kimokawis?” ²¹ Ijkó mochiwah n tlakah non kooloah miak tomi itech nin tlaltikpaktli. Pero amitla kipiah ixpa n Dios.

Dios kinmokuilawia iaxkawah

(Mt. 6:25-34)

²² Satepa Jesús okinmili itlamachtijkawah:

—Yika, Ne nomechilia: Amo manomechtekipacho tlan nonkimomajsewiskeh noso tlan ika nonyolitoskeh, nion tlan nonkimokentiskesh. ²³ Nomonemilis inawak Totajtsi Dios okachi ipati ke n tlákuali, iwa nomokuervo okachi ipati ke n tlakemitl. ²⁴ San xikinmitakah n kakalomeh, amo tookah nion pixkah, nion amo kipiah kan kitlaatiskeh intlakual; iwa maya ijkó, Dios kintlakualtia. ¿Amo okachi nomopati nomejwah ke n totomeh? ²⁵ ¿Tla aka de nomejwah satlawel motekipachoa, yolitos ok se tonati? ²⁶ Tla nomejwah amo nonweletih nonkichiwah tlan amo owi, ¿tleka nomechtekipachoa oksiki tlan mach weletis nonkichiwaskeh?

* 12:25 sikimeh tiotlajkuilolteh kipiah: ¿Akin de nomejwah okachi mowejkapantia san por miak motekipachoa?

²⁷ Xikimitakah kenijki moskaltiah n lirioteh. Amo tekutih nion tlajtsomah, pero Ne nomechilia nion n rey Salomón ika nochi iweyilis, omotlakenti kemi seme de ninteh xochimeh. ²⁸ Iwa tla Dios kitlakentia n xiwitl, non axa moskaltia tetlala iwa ok se tonati kichichinoah, amo okachi nomechyektlakentis maya amo nonteneltokakeh. ²⁹ Yika, amo manomechtekipachojtinehi tlan nonkimomajsewiskeh noso tlan nonkoniskeh. ³⁰ Porke n tlaltikpaktlakah kitemojtinemih nochi ni, pero nomejwah nonkipiah Nomotajtsi iwa Ye ya kimatok nochi tlan nomechpoloa. ³¹ Okachi kuali xiktemokah matlanawati Dios itech nomoyolo, iwa Ye nomechmakas tlan nomechpoloa.

Jesús otemachtí matiktemokah tlan milák ipati kan ilwikak
(Mt. 6:19-21)

³² Maya amo nonmiakeh amo ximawikah noichkawah, porke Nomotajtsi kimonekiltia nomechkawilis xikalakikah kan Ye tlanawatia. ³³ Xiknemakakah tlan nonkipiah, iwa xikimpalewikah akimeh kimpoloa. Xikinchihiwakah púxajteh non amayik tsononih, xiktlaweloololokah kan ilwikak kan amitla kimati soliwí nion kimati tلامي, kan amo onka ichtek nion n tlalxinachi tlaixpoloa. ³⁴ Porke kan yetos tlan nomoaxka, ompa yetos nomoyolo.

Jesús technajnawatia matijsatokah

³⁵ Ximotlatlalikah sa maxotlatokah nomotlawilwah. ³⁶ Xiyetokah kemi itekitwah se tlakatl non oyá kan monamiktilo iwa sa mochixtokeh para kitlatlapoliskeh iteko ijkuak waltlakakalatsa. ³⁷ Miak pakílistli kipiaskah n tekitkeh ijkuak kualinmajsi inteko kichijtokeh tlan okinnawatijewak. Ne nomechilia inewia n tekowa pewas kintlateekilis mamotlamajsewikah. ³⁸ Maya mawalkalakiki n tekowa tlajko yuak, noso sa kualka, miak yolpakílistli kipiaskah nonteh tekitkeh tla inteko kualinmajsi ijsatokah. ³⁹ Noiwa kuali xikmatikah, tla se chane kimatoskia kemia kalakiki n tlachteh, ye ijsatoskia interoyuáli iwa amo kitekawiliskia makitlachtekikah. ⁴⁰ Nomejwah noiwa xijsatokah, porke mach nonkimatih kemia niwalkalakiki Ne Non onimochi ni tlakatl.

N tetlakéwale tetlakitak iwa non amo tetlakitak
(Mt. 24:45-51)

⁴¹ Ijkuakó Pedro okili:

—Noteko, ¿nin tlapoálistli otechkakiti san tejwah, noso tinochteh?

⁴² N Toteko okinankili:

—¿Kanin ka n tetlakéwale yekmilajka iwa tetlakitak, non iteko kinmaktilia itlakawah para makintlamaka ipan ora? ⁴³ Satlawel yolpakiliso n tetlakéwale akin iteko kajsiki kichijtok tlan okinawatijewak. ⁴⁴ De milajka nomechilia, n tekowa kimaktilis makimokuitlawili nochi tlan iaxka. ⁴⁵ Pero tla non tetlakéwale kijejyekolia iteko ok wejkawas kalakiki, iwa pewa kinwiteki n tekitkeh iwa pewa motlakualtia iwa motlawantia. ⁴⁶ Ijkuakó n tekowa walkalakiki ijkuak itékitki amo kichia, iwa chikawak kitlajjowiltis kemi kintlajjowiltiah non amo tetlakitakeh.

⁴⁷ N tetlakéwale non ya kimatok tlan kipaktia iteko pero amo motlatlalia nion kitlakita, saikpanoa kitsonwetikiseh. ⁴⁸ Pero n tetlakéwale non amo kimati tlan kipaktia iteko, iwa kichiwa tlan amokuali, amo miak kitlajjowiltiseh. Porke akin miak okimaktilijkeh, miak kitlajtlaniliseh. Iwa akin miak okiseli, okachi miak kitlajtlaniliseh.

N tlakah moxexeloh por Cristo
(Mt. 10:34-36)

⁴⁹ Ne oniwala onixotlaltiko tletl ipan nin tlaltikpaktli. ¡Saikpanoa niknekiskia ya maxotlato! ⁵⁰ Pero achto moneki manimokuaateki ika tlajjowiltistli iwa ¡satlawel nitomokipachojtinehi asta mamochiwa! ⁵¹ Amo xikijejyekolikah Ne onikualik yolsewiltistli itech nin tlaltikpaktli. Amó, yej Ne nomechilia n tlaltikpaktlakah mokualaniseh iwa moxexeloskeh porke Ne oniwala. ⁵² Axa ik tlayakapa itech se familia kan chantitoskeh mákuilteh, non eyi amo kinekiseh mowikaskeh iwa non ome, iwa nonteh ome amo kinekiseh mowikaskeh iwa nonteh eyi. ⁵³ N teta kixnamikis ipilti, iwa n tepilti

kixnamikis ita. N tena kixnamikis ichpoch, iwa n teichpoch kixnamikis ina. N temona kixnamikis imo, iwa n montli kixnamikis imona.

Tlan technextiliah n tonatijmeh

(Mt. 16:1-4; Mr. 8:11-13)

⁵⁴Jesús noiwa okinmili n tlakah:

—Ijkuak nomejwah nonkitah pewa tlamixtemi kan ik kalaki tonati, niman nonkijtoah kiawis, iwa milák ijko tlamochiwa. ⁵⁵Iwa ijkuak n ejekatl walewa ik tlatsintla, nomejwah nonkijtoah: “Axa kualtsi tonas”, iwa ijko tlamochiwa. ⁵⁶¡Íxkopteh! Kenomi nonweletih nonkiyejyekoliah kemania kiawis noso kemania tonas. ¿Tleka amo nonweletih nonkasikamatih tlan tlamochijtok itech ninteh tonatijmeh?

Ximotlapojpolwi iwa non mitskokolia

(Mt. 5:25-26)

⁵⁷¿Tleka nomonewiah amo nonkiyejyekoliah tlan kuali? ⁵⁸Tla aka mitsteilia por otiktokti itla amo kuali, ximoyekkawa iwa, ijkuak ayamó mitsteixpantia inawak tekiwa, tlamo n tekiwa mitstemaktis inawak n alwasil para mamitstsakua. ⁵⁹De milajka nimitsilia, amo tikisas asta kelamo tiktlaxtlawas nochi tlan mitstlajtlaniliskah.

13

Moneki se mamoyolkopa inawak Dios

¹Itech nekateh tonatijmeh, sikimeh tlakah okitakah n Jesús iwa okilijkeh Pilato okinmikti sikimeh tlakah de Galilea, iwa inmesso okinenelo ika inmesso n yolcameh non yejwah okinmiktijkeh para tlamanaskeh. ²Jesús okinmili:

—¿Nonkiyejyekoliah nomejwah nonteh tlakah de Galilea ijko omochijkeh porke okachi tlajtlakolejkeh ke n oksikimeh tlakah de Galilea? ³Ne nomechilia amó; iwa tla nomejwah amo nonmoyolpatlah, noijko nontlamitiweh. ⁴¿Noso nonkiyejyekoliah nekateh májtlaktli iwa n chikweyi tlakah non omijmikeh ijkuak impah owetsiko n wejkapa torre de Siloé, okachi tlajtlakolejkeh ke n oksikimeh non ochantitokah Jerusalén? ⁵Ne nomechilia amó, iwa tla nomejwah amo nonmoyolpatlah inawak Dios, non nochteh ijko nontlamitiweh.

N igoskuawitl non amo tlaki

⁶Ijkuakó Jesús okinmili nin tlapoálistli:

—Se tlakatl okipiaya se igoskuawitl non otooktoka itlajko iuvaskuauyo, iwa oyá okitlatemolito, pero amitla okajsik. ⁷Ijkuakó okili iuvastékkitki: “Techkaki, ika axa ya eyi xiwitl nikwattlatemolia nin igoskuawitl iwa ayik nikajsi nion se igos. Xiktsonteki, ayakmó san matlatsakuilijto.” ⁸Pero n uvastékkitki okili: “Noteko, xikkawa sa nin xiwitl; niktlalkaxanis iwa nikkojtlalotis. ⁹Chamo ijko ya tlaakis. Pero tla amo tlaaki, ijkuakó niktsontekis.”

Jesús kipajtia se siwatl itech tonati pialoni

¹⁰Se sábadó ijkuak mosewiah n judíos, Jesús otlamachtijtoka itech se sinagoga. ¹¹Noiwa ompa okatka se siwatl non yokiwikaya májtlaktli iwa n chikweyi xiwitl ika kokólistli. Se espíritu amokuali okikuilapantompocho iwa mach oweletia omomilawaya. ¹²Ijkuak Jesús okitak okínotski iwa okili:

—Siwatl, yotimákiski de mokokolis.

¹³Ijkuakó Jesús okintlali imawah ipan siwatl, iwa n siwatl san nima owalmomila iwa opé kiweyijkachiwa Dios. ¹⁴Pero n tiópixki non okachi otlayakantoka okuálanke, porke Jesús okipajti non siwatl itech sábadó, iwa okinmili non ompa okatkah:

—Onkateh chikwase tonatijmeh ijkuak weletis se tekitis; itech seme de nonteh tonatijmeh ximopajtikih, pero amo itech tonati ijkuak moneki matimosewihak.

¹⁵Ijkuakó Jesús okinankili:

—¡Íxkopteh!, ¿mach amo nonkintojtomah nomoyolkawah iwa nonkinmatlitiah malki mayeto sábadó? ¹⁶Nin siwatl non walewatok de Abraham, akin sataná okitlajiyowiltijtoka

* 13:10 sinagoga: se kali kan omooloolayah n judíojeteh nochi sábadó.

mañtlakli iwa n chikweyi xiwitl, ¿mach amo omonekia se makimakixti maya mayeto sábado?

¹⁷Ijkuak Jesús ijko okinmili, nochteh non okikokoliayah opinawakeh. Pero n oksikimeh opakiah ijkuak okitayah n wejweyi neskeyolteh non Jesús okinchiwaya.

N xinatsintli de mostaza
(Mt. 13:31-32; Mr. 4:30-32)

¹⁸Ijkuakó Jesús okijto:

—¿Tlan ika weletis nikiknitis kan Dios tlanawatia? ¹⁹Nikchiwas ika se xinatsintli de mostaza non se tlakatl okitookak kan ilawerta, satlawel omoskali iwa omotlamito se weyi kuawitl iwa n totomeh omotepajsojtijkeh itech imamayowah.

N tlapodílistli de n levadura
(Mt. 13:33)

²⁰Jesús noiwa okijto:

—¿Tlan ika weletis nikiknitis kan Dios tlanawatia? ²¹Nochi ni kemi n levadura non se siwatl kineloa ika eyi tlatamachiwali arina. Iwa n levadura kisamawaltia nochi n textli.

N ojtli pitsawak
(Mt. 7:13-14, 21-23)

²²Ijkuak Jesús oyaya itech ojtli non onkisa Jerusalén, otlamachtijtiah itech nochteh altepemeh kan ik opapanotia. ²³Iwa se tlakatl okitlajtiani:

—Toteko, ¿amo miakeh momakixtiskeh?

Jesús okinankili:

²⁴—Ximochijchikawakah xikalakikah kan ik kaltentli tsopijtik, Ne nomechilia, miakeh kinekiskeh kalakiskeh pero amo weletiskeh. ²⁵Porke ijkuak n chane mewas iwa kiwalsakuas n kaltentli, akimeh nonyetoskeh kala, nontlakakalatsaskeh iwa nonkijtoskeh: “Toteko, techtlatlapoli.” Pero Ye nomechnankilis: “Mach nikmati kan nonwalewah.” ²⁶Ijkuakó nomejwah pewas nonkijtoskeh: “Tejwah otitlakuajkeh iwa otikonikeh mowah, iwa otitemachti itech toaltepeu.” ²⁷Pero Ye nomechilis: “Mach amo yonomechili amo nikmati kan nonwalewah. Ximoachiwakah tlajtlakolchiwanih.” ²⁸Ompa nonchokaskeh iwa nomotlanwah nejnetsontoskeh ijkuak nonkitaskeh Abraham, Isaac, Jacob iwa nochteh n profetas kan Dios tlanawatijtok. Pero nomejwah nomechontlamotlaskeh kala. ²⁹Porke witseh n tlakah de ik tlatsintla iwa de ik tlakpak, kan ik kisa tonati iwa kan ik kalaki tonati, moyayantiskeh iwa motlamajsewiskeh kan Dios tlanawatijtok. ³⁰Non tonati, sikimeh non axa amitla impati, ijkuakó weyijkatitoskeh, iwa non axa weyijkatitokeh ijkuakó ayakmitla yetos impati.

Jesús kichokilia n Jerusalén
(Mt. 23:37-39)

³¹Itech non tonati owalajkeh sikimeh fariseos iwa okilijkeh n Jesús:

—Xio de nika, porke Herodes Antipas kineki mitsmiktis.

³²Pero Jesús okinnankili:

—Xiwhah iwa xikilikah non koyotl: “Xikkaki, axa iwa mostla nikinkixtis espíritus amokualteh iwa nikimpajtis kokoxkeh, iwa biktla niktlamis noteki.” ³³Pero axa, mostla iwa biktla, moneki maniksentoka noteki, porke mach weletis se profeta mamiki oksika tla amo kan weyi altepetl de Jerusalén.

³⁴¡Jerusalén, Jerusalén, mopilwah kinmiktia n profetas iwa kinmojmotlah ika tetl akimeh Dios kintitlani monawak! ¡Miak welta oniknek nikinmoololos mopilwah, kemi se siwapio kimoooloa ipiotsitsiwh itlampa ijaswah, pero mach okinekeh! ³⁵Axa nomoweyitiopa mokawas sa iselti, iwa Ne nomechilia ayakmó nonnechitaskeh oksepa asta maajsiki n tonati ijkuak nonkijtoskeh: “Matiochito Akin okwáltlanki Toteko Dios.”

¹ Itech se sábadó ijkuak mosewía n judíos, Jesús oyá otlakuaato icha n se tlanawati fariseo. Iwa n oksikimeh fariseos sa okiitinemiah tlan kichiwas. ² Iwa iyakapa n Jesús okatka se tlakatl kókoxxi non oatétenki. ³ Ijkuakó Jesús okintlajtlani n fariseos iwa non kitemachtiah n tlanawatílistli:

—¿Nomotlanawatil kitekawilia se matlapajti itech sábadó, noso amó?

⁴ Yejwah mach otlanankilijkeh. Ijkuakó Jesús okonkitski n kókoxxi, okipajti iwa okili mawia. ⁵ Otlanki Jesús okinmili n fariseos:

—Tla se nomoburrojtsi noso se nomotoro moposojwia, ¿amo nonkonkixtiah maya mayeto sábadó?

⁶ Yejwah mach ok itla oweletkeh okinankilijkeh.

N tlatlálwilteh itech se monamiktilo

⁷ Ijkuak Jesús okimitak kenomi omotlapejpeniayah para motlaliskeh okachi tlayakapa n tlatlálwilteh itech se ilwitl, Ye okinmili ninteh tlajlotleh:

⁸ —Ijkuak aka mitsontlalwis xitlatlakuaati kan se monamiktilo, amo ximotlapejpeni kan timoyayantis, porke weletis wits ok se tlatlálwili okachi weyijkatitok; ⁹ ijkuakó akin omitstlalwi weletis mitsiliki: “Xonmijkuani, nika motlalis nin notlatlalwil.” Ijkuakó te tipinawas iwa tias timotlaliti asta tlakuitlapa. ¹⁰ Yika, ijkuak mitstlalwiskeh, ximotlaliti tlakuitlapa; ijko mitsontlajpaloki akin omitstlalwi, iwa mitsilis: “Noknitsi, ximoyayantiti nepa tlayakapa.” Ijkuakó, nochteh akimeh mowah ewatoskeh, kualí tlajtoskeh de te. ¹¹ Pero akin inewia moweyilia, kipijpinawiskeh; iwa akin moiknelia, kiweyijkatlaliskeh.

¹² Jesús noiwa okili n tlakatl non okitlalwi matlakuati icha:

—Ijkuak tiilwichiwas, amo xikintlalwi akimeh inwah timowika, noso mokniwah, noso non ken tikimita, noso non kitlawelpiah tomi; porke satepa yejwah noiwa mitstlalwiskeh xitlatlakuaati, iwa ijko momakopaskeh mowah. ¹³ Ijkuak tiilwichiwas xikintlalwi n próbesteh, n matepomeh, n koxomeh iwa non amo weleti tlachiah, ¹⁴ iwa tikpias miak pakílistli. Porke yejwah mach weletis momakopaskeh mowah, pero te tikpias motlaxtlawil neká iksemi tonati ijkuak moyolitiskéh n yekmilajkameh.

Se weyi ualtlákuali

¹⁵ Ijkuak ijko okikakeh, seme non ompa otlakuajtakah iwan Jesús, okili:

—¡Miak pakílistli kipias akin tlakuas kan Dios tlanawatijtók!

¹⁶ Jesús okili:

—Se tlakatl okichi miak tlákuali iwa otlanawati matetlalwitih matlakuakih icha. ¹⁷ Iwa ijkuak ya tlakuaskiah, okinawati se tetlakéwale makimiliti n tlatlálwilteh: “Xiwal-muikakah, porke nochi yotlaiksik.” ¹⁸ Pero nochteh opé motlapojpolwiah inawak. Se okijto: “Sikin onikko se tlali, iwa nio nikonatati; nimitstlatlaujtia techontlapojpolwi.” ¹⁹ Ok se okijto: “Sikin onikinko mákuili noyuntajwah, iwa nio nikinyejyekoti, nimitstlatlaujtia techontlapojpolwi.” ²⁰ Iwa ok se okijto: “Sikin onimonamikti, iwa mach weletis nias.”

²¹ Ijkuak n tetlakéwale omokopato, okitlapowi iteko nochi tlan okilijkeh n tlatlálwilteh. Ijkuakó n tekowa tlawel okuálanki iwa okili itlakewal: “Xiajtjwetsi tiánkistli iwa itech ojme de nin atepetl, xikualinwika n próbesteh, n matepomeh, n koxomeh iwa non amo tlachiah.” ²² N tetlakéwale omokopato iwa okijto: “Noteko, yonikhi tlan otechnawati, iwa ok onka miak lojar.” ²³ Ijkuakó n tekowa okili itlakewal: “Xiajtjwetsi itech ojme, iwa nochteh non tikinnamiktias xikinchiyichikawa makalakikah nocha para matemi nocha.

²⁴ Porke de milajka nomechilia, nion se de akin achto oniktalwi matlakuaki, kimomasewis n tlákuali non ne nikmomajsewis.”

Kipia ipati tiktlakitas Cristo

²⁵ Miakeh tlakah okikuitlapantokayah n Jesús, iwa Ye omókopki iwa okinmili:

²⁶ —Tla aka wits nonawak, iwa amo nechtlasojtla okachi ke ita, ina, isiwa, ipilwah, ikniwah, iweltiwah noso ye inewia, noni mach weletis yetos notlamachtijkau. ²⁷ Iwa akin amo kinekis tlaijyowis maya makimiktikah por nechtlakita, noni mach weletis yetos notlamachtijkau. ²⁸ Tla aka de nomejwah kineki kichijchiwas se torre, ¿amo achto kiyejyekolia kox kajxilil itomi para weletis kitlamis? ²⁹ Porke tla kualtsimpewaltia iwa san

ompa kikawa ken ayakmó okajxili itomi; nochteh akimeh kitaskeh san kiwetskaskeh,³⁰ iwa kijtoskeh: “Nin tlakatl san okitsimpewalti ikal iwa mach owéletki okitlami.”³¹ Noso ijkuak se rey kintitlani isoldadojwah mamotekilmakatih iwan isoldadojwah ok se rey, ¿amo achto kiyejyekolia kox ika májtlaktli mil soldadojteh weletis motekilmakas iwa non ok se rey non okwalintitlanki sempóali mil soldadojteh?³² Iwa tla amo weleti, ijkuak n ok se rey ok wejka wits, konintitlanilia sikimeh tlatitlanilith para mamoyekkawakah.³³ Ijkó kiné, akin amo kikawa nochi tlan kiyoltilana, mach weletis yetos notlamachtijkau.

Ijkuak n istatl ayakmó tlapuyeya

(Mt. 5:13; Mr. 9:50)

³⁴ 'N istatl satlawel kuali, pero tla ayakmó tlapuyeya, ayakmó kuali. ³⁵ Ayakmó weletis motekitiltis nion itech tláli, nion para motlakojtlatotis, yej sa para motepewas. †Akin de milajka kipia inakas, makajsikamati!

15

N ichkatsi non opolika

(Mt. 18:10-14)

¹ Miakeh tominoolojkeh, non okoololoaya tomi para Roma, iwa sikimeh tlajtlakolchijkeh owalmijkuaniayah inawak Jesús iwa okikakiah,² yika n fariseos iwa non kitemachtiah n tlanawatili okipojpoayah iwa okijoayah:

—Nin tlakatl mowika iwan tlajtlakolchijkeh iwa tlakua inwah.

³ Ijkuakó Jesús okinmili nin tlapoálistli:

⁴ —¿Tla aka de nomejwah kimpixtok se sientto ichkameh iwa kipoloo se, amo kinkakajteh-wah n nawi póali iwa n káxtoli iwa n nawi (99) ichkameh tetlala iwa kontemoa n ichkatsi non opoliwik? ⁵ Iwa ijkuak konajsi, kimokechpanoltia iwa satlawel pakmiki, ⁶ iwa ijkuak onkalaki icha, kinmoolooa non iwa moiknitia iwa non ik ompa chanti iwa kinmilia: “Xipakikah nowa, porke yonikajsik n ichkatsi non onikpolojka.” ⁷ Ne nomechilia onka okachi miak paklistli kan ilwikak ijkuak se tlajtlakolchi moyolpatla, iwa amo por nawi póali iwa n káxtoli iwa n nawi kualteh n tlakah non ayakmó moneki makipatlakah inyalis.

N tomi non opolika

⁸ 'Noso tla se siwatl kipia májtlaktli platajtomi iwa kualpoloo se, ¿amo kixotlaltia se tláwili, iwa yolik kichpana n kali iwa kitejtemojti asta kan kualajsi? ⁹ Iwa ijkuak yokajsik, kinmoolooa non iwa moiknitia iwa non ik ompa chanti iwa kinmilia: “Nowa xipakikah, porke yonikajsik n platajtomi non onikpolojka.” ¹⁰ Ne nomechilia, noiwa iangelwah Dios pakmikih ijkuak se tlajtlakolchi molnamiki iwa ayakmó tlajtlakolchiwa.

N télpochtli non okawilti itomi

¹¹ Jesús noiwa okinmili:

—Se tlakatl okimpiaya ome itelpochwah,¹² iwa non tsoyotl okili ita: “Nota, xixxejxelo tlan tikpia iwa techmaka tlan techaxkatilis.” Ijkuakó n teta okixejxelo tlan okipixtoka, iwa okimák ipiltsi non tsoyotl tlan okitlajtlanili. ¹³ Kech tonati satepa, n télpochtli non tsoyotl okinamák nochi tlan okiaxkatilijkah, iwa ika non tomi wejka omopaxialoltito. Ompa okawilti itomi iwan awilsiwameh. ¹⁴ Pero ijkuak omotomintlajtlami, owala se apisotl itech neká tlali kan ye opaxialoto iwa opé kipoloo tlan kikuas. ¹⁵ Ijkuakó okitlajtlanilito tekiti se tlakatl non ochantitoka itech non altepetl, akin okinawati makinmokitlawiliti ipitsowah. ¹⁶ N télpochtli oapismikia iwa okinekia kinkualis intlakual n pitsomeh, pero amaka itla okimakaya. ¹⁷ Ijkuakó opé ijki mokuatlapowia: “¡Miakeh itlakawah nota, kipiah miak tlan kikuaskeh, iwa ne nika niapismiktok! ¹⁸ Okachi kuali nimokopas ichan nota, iwa nikilis: nota, onitlajtlakolchi inawak Dios iwa monawak. ¹⁹ Ayakmó techita kemi mokone; yej techita kemi se motlakewal.” ²⁰ Ijkuak owalmókopki icha n ita.

²¹ Iwa ok wejka owalaya, ita okonitak iwa saikpanoa okiknoma. Omotlelo okinamik-ito, okinanawajtek iwa okiixtennamik. ²¹ Ijkuakó ipiltsi okili: “Nota, onitlajtlakolchi inawak Dios iwa monawak. Ayakmó techita kemi mokone.” ²² Ijkuakó n teta okinmili itlakawah: “Totokatijjak, kixualikakah non okachi kuali tlakemitl iwa xitlakentikah;

noiwa xiktlalilikah se aniyo iwa xikkaktikah. ²³ Xikualikakah n torojkonetl non tomawak iwa xikmiktikah. ¡Matilwichiawah iwa matitlatlakuakah! ²⁴ Porke nin nopiltsi yomikka, iwa oksepa omoyoliti, yopolika, iwa axa yotikajsikeh.” Iwa opé ilwichiawah.

²⁵ Pero ipiltsi non teteachka otekititoka itlala; iwa ijkuak owalmokopaya iwa ya onajsia icha, okiak tlatsotsonah iwa mijtotiah. ²⁶ Ijkuakó okínotski se tlakéwale iwa okitlajtlani tlan okichijtokah icha. ²⁷ N tlakéwale okili: “Mokni yomokopato, iwa mopapá otlanawati makimiktikah n torojkonetl non okachi tomawak, porke mokni okalakiko ika kuali.”

²⁸ Pero n teikni non teteachka okuálanki, iwa kemi amo okinekia kalakis, ita owálkiski iwa okitlatlaujti makalaki. ²⁹ Pero n tepiltsi okili ita: “Tejwatsi kuali tikmatok nochipa nitekititok mowah iwa nimitstlakita, iwa ayik techmakatikah nion se tentsontsi, para manilwichiwa iwa non inwa nimowika. ³⁰ Pero axa kemi owala mopiltsi, non okawilito motomi iwan awilsiwameh, okachi otikmiktili n torojkonetl non sa tomaktik.” ³¹ Ijkuakó n teta okili ipiltsi: “Nokone, te nochipa tika nowa, iwa nochi tlan nikpia moaxka. ³² Pero axa kuali matilwichiawah iwa matipakikah, porke mokni omikka, iwa axa omoyoliti; opolika, pero yotikajsikeh.”

16

N tetlakéwale non amo okitlachiliaya iteko

¹ Jesús noiwa okinmili itlamachtijkawah:

—Okatka se tlakatl non satlawel okipiaya, iwa okitlali se ichantlamokuitlawi. Pero sikimeh tlakah okilitoh n tekowa ichantlamokuitlawi san okawilitjtoka tlan iaxka.

² Ijkuakó n tekowa okónnotski iwa okili: “¿Amo tikmati tlan nechtlapowiah de te? Techili kenomi titekititok, porke ayakmó tikmokuitlawis tlan noaxka.” ³ Ijkuakó n techantlamokuitlawi okimoli: “¿Axa tlan nikchivas tla noteko nechxixtilis noteki? Mach nikxikos nitekitis tetlala, iwa satlawel nipinawas nimijtlanijtinemis. ⁴ Ya nikmatok tlan nikchiwas, para manechselikah itech incha ijkuak ayakmó nikpías nin tekitl.”

⁵ Ijkuakó n techantlamokuitlawi se por se okinnotiah akimeh okiwikiliyah iteko; iwa non ocho owala okitlajtlani: “¿Kech tikuikilia noteko?” ⁶ N tlakatl okinankili: “Nikkuikilia mákuili poali barril aseite.” Ijkuakó n techantlamokuitlawi okili: “Nika machotitok tlan tiktewikilia, ximotlali iwa xikmajmantiwetsi sa tlajko sientto barril.” ⁷ San nima ok se okitlajtlani: “Iwa te, ¿kech tiktewikilia?” N tlakatl okinankili: “Se sientto tlatamachiwali de trigo.” Ijkuakó n techantlamokuitlawi okili: “Xikonana moamatsi iwa xikmajmana ok se, pero xikmomachotili san nawi póali (80) tlatamachiwali de trigo.” ⁸ Ijkuakó n tekowa omotlajtlachialti ijkuak okima tlan okichi n amokuali techantlamokuitlawi. N tlaltikpaktlakah okachi ixtlamatih itech tlan kichiwah, iwa amo akimeh tepilwah inawak Dios.

⁹ Ne nomechilia: Xiktekiltikah tlan onka itech nin tlaltikpaktili, para nonkim-palewiskeh n próbesteh iwa ijko nonkimpíaskeh akimeh nomechmoiknitiskeh, para ijkuak amitla nonkimpíaskeh, weletis nomechseliskeh ilwikak kan nochipa nonchantitoskeh.

¹⁰ Akin san achitsi kiyekmokuitlawia, noiwa weletis kiyekmokuitlawis tlan miak; iwa akin amo kiyekmokuitlawia tlan san achitsi, mach weletis kiyekmokuitlawis tlan miak. ¹¹ Yika tla amo nonkiyektekitiltiah tlan onka itech nin tlaltikpaktili, ¿kenomi nomechmaktiliskeh xikmokuitlawikah tlan de milajka ipati? ¹² Iwa tla amo nonkiyekmokuitlawiah tlan amo nomoaxka, ¿akin nomechmakas tlan nomoaxka?

¹³ Nion se tlakéwale weletis kinyektektilis ome tekowajkeh; porke se kikokolis iwa n ok se kitlasojtlas, noso sanwel se kitlakitas iwa n ok se kitlawelitas. Mach weletis nonkiyolpixtoskeh Dios tla nomechyoltilana n tomi.

¹⁴ N fariseos san okikaktokah tlan Jesús otetlapowiaya, iwa san okiwetskayah porke yejwah okiweliliyah n tomi. ¹⁵ Ijkuakó Jesús okinmili:

—Nomejwah nonmomachiliah nonkualteh n tlakah imixpah n oksikimeh, pero Dios nomechyolixmati, porke nochi tlan kiweyiliah n tlakah, Dios kitlawelita.

N tlanawátli iwa kan Dios tlanawatia

¹⁶ 'N tlanawatílistli iwa n profetas otlamiko ijkuak owala n Juan Bautista. Ijkuakó opé kitematiltia n kualitlájtolí iwa satlawel miakeh tlaltikpaktlakah mochijchikawah iwa kinekih kalakiskeh kan Dios tlanawatijtok.

¹⁷ 'Okachi amo owi pojpoliwis n ilwíkwak iwa n tlaltíkpahtli, pero tlan ijkuilitok saman mochiwas.

Jesús temachtia amo se mamosiwakajkawa

(Mt. 19:1-12; Mr. 10:1-12)

¹⁸ 'Tla se tlakatl kikajkawa isiwa iwa monamiktia iwan ok se siwatl, non tlakatl san kimomekatijtok n siwatl iwa tlajtlakolchijtok. Iwa tla se tlakatl non san iselti, monamiktia iwan se siwatl non yokikajka iokich, noiwa san kimomekatijtok iwa tlajtlakolchijtok.

Lázaro iwa n tlakatl non kitlawelpia

¹⁹ 'Okatka se tlakatl akin satlawel okipiaya, iwa omotlakentiaya ika tlakemeh patiojkeh; nochipa oilwichiwaya iwa otetlatlakualtiaya. ²⁰ Noiwa se tlakatl non satlawel probe non itoka Lázaro, nin tlakatl oajsilentoka inakayo iwa nochipa owalmotlaliaya ikaltempa n tlakatl non saikpanoa okitlawelpiaya. ²¹ Nin probe okinekia ixwis ika n tlákuali non owetsia de kan imesa non tlakatl; iwa n chichimeh okualpajpaliliayah inakayo kan oajsilentoka. ²² Se tonati n Lázaro omikki, iwa iangelwah n Dios okiwikakeh inawak Abraham. Noiwa n tlakatl non okipiaya tomi omikki, iwa okitookakeh. ²³ Ijkuak n tlakatl non okipiaya tomi otlaiyyowijtoka miktla, oajkotláchixki iwa okitak Abraham iwa n Lázaro inakastla. ²⁴ Ijkuakó opé kitsajtsilia: "Nota Abraham, techiknomati, iwa xiknawati n Lázaro makisiawa se imajpil iwa makiseseyaliki nonenepil, porke saikpanoa nitlajiyowijtok itech nin tletl." ²⁵ Pero Abraham okili: "Nokone, xikilnamiki te yotimopaakti ijkuak otinemia itech tlaltíkpahtli, iwa n Lázaro amo okipiaya nion tleno. Yika axa ye nika yolpaktok, iwa te axa titlajiyowijtok. ²⁶ Noiwa xikmati techxelojtok se weyi barranka, yika non nika kateh mach weletis yaskeh ompa, iwa non ompa kateh mach weletis witseh nika." ²⁷ Ijkuakó n tlakatl non okitlawelpiaya tomi okijto: "Nota Abraham, nimitstlatlajtia xiktitlani n Lázaro mawia ichan nota, ²⁸ porke nikimpia mákuilteh nokniwah iwa nikneki makintlapowiti, para ijko yejwah amo mawikih itech nin lojar tetlajiyowilti." ²⁹ Pero Abraham okili: "Yejwah kipixtokeh itlajkuilol Moisés iwa intlajkuilolwah n profetas; ¡makintlakitakah!" ³⁰ Pero n tlakatl non okipiaya tomi okinankili: "Milák, tata Abraham, pero tla kintlapowiti se non yomikki, moyolpatlaskeh inawak Dios." ³¹ Pero Abraham oksepa okili: "Tla amo kinekih kitlakitaskah itlajkuilol Moisés nion intlajkuilol n profetas, noiwa mach kineltokaskeh maya mamoyoliti se miketl."

17

Ximotlachilikah amo kichiwa nontlajtlakolchivaskeh

(Mt. 18:6-7, 21-22; Mr. 9:42)

¹ Satepa Jesús okinmili itlamachtijkawah:

—Nochipa yetos tlan kintlajtlakolchiwaltis n tlakah. Pero ¡probe n tlakatl non kichiwas aka matlajtlakolchiwa! ² Okachi kuali makikechilpililikah se weyi tetl, iwa makontlamotlakah ijtik n weyi atl, para amo makitlajtlakolchiwalti seme de ninteh pípilteh. ³ ¡Yika, ximotlachilikah!

'Tla mokni mitstoktia itla amokuali, xiknonotsa; tla mitskaki iwa molnamiki, xiktlapopolwi. 'Iwa tla mitstoktia itla amokuali chikome welta itech se tonati, iwa mitstlajtlanilia xiktlapopolwi chikome welta itech se tonati, xiktlapopolwi.

Xikmiakili totlaneltokalis

⁵ Ijkuakó itlamachtijkawah okilijkeh n Jesús:

—Xikmiakili totlaneltokalis.

⁶ N Toteko okinmili:

—Tla nonkipiaskiah tlaneltokálistli, maya san kemi se xinatsintli de mostaza, weletis nonkiliskiah nin tlatoókali: "Ximowiwitla de nika iwa ximomanati itech weyi atl", iwa non tlatoókali nomechtlakitaskia.

N tlakéwale iwa iteko

⁷Tla aka de nomejwah kipia se itlakewal non okitekitalito itlala noso otlajpiato, mach nonkiliah: “Ximotlali iwa ximotlamajsewi.” ⁸Amó, yej nonkiliah: “Techtlalili tlan nikkuas, iwa ijkuak nitlamis nitlakuas iwa nikonis ijkuakó te titlakuas iwa tikonis.” ⁹¡N tekowa mach motlasojkamati inawak itlakewal, por okichi tlan okinawati makichiwa! ¹⁰Ijkó noiwa nomejwah, ijkuak tlamis nonkichiwaskeh tlan Dios nomechnawatia, xikiytokah: “Tejwah mach itla topatih, porke sanwel otikchijkeh tlan omonekia tikchiwaskeh.”

Jesús kimpajtia májtlakteh leprosos

¹¹Ijkuak Jesús oyaya Jerusalén, opajpanotia kan tlalmeh de Samaria iwa Galilea. ¹²Ijkuak ya onkalakia itech se altepetl, okinamikikoh májtlakteh tlakah non okipiaya lepra, pero san wejka omoketskeh ¹³iwa oksajtsilijkeh:

—¡Jesús! ¡Tlamachti! ¡Techiknomati!

¹⁴Ijkuak Jesús okimitak, okinmili:

—Ximoteitititih innawak tiopixkeh.

Ijkuak oyayah itech ojtli, owalpjatikeh. ¹⁵Ijkuakó seme de yejwah ijkuak okitak yopajtik, owalmókopki iwa okiweyijkachiwaya Dios ika chikawak itlajtol, ¹⁶iwa omixtlapacho ikxitla n Jesús, iwa okitlasojkama nin tlakatl samaritano. ¹⁷Ijkuakó Jesús okitlajtlani:

—¿Amo non májtlakteh akimeh onompajtikeh? ¿Kanin kateh n oksikimeh chiknawi?

¹⁸¿Sanwel nin tlakatl non amo israelita owalmókopki okiweyijkachiwako Dios?

¹⁹Ijkuakó Jesús okili n tlakatl:

—Ximoketsa iwa xio, motlaneltokalis omitspajti.

Ijkí kalakiki itlanawatil Dios

(Mt. 24:23-28, 36-41)

²⁰N fariseos okitlajtlanjikeh n Jesús, kemia kalakiki itlanawatil Dios. Jesús okinnankili: —Itlanawatil Dios mach motas ijkuak wits. ²¹Amo kijtoskeh, “Nikan ka”, noso “Nepa ka”, porke itlanawatil Dios ya kajki nomonawak.

²²Ijkuakó Jesús okinmili itlamachtijkawah:

—Ajsiki n tonati ijkuak nonkinekiskeh nonnechitaskeh Ne Non onimochi ni tlakatl maya san se tonati, pero amo nonnechitaskeh. ²³Iwa nomechiliskeh: “Nikan kajki”, noso “Nepa kajki.” Pero amo xiwiah, nion xikinmotokikah. ²⁴Porke ijko kemi ijkuak tlapajpetlani iwa tlawia de nin lado iwa asta kan ok se lado de ilwikak, ijko Ne Non onimochi ni tlakatl sentetl nechitaskeh itech neká iksemi tonati. ²⁵Pero achto nitlajjowis iwa nechixnamikiskeh n tlakah de ninteh tonatijmeh. ²⁶Ijkó kemi otlamochi ijkuak Noé onemia, ijko tlamochiwas ijkuak niwits Ne Non onimochi ni tlakatl. ²⁷N tlakah otlatlakuayah iwa okoniayah, omonamiktayah iwa otenajnamiktayah, asta n tonati ijkuak Noé okalak itech weyi arka iwa owalmokajka n weyi kiawitl non okimijmiktih nochteh. ²⁸Noijkó otlamochi ijkuak Lot onemia: otlatlakuayah iwa okoniayah, otlanamakayah iwa omotlakojkowayah, otookayah iwa omokajkaltayah; ²⁹pero ijkuak Lot okiski de Sodoma, owetski tletl ika asufre de ilwikak, iwa nochteh omijmikeh non ompa ochantitokah. ³⁰Ijkó tlamochiwas itech neká tonati ijkuak niwalmonextis, Ne Non onimochi ni tlakatl.

³¹Itech non tonati, akin yetos ikpak ikal, amo mawaltemo makixitiki tlan kipixtok tlajitik; iwa tla aka yetos itlala amo mawalmokopa icha. ³²Xikilnamikikah tlan omochi isia n Lot. ³³Akin kinekis kipalewis iyolilis kixpolos, pero, akin kipolos iyolilis por nechtlakita momakixtis.

³⁴Ne nomechilia, itech non yúali ome kochtoskeh san sika; se kiwikaskeh iwa n ok se mokawas. ³⁵Ome siwameh testoskeh sansikah; se kiwikaskeh iwa n ok se mokawas. ³⁶Ome tlakah tekititoskeh sansikah intlala; se kiwikaskeh iwa n ok se mokawas.

³⁷Ijkuak ijki okikakeh, okitlajtlanjikeh n Jesús:

—¿Toteko, kan tlamochiwas nochi ni?

Jesús okinmili:

—Kan yetos n miketl, ompa moololoskeh n tsojopilomh.

18

N iknosiwatl iwa n jues

¹ Jesús okinmili se tlapoálistli para kinmittis nochipa mamotiotsajtsilikah, iwa ayik mamosotlawakah. ²Iwa okinmili:

—Itech se altepetl okatka se tekiwa, non amo okiimakajsia Dios, nion okintlakitaya n tlakah. ³Itech non altepetl, noiwa ochantitoka se iknosiwatl, akin nochipa okualtlajtlani-
iaya n tekiwa makipalewi porke aka okikokoliaya iwa okitlajtoltemoliaya. ⁴Pero n tekiwa
mach okikakia tlan okiliaya n iknosiwatl, pero satepa okimoli: “Maya amo nikiimakajsi
Dios nion aka nechtekipachoa, ⁵nikpalewis nin iknosiwatl iwa ayakmó mawalajto, para
ayakmó manechkuejso, porke tla amo nikpalewis nochipa nechkuejsolojtos.”

⁶N Toteko ok okijto:

—Ye ni tlan okijto n amokuali tekiwa. ⁷Pero Ne nomechilia: ¿Amo kimpalewis
Dios akimeh Ye okimpépenki, iwa motiotsajtsiliah tlajka iwa n yuak?, noso ¿kintoktis
mamochiakah? ⁸Ne nomechilia Ye kimpalewis iwa amo wejkwaw. Pero ijkuak Ne Non
nonimochi ni tlakatl niwalmokopas, ¿kechmeh ok kipiaskheh tlaneltokálistli inawak Dios?

N fariseo iwa n tominoololo

⁹N fariseos satlawel omomachiliayah kualteh n tlakah. Yejwah okintlawelitayah
oksikimeh tlakah. Ijko kiné Jesús okinmili:

¹⁰—Ome tlakah omotiotsajtsilitoh kan Weyi Tiopa: se fariseo, iwa n ok se tominoololo.

¹¹N fariseo omoketoka iwa ijki omotiotsajtsiliaya: “Notajtsi Dios, nimitstlasojkamati porke
ne mach kemi n oksikimeh, yejwah ichtekheh, amokualteh iwa mekatánajteh, iwa ne
amo kemi nin tominoololo. ¹²Ne nochipa nimosawa ome tonati itech se samano, iwa
nimitsmaka májtlaktli de se sientto de nochi tlan niktiani.” ¹³Pero n tominoololo san wejka
omoka iwa amo omixewiaya kajkokuis itlachialis, yej omoelpanwitekiaya iwa okijtoaya:
“¡Noteko Dios, techiknomati, ne saikpanoa nitlajtlakolchiwa!” ¹⁴Ne nomechilia, nin
tominoololo omókopki icha ika itlapojpolwilis Dios, pero n fariseo amó. Porke akin inewia
moweyilia kipijpinatiskeh, iwa akin amo kimati moweyilia, okachi kitlakitaskeh.

Jesús kintiochiwa n pípilteh

(Mt. 19:13-15; Mr. 10:13-16)

¹⁵Noiwa okwalinwikiliayah n pípilteh inawak Jesús, para makintlalili imawah intech.
Pero ijkuak itlamachtijkawah ijki okitakeh, opé kimajwah akimeh okwalinwikiliayah n
pípilteh. ¹⁶Pero Jesús okinnotski itlamachtijkawah iwa okinmili:

—Xikinkawilikah n pípilteh mawikih nonawak, amo xikintsakuilikah, porke akimeh
yolyamankeh kemi n pípilteh, kalakiskah kan Dios tlanawatijtok. ¹⁷De milajka nomechilia,
akin amo kikawilis Dios matlanawati itech iyolo kemi se chokotsi kimokawilia maki-
nawatikah, non tlakatl mach kalakis kan Dios tlanawatijtok.

Se télpochtli non kitlawelpia tomi motlapowia iwan Jesús

(Mt. 19:16-30; Mr. 10:17-31)

¹⁸Se tlayákanki okitlajtlani n Jesús:

—Kuali tlamachtli, ¿tlan moneki nikchiwas para niyolitos nochipa kan ilwikak?

¹⁹Jesús okili:

—¿Tleka techilia nikuali? Sanwel onka se Akin kuali, Ye Dios. ²⁰Te tikinmixmati n
tlanawatílisteh:

“Amo ximomekati;

amo xitemikti;

amo xitlachteki;

amo xixolopijti;

xiktlakita mota iwa n mona.”

²¹N tlakatl okili:

—Ninteh tlanawatílisteh nikinchiwtiwits desde ni telpotsintli.

²²Ijkuak Jesús ijko okikak, okili n tlakatl:

—Ok mitspoloia tikchiwas itla: xiknamaka nochi tlan tikpia iwa xikinxejxelili n próbesteh, ijkó tiktlawelpias kan ilwikak; tlamis xiwiki nowa.

²³ Pero ijkuak n tlakatl ijkó okikak, satlawel omoyolkoko, porke okitlawelpiaya tomi.
²⁴ Ijkuak Jesús okitak omoyolkoko, iwa okijto:

—¡Owi kalakiskeh kan Dios tlanawatijtok akimeh kitlawelpiah tomi! ²⁵ Okachi amo owi panos se “kameyo”^{*} kan ik iixtololo se akuxa, iwa amo se non kitlawelpia tomi makalaki ilwikak.

²⁶ Yika akimeh ijkó okikakeh okijtojkeh:

—Tla ijkó, ¿akin kalakis kan Dios tlanawatijtok?

²⁷ Jesús okinmili:

—Tlan amo weletih kichiwah n tlakah, Dios weleti kichiwa.

²⁸ Ijkuakó, Pedro okili:

—Tejwah otikkakajtejkeh nochi tlan otikpiayah, iwa otivalajkeh mowah.

²⁹ Ijkuakó Jesús okinnankili:

—De milajka nomechilia, akin kikakajtewa icha, itajwah, ikniwah, isiwa, noso ipilwah, para kichiwas tlan Dios kinawatia, ³⁰ noni kiselis okachi miak itech nin tlaltípkaktli; iwa itech n tonatijmeh non sikin witseh, yolitos nochipa.

Oksepa Jesús kinmatilitia imikilis

(Mt. 20:17-19; Mr. 10:32-34)

³¹ Satepa, Jesús okinmoololo n májtlakteh iwa ome itlamachtijkawah iwa okinmili:

—Xikkakikah, axa tiawih Jerusalén, Ne Non onimochi ni tlakatl nechtoktiskeh nochi tlan okijkuioljkeh n profetas. ³² Ompa nechtemakaskeh inmak non amo judíojteh, nechpijpinawiskeh, nechwijwikaltiskeh iwa nechchijchawiskeh. ³³ Nechwitekiskeh, tlamis nechmiktiskeh. Iwa ipan eyi tonati nimoyolitis.

³⁴ Itlamachtijkawah mach itla okajsikamatkeh, nion okimatiah tlan okintlapowiaya.

Jesús kipajtia se tlakatl de Jericó non amo otlachiaya

(Mt. 20:29-34; Mr. 10:46-52)

³⁵ Ijkuak Jesús ya onajsia kan altepetl de Jericó, se tlakatl non amo otlachiaya omijtlani-jtoka inakastla n ojtli. ³⁶ Ijkuak n tlakatl non amo otlachiaya okinkak panotokeh miakeh tlakah, otlájtlanke tlan otlamochijtoka. ³⁷ Okilijkeh Jesús de Nazaret ik ompa opanotoka.

³⁸ Ijkuakó non tlakatl otsajtsik chikawak iwa okijto:

—¡Jesús, lkone n David, techiknomati!

³⁹ N tlakah non oyayah tlayakapa okajwakeh para makitsakua ikamak. Pero ye okachi chikawak otsajtsik:

—¡lkone n David, techiknomati!

⁴⁰ Ijkuakó Jesús omóketski iwa otlanawati makualikilikah n tlakatl; iwa ijkuak okualikil-ijkeh, Jesús okitlajtlani:

⁴¹ —¿Tlan tikneki manimitstokti?

N tlakatl non amo otlachiaya otlanankili:

—Noteko, nikneki nitlachias.

⁴² Jesús okili:

—¡Xitlachia! Por motlaneltokalis yotipajtik.

⁴³ San nima n tlakatl non amo otlachiaya owaltláchixki, iwa oyá iwan Jesús kiweyijkachi-jti n Totajtsi Dios. Iwa nochteh n tlakah ijkuak ijkó okitakeh, noiwa okiweyijkachijkeh Dios.

19

Jesús yawi icha n Zaqueo

¹ Jesús okalak Jericó, iwa opajpanotiaya itlajko non altepetl. ² Ompa ochantitoka se tlakatl non itoka Zaqueo ye okitlawelpiaya tomi porke okinnawatiaya n tominoolojkeh.

* 18:25 Sikimeh tlajkuilolteh kipiah n tlájtoli ‘de kameyo’ porke n michmajkeh kipiah se tomawak riata non okichijchijkeh ika itsojmio n kameyo. Nawi itlamachtijkawah Jesús achto okatkah michmajkeh iwa okitekiltiayah non riata non yejwah okitokayotijkeh ‘kameyo’.

³Ye okinekia kixmatis Jesús. Pero mach oweletia okitaya porke miakeh tlakah oyayah iwan Jesús, iwa n Zaqueo mach wejka. ⁴Ijkuakó n Zaqueo otlayákanki omotlejkoltito itech se kuawitl kan ik Jesús panoskia para weletis kitas. ⁵Ijkuak Jesús yopanotoka ik ompa, oajkotláchixki; okitak n Zaqueo iwa okili:

—Zaqueo, xitemotiwetsi, porke axa nikneki nimokalotis mocha.

⁶Ijkuakó n Zaqueo owaltemotiwetski, iwa ika miak pakfistli okiseli n Jesús. ⁷Ijkuak okitakeh, nochteh opé kipojpoah n Jesús por otlakuaato icha n se tlajtlakolchi. ⁸Ijkuakó Zaqueo omóketeki iwa okili n Toteko:

—Noteko, nikinmakas n próbesteh tlajko de nochi tlan nikpia; iwa tla aka oniktlachtekili, nikkopilis nawi welta okachi.

⁹Jesús okili:

—Axa, itech nin tonati, Dios okinmakixtiko akimeh chantitokeh itech nin kali, porke nin tlakatl noiwa walewatok de Abraham. ¹⁰Ne Non onimochi ni tlakatl oniwala onikintemoko iwa oniknimakixtiko akimeh yopolikah.

N májtlakteh tomimeh

(Mt. 25:14-30)

¹¹Ijkuak n tlakah okikaktokah tlan Jesús okinmilitoka, Ye okinmili ok se tlapoálistli, porke ya onajsia Jerusalén, iwa yejwah okiyejyekoliayah Dios san nima ya pewaskia tlanawatis ompa. ¹²Yika Jesús okinmili:

—Se tlakatl non owalewatoka itech se kuali familia oyá wejka, kan sa okichixtoka kitlaliskah inrey iwa satepa walmokopaskia. ¹³Iwa ijkuak yoonewaya, okínnotski májtlakteh itekitwah. Sejse okimaktijitia se tomi non miak ipati iwa okinmili: “Xiktekiltitjtokah nin tomi para xiktlanikah okachi asta manimokopati.” ¹⁴Pero n tlakah de ialtépeu okikokoliayah, yika, ijkuak oonewak, okintitlankeh sikimeh tlakah makijtotih: “Mach tiknekih matechnawati nin tlakatl.” ¹⁵Pero maya ijkó, non tlakatl okitlalijkeh tekiwajtlanawati. Iwa ijkuak owalmokopato iwa oajsiko kan ialtépeu, okínnotski itlakewalwah non okinmajmakatewak itomi, para kimatis kech okitlankeh sejemeh. ¹⁶Itékkiti non achto okalakiko okijto: “Noteko, motomi okitlanki májtlaktli welta ipa.” ¹⁷N rey okinankili: “Kuali tlan otikchi; te kuali titékkiti; iwa kemi otikyektekitilti tlan san achitsi onimitsmák, nimitstlalis xikinnawati májtlakteh altepemeh.” ¹⁸Non ok se noiwa okalakiko iwa okili: “Noteko, ika motomi oniktlaniki ok mákuili ipa.” ¹⁹N rey noiwa okili: “Te tiyetos gobernador iwa tikinnawatijtos mákuili altepemeh.” ²⁰Ijkuakó owala ok se iwa okijto: “Noteko, nikan kajki motomi. Ne oniktlaati ika nopañito; ²¹porke onimitsmawili, nikmatok tejwatsi tikuejsi, iwa tikmoaxkatia tlan amo moaxka, iwa tipixka kan amo titooka.” ²²Ijkuakó n rey okili: “Amo kuali tlakéwale, san ika motlajtolwah nikyeyekolia akin te. Yotikmatia nikuejsi, iwa nikmoaxkatia tlan amo noaxka, iwa nipixka kan amo nitooka. ²³¿Tleka amo otiktlaati notomi itech banko, ijkó keman niwalmokopaskia, nikeliskia notomi ika nochi ikoneyo?” ²⁴Ijkuakó n rey okinmili akimeh ompa okatkah: “Xikkixtilikah n tomi, iwa xikmaktilikah akin kipixtok májtlaktli.” ²⁵Yejwah okilijkeh: “Noteko, pero ye ya kimpixtok májtlakteh tomimeh.” ²⁶N rey otlanankili: “Ne nomechilia, akin ya kipia, kimaktiliskah okachi. Iwa akin amo kipia, kixixtiliskah asta tlan san achitsi kipia. ²⁷Iwa nekateh akimeh amo okinekeh maniyeto intlanawati, techinwalikilikah iwa xikinkechtsontekikah noyakapa.”

Jesús kalaki Jerusalén kemi Rey

(Mt. 21:1-11; Mr. 11:1-11; Jn. 12:12-19)

²⁸Ijkuak Jesús otlanki okintlapowi, oyá Jerusalén. ²⁹Ijkuak Jesús ya onkalakia kan altepemeh de Betfagé iwa Betania, itech olivostepetl, okintlayakanalti ome itlamachtijkawah, ³⁰iwa okinmili:

—Xiwiah kan altepetl non kajki tlayakapa, iwa ijkuak nonkalakitiweh, ompa nonkajsi-tiweh se burrojtsi ilpitok, non ayamaka ipan tlejkotika. Xiktojtomakah iwa techalikilikah.

³¹Iwa tla aka nomechtlajtlania tleka nonkitojtomah, xikilikah n Toteko kitekitiltis.

³²Itlamachtijkawah oyajkeh iwa okajsikah nochi kemi Jesús okinmilijka. ³³Iwa ijkuak yokitojtomah n burrojtsi, n tekowajkeh okintlajtlanjikah:

—¿Tleka nonkitojtomah n burrojtsi?

³⁴Yejwah otlanankilijkeh:

—Porke n Toteko kitekitiltis.

³⁵Iwa nima, okiwikilijkeh n Jesús non burrojtsi, okipejpechtijkeh ika inkotonwah iwa ipan okitlejkoltijkeh n Jesús. ³⁶Iwa ijkuak Jesús opanotiaya itech ojtli, n tlakah okinsoayah intlakenwah. ³⁷Iwa ijkuak ya onajsia kan pewa ixtemoa n olivostepetl, nochteh n tlakah akimeh okineltokayah opé kojtsajtsih ika pakfistli iwa okiweyijkachijkeh Dios por nochteh n milagros non yokimitakeh. ³⁸Iwa okijtoayah:

—¡Matiochito n Weyi Tlanawati Akin wits itech itoka n Toteko! ¡Mayeto yolsekwílistli, iwa Weyijkachiwálistli kan ilwikak! Sal. 118:25-26

³⁹Ijkuakó sikimeh fariseos non okatkah intlajko n tlakah, okilijkeh n Jesús:

—Tlamachti, xikintlakawalti nonteh tlakah.

⁴⁰Pero Jesús okinnankili:

—Ne nomechilia, tla yejwah kitsakuaskeh inkamak, n temeh tsajtsiskeh.

Jesús kichokilia n Jerusalén

⁴¹Ijkuak Jesús ya onkalakia Jerusalén, okonitak iwa opé kichokilia. ⁴²Iwa okijto:

—¡Tla tikkajsikamatiskia maya san itech nin tonati, tlan weletis mitsmakas yolsekwílistli! Pero mach weleti tikita nion tikkajsikamati. ⁴³Porke witseh tonatijmeh, ijkuak mokokolikniwah kichijchivaskeh se tepamitl non ika mitsyawaloskeh, sentetl mitsmojmotlaskeh ⁴⁴iwa mitspojpoloskeh. Kinmiktiskeh non motech chantitokeh, iwa amo kikawaskeh nion se tetl ipan ok se tetl, porke amo otikseli Dios, ijkuak omitstlajpaloko para mitspalewis.

Jesús kualinkixtia n tlasemankeh kan Weyi Tiopa

(Mt. 21:12-17; Mr. 11:15-19; Jn. 2:13-22)

⁴⁵Jesús okalak kan Weyi Tiopa iwa opé kinkixtia akimeh ompa otlanamakatokah iwa otlakojtokah, ⁴⁶iwa okinmili:

—Itech itlajkuilol Dios kijtoa: “Nocha, kali kan motiotsajtsiliah”, pero nomejwah yononkikopkeh se kúyoktli kan moololoah ichtekheh. Is. 56:7; Jr. 7:11

⁴⁷Nochi tonati Jesús otlamachtiaya itech Weyi Tiopa, pero n tiopixkeh non tlayakan-tokeh iwa non kitemachtiyah n tlanawatfistli, iwa n tlayakankeh israelitas, okitemolijtine-miah kenijki kimiktiskeh n Jesús. ⁴⁸Pero mach okajtsiah kenijki kichivaskeh, porke n tlakah nochipa okiwikatinemiah iwa okikakiah itemachtilis.

20

Kitlajtlaniah n Jesús akin okitekiwajtlali

(Mt. 21:23-27; Mr. 11:27-33)

¹Se tonati, ijkuak Jesús okinmachtijtoka n tlakah n kualitlájtolli kan Weyi Tiopa, owalajkeh n tiopixkeh non tlayakan-tokeh, non kitemachtiyah n tlanawatfistli iwa n tetajmeh non tlayakan-tokeh kan tiopa, ²iwa okitlajtlanjijkeh:

—Techili, ¿akin omitsnawati ijkó xikchiwa? Iwa, ¿akin omitsmák non tekiwajyotl?

³Jesús okinnankili:

—Ne noiwa nomechtlajtlanis, iwa technankilikah: ⁴¿Akin okinawati n Juan mat-lakuaateki? ¿Okinawati Dios noso n tlakah?

⁵Yejwah opé moichtakatlajtolitlah iwa okijtoayah:

—¿Tlan tikijtoskeh? Tla tikijtoskeh Dios okinawati, Ye techilis: “¿Tleka mach ononkineltokakeh?” ⁶Pero, tla tikijtoskeh n tlakah okinawatijkeh, nochteh n tlakah techmokitskiliskeh ika tetl iwa techmiktiskeh, porke yejwah kualí kimatokheh Juan iprofeta n Dios.

⁷Ijkuakó, yejwah okinankilijkeh mach okimatiah. ⁸Ijkuakó Jesús okinmili:

—Ne noiwa mach nomechilis akin onechmák nin tekiwajyotl.

N tekitkeh amokualteh

(Mt. 21:33-44; Mr. 12:1-11)

⁹Otlanki Jesús opé kintlapowia ika nin tlapoálistli:

—Se tlakatl okintookak miakeh uvaskuaujmehtlala. Satepa okinmák partido sikimeh uvastekitkeh, iwa non tekowa wejka oyá, iwa owejkawato. ¹⁰Iwa ijkuak oajsiko n tonati para motlatekis, n tekowa okitítlanki se itlakewal makitlajkoxelilikah n uvas. Pero n uvastekitkeh okitekilmakakeh itlakewal n tekowa iwa okikopkeh mapijpilkati. ¹¹Otlanki n tekowa okitítlanki ok se itlakewal. Pero n uvastekitkeh noiwa okitekilmakakeh, okiwijwikaltijkeh iwa okikopkeh noiwa mapijpilkati. ¹²Niman, n tekowa okitítlanki ok se itlakewal, pero n uvastekitkeh noiwa okikojkoykeh iwa okwalkixtijkeh.

¹³Ijkuakó n tekowa okijto: “¿Axa tlan nikchiwas? Niktitlanis nopiltsi non satlawel niktlasojtla, ijkuak kitaskeh, ye okachi kitlakitaskeh.” ¹⁴Pero ijkuak n uvastekitkeh okitakeh ipiltsi n tekowa, okijtojkeh: “Ye ni akin kiselis tlan iaxka n tekowa; matikmiktikah iwa ijko tejwah tikmokawiskeh n lawerta.” ¹⁵Ijkuakó, n uvastekitkeh okwalkixtijkeh de kan lawerta iwa okimiktijkeh.

Ijkuakó Jesús okintlajtlani:

—Axa, ¿tlan nonkiyejyekoliah kintoktis n tekowa nonteh uvastekitkeh amokualteh?

¹⁶Ye yas iwa kinmijmiktis nonteh uvastekitkeh, iwa ilawerta kinmaktilis oksikimeh.

Ijkuak yejwah ijki okikakeh, okijtojkeh:

—¡Amo Dios makimonekilti!

¹⁷Pero Jesús okintlajtlatak iwa okinmili:

—¿Tlan kijtosneki itlajkuilol Dios kan kijtoa?

N tetl non n kalchijchijkeh okontlakaltechojkeh,

omochiwako non okachi tetlaxxili.

Sal. 118:22

¹⁸Akin wetsis ipan non tetl mopopostekis.

Pero tla n tetl wetsis ipan se, kikuejkuechos.

Is. 8:14-15

Kitlajtoltiah n Jesús kox kuali se kitlaxtlawas impuestos

(Mt. 21:45-46; 22:15-22; Mr. 12:13-17)

¹⁹Ijkuak n tiopixkeh non tlayakantokeh iwa non kitemachtiah n tlanawatílistli, okajsikamatkeh n Jesús okinkakitiytoka non tlájtoli. Satlawel okualankeh iwa okinekiah kikit-skiskeh, pero mach okikitskijkeh porke okinmawiliayah n tlakah. ²⁰Ijkuakó okintitlankeh sikimeh teixkajkayajkeh inawak Jesús para makikajkakitihtlan kijtoa, iwa ijko weletis kitemaktiskeh inawak n gobernador. ²¹Yika ijki okitlajtlanjijkeh:

—Tlamachtí, tikmatokeh tlan tikijtoa iwa tlan tiktémachtia milák, iwa amo san tikpejpena motemachtilis. Tejwatsi kualitlámachtia ijko kemi Dios kimonekiltia matiyekne-mikah. ²²Techonili: ¿Kuali ka matiktlatlawakah impuestos inawak n romanojtekiwa, noso amó?

²³Pero Jesús okajsikama san okiyejyekojtokah iwa okinmili:

—¿Tleka nonnecheyekoah? ²⁴Techititakah se denariojtomi. ¿De akin ixko nikan ka?, iwa ¿akin itoka ijkuilitok?

Yejwah okinankilijkeh:

—De César.

²⁵Ijkuakó Jesús okinmili:

—Xikmakakah n César tlan iaxka n César, iwa xikmakakah Dios tlan iaxka n Dios.

²⁶Iwa n tlakah mach itla okajxilijkeh itech tlan okijtoaya non ika kiteiliskiah, yej omotlajtlachialtijkeh kenijki okinnankili, yika san owalmokakajkeh.

N saduseos kitlajtlaniah n Jesús kox oksepa moyolitiah non yomikkeh

(Mt. 22:23-33; Mr. 12:18-27)

²⁷Satepa sikimeh saduseos non amo kineltokah non yomikkeh oksepa moyolitiah, omijkuanijkeh inawak Jesús iwa okitlajtlanjijkeh:

—Tlamachtí, itech itlanawatil Moisés ijki otechtlajkuilili, tla se tlakatl non ya kipia isiwa, mikki iwa amo okimpixki ipilwah iwan isiwa, n iknosiwatl moneki mamonamikti iwan ikni non yomikki para makinmaka ipilwah ikni non yomikki. Dt. 25:5

²⁹Yowejka okatkah chikome iknimeh. Non teteachka omonamikti pero omikki iwa amo okinkajteh ipilwah. ³⁰Itsoyo non omikki omonamikti iwan iknosiwatl. Pero noiwa omikki

iwa amo okinkajtewili ipilwah. ³¹ Ijkuakó non ipan eyi iknimeh noiwa omonamikti iwa n iknosiwatl; iwa nochteh n iknimeh omonamiktijtjajkeh iwa non iknosiwatl pero nochteh omijmiktjajkeh, iwa nion seme de yejwah okimák se konetl non siwatl. ³² Sa iksemi, n siwatl noiwa omikki. ³³ Axa, ijkuak non yomikkeh moyolitiskeh, nin siwatl ꝑ de akin yetos tesiwa, tla n chikome iknimeh omonamiktjajkeh iwa non siwatl?

³⁴ Ijkuakó Jesús okinmili:

—Itech nin tlaltíkpaktli, n tlakah iwa n siwameh monamiktiah. ³⁵ Pero ijkuak moyolitiskeh non yomikkeh, akimeh Dios kinkawilis makalakitih kan ilwikak; ompa ayakmó monamiktiskeh nion kintemakaskah impilwah mamonamiktikah, ³⁶ porke ompa mach ok mikiskeh. Yetoskeh kemi ángelteh, iwa yetoskeh tepilwah de Dios porke omoyolitijkeh. ³⁷ Inewia n Moisés itech itlajkuilol de n tlátsmoli non otlatlaya, otechmatilti non yomikkeh oksepa moyolitiskeh. Ompa nestok kan Moisés kijtoa n Totajtsi, Ye Idios Abraham, Isaac, iwa Jacob. ³⁸ Porke Dios amo Dios de non yomikkeh, yej de akimeh yolitokeh, porke ixpa n Ye nochteh yolitokeh.

³⁹ Ijkuakó sikimeh non kitemachtiah n tlanawatílistli okilijkeh:

—Tlamachti, kuali tlan otikijto.

⁴⁰ Iwa ayakmó omixewijkeh okachi kitlatlajtlaniskeh.

Jesús kintlajtlania n fariseos akin Ikone n Cristo
(Mt. 22:41-46; Mr. 12:35-37)

⁴¹ Jesús okinmili:

—ꝑKenomi nonkijtoah Cristo ikone n David? ⁴² Porke n David inewia kijtoa itech salmos: N Totajtsi Dios okili n Noteko:

“Ximoyayanti noyekma,

⁴³ asta manikintlali mokokolikniwah itlampa mokxiwah.”

Sal. 110:1

⁴⁴ Tla inewia n David kilia n Cristo, Noteko; ꝑkenomi n Cristo weletis yetos ikone n David?

Jesús kinteilia non kitemachtiah n tlanawatílistli
(Mt. 23:1-36; Mr. 12:38-40; Lc. 11:37-54)

⁴⁵ Nochteh n tlakah okikaktokah ijkuak Jesús okinmili itlamachtijkawah:

⁴⁶—Ximotlachilikah de akimeh kitemachtiah n tlanawatílistli, porke kiwilitah nemiskah ika intlakeh weweyak, iwa kinekih makinyektlajpalokah ijkuak nemi tiánkistli. Iwa itech sinagogas kiwilitah motlaliskah kan motlalialih n tlayakankeh, iwa kiwilitah motlaliskah kan okachi kualteh lojarteh itech ilwimeh. ⁴⁷ Noiwa kintlakijkixtilialih n iknosiwameh, iwa para amaka makimati, satlawel motiotsajtsilialih. Ne nomechilia, ninteh kiseliskah okachi weyi tlajjyowílistli.

21

N iknosiwatl non okitemák nochi tlan okipiaya
(Mr. 12:41-44)

¹ Ijtik Weyi Tiopa, Jesús okimitak n tominyojkeh ijkuak okontlalijtokah intomi kan nochteh okitlaliaya. ² Noiwa okitak se probe iknosiwatl ijkuak okintlali ome tomintsitsinteh non amo miak impati. ³ Iwa Jesús okijto:

—De milajka nomechilia, nin probe iknosiwatl, okachi okitemák ke n oksikimeh; ⁴ porke nochteh okitemakakeh tlan ayakmó kitekitiltiah, pero nin probe iknosiwatl okitemák nochi tlan ika panotoskia.

Jesús kinmilia n Weyi Tiopa de Jerusalén kixixitiniskah
(Mt. 24:1-2; Mr. 13:1-2)

⁵ Sikimeh okimolijtokah saikpanoa kualtsitsinteh n temeh non okintekitiltijkeh ijkuak okichijhijkeh n Weyi Tiopa, iwa kenijki kualtsi otlamajmankeh itech itepanwah. Ijkuakó Jesús okijto:

⁶—Wits tonati ijkuak nochi ni tlan nomejwah nonkitlajtlatokeh kixixitiniskah, iwa amo mokawas nion se tetl ikpak ok se.

Ijkí tlamochiwas achto de tlajtlamis n tlaltípkaktli

(Mt. 24:3-28; Mr. 13:3-23)

⁷ Ijkuakó okitlajtlanjikeh n Jesús:

—Tlamachti, ¿kermania ijko tlamochiwas?, iwa ¿tlan monextis ijkuak ijko ya tlamochiwati?

⁸ Jesús okijto:

—Ximotlachilikah, iwa amo manomechkajkayawakah. Porke miakeh kijtojtiwitseh itech Notoka: “Ne Cristo”; iwa kijtoskeh: “Yoajsiko n tonati.” Amo xikinneltokakah.

⁹ Keman nonkimatiseh momijmiktilo iwa motekilmakalo, amo ximomojtikah, nochi ni moneki mamochiwa, pero ayamó itlamia n tlaltípkaktli.

¹⁰ Jesús noiwa okinmili:

—N tlanawatijkeh de se weyi tlali motekilmakaskeh iwa n tlanawatijkeh de ok se weyi tlali, iwa n tekiwajkeh de se altepetl motekilmakaskeh iwan tekiwajkeh de ok se altepetl.

¹¹ Tlalolinis chikawak, iwa sentetl yetos apisotl iwa kokólistli, iwa itech ilwikak motas tlan temojti non ayik motika.

¹² Pero achto, nomechkitskiseh iwa nomechtotojtokaskeh. Nomechwikaskeh innawak tekiwajkeh de sinagogas iwa nomechtsakuatiweh. Nomechtemaktiseh innak wejweyi tlanawatijkeh iwa gobernadmeh por nonnechtlakitah. ¹³ Ijkuakó nomejwah nonweletiseh nonkintlapowiseh de Ne. ¹⁴ Amo sa manomechtekipachojto kenijki nonmotlajtolpalewiseh ijkuak nonyetoskeh inyakapah n tekiwajkeh, ¹⁵ porke Ne nomechinmakas n tlájtoltel non nomejwah nonkintenkixtiseh, iwa nion se de akin nomechkokolia kixikos nion nomechtlajtolkopas. ¹⁶ Innewiah nomotajwah, nomokniwah, nomotlakaikniwah iwa non ken nonkinmitah nomechtejtemaktiseh. Iwa sikimeh de nomejwah nomechmik-tiseh, ¹⁷ iwa nochteh n tlaltípkaktlakah nomechkokoliseh por nonnechneltokah, ¹⁸ pero nion se nomotsonkal poliwis.

¹⁹ Iwa tla nochi nonkixikoskeh, nonmomakixtiseh.

²⁰ Ijkuak nonkinmitaskeh n soldadojtech yokiyayawalojkeh n Jerusalén, ijkuakó kuali xikmatikah ya kixixitiniskeh. ²¹ Ijkuakó, akimeh yetoskeh Judea, macholokah kan tepemeh; iwa akimeh yetoskeh Jerusalén noiwa makisakah, iwa akimeh yetoskeh intlala amo mamokopakah Jerusalén. ²² Porke itech nekateh tonatijmeh Dios tetlajiyowiltis, ijko kemi ijkuilitok itech itlajkuilol Dios. ²³ ¡Míálmasteh n siwameh akimeh itech nonteh tonatijmeh kokoxtitoskeh de konetl noso matlachichitijtokah! Porke yetos miak tlajiyowilistli itech nin tlaltípkaktli, iwa ikualanilis Dios wits ipan ninteh tlakah. ²⁴ Sikimeh kinmiktitiseh, iwa oksikimeh kintsakuatiweh itech oksikimeh talmeh. Iwa non amo judójtch kitlajtlaksaskeh n Jerusalén, asta ijkuak Dios kijtos matlami tlan kichijtokeh n tlakah non amo judójtch.

Ne Non onimochi ni tlakatl oksepa niwalmokopas

(Mt. 24:29-31, 42-44; Mr. 13:24-27)

²⁵ Ijkuakó motaskeh neskáyoltel itech tonati, itech metsi iwa itech sítlalteh; iwa itech n tlaltípkaktli n tlakah san moixtlapololijtoseh iwa momojtiseh ijkuak ijkuyukas n weyi atl iwa n amemélotel. ²⁶ N tlakah tlawelmomojtiseh ijkuak kajsikamatiseh tlan panos itech nin tlaltípkaktli; porke asta n chikawálisteh non kateh ilwikak bibiokaskeh. ²⁷ Ijkuakó nechitaskeh Ne Non onimochi ni tlakatl, niwaltemotiwits itech se mexтли ika noweletilis iwa ika se weyi tláwili. ²⁸ Ijkuak pewas ijko tlamochiwas, ximoyolchikawakah iwa xiajotlachiakah porke san nima nomechmakixtikih.

N igoskuawitl

(Mt. 24:32-35; Mr. 13:28-31)

²⁹ Jesús noiwa okinmili nin tlapoálistli:

—Xikitakah n igoskuawitl, noso ok se tlatookali. ³⁰ Ijkuak nonkitah yopé mokopina, nonkimatih ya walajsi n tonala. ³¹ Ijko noiwa, ijkuak nonkitaskeh ijko ya tlamochijtok, xikmatikah itlanawatil Dios ya walajsi.

³²De milajka nomechilia, nochi ni tlamochiwas, iwa n tlakah non axa yolitokeh kitaskeh. ³³N ilwikak iwa n tlaltípkaktli pojpoliwiskeh, pero notlajto ayik pojpoliwis.

³⁴Ximotlachilikah; amo xiktakuawakah nomoyolo ika tlan amo kualí, amo san xitlakuajtinemikah, amo xitlawantinemikah iwa amo xikkawilikah manomechtekipacho tlan onka itech nin tlaltípkaktli. Porke Ne san nonkisaki itech neká tonati, iwa amo níkneki íjkó nomechajsiki. ³⁵Yetos kemi se tékochtli non amo mota iwa wetsiskeh nochteh n tlakah non nemi itech nin tlaltípkaktli. ³⁶Xiíjsatokah, iwa nochipa ximotiotsajtsilíjtokah para weletis nonmakisaskeh de nochi tlan panos, iwa íjkó nonweletiskeh nonmoketoskeh nonawak Ne Non onimochi ni tlakatl.

³⁷Jesús otlamachtíaya tlajka kan Weyi Tiopa, iwa de yuak, oyaya kan olivostepetl iwa ompa omokawaya. ³⁸Iwa nochi tonati, miakeh oyayah kan Weyi Tiopa san kualka para kikakiskeh n Jesús.

22

Motlatlalwiah kenijki kíkítskískeh n Jesús

(Mt. 26:1-5, 14-16; Mr. 14:1-2, 10-11; Jn. 11:45-53)

¹Yowalajsia n ilwitl íjkuak mokua paj non amo kipia levadura, non okiliayah n ilwitl de Paskua. ²N tiopixkeh non tlayakantokeh iwa non kitemachtiah n tlanawatflístli, okitemoliayah kenijki kimíktískeh n Jesús. Pero mach oweletiah porke okinmawiliayah n tlakah non iwa onemíah.

³Ijkuakó, satanáx okimoaxkati n Judas Iscariote akin tewa iwan májtlaktli iwa n ome tlatematíltíjkeh. ⁴Ye okimitat n tiopixkeh non tlayakantokeh iwa non okimokuitlawiayah n Weyi Tiopa, inwah omotlapowito tlan kichiwaskia para kimmaktílis n Jesús. ⁵Yejwah saikpanoa opakmíkeh iwa okilíjkeh kimakaskeh tomi. ⁶Judas omoyekka inwah, iwa opé kitemolia kemia weletis kimmaktílis n Jesús, pero íjkuak amo makítakah n tlakah.

Itlamachtíjkawah kimajmanah n tlákuali de Paskua

(Mt. 26:17-29; Mr. 14:12-16; Jn. 13:21-30; 1 Co. 11:23-26)

⁷Oajsiko n ilwitl de Paskua íjkuak mokua n paj non amo kipia levadura iwa kimíktiah n íchkatsi. ⁸Ijkuakó Jesús okintítlanki n Pedro iwa Juan, iwa okinmili:

—Xikmajmanatih n tlákuali de Paskua.

⁹Yejwah okitlajtlaníjkeh:

—¿Kani tikneki matíkmajmanatih?

¹⁰Jesús okinnankili:

—Íjkuak nonkalakítíweh Jerusalén, nonkinamikískeh se tlakatl kimamajti íaxoktsi. Xíkkuítlapantokakah asta itech kali kan kalakíti, ¹¹iwa xikilíkah n tekowa: “N Tlamachtí tlajtlani: ¿Kanin kajki n kuarto kan kimomajsewis n tlákuali de Paskua iwan itlamachtí-jkawah?” ¹²Ijkuakó ye nomechítítis se weyi kuarto kan tlamajmantos, non kajki tlakpak; ompa xikmajmanakah n tlákuali de Paskua.

¹³Yejwah oyájkeh iwa okajsíkeh nochi kemi Jesús okinmíljka, iwa okimajmankeh n tlákuali de Paskua.

Jesús kimomajsewia n íksemi tlákuali

(Mt. 26:20-25; Mr. 14:17-21; Jn. 13:21-35)

¹⁴Ijkuak ya motlamajsewiskíah, Jesús omoyayanti iwa n májtlaktli iwa ome itlamachtí-jkawah. ¹⁵Iwa okinmili:

—¡Satlawel yoníktlawelnektoka níkmomajsewis nin tlákuali de Paskua nomowah, achto de nímkísis! ¹⁶Porke de milajka nomechilia, amo níkmomajsewis oksepa nin tlákuali asta íjkuak tikmosepanmajsewiskeh kan Dios tlanawatíjtok.

¹⁷Ijkuakó Jesús okónanki se kopa, omotlasojkama inawak Dios, iwa okíjto:

—Xíkoníkah non nochteh. ¹⁸Ne nomechília mach níkonís oksepa íayo n uvas, tlamo asta maajsiki n tonati íjkuak Dios pewas tlanawatis.

¹⁹Otlanki okónanki n paj iwa omotlasojkama inawak Dios; okitlatlajkotlápanki iwa okinmajmák itlamachtíjkawah iwa okinmili:

—Ye ni nokuerpo non niktemaka por nomejwah. Ijkí xikchiwakah para non-nechilnamikiskeh.

²⁰ Ijkuak yokimomajsewijkeh n paj; okónanki n kopa iwa okijto:

—Nin kopa ye noesso non ika timotlajtolsenkawa, iwa motoyawas por nomejwah.

²¹ 'Pero axa, akin nechtemaktis kajki nowa itech mesa. ²² Porke Ne Non onimochi ni tlakatl, nimikkis ijko kemi Dios kimonekiltia, pero, ¡mialma n tlakatl akin nechtemaktis!

²³ Ijkuakó opé motlatlajtlaniah akin kitemaktiskia.

Itlamachtijkawah motlatlajtolkopah akin okachi weyijkatitok

²⁴ Otlanki yejwah opé motlatlajtolkopah akin okachi weyijkatitoskia. ²⁵ Pero Jesús okinmili:

—N reyes moweyiliah iwa kinnajawatiah n tlakah de non altepetl, iwa n tlakah de non altepetl kinnotsah kualteh n tlakah. ²⁶ Pero nomejwah amo ijko xikchiwakah, yej akin weyijkatitok, amo mamoweyili; iwa akin teyakana, noiwa makimati matetlakita. ²⁷ ¿Akin okachi weyijkatitok?, ¿akin sa kitlateekiliah matlakua, noso akin tlateeka? ¿Amo okachi weyijkatitok akin sa kitlateekiliah matlakua? Pero Ne nika nomowah kemi se non tlateeka.

²⁸ 'Iwa nomejwah nochipa nontlajiyowijtinemih nowa. ²⁹ Yika, Ne nomechtlalis xitlanawatikah, ijko kemi Notajtsi onechtlali manitlanawati, ³⁰ para ximotlamajsewikah iwa xikonikah ipan nomesa kan nitlanawatia. Noiwa para nonmoyayantiskeh iwa nonkin-mixkomakaskeh n májtlakteh iwa ome familias de Israel.

Jesús kitematiltia Pedro kijtoskia amo kixmati

(Mt. 26:31-35; Mr. 14:27-31; Jn. 13:36-38)

³¹ Satepa okijto:

—¡Simón, Simón, xikkakal! N satanás yonomechtlájtlaniki para nomechtsejtselos kemi kitsejtseloh n trigo; ³² pero Ne yonimotiotsajtsili para amo xikpolo motlaneltokalis. Iwa ijkuak timoyolpatlas, xikinyolchikawa mokniwah.

³³ Pedro okili n Jesús:

—¡Noteko, nimotemaka nias mowa maya manechtsakuakah noso manechmiktikah!

³⁴ Jesús okili:

—Pedro, Ne nimitsilia achto de tlakuikas n kaxtil, te tikijtos eyi welta, “Amo nikixmati.”

Yoajtsiko n ora para kiyejyekoskeh n Jesús iwa itlamachtijkawah

³⁵ Ijkuakó Jesús okinmili:

—Ijkuak onomechtítlaniki, amo ononkiwikakeh nomopuxa, nion nomopuxajtomi, nion oksikimeh nomokakkuah, ¿itla onomechpolo?

Yejwah otlanankilijkeh:

—Amitla otechpoloh.

³⁶ Ijkuakó Jesús okinmili:

—Pero axa, akin kipia se ipuxa, makimowikili noiwa ipuxajtomi, iwa akin amo kipia iespada, makinamaka se ikoto iwa makimokuili se iespada. ³⁷ Porke Ne nomechilia moneki mamochiwa tlan ijkuilitok itech itlajkuilol Dios: “Okitakeh kemi yaskia se tlakatl amo kuali.” Is. 53:12 Porke nochi tlan ijkuilitok de Ne moneki mamochiwa.

³⁸ Ijkuakó yejwah okilijkeh:

—Noteko, nika kateh ome espadajteh.

Jesús okinnankili:

—Ya kuali ka.

Jesús motiotsajtsilia kan huerto de Getsemaní

(Mt. 26:36-46; Mr. 14:32-42)

³⁹ Jesús okiski de Jerusalén iwa oyá kan olivostepetl, kan nochipa onmotiotsajtsiliaya. Itlamachtijkawah noiwa oyajkeh íwa. ⁴⁰ Ijkuak okalakitoh kan olivostepetl, Jesús okinmili itlamachtijkawah:

—Ximotiotsajtsilikah, para amo manomechyoltilana n tlajtlákolli.

⁴¹ Nima omijkuani ixwejkatsi kemi sempóali metro, iwa ompa omotlankuáketski iwa opé motiotsajtsilia. ⁴² Iwa okijto:

—Notajtsi, tla tikmonekiltia, techachiwili nin tlaijyowilistli. Pero amo mamochiwa kemi Ne ne nikneki, yej kemi Tejwatsi tikmonekiltia.

⁴³ Ijkuakó okimonextili se ángel de ilwikak non okiyolchikawako. ⁴⁴ Iwa ken satlawel otlaijyowijtoka, okachi omotiotsajtsiliaya, iwa itonil omókopki kemi estli iwa owetsia ixko tlali.

⁴⁵ Ijkuak Jesús otlanki omotiotsajtsili, omókopki kan itlamachtijkawah; iwa ken satlawel omoyolkokoayah, okochtlamilajkeh.

⁴⁶ Iwa okinmili:

—¿Tleka nonkochtokeh? Ximewakah iwa ximotiotsajtsilikah para amo manomechy-oltilana n tlajtlákolli.

Kikitskiah n Jesús

(Mt. 26:47-56; Mr. 14:43-50; Jn. 18:2-11)

⁴⁷ Jesús ok okintlapowijtoka itlamachtijkawah ijkuak okalakikoh miakeh tlakah. Judas seme de n májtlakteh iwa ome itlamachtijkawah okwalinyakantiwalaya, niman omijkuani inawak Jesús para kiixtennamikis. ⁴⁸ Ijkuakó Jesús okili:

—Judas, ¿techixtenamiki para manechkitskikah, iwa ijkó techtemaktia Ne Non onimochi ni tlakatli?

⁴⁹ Akimeh okatakah iwan Jesús, ijkuak okitakeh tlan otlamochijtoka, okitlajtlanjkeh:

—Tejwatsi, ¿tikneki matikinkojkokah ika toespadajawah?

⁵⁰ Ijkuakó seme de yejwah okikojko se itékitki n tiópixki non okachi otlayakantoka, ni okitekili inakas non iyekma. ⁵¹ Pero Jesús okili:

—Xikinkawakah, jayakmó xikinkojkokah!

Ijkuakó Jesús okitelkoli inakas non tlakéwale, iwa owalpaajtik. ⁵² Otlanki, Jesús okinmili n tiópixkeh non tlayakantokeh, iwa non otlamokuitlawiayah kan Weyi Tiopa iwa n tetajmeh non tlayakantokeh kan tiopa, non okikitskikoh:

—¿Ononwalajkeh ononnechkitskikoh ika espadajtah iwa ika kuawitl kemi niyetoskia se ichtek? ⁵³ Ixmstla onikatka nomowah kan Weyi Tiopa, iwa ayik ononnechtelkojkeh. Pero ye ni nomoora ijkuak tleyua iwa nomejwah nonweletih nonkichiwah nomoteki.

Pedro kijtoa amo kixmati Jesús

(Mt. 26:57-58, 69-75; Mr. 14:53-54, 66-72; Jn. 18:12-18, 25-27)

⁵⁴ Ijkuakó okikitskijkeh n Jesús, iwa okiwikakeh icha n tiópixki non okachi otlayakantoka, iwa n Pedro san wejka okintokaya. ⁵⁵ Ompa itlajkotia n patio otlatlatijkeh, okiyawalojkeh n tlékuili iwa omotlajtlalijkeh; noiwa n Pedro omotlali inwah. ⁵⁶ Ijkuakó se iteska n tiópixki non okachi otlayakantoka okitak n Pedro ewatok inakastla n tlékuili, okisentlajtlatak iwa okijto:

—Nin tlakatli noiwa okatka iwa n Jesús.

⁵⁷ Pero n Pedro mach okimokuiti, iwa okijto:

—Siwatli, ne mach nikixmati.

⁵⁸ Okachi satepa ok se tlakatli okitak n Pedro iwa okili:

—Te noiwa seme de yejwah.

Pero Pedro okijto:

—Mach ne, otimoixtlapololti.

⁵⁹ Kemi se ora okachi satepa, ok se tlakatli noiwa okili:

—De milajka nin tlakatli tewa íwa, ye noiwa walewatok de Galilea.

⁶⁰ Ijkuakó Pedro okijto:

—Tlakatli, mach nikmati tlan tikijtojtok.

Ijkuak Pedro ok otlajtojtoka, owaltlakuikak n kaxtil. ⁶¹ Ijkuakó n Toteko omókopki iwa okitak n Pedro, ijkuakó Pedro okilnamik tlan Jesús yokilijka: “Ijkuak tlakuikas n kaxtil, te yotikijto eyi welta amo nikixmati.” ⁶² Ijkuakó Pedro okiski iwa satlawel ochokak.

*Kipijpinatiah n Jesús**(Mt. 26:67-68; Mr. 14:65)*

⁶³ Akimeh okimokuitlawijtokah n Jesús okipijpinawiyayah iwa okitekilmakayah.
⁶⁴ Okiiixtsajtsakeh, okiiixwijwitekiah iwa okiliayah:

—¡Techili, akin omitsmák!

⁶⁵ Iwa ika tlájtoltch pitsotikeh okipijpinawiyayah.

*Kiteixpantiah n Jesús inawak Sanedrín**(Mt. 26:59-66; Mr. 14:55-64; Jn. 18:19-24)*

⁶⁶ Ijkuak owaltláneski, omoololojkeh n tetajmeh non tlayakantokeh kan Weyi Tiopa, noiwa n tiopixkeh non tlayakantokeh iwa non kitemachtiah n tlanawatílistli, iwa okiix-pantitoh n Jesús innawak n Sanedrín. * Iwa ompa okitlajtlanjikeh:

⁶⁷ —Techili, ¿te ti Cristo?

Ye okinnankili:

—Tla nomechilis Ne Ni Cristo, mach nonnechneltokaskeh. ⁶⁸ Desde tla Ne nomechtlajtlanis itla, mach nonnechnankiliskeh. ⁶⁹ Desde axa, Ne Non onimochi ni tlakatl, niewatos iyekma Totajtsi Dios Akin kipia nochi weletfílistli.

⁷⁰ Ijkuakó nochteh okitlajtlanjikeh:

—¿Tejwatsi Ikone Dios?

Jesús okinmili:

—Milák, Ne Ikone n Totajtsi Dios kemi nomonewiah yononkijtojkeh.

⁷¹ Ijkuakó yejwah okijtojkeh:

—¿Tlan ok para tikintlatlajtlaniskeh oksikimeh? Tonewiah yotikkakeh tlan okijto.

23

*Jesús inawak Pilato**(Mt. 27:1-2, 11-14; Mr. 15:1-5; Jn. 18:28-38)*

¹ Ijkuakó nochteh owalmokeketskeh, iwa okiwikakeh n Jesús inawak Pilato. ² Ompa opé kiteiliah, iwa okijtojkeh:

—Otikitakeh nin tlakatl kimpajsolojtinemi n tlakah. Ye kijtojtinemi amo matikt laxtlawilikah impuestos n César, iwa kijtoa ye n Cristo, iwa kijtoa Ye rey.

³ Ijkuakó Pilato okitlajtlani n Jesús:

—¿De milajka te inrey n judíojteh?

Jesús okinankili:

—Milák, ijkó ken yotikijto.

⁴ Ijkuakó Pilato okinmili n tiopixkeh non tlayakantokeh iwa nochteh n tlakah:

—Ne amitla amokuali nikajsi itech nin tlakatl.

⁵ Pero yejwah okachi okualankeh iwa okijtojkeh:

—Kimpajsolojtinemi nochteh n judiojteh ika itlamachtilis. Opé Galilea, iwa nika yokalakiko.

Jesús ixpa Herodes Antipas Primero

⁶ Ijkuak Pilato ijki okikak, otlájtlaniki kox non tlakatl walewatok de Galilea. ⁷ Ijkuak okilijkeh Jesús owalewatoka de Galilea, okitítlaniki kan Herodes, gobernador de Galilea. Itch nonteh tonatijmeh Herodes okatka Jerusalén. ⁸ Ijkuak Herodes okitak n Jesús satlawel opaki; porke miakeh omotlapowiyah de Jesús iwa yowejka okinekia kixmatis, iwa okinekia kitas se neskayotl. ⁹ Herodes okitlatlajtlani n Jesús, pero Ye machitla okinankili. ¹⁰ Ompa okatkah n tiopixkeh non tlayakantokeh iwa non kitemachtiah n tlanawatílistli, akimeh okitlawelteiliah n Jesús. ¹¹ Ijkuakó Herodes Antipas Primero iwa isoldadojwah fiero okitoktijkeh n Jesús, iwa para okachi fiero kipijpinawiskeh okitlakentijkeh kemi yetoskia Rey, iwa n Herodes oksepa okitítlaniki kan Pilato. ¹² Pilato iwa n Herodes omokokoliayah, pero non tonati opé moyekwikah.

* 22:66 Sanedrín: nin grupo kimajmanah kemi 50 tetajmeh non tlaixkomakah ijkuak kinteiliah akimeh amo kuali kitlakitah itlanawatil Moisés.

*Kitemaktiah n Jesús para makimiktikah**(Mt. 27:15-26; Mr. 15:6-15; Jn. 18:39—19:16)*

¹³ Ijkuakó n Pilato okinmoololoh n tiopixkeh non tlayakantokeh, n tekiwajkeh iwa nochteh n tlakah, ¹⁴ iwa okinmili:

—Nomejwah ononnehalikilikijeh nin tlakatl, porke nonkijtoah kimpajsojlojinemi n tlakah. Ne yoniktlatlajtlaní nomoixpah, iwa yononkikakeh amitla amokuali nikkajxililia ika tlan nomejwah nonkiteiliah. ¹⁵ Nion Herodes mach okijto kox tlajtlakole nin tlakatl, yika oksepa otechaltitlanili, porke noiwa amitla okajsik kemi para matikmiktikah.

¹⁶ Nitlanawatis makitsonwitekikah iwa nikkajkawas.

¹⁷ Nochi xiwitl itech ilwitl de Paskua, Pilato okimpaktiaya n judfojtech ijkuak okinkajkawiliaya seme de non tsaktokeh. ¹⁸ Pero nochteh otsajtsikeh chikawak:

—¡Xikmikti non tlakatl! ¡Xikkajkawa n Barrabás!

¹⁹ Nin Barrabás otsaktoka porke otemikti iwa okimpajsojlojka miakeh tlakah para makixnamikikah n gobierno. ²⁰ Pilato oksepa okintlapowi n tlakah porke okinekia kikajkawas n Jesús. ²¹ Pero yejwah oksepa otsajtsikeh:

—¡Xikkrusifikaro! ¡Xikkrusifikaro!

²² Ipan eyi welta Pilato okinmili:

—¿Tleka nonkinekih mamikki?, ¿tlan amo kuali okichí? Ne mach nikita satlawel tlajtlakole, kemi para makimotlanili imikilis. Nitlanawatis makitsonwitekikah iwa satepa nikkajkawas.

²³ Pero yejwah okachi otsajtsiah chikawak iwa okitlajtlaniayah makikrusifikaro n Jesús; iwa kemi yejwah satlawel otsajtsiah, okinekiltijkeh n Pilato makinchiwili tlan okitlajtlaniijtokah. ²⁴ Ijkuakó Pilato okichi tlan yejwah okitlajtlaniijkeh, ²⁵ iwa okikajka n Barrabás, non otsaktoka por okimpajsojlojka n tlakah iwa por otemikti, otlaniki okinnawati isoldadojwah makikrusifikarokah n Jesús kemi yejwah okinekia.

*Kikrusifikaroah n Jesús**(Mt. 27:32-44; Mr. 15:21-32; Jn. 19:17-27)*

²⁶ Ijkuak yokiwikayah kikrusifikarotiweh n Jesús, okiyakanamikeh se tlakatl de Cirene non itoka Simón. Ye owalewaya de itlala iwa okitoktijkeh makimama n krus, iwa makikuilapantoka n Jesús.

²⁷ Miakeh tlakah de Jerusalén okwaltokayah n Jesús. Noiwa miakeh siwameh okichokilijtiayah iwa omoyolkokojtiayah. ²⁸ Pero Jesús okimitak iwa okinmili:

—Siwameh de Jerusalén, amo techchokilikah, yej ximochokilikah iwa xikinchochokilikah nomopilwah. ²⁹ ¡Xikakikah!, witseh tonatijmeh ijkuak kijtoskeh: “Miak yolpaklistli para akimeh amo okimpixkeh impilwah, nion okonewajtikeh nion otlachichitijkeh.”

³⁰ Ijkuakó n tlakah pewas kinmiliskeh n tepemeh: “Xiwetsikah topah”; iwa kinmiliskeh n tepemeh: “Techtlaatikah.” ³¹ Pero tla ijko kichiwah iwa n kuawitl xoxobik tlan kichiwaskeh ika non yowaki?

³² Noiwa okinwikayah ome ichtekheh iwa temiktijkeh para kinkrusifikaroskeh inajnakastla n Jesús. ³³ Ijkuak okalakitoh kan tepetl non kiliah Miketsontekomatl, okikrusifikarojkeh n Jesús. Noiwa ompa okinkrusifikarojkeh ome tlachtekeh, se ik iyekma iwa n ok se ik iopochma. ³⁴ Iwa ijkuak yokikrusifikarojtokah, Jesús okijto:

—Notajtsi, xikintlapojpolwi, porke mach kimatih tlan kichiwah.

Iwa n soldadojtech okinmotlatlanilijkeh itlakenwah n Jesús. ³⁵ N tlakah de non altepetl okimawisojtokah, iwa asta n tekiwajkeh okipijpinawayah n Jesús iwa okijtoayah:

—Oksikimeh okinmakixti, axa, tla de milajka Ye n Cristo itlapejpenil Dios, mamomaxixti inewia.

³⁶ N soldadojtech noiwa okipijpinawayah n Jesús, omopachoayah inawak iwa okitiayah vinagre, ³⁷ iwa okiliayah:

—Tla Te tirey de judfojtih, ximomaxixti monewia.

³⁸ Noiwa ik ikuatsontla okijkuililijkeh non okijtoaya: “Ye ni inrey n judiojtech.”

³⁹ Seme de nonteh ichtekheh non okikrusifikarojkeh inakastla n Jesús, ijki fiero okiliaya:

—Tla te ti Cristo, monewia ximomaxixti, iwa tejwah noiwa.

⁴⁰ Pero non ok se ichtek okajwak iwa okili:

—¿Amo tikmawilia Dios, maya ya tikmati san sika timikiskeh? ⁴¹ Tejwah tikijyowijtokeh nin tlajiyowílistli porke otikmotlanilijkeh, pero nin tlakatl mach itla okichi.

⁴² Ijkuakó okili n Jesús:

—Techilnamiki ijkuak pewas titlanawatis.

⁴³ Jesús okinankili:

—De milajka axa nimitsilia: tiyetos nowa kan moitstika Notajtsi.

Mikki n Jesús

(Mt. 27:45-56; Mr. 15:33-41; Jn. 19:28-30)

⁴⁴ Kemi tlajko tonati owaltleyuak itech neká tlali, iwa asta kemi las tres de tiotlak opanok n tleyuálistli. ⁴⁵ N tonati okualok, iwa n kortina de n Weyi Tiopa, otlajkotsáyanki. ⁴⁶ Ijkuakó Jesús ika chikawak tlájtoli okijto:

—Notajtsi Dios, momak niktlalia noespíritu.

Ijkuak ijko okijto, omikki.

⁴⁷ Ijkuak n soldado tlanawati romano okitak tlan otlamochijka, okiweyijkachi Dios iwa okijto:

—Nin tlakatl milák yekmilajka.

⁴⁸ Nochteh non ompa otlamawisojtokah, ijkuak okitakeh nochi tlan otlamochijka owalyayajkeh incha iwa omoelpanwitektyayah. ⁴⁹ Pero nocteh akimeh okixmatiah n Jesús, iwa n siwameh non owalayah iwan Jesús desde Galilea, san wejka okoniitokah tlan otlamochijtoka.

Kitookah n Jesús

(Mt. 27:57-61; Mr. 15:42-47; Jn. 19:38-42)

⁵⁰ Okatka se kualitlakatl non omonotsaya José, owalewatoka de se altepetl non itoka Arimatea. Ye noiwa tewa otekiwajtitoka kan Sanedrín. ⁵¹ Nin José noiwa okichiaya ijkuak Dios pewas tlanawatis, yika mach okipakti tlan okichijkeh non de Sanedrín. ⁵² Ijkuakó n José okitato n Pilato iwa okitlajtlanili ikuerpo n Jesús. ⁵³ Satepa okitemowito de kan krus iwa okikemelo ika se tlakemitl, otlanki okikalakito kan se miketékochtli non oichkuatoka itech tetl kan ayamaka okitlalpachoayah. ⁵⁴ Non tonati yomotlatlalijtokah para n sábado non yowalajsia.

⁵⁵ N siwameh akimeh owalajkeh de Galilea iwan Jesús, oyajkeh okitatos n miketékochtli, iwa okitakeh kenijki okiwilankeh n kuerpo. ⁵⁶ Iwa ijkuak owalmokopkeh incha, okinmajmankeh ajwiapajmeh, iwa non sábado omosewijkeh ijko kemi kijtoa n tlanawátli.

24

Jesús moyolitia

(Mt. 28:1-10; Mr. 16:1-8; Jn. 20:1-10)

¹ Semi san kuinal, itech ipewayá n samano, n siwameh oyajkeh kan otooktoka n Jesús, iwa okinwikayah ajwiapajmeh non yejwah yokichijchijkeh, noiwa oksikimeh siwameh oyayah ínwh. ² Ijkuak n siwameh okalakitoh kan okitookakeh Jesús, n tetl non okitentsaktoka n miketékochtli yokachijka. ³ Iwa okalakeh, pero mach okajsikeh ikuerpo n Toteko Jesús. ⁴ Yejwah ayakmó okimatiah tlan kichiwaskeh. San nima ome tlakah non otlakentsotlaniah, okinmonextilijkeh innakastla. ⁵ Kemi yejwah satlawel omomojtijkeh, omotlankuaketskeh asta okitelkotoh n tlali ika inmixkuak, pero nonteh tlakah okinmilijkeh:

—¿Tleka nonkitemoah kan yomikkeh, Akin yolitok? ⁶ Mach nikan ka, Ye yomoyoliti. Xikilnamikikah tlan onomechili ijkuak ok okatka Galilea, ⁷ noiwa onomechili Ye Akin omochi tlakatl kitemaktiskiah innak n tlajtlakolejkeh, iwa kikrusifikaroskiah, pero ipan eyi tonati moyolitiskia.

⁸ Ijkuakó n siwameh okilnamikah tlan Jesús okimilijka, ⁹ iwa ijkuak yomokopatoh de kan miketékochtli, nochi tlan yejwah okitakeh ompa, n siwameh okintlapowijkeh n májtlaakteh

iwa n se itlamachtijkawah iwa akimeh ompa okatkah. ¹⁰ N siwameh yejwah ninteh: María de Magdala, Juana, María, ina n Jacobo, iwa n oksikimeh siwameh. ¹¹ Pero itlamachtijkawah okimoliayah chamo kuatlapolojtokeh, iwa mach okinneltokakeh.

¹² Pero n Pedro okistewak iwa omotlelo kan miketékochtli, iwa ijkuak oontláchixki tlajitik, sanwel okimitak n tsósolteh tlakaltechitokeh. Ijkuakó omókopki icha, iwa satlawel okitlajtlachialti tlan otlamochijka.

Jesús kinmonextilia itech ojtli de Emaús

(Mr. 16:12-13)

¹³ Non tonati, ome itlamachtijkawah oyayah para n altepetl non itoka Emaús, non omokawaya kemi májtlaktli iwa n se kilómetro wejka de Jerusalén. ¹⁴ Yejwah omotlatlapowijtiayah tlan otlamochijka. ¹⁵ Iwa ijkuak yejwah omotlatlapowijtiayah iwa omotlatlajtolkopayah, Jesús inewia omijkuani innawak iwa opé nejnemi inwah. ¹⁶ Pero maya okitayah, mach okixmatkeh. ¹⁷ Ijkuakó Jesús okintlajtlani:

—¿Tlan semi nonkimolijtiwih? ¿Tleka nonmoyolkokoah?

¹⁸ Se de yejwah, non omonotsaya Cleofas, okinankili:

—Nochteh n tlakah kimatokeh tlan otlamochi kan Jerusalén itech ninteh tonatijmeh. ¿Te timokalotijtok ompa iwa amo tikmati?

¹⁹ Ijkuakó Jesús okintlajtlani:

—¿Tlan otlamochi?

Yejwah okinankilijkeh:

—¿Amo otikma tlan okitoktijkeh n Jesús non owalewatoka de Nazaret? Ye se profeta weletini itech nochi tlan okijtoaya iwa tlan okichiwaya inawak Dios iwa innawak n tlakah.

²⁰ ¿Amo otikma n tiopixkeh non tlayakantokeh sansikah iwa n totekiwajkawah okitemaktijkeh para makitlajiyowiltikah iwa makimiktikah? ²¹ Tejawh otimoyolchikawayah itech porke otikneltokayah Ye akin kimakixtiskia nochi Israel. Pero axa ya kipia eyi tonati ijko otlamochi. ²² Iwa axa, sikimeh siwameh non towah mopoah yotechmomojtijkeh, porke yejwah san kuinal oyajkeh kan miketékochtli. ²³ Amo okajsikeh ikuerpo Jesús. Ijkuakó owalajkeh otechilikoh okimitakeh sikimeh ángelteh non okimilijkeh Jesús yolitok.

²⁴ Okachi satepa, sikimeh tlakah non towah mopoah oyajkeh kan miketékochtli, iwa okajsitoh kemi n siwameh otechilijkeh, pero mach okitakeh n Jesús.

²⁵ Ijkuakó Jesús okinmili:

—¡Nomejwah yolik nontejksamatih, tleka owi nonkineltokah tlan okitemachtijkeh n profetas! ²⁶ ¿Mach amo omonekia matlajiyowi n Cristo iwa satepa kiweyijkachiwaskiah?

²⁷ Ijkuakó Jesús opé kinmajsikamatiltia itlajkuilol n Moisés iwa n profetas kan tlapoah de Ye.

²⁸ Ijkuak okalakitoh Emaús, Jesús omochi kemi ok oyaya okachi tlayakapa. ²⁹ Pero yejwah okitlatlautijkeh mamokawa, iwa okilijkeh:

—Ximokawa towah, yopé tleyua.

Ijkuakó Jesús okalak itech non altepetl iwa omoka inwah. ³⁰ Iwa ijkuak yoewatoka inwah kan motlamajsewiskiah, okónanki n paj, omotlasojkama inawak Dios, iwa okinmajmák makimomajsewukah. ³¹ Ijkuakó okimachilijkeh kemi owalmoixtlajtlapojkeh, iwa okiyekixmatkeh Ye n Jesús, pero Ye san owalpoliwik. ³² Iwa yejwah opé kimoliah:

—Satlawel otiyolatlalayah keman otechtlapowijtiwalaya itech ojtli, noiwa kemi otechilijtiwalaya tlan kijtosneki itlajkuilol Dios.

³³ Ijkuakó, owalmokeketskeh okonankeh ojtli iwa omokopkeh Jerusalén; ompa okinmajsitoh n májtlaktli iwa n se itlamachtijkawah iwa n oksikimeh non ompa okatkah, ³⁴ iwa yejwah okimilijkeh:

—Milák, n Toteko Jesús yomoyoliti, iwa n Simón yokitak.

³⁵ Satepa yejwah ome okinmatiltijkeh tlan omochijkeh itech ojtli, iwa okimilijkeh kenijki okiyekixmatkeh n Jesús ijkuak okitlajkotlápanki n paj.

Jesús kinmonextilia itlamachtijkawah.

(Mt. 28:16-20; Mr. 16:14-18; Jn. 20:19-23)

³⁶Itlamachtijkawah okimolijtokah tlan omochijkah, ijkuakó Jesús owalmonexti intlajko.

³⁷Yejwah saikpanoa omomotijkeh iwa okiyejekoliayah chamo okitlajlatokah se espíritu. ³⁸Pero Jesús okinmili:

—¿Tleka nonmotlajtlachialtia? ¿Amo nonkineltokah kox Ne? ³⁹Xikinmitakah nomawah iwa nokxiwah. Techtelkokah iwa techitakah; porke se espíritu amo kipia inakayo nion iomiowah kemi Ne nikimpia.

⁴⁰Ijkuak Jesús ijkó okinmili, okimititih imawah iwa ikxiwah. ⁴¹Pero ken opakmiktokah iwa ok omotlajtlachialtijtokah, amo okiyekeletoyah kox Ye n Jesús, yika Jesús okinmili:

—¿Nonkipiah itla tlan se kimomajsewis?

⁴²Ijkuakó okonmakakeh tlajko michi tléwaki, ⁴³iwa Ye okiseli iwa okimomajsewi inmixpah.

Jesús kintitlani itlamachtijkawah makitetlapowikah n kualitlájtoli

(Mt. 28:16-20; Mr. 16:15-18; Jn. 20:21-23)

⁴⁴Otlanki Jesús okinmili:

—Tlan yonimochi ye tlan onomechilijka ijkuak onikatka nomowah. Onomechili nochi tlan ijkuilitok itech itlanawatil Moisés iwa itech intlajkuilolwah n profetas iwa itech salmos, ye tlan nimochiwaskia.

⁴⁵Ijkuakó n Jesús okinmajsikamatilti tlan okijtoaya itlajkuilol Dios, ⁴⁶iwa okinmili:

—Nochi ni ijkuilitok iwa ijkó Ne onimochi, porke saman nimikiskia, iwa ipan eyi tonati nimoyolitiskia. ⁴⁷Itech Notoka xikimilikah kenijki moyolpatlaskeh inawak Dios iwa kenijki kintlapojpolwiliskeh de intlajtlakolwah. Xipewakah nika Jerusalén iwa satapa itech nochteh tlalmeh de nin tlaltíkpaktli. ⁴⁸Nomejwah ononkitakeh tlan onipanok.

⁴⁹Techkakikah, Ne nomechaltitlanilis tlan Notajtsi onomechkakiti. Pero xiyetokah nika Jerusalén, asta ijkuak nonkiseliskeh n weletflistli non wits de ilwikak.

Jesús tlejko ilwikak

(Mr. 16:19-20)

⁵⁰Satapa, Jesús okinwík itlamachtijkawah asta Betania. Ompa okinmajkok imawah iwa okintiochi. ⁵¹Iwa ijkuak okintiochijtoka, omoixkoyanti iwa okiwikakeh ilwikak.

⁵²Niman, ijkuak otlankeh okiweyijkachijkeh, omokopkeh Jerusalén ika miak pakflistli, ⁵³iwa ixmostla okitlakuikiliayah Dios kan Weyi Tiopa.

N Kualitlájtoli non Okijkuido San Juan

Itlajtol n Totajtsi Dios omochi tlakatl

¹Ijkuak ayamó opewayá n tlaltípkaktli, yokatka n Tlájtoli, iwa non Tlájtoli okatka iwan Dios, iwa non Tlájtoli* Ye Dios.

²Nin Tlájtoli yokatka iwan Dios ijkuak okichijchi n tlaltípkaktli.

³Ika nin Tlájtoli, okichijchi nochi tlan onka, iwa tla amo por Ye, amitla yetoskia. Col. 1:15-17

⁴Itech Ye onka Yolílistli, iwa non Yolílistli Ye n Tláwili Akin kintlawilia n tlaltípkaktlakah.

⁵Nin Tláwili tlawia kan tleyua, iwa n sentleyuálistli mach weleti kisewia non Tláwili.

⁶Okatka se tlakatl itoka Juan, non Dios okwáltítlanki. ⁷Juan owala otetlapowiko de nin Tláwili (Cristo), para ijko nochteh makineltokakah. ⁸Juan amo ye n Tláwili, sanwel otetlapowiko de non Tláwili. ⁹Ye n milajka Tláwili, non kintlawilia nochteh n tlakah itech nin tlaltípkaktli.

¹⁰Neka Tlájtoli okatka itech nin tlaltípkaktli, iwa Ye okichijchi nochi n tlaltípkaktli pero n tlaltípkaktlakah mach okixmatkeh akin Ye. ¹¹Owala innawak ichanikniwah, pero yejwah mach okiselijkeh. ¹²Pero akimeh okiselijkeh iwa okineltokakeh, Ye okinkawili mamochiwakah ipilwah Dios. ¹³Ninteh amo otlakatkeh kemi tlakatih n tlaltípkaktlakah, yej otlakatkeh kemi tepilwah de Dios porke Ye ijko okimonekilti matlakatikah inawak.

¹⁴Non Tlájtoli omókopki Tlakatl, iwa towa ochanchiwako. Tejwah otiktakeh imawistilis, iwa non mawistílistli kipia non san Ye ikone n Totajtsi Dios, porke otechititi nochi itlasojtlalis iwa nochi tlan ye milajka.

¹⁵Juan otetlapowi de non Tlájtoli. Iwa chikawak otlajto, iwa okijto:

—Ye nin tlakatl non ne onomechiliaya. N tlakatl non satepa wits, Ye okachi weyijkatitok ke ne, porke Ye yokatka ijkuak ne ayamó onitlakatia.

¹⁶Nochi tlan Ye kipia tejwah tikselijtiwitseh, nochipa topah momiakilia itlatiochiwalis.

¹⁷Moisés otechmák n tlanawátili, pero por Cristo Jesús owala n tlasojtlálistli iwa tlan milák.

¹⁸Amaka tlakatl yokitak Totajtsi Dios, pero ikone non san Ye se Akin noiwa Dios, Akin nochipa nechonitok iwan Itajtsi, Ye Akin otechixmatiltiko.

Juan non tlakuatekia kiteixmatiltia n Cristo Jesús

(Mt. 3:11-12; Mr. 1:7-8; Lc. 3:15-17)

¹⁹Ye ni tlan Juan otlapoaya ijkuak n judíojteh de Jerusalén okintitlankeh sikimeh tiopixkeh iwa levitas makitlajtlanitih n Juan akin ye. ²⁰Okimili tlan milák iwa okimokuiti:

—Mach ne ni Cristo.

²¹Ijkuakó yejwah oksepa okitlajtlanijkeh:

—¿Akin te? ¿Te n profeta Elías?

Juan okinnankili:

—Amó, mach ne.

—Techili, ¿Te n profeta?

Ye okinnankili:

—Amó.

²²Ijkuakó okilijkeh:

—¿Akin te kiné? Moneki tikinmiliskeh itla akimeh otechaltitlankeh. ¿Techili, akin te?

²³Juan okinnankili:

—Ne non nitetsajtsilia kan tlatejteyinki iwa nikijtoa: “Xikmilawakah iojwiu n Toteko” Is. 40:3

²⁴N fariseos okintitlankeh sikimeh makitlajtlanitih n Juan

²⁵—Tla te amo Ti Cristo, nion ti Elías, nion ti profeta, ¿tleka titlakuatekia?

* 1:1 Tlájtolikijtosneki Cristo

²⁶ Juan okinnankili:

—Ne nitlakuaatekia ika atl, pero nomowah kajki se Akin nomejwah amo nonkixmatih.

²⁷ Milák, Ye satepa wits, iwa ne mach nitlawelkuali kemi para nikkaktojtomas.

²⁸ Nochi ni otlamochi itech altepetl de Betania, ik nepa lado de n río Jordán, kan Juan otlakuaatekijtoka.

Jesús Ye Iichkatsi n Totajtsi Dios

²⁹ Ipan ok se tonati, Juan okitak n Jesús okinamiktiwalaya iwa okijto:

—Xikitakah, Ye Ni Iichkatsi Dios, non kitekixtilis nochi intlajtlakol n tlaltikpaktlakah.

³⁰ De Ye onitlajto: “Satepa wits se tlakatl Akin okachi weyjkatitok ke ne, porke Ye yokatka ijkuak ne ayamó onitlakatia.” ³¹ Ne nonewia amo onikixmatia. Yika onitlakuaatekijtiwalaya ika atl para n tlakah de Israel makixmatikah Ye.

³² Juan noiwa okijto:

—Ne onikitak n Espíritu owaltemok de ilwikak kemi se palomatsi, iwa omotlaliko itech Jesús. ³³ Ne ayamó onikixmatia. Pero Akin onechalitlanki manitlakuaatekiki ika atl, onechili: “Ijkuak tikitas n Espíritu waltemos iwa motlaliki itech se tlakatl, Ye Akin tlakuaatekis ika n Espíritu Santo.” ³⁴ Ne yonikitak, yika, nomechilia nik Ye Ikone Dios.

Non sikinika itlamachtijkawah n Jesús

³⁵ Ijkuak owalmostlatik Juan oksepa ompa okatka iwa ome itlamachtijkawah. ³⁶ Iwa ijkuak okitak Jesús opanoaya, Juan okijto:

—Xikitakah, nin tlakatl Ye Iichkatsi n Totajtsi Dios.

³⁷ Ijkuak n ome itlamachtijkawah n Juan okikakeh tlan okijto, oyajkeh iwan Jesús.

³⁸ Ijkuakó Jesús oontláchixki ik ikuitlapa, iwa ijkuak okinmitak okiwaltokayah, okintlajtlani:

—¿Tlan nonkitemoah?

Yejwah okinankilijkeh:

—Rabí —non kijtosneki tlamachtí—, ¿kan tichanti?

³⁹ Jesús okinnankili:

—Xiwikih iwa xikitakah.

Ijkuakó yejwah oyajkeh iwan Jesús iwa okitakeh kan chanti. Yokatka kemi las kuarto de tiotlak. Ompa omokajkeh iwan Jesús non tonati.

⁴⁰ Andrés ikni n Simón Pedro, ye seme de nonteh ome non okikakeh tlan okijto n Juan, oyajkeh iwan Jesús. ⁴¹ Andrés achto okajsik ikni Simón, iwa okili:

—Yotikajsikeh n Mesías —noni kijtosneki n Cristo noso non Dios okipéjpenki.

⁴² Andrés okiwík ikni Simón inawak Jesús, iwa ijkuak Jesús okitak okili:

—Te ti Simón ipiltsi n Jonás, axa yetos motoka Cefas —kijtosneki Pedro. †

Jesús kinotsa n Felipe iwa Natanael

⁴³ Owalmostlatik Jesús okisentlali yas kan tlali de Galilea. Ompa okitak n Felipe, iwa okili:

—Xiwiki nowa.

⁴⁴ Felipe owalewatoka itech altepetl de Betsaida. Andrés iwa n Pedro noiwa de ompa.

⁴⁵ Felipe okitemoto n Natanael iwa okili:

—Yotikajsikeh n tlakatl non okitene Moisés iwa n profetas itech intlajkuilolwah. Ye n Jesús ipiltsi n José non walewatok de Nazaret.

⁴⁶ Natanael okili:

—¿Weletis kisas itla kuali de Nazaret?

Felipe okinankili:

—Xiwiki, iwa xikitaki.

⁴⁷ Ijkuak Jesús okitak Natanael okualajsia, okijto:

—Nika wits se tlakatl non milák Israelita, non amo kimati tlakajkawaya.

⁴⁸ Ijkuakó Natanael okitlajtlani:

—¿Kenomi techixmati?

Jesús okinankili:

† 1:42 N tlájtoli ‘cefás’ itech arameo kijtosneki ‘tetl’

—Ijkuak otikatka itlampa n igoskuawitl, achto de mitsonnotsaskia n Felipe, Ne yonim-itsitak.

⁴⁹Natanael okili:

—¡Tlamachti, Tejwatsi Ti Tekone de Dios! ¡Tejwatsi Rey de Israel!

⁵⁰Jesús okinankili:

—¿Techneltoka san por onimitsili onimitsitak itlampa n igoskuawitl? Te tikitas itla okachi wejweyi ke ni.

⁵¹Jesús noiwa okijto:

—De milajka, de milajka nomechilia, nomejwah nonkitaskeh n ilwikak tlapotok, iwa iángelwah n Dios tlejkoskeh iwa temoskeh notech Akin onimochi ni tlakatl.

2

Se ilwitl kan monamiktiah itech altepetl de Caná de Galilea

¹Eyi tonati satepa okatka se ilwitl kan monamiktילו itech se altepetl de Caná itech tlali de Galilea. Iwa imamá n Jesús ompa okatka. ²Jesús iwa itlamachtijkawah noiwa okintlalwijkeh itech non ilwitl. ³Iwa ijkuak otlanki n vino, imamá n Jesús okiliko:

—Ayakmó kipiah vino.

⁴Pero Jesús okinankili:

—¿Siwatl, tleka ne techilia? Ayamó ajsi noora.

⁵Pero imamá n Jesús okinmili non tetlamakatokeh:

—Xikchiwahak nochi tlan Ye nomechilis.

⁶Ompa okatkah chikwase ajpasteh* non ika okipixtokah inmau, iwa okintekiltiyah ijkuak omomapajpakayah noso omochipawayah n judíos, ijkó kemi kijtoa intlanawatil, itech ninteh ajpasteh oakiah mákuili poali litro atl. ⁷Jesús okinmili non otlatetekatokah:

—Xikintemitikah ika atl n ajpasteh.

Yejwah okintemitijkeh asta opiaujkeh, ⁸ijkuakó Jesús okinmili:

—Axa xikkixtikah siki iwa xikwikilikah akin kiyakantok n ilwitl.

Yejwah ijkó okichijkeh. ⁹Akin otlayakantoka itech ilwitl okiyeko n atl, non Jesús okíkopki vino. Ye amo okimatia de kan owala, sanwel okimatiah non otlatetekatokah porke yejwah okikixtikah non atl. Ijkuakó n tlayakantok okínotski n novio, ¹⁰iwa okili:

—San akin yetos achto kitemaka n kuali vino, iwa ijkuak n tlatlálwilteh satlawel yokonikeh, ijkuakó kinmajmakah ok se vino. Pero te sikin otikkixtikah non okachi kuali vino.

¹¹Itech Caná de Galilea, Jesús okichi non sikinika milagro. Ika non milagro omotak milák weletini, yika itlamachtijkawah okineltokakeh.

¹²Satepa, Jesús iwa imamá, iwa ikniwah iwa itlamachtijkawah owaltemokeh kan altepetl de Capernaúm iwa ompa omokajkeh kanaj kech tonati.

Jesús kinkixtia n tlasemankeh kan Weyi Tiopa

(Mt. 21:12-13; Mr. 11:15-18; Lc. 19:45-46)

¹³Ijkuak yowalajsia n ilwitl de Paskua inmilwiu n judíojeteh, Jesús otlejkok Jerusalén.

¹⁴Iwa kan Weyi Tiopa okinmajsito non kinnamakah torojteh, ichkameh iwa palomajtsinteh, noiwa ompa okatkah n tomintlapatlakeh. ¹⁵Ijkuak Jesús okimitak, okichijchi se chikote iwa okwalinkixti de kan Weyi Tiopa ika nochi intorojwah iwa inmichkawah. Okintlamochohili ipan tlali intomi n tomintlapatlakeh. Okinxitronkopili inmesajwah iwa intomi oxixitikah. ¹⁶Iwa akimeh okinnamakatokah palomajtsinteh okinmili:

—¡Xikinkixtikah de nika! ¡Amo xiktiankiskopakah icha n Notajtsi Dios!

¹⁷Ijkuakó, itlamachtijkawah okilnamikeh itech tiotlájtolli ijkuilitok: “Nikchawatilia mochantsi, kemi se tletl nechtlamia.”

Sal. 69:9

¹⁸Ijkuakó n judíojeteh okitlajtlanjikeh:

—¿Tlan weletis technextilis para tikitaskeh kox milák te omitsmakakeh non tekiwajy-otl?

* 2:6 kemi sien litros, n griego kijtoa: ome noso eyi metretas.

¹⁹ Jesús okinnankili:

—Xikxixitinihah nin tiopa, iwa ipan eyi tonati oksepa nikajkokuis.

²⁰ Ijkuakó n judíojteh okilijkeh:

—Ome póali iwa n chikwase xiwitl (46) owejkajkeh okichijchijkeh nin tiopa; ¿Iwa Te tikijtoa ipan eyi tonati tikajkokuis?

²¹ Keman Jesús okitene n tiopa, Ye otlajtojtoka de ikuerpo. ²² Yika, ijkuak Jesús omoyoliti, itlamachtijkawah okilnamikah tlan okimilijka, iwa okineltokakah tlan kijtoa itlajkuilol Dios.

Jesús kinmixmati inyolo n tlakah

²³ Ijkuak Jesús okatka Jerusalén itech ilwitl de Paskua, miakah okineltokakah ijkuak okimitakah n wejweyi milagros, non Ye okinchiwaya. ²⁴ Pero Jesús mach okinneltokaya, porke yokinmixmatia inyolo. ²⁵ Amo omonekia aka makitlapowi tlanón okiyejyekoliayah n tlakah, porke Ye yokimatia tlan okipiayah itech inyolo.

3

Jesús iwa Nicodemo

¹ Okatka se tlakatl fariseo non itoka Nicodemo, ye okatka tlayakanki judío. ² Ye okitato n Jesús se yúali, iwa okili:

—Tlamachtí, kualí tikmatokah Dios omitsaltflanki techmachtiki, porke amaka weleti kinchiwa ninteh milagros non Tejwatsi tikinchiwa, tla Dios amo kajki iwa.

³ Jesús okili:

—De milajka, de milajka nimitsilia, amaka weletis kalakis kan Dios tlanawatia, tla amo oksepa tlakati.

⁴ Nicodemo okitlajtlani:

—¿Kenijki weletis se tlakatl non yomochi teta oksepa tlakatis? ¿Weletis oksepa kalakis ijtik imamá iwa oksepa tlakatis?

⁵ Jesús okinankili:

—De milajka, de milajka nimitsilia, akin amo tlakati de atl iwa de Espíritu, amo kalakis kan Dios tlanawatia. ⁶ Akin tlakati itech nin taltípkaktli, ye taltípkaktlakatl. Pero akin tlakati itech Espíritu, ya kipias espíritu de ilwikak. ⁷ Amo ximotlajtlachialti por tlan onimitsili: “Nochteh kipiah de tlakatiskeh oksepa.” ⁸ N ejekatl tlaxojpitsa san kan ik kineki, iwa tikkaki ijkuayuka, pero amo tikmati kan ik walewa nion kan ik yawi. Ijkó noiwa mochiwah akimeh tlakatih itech Espíritu.

⁹ Nicodemo oksepa okitlajtlani n Jesús:

—¿Kenijki weletis mochiwas tlan tikijtoa?

¹⁰ Jesús okinankili:

—¿Amo weyi titlamachtí de Israel iwa amo tikkasikamati tlan nimitsilijtok? ¹¹ De milajka, de milajka nimitsilia, tejwah tikijtoah tlan tikmatih, iwa titetlapowiah de tlan otiktakah. Pero nomejwah mach nonkineltokah tlan tomechiliah. ¹² Ne nomechtlapowia ika tlan tlamochiwa itech nin taltípkaktli, iwa amo nonnechneltokah, ¿kenijki nonnechneltokaskeh tla nomechtlapowis de tlan tlamochiwa ilwikak?

¹³ Amaka tlejkotika ilwikak, sanwel Ne, Akin onimochi ni tlakatl, non oniwaltemok de ilwikak. ¹⁴ Iwa ijko kemi Moisés okajkok n koatl kan tlattejtéyinki, ijko noiwa moneki nechajkokuiskeh Ne Non onimochi ni tlakatl, Nm. 21:8 ¹⁵ para nocteh akimeh nechneltokaskeh amo mamoiopolokah, yej mayolitokah nochipa kan ilwikak.

Totajtsi Dios saikpanoa okintlasojtlak n taltípkaktlakah

¹⁶ Totajtsi Dios saikpanoa okintlasojtlak n taltípkaktlakah, yika okitemakti non sanwel Ye se Ikone, para nocteh akimeh kineltokaskeh amo mamoiopolokah, yej makipiakah se yankuik nemilistli non ayik tlami. ¹⁷ Dios amo okwáltflanki ikone para kintlajtlakoltis n taltípkaktlakah, yej okwáltflanki para kinmakixtis.

¹⁸ Akin kineltoka ikone n Totajtsi Dios, amo kitlajtlakoltiskeh. Pero akin amo kineltoka, Dios kitlajtlakoltis porke amo okineltokah itech Itoka non san Ye se Ikone n Totajtsi

Dios. ¹⁹ Akimeh amo kineltokah Dios, kintlajtlakoltis. Porke ijkuak owala n Tláwili itech nin tlaltíkpaktli, okachi okiwilitakeh n tleyuálistli iwa amo n tláwili. Yika okichiwayah tlan amokuali. ²⁰ Nochteh akimeh kichiwah tlan amokuali, kikokoliah n Tláwili. Amo mijkuaniah inawak n Tláwili, para amo mamota tlan amokuali kichiwah. ²¹ Keman akimeh kichiwah tlan kualí, mijkuaniah inawak n Tláwili, ijko mamota kichijtokeh tlan Dios kimonekiltia.

Juan Tlakuatekiani oksepa tetlapowia de Jesús

²² Okachi satepa, Jesús iwa itlamachtijkawah oyajkeh kan tlali de Judea, iwa ompa omokajkeh kech tonati, iwa otlakuatekiayah. ²³ Juan noiwa otlakuatekijtoka itech altepetl de Enón, inakastla n altepetl de Salim, porke ompa okatka miak atl. Iwa miakeh tlakah oyayah inawak Juan iwa Ye okinkuaatekiaya. ²⁴ Itech nonteh tonatijmeh ayamó okitsakuayah n Juan.

²⁵ Ijkuakó sikimeh itlamachtijkawah n Juan omotlatlajtolkopkeh iwan se tlakatl judío de kenijki se moyolchipawas inawak Dios. ²⁶ Ijkuakó okilitoh n Juan:

—Tlamachtí, akin okatka mowa ik nepa lado de n río Jordán, de akin tejwatsi otechtlapowi, noiwa ya tlakuatekijtok, iwa nochteh yawih inawak.

²⁷ Juan okinnankili:

—Se tlakatl amo weletis itla kiselis, tla amo kimaktilia de ilwikak. ²⁸ Nomejwah mononewiah ononnechakeh ijkuak onomechili nik ne amo ni Cristo, sanwel onechtitlanke iyakapa. ²⁹ Kan monamiktilo, n novio mokawa iwan novia, iwa iamigo n novio paki ijkuak kikaki itlajtol n novio. Ijko kiné, ajsitok nopakilis. ³⁰ Jesús moneki okachi maweyixti, iwa ne manitsikitsintia.

Jesús walewatok de ilwikak

³¹ Akin walewatok de ilwikak okachi weyijkatitok. Akin walewatok itech nin tlaltíkpaktli, tlajtoa de tlan onka itech nin tlaltíkpaktli. Pero Akin walewatok de ilwikak Ye okachi weyijkatitok ke nochteh. ³² Ye kitematiltia tlan yokitak iwa yokikak, pero amaka kineltoka tlan kitematiltia. ³³ Pero akin kineltoka tlan Ye kitetlapowia, kinextia nik Dios kijtoa tlan milák. ³⁴ Porke Akin Dios okwalftlanki, tlajtoa de itlajtol Dios, porke Dios amo kitemaka n Espiritu san ajachi. ³⁵ N Teta kitlasojtla Ikone, iwa okimák makinawati nochi. ³⁶ Akin kineltoka Ikone Dios, yolitos nochipa kan ilwikak. Pero akin amo kineki kitlakitas Ikone Dios, amo yolitos kan ilwikak yej kiselis ikualanilis Dios.

4

Jesús iwa n siwatl de Samaria

¹ N fariseos okimatkeh Jesús okimpiaya okachi itlamachtijkawah iwa okachi okinkuaatekiaya ke Juan. ² Pero Jesús amaka okikuaateki, yej san itlamachtijkawah. ³ Ijkuak Jesús ijko okima, okiski de Judea iwa omókopki kan tlali de Galilea.

⁴ Iwa kan ik yaskia, okipiaya de panos kan tlali de Samaria. ⁵ Ijko kiné, Jesús okalakito itech se altepetl de Samaria non itoka Sicar, inakastla n tlali non Jacob okiaxkatili ipiltsi José. ⁶ Ompa okatka n atékochtli de onekiliayah poso de Jacob. Jesús omotlali inakastla n atékochtli porke osotlawatoka de onejentiwalaya. Okatka kemi tlajko tonati. ⁷ Ijkuakó se siwatl de Samaria okixitoko atl, Jesús okili:

—Techonmaka siki atl, maniatli.

⁸ Itlamachtijkawah yoyajtokah kan altepetl okikuatoh tlan kikuaskeh.

⁹ Ijkuakó n siwatl de Samaria okinankili:

—¿Tleka techtlajtlanilia atl, amo tikmati ne de Samaria iwa tejwatsi judío? N judíos amo monotsah iwa non de Samaria.

¹⁰ Ijkuakó Jesús okinankili:

—Tla tikixmatiskia tlan Dios kitetliokolia iwa tikmatiskia akin mitstlajtlanilijtok atl, te monewia tiklajtlaniliskia atl, iwa Ye mitsmakaskia n atl non ika tiyolitos nochipa.

¹¹ N siwatl okili:

—Tlakatl, n atékochtli wejkatla iwa amo tikpia tlan ika tikixtis atl. ¿Kan tikixtis nin atl non ika niyolitos nochipa? ¹²Towejkatata Jacob otechkajtewili nin atékochtli. Ye, ipilwah iwa iyolkawah nika oatlikeh. ¿Mach te okachi tiweyixtok ke ye?

¹³Jesús okinankili:

—Nochteh akimeh nika atlih, oksepa amikiskeh, ¹⁴pero akin konis n atl non Ne nikmakas, ayik oksepa amikis. Porke n atl non Ne nikmakas, mochiwas itech ye kemi se améyali, kan mextos n atl non ika yolitos nochipa.

¹⁵Ijkuakó n siwatl okili:

—Tlakatl, techmaka kiné non atl, ijko ayakmó niamikis, iwa ayakmó oksepa nikixtiki atl nika.

¹⁶Jesús okili:

—Xio xiknotsati mookich iwa oksepa xiwiki.

¹⁷N siwatl okinankili:

—Ne mach nikpia nookich.

Jesús okili:

—Milák tlan tikijtoa, nik amo tikpia mookich, ¹⁸porke yotikimpapatlak mákuilteh tlakah, iwa non axa iwan tika noiwa amo mookich. Milák tlan tikijtoa.

¹⁹N siwatl okili n Jesús:

—Tlakatl, nikita tejwatsi tiprofeta. ²⁰Towejkatatawah okiweyiliayah Dios itech nin tepetl. Pero nomejwah non de Judea nonkijtoah moneki matikweyilikah Dios kan Jerusalén.

²¹Jesús okili:

—Siwatl, xikneltoka, ajsiki tonati ijkuak nomejwah weletis nonkiweyijkachiwaskeh Dios maya amo nonwitseh itech nin tepetl nion nonyaskah Jerusalén. ²²Nomejwah mach nonkixmatih akin nonkiweyijkachiwah, pero tejwah tijudójtah tikixmatih Akin tikweyijkachiwah, porke n temakixtlistli wits por n judójtah. ²³Pero ajsiki n tonati, iwa ya yoajsiko, ijkuak akimeh de milajka kiweyijkachiwah Dios, kiweyijkachiwah Totajtsi ika inmespíritu iwa ika tlan milák, porke Totajtsi kintemoa akimeh kiweyijkachiwaskeh. ²⁴Dios, Ye Espíritu, iwa akimeh kiweyijkachiwah moneki makiweyijkachiwahak ika nochi inyolo iwa de milajka.

²⁵N siwatl okili:

—Ne nikmatok wits n Mesías —non Itoka Cristo—, iwa ijkuak Ye wits, techajsikamatiltis nochi.

²⁶Jesús okinankili:

—Ye Ne, Akin axa timotlapowijtok íwa.

²⁷Ijkuakó oajsikoh itlamachtijkawah n Jesús iwa omotlajtlachialtijkeh ijkuak okitakeh n Jesús motlapowijtok iwan se siwatl. Pero amaka omixewi kitlajtlanis tlan okinekia non siwatl, noso tlan okimolijtokah. ²⁸Ijkuakó n siwatl okikakajte iaxoktsi iwa oyá kan ialtépeu, iwa okinmilito n tlakah:

²⁹—Xiwikih, xikitakih se tlakatl non onechili nochi tlan onikchi. ¿Amo Ye n Cristo?

³⁰Ijkuakó n tlakah de non altepetl okiskeh okitatos n Jesús. ³¹Ijkuakó itlamachtijkawah okitlatlaujtiayah n Jesús:

—Tlamachtí, ximotlamasewi.

³²Pero Ye okinmili:

—Ne nikpia itla tlan nikmomajsewis tlan nomejwah amo nonkixmatih.

³³Ijkuakó itlamachtijkawah opé motlatlajtlaniah:

—¿Chamo aka okwalikili tlan kimomajsewis?

³⁴Pero Jesús okinmili:

—Notlakual ye manikchiwa tlan kipaktia Akin onechaltítlanki, iwa maniktiami iteki.

³⁵Nomejwah nonkijtoah: “Ok poliwi nawi mestli para mopixkas.” Pero Ne nomechilia: Xiyektlachiakah iwa xikimitakah n tláttookteh, yotlachikawak iwa ya kualí se pixkas. ³⁶Akin tlaoololoa kiselia itlaxtlawil, iwa tlan koololoa, koololoa para ayik tlamis, iwa ijko akin tlatooka iwa akin pixka, sansikah yolpaktoskeh. ³⁷Milák, ijko kemi kijtoa n tlájtoli: “Se akin

tooka, iwa ok se akin pixka.”³⁸ Ne onomechtítlanki xipixkatih kan amo onontookakeh. Oksikimeh otookakeh, pero axa nomejwah nompixkaskeh kan yejwah otookakeh.

³⁹ Miakeh tlakah de Samaria okineltokakeh n Jesús por tlan okinmatilti neká siwatl, ijkuak okinmili: “Ye onechili nochi tlan yonikchi.”⁴⁰ Yika ijkuak n samaritanos owalajkeh inawak Jesús, okitlatlautijkeh mamokawa ínwah. Iwa Ye omoka ompa ome tonati,⁴¹ iwa oksikimeh noiwa okineltokakeh n Cristo Jesús ijkuak okikakeh tlan Ye inewia okimiliaya.⁴² Iwa okiliayah n siwatl:

—Axa tikneltokah pero amo san por tlan otikijto, yej porke tonewiah yotikkakeh, iwa axa kualitimatokah milák Ye n Cristo, non kinmakixtis n tlaltikpaktlakah.

Jesús kipajtia itelpoch se tekiwa

⁴³ Ome tonati satepa, Jesús okiski de Samaria iwa oyá Galilea. ⁴⁴ Porke inewia n Jesús okijtojka, nion se profeta kitlakitah kan otlatkatki. ⁴⁵ Ijkuak Jesús okalakito Galilea, n tlakah okiyekselijkeh, porke noiwa oyajkeh Jerusalén itech ilwitl de Paskua, iwa ompa okitakeh nochi tlan Ye okichi itech non ilwitl.

⁴⁶ Ijkuakó Jesús oksepa omókopki kan altepetl de Caná de Galilea, kan okikopki vino n atl. Ompa okatka se tekiwa de n rey akin okipiaya se itelpoch non omokokoaya. Ye okatka Capernaúm. ⁴⁷ Ijkuak n tekiwa okima Jesús omokopato de Judea iwa okalakiko Galilea, okitato iwa okitlatlaujti mawia icha iwa makipajtiti itelpoch porke yomiktoka. ⁴⁸ Ijkuakó Jesús okili:

—Nomejwah mach nonnechneltokah, tla amo achto nonkitah se milagro.

⁴⁹ Pero itekiwa n rey okili:

—Tejwatsi, xiwalmuikatiwetsi, amo kichiwa mikis netelpoch.

⁵⁰ Ijkuakó Jesús okinankili:

—Ximokopa mocha, motelpoch yolitok.

N tlakatl okineltokah tlan Jesús okili, iwa omókopki icha. ⁵¹ Ijkuak n tekiwa ya onajsia icha, sikimeh itlakawah okinamikoh iwa okilijkeh:

—Mopiltsi yolitok.

⁵² Ijkuakó ye okintlajtlani kemi tlan oras opé kualit momachilia itelpoch, iwa yejwah okilijkeh:

—Yala, la una de tiotlak, okikajka n totonik.

⁵³ Ijkuakó n teta okilnamik ipan non ora Jesús okili: “Motelpoch yolitok.” Ye iwa nochi ichantlakawah okineltokakeh n Jesús.

⁵⁴ Ika ni, Jesús okinchi ome milagros, ijkuak owalmókopki de Judea iwa okalakiko Galilea.

5

Jesús kipajtia se tlakatl non amo oweletia onejnemia

¹ Satepa Jesús otlejkok Jerusalén itech tonatijmeh ijkuak n judíojeteh okichiyayah se ilwitl. ² Ompa Jerusalén kanik kiliah kaltentli de ichkameh, okatka se tanke non itech tlájtoli hebreo monotsa Betesda. Nin tanke okimpiaya mákuili portalteh. ³ Ompa owejwetokah miakeh kokoxkeh: non amo otlachiyayah, koxomeh iwa non oikximijmiktokah, yejwah okichiyayah mamolini n atl. ⁴ San kualchiwa se ángel owaltemoaya iwa okoliniaya n atl, iwa san akin achto omopolakiaya, opajtia. ⁵ Ompa owetoka se tlakatl non omokokoaya sempóali iwa n káxtoli iwa n eyi xiwitl (38). ⁶ Ijkuak Jesús okitak n kócoxki ompa wetok, okajsikama yowejka omokokoaya, iwa okili:

—¿Tikneki tipajtis?

⁷ N kócoxki okinankili:

—Tejwatsi, amo nikpia akin nechapolakis ijtik tanke ijkuak molinia n atl. Iwa ijkuak ya nimopolakiti, ok se achto mopolakia.

⁸ Jesús okili:

—Ximewa, xikajkokui mopetl iwa xinejnemi.

⁹ San nima non tlakatl owalpjatik, okajkok ipetl iwa onéjnenki. Non tonati okatka sábado ijkuak mosewia n judíos. ¹⁰ Pero n tlayakankeh judíojeteh okilijkeh n tlakatl non opajtik:

—Axa sábadó, mach weletis tikmamas mopetl.

¹¹ N tlakatl okinnankili:

—Akin onechpajti inewia onechili: “Xikajkokui mopetl iwa xiajti.”

¹² Ijkuakó okitlajtlanjikeh:

—¿Akin omitsili: “Xikajkokui mopetl iwa xiajti?”

¹³ Pero n tlakatl non opajtik mach okimatia akin okipajti, porke ompa okatkah miakeh tlakah iwa n Jesús ayakmó ompa okatka. ¹⁴ Okachi satepa Jesús okajsito n tlakatl kan Weyi Tiopa iwa okili:

—Techkaki, ken axa yotipajtik, ayakmó oksepa xitlajtlakolchiwa, porke weletis mitsajsis ok se kokólistli okachi temojti.

¹⁵ N tlakatl oyá, iwa okinmatilito n tlayakankeh judíojeteh Jesús okipajti. ¹⁶ Yika, n tlayakankeh judíojeteh okitotojtokayah n Jesús porke okinchiwaya ninteh milagros itech sábadó. ¹⁷ Pero Jesús okinmili:

—Notajtsi nochipa tekiti, yika Ne noiwa nitekiti.

¹⁸ Yika, n tlayakankeh judíojeteh okachi okinekia kimiktiskeh, iwa amo san por okixpanawiaya n sábadó yej porke noiwa okijtoaya Dios Itajtsi, kemi yetoskia Ye noiwa Dios.

Ikone Dios kipia weletílistli

¹⁹ Jesús noiwa okinmili:

—De milajka, de milajka nomechilia: Ne Akin Ni Tekone amo niweleti nikchiwa itla, san Ne noselti, yej nikchiwa tlan nikita kichiwa Notajtsi. Porke nochi tlan Notajtsi kichiwa Ne noiwa nikchiwa. ²⁰ Iwa Notajtsi nechtlasojtla iwa nechititia nochi tlan Ye kichiwa, iwa okachi wejweyi milagros nechnextilis para nomechtlajtlachialtis. ²¹ Porke ijko kemi Notajtsi Dios kinyolitia non yomikkeh, ijko noiwa ikone n Dios kinmaka yolílistli akimeh Ye kineki kinmakas. ²² Porke Notajtsi amaka kiyolkuitia, yej onechmák nochi itlanawatil para Ne maniteyolkuiti, ²³ para nochteh n taltikpaktlakah makiweyijkachiwahakah Ikone Dios ijko kemi kiweyijkachiwah Dios. Akin amo kiweyijkachiwa n tekone, amo kiweyijkachiwa Dios akin okualtítlanki.

²⁴ De milajka, de milajka nomechilia: akin kikaki notlajtol iwa kineltoka Notajtsi Dios Akin onechaltítlanki, ye kypias yolílistli non ayik tlami iwa amaka kitlajtlakoltis. Kijtosneki yomiktoka pero axa ya kipia nemílistli non ayik tlami. ²⁵ De milajka, de milajka nomechilia: ajsitiwits n ora, iwa yoajsiko, ijkuak non yomikkeh nechkakiskeh Ne Akin Ni Tekone de Dios, iwa akimeh nechkakiskeh yolitoskeh. ²⁶ Ijko kemi Notajtsi inewia kipia yolílistli, Ne Ikone noiwa onechmák weletílistli para maniktemaka yolílistli. ²⁷ Noiwa onechmák tekiwájyotl para manitetlajtlakolti, Ne Non onimochi ni tlakatl. ²⁸ Amo ximotlajtlachialtikah, porke ajsiki n ora ijkuak nochteh non yomikkeh iwa tooktokeh kikakiskeh itlajtol. ²⁹ Iwa kisaskeh de inmiketekochoh. Akimeh okichijkeh tlan kuali, moyolitiskeh iwa mach ok ayik mikiskeh, iwa akimeh okichijkeh tlan amokuali, moyolitiskeh para kinyolkuitiskeh.

Sikimeh kiteixmatiltiah Jesús kipia weletílistli

³⁰ Ne amitla weleti nikchiwa san tlan notech kisa. Ne nitetlajtlakoltia ijko kemi Notajtsi Dios nechnewatia, iwa nitetlajtlakoltia kemi moneki, porke mach nikchiwa san tlan ne nikneki, yej nikchiwa tlan kineki Notajtsi Akin onechaltítlanki. ³¹ Tla nomechiliskia san tlan kisa itech ne, tlan nikijtoskia amitla ipati. ³² Pero onka ok se akin tlajtoa de Ne, iwa nikmatok nik tlan Ye kijtoa de Ne milák. ³³ Nomejwah ononkintitlankeh sikimeh tlakah makitlajtlanitih n Juan akin ye, iwa ye okijto tlan milák de Ne. ³⁴ Pero mach moneki aka tlakatl para makimatikah akin Ne; yej san nomechilnamiktia tlan Juan okijto para weletis nonnechneltokaskeh iwa ijko ximomakixtikah. ³⁵ Juan okatka kemi se tláwili non oxotlatoka iwa otlawia, iwa nomejwah ononpakeh san kech tonati ika itlawil. ³⁶ Pero Ne nikpia ok se tlájtoli non okachi weyi ke non de Juan: Nochi tlan Ne nikchiwa ye tlan Notajtsi onechnawati manikchiwa, iwa nochi tlan nikchiwa kiteititia nik Notajtsi onechaltítlanki. ³⁷ Notajtsi Akin onechaltítlanki, noiwa kiteititia Akin Ne. Nomejwah ayik nonkikaktikateh itlajtol, nion nonkiitikateh, ³⁸ nion itlajtol amo onkalaki itech nomoyolo, porke amo nontlaneltokah Itech Akin Notajtsi Dios okwaltítlanki. ³⁹ Nomejwah

nonkimomachtiah itlajkuilol Dios porke nonkiyejekoliah nomechmakas yollistli non áyik tlami. Pero itlajkuilol Dios ompa tlajtoa de Ne, ⁴⁰ iwa maya ijkó, nomejwah amo nonkinekih nonwitseh nonawak para nonyolitoskeh nochipa.

⁴¹ Ne mach nikselia manechweyilikah n tlaltikpaktlakah. ⁴² Porke Ne nomechixmatok iwa nikmati amo nonkipiah itlasojtlalis Totajtsi Dios. ⁴³ Ne oniwala itech itoka Notajtsi iwa nomejwah amo nonnechseliah. Pero tla aka ok se wits itech ye itoka, nomejwah nonkiseliskiah. ⁴⁴ ¿Kenijki weletis nontlaneltokaskeh, tla san nonkitemojtinemih manomechweyilikah oksikimeh iwa amo nonkitemoah n weyílistli non kitemaka Akin sanwel Ye Dios? ⁴⁵ Amo xikmolikah Ne nomechteilis inawak Notajtsi, yej onka se akin nomechteilis, ye itlanawatil Moisés, akin nomejwah itech nonmoyolchikajtokeh. ⁴⁶ Porke tla milák nonkineltokaskiah tlan okijto n Moisés, noiwa Ne nonnechneltokaskiah, porke ye otlajkuilo de Ne. ⁴⁷ Pero tla amo nonkineltokah tlan Moisés okijkuilo, ¿kenijki nonkineltokaskeh tlan Ne nomechilia?

6

Jesús kintlakualtia mákuili mil tlakah

(Mt. 14:13-21; Mr. 6:30-44; Lc. 9:10-17)

¹ Satepa, Jesús oyá ik nepa lado de lago de Galilea non noiwa itoka Tiberias. ² Iwa miakeh tlakah oyayah iwan Jesús, porke okinmitayah n milagros non Ye okinchiwaya keman okimpajtiaya n kokoxkeh. ³ Otlanki Jesús otlejkok itech se tepetl iwa ompa omotlali iwan itlamachtijkawah. ⁴ Ijkuakó yowalajsia n paskua, inmiliwu n judójtah. ⁵ Ijkuak Jesús oontláchixki iwa okitak miakeh tlakah omooolojtokah, okili n Felipe:

—¿Kani tikkoatiweh paj para tikintlakualtiskeh ninteh tlakah?

⁶ Ijkó okili n Felipe san para kitas tlan kijos, porke Jesús yokimatia tlan kichiwaskia.

⁷ Ijkuakó Felipe okinankili:

—¡Ome siento denariojtomí paj, amo kajxilis tikinmajmakaskeh ajachitsi!

⁸ Andrés ikni n Simón Pedro, akin noiwa imomachtí okilito n Jesús:

⁹ —Nika kajki se telpetsintli, non kimpixtok mákuili pameh de sebada iwa ome michimeh, pero ¿kan matechajxili?

¹⁰ Ijkuakó Jesús okijto:

—Xikinmilikah nochteh mamotlajtlalikah.

Itech non lojar okatka xiujyo, iwa omotlajtlalijkeh kemi mákuili mil tlakah. ¹¹ Ijkuakó Jesús okinmónanki n pameh iwa omotlasojkama inawak Dios, otlanki okinmák itlamachtijkawah, iwa yejwah opé kinxejxeliliah nochteh non ompa oewatokah. Noiwa ijkó okichi iwan michimeh, iwa nochteh omotlamajsewijekah iwa kualí oijixwikeh. ¹² Ijkuak yoiixwikeh, Jesús okinmili itlamachtijkawah:

—Xikoololokah nochi tlan omoka amo san maawilti.

¹³ Okoolojkeh tlan ayakmó okikuajkeh ika mákuili paj de sebada, iwa okintemitijkeh májtlaktli iwa ome chikimeh. ¹⁴ Ijkuak n tlakah okitakeh n milagro non Jesús okichi, okijtojkeh:

—De milajka, Ye ni n profeta non saman walaskia itech nin tlaltikpaktli.

¹⁵ Pero Jesús okinmitak yejwah omochijchikajtokah kiwikaskeh para mayeto Inrey. Yika, oksepa oyá iwa otlejkok ikpak tepetl san Ye iselti.

Jesús nejnemi ixko atl

(Mt. 14:22-27; Mr. 6:45-52)

¹⁶ Ijkuak opé tleyua, itlamachtijkawah otemokeh okichiatoh itempa n lago de Galilea. ¹⁷ Otlejkokeh itech se barka iwa opé kikojchalwiah n lago para ajsiwih kan altepetl de Capernaúm. Ijkuakó yotleyuak, Jesús ayamó okwalinmajsia. ¹⁸ Ijkuakó se ejekatli chikaktik opé kitlatlamotla n atl. ¹⁹ Iwa yoyayah kemi se mákuili noso chikwase kilómetro itech atl. Okitakeh n Jesús nejnentiwits ixko atl iwa yokualinmasia. Ijkuakó yejwah omomojtijkeh, ²⁰ pero Ye okinmili:

—Amo ximomojtikah, Ne ni Jesús.

²¹ Ijkuakó yejwah opakeh iwa okitlejkoltijkeh itech barka. Iwa san nima n barka oajsito itech tlali kan oyayah.

N tlakah kitemoah n Jesús

²² Owalmstlatik, nochteh n tlakah non omokajkeh ik nepa lado de n lago, okitakeh okatka san se barka, iwa itlamachtijkawah n Jesús oyajkeh inselti, iwa Jesús amo oya inwah. ²³ Satepa, oksikimeh barkas non owalaya de Tiberias okalakikoh kan ik okikuajkeh n paj, iwa Jesús omotlasojkamah inawak Dios. ²⁴ Yika, ijkuak n tlakah okitakeh Jesús iwa itlamachtijkawah ayakmó ompa okatkah, otletlejkokeh itech nonteh barkas iwa oyajkeh Capernaúm okitemoto n Jesús.

Jesús Ye n paj non kitemaka yolílistli

²⁵ Ijkuak oajsitoh n Jesús ik nepa lado de n lago, okitlajtlaniykeh:

—Tlamachtí, ¿kermania otikalakiko nika?

²⁶ Jesús okinmili:

—De milajka, de milajka nomechilia, nomejwah nonnechtemoah amo por ononka-sjikamatkeh tlan kijosneki n milagro non onikchi, yej porke onomechtlakualti asta kan ononmijxwikeh. ²⁷ Amo xitekitikah por n tlákuali non kimati tlami, yej xitekitikah por n tlákuali non ayik tlami iwa kitemaka yolílistli. Non tlákuali Ne nomechmakas porke sanwel Ne Dios onechpéjpenki para nin tekítl.

²⁸ Ijkuakó yejwah okitlajtlaniykeh:

—¿Tlan tekítl moneki matikchiwahak para tiktekitiliskeh Dios?

²⁹ Jesús okinnankili:

—Ye ni tlan Dios okichi, iwa manechnehtokakah Ne Akin Ye okualtítlanki.

³⁰ Yejwah okilijkeh:

—¿Tlan milagro techititis para matiktakah iwa timitsnehtokaskeh? ¿Tlan weletis tikchiwas? ³¹ Towekatatawah okikuajkeh n paj non itoka maná kan tlatejtéyinki, ijko kemi kijtoa itlajkuilol Dios: “Paj de ilwikak okinmák makikuakah.” *Sal. 78:24; Éx. 16:4-15*

³² Jesús okinmili:

—De milajka, de milajka nomechilia: Moisés amo onomechmák n paj non owaltemok de ilwikak, yej Notajtsi Dios Akin nomechmaka n de milajka paj de ilwikak. ³³ Porke n paj non Dios kitemaka ye non waltemoa de ilwikak iwa kinmaka yolílistli n tlatikpaktlakah.

³⁴ Ijkuakó okilijkeh:

—Tejwatsi, techmaka sanwel non paj.

³⁵ Jesús okinmili:

—Non paj ye Ne, akin niktemaka yolílistli. Akin wits nonawak mach ok ayik xitlatlas, iwa akin nechneltoka ayik amikis. ³⁶ Pero ijko kemi yonomechili, maya yononnechitakeh amo nonnechneltokah. ³⁷ Nochi tlan Notajtsi nechmaka wits nonawak, iwa akimeh witseh nonawak, Ne nikinselis. ³⁸ Porke Ne amo oniwalttemok de ilwikak para nikchiwas tlan Ne nechpaktia, yej para nikchiwas tlan kipaktia Akin onechaltítlanki. ³⁹ Iwa Notajtsi Akin onechaltítlanki, amo kineki manikpolo nion se de nochteh akimeh onechinmák, yej kineki manikinyoliti itech nekateh iksemi tonatijmeh. ⁴⁰ Porke tlan Notajtsi Dios kineki Ye ni: nochteh akimeh kitaskeh Ikone Dios iwa kineltokah, maya mamikikah moyolitiskesh porke Ne nikinyolitis itech n iksemi tonati.

⁴¹ Ijkuakó n judójtah opé moichtakatlapowiah de Jesús porke okijto: “Ne nipaj non owaltemok de ilwikak.” ⁴² Iwa okijtoayah:

—¿Amo ye nin Jesús, ipiltsi n José? Tejwah tikinmixmatih ipapá iwa imamá. ¿Keniijkijtoa owaltemok de ilwikak?

⁴³ Jesús okinmili:

—Ayakmó ximokulankatlapowikah. ⁴⁴ Amaka weletis wits nonawak, tla amo kinotsa Notajtsi Akin onechaltítlanki, iwa Ne nikyolitis itech n iksemi tonati. ⁴⁵ Itech intlajkuilol n profetas ijkuilolitik: “Dios kinmachtis nochteh.” *Is. 54:13; Jr. 31:33-34* Yika, nochteh akimeh kikakih Notajtsi iwa kajsikamatih tlan kinmachtia, witseh nonawak.

⁴⁶ 'Amaka yokitak Notajtsi, sanwel Ne Akin niwalewatok de Dios, Ne yonikitak. ⁴⁷ De milajka, de milajka nomechilia: Akin Ne nechnehtoka kipia yolílistli non ayik tlami. ⁴⁸ Ne ni paj non kitemaka yolílistli. ⁴⁹ Nomowejkatatawah kan tlaltejtéyinki okikujkeh n paj non itoka maná, iwa maya okikujkeh non paj omikeh. ⁵⁰ Pero Ye nin paj non waltemoa de ilwikak, akin kikuas non paj, ayik mikis. ⁵¹ Ne nonewia non paj yolitok non owaltemok de ilwikak. Tla aka kikua non paj, nochipa yolitos. Nokuerpo ye non paj non niktemaka para mayolitokah nochipa n tlaltikpaktlakah.

⁵² Ijkuakó n judfójtch opé motlatlajtolkopah iwa okimoliayah:

—¿Kenomi weletis techmakas matikkuakah ikuerpo?

⁵³ Jesús okinmili:

—De milajka, de milajka nomechilia: Tla nomejwah amo nonkikuaskeh nokuerpo, Ne non onimochi ni tlakatl, iwa tla amo nonkoniskeh noesso, amo kipiah yolílistli. ⁵⁴ Akin kikua nokuerpo iwa koni noesso kípías yolílistli non ayik tlamis, iwa Ne nikyolitis itech iksemi tonati. ⁵⁵ Porke nokuerpo de milajka tlákuali, iwa noesso de milajka tlaonlistli. ⁵⁶ Akin kikua nokuerpo iwa koni noesso, moseitilijtok nowa iwa Ne íwa. ⁵⁷ Notajtsi Akin onechaltítlanki, yolitok, iwa Ne niyolitok por Ye, ijko noiwa akin kimomajsewis nokueqppo, yolitos por Ne. ⁵⁸ Ne Ni paj non owaltemok de ilwikak, pero nin paj amo kemi n maná non okikujkeh nomotatawah iwa satepa omijmikeh. Akin kikuas nin paj, nochipa yolitos.

⁵⁹ Jesús ijki okitemachti kan se sinagoga* kan altepetl de Capernaúm.

Miakeh kikawah n Jesús

⁶⁰ Ijkuak ijko okikakeh itlamachtijkawah n Jesús, miakeh okijtojkeh:

—Nin tlamachtílistli kema chikawak, ¿akin weletis kajsikamatis?

⁶¹ Jesús okimatia itlamachtijkawah omoichtakatlapowiyah ika tlan okijto, iwa okinmili: —¿Ye ni nomechkuejsoa? ⁶² ¿Tlan nonkimoliah tla nonnechitaskiah Ne Non onimochi ni tlakatl nitlejkos ilwikak kan ocho onikatka? ⁶³ N espíritu kimaka yolílistli se kuerpo. N kuerpo mach itla ipati tla amo kipia espíritu. N tlájtoltch non Ne yonomechili wits de n espíritu iwa kimaka yolílistli. ⁶⁴ Pero miálmasteh nomejwah akimeh amo nontlaneltokah.

Jesús ijko okijto porke desde ocho yokimatia akimeh amo kineltokaskiah iwa akin kitemaktiskia. ⁶⁵ Iwa okijto:

—Yika, yonomechili amaka weletis wits nonawak, tla Notajtsi amo kitekawilia.

⁶⁶ Ika noni, miakeh itlamachtijkawah n Jesús okikakajtejkeh iwa ayakmo onemiah íwa.

Jesús techilia kenomi tiyolitoskeh nochipa

⁶⁷ Ijkuakó Jesús okintlajtlani n májtlakteh iwa ome itlamachtijkawah:

—¿Nomejwah noiwa nonkinekih non nechkakajtewaskeh?

⁶⁸ Simón Pedro okinankili:

—Noteko, ¿Akin ok se íwa tiaskeh? Sanwel Tejwatsi tikpia non tlájtoli non kitemaka yolílistli non ayik tlami. ⁶⁹ Tejwah tikneltokah iwa tikmatih Tejwatsi n Yolchipawak de Dios.

⁷⁰ Ijkuakó Jesús okinnankili:

—Ne onomechpépenki nomejwah n májtlakteh iwan ome. Pero seme de nomejwah ye n diablo.

⁷¹ Ijkuak ijko okijto, Jesús otlajtoaya de Judas Iscariote ipiltsi n Simón, porke ye kitemaktiskia maya okatka seme de n májtlakteh iwa ome itlamachtijkawah.

7

Ikniwah n Jesús mach okineltokayah

¹ Satepa ijkuak ijko yotlamochi, Jesús onemia itech tlali de Galilea, mach okinekia nemis itech altepetl de Judea, porke ompa sikimeh judfójtch okinekia kimiktiskieh. ² Pero kemi yowalajsia inmilwiu n judfójtch non itoka ilwitl de n akákalteh, ³ ikniwah n Jesús okilijkeh:

* 6:59 sinagoga: se kali kan omoolooyah n judfójtch nochi sábado.

—Amo ximokawa nika, xio kan tlali de Judea, ijko motlamachtijkawah, kitaskeh tlan tikchiwa. ⁴Porke akin kineki makixmatikah, mach kichiwa itla san ichtaka. Yej moneki xikinchiwa milagros inmixpa nochteh n tlakah para ijko nochteh makitakah tlan tikchiwa.

⁵Ikniwah n Jesús ijko okiliayah, porke nion yejwah amo okineltokayah. ⁶Yika Jesús okinmili:

—Ayamo walajsi noora para nias ompa, pero nomejwah san tlan oras weletis nonyaskesh. ⁷N tlaltikpaktlakah mach weletis nomechkokoliskeh, pero Ne nechkokoliah, porke Ne nikinmilia yejwah kichiwah tlan amo kuali. ⁸Nomejwah xitlejkokah ilwitl. Ne amo nitlejkos porke ayamó walajsi noora.

⁹Ye ijko okinmili iwa omoka Galilea.

Jesús yáwi ilwitl non itoka akákalteh

¹⁰Satepa, ikniwah n Jesús otlejkokeh ilwitl. Ye noiwa otlejkok pero san ichtaka. ¹¹Itech ilwitl de Jerusalén, n tlayakankeh judfojtech okitemoayah n Jesús iwa omotlajtlaniayah:

—¿Kan ik nentinemi non tlakatl?

¹²Iwa miakeh omoichtakatlapowiayah de Ye. Sikimeh okijtoayah: “Jesús, ye kuali tlakatl.” Pero oksikimeh okijtoayah: “Amó, porke san kinkajkayawa n tlakah.”

¹³Pero amaka omixewiaya tlajtos de Ye inmixpa n tlayakankeh judfojtech, porke okinmawiliayah.

¹⁴Ijkuak yoyaya tlajko ilwitl, Jesús otlejkok kan Weyi Tiopa iwa opé tlamachtia. ¹⁵N tlayakankeh judfojtech san omotlajtlachialtiayah iwa okijtoayah:

—¿Kenomi nin tlakatl satlawel kimati miak, iwa amo omixtlamachtí?

¹⁶Jesús okinnankili:

—Notemachtilis amo Ne noaxka, yej de Akin onechaltítlanki. ¹⁷Akin kineki kichiwas tlan Dios kimonekiltia, kajsikamatis kox notemachtilis walewatok de Dios, noso nikijtoa san tlan Ne nikijtoa. ¹⁸Akin tlajtoa san tlan ye itlajtol, kichiwa san para makiyektenewakah n tlakah. Pero Ne nikneki nikweyijkachiwas Akin onechaltítlanki, yika nikijtoa tlan milák iwa ayik nitlakajkayawa.

¹⁹Moisés onomechmák n tlanawátili, iwa nion se de nomejwah amo kichiwa tlan kijtoa non tlanawátili. ¿Tleka kiné nonkinekih nonnechmiktiskeh?

²⁰N tlakah okinankilijkeh:

—Te tikpia se demonio; ¿akin kineki mitsmiktis?

²¹Jesús okinnankili:

—Se kuali tektil onikchi itech sábadó iwa nochteh nomejwah nonmotlajtlachaltiah. ²²Moisés onomechnawati ximosirkunsidarokah, pero non tlanawátili amo walewatok de Moisés, yej de nomowekataatawah, iwa nomejwah nonkisirkunsidaroh se konetl maya mayeto sábadó ijkuak amo para nontekitisekeh. ²³Ijko kiné, nomejwah nonkitlakitah itlanawatil Moisés, iwa nonkisirkunsidaroh se konetl maski mayeto sábadó, porke ijkuakó ochikometik de otlákati, ¿tleka kiné nonkualanih nowa por onikpajti se tlakatl itech sábadó? ²⁴Amo san nima xiktalajtlakoltikah se tlakatl san por ijko nonkimoliah, yej xiktalajtlakoltikah kemi moneki.

Jesús kinmilia de kan walewatok

²⁵Ijkuakó sikimeh tlakah de Jerusalén okimoliayah:

—¿Amo nin tlakatl kitemojtinemih para kimiktiskeh? ²⁶¿Xikitakah!, tlajtojtok teixpa iwa amitla kiliah ¿chamo totlayanwah yokajsikamatkeh nin tlakatl Ye n Cristo? ²⁷Pero tejwah kuali tikmatih kan walewatok nin tlakatl. Pero ijkuak wits n Cristo, amaka kimatis de kan wits.

²⁸Jesús otlamachtijtoka itech Weyi Tiopa, iwa ijkuak okikak tlan okijtoayah, okijto chikawak:

—¿Nomejwah nonkijtoah nonnechixmatih iwa nonkimatih de kan niwalewatok! Pero amo oniwala san por Ne oniknek, yej onechaltítlanki Akin nomejwah amo nonkixmatih. Ye yekmilajka. ²⁹Ne nikixmati porke inawak oniwala, iwa Ye onechaltítlanki.

³⁰ Ijkuakó n tlayakankeh judíojtéh okinekih kikitskiskéh n Jesús. Pero amaka omixewi okikitski, porke ayamó oajsia iora para kikitskiskéh. ³¹ Pero miakéh okineltokakéh, iwa okijtoayah:

—Ijkuak wits n Cristo, ¿kox kinchiwas okachi wejweyi milagros ke nin tlakatl?

N fariseos kintitlanih insoldadojwah para makikitskikah n Jesús

³² N fariseos okikakéh tlan okijtoayah n tlakah de Jesús, yika omotlatlalwijkeh iwa n tiopixkeh non tlayakantokéh, iwa okintitlankeh non otlamokuitlawiyah kan Weyi Tiopa makikitskitih n Jesús. ³³ Ijkuakó Jesús okijto:

—Ne niyetos nomowah sa kanaj kech tonati, tlamis oksepa nimokopas inawak Akin onechaltíflanki. ³⁴ Nomejwah nonnechtemoskeh, pero amo nonnechajsiskeh, porke mach nonweletiskeh nonyaskeh kan Ne nias.

³⁵ Ijkuakó n tlayakankeh judíojtéh omotlajtlaniayah:

—¿Kan ik yas nin tlakatl, kan amo weletis tikajsiskeh? ¿Chamo kinmachtitih n israelitas non xitintokéh itech tlali de Grecia, noso innewiah n tlakah de Grecia kinmachtiti? ³⁶ ¿Tlan kijtosneki: “Nonnechtemoskeh pero mach nonnechajsiskeh, porke amo weletis nonyaskeh kan Ne nio?”

N améyali non kichiwa matiyolitokah nochipa

³⁷ Itech iksemi tonati, de non weyi ilwitl, Jesús omóketski iwa ika chikawak tlájtoli okijto: —Tla aka amiki, mawiki nonawak iwa maatlí. ³⁸ Kemi kijtoa itlajkuilol Dios, akin necheltokas, itech iyolo mextos atl non kitemaka yoflistli.

³⁹ Jesús otlajtojtoka de n Espíritu non kiseliskiah akiméh kineltokaskiah. Pero n Espíritu ayamó owaltemoaya porke Jesús ayamó okiseliaya weyílistli.

N tlaltikpaktlakah moxexeloah

⁴⁰ Ijkuakó sikiméh ijkuak okinkakéh ninteh tlájtoltéh, okijtojkeh:

—De milajka, nin tlakatl Ye n profeta.

⁴¹ Iwa oksikiméh okijtoayah:

—Ye ni n Cristo.

Pero oksikiméh okijtoayah:

—¿De Galilea weletis wits n Cristo? ⁴² Itlajkuilol Dios kijtoa Cristo walewatos de n Rey David, de Belén kan ochantitoka n David.

⁴³ Ijkó, n tlakah omoxexelojkeh porke sikiméh amo okineltokayah n Jesús. ⁴⁴ Sikiméh okinekih kikitskiskéh, pero amaka omixewi okikitski.

N wejweyi tlanawatijkeh mach kineltokah n Jesús

⁴⁵ N tlamokuitlawijkeh de n Weyi Tiopa, oyajkeh innawak n fariseos iwa innawak tiopixkeh non tlayakantokéh, iwa ninteh okintlajtlaniyeh:

—¿Tleka amo ononkualikakéh?

⁴⁶ N tlamokuitlawijkeh otlanankilijkeh:

—¡Nion se tlakatl ayik ijkó tlajtoa kemi nin tlakatl!

⁴⁷ Ijkuakó n fariseos okinmilijkeh:

—¿Noiwa nomejwah ononkimokawilijkeh manomechkajkayawa? ⁴⁸ ¿Kox aka totlanawati noso aka fariseo okineltokak non tlakatl? ⁴⁹ Akiméh kineltokah non tlakatl, amo kixmati itlanawatil Moisés, yika Dios kintlajjowíltis.

⁵⁰ Nicodemo tewa iwan fariseos, akin se yúali okitato n Jesús, okinmili:

⁵¹ —Totlanawatilis amo techkawilia matiktajtlakoltikah se tlakatl, tla amo achto tikkakih tlan ika kiteiliah.

⁵² Ijkuakó okinankilijkeh:

—¿Te noiwa de Galilea? Xikmoyekmacti itlajkuilol Dios iwa tikitas itech Galilea ayik kistika nion se profeta.

⁵³ Iwa nochteh oyayajkeh inchajcha.

8

N siwatl non okajsito iwan ok se tlakatl

¹ Jesús oyá kan olivostepetl. ² Ijkuak owaltláneski, oksepa oyá kan Weyi Tiopa. Omijkuanijkeh inawak, iwa Ye omotlali iwa opé kinmachtia. ³ Ijkuak Jesús otlamachtijtoka, n tlamachtijkeh de itlanawatil Moisés iwa n fariseos okualikilijkeh se siwatl non okajsitoh iwan ok se tlakatl non amo iokich itech tlajtlákoli. Yejwah okiketsatoh tlatlajkotiah, ⁴ iwa okilijkeh n Jesús:

—Tlamachtí, nin siwatl otikajsitoh itech tlajtlákoli. ⁵ Itlanawatil Moisés tlanawatia matikinmiktikah ika tetl akimeh ijko kichiwah. * Tejwatsi, ¿tlan tikijtoa?

⁶ Yejwah ijko okilijkeh para kitaskeh tlan kichiwas, iwa ijko kipiaseh tlan ika kiteiliskeh. Ijkuakó Jesús omotolo iwa opé tlajkuiloa ixko tlali ika imajpil. ⁷ Pero kemi okachi okitlatlajtlanayah, Ye omoyékketski iwa okijto:

—Tla aka de nomejwah amo kipia tlajtlákoli, ye achto makimotla ika tetl.

⁸ Jesús oksepa omotolo iwa ok otlajkuilo ixko tlali. ⁹ Keman okikakeh tlan Jesús okinmili, se por se oyayajtiakkeh. Achto oyayajkeh non okachi ya wewemeh, iwa ijkuak nochteh yoyayajkeh, sa Jesús omoka iselti iwan siwatl. ¹⁰ Ijkuakó, Jesús omoyékketski iwa kemi ayakmaka okitak, okitlajtlani n siwatl:

—Siwatl, ¿kanin kateh non omitsteilayah? ¿Amaka omitstlajtlakolti?

¹¹ N siwatl okili:

—Nion se de yejwah Noteko.

Ijkuakó Jesús okili:

—Nion Ne omitstlajtdlakolti. Xio, iwa ayakmó oksepa xitlajtlakolchiwa.

Jesús Ye n tláwili itech nin tlaltípkaktli

¹² Jesús oksepa okintlapowi iwa okinmili:

—Ne nitláwili itech nin tlaltípkaktli. Akin wits nonawak, kideas n tláwili non kimakas nonmilstli iwa ayik nemis kan tleyua.

¹³ N fariseos okilijkeh:

—San Te monewia timotenewa akin te, yika, tlan tikijtoa mach itla ipati.

¹⁴ Jesús okinnankili:

—Maya Ne nonewia nimotenewa Akin Ne, tlan nomechilia milák, porke Ne nikmatok kan oniwalewak iwa kan nio. Pero nomejwah amo nonkimatih kan oniwalewak nion kan nio. ¹⁵ Nomejwah nontetlajtlakoltiah kemi kichiwah n tlaltípkaktlakah. Ne amaka niktlatlajtlakoltia. ¹⁶ Pero tla Ne nitetlajtlakoltia, nikchiwa ika tlan milák, porke amo san Ne noselti nitetlajtlakoltia, yej Ne iwan Notajtsi Dios akin onechaltítlanki. ¹⁷ Itech nomotlanawatil ijkuilitok, sanwel kiseliskeh intlajtol ome iwa amo san se. ¹⁸ San Ne nonewia nimotenewa akin Ne, iwa Notajtsi Dios Akin onechaltítlanki, noiwa nechteixmatiltia akin Ne.

¹⁹ Yejwah okitlajtlanjkeh:

—¿Kanin kajki Mota?

Jesús okinnankili:

—Nomejwah amo nonnechixmatih, nion nonkixmatih Notajtsi, tla nomejwah nonnechixmatiskiah, noiwa nonkixmatiskiah Notajtsi.

²⁰ Ninteh tlájtoltel Jesús okimijto ijkuak otlamachtijtoka itech n Weyi Tiopa kan ik okatka n kaxajtomij. Pero amaka okikitski porke ayamó oajsia n tonati para kikitskiskeh.

‘Kan Ne nias nomejwah amo weletis nonyaskeh’

²¹ Jesús oksepa okinmili:

—Ne nias, iwa nonnechtemoskeh, pero nonmikiskeh itech nomotlajtlakolwah. Yika, kan Ne nias, amo weletis nonyaskeh.

²² Ijkuakó n tlayakankeh judíojeteh okijtojkeh:

—¿Chamo kineki momiktis, yika kijtoa kan Ye yas, tejwah mach weletis tiaskeh?

* 8:5 Itlanawatil Moisés tlanawatia matikinmiktikah ika tetl san ken ome akimeh ijko kichiwah, iwa amo san siwatl. Lv. 20:10.

²³ Ijkuakó Jesús okinmili:

—Nomejwah nonteaxkawah itech nin tlaltíkpaktli, pero Ne niwalewatok de ilwikak. Nomejwah non tlaltíkpaktlakah, pero Ne amó. ²⁴ Yika onomechili nonmikiskeh itech nomotlajtlakolwah. Porke tla nomejwah amo nonnechneltokah kox Ne Ni Cristo, nonmikiskeh itech nomotlajtlakolwah.

²⁵ Ijkuakó oksepa okitlajtlanjkeh:

—¿Akin te?

Jesús okinnankili:

—Ne yonomechili Akin Ne. ²⁶ Nikpia miak tlájtoli tlan nomechilis iwa miak tlan ika nomechtlajtlakoltis, pero Akin onechaltítlanki kijtoa tlan milák, iwa tlan Ne nikinmilia n tlaltíkpaktlakah ye tlan onikkak, okijto.

²⁷ Yejwah amo oksajikamatkeh Jesús okintlapowiaya de Itajtsi Dios. ²⁸ Yika Jesús okinmili:

—Ijkuak nonnechajkokuiskeh, Ne non onimochi ni tlakatl, ijkuakó nonkajsikamatiskeh Ne Ni Cristo, iwa amitla nikchiwa san tlan Ne nikneki. Ne sanwel nikijtoa tlan Notajtsi Dios onechmachtli. ²⁹ Porke Akin onechaltítlanki kajki nowa. Amo kema nechkawa noselti, porke nochipa nikchiwa tlan Ye kipaktia.

³⁰ Ijkuak Jesús ijko okinmili miakeh okineltokakeh.

Jesús kinnmilia kenomi se makisas itech tlajtlákoli

³¹ Ijkuakó Jesús okinmili n judíojteh non okineltokakeh:

—Tla nomejwah nochipa nonkitlakitaskeh notlajtol, milák nonyetoskeh notlamachtikawah. ³² Iwa nonkixmatiskeh tlan milák, iwa tlan milák nomechmakixtis.

³³ Yejwah okinankilijkeh:

—Tejwah tiwalewatokeh de Abraham, iwa ayik otikatkah titlanemakteh, ¿kenijki Te tikijtoa techmakixtis?

³⁴ Jesús okinankili:

—De milajka, de milajka nomechilia, nochteh akimeh kichiwa tlajtlákoli kijtosneki n tlajtlákoli kinnawatijtok kemi se tekowa. ³⁵ Se esclavo amo nochipa mokawas ichan iteko. Pero se tekone nochipa yetos mowa. ³⁶ Ijko kiné, tla Ikone Dios nomechmakixtis, nomejwah de milajka nonmomakixtiskeh. ³⁷ Quali nikmatok nomejwah nonwalewatokeh de Abraham. Pero nonkinekih nonnechmiktiskeh porke amo nonkiseliah notlajtol itech nomoyolo. ³⁸ Tlan onikitak inawak Notajtsi, ye nikijtoa. Iwa nomejwah tlan ononkikakeh de nomota nonkichiwah.

³⁹ Yejwah okilijkeh:

—¡Tejwah titepilwah de Abraham!

Jesús okinmili:

—Tla de milajka nonyetoskiah ipilwah Abraham, nonkichiwaskiah tlan Ye okichi. ⁴⁰ Pero maya yonomechili tlan milák, tlan Dios onechititi, nomejwah nonkinekih nonnechmiktiskeh. ¡Abraham ayik ijko okichi! ⁴¹ Nomejwah nonkichiwah tlan kichiwa nomota.

Yejwah okinankilijkeh:

—Tejwah amo tiichtakakokoneh, sanwel se totata tikpia, iwa Ye Dios.

⁴² Jesús okinnankili:

—Tla de milajka Dios yaskia Nomotajtsi, nomejwah nonnechtlasojtlaskiah, porke Ne oniwala de Dios itech nin tlaltíkpaktli. Amo oniwala san por Ne oniknek, yej Dios onechaltítlanki. ⁴³ ¿Tleka amo nonweletih nonkajsikamatih tlan nomechilia? Porke amo nonkinekih nonkiseliskeh notlajtol. ⁴⁴ Nomejwah nomota n diablo, nomejwah ipilwah, iwa nonkichiwah tlan ye kiwelita. N diablo ye se temikti desde ipewayaya n tlaltíkpaktli iwa ayik kijtoa tlan milák. Porke ye amo kixmati tlan milák, iwa ijkuak tlajtoa, tlakajkawaya porke ye non iteki. Iwa ye n teta de nochteh non tlakajkawayah. ⁴⁵ Pero kemi Ne nikijtoa tlan milák, yika nomejwah mach nonnechneltokah. ⁴⁶ ¿Akin de nomejwah weletis kijtos ke nikpia itla tlajtlákoli? Iwa tla Ne nikijtoa tlan milák, ¿tleka amo nonnechneltokah?

⁴⁷ Akimeh tepilwah de Dios, kikakah itlajtol Dios. Pero kemi nomejwah amo nontepilwah de Dios, mach nonnechkakah.

Ijkuak Abraham otlákatki Cristo yokatka

⁴⁸ Ijkuakó n tlayakankeh judíojteh okilijkeh:

—Yompa tlan tejwah tikijtoah, te de Samaria iwa tikpixtok se amokuali espíritu.

⁴⁹ Jesús okinnankili:

—Ne amo níkpia se demonio. Ne sanwel níkweyilia Notajtsi, pero nomejwah nonnech-mawistetepewah. ⁵⁰ Ne mach níktemoa manechweyilikah. Pero onka se Akin kimonekiltia manechweyilikah, iwa Ye Akin teixkomakah. ⁵¹ De milajka, de milajka nomechilia, akin kitlakita notlajtol, ayik mikis.

⁵² Ijkuakó n tlayakankeh judíojteh okinankilijkeh:

—Axa kualí tikmatih te tikpia se demonio. Abraham iwa nochteh n profetas omikkeh, iwa te tikijtoa: “akin kitlakita notlajtol, ayik mikis.” ⁵³ ¿Mach te okachi tiweyijkatitok ke Totata Abraham? Ye noiwa omikki iwa n profetas noiwa. ¿Akin te timomachilia?

⁵⁴ Jesús okinnankili:

—Tla san Ne nimoweyijkachiwa, noweyijkachiwalis amitla ipati. Pero Akin nechwey-ijkachiwa, Ye Notajtsi, Akin nomejwah nonkijtoah Nomodios. ⁵⁵ Pero nomejwah mach nonkixmatih. Ne de milajka níkixmati, iwa tla níkijtoskia amo níkixmati, níxolopijtiskia kemi nomejwah. Pero Ne kema níkixmati, iwa níkchiwa tlan Ye nechnewatia. ⁵⁶ Nomotata Abraham, opaki ijkuak okima níwalaskia, iwa ika itlaneltokalis onechitak iwa opakmik.

⁵⁷ Ijkuakó n tlayakankeh judíojteh okilijkeh n Jesús:

—Ayamó tikpia ome póali iwa n májtlaktli xiwitl, ¿iwa tikijtoa otikitak Abraham?

⁵⁸ Jesús okinnankili:

—De milajka, de milajka nomechilia: ¡Ijkuak Abraham ayamó otlakatia, Ne yonikatka!

⁵⁹ Ijkuakó yejwah okinmonankeh temeh para kimojmotlaskeh n Jesús. Pero Ye okinmot-laatili, iwa opanok intlajkotiah, iwa okiski de kan Weyi Tiopa.

9

Jesús kipajtia se tlakatl non amo otlachiaya desde otlákatki

¹ Ijkuak Jesús opanotiaya itech se ojtli, okitak se tlakatl non amo otlachiaya desde otlákatki. ² Iwa itlamachtijkawah okitlajtlanjkeh:

—Tlamachtí, ¿tleka ijko otlákatki nin tlakatl? ¿Akin otlajtlakolchi, itajwah, noso ye inewia?

³ Jesús otlanjankili:

—Amo por ye otlajtlakolchi nion por itajwah, yej ijko otlákatki para mamota ítech, tlan Dios weletis kichiwas. ⁴ Iwa axa kemi ok tlanestok, níkpia níktekítis Akin onechaltílaniki, porke ajsiki n yúali ijkuak ayakmaka weleti tekiti.

⁵ Axa, kemi Ne ok nika itech nin tlaltípkaktli, Ne nitláwili itech n tlaltípkaktli.

⁶ Ijkuak Jesús ijko okijto, ochijchak ipan tlali, iwa okichijchi siki sokitl. Okinxawili itech ixtololowah n kócoxki, ⁷ iwa okili:

—Ximoixpajpakati kan tanke de Siloé. Siloé kijosneki Tlatitlánili.

N tlakatl non amo otlachiaya omoixpajpakato, iwa ijkuak owalmokopato, yotlachiaya.

⁸ Ijkuakó non okixmatiah iwa akimeh okimatiah amo otlachiaya okijtojkeh:

—¿Amo ye ni non omijtlaniaya?

⁹ Sikimeh okijtoayah:

—Ye ni n tlakatl.

Oksikimeh okijtoayah:

—Nesi ijko tlachixtok, pero amo ye.

Pero inewia okimiliaya:

—Ejé, ye ne.

¹⁰ Ijkuakó okitlajtlanjkeh:

—¿Kenijki ya weleti titlachia?

¹¹ Ye okinnankili:

—Neká tlakatl non Itoka Jesús, okichijchi siki sokitl, onechxawili kan noixtololowah iwa onechili: “Ximoixpajpakati kan tanke de Siloé.” Ne onia iwa ijkuak yonimoixpajpak, oniwaltláchixki.

¹²Iwa oksepa okitlajtlanijkeh:

—¿Kanin kajki non tlakatl?

Ye okinmili:

—Mach nikmati.

N fariseos kitlatsintokiah n tlakatl non amo otlachiaya

¹³Ijkuakó n tlakatl non amo otlachiaya okiwikakeh innawak n fariseos. ¹⁴Porke ijkuak Jesús okichijchi sokitl iwa okintlapoli ixtololowah n tlakatl, okatka sábadó ijkuak yejwah mosewiah. ¹⁵Ijkuakó n fariseos oksepa okitlajtlanijkeh kenomi otláchixki, iwa ye okinnankili:

—Onechxawili sokitl itech noixtololowah, onimoixpajpak, iwa axa ya nitlachia.

¹⁶Ijkuakó sikimeh fariseos okilijkeh:

—Akin ijko okichi amo walewatok de Dios, porke amo kitlakita n sábadó ijkuak moneki se mamosewi.

Pero oksikimeh okijtoayah:

—¿Kenijki weletis se tlajtlakolchi ijko kichiwas?

N tlakah omoxelobjkeh. ¹⁷Ijkuakó oksepa okitlajtlanijkeh n tlakatl non amo otlachiaya:

—¿Iwa te, tlan tikijtoa de neká tlakatl non omitsmák motlachialis?

Ye otlanankili:

—Ne nikijtoa Ye se profeta.

¹⁸N tlayakankeh judíojteh mach okineltokayah kox milák amo otlachiaya. Ijkuakó okinnotskeh intajwah, ¹⁹iwa okintlajtlanijkeh:

—¿Ye ni nomotelpoch non nomejwah nonkijtoah amo otlachiaya ijkuak otlákatki? ¿Iwa axa kenomi ya tlachia?

²⁰N tetajmeh otlanankilijkeh:

—Ye totelpoch, iwa kualitkmatokeh amo otlachiaya ijkuak otlákatki. ²¹Pero axa, amo tikmatih kenijki ya weletitlachia iwa amo tikmati akin okintlapoli ixtololowah. Inewia xiktlajtlanikah, ye ya tlakatl iwa weletis nomechilis.

²²N tetajmeh ijko otlanankilijkeh porke okinmawiliayah n tlayakankeh judíojteh. Porke n tlayakankeh judíojteh yomotlatlalwijkeh ayakmó kinkawiliskiah makalakikah kan sinagoga* akimeh kijtoskiah Jesús Ye n Cristo. ²³Yika itajwah okijtojkeh: “Ye inewia xiktlajtlanikah porke ya tlakatl.”

²⁴Ijkuakó n tlayakankeh judíojteh oksepa okinotskeh n tlakatl non achto amo otlachiaya, iwa okilijkeh:

—Techili tlan milák ixpa n Dios, tejwah tikmatokeh non tlakatl, tlajtlakolchi.

²⁵Ijkuakó n tlakatl non yotlachiaya okinnankili:

—Ne mach nikmati kox tlajtlakolchi noso amó. Sanwel nikmatok, achto amo onitlachia ya iwa axa ya nitlachia.

²⁶Iwa oksepa okitlajtlanijkeh:

—¿Tlan omitstokti? ¿Kenomi omitsintlapoli moixtololowah?

²⁷Ye okinnankili:

—Ne yonomechili iwa amo nonnechkakih, ¿tleka nonkinekih oksepa manomechili? ¿Noiwa nomejwah nonkinekih nonyetoskeh itlamachtijkawah?

²⁸Ijkuakó yejwah fiero okitenejkeh iwa okilijkeh:

—Te yotimochi itlamachtijkau non tlakatl, pero tejwah tiitlamachtijkawah Moisés.

²⁹Tejwah tikmatokeh Dios okitlapowi n Moisés. Pero non tlakatl, mach tikmatih kan owala.

³⁰Ijkuakó n tlakatl okinnankili:

* 9:22 sinagoga: se kali kan omoololoyah n judíojteh nochi sábadó.

—¡Kenijki! Ye onechintlapoli noixtololowah iwa nomejwah amo nonkimatih kan owala. ³¹Kuali tikmatih Dios amo kinkaki n tlajtlakolejkeh. Ye sanwel kinkaki akimeh kiweyijkachiwah iwa kichiwah tlan Ye kimonekiltia. ³²Mach ayik tikkakih aka tlakatl makitlachialti se akin amo tlachia desde otlákatki. ³³Tla nin tlakatl amo walewaskia de Dios, amitla weletiskia kichiwaskia.

³⁴Yejwah okilijkeh:

—Te otlákatki ika miak tlajtlákoli, ¿iwa axa tikneki techmachtis?

Ijkuakó okwalkixtijkeh de kan sinagoga.

N tlakah non kijtoah tlachiah pero amitla kimatih

³⁵Jesús okima n tlakatl non okimák itlachialis okwalkixtijkeh de kan sinagoga, iwa ijkuak okinamik okili:

—¿Te tikneltoka Ikone Dios?

³⁶Ye okinankili:

—Tejwatsi, techili akin ye iwa nikneltokas.

³⁷Jesús okinankili:

—Te yotikitak, iwa Ye Akin íwa timotlapowijtok.

³⁸Ijkuakó n tlakatl omotlankuáketski inawak Jesús iwa okili:

—Nimitsneltoka, Tejwatsi Noteko.

³⁹Otlanki Jesús okili:

—Ne oniwala itech nin tlaltípkaktli para nikinmilis kox kuali noso amokuali tlan kichiwah n tlaltípkaktlakah, iwa non amo tlachiah matlachiakah iwa non tlachiah amo matlachiakah.

⁴⁰Ijkuakó sikimeh fariseos non ompa okatkah, ijkuak íjkó okikakeh okitlajtlanjkeh:

—¿Kijtosneki tejwah noiwa amo titlachiah?

⁴¹Jesús okinnankili:

—Tla nomejwah milák amo nontlachiaskiah, amo nonkipiaskiah tlajtlákoli. Pero kemi nomejwah nonkijtoah kuali nontlachiah, yika nonmokawah itech nomotlajtlakolwah.

10

N tlájpixki iwa ichkameh

¹De milajka, de milajka nomechilia, akin amo kalaki kan ik ikalte n ichkakorral iwa san tsekuini, noni se ichtek. ²Pero akin kalaki kan ik inkalte n ichkameh, ye intlájpixki iwa ye kinmokuitlawia. ³N kaltentlamokuitlawi kitlatlapolia n tlájpixki, iwa iichkawah kitenkakah. Ye kinnotsa iichkawah ika intoka, iwa kinkixtia. ⁴Iwa ijkuak yokinkixti nochteh iichkawah, kinyakana. Iwa iichkawah yawih ikuitlapa porke kitenkakah. ⁵Pero se non amo kixmati mach iwan yawi, yej kicholiliskeh porke amo kitenkakah se akin amo kixmatih. ⁶Jesús okinmili nin tlapoálistli, pero yejwah mach okajsikamatkeh tlan okinekia makajsikamatikah.

Jesús Ye n kuali Tlájpixki

⁷Ijkuakó Jesús oksepa okinmili:

—De milajka, de milajka nomechilia: Ne n kaltentli kan ik kalakih n ichkameh. ⁸Nochteh akimeh owalajkeh achto de Ne, okatkah ichtekeh iwa tekajkayajkeh. Pero n ichkameh mach okintenakeh. ⁹Ne n kaltentli, akin kalakis itech non kaltentli non Ne nonewia, momakixtis. Kalakis iwa kisas iwa kajsis tlan kikuas.

¹⁰N ichtek sanwel wits para tlachtakis, para temiktis iwa teixpolos. Pero Ne oniwala para nochteh n tlakah makipiakah yolílistli, iwa non yolílistli mamomiakili itech inyolo. ¹¹Ne nikuali tlájpixki. Se kuali tlájpixki kinmokuitlawia iichkawah, maya makimiktikah.

¹²Pero se akin san tetlajpialia iwa amo iaxkawah n ichkameh, ijkuak kita wits n koyotl kinkakajtewa n ichkameh iwa choloa. Ijkuakó n koyotl kinkitskia sikimeh, iwa oksikimeh kinxixitinia. ¹³Ijkuakó non tetlajpialia choloa porke amo kintekipachoa n ichkameh sanwel itlaxtlawil.

¹⁴Ne kual ni tlájpixki, iwa nikinmixmati akimeh noichkawah, iwa yejwah nechixmatih. ¹⁵Ijkó kemi Notajtsi nechixmati iwa Ne nikixmati Notajtsi, iwa niktemaka noyolilis por noichkawah. ¹⁶Noiwa nikimpia oksikimeh ichkameh, non amo kateh ijtik nin korral. Iwa moneki nikualinwikas noiwa. Yejwah nechtenkakiskeh, iwa nochteh yetoskeh sansikah, iwa yetos san se tlájpixki.

¹⁷Yika Notajtsi nechtlasojtla, porke nonewia niktemaka noyolilis, para ijkó satepa oksepa nimoyolitis. ¹⁸Amaka weletis nechkixtilis noyolilis, yej Ne nonewia niktemaka. Ne weletis niktemakas noyolilis, iwa oksepa nikselsi. Ye ni tlan onechnawati Notajtsi.

¹⁹Ijkuak n tlayakankeh judíojtah okikakeh nin tlájtoli, oksepa omoxexelokeh. ²⁰Sikimeh okijtoayah:

—Nin tlakatl kipia se demonio iwa yokuatlapolo. ¿Tleka nonkikakih?

²¹Pero oksikimeh okijtoayah:

—Akin kipia se demonio mach ijkó tlajtoa. Se tlakatl non kipia se demonio mach weletis kintlapolis ixtolowah non amo tlachiah.

N tlayakankeh judíojtah amo kiseliah n Jesús

²²Itech sewaya n judíojtah okichiyawah ilwitl porke okilnamikiah nochi xiwitl n tonati ijkuak okiyankuilijkeh n Weyi Tiopa de Jerusalén. ²³Iwa Jesús onemia kan Weyi Tiopa, kan ik iportal Salomón. ²⁴Ijkuakó n tlayakankeh judíojtah okiyawalokeh iwa okitlajtlanjikeh: —¿Asta kemania san titlamatoskeh akin te? Sansemi techili tla te ti Cristo.

²⁵Jesús okinnankili:

—Ne yonomechili, iwa nomejwah amo nonnechneltokah. Nochi tlan Ne nikchiwa, nikchiwa ika iweletilis itoka Notajtsi iwa kinextia Ne Ni Cristo. ²⁶Pero nomejwah amo nonnechneltokah porke amo noichkawah. ²⁷Noichkawah nechtenkakih, iwa Ne nikinmixmati, iwa yejwah witseh nonawak. ²⁸Ne nikchiwa mayolitokah nochipa, iwa ayik moixpoloskeh, iwa amaka weletis nechinmakixtilis. ²⁹Notajtsi Akin onechinmaktili noichkawah, Ye okachi kipia weletistli iwa amo onka ok se kemi Ye, iwa amaka weletis kinmakixtilis. ³⁰Ne iwa Notajtsi tiseititokeh.

³¹Ijkuakó n tlayakankeh judíojtah oksepa okonintlankeh temeh para kimotlaskeh.

³²Jesús okinmili:

—Nomoixpa nikchijtiwits miak tlamawísoli ika iweletilis Notajtsi, ¿katlie ika nonk-inekiah nonnechmojmotlaskeh ika tetl?

³³N tlayakankeh judíojtah okinankilijkeh:

—Amo timitsmojmotlaskeh ika tetl por tlan kuali yotikchi, yej por tikixpanawia Dios ika tlan tikijtoa. Te san titlakatl iwa timotenewa ti Dios.

³⁴Jesús okinnankili:

—Itech nomotlanawatilis ijkí ijkuilitok: “Ne onikijto nomejwah nondiosmeh.”

³⁵Tikmatokah tlan kijtoa itlajkuilol Dios amo weletis se kipatlas; iwa Dios okínnotski diosmeh akimeh okiselijkeh itlajtol. ³⁶Iwa tla Dios onechpéjpenki iwa onechaltítlanki itech nin tlaltípkaktli, ¿kenomi nonkijtoah Ne onikixpanawi porke onikijto Ne Ni Tekone de Dios? ³⁷Tla amo nikinchiwa milagros kemi Notajtsi kinchiwa, amo techneltokakah.

³⁸Pero tla nikinchiwa milagros, amo Ne techneltokakah, yej xikinneltokakah n milagros non nikinchiwa, ijkó nonkitaskeh Notajtsi kajki nowa, iwa Ne nika íwa.

³⁹Oksepa okinekiah kikitiskiskeh, pero Jesús okincholili.

⁴⁰Ijkuakó Jesús oksepa oyá ik nepa lado de n río Jordán, kan achto n Juan otlakuatekiaya iwa ompa omoka. ⁴¹Miakeh oyayah inawak Jesús iwa okijtoayah:

—Juan amo okichi nion se milagro, pero nochi tlan okijto de nin tlakatl milák.

⁴²Iwa miakeh ompa okineltokakeh n Jesús.

¹Itech altepetl de Betania okatka se tlakatl non omokokoaya. Ye itoka Lázaro, iwa ochantitoka iwan iweltiwah María iwa Marta. ²Nin María iwelti n Lázaro, ye akin

okinxawili ajwiálistli itech ikxiwah n Toteko iwa okinwajwachili ika itsonkal. ³ Ijkó kiné, iweltiwah n Lázaro otlatitlankeh makilitih n Jesús:

—Tejwatsi, motlasojikni Lázaro mokokoa.

⁴ Ijkuak Jesús okikak, okijto:

—Nin kokólistli amo kimiktis, yej ika noni moteititis iweyijkachiwalis Dios, iwa ika non kokólistli noiwa kiweyijkachiwaskeh Ikone Dios.

⁵ Jesús okintlasojtlaya n Marta, María iwa n Lázaro. ⁶ Ijkuak okilijkeh Lázaro omokokoaya, Ye ok omoka ome tonati kan okatka. ⁷ Otlanki Jesús okinmili itlamachtijkawah:

—Matimokopakah Judea.

⁸ Ijkuakó itlamachtijkawah okilijkeh:

—Tlamachtí, ayamó wejwaha n tlayakankeh judíojeteh okinekiah mitsmiktiskeh ika tetl; ¿iwa oksepa tikneki timuikas ompa?

⁹ Jesús okinmili:

—Se tonati kipia májtlaktli iwa ome ora. Tla se tlakatl nemis ijkuak tlanestok amo moikxitlanwis, porke kita n tláwili non kajki itech nin tlatlfpaktli, ¹⁰ pero tla se tlakatl nemi de yuak, moikxitlanwia porke n tláwili amo kajki itech.

¹¹ Satepa Jesús okinmili:

—Totlasoj Lázaro kochtok, iwa Ne nio nikijxititi.

¹² Ijkuakó itlamachtijkawah okilijkeh:

—Tejwatsi, tla san kochtok, pajtis.

¹³ Pero Jesús okinekia kimilis Lázaro yomikki, pero itlamachtijkawah okiyejyekoliayah chamo okintlapowijtoka de n kochilistli non tinochteh tikpia. ¹⁴ Ijkuakó Jesús okinyekili: —Lázaro yomikki. ¹⁵ Iwa nipaki porke amo ompa onikatka, ijkó nomejwah nontlanel-tokaskeh. Tiawih, matikitatih.

¹⁶ Ijkuakó Tomás non okiliayah Kuatsi, okinmili non oksikimeh itlamachtijkawah:

—Matiwiah tejwaha noiwa, para timikiskeh iwan Jesús.

Jesús teyolitia iwa kitemaka nemilistli

¹⁷ Ijkuak Jesús okalakito Betania, Lázaro yokiwikaya nawi tonati tootok. ¹⁸ Betania amo wejka omokawaya de Jerusalén, san kanaj eyi kilómetro. ¹⁹ Miakeh judíojeteh owalajkeh otelajpaloko ichan Marta iwa n María para kinyolchikawaskeh porke omikki inmikni.

²⁰ Ijkuak Marta okima Jesús yompa owalaya, okinamikito, pero María omoka itech kali.

²¹ Iwa Marta okili n Jesús:

—Noteko, tla nika tiyetoskia, nokni amo mikiskia. ²² Pero ne nikmati Dios mitsmakas nochi tlan Te tiktlajtlanilis.

²³ Jesús okili:

—Mokni moyolitis.

²⁴ Marta okili:

—Milák, ne nikmati moyolitis ijkuak non yomikah moyolitiskeh itech n iksemi tonati.

²⁵ Ijkuakó Jesús okili:

—Ne niktemaka nemilistli iwa yolílistli. Akin nechneltokas maya mamiki, yolitos nochipa. ²⁶ Iwa nochteh akimeh yolitokah iwa nechneltokah ayik mikiskeh. ¿Tikneltoka?

²⁷ Marta okili:

—Ejé, Noteko, ne nikneltoka Tejwatsi Ti Cristo Ikone Dios, Akin walaskia itech nin tlatlfpaktli.

Jesús choka kan okitookakeh n Lázaro

²⁸ Ijkuak ijkí okijto, Marta oyá san ichtakatsi okinotsato ikni María iwa okili:

—N Tlamachtí nika moitstika iwa mitsnotsa.

²⁹ Ijkuak María okikak tlan Marta okili, omoketíkiski iwa okitato n Jesús. ³⁰ Jesús ayamó okalokia kan altepetl, ok okatka kan Marta okajsito. ³¹ Ijkuak n tlayakankeh judíojeteh non okatkah itech kali okitakeh kenijki n María omoketíkiski, okikuitlapantokakeh. Okiyejyekoliayah chamo oyaya kichokiliti n Lázaro kan okitookakeh.

³² Ijkuak María okalakito kan okatka n Jesús, omotlankuáketski inawak iwa okili:
—Noteko, tla nika tiyetoskia, nokni amo mikiskia.

³³ Ijkuak Jesús okitak n María chokatok, iwa n judíojteh non okikuitlapantokayah noiwa, Jesús oyoltélinki asta oyolpatsiwik. ³⁴ Iwa okintlajtlani:

—¿Kani ononkitookakeh?

Yejwah okilijkeh:

—Tejwatsi, nika xiwalmuika iwa xikitaki.

³⁵ Iwa Jesús ochokak. ³⁶ N tlayakankeh judíojteh okijtojkeh:

—¡Xikitakah, milák okitlasojtlaya!

³⁷ Pero oksikimeh okijtojkeh:

—Tla owéletki okimák itlachialis non amo otlachiaya, ¿amo weletiskia kichiwaskia itla para amo mamiki n Lázaro?

Jesús kiyolitia n Lázaro

³⁸ Jesús oksepa omoyolkoko iwa omijkuani kan okitookakeh n Lázaro. Non miketékochtli okatka ijtik se kúyoktli iwa otentsaktoka ika se tetl. ³⁹ Jesús okinmili:

—Xikachiwahak n tetl.

Marta, iwelti n Lázaro, okili n Jesús:

—Noteko, ye ya fiero kistos porke ya kipia nawi tonati tootok.

⁴⁰ Pero Jesús okili:

—Yonimitsili, tla titlaneltokas tikitas iweyijkachiwalis Dios.

⁴¹ Ijkuakó okachijkeh n tetl. Jesús oajkotláchixki ilwikak iwa okijto:

—Notajtsi, nimitstlasojkamati porke otechkak. ⁴² Ne nikmatok nochipa techkaki, iwa ijki nikijtoa para n tlakah non nika kateh makineltokakah Tejwatsi otehaltítlanki.

⁴³ Ijkuak ijki otlanki okijto, chikawak okitsajtsili:

—¡Lázaro, xiwalkisa!

⁴⁴ Ijkuakó n miketl owálkiski kikekemelitiwits ika tsótsoli itech ikxiwah iwa itech imawah, iwa oixtsaktiwalaya ika se tsótsoli. Iwa Jesús okinmili:

—Xiktojtomakah iwa xikkawilikah mawia.

Motlatlalwiah kenijki kimiktiskeh n Jesús

(Mt. 26:1-5; Mr. 14:1-2; Lc. 22:1-2)

⁴⁵ Miakeh judíojteh non okiyolchikawatoh n María, ijkuak okitakeh tlan okichi n Jesús, okineltokakeh. ⁴⁶ Pero sikimeh okimitatoh n fariseos iwa okimilijkeh tlan Jesús okichi.

⁴⁷ Ijkuakó n tiopixkeh non tlayakantokeh, n fariseos iwa n tekiwajkeh de Sanedrín* omoololjkeh iwa okimolijkeh:

—¿Tlan tikchiwaskeh? Nin tlakatl kinchijtinemi miakeh milagros. ⁴⁸ Tla tikkawiliskeh ijko makichijtinemi, nochteh pewas kineltokaskeh, iwa n tekiwajkeh de Roma witseh kixixititsakiweh n Weyi Tiopa iwa n nochi topaís.

⁴⁹ Ijkuakó seme de yejwah non itoka Caifás, non itech non xiwitl okinnawatiaya n tiopixkeh, okinmili:

—Nomejwah amitla nonkimatih, ⁵⁰ amo nonkajsikamatih okachi kuali mamiki san se tlakatl por tinochteh, iwa amo makipojpolokah nochi topaís.

⁵¹ Ninteh itlajtolwah n Caifás amo inewia okimijto, yej kemi ye okatka weyi tiópixki non xiwitl, Dios okitlajtolti Jesús mikiskia por nochteh. ⁵² Iwa amo mikiskia san por n judíojteh, yej noiwa para kinseitilis nochteh ipilwah Dios non sentetl oxitintokah. ⁵³ Yika desde non tonati opé kitemoliah kenijki kimiktiskeh n Jesús.

⁵⁴ Ika noni, Jesús ayakmo omoteititiaya inmixpah n judíojteh, yej oyá kan se altepetl non itoka Efraín non kajki kan ik tlaltejtéyinki, iwa ompa omoka iwa itlamachtijkawah.

* 11:47 Sanedrín: nin grupo kimajmanah kemi 50 tetajmeh non teixkomakah ijkuak kinteiliah akimeh amo kuali kitlakitah itlanawatil Moisés.

⁵⁵ Yowalajsiwalaya n ilwitl de Paskua de n judíojteh. Miakeh okisayah de inmaltépeu iwa otlejkoayah Jerusalén para motlajtlakolchipawaskeh achto de pewas inmiliwui.

⁵⁶ Yejwah okixtemojtinemiah n Jesús kan Weyi Tiopa iwa omotlajtlaniayah:

—¿Tlan non kimoliah? ¿Wits itech ilwitl noso, amo wits?

⁵⁷ N fariseos iwa n tiopixkeh non tlajakantokeh otlawatijkeh tla aka kimatis kan kajki n Jesús, makinmatilti para kikitiskiskeh.

12

Se siwatl kinmajwialia ikxiwah n Jesús

(Mt. 26:6-13; Mr. 14:3-9)

¹ Chikwase tonati achto de pewas n ilwitl de Paskua, Jesús oyá Betania, kan ochantitoka n Lázaro, akin Jesús okiyoliti. ² Ompa okichijchijkeh se tlákuali para motlasojkamatiskeh inawak Jesús, Marta okintlatakiliaya, Lázaro oewatoka kan mesa iwan Jesús. ³ Ijkuakó María okualík kemi tlajko litro ajwiálistli de nardo non tlawel patio, iwa okinmajwialia ikxiwah n Jesús, otlanki okinwajwachili ika itsonkal. Iwa nochi n kali omoajwiali. ⁴ Ijkuakó Judas Iskariote ikone n Simón, seme de itlamachtijkawah akin satepa kitemaktiskia n Jesús, okijto:

⁵ —¿Tleka amo omonamá n nin ajwiálistli ika eyi sientto denariojtomi, ika tikim-palewiskiah n próbesteh?

⁶ Pero Judas amo ijko okijto por milák okinmiknomatiaya n próbesteh, yej porke ye tlachteh, iwa kemi ye okooloaya n tomi, inewia okichikowiaya. ⁷ Ijkuakó Jesús okili:

—Xikwaha, ye okitlaatijtoka nin ajwiálistli para n tonati ijkuak nechtookaskeh. ⁸ N próbesteh nochipa yetoskeh nomowah, pero Ne amo nochipa niyetos nomowah.

N tiopixkeh non tlajakantokeh motlatlalwiah kimiktiskeh n Lázaro

⁹ Miakeh judiojteh okimatkeh Jesús okatka kan altepetl de Betania, iwa oyajkeh. Amo oyajkeh san para kitaskeh n Jesús, yej noiwa para kitaskeh n Lázaro, akin Jesús okiyoliti.

¹⁰ Ijkuakó n tiopixkeh non tlajakantokeh omotlatlalwijkeh noiwa kimiktiskeh n Lázaro.

¹¹ Porke ijkuak Lázaro omoyoliti, miakeh judíojteh omoixkoyantijkeh de n tiopixkeh non tlajakantokeh iwa okineltokayah n Jesús.

Jesús kalaki Jerusalén kemi Rey

(Mt. 21:1-11; Mr. 11:1-11; Lc. 19:28-40)

¹² Ipan ok se tonati, miakeh tlakah oyajkeh ilwitl de Paskua, iwa okimatkeh Jesús noiwa oyaya ompa Jerusalén itech non ilwitl. ¹³ Okinmatekeh soyameh iwa oyajkeh okinamikitoh n Jesús, iwa otsajtsia chikawak:

—¡Hosanna! Ma Dios kitiochiwa Akin okititlankeh matlanawati! ¡Ma Dios kitiochiwa n Rey de Israel!

¹⁴ Jesús okajsik se burrojtsi iwa ipan otlejkok. Kemi kijtoa itlajkuilol Dios:

¹⁵ Amo ximawikah akimeh chanchiwah Sión;

xikitakah nomorey ya walmuika,

tlejkotiwiits ipan se burrojtsi.

¹⁶ Itech non tonati itlamachtijkawah mach okajsikamatkeh tlan kijtosneki tlan otlam-ochi, pero satepa ijkuak Jesús oyá ilwikkak, itlamachtijkawah okualilnamikheh yojkuilutoka nochi tlan Ye panoskia.

¹⁷ N tlakah non okatkah iwan Jesús ijkuak okínotski n Lázaro ijtk miketékochtli iwa okiyoliti de kan mikemeh, oteplapowijtinemiah tlan okitakeh. ¹⁸ Yika, miakeh okinamikitoh n Jesús, porke okimatkeh okichi non milagro. ¹⁹ Pero n fariseos okimoliayah:

—Xikitakah, nochteh n tlakah yawih inawak Jesús. Iwa tejwah amitla tiweleti tikchiwah.

Sikimeh tlakah de Grecia kitemoah n Jesús

²⁰ Itech non ilwitl de Paskua noiwa owalajkeh sikimeh tlakah de Grecia akimeh noiwa okiweyijkachiwakoh Dios. ²¹ Yejwah omijkuanijkeh inawak Felipe non okatka de Betsaida, iwa okitlatlautijkeh:

—Tlakatl, tiknekih tikitasken n Jesús.

²² Felipe okitlajoltito n Andrés; iwa san ken ome okitlapowitoh n Jesús. ²³ Ijkuakó Jesús okinmili:

—Yoajsiko n ora ijkuak nechweyijkachiwaskeh Ne Non onimochi ni tlakatl. ²⁴ De milajka, de milajka nomechilia, tla se kitooka se xínachtli iwa non xínachtli amo miki, non xínachtli mokawas iselti iwa amitla kitemakas. Pero tla non xínachtli miki, kitemakas miak itlakilo.

²⁵ Akin amo kitemakas iyolilis nonawak, kipolos ijkuak mikis. Pero akin kitemakas iyolilis nonawak itech nin tlaltípkaktli amo kipolos yej kípías yolilistli non amayik tlami. ²⁶ Akin kinekis nechtekitilis, mawiki nowa, iwa kan Ne niyetos, noiwa ompa yetos. Tla aka nechtekitilia, Notajtsi kiweyijkatlalis.

Jesús kinmatiltia imikilis

²⁷ 'Axa satlawel nimoyolkokoa, ¿Iwa tlan nikijtos? ¿Mach weletis nikilis: “Notajtsi, techmakixti itech nin tlaijyowflistli?” Amó, mach weletis ijko nikilis porke saman para ye Ne oniwala. ²⁸ Notajtsi, maweyijkachito Motoka.

Ijkuakó omokak se tlájtoli de ilwikak:

—Yonikweyijkachi iwa oksepa nikweyijkachiwas.

²⁹ N tlakah non ompa okatkah, ijkuak okikakeh n tlájtoli, okijtoayah, otlatékuinki, iwa oksikimeh okijtoayah:

—Se ángel okitlapowi.

³⁰ Ijkuakó Jesús okinmili:

—Non tlájtoli amo omokak para Ne manikkaki, yej para nomejwah xikkakikah.

³¹ Yoajsiko n tonati ijkuak kintlajtlakoltiskeh n tlaltípkaktlakah, iwa axa kualkixtiskeh akin kinawatia nin tlaltípkaktli. ³² Iwa ijkuak nechajkokuiskeh itech krus, nochteh nikinyoltilanas para mawikih nonawak.

³³ Ijko Jesús okinmajsikamatilti kenijki mikiskia. ³⁴ N tlakah okinankilijkeh:

—Itlajkuilol Dios kijtoa Cristo nochipa yolitos. ¿Kenijki Te tikijtoa non omochiwako tlakatl moneki makajkokuikah? ¿Akin ye akin omochi tlakatl?

³⁵ Ijkuakó Jesús okinmili:

—San kanaj kech tonati niyetos nomowah. Xinemikah ika notlawil axa ken ok nonweletih, amo kichiwa nomechajtsiti n tleyuálistli. Porke akin nemi itech tleyuálistli amo kimati kan ik yawi. ³⁶ Axa ken ok nonkipixtokeh n tláwili, xikkawilikah mamoskaltih non tláwili itech nomoyolo, ijko nonyetoskeh tepilwah de non tláwili.

Ijkuak Jesús okimijto ninteh tlájtoltel, oyá okinmotlaatlito.

N judíojteh mach kineltokah n Jesús

³⁷ Maya Jesús okinchi miakeh milagros inmíxpah n judíojteh, amo okineltokayah. ³⁸ Ijko omochi tlan okijto n profeta Isaías:

Noteko, ¿akin okineltokak motlajtol non tejwah otiktematiltijkeh?

¿Akin inawak yomonexti iweletilis n Toteko?

³⁹ Yejwah mach otlaneltokayah, Isaías noiwa okijto:

⁴⁰ Dios okintokti ayakmó matlachiakah iwa okinyoltlakuawaltih, para amo matlachiakah ika inmíxtolowah

nion mateajsikamatikah ika inyolo,

nion mamoyolkopakah nonawak, para manikimpajti.

⁴¹ Isaías ijki okijto porke okitak iweletilis Cristo, yika otetlapowiaya de Ye.

⁴² Maski ijko, miakeh judíojteh okineltokakeh n Jesús, iwa asta sikimeh tlayakankeh itech Weyi Tiopa. Pero amo okitenextiayah teixpa porke okinmawiliayah n fariseos, para amo makinkixtikah itech sinagogas. ⁴³ Porke yejwah okachi okiwilitayah makinweyilikah n tlakah iwa amo Dios.

Itlajtol Jesús kintlajtlakoltis n tlakah

⁴⁴ Ijkuakó Jesús chikawak okijto:

—Akin necheltoka, amo san Ne necheltoka, yej noiwa kineltoka Notajtsi Akin onechaltítlanki. ⁴⁵ Iwa akin nechita, noiwa kita Akin onechaltítlanki. ⁴⁶ Ne oniwala itech nin tlaltípkaktli kemi se tláwili, iwa nikintlawilia itech inyolo nochteh akimeh necheltokah, iwa yejwah amo mamokawakah itech tleyuálistli. ⁴⁷ Tla aka kikaki notlajtol iwa amo kitlakita, amo Ne niktajtlakoltis. Porke Ne amo oniwala oniktajtlakoltiko n tlaltípkaktlakah, yej onikinmakixtiko. ⁴⁸ Akin nechtlawelita, iwa amo kitlakita notlajtol, ya kipia akin kitlajtlakoltis: N tlájtoli non Ne oniktematilti, ye kitlajtlakoltis itech n iksemi tonati. ⁴⁹ Porke Ne amo onikijto san tlan Ne nonewia onikyejyekoli, yej Notajtsi Akin onechaltítlanki onechnawati tlan moneki nikijtos iwa tlan moneki niktemachtis. ⁵⁰ Ne nikmatok akimeh kichiwa tlan kijtoa itlanawatil Notajtsi, kinmakas yolílistli non ayik tlami. Yika, tlan Ne nikijtoa, nikijtoa ijóó kemi Notajtsi onechnawati.

13

Jesús kinmiikxipajpaka itlamachtijkawah

¹ Yoajsiwalaya n ilwitl de Paskua, Jesús yokimatia yoajsia n ora para kikakajteawas nin tlaltípkaktli iwa yas inawak Itajtsi. Ye nochipa okintlasojtlak iaxkawah non okatkah itech nin tlaltípkaktli, iwa okintlasojtlak asta n iksemi tonati.

² Non yuáli, ijkuak Jesús iwa itlamachtijkawah oyualtlakuajtokah, n diablo yokitlaliyka itech iyolo n Judas Iscariote, ipiltsi n Simón, para makitemakti n Jesús. ³ Jesús okimativalaya Itata yokimaktili nochi para Ye matlanawati, iwa yokimatia Ye owala de Dios iwa oksepa mokopaskia íwa. ⁴ Ijkuakó Jesús omóketski de kan mesa, okimokixtili ikapa, iwa omotlajkoilpi ika se tsótsoli. ⁵ Ijkuakó okitekak atl itech se xíkali iwa opé kinmikxipajpaka itlamachtijkawah iwa okinmaxotomaya ika n tsótsoli non ika omotlajkoilpijka.

⁶ Ijkuak Jesús omijkuani kan Simón Pedro para kimpakilis ikxiwah, Pedro okili:

—Noteko, ¿Tejwatsi, techimpakilis nokxiwah?

⁷ Jesús okinankili:

—Tlan Ne nikchijtok, te axa amo tikajsikamati, pero satepa tikajsikamatis.

⁸ Pedro okili:

—Tejwatsi amayik techimpakilis nokxiwah.

Jesús okinankili:

—Tla amo nimitsikxipajpakas, amo timopoas nowa.

⁹ Ijkuakó Simón Pedro okili:

—Noteko, tla ijóó, amo sanwel techimpakili nokxiwah, yej noiwa nomawah iwa notsonteko.

¹⁰ Pero Jesús okili:

—Akin sikin omalti, sanwel moneki mamoiikxipajpaka, porke ya chipawak. Iwa nomejwah ya nonchipawakeh, maya amo non nochteh.

¹¹ Jesús okimatia akin kitemaktiskia, yika okijto: “Amo nochteh nonchipawakeh.”

¹² Ijkuak yotlanki okimikxipajpak itlamachtijkawah, oksepa okimokentili ikapa iwa omotlalito kan mesa, iwa okinmili:

—¿Nonkajsikamatih tlan onikchi nomowah? ¹³ Nomejwah nonnechtsah Tlamachtí iwa Noteko, iwa kualí tlan nonkijtoah, porke milák, Ne Nomotlamachtí iwa Nomoteko.

¹⁴ Iwa tla Ne Nomoteko iwa Nomotlamachtí onomechinpakili nomokxiwah, ijóó noiwa moneki ximosepanikxipajpakakah. ¹⁵ Porke ijóó kemi Ne onikchi moneki no ijóó xikchiwakah. ¹⁶ De milajka, de milajka nomechilia se tlakéwale amo okachi weyijkatitok ke iteko. Ijóó noiwa, se tlatitlánili amo okachi weyijkatitok ke akin okitítlanki. ¹⁷ Tla nonkajsikamatih iwa nonkichiawah tlan nomechilijtok, nonkipiaskeh miak pakílistli.

¹⁸ Tlan nikijtoa amo para nochteh nomejwah. Ne nikinmixmati inyolo akimeh onikimpejpenki. Pero nika mochiwas tlan kijtoa n tiotlajkuíloli: “N tlakatl akin nowa tlapalao, omíxkopki nowa.”

Sal. 41:9

¹⁹ Axa nomechilia nochi ni, para ijkuak ijóó tlamochiwas, xikneltokakah Ne Ni Cristo. ²⁰ De milajka, de milajka nomechilia: Akin kiselia akin Ne niktítlani, Ne nechselia, iwa akin Ne nechselia, noiwa kiselia Akin onechaltítlanki.

Jesús kinnilia Judas kitemaktis

(Mt. 26:20-25; Mr. 14:17-21; Lc. 22:21-23)

²¹ Ijkuak Jesús okimijto ninteh tlájtoltel, saikpanoa oyoltélinki iwa okinyekili:

—De milajka, de milajka nomechilia, seme de nomejwah nechtemaktis.

²² Ijkuakó n itlamachtijkawah opé motlatlajtlatah, porke amo okimatiah akin okitenejtoka. ²³ Seme de yejwah non Jesús okitlasojtlaya, omonakasiktekek itech Jesús ijkuak otlakuajtakah. ²⁴ Simón Pedro okichtakaili n Juan makitlajtlani n Jesús akin okitenejtoka.

²⁵ Ijkuakó okachi omijkuani inawak Jesús iwa okitlajtlani:

—Noteko, ¿akin mitstemaktis?

²⁶ Jesús okinankili:

—Nikajakis siki paj, iwa akin Ne nikmakas, ye nechtemaktis.

Ijkuakó Jesús okajaki n paj iwa okonmák n Judas Iscariote, ipiltsi n Simón. ²⁷ Ijkuak Judas okikua n paj, n diablo okalak itech iyolo. Ijkuakó Jesús okili:

—Tlan tikchiwas sansemi xikchiwa.

²⁸ Nion se de yejwah, akimeh otlakuajtakah itech mesa okajsikama tleka n Jesús ijko okili n Judas. ²⁹ Kemi Judas okipixtoka n tomi, yejwah okiyejyekoliayah chamo Jesús okili makikoati tlan monekis para n ilwitl de Paskua, noso itla makintliokoli n próbesteh.

³⁰ Ijkuak Judas yokikua n paj non Jesús okonmák, sanima okiski, iwa ya yotleyuak.

Se yankuik tlanawátli

³¹ Satepa ijkuak Judas yokiski, Jesús okijto:

—Axa moteititia noweyijkachiwalis Ne Akin onimochi ni tlakatl, iwa iweyijkachiwalis Dios motenextia itech tlan Ne nikchiwa. ³² Tla Ne nikteititis iweyijkachiwalis Dios, ijkuakó Dios noiwa kiteititis noweyijkachiwalis, iwa san nima ijko kichiwas. ³³ Nopilwah, mach ok wejkawas niyetos nomowah. Nomejwah nonnechtemoskeh. Pero ijko kemi onikinmili n judíos axa nomejwah nomechilia: Kan Ne nio, nomejwah mach weletis nonyashkeh. ³⁴ Ne nomechmaka se yankuik tlanawátli: Ximosepantlasojtlakah, ijko kemi Ne nomechtlasojtla, ijko moneki ximosepantlasojtlakah. ³⁵ Tla nomejwah nonmosepantlasojtlah, nochteh n tlaltikpaktlakah nomechitashkeh nomejwah de milajka notlamachtijkawah.

Jesús kitematiltia Pedro kijtos amo kixmati

(Mt. 26:31-35; Mr. 14:27-31; Lc. 22:31-34)

³⁶ Simón Pedro okitlajtlani n Jesús:

—Tejwatsi, ¿kan timuikas?

Jesús okinankili:

—Kan Ne nimuikas, axa mach weletis tias nowa. Pero satepa weletis tias nowa.

³⁷ Pedro okili:

—Noteko, ¿tleka axa amo weletis nias mowa? ¿Tla moneki, asta nikmokawilis manechmiktikah por Tejwatsi!

³⁸ Jesús okinankili:

—¿Timotemaktis nopatka? De milajka, de milajka nimitsilia, achto de tlakuikas n kaxtil, te tikijtos eyi welta amo techixmati.

14

Jesús Ye n ojtli non tewika inawak Totajtsi Dios

¹ Amo ximotekipachojtinemikah. Xikneltokakah Dios iwa techneltokakah Ne noiwa. ² Icha Notajtsi onka miak lojar kan se chantitos. Tla amo ijko yetoskia, Ne nomechiliskia. Yika, Ne nio ompa nomechmajmaniliti se lojar. ³ Satepa ijkuak yonia iwa yonomechmajmanili non lojar, oksepa niwalmokopas iwa nomechwikas nowa, nonyetoskeh kan Ne niyetos. ⁴ Kan Ne nio, nomejwah ya nonkixmatokeh n ojtli.

⁵ Ijkuakó Tomás okili:

—Noteko, tejwah mach tikmatih kanon timuika, ¿kenomi tikixmatiskeh non ojtli?

⁶ Jesús okinankili:

—Ne Ni ojtli nontewika inawak Dios, Ne nomechnonotsa ika milák tlájtoli, iwa Ne Akin kichiwa xiyolitokah. Sanwel akin nechtlakita weletis kalakiti inawak Notajtsi. ⁷Tla nomejwah nonnechixmatiskiah, noiwa nonkixmatiskiah Notajtsi, axa ya nonkixmatokeh, porke ya nonkiitiwitseh.

⁸Ijkuakó Felipe okili:

—Tejwatsi, techixmatilti Toweyitajtsi iwa ika no, ya kuali.

⁹Jesús okili:

—Felipe, yowejka nika nomowah, ¿iwa ayamó techixmati? Akin yonechitak kijtosneki yokitak Notajtsi. Yika ¿kenijki te tikijtoa manomechixmatilti Notajtsi? ¹⁰¿Amo tikneltoka Ne nika itech Notajtsi iwa Ye kajki notech? Nochi tlan Ne nomechtlapowia, amo notech kisa, yej Notajtsi non kajki notech, kichiwa tlan Ye kimonekiltia. ¹¹Techneltokakah Ne nika iwa Notajtsi, iwa Notajtsi kajki nowa, noso tla amo ijko, techneltokakah por tlan nikchiwa. ¹²De milajka, de milajka nomechilia: Akin nechneltoka, noiwa weletis kichiwas tlan Ne nikchiwa. Iwa weletis kinchiwas okachi weyi, porke Ne nio inawak Notajtsi. ¹³Nochi tlan nonkitlajtlaniliskeh Notajtsi ika Notoka, Ne nikchiwas, para makiseli weyílistli Notajtsi por Ne. *Stg. 4:3* ¹⁴Tla itla nonkitlajtlaniliskeh ika Notoka Ne nikchiwas.

Jesús okijto kualtitlanis n Espiritu Santo

¹⁵Tla nomejwah nonnechtlasojtlah, xikchiwakah tlan kijtoa notlanawatil. ¹⁶Iwa Ne nik-tlatlaujtis Notajtsi manomechitlanili ok se teyolchika, para nochipa mayeto nomowah. ¹⁷N tlaltikpaktlakah amo weletih kiseliah n Espiritu non techajsikamatiltiah tlan milák porke amo kitah nion kixmatih. Pero nomejwah nonkixmatih porke Ye kajki nomowah iwa nochipa yetos nomowah. ¹⁸Amo nomechkawas nonmiknomeh, niwalmokopas iwa nomowah niyetos. ¹⁹Mach ok wejkawas iwa ayakmó nechitaskeh n tlaltikpaktlakah, pero nomejwah nonnechitaskeh. Porke kemi Ne niyolitok, nomejwah noiwa nonyolitoskeh. ²⁰Itech neká tonati nomejwah nonkajsikamatiskah Ne nika iwa Notajtsi, iwa nomejwah nonkateh nowa, iwa Ne nika nomowah. ²¹Akin kixmati notlanawatil, iwa kichiwa tlan kijtoa, non tlakatl nechtlasojtla. Iwa akin nechtlasojtla, Notajtsi kitlasojtla iwa Ne noijsko niktlasojtla iwa nimoteititis inawak.

²²Ijkuakó non ok se Judas okitlajtlanil:

—Noteko ¿tleka timoteixmatiltis tonawak, iwa amo innawak n tlaltikpaktlakah?

²³Jesús okinankili:

—Akin nechtlasojtla kijtosneki kichiwa tlan nikijtoa. Notajtsi kitlasojtla, iwa Notajtsi iwa Ne timochantikiweh íwa. ²⁴Iwa akin amo nechtlasojtla, amo kitlakita notlajtol. N tlájtoli tlan nomejwah nonkinkaktokeh, mach Ne notlajtol yej itlajtol Notajtsi Akin onechaltítlanki.

²⁵'Ne onomechili nochi ni ijkuak onikatka nomowah. ²⁶Pero n teyolchika, Ye n Espiritu Santo Akin Notajtsi kualtitlanis ika Notoka, Ye nochi nomechajsikamatiltis, iwa nomechilnamiktis nochi tlan Ne yonomechili.

²⁷'Noyolsewilis nomechkajtewilia, noyolsewilis nomechmaka. Iwa amo kemi non kitemakah n tlaltikpaktlakah. Amo ximosotlawakah nion ximawikah. ²⁸Nomejwah yononkikakeh tlan nikijto, onomechili nias iwa oksepa niwalmokopas para niyetos nomowah. Tla de milajka nonnechtlasojtlaskiah, nompakiskiah ijkuak onomechili nio íwa Notajtsi, porke Notajtsi okachi weyijkatitok ke Ne. ²⁹Ne achto yonomechili ijko tlamochiwa, yika ijkuak ijko tlamochiwas, nomejwah xitlaneltokakah.

³⁰'Ayakmó niwejkawas nomechtlapowis, porke yompa wits non kinnawatia n tlakah de nin tlaltikpaktli. Ye amitla weletis nechtoktis. ³¹Nikchiwas tlan nechawatia Notajtsi, para ijko makimatikah n tlaltikpaktlakah, Ne niktlasojtla Notajtsi.

'Ximoketsakah.

¹ 'Ne n de milajka uvaskuawitl, iwa Notajtsi Ye n uvastékítiki. ² Tla se nomamayo amo tlaaki, Notajtsi kitsonteki. Pero tla kuali tlaaki kichijchipawa para okachi matlaaki. ³ Nomejwah yononmochipajkeh, ika notlajtol non Ne yonomechili. ⁴ Xiseititokah nowa, kemi Ne niseititok nomowah. Nion se imamayo n uvaskuawitl amo weletis tlaakis tla amo salitos itech itlaktsonyo. Ijkó noiwa, amo weletis nonkitemakaskeh tlakilo tla nomejwah amo nonseititoskeh nowa.

⁵ 'Ne niuvaskuawitl iwa nomejwah nomamayowah. Akin salitok nowa iwa Ne íwa, kitemakas miak itlakilo. Porke tla amo nonsalitoskeh nowa, amitla weletis nonkichiwaskeh. ⁶ Akin amo seititok nowa, kitlamotlaskeh kala iwa wakis kemi imamayowah n uvaskuawitl non kinmoololoah, iwa kintlamotla ijtik tletl iwa ompa tlatlah.

⁷ 'Tla nomejwah nonseititoskeh nowa iwa notlajtol kajki ijtik nomoyolo, xiktajltlanikah san tlan nonkinekih iwa nomechmakas. ⁸ Notajtsi kiselia weyílistli ijkuak nomejwah nonkitemakah miak nomotlakilo, iwa ijkó mota nomejwah milák notlamachtijkawah. ⁹ Ne nomechtlasojtla kemi Notajtsi nechtlasojtla, xiyetokah nochipa ika notlasojtlalis. ¹⁰ Tla nonkitlakitah tlan nomechnawatia, nochipa nomechtlasojtla, ijkó kemi Ne niktakita tlan nechtnawatia Notajtsi, yika Ye nechtlasojtla.

¹¹ 'Ne nomechilia nochi ni para xipakikah kemi Ne nipaki, iwa ijkó xitentokah ika nopakilis. ¹² Ye ni tlan nomechnawatia: Ximotlasojtlakah non nochteh ijkó kemi Ne nomechtlasojtla. ¹³ Akin motemakas makimiktikah ipatka itlakaikniwah, saikpanoa kintlasojtla. Saikpanoa kintlasojtla itlakaikniwah tla motemakas makimiktikah impatka. ¹⁴ Nomejwah de milajka notlakaikniwah tla nonkichiwah tlan nomechnawatia. ¹⁵ Ayakmó nomechnotsas notlakawah, porke se tlakéwali amo kimati tlan kichiwa iteko. Ne nomechnotsas notlakaikniwah, porke yonomechmatilti nochi tlan Notajtsi onechili.

¹⁶ 'Nomejwah amo ononnechpejpenkeh, yej Ne onomechpéjpenki, iwa onomechmaktili n tekittl para xiwiah iwa xiktemakakah miak nomotlakilo, iwa nomotlakilo mawejkawa. Ijkó nochi tlan nonkitlajtlaniliskeh Notajtsi ika Notoka, Ye nomechmakas. ¹⁷ Ye ni tlan Ne nomechnawatia: Ximosepantlasojtlakah.

N tlaltikpaktlakah kikokoliah n Jesús iwa akimeh tlaneltokah

¹⁸ 'Tla n tlaltikpaktlakah nomechkokoliah, xikmatikah Ne achto yonechkokolijkeh. ¹⁹ Tla nomejwah ok nontlajtlakolchijtinemiskiah kemi kichiwah n tlaltikpaktlakah, yejwah nomechtlasojtlaskiah kemi yejwah motlasojtlah. Pero kemi Ne onomechpéjpenki de intlajko n tlajtlakolchijkeh, yika yejwah nomechtlawelitalah porke ayakmó nonkichiwah tlan yejwah kichiwah. ²⁰ Xikilnamikikah tlan onomechili: "Nion se tlakéwali okachi ke iteko." Tla Ne onechtotojtokakeh, noiwa nomejwah nomechtotojtokaskeh, iwa tla okitlakitakeh notlajtol, noiwa kitlakitaskeh nomotlajtol. ²¹ Nochi ni nomechtoktiskeh por nonnechtlakitah. Porke yejwah amo kixmatih Akin onechalítlaniki.

²² 'Tla Ne amo niwalaskia iwa nion amo niktlapowiskia, amo kipiaskiah tlajtlákoli. Pero axa amo weletis kijoskeh amo kimpiah tlajtlákolteh. ²³ Porke akin Ne nechkokolia, noiwa kikokoliah Notajtsi. ²⁴ Yejwah amo kipiaskiah tlajtlákoli tla Ne amo nikinchiwaskia milagros inmixpa. Pero maya okimitakeh, yejwah nechkokoliah iwa kikokoliah Notajtsi. ²⁵ Ijkí otlamochi para mamochiwa tlan ijkuilitok itech intlanawatil, kan kijtoa: "Onechkokolijkeh san por okinekeh."

Sal. 35:19; 69:4

²⁶ 'Pero ijkuak wits Akin teyolchikawa, n Espiritu non kitemachtia tlan milajka, non Ne nomechtlanililis de inawak Notajtsi. Ye nomechtlapowis de Ne. ²⁷ Iwa nomejwah noiwa nontetlapowiskeh de Ne, porke ononkatkah nowa ijkuak sikinika onikpewalti noteki.

16

¹ 'Ne nomechilia nochi ni para amo xikkawakah nontlaneltokaskeh nowa. ² Nomechkixtiskeh kan nomosinagogas. Iwa ajsiki tonati ijkuak aka nomechmiktis, kijtos okichi se kuali tekittl inawak Dios. ³ Ijkó kichiwaskeh porke amo okixmatkeh Notajtsi nion Ne. ⁴ Ijkí nomechilia para ijkuak ijkó tlamochiwas xikilnamikikah Ne yonomechilijka.

Tlan kichiwa n Espiritu Santo

⁵ 'Axa nio inawak Akin onechaltitlanki; ¿iwa nion se de nomejwah nechtlajtlania kan nio? ⁶ Ken yonomechili ninteh tlajtolteh axa nonmoyolkokoah. ⁷ Pero Ne nomechilia tlan milák: Okachi kuali manimuika, porke tla amo nio, Akin teyolchikawa amo weletis wits mononawak. Pero tla Ne nimuikas, nomechwaltitlanilis Akin teyolchikawa. ⁸ Ijkuak Ye wits, kinmajsikamatiltis n tlaltikpaktlakah kateh itech tlajtlákoli. Iwa kenomi weletis yetoskeh kuali inawak Dios. Iwa kinmajsikamatiltis Dios se tonati kijtos akin tlajtlakole iwa akin amó. ⁹ N Espiritu kinmajsikamatiltis kateh itech tlajtlakole akimeh amo nechneltokah. ¹⁰ Noiwa kinmajsikamatiltis tlan yekmilawak. Porke Ne nio iwa Notajtsi iwa nomejwah ayakmó nonnechitaskeh. ¹¹ Kinmajsikamatiltis Dios se tonati kijtos akin tlajtlakole iwa akin amó, porke akin tlanawatijtok itech nin tlaltikpaktli, yokitlajtlakoltijkeh.

¹² 'Nikpia okachi tlan moneki nomechilis, pero axa amo weletis nonkajsikamatiskeh.

¹³ Ijkuak wits n Espiritu, Ye nomechmatiltis nochi tlan milák. Porke amo nomechmatiltis san tlan itech kisa, yej nomechmatiltis nochi tlan kikaki. Iwa nomechmatiltis nochi tlan satepa tlamochiwas. ¹⁴ N Espiritu kiteititis nomawistilis, ken kiselis tlan noaxka iwa nomechmatiltis. ¹⁵ Nochi tlan iaxka Notajtsi, noiwa noaxka. Yika onomechili n Espiritu, kiselis tlan noaxka iwa nomechmatiltis.

N neyolkókoli mokopas pakílistli

¹⁶ 'Ayakmó wejkawas nonnechitaskeh, iwa satepa, oksepa nonnechitaskeh. Porke Ne nimuika inawak Notajtsi.

¹⁷ Ijkuakó, sikimeh itlamachtijkawah omotlatlajtlanjikeh:

—¿Tlan kijtosneki tlan techilia? Kijtoa sa kanaj kech tonati ayakmó tikitaskah, iwa amo wejkawas oksepa tikitaskah, noiwa kijtoa yas inawak Itajtsi. ¹⁸ Iwa okimoliayah: ¿tlan kijtosneki ijkuak kijtoa ke ayakmó wejkawas? Mach tikajsikamatih tlan kineki techilis.

¹⁹ Jesús okajsikama yejwah okinekia kitlajtlaniskeh tlan kijtosneki tlan okinmili. Ijkuakó okinmili:

—¿Nonmotlatlajtlaniah tlan kijtosneki ijkuak onikijto: Ayakmó wejkawas nonnechitaskeh, iwa satepa, oksepa nonnechitaskeh? ²⁰ De milajka, de milajka nomechilia, nomejwah nonchokaskeh iwa nonmoyolkokoskeh, pero n tlaltikpaktlakah pakiskeh. Maya nonmoyolkokoskeh, nomoneyolkokol mokopas pakílistli. ²¹ Ijkuak se siwatl ya kipiati ikone, pewa motekipachoa porke yoajsiko ora mokokos. Pero satepa, ijkuak yotlákatkí ikone, kilkawa itlajjowilis iwa paki porke yotlákatkí se konetl itech nin tlaltikpaktli. ²² Ijkoó nomejwah, axa nonmoyolkokoah, pero Ne nomechitas oksepa, iwa nonpakiskeh, iwa non yolpakílistli, amaka weletis nomechkixtilis.

²³ 'Ijkuak ajsiki non tonati, ayakmitla nonnechtlajtlaniskeh. De milajka, de milajka nomechilia, Notajtsi nomechmakas nochi tlan nonkitlajtlaniliskeh ika Notoka. ²⁴ Asta axa nomejwah amitla nonkitlajtlaniliah ika Notoka. Xiktalajtlanikah ijkoó nonkiseliskeh, ijkoó nonkipiaskah miak pakílistli.

Cristo Jesús okitlanili n tlajtlákoli

²⁵ 'Nochi ni yonomechtlapowi ika tlapoálistli, pero ajsiki n tonati ijkuak ayakmó nomechtlapowis ijkoó, yej nomechyekajsikamatiltis Akin Notajtsi. ²⁶ Itech neká tonati nomejwah weletis itla nonkitlajtlaniliskeh Notajtsi ika Notoka. Ayakmó monekis Ne niktalajtlanilis Notajtsi por nomejwah. ²⁷ Notajtsi inewia nomechtlasojtla porke nomejwah nonnechtlasojtla iwa ken nonkineltokah Ne niwalewatok de Dios. ²⁸ Ne oníkiski inawak Notajtsi iwa oniwala itech nin tlaltikpaktli, iwa axa nikkajtewa nin tlaltikpaktli iwa nimokopas inawak Notajtsi.

²⁹ Ijkuakó itlamachtijkawah okilijkeh:

—Axa kema yotikajsikamatkeh motlajtol, iwa ayakmó techtlapowia ika tlapoálistli.

³⁰ Axa ya tikmatih Tejwatsi nochi tikmati, iwa mach ok moneki se mamitstlajtlani itla. Yika tikneltokah Tejwatsi tiwalewatok de Dios.

³¹Jesús okinnankili:

—¿Axa kema ya nonnechneltokah? ³²Ya ajsitiwits n ora iwa ayakmó wejkawas, ijkuak nomejwah nonmoxexeloskeh iwa nonyaskeh nomochajcha. Nonnechkajtewaskeh noselti. Pero Ne amo nika noselti, porke Notajtsi kajki nowa. ³³Nochi ni nomechilia, para xikpiakah yolsekilistli. Nomejwah nontlajjowiskeh itech nin tlaltípkaktli, pero amo ximosotlawakah porke Ne yoníktlanki akin kinawatia nin tlaltípkaktli.

17

Jesús motiotsajtsilia por itlamachtijkawah

¹Ijkuak Jesús otlanki otlajto, oajkotláchixki ilwikak iwa okijto:

—Notajtsi, n ora yoajsiko. Xikweyijkatlali Mokone para ijko Mokone noiwa mamitswey-ijkatili. ²Tejwatsi otechtlali manikinnawati nochteh n tlaltípkaktlakah, para manikinmaka yolflistli kan ilwikak nochteh akimeh otechinmák. ³Tla miximatiskeh sanwel Tejwatsi n de milajka Dios, iwa Cristo Jesús, Akin Tejwatsi otikwáltítlanki, kipiaskah n yolflistli tlan ayik tlamis.

⁴Ne yonimitsweyili itech nin tlaltípkaktli. Iwa yoniktiami n tekítl non otechnawati manikchiwa. ⁵Axa kiné, Notajtsi, techweyijkatili monawak, ika n weyflistli non onikpiaya monawak desde ijkuak ayamó okatka n tlaltípkaktli.

⁶Ne yonikinmatilti Akin Tejwatsi akimeh Tejwatsi otikimpéjpenki itech nin tlaltípkaktli. Yejwah okatkah moaxkawah, pero Tejwatsi otechinmaktili, iwa axa kineltokah motlajtol. ⁷Axa ya kimatih nochi tlan nikpia Tejwatsi otechmák. ⁸Porke nochi tlan Tejwatsi otechili, Ne yonikinmili, iwa yejwah yokineltokakeh. Iwa yokajsikamatkeh milák Ne niwalewatok monawak, iwa yokineltokakeh Tejwatsi otechaltítlanki.

⁹Ne nimitstlatlajtia por yejwah. Amo nimitstlatlajtia por oksikimeh tlaltípkaktlakah, yej por akimeh Tejwatsi otechinmák, porke moaxkawah. ¹⁰Nochi tlan noaxka, noiwa moaxka, iwa tlan moaxka, noiwa noaxka, iwa noweyijkachiwalis monextia intech.

¹¹Ne ayakmó niyetos itech nin tlaltípkaktli porke ya nio mowa, pero yejwah ok mokawah itech nin tlaltípkaktli. Noweyitajtsi, xikinmokuítlawi ika moweletilis non otechinmák, para mayekseititokah kemi Tejwatsi iwa Ne tiseititokeh. ¹²Ijkuak Ne onikatka inwah itech nin tlaltípkaktli, Ne onikinmokuítlawi ika moweletilis akimeh otechinmák, iwa onikimpalewiaya. Iwa nion se de yejwah omoixpolo, sanwel akin yomoixpolojka para mamochiwa tlan kijtoa itlajkuilol Dios.

¹³Pero axa ya nio mowa, iwa nikijtoa nin tlájtoli ijkuak ok nika itech nin tlaltípkaktli, para yejwah makipiakah miak pakílistli itech inyolo ijko kemi Ne nikpia. ¹⁴Ne yonikinmatilti motlajtol notlamachtijkawah, pero n tlaltípkaktlakah kinkokoliah, porke yejwah ayakmó de nin tlaltípkaktli. Ijko kemi Ne amo de nin tlaltípkaktli. ¹⁵Amo nimitstlatlajtia xikinkixti de itech nin tlaltípkaktli, yej xikinyekmokuítlawi para amo makinkajkawawa n amokualitlakatl. ¹⁶Ijko kemi Ne amo de nin tlaltípkaktli, yejwah noiwa ayakmó de nin tlaltípkaktli. ¹⁷Xikin yolchipawa ika motlajtol, motlajtol ye tlan milák. ¹⁸Ijko kemi Tejwatsi otechaltítlanki innawak n tlaltípkaktlakah, ijko noiwa Ne nikintitlani innawak n tlaltípkaktlakah. ¹⁹Ne yoniyéknengi por yejwah, para yejwah noiwa mayeknemikah por motlajtol non milák.

²⁰Ne amo nimotlatlajtia san por notlamachtijkawah, yej noiwa por non satepa tlaneltokaskeh nonawak, ijkuak notlamachtijkawah kitematiltiskeh notlajtol, ²¹para maseititokah nochteh, ijko kemi Tejwatsi iwa Ne tiseititokeh. Iwa yejwah noiwa maseititokah towah, para makitakah n tlaltípkaktlakah Tejwatsi otechaltítlanki. ²²Ne yonikinmák n weyflistli non Tejwatsi otechmák, para ijko yejwah maseititokah, ijko kemi tejwah tiseititokeh. ²³Ne niyetos intech, iwa Tejwatsi tiyetos notech, para ijko yejwah de milajka maseititokah. Iwa ijko n tlaltípkaktlakah makimatikah Tejwatsi otechaltítlanki, iwa milák tikintlasojtla ijko kemi Tejwatsi techtlasojtla.

²⁴Notajtsi, akimeh Tejwatsi otechinmaktili, nikneki mayetokah nowa kan Ne niyetos, para makitakah momawistilis non otechmák, porke techtlasojtla desde ijkuak ayamó

okatka n tlaltípkaktli. ²⁵ Notajtsi yolmilajka, n tlaltípkaktlakah amó omitsixmatkeh. Pero Ne onimitsixma, iwa ninteh non kateh towah okimatkeh Tejwatsi otechaltítlanki. ²⁶ Ne onikinmatilti motoka, iwa ok nikinmatiltijtos, para n tlasojtlálistli non ika techtlasojtla mayeto intech iwa Ne niyetos intech.

18

Kikitskiah n Jesús

(Mt. 26:47-56; Mr. 14:43-50; Lc. 22:47-53)

¹ Ijkuak Jesús otlanki okimijto ninteh tlájtoltel, okiski iwa itlamachtijkawah iwa oyajkeh ik nepa lado de n barranca de Cedrón. Ompa okatka se werto, Jesús iwa itlamachtijkawah ompa okalakeh. ² Judas, akin kitemaktiskia n Jesús, noiwa okixmatia non lojar, porke Jesús iwa itlamachtijkawah miak welta ompa omoooloayah. ³ Ijkó kiné, Judas okinyakan-tiwalaya miakeh soldadojteh iwa sikimeh tlamokuitlawijkeh de n Weyi Tiopa. Ninteh okwalintitlankeh n tiopixkeh non tlayakantokeh iwa fariseos. Yejwah okwalinwikayah kuaujmeh non xotlatiwitseh iwa lintérnajteh iwa téposteh. ⁴ Jesús yokimatia nochi tlan mochiwaskia, yika okinyakanamikito iwa okinmili:

—¿Akin nonkitemoah?

⁵ Yejwah okinankilijkeh:

—Tiktemojtiwitseh n Jesús de Nazaret.

Ye okinmili:

—Ne Ni Jesús.

Noiwa ompa omoketoka n Judas non okitemaktijtoka n Jesús. ⁶ Ijkuak Jesús okinmili: “Ne Ni Jesús”, yejwah otsinkiskeh iwa oajketiajkeh owetsito ipan tlali. ⁷ Ijkuakó Jesús oksepa okintlajtlan:

—¿Akin nonkitemoah?

Yejwah okilijkeh:

—Tiktemoah n Jesús de Nazaret.

⁸ Jesús oksepa okinmili:

—Yonomechili Ne Ni Jesús. Tla Ne nonnechemoah, xikinkawilikah mawiah ninteh.

⁹ Ijkó okijto para mamochiwa tlan Jesús okijtojka: “Akimeh Tejwatsi otechinmák, nion se omoixpolo.” ¹⁰ Ijkuakó Pedro okwalkópinki iespada iwa okitekili inakes non iyekma n Malco, itékitki n tiópixki non okachi otlayakantoka. ¹¹ Jesús okili n Pedro:

—¡Xiktlaati moespada! Notajtsi kineki manikpano nin tlaijyowfistli, moneki ijkó manipano maya tekoko.

Kiwikah n Jesús inawak Anás n tiópixki non okachi otlayakantoka

(Mt. 26:57-58; Mr. 14:53-54; Lc. 22:54)

¹² Ijkuakó n kapita, iwa isoldadojwah, iwa n soldadojteh non kimokuitlawiah n Weyi Tiopa, okikitskijkeh n Jesús, okimailpijkeh iwa okiwikakeh. ¹³ Achto okiwikakeh inawak Anás porke okatka imonta n Caifás. Nin Caifás okatka weyi tiópixki non xiwitl. ¹⁴ Nin Caifás yokintlatlalwijka non de Sanedrín* okachi kuali mamiki sanwel se tlakatl, iwa amo nochteh n judíojteh. Jn. 11:49-51

Pedro kijtoa amo kixmati n Jesús

(Mt. 26:69-70; Mr. 14:66-68; Lc. 22:55-57)

¹⁵ Simón Pedro iwa n ok se imomachti san wejka okwaltokayah n Jesús. Non ok se imomachti omoixmatia iwa n weyi tiópixki Anás, yika ye okalak kan okiwikakeh n Jesús. ¹⁶ Pero n Pedro omoka san kaltempa. Yika, non ok se imomachti non omixmatia iwan weyi tiópixki, omotlapowi iwan siwatl non okimokuitlawiaya n kaltentli iwa okili makikalaki n Pedro. ¹⁷ Ijkuakó n siwatl okitlajtlan n Pedro:

—¿Amo te noiwa imomachti non tlakatl?

Pedro okinankili:

* 18:14 Sanedrín: nin grupo kimajmanah kemi 50 tetajmeh non tlaxikomakah ijkuak kinteiliah akimeh amo kuali kitlakitah itlanawatil Moisés.

—Amó, mach ne.

¹⁸ N tlakewalteh iwa n tlamokuitlawijkeh okitlalijkeh se tlékuili porke osewaya, iwa omototonijtokah. Pedro noiwa omijkuani inakastla n tlékuili.

Anás kitlatsintokia Jesús

(Mt. 26:59-66; Mr. 14:55-64; Lc. 22:66-71)

¹⁹ N weyi tiópixki Anás, opé kitlatsintokia Jesús akimeh itlamachtijkawah iwa tlan okinmachiya. ²⁰ Jesús okinankili:

—Ne onikintlapowiaya inmixpa nochteh n tlakah. Ne ixmostla onitemachiya itech sinagogas iwa kan toweyi Tiopa kan moololoah nochteh n judíojteh, iwa amitla san ichtaka oniktemachti. ²¹ ¿Tleka Ne techtlatlajtlania? Xikintlajtlani akimeh onechkakeh, iwa yejwah mamitsilikah tlan onikinmiliaya. Yejwah kual kimatokeh tlan onikijto.

²² Ijkuak Jesús ijki okijto, se non kimokuitlawia de n Weyi Tiopa, okiixtlatsini iwa okili:

—¿Ijko tiknankilia n weyi tiópixki?

²³ Jesús okinankili:

—Tla onikijto itla amokuali, techili. Pero tla onikijto tlan milák, ¿tleka techixtlatsinia?

²⁴ Ijkuakó Anás okitlanki n Jesús maijlpiti inawak Caifás n weyi tiópixki.

Pedro ome welta kijtoa amo kixmati n Jesús

(Mt. 26:71-75; Mr. 14:69-72; Lc. 22:58-62)

²⁵ Pedro ok omoketoka inakastla n tlékuili iwa ompa okitlajtlanjkeh:

—¿Amo te noiwa se de itlamachtijkawah?

Pedro mach okimokuiti, iwa okijto:

—Amó, mach ne.

²⁶ Ijkuakó se itlákau n weyi tiópixki non ken okitaya n tlakéwale akin Pedro okinakast-sontek, okitlajtlani:

—¿Amo te noiwa onimitsitak iwan Ye, kan werto?

²⁷ Pedro oksepa okijto amo kixmati, iwa san nima se kaxtil otlaquik.

Jesús inawak Pilato

(Mt. 27:1-2, 11-14; Mr. 15:1-5; Lc. 23:1-5)

²⁸ Ijkuakó okiskeh icha n Caifás iwa okiwikakeh n Jesús ichan Poncio Pilato. Iwa ken yotlanestiwalaya n judíojteh amo okalakeh icha n Pilato para amo moyolijtlakoskeh. Yejwah okinekiah yetoskeh yolchipawakeh ijkuak kikuaskeh n tlákuali de Paskua. ²⁹ Ijkuakó Pilato owálkiski, iwa okinmili:

—¿Tleka nonkiteiliah nin tlakatl?

³⁰ Yejwah okinankilijkeh:

—Tla nin tlakatl amo kichijtinemiskia tlan amokuali, mach timitsmaktiliskiah.

³¹ Ijkuakó Pilato okinmili:

—Xikwikakah iwa nomejwah xiktlajtlakoltikah kemi kijtoa nomotlanawatil.

N tlayakankeh judíojteh okilijkeh:

—Nomotlanawatilis amo techkawilia aka matikmiktikah.

³² Ijko otlamochi kemi Jesús okijtoja kenomi mikiskia. *Jn. 3:14, 12:32* ³³ Pilato oksepa okalak kan palasio. Okínotski n Jesús iwa okitlajtlani:

—¿Te tirey de judíojteh?

³⁴ Jesús okinankili:

—¿Tlan techtlajtlania, motech kisa, noso san por oksikimeh omitstlapowijkeh de Ne?

³⁵ Pilato okinankili:

—¡Ne mach ni judío! Innewiah mokniwah iwa n tiopixkeh non tlayakantokeh nomak omitstemaktijkeh. ¿Tlan otikchi?

³⁶ Ijkuakó Jesús okinankili:

—Notekiwajyo amo kajki itech nin tlatípkaktli. Porke tla ijko yetoskia, notlakawah motekilmakaskiah para amo manechtemaktikah innak n judíojteh. Pero Ne amo nitlanawatia nika.

³⁷ Ijkuakó Pilato okili:

—Tla ijkó, ¿te tirey?

Jesús okinankili:

—Ne Ni Rey ijkó kemi te yotikijto. Ne onitlákatki para nietos Ni Rey iwa oniwala itech nin tlaltíkpaktli para niktematilis tlan milák. Nochteh akimeh kixmatih iwa kijtoah tlan milák, weleti kikakah notlajtol.

³⁸Pilato okitlajtlani:

—¿Tlan kijtosneki milák?

Kitemaktiah Jesús para kimiktiskeh

(Mt. 27:15-31; Mr. 15:6-20; Lc. 23:13-25)

Ijkuak Pilato ijkó okitlajtlani n Jesús, oksepa okiski okintlapowito n judójtch, iwa okinmili:

—Ne amo nikkajsi nion se tlajtlákoli itech nin tlakatl. ³⁹Pero nomejwah ya nonkimatokeh trato nikkajkawa seme de nontsaktokch itech ilwitl de Paskua. ¿Nonkinekih manikkajkawa n Rey de Israel?

⁴⁰Ijkuakó, nochteh otsajtsikeh:

—¡Ye amó! ¡Xikkajkawa n Barrabás!

Nin Barrabás okatka tlachteh iwa okimpajsoloaya n tlakah.

19

¹Ijkuakó Pilato otlanawati makiwitekikah n Jesús. ²N soldadojtch okichijchiwilijkeh se korona ika witstli iwa okitlalilijkeh itech itsonteko, iwa okikentilijkeh se kapa chichiliktik.

³Iwa omijkuaniayah inawak Jesús iwa okiliayah:

—¡Timitsweyiliah, Rey de judójtch!

Iwa okixtatsiniayah.

⁴Pilato oksepa owálkiski iwa okinmili:

—Techkakikah, nika onikkixti para xikmatikah amo nikkajsi itech Ye itla amo kuali.

⁵Ijkuak Jesús okiski, okiwikaya ipan itsonteko n korona non okichijchijkeh ika witstli, noiwa okiwikaya n kapa chichiliktik. Ijkuakó Pilato okinmili:

—¡Xiktakah, nika kajki n tlakatl!

⁶Ijkuak okitakeh n tiopixkeh non tlayakantokch iwa n soldadojtch non kimokuitlawiah n Weyi Tiopa, opé tsajtsih:

—¡Xikkrusifikaro, xikkrusifikaro!

Pilato okinmili:

—Xikwikakah nomejwah, iwa xikkrusifikarokah, porke ne amo nikajsi tlan ika niktajtlakoltis.

⁷Pero n tlayakankeh judójtch okinankilijkeh:

—Tejwah tikpiah se tlanawátili, iwa non tlanawátili kijtoa mamiki non tlakatl, porke Ye inewia omotene Ikone Dios.

⁸Ijkuak Pilato okikak tlan okilijkeh, okachi omaujki. ⁹Pilato oksepa okalak kan palasio iwa okitlajtlani n Jesús:

—¿Te, de kani tiwits?

Pero Jesús mach okinankili.

¹⁰Ijkuakó Pilato okili:

—¿Amo technankilis? ¿Mach amo tikmati ne weletis nikimilis mamitskrusifikarokah noso mamitskajkawakah?

¹¹Jesús okinankili:

—Mach weletis titlanawatiskia notech tla Dios amo mitsmakaskia non tekiwajyotl. Yika, akin momak onechtemakti, okachi tlajtlakole ke te.

¹²Pilato okitemoliaya kenijki kikajkawas n Jesús, pero n tlayakankeh judójtch okachi otsajtsiah:

—¡Tla tikkajkawas non tlakatl, tikixpanawis n César, porke akin motenewa rey, kijtosneki kikokolia n César!

¹³ Ijkuak Pilato okinkak ninteh tlájtoltel, okixiti n Jesús, iwa Pilato omotlali kan tlaixkomaka, itech se lojar non itoka Tlateyotitok non itech tlájtoli hebreo itoka Gábata. ¹⁴ Non tonati yomotlatlalijtokah para n ilwitl de Paskua, ijkuakó yokatka kemi tlajko tonati, Pilato okinmili n judíojeteh:

—¡Nikan kajki nomorey!

¹⁵ Iwa yejwah otsajtsikeh:

—¡Xikixiti! ¡Mamiki! ¡Xikkrusifikaro!

Pilato okinmili:

—¿Nonkinekih manikkrusifikaro nomorey?

Pero n tiopixkeh non tlayakantokeh otlanankilijkeh:

—¡Tejwah mach tikpiah ok se rey, sanwel César!

¹⁶ Ijkuakó Pilato okinmaktili n Jesús para makikrusifikarokah, iwa yejwah okiwikakeh.

Kikrusifikaroah n Jesús

(Mt. 27:32-44; Mr. 15:21-32; Lc. 23:26-43)

¹⁷ Ijkuak Jesús okiski de Jerusalén, okimamajtiaya ikrus imilajkayo n lojar non itoka Miketsontekomatl, non itech tlájtoli hebreo omonotsaya Gólgota. ¹⁸ Ompa okikrusifikarojkeh n Jesús iwa n ok ome tlakah ik inajnakastla. ¹⁹ Pilato okichijchi se tlajkuíloli iwa otlanawati makitlalilikah ik ikuatsontla. N tlajkuíloli okijtoaya: “Jesús de Nazaret, Rey de judíos.” ²⁰ Miakeh judíojeteh okiamapoah, porke kan okikrusifikarojkeh n Jesús amo wejka de Jerusalén, iwa oijkuilitoka itech tlájtoli hebreo, latín iwa griego. ²¹ Yika n tiopixkeh non tlayakantokeh okilijkeh n Pilato:

—Amo xikijkuiilo “Rey de judíojeteh”; yej xikijkuiilo “Akin motenewa Rey de judíojeteh.”

²² Pero Pilato okinnankili:

—Tlan yonikijkuiilo, yonikijkuiilo.

²³ Ijkuak n soldadojeteh yokikrusifikarojkeh n Jesús, nawi okinmoxexelilijkeh itlakenwah. Pero kemi imanto oseititoka ²⁴ n soldadojeteh okimolijkeh:

—Amo matiktsononikah, yej matikawiltikah, san akin kitlanis.

Ijkó omochi tlan oijkuilitoka itech itlajkuilol Dios: “Okinmoxexelilijkeh notlakenwah, iwa okimotlatlanilijkeh nomanto.” *Sal. 22:18* Iwa ijkó okichijkeh n soldadojeteh.

²⁵ Iwa inakastla ikrus n Jesús, okatka imamá, iwa iwelti imamá, María isiwa n Cleofas, iwa n María de Magdala. ²⁶ Ijkuak Jesús okitak imamá inakastla itlamachtijkau Juan, okili imamá:

—Siwatl, ompa kajki mokone.

²⁷ Otlanki okili n Juan:

—Xikita, ompa kajki momamá.

Desde ijkuakó itlamachtijkau okiseli icha.

Jesús mikki

(Mt. 27:45-56; Mr. 15:33-41; Lc. 23:44-49)

²⁸ Satepa, ijkuak Jesús okitak nochi iteki yomochi, iwa para mamochiwa tlan kijtoa itlajkuilol Dios, Ye okijto:

—¡Niamiki!

²⁹ Ompa okatka se tekonsi non okipiaya vinagre. Yejwah okipolakijkeh se esponja itech non vinagre, okitsekojkeh itech se kuawitl de isopo iwa okimakakeh n Jesús makoni. *Sal. 69:21* ³⁰ Ijkuak Jesús okiyeko n vinagre okijto:

—¡Nochi yomochi!

Omokuatolo iwa omikki.

Se soldado okikespantopiti n Jesús

³¹ Se tonati achto de n ilwitl de Paskua, n judíojeteh amo okinekiah mamokawakah n kuerpojeteh itech krus itech sábadó, porke okatka weyi tonati. Yika okitlatlautijkeh n Pilato makinmetspostekikah akimeh okinkrusifikarojkeh, iwa makinmachiwakah. ³² Ijkuakó n soldadojeteh oyajkeh okinmetspostekitoh akimeh okrusifikaritokah inajnakastla n Jesús.

³³ Pero ijkuak omijkuanijkeh inawak Jesús, kemi okitakeh yomikki, ayakmó okimet-spostekeh. ³⁴ Pero seme de n soldadojteh okikespantopiti ika se kuawitl yakawitstik, iwa sanima okiski estli iwa atl.

³⁵ Ne nonewia onikatak nochi ni, iwa tlan nomechmatiltia milák. Nikmatok tlan nikijtoa milák, para nomejwah noiwa xitlaneltokakah. ³⁶ Nochi ni otlamocho kemi kijtoa itlajkuilol Dios: “Nion se iomio kipostekiliskeh.” *Éx. 12:46; Nm. 9:12; Sal. 34:20* ³⁷ Noiwa oksika kijtoa: “Kitaskeh akin okikespantopitijkeh.” *Zac. 12:10*

Kitookah n Jesús

(Mt. 27:57-61; Mr. 15:42-47; Lc. 23:50-56)

³⁸ Satepa, José de Arimatea okitlatlajuito n Pilato makikawili makiwika ikuervo Jesús. Nin José okatka imomachtli n Jesús san ichtaka porke okinmawiliaya n tiopixkeh judíojteh. N Pilato okikawili n José makiwika n kuerpo. ³⁹ Noiwa Nicodemo non se yúali omotlapowito iwan Jesús, okalakito kan okatka ikuervo Jesús iwa okiwikaya kemi sempóali iwa n májtlaktli (30) kilo ajwajkayotl non okichijchijkeh ika mirra iwa áloe. ⁴⁰ Okitemowijkeh ikuervo Jesús iwa okikekemeloykeh ika tsótsolteh non okinmajwialijkeh kemi kichiwah n judíojteh ijkuak okintookayah inmikenwah. ⁴¹ Kan okikrusifikaroykeh n Jesús okatka se werto, iwa itech non werto okatka se yankuik miketékochtli, kan ayamaka okitookayah. ⁴² Ompa okitookakeh n Jesús porke n miketékochtli amo wejka okatka de Jerusalén iwa n weyi tonati yowalajsia.

20

Jesús moyolitia

(Mt. 28:1-10; Mr. 16:1-8; Lc. 24:1-12)

¹ N domingo, semi kuinal ijkuak ok otleuyatoka, María de Magdala oyá kan okitookakeh n Jesús. Iwa ijkuak okalakito, okitak yokachijkeh n tetl non okikamatsaktoka n miketékochtli. ² Ijkuakó omotlelo María iwa oyá kan okatka n Pedro iwa n Juan non Jesús okitlasojtlaya, iwa okinmili:

—Yokiwikakeh ikuervo n Toteko Jesús de kan miketékochtli, iwa amo tikmatih kan okikawatoh.

³ Pedro iwa Juan okiskeh iwa oyajkeh okitatoh n miketékochtli. ⁴ Sansikah omotleloayah, pero Juan okachi omotlelo ke Pedro iwa achto okalakito kan miketékochtli. ⁵ Juan oontláchixki tlajitk, iwa okimitak n tsótsolteh ompa okatkah, pero mach okalak. ⁶ San nima okalakiko n Pedro iwa okalaktiwetski kan miketékochtli. Ye noiwa okimitak n tsótsolteh ompa okatkah, ⁷ iwa n mantajtsótsoli non ika okuakemelitoka n Jesús, ixkoya okatka. ⁸ Ijkuakó Juan okalak kan miketékochtli, iwa ijkuak okitak, otlaneltokak. ⁹ Porke achto, ayamó okajsikamatiah itlajkuilol Dios, Jesús moyolitiskia de kan mikemeh. ¹⁰ Ijkuakó imomachtijkawah omokopkeh inchajcha.

Jesús kimonextilia María de Magdala

(Mr. 16:9-11)

¹¹ Pero María de Magdala omoka kaltempa chokatok inakastla n miketékochtli. Keman ochokatoka oontláchixki ijtk n miketékochtli, ¹² okimitak ome ángelteh ika intlakeh istak, ninteh ángelteh oewatokah kan achto owilantoka ikuervo Jesús, se ik ikuatsontla iwa ok se ikxitla. ¹³ N ángelteh okitlajtlanijkeh:

—Siwatl, ¿tleka tichoka?

Ye okinmili:

—Porke okiwikakeh ikuervo Noteko iwa amo nikmati kan okikawatoh.

¹⁴ Ijkuak ijko okinmili, omókopki iwa okitak n Jesús ompa moketok, pero amo okixma kox ye n Jesús. ¹⁵ Ijkuakó Jesús okitlajtlani:

—Siwatl, ¿tleka tichoka? ¿Akin tiktemoa?

María okimoli chamo non tlakatl ye non okimokuitlawiaya n werto, iwa okili:

—Tata, tla otikwik ikuervo, techili kan otikkawato, iwa ne nikwikas.

¹⁶ Ijkuakó Jesús okili:

—¡María!

Ye omokoptíwetski iwa okili ika tlájtoli hebreo:

—¡Raboni! —non tlájtoli kijtosneki Tlamachti.

¹⁷Jesús okili:

—¡Amo techtsakuili!, porke ayamó nitlejko íwa Notajtsi. Pero xio xikinmiliti nokniwah nitlejkos íwa Notajtsi, Akin noiwa Nomotata, íwa Nodios, akin noiwa Nomodios.

¹⁸Ijkuakó María de Magdala okinmatiltito n momachtijkeh nik ye okitak Inteko, iwa Ye okinmili nochi ni.

Jesús kinmonextilia itlamachtijkawah

(Mt. 28:16-20; Mr. 16:14-18; Lc. 24:36-49)

¹⁹Ijkuak otiotlatik, itlamachtijkawah n Jesús oololitokah iwa omokaltsakeh porke okinmawiliayah n judíojteh. Ijkuakó Jesús okalak iwa omoketsato tlatlajkotia iwa okinmili:

—¡Xikpiakah yolseklistli!

²⁰Ijkuak íjkó okinmili, okimititi imawah iwa icespa. Yejwah opakeh porke oksepa okitakeh Inteko. ²¹Jesús oksepa okinmili:

—¡Xikpiakah yolseklistli! Kemi Notajtsi onechtítlanki, íjkó Ne nomechtitlani.

²²Ijkuak íjkí okijto, okinmíjpski iwa okinmili:

—Xikselikah n Espírítu Santo. ²³Akimeh nonkintlapojpolwiliskeh intlajtlakolwah, mokawaskeh chipawakeh. Pero akimeh amo nonkintlapojpolwiliskeh intlajtlakolwah, mokawaskeh itech tlajtlákoli.

Tomás kita n Jesús

²⁴Tomás, seme de n májtlaktli iwa ome itlamachtijkawah, non okiliayah kuatsi, amo ompa okatka iwan oksikimeh itlamachtijkawah ijkuak owala n Jesús. ²⁵Satapa, n oksikimeh imomachtijkawah okilijkeh n Tomás:

—Yotikitakeh n Toteko Jesús.

Pero Tomás okinmili:

—Tla amo nikimitas imawah iwa tla amo nikkalakis nomajpil kan okintsoptonilijkeh n klavos, iwa nikkalakis noma icespa, ayik nikneltokas.

²⁶Chikweyi tonati satapa, itlamachtijkawah oksepa okaltsaktokah, iwa Tomás noiwa ompa okatka. Maya n kaltentli otsaktoka, Jesús okalak iwa omóketski tlatlajkotia iwa okinmili:

—¡Xikpiakah yolseklistli!

²⁷Otlanki okili n Tomás:

—Nika xiktlali momajpil, iwa xikinmita nomawah. Xikijkuani moma iwa xikkalaki kan nokespa. Iwa sansemi xitlaneltoka.

²⁸Ijkuakó Tomás okili:

—¡Noteko iwa Nodios!

²⁹Jesús okili:

—Tomás, otitlaneltokak porke otechitak. ¡Miak pakílistli kipiaskah akimeh amo onechitakeh, iwa nechneltokaskeh!

Nin tlajkuíloli omoijkuilo para xitlaneltokakah

³⁰Jesús okinchi ok miaktikeh milagrojteh inmixpah itlamachtijkawah non amo ijkuilitokeh itech nin amatlajkuíloli. ³¹Pero nin tlajkuíloli omoijkuilo para xikneltokakah Jesús Ye n Cristo lkone Dios. Iwa tla nomejwah nonkineltokaskeh, nonkipiaskah yolklistli ika Itoka.

21

Jesús okinmonextili chikome itlamachtijkawah

¹Satapa, Jesús oksepa okinmonextili itlamachtijkawah itempa n lago de Tiberias. Iwa íjkí okinmonextili: ²Ompa sansikah okatkah Simón Pedro, Tomás non okiliayah kuatsi, Natanael non de Caná de Galilea, itelpochwah n Zebedeo iwa n ok ome itlamachtijkawah n Jesús. ³Iwa Simón Pedro okinmili:

—Nio nimichmati.

Yejwah okinankilijkeh:

—Tejwah noiwa tiawih mowa.

Yejwah otlejkokeh itech se barka iwa omichmaatoh, pero non yúali amitla michi okikit-skijkeh. ⁴Ijkuak yotlanestiwalaya, Jesús omoketsato itempa n lago, pero itlamachtijkawah amo okimatiah kox Ye n Jesús. ⁵Ijkuakó okinmili:

—Nopilwah, ¿nonkipiah siki michi?

Yejwah okinankilijkeh:

—Amó.

⁶Ijkuakó Jesús okinmili:

—Xikontlamotlakah n michayatl iyekma n barka iwa nonkinmajsiskeh michimeh.

Yejwah ijko okichijkeh, iwa ayakmó oweletiah okixtiayah n michayatl, porke miaktikeh michimeh okinkitskijkeh. ⁷Ijkuakó Juan non Jesús okitlasojtlaya okili n Pedro:

—¡Ye n Toteko Jesús!

Ijkuak Simón Pedro okikak Ye n Jesús, okimotlalili itlakeh porke okatka xipetstik iwa onmotlamotlak ijtik atl. ⁸N oksikimeh itlamachtijkawah okalakitoh itempa n atl itech barka sa kitilantiwih n michayatl tentiwits ika michimeh, porke sa kanaj mákuili poali metro okatkah itempa n atl. ⁹Ijkuak okiskeh, okitakeh siki tlekúyoli xotlatok, iwa ikpak okatka michi, iwa paj. ¹⁰Jesús okinmili:

—Xikualinwikakah sikimeh michimeh non sikin ononkinkixtijkeh.

¹¹Simón Pedro otlejkok kan barka iwa okitilantia asta itempa n lago n michayatl tenti ika se siento iwa n tlajko iwa n eyi (153) wejweyi michimeh. Iwa maya n michimeh okatkah miaktikeh n michayatl amo okojkótonki. ¹²Ijkuakó Jesús okinmili:

—Ximotlamajsewikih.

Nion se itlamachtijkau omixewi okitlajtlani Akin Ye, porke yokimatiah Ye Jesús.

¹³Otlanki Jesús owalmijkuani, okónanki n paj iwa okinmajmák itlamachtijkawah, iwa noijkó okichi iwa n michimeh.

¹⁴Ika ni ya eyi welta okinmonextili itlamachtijkawah satepa de omoyoliti.

Jesús kitlapowia Simón Pedro

¹⁵Ijkuak yotlankeh omotlamajsewijkeh, Jesús okili n Simón Pedro:

—¿Simón ipiltsi n Juan, techtlasojtla okachi ke ninteh?

Pedro okinankili:

—Noteko Tejwatsi kuali tikmatok nimitsneki.

Jesús okili:

—Techinmokuitlawili noichkawah.

¹⁶Jesús oksepa okitlajtlani:

—Simón ipiltsi n Juan, ¿techtlasojtla?

Pedro okinankili:

—Noteko, Tejwatsi kuali tikmatok nimitsneki.

Jesús oksepa okili:

—Techinmokuitlawili noichkawah.

¹⁷Jesús okitlajtlani ipan eyi welta:

—¿Simón Pedro ipiltsi n Juan, techneki?

Pedro omoyolkoko porke Jesús ayakmó okitlajtlani techtlasojtla ipan eyi welta, porke sa iksemi okitlajtlani kox okinekia. Pedro okinankili:

—Noteko, Tejwatsi kuali tikmatok nimitsneki.

Jesús okili:

—Techinmokuitlawili noichkawah. ¹⁸De milajka, de milajka nimitsilia, ijkuak otikatka titélpochtli, te monewia otikonakiaya motlake, iwa otiaya san kan ik te otiknekia. Pero ijkuak tiwewejtis, sa tikinmajkokuis momawah iwa ok se mitstlalilis motlakeh iwa mitswikas kan amo tikneki tias.

¹⁹Ijkuak Jesús ijko okijto, okinekia kajsikamatiltis n Pedro kenijki mikiskia iwa ijko kiweyiliskia Dios. Satepa okili:

—Xiwiki nowa.

Jesús tlajtoa de Juan

²⁰ Ijkuak Pedro owalmókopki okitak okwalintokaya itlamachtijkau akin Jesús okitla-sojtlaya. Ye omonakasikték itech ielpa ijkuak okimomajsewijtakah n yuallákuali de Paskua iwa okitlajtlanjika akin kitemaktiskia. ²¹ Ijkuak Pedro okitak itlamachtijkau n Jesús, okitlajtlani:

—Noteko, iwa nin tlakatl, ¿tlan mochiwas?

²² Jesús okinankili:

—Tla Ne nikhonekiltis mamokawa asta ijkuak Ne niwalmokopas, te mach moteki. Te xiwiki nowa.

²³ Ijkuakó non tlájtoli opé momati itech nochteh non okineltokakeh, iwa okijtoayah non imomachtijkau amo mikiskia. Pero Jesús amo okijto amo mikiskia, Ye okijto: “Tla Ne nikhonekiltis mamokawa asta ijkuak Ne niwalmokopas, te mach moteki.”

²⁴ Ye nin imomachtijkau akin tetlapowia de tlan otlamochi iwa nika okijkuilo. Iwa tejwah kualitkamatokeh kijtoa tlan milák.

²⁵ Iwa okachi miak onka tlan okichi n Jesús. Tla mijkuiloskia nochi tlan Ye okichi, n tlajkuíolteh amo akiskiah itech nin tlaltíkpaktli.

Tlan okichijkeh Itlatitlanilwah Cristo

Jesús okisentlalili itlatematiltjkawah kintitlanilis n Espíritu Santo

¹ Noknitsi Teófilo non saikpanoa tiweyixtok: Itech non sikinika noamatlajkuilol, oniki-jkuilo nochi tlan Jesús okichi iwa otlamachti desde ijkuak okipewalti iteki, ² asta n tonati ijkuak otlejkok ilwikak. Ijkuak ya muikaskia, ika iweletilis n Espíritu Santo okimpéjpenki itlatitlanilwah iwa okinnawatijtewak tlan kichiwaskiah. ³ Satepa ijkuak yomoyoliti, Jesús inewia okinmonenextili ipan ome póali tonatijmeh itlatitlanilwah, para makitakah Ye milák yolitok, iwa okintlapowiaya kenijki Dios tlanawatia.

⁴ Ijkuak okatka iwa itlatitlanilwah, Jesús okinnawati amo mawiah de Jerusalén. Iwa okinmili:

—Xikchiakah mamochiwa tlan Notajtsi Dios onomechili, ijko kemi Ne noiwa yonomechili. ⁵ Milák, Juan otlakuaateki ika atl, pero sa kanaj kech tonati, Dios nomechkuatekis ika Espíritu Santo.

Jesús tlejko ilwikak

⁶ Akimeh okatkah iwan Jesús, okitlajtlanijkeh:

—Tejwatsi, ¿axa tikinmakixtisi n tlaltikpaktlakah de Israel iwa tikinmakas se tlanawati?

⁷ Jesús okinnankili:

—Nomejwah mach nomoteki tlan tonati noso kermania Totajtsi Dios kichiwas iteki. Sanwel Ye tlanawatia itech nochi tlan kichiwa. ⁸ Ijkuak n Espíritu Santo wits nomotech, nonkiseliskeh weletfílistli iwa nonyaskeh nontetlapowitiweh notlajtol itech Jerusalén, Judea, Samaria; iwa itech nochi n tlaltikpaktli.

⁹ Ijkuak Jesús yotlanki okinmili nin tlájtoli, yejwah ok okontlajlatokah, Jesús opé moajkoku iwa okitakeh kenijki okiwiwakeh ilwikak. Iwa san nima se mexтли okwalmókenki, iwa ayakmó okitakeh. ¹⁰ Yejwah okitlajlatokah n Jesús kenomi otlejkotiaya ilwikak. Ijkuakó ome tlakah non otlakentitokah ika intlakeh istak owalmonextijkeh innakastla. ¹¹ Yejwah okimilijkeh:

—Tlakah de Galilea, ¿tleka ononmokajkeh nontlachixtokeh ilwikak? Nin Jesús Akin okatka nomowah iwa yokiwiwakeh ilwikak, oksepa walmokopas ijko kemi ononkitakeh oyá.

Kipejpenah n Matías mayeto ipatka n Judas

¹² Ijkuakó itlatitlanilwah owaltemokeh de kan olivostepetl onejnentiajkeh sanwel se kilómetro iwa okalakitoh Jerusalén. Intlanawatilis okinkawiliaya n judíojteh manejnemikah san achó itech sábado. ¹³ Ijkuak oajsitoh Jerusalén, okalakeh itech kali iwa otlejkokeh kan omokalotiaya. Ompa okatka:

Pedro,

Jacobo,

Juan,

Andrés,

Felipe,

Tomás,

Bartolomé,

Mateo,

Jacobo ipiltsi n Alfeo,

Simón n Zelote (Kananista)*

iwa Judas itelpoch n Jacobo.

¹⁴ Yejwah iwa oksikimeh siwameh omoololoayah nochi tonati iwa motiotsajtsiliskeh. Noiwa ompa okatkah, María imamá n Jesús iwa ikniwah n Jesús.

* 1:13 Simón tewa iwan partido de n Kananistas. Nonteh Kananistas se partido non okinekia moixkoyantiskeh de n tekiwa romano.

¹⁵Se tonati ompa okatkah kemi chikwase póali (120) tokniwah non okineltokayah Cristo Jesús. Pedro omóketski tlatlajkotia, iwa okinmili:

¹⁶—Nokniwah, techkakah yowejka n rey David okijkuilo tlan okili n Espíritu Santo, tlan Judas kichiwaskia, ijkuak okinyákanki akimeh okikitskijkeh n Jesús. *Sal. 41:9* ¹⁷Judas towa okatka, nojki towah otekitia. ¹⁸Pero tikmatokeh ika non tomi non okimakakeh ika tlan amokuali okichi, okiko se tlali. Iwa owetski ika itsonteko iwa otlalaxtsáyanki iwa ochitonkeh ikuitlaxkolwah. ¹⁹Ijkuak non ochantitokah Jerusalén okimatkeh, non tlali okitlalilijkeh itoka Hacéldama, non itech tlájtoli hebreo kijtosneki: Tlali de estli. ²⁰Porke itech n Salmos ijki kijtojtok:

Icha mamokawa iselti,
iwa amaka ompa machanchiwa.

Sal. 69:25

Iwa itech ok se Salmo kijtoa:

Ok se makonanili iteki.

Sal. 109:8

²¹Nika kateh sikimeh tlakah non otechwikatinenkeh nochipa ijkuak n Toteko Jesús onentinemia towah, ²²desde ijkuak Juan okikuaateki n Jesús iwa asta ijkuak otlejokk ilwikak. Yika moneki seme de yejwah matechmoseitili, iwa sansikah matitetlapowikah Jesús yomoyoliti.

²³Ijkuakó okimpejpenkeh ome: José non okinotsayah Barsabás, akin noiwa okiliayah Yolmilajka, iwa Matías. ²⁴Iwa ijki omotiotsajtsilijkeh:

—Toteko Dios, Tejwatsi tikmati tlan kipixtokeh itech inyolo nochteh n tlakah. Techa-jksamatilti katlie de ninteh ome tlakah yotikmopejpenili, ²⁵para makichiwa n tekiti non Judas okika, porke ye oyá kan inewia okimotlanili.

²⁶Ijkuakó okipejpenkeh sawel se, iwa okítlanki Matías, akin san nima non tonati omoseitili iwa oksikimeh májtlaktli iwa n se tlatematiltijkeh.

2

Totajtsi Dios kualtitlani n Espíritu Santo

¹Ijkuak oajsiko n ilwitl de Pentecostés, nochteh non okineltokakeh n Cristo Jesús okatkah sansikah itech se kali.

²San nima owaltlatékuinki kan ilwikak, kemi ijkuak tlaxojpitsa se ejekatl chikaktik, iwa omonawaloti ijtik nochi n kali kan yejwah oewatokah. ³Ijkuakó okinmonextilijkeh sikimeh kemi nenépliteh milintokeh non omoxexelojkeh impah nochteh. ⁴Iwa nochteh okiselijkeh n Espíritu Santo, iwa opé tlajtoah ika tlatlamanteh tlájtoltel. Iwa okijtoayah tlan n Espíritu Santo okinmiliaya makijtokah.

⁵Itech nonteh tonatijmeh, ompa Jerusalén okatkah miakeh judójtet non satlawel okimopantiaayah itlanawatil Moisés. Ninteh judójtet owalajkeh de nochi lado de nin tlatltpaktli. ⁶Ijkuak okikakeh non tlatekuinílistli, san nima owalmoolojkeh miakeh tlakah, iwa mach ok okimatiah tlan kijtoskeh, porke yejwah opé kikaki kintlapowiah ika intlajtol. ⁷Yejwah satlawel omotlajtlachialtijkeh, iwa okijtojkeh:

—¿Amo de Galilea nochteh ninteh non tlajtojtokeh? ⁸¿Tleka kiné, tikinkakih tlajtoah ika totlajtol non tejwah ipan otitlakatkeh? ⁹Nika kateh sikimeh tlakah de Partia, de Media, de Elam, de Mesopotamia, de Judea, de Capadocia, de Ponto iwa de Asia, ¹⁰de Frigia iwa de Panfilia, de Egipto iwa de talmeh de África, non kateh okachi tlayakapa de Cirene. Nika noiwa chantitokeh sikimeh tlakah de Roma. ¹¹Noiwa nika kateh sikimeh tlakah non owalajkeh de Creta iwa de Arabia. Iwa ika tejwah totlajtol tikinkakih kenijki yejwah kimijtoah n milagros non Dios yokinchi.

¹²Nochteh san omotlajtlachialtiayah iwa mach okimatiah tlan kijtoskeh, iwa omotlatlajtlaniayah:

—¿Tlan kijtosneki nochi ní?

¹³Pero oksikimeh san otepijpinawiaayah, iwa okijtoayah:

—¡Ninteh tlakah wintitokeh!

Pedro omóketski iwa opé tlajtoa

¹⁴ Ijkuakó Pedro omóketski iwa n májtlakteh iwa n se tlatematiltijkeh, iwa chikawak opé tlajtoa:

—Judíos iwa nochteh akimeh nonchanchijtokeh nika Jerusalén, xikmatikah nochi ni, iwa kualí xikkakikah tlan nomechilis. ¹⁵ Ninteh tlakah amo wintitokeh kemi nomejwah nonkimoliah, porke wel ok kualka, sikin las nueve de kuinal. ¹⁶ Porke nochi tlan axa panotok, ye noni tlan yowejka okijto n profeta Joel:

¹⁷ N Totajtsi Dios kijtoa:

Itech sa iksemi tonatijmeh,
niktitlanis no Espíritu itech nochteh n tlaltikpaktlakah.
Nomopilwah iwa nomochpochwah kijtoskeh tlan tlamochiwas satepa.
Nomotelpochwah kinmitaskeh neskayolteh
iwa n tetajtsintsinteh tejttemikiskeh.

¹⁸ Itech nekateh tonatijmeh niktitanis no Espíritu itech n tlakah iwa siwameh akimeh tekiti nonawak,

iwa tetlapowiskeh tlan satepa tlamochiwas.

¹⁹ Tlakpak kan ilwikak iwa tlatsintla itech tlaltikpaktli:

nikinteititis neskayolteh,
estli, tletl iwa méxpoktli.

²⁰ N tonati ayakmó tlawis,

iwa n metsi chichilewis kemi estli,
achto de maajsiki itonati n Toteko,
non tonati yetos weyi iwa mawistik.

²¹ Iwa nochteh akimeh kitenewaskeh Itoka n Toteko, Ye kinmakixtis.

²² Tlakah de Israel, xikkakikah tlan nomechilis: Jesús de Nazaret, Dios okipéjpenki. Nomejwah kualí nonkimatokeh, porke Dios okimák weletílistli para makinchiwa wejweyi neskayolteh nomoixpa, kemi nomejwah kualí nonkimatokeh. ²³ Pero nomejwah ononkik-itskijkeh iwa ononkitemaktijkeh inmak tlakah tlajtlakolejkeh, iwa yejwah okimiktijkeh ipan krus, ijko kemi Dios yokimatia iwa okimonekilti ijko mamochiwa. ²⁴ Pero Totajtsi Dios okiyoliti. Ye okitekixtili imak n mikílistli, porke n mikílistli mach owéletki okítlanki. ²⁵ N rey David otlajto de Cristo Jesús ijkuak okijto:

Nochipa onikitaya n Toteko noyakapa;
amitla weletis nechmojtis, porke ye kajki nomayekma.

²⁶ Yika niyolpaki,

iwa nitlakuika ika pakílistli,
iwa maya niwilantos,
kualí nikmatok oksepa nimoyolitis.

²⁷ Porke mach tikkawas noalma kan miktla,
nion tikkawas maijtlakawi ikuerpo Mokone yolchipawak.

²⁸ Otechimititi n ojmech non nechwikah kan nochipa niyolitos,
iwa tikchiwas satlawel maniyolpaki ijkuak niyetos monawak.

²⁹ Nokniwah, kualí tikmatokeh totata rey David omikki iwa okitookakeh, porke asta axa tikmatokeh kan omotook. ³⁰ Pero David okatka profeta, iwa kualí okimatia n Dios okisentlali seme de iixwiiwah non walaskia okachi satepa yetoskia n Cristo. Ye mochiwaskia rey kemi okatka n David. ³¹ Ijko, kemi yaskia inewia kontlajtlatok, David okijto Cristo moyolitiskia iwa Dios amo kikawaskia ikuerpo maijtlakawi miktla. ³² Dios okiyoliti n Jesús iwa tinochteh otikitakeh. ³³ Ijko kiné, ik iyekma Totajtsi Dios okiweyijkatlali n Jesús, iwa Jesús okiseli n Espíritu Santo non Itajtsi yokijtojka kitemakas. Iwa axa yotechaltílanili n Espíritu Santo non axa nonkitah iwa nonkikakih. ³⁴ David amo otlejkok ilwikak. Pero inewia okijto:

Notajtsi Dios okili Noteko:

“Ximoyayanti noyekma,

³⁵ asta manikintlali non mitskokolia itlampa mokxiwah.”

Sal. 110:1

³⁶ Tlakah de Israel, kuali xikmatikah, nin Jesús Akin nomejwah ononkikrusifikarojkeh, Dios okiweyijkatlali para mayeto Nomoteko iwa Nomotemakixti.

³⁷ Ijkuak ijko okikakeh, nochteh omoyolkokojkeh iwa okitlajtlanjkeh n Pedro iwa n oksikimeh tlatitlanilti:

—Tokniwah, ¿tlan moneki matikchiwahkah?

³⁸ Ijkuakó Pedro okinnankili:

—Xikilikah Dios manomechtlapojpolwi iwa xiktlakitakah, iwa ximotekawilikah manomechkuaatekikah itech Itoka n Cristo Jesús, ijko Dios nomechtlapojpolwis de nomotlajtlakolwah iwa nonkiseliskeh n Espíritu Santo. ³⁹ Nin tlájtoli non yowejka omozentlali omochi para nomejwah iwa nomopilwah, noiwa para nochteh akimeh Totajtsi Dios kinekis kinmakixtis itech nochi n tlaltípkaktli.

⁴⁰ Pedro ok okintlapowiaya n tokniwah iwa ika miak chikawálistli okimiliaya:

—¡Ximomakixtikah de n tlaijowílistli non kiseliskeh akimeh tlajtlakolchijtinemih!

⁴¹ Ijko kiné, akimeh okikakeh tlan Pedro okinmacthi, omokuaatekijkeh; iwa non tonati omoseitilijkeh iwan tokniwah non kineltokah Cristo Jesús kemi eyi mil tlakah. ⁴² Iwa nochteh omochijchikawayah iwa okichiwayah tlan n tlatematiltijkeh okinmacthiayah, omoyekwikayah, omotiotsajtsiliayah iwa omoooloayah para kisepankuaskeh n paj.

Kenomi omoyekwikayah non sikinika okineltokakeh Cristo Jesús

⁴³ Nochteh omotlajtlachialtiayah, porke itlatitlanilwah n Cristo okinchiwayah mi-akeh milagros iwa okinextiayah tlan amayik omotaya. ⁴⁴ Nochteh non okineltokakeh omoyekwikayah, iwa okimosepanxexeliliayah tlan okipiayah. ⁴⁵ Okinemakayah nochi tlan okipiayah, iwa okinxejeliliayah n tomi akimeh okimpoloaya. ⁴⁶ Ixmostla omoooloayah kan Weyi Tiopa, iwa incha okisepankuayah n paj, iwa sansikah omotlamajsewiayah ika pakílistli. ⁴⁷ Okiweyijkachiwayah Dios, iwa nochteh n tlakah de non altepetl okinyekitayah. Ixmostla omomiakiliayah non okineltokayah akimeh n Toteko Dios okinmakixtijtiaya.

3

Pedro kipajtia se tlakatl non amo weleti nejnemi

¹ Se tonati, Pedro iwa n Juan oyajkeh kan Weyi Tiopa kemi las tres de tiotlak. Non ora nochteh omotiotsajtsiliayah. ² Nochi tonati ompa okatka se tlakatl non amo weleti nejnemi. Okonkawayah kan ikalte n Weyi Tiopa non omonotsaya Kuajkualtsi, iwa ompa okintlajtlaniaya tomi akimeh ompa okalakiah. ³ Ijkuak ye non amo weleti nejnemi okitak n Pedro iwa n Juan, yokalaktiayah tiopa, okintlajtlani tomi. ⁴ Ijkuakó Pedro iwa Juan okontlajtlatakeh, iwa Pedro okili n tlakatl:

—Techalita.

⁵ N tlakatl okinyektlajtlata, porke okimoli chamo kimakaskiah itla. ⁶ Pero Pedro okili:

—Amo nikpia oro nion plata, pero tlan nikpíxtok nimitsmaka: Itech Itoka n Cristo Jesús de Nazaret, ¡ximoketsa iwa xinejnemi!

⁷ Ijkuakó Pedro okontlanki ika imayekma iwa okiketsalti, iwa san nima omoyekmijmilajkeh ikxiomiwah. ⁸ Ijkuakó non amo oweletia onejnemia owalmóketski iwa opé nejnemi. Iwa okalak inwah kan Weyi Tiopa, nejnenti iwa ajkotsekuinti iwa okiweyijkachiwaya Dios. ⁹ Nochteh okitakeh n tlakatl kenijki onejnemia iwa okiweyijkachiwaya Dios. ¹⁰ Nochteh okiyekixmatkeh n tlakatl porke nochi tonati omotominijtlaniaya ikaltempa n Weyi Tiopa kan kaltentli non kilia Kuajkualtsi, iwa omotlajtlachialtijkeh por tlan otlamochijkah.

Pedro tenonotsa kan Portal de Salomón

¹¹ N tlakatl non opajtik ayakmó okinkawayah n Pedro nion Juan. Nochteh n tlakah omotlajtlachialtijkeh iwa omotlelojkeh okimatoh kan korredor non kiliah Portal de Salomón. ¹² Ijkuak ijko okitak, Pedro okinmili:

—Tlakah de Israel, ¿tleka nonmotlajtlachialtia? Techsentlajtlatah kemi yetoskia tejwah tonewiah otikpajtijkeh nin tlakatl; noso kemi yetoskia tikualteh titlakah, iwa ika toweletilis otikchijkeh manejnemi. ¹³ Pero amo ijko kemi non kimoliah; porke

Idios Abraham, Isaac, Jacob iwa nochteh totatawah, Ye Akin okipajti n kócoxki iwa okiweyijkatlali Ikone Jesús, Akin nomejwah ononkitemaktijkeh inmak n tekiwajkeh, iwa ijkuak Pilato okinekia kikajkawas, nomejwah mach ononkinekeh. ¹⁴Ijkuak onomechtlajtlaniykeh kox ononkinehiah makikajkawakah Akin yolchipawak iwa yekmilajka, nomejwah mach ononkinekeh, yej ononkitlajtlankeh makikajkawakah se tlakatl non temikti. ¹⁵Ijkó nomejwah ononkimiktijkeh Akin weleti kichiwa se mayolito nochipa. Pero Dios okiyoliti, iwa noni tejwah kualitimatokoh porke otiktakeh. ¹⁶Nin tlakatl non kajki nomoyakapa, non nomejwah kualitimatoh, Dios okipajti porke titlaneltokah itech iweletilis n Jesús. Iwa por tikneltokah n Jesús, kemi nochteh nomejwah nonweletih nonkitah.

¹⁷'Nokniwah, kualitimatoh ijkuak nomejwah iwa n tlanawatijkeh ononkimiktijkeh n Jesús, mach ononkimatiah tlan ononkichiwayah. ¹⁸Ijkó Dios okichi tlan achto yokitem-atiltijka ika intlajtol iprofetajwah. Nochteh yejwah okijtojkeh Cristo tlaijyowiskia. ¹⁹Yika, ayakmó xikchiwahkah tlajtlákolli iwa xiktlakitakah Dios. Ijkó Ye kilkawas nochi tlan amo kualitimatoh, iwa nomechmakas yankuik chikawálistli, ²⁰iwa kualitimatoh n Jesús, Akin yowejka okipéjpenki para mayeto n Cristo. ²¹Pero axa, Cristo Jesús ok moneki mayeto ilwikak asta ijkuak Dios tlamis kiyankuilis nochi tlan onka ilwikak iwa ipa n tlaltípkaktli. Dios ya wejkawitl ijko okijto ika intlajtol n profetas. ²²Yika, Moisés okinmili totatawah: "Ijkó kemi n Toteko Dios onechtítlanli nomonawak, noiwa nomechtitlanilis se profeta non kisas de nomejwah. Xikneltokilikah nochi tlan Ye nomechilis. ²³Porke akin amo kitlakitas non profeta, ayakmó kikawiliseh mayeto tewa iwan tlakah de Israel."

²⁴'Samuel iwa nochteh n profetas non satepa oneskeh, noiwa otetlapowijkeh tlan tlamochijtok itech ninteh tonatijmeh. ²⁵Nomejwah nontepilwah de nekateh profetas; iwa Dios nomechmakas tlan okinkakiti kinmakas totatawah ijkuak okili n Abraham: "Por moxwihah, Dios kintiochihis nochteh n tlaltípkaktlakah." ²⁶Ijkuak Dios okiyoliti Ikone, achto onomechtitlanili nomonawak, para manomechtiuchiwa, iwa ijko xikkawakah tlan amokualitimatoh nonkichihtinemih.

4

Pedro iwa n Juan innawak tekiwajkeh

¹Pedro iwa n Juan ok okintlapowijtokah n tlakah. Ijkuakó okalakikoh n tiopixkeh iwa n tlanawati non okinnawatiaya n tlamokuitlawijkeh de kan Weyi Tiopa iwa n saduseos. ²Satlawel okualantiwalayah porke Pedro iwa Juan okinmachiayah n tlakah, iwa okinmiliayah non yomikkeh moyolitiseh porke Jesús omoyoliti de kan mikemeh. ³Ijkuakó okinkitskijkeh iwa okintsakuatoh, iwa ompa okinkajtejkeh non tonati porke yotleuatoka. ⁴Pero miakeh akimeh okikakeh intlajtol, okineltokakeh Cristo Jesús; iwa san tlakah okatkah kemi mákuili mil.

⁵Ijkuak owalmostlatik, n tlayakankeh judíojehteh, n tetajmeh non tlayakantokoh kan Weyi Tiopa iwa n tlamachtijkeh de itlanawatil Moisés, omooolojkeh kan altepetl de Jerusalén. ⁶Ompa okatka Anás n tiópixki non okachi otlayakantoka. Noiwa ompa okatka Caifás, Juan, Alejandro iwa n oksikimeh ichanejkawah n Anás. ⁷Ijkuakó okwalinnotsatoh n Pedro iwa n Juan iwa okinkeseh tlatlajkotia, iwa okintlajtlaniykeh:

—¿Akin onomechmák non tekiwajyotl, noso akin onomechili xikpajtikah nin tlakatl?

⁸Ijkuakó Pedro, non okipixtoka ichikawalis n Espíritu Santo, okinmili:

—Wejweyi tekiwajkeh iwa tetajmeh de Israel: ⁹Ijkó kemi nomejwah nontechtlajtlaniah, kenijki otikpajtikah n kócoxki, iwa nonkinekih nonkimatiseh kenomi opajtik. ¹⁰Tomechmatiltiah inyakapah nochteh n tlakah de Israel para makimatikah nin tlakatl non kajki nomoyakapah, opajtik ika Itoka n Cristo Jesús non de Nazaret, Akin nomejwah ononkimiktijkeh itech krus, iwa Dios okiyoliti de kan mikemeh. ¹¹Nin Jesús, Ye n tetl Akin nomejwah nonkalchijchijkeh ononkitlakaltechojkeh, pero nin tetl omochiwako non okachi tetlakxili. ¹²Mach onka ok se tlakatl akin weletis techmakixtis, porke Dios mach techmák ok se tlakatl itech nin tlaltípkaktli para inawak matimomaxitakah.

¹³Ijkuak okitakeh kenijki Pedro iwa n Juan mach okimawiliayah tlajtoskeh teixpa, maya amo kanaj omoixtlamachtijkeh, satlawel omotlajtlachialtijkeh. Ijkuakó okajsikamatkeh milák onemiah iwan Jesús. ¹⁴Yika amitla oweletkeh okimilijkeh porke n tlakatl non okipajtijkeh ompa inwah omoketoka. ¹⁵Ijkuakó okwalinkixtijkeh de kan Sanedrín,* iwa nochteh n tekiwajkeh ompa omokajkeh para motlapowiskeh tlan kichiwaskeh. ¹⁶Iwa okimoliayah:

—¿Tlan tikchiwaskeh iwa ninteh tlakah? Nochteh non chantitokeh nika Jerusalén kimatih okichijkeh se weyi milagro, iwa amo weletis tikijtoskeh amo milák. ¹⁷Yika, para ayakmó okachi mamoxitini nin tlájtoli, matikinmomojtikah, para ayakmó matlamachtijtinemikah de Jesús.

¹⁸Ijkuakó oksepa okinnotskeh mawalkalakikah iwa okinnawatijkeh ayakmó matlapowikah nion matlamachtikah de Jesús. ¹⁹Pero Pedro iwa n Juan ijki okinnankilijkeh:

—Kuali xikyeyekolikah nomejwah, kox kuali inawak Dios tlan nomejwah nontechnawatiah, ¿akin okachi moneki se makitlakita, nomejwah noso Dios? ²⁰Mach weletis san tejwah matikpixtokah tlan otiktakeh iwa otikkakeh.

²¹Ijkuakó n tekiwajkeh okinnommojtijkeh, pero okinkajkeh mawiah. Amo okajsikeh kenijki kintlaijyowiltiskeh, porke nochteh n tlakah okiweyijkachiwayah Dios por neká tlakatl non opajtik. ²²Iwa n tlakatl non opajtik ika non milagro, yokipiaya okachi de ome póali xiwitl.

Non kineltokah Cristo Jesús kitlajtlanilah Dios makinmaka chikawálistli

²³Keman okinkajkeh mawiah, Pedro iwa n Juan oyajkeh kan okatkah inmikniwah, iwa okimilijkeh nochi tlan n tetajmeh non tlayakantokeh kan Weyi Tiopa okimilijkah. ²⁴Ijkuak yokikakeh nochi tlan okimilijkeh, nochteh omotiotsajtsilijkeh iwa okijtojkeh:

—Totajtsi Dios, Tejwatsi otikchijchi n ilwikak, iwa n tlaltíkpaktli, n weyi atl iwa nochi tlan itech onka. ²⁵Tejwatsi ika iweletilis n Espíritu Santo iwa ika itlajtol motékitki David, otikijto:

¿Tleka nochteh n tlaltíkpaktlakah onewah mopa?

¿Iwa tleka nochteh san tlan kajsih kichiwah?

²⁶N wejweyi tlanawatijkeh de nin tlaltíkpaktli omoseitilijkeh,

iwa n tekiwajkeh de nochteh n altepemeh motlatlalwiskeh iwa onewaskeh ipan Toteko Dios iwa Cristo. *Sal. 2:1-2*

²⁷Tikmatih milák, Herodes Antipas Primero iwa Poncio Pilato omoseitilijkeh nika Jerusalén iwa sikimeh tlakah non amo judíojteh iwa oksikimeh non milák judíojteh, nochteh omoseitilijkeh iwa oonewakeh ipan Jesús Mokone yolchipawak, Akin Tejwatsi otikpépenki. ²⁸Ijkuak oonewakeh ipa, yejwah okichijkeh mamochiwa tlan Tejwatsi yotikmolijka iwa otikmonekilti ijko mamochiwa. ²⁹Iwa axa, Toteko Dios, xikita kenijki kinekih techmomojtiskeh, xikchiwa matimoyolchikawakah para matitlapowikah de motlajtol iwa amitla matechmojtí. ³⁰Iwa ika moweletilis mapajtikah n kokoxkeh, iwa mamochiwakah milagros iwa mamonextikah wejweyi neskayolteh itech Itoka Cristo Jesús Mokone yolchipawak.

³¹Ijkuak yotlankeh omotiotsajtsilijkeh, san nima otlalólinki kan omooolojkeh. Iwa nochteh okiselijkeh n Espíritu Santo, iwa ika yolchikawálistli otetlapowijtineneh de itlajtol Totajtsi Dios.

Nochi tlan okipiayah okimosepanxexelilijkeh

³²Nochteh non okineltokayah n Cristo Jesús san se intlayeyekolis okipiayah, iwa nochi tlan okichiwayah, sansikah okichiwayah. Amaka okijtoaya san ye iaxka tlan okipiayah, yej okimosepanxexeliliayah. ³³Iwa ika miak weletílistli, itlatitlanilwah otetlapowiyah Toteko Jesús oksepa omoyoliti, iwa Dios saikpanoa okintiochiwaya. ³⁴Nion seme de yejwah itla okipoloaya, porke nochteh akimeh okimpiayah intlalwah noso inkal, okinnemakayah,

* 4:15 Sanedrín: nin grupo kemi de 50 kimajmanah n tetajmeh non tlaixkomakah ijkuak kinteiliah akimeh amo kitlakitah intlanawatil.

³⁵ iwa okinmaktiliayah n tlatematiltijkeh, iwa yejwah okinxejxeliyah akimeh okim-poloaya. ³⁶ Ijkó okichi se tlakatl non itoka José. Nin José otlákatki kan isla de Chipre iwa owalewatoka de Leví; iwa n tlatematiltijkeh okitlalilijkeh itoka Bernabé, non kijtosneki: Teyolchika. ³⁷ Nin tlakatl okinemák itlal iwa n tomi okinmaktili n tlatematiltijkeh.

5

Ananías iwa Safira tlajtlakolchiwah

¹ Noiwa ok se tlakatl non itoka Ananías iwa isiwa Safira okinemakakeh intlal. ² Iwa nin tlakatl omotlatlalwi iwa isiwa para makimokawikah siki tomi, iwa oksiki okinmaktilitoh n tlatematiltijkeh. ³ Ijkuakó Pedro okili:

—Ananías, ¿tleka otikkawili n satanás makimoaxkati moyolo, iwa mamitstokti xikkajkayawa n Espíritu Santo, iwa otikchikowi n tomi non omitsmakakeh por motlal? ⁴ ¿Mach amo okatka moaxka n tlali? Iwa ijkuak yotiknemák, ¿amo noiwa okatka moaxka n tomi? ¿Tleka kiné otikkawili moyolo matlakajkayawa? Amo otikinkajkaya n tlakah, yej otiknekia tikkajkayawas Dios.

⁵ Ijkuak Ananías otlanki okinkak ninteh tlájtoltel, omikki. Iwa nochteh akimeh okimatkeh tlan otlamochi, tlawel omomojtijkeh. ⁶ Ijkuakó owalajkeh sikimeh telpokameh, okimemelojkeh n mikel iwa okitookatoh.

⁷ Kemi eyi ora satepa, okalakiko isiwa n Ananías, mach okimatia tlan otlamochijka. ⁸ Ijkuakó Pedro okitlajtlani:

—Techili, ¿Nomejwah ononkinamakakeh n tlali, achó kemi nonkijtoah?

N siwatl otlanankili:

—Milák, achó ipati.

⁹ Pedro okili:

—¿Tleka ononmotlatlalwijkeh para nonkiyejekoskeh Iespíritu n Toteko Dios? Kaltempa kalaktiwitseh akimeh okitookatoh motlakau, iwa axa te noiwa mitstookatiweh.

¹⁰ Ijkuakó Safira owetski ikxitla n Pedro iwa omikki. Ijkuak owalkalakeh n telpokameh, okajsikoh n Safira yomikki, okikixtijkeh iwa okitookatoh inakastla iokich. ¹¹ Nochteh n tlaneltokakeh, iwa akimeh okimatkeh tlan otlamochi, satlawel omomojtijkeh.

Ilatitlanilwah Jesús kimpajtiah miakeh tlakah

¹² Ilatitlanilwah Jesús okinnextiayah miakeh neskayolteh iwa tlan tetlajtlachialti ompa Jerusalén, iwa nochteh non okineltokayah n Jesús omoololoayah kan korrédor non kiliah Portal de Salomón. ¹³ Iwa n oksikimeh mach omixewiayah moneloskeh inwah, pero nochteh okintlanekiliyah. ¹⁴ Iwa omomiakiliyah miakeh tlakah iwa siwameh non okineltokayah n Toteko. ¹⁵ Iwa asta okinkixtiayah inkokoxwah itech ojtli, iwa okintlaliyah ipan inkuaujtlapech noso ipan impetl para ijkuak panos n Pedro, maya san ika itlasekawilo makoninmajsí iwa ijkó mapajtiah. ¹⁶ Noiwa akimeh ochantitokah itech altepemeh non okiyawalojtokah Jerusalén, okwalinwikayah inkokoxwah iwa akimeh okimpiayah espíritus amokualteh, nochteh opajtiah.

Pedro iwa n Juan oksepa konintsakuah

¹⁷ Ijkuakó n tiópixki non okachi otlayakantoka iwa sikimeh saduseos non iwa okatkah, satlawel oxikojmikeh, ¹⁸ iwa okinkitsikijkeh n tlatematiltijkeh iwa okintsakeh. ¹⁹ Pero se yuáli iángel n Toteko okitlapo n kaltentli kan otsaktokah, iwa okinkixtih. Iwa okinmili:

²⁰ —Xiwhah kan Weyi Tiopa, iwa xikinmatiltikah n tlájtoli non kitemaka temakixtílistli.

²¹ Okikakeh, iwa ijkuak owatlánneski oyajkeh kan Weyi Tiopa iwa opé tlamachtiah.

Ijkuakó n tetajmeh non tlayakantokah kan Weyi Tiopa iwa non iwa okatkah, okinotskeh mamoololokah nochteh non otlanawatiyah kan Weyi Tiopa. Satepa otlatitlankeh makinnotsatih n tlatitlanilteh kan otsaktokah. ²² Pero ijkuak n tlamokuitlawijkeh okalakitoh kan otsaktokah n tlatematiltijkeh, ayakmó okinmajsitoh. Iwa owalmokoptiwetskeh otlanawatikoh n tlatematiltijkeh ayakmó ompa okatkah, ²³ iwa okijtojkeh:

—Otikajksitoh n kaltentli kuali tsaktok, iwa n tlamokuitlawijkeh okiyekmokuitlawij-tokah n kaltentli kan otsaktokah n tlatematiltijkeh, pero ijkuak otitlatlapojkeh, amaka otikajksikeh tlajitk.

²⁴ Ijkuak okikakeh nochi ni, n tlayákanki de non otlamokuitlawiyah kan Weyi Tiopa iwan tiopixkeh non otlayakantokah, omotlajtlachialtijkeh iwa omotlajtlaniayah tlan okachi tlamochiwaskia. ²⁵ Ijkuakó okalakiko se tlakatl, iwa okinmili:

—N tlakah akimeh nomejwah nonkintemoah kateh kan Weyi Tiopa, iwa kinmachtij-tokeh n tlakah.

²⁶ Ijkuakó n tlayákanki iwa itlamokuitlawilwah, oyajkeh okwalinnotsatoh n tlatem-atiltijkeh, iwa okwalinwikakeh ika kuali, porke omawiah makinmojmotlakah ika tetl.

²⁷ Ijkuak okwalinwikakeh, okinketsatoh innawak tekiwajkeh, iwa n tiópixki non okachi otlayakantoka okinmili:

²⁸ —Tejwah kuali otomechilijkeh ayakmó xitlamachtikah ika itoka non tlakatl. Pero nomejwah amo onontechtakitakeh, yej itech nochi nin altepetl de Jerusalén yononkiteix-matiltijkeh itlamachtilis non tlakatl. Iwa axa nonkinekih techtlajtlakoltiskeh de imikilis non tlakatl.

²⁹ Ijkuakó Pedro iwa n oksikimeh tlatematiltijkeh otlanankilijkeh:

—Tejwah tikpiah tiktakitaskah tlan Dios kijtoa iwa amo tlan kijtoah n tlakah. ³⁰ Idios totatawah okiyoliti n Jesús, Ye Akin nomejwah ononkimiktijkeh ijkuak ononkikrusifikar-ojkeh ipan krus. ³¹ Dios yokiweyijkachi n Jesús ika iweletilis, iwa okitlali mayeto Tlayákanki iwa Totemakixti. Dios ijko okichi para nochteh n tlakah de Israel mamoyolpatlakah inawak iwa makintlapojpolwili intlajtlakolwah. ³² Tejwah otiktakeh iwa otikkakeh tlan tomechtlapowiah sansikah iwa n Espíritu Santo non Dios kinmaka akimeh kitlakitah.

³³ Ijkuak yejwah okikakeh tlan okijtoayah n tlatematiltijkeh, okualankamikeh iwa yokinekih kinmiktsikeh. ³⁴ Pero ompa inwah nonteh tekiwajkeh okatka se tlakatl fariseo non itoka Gamaliel. Ye okatka se tlamacht de itlanawatil Moisés iwa nochteh n tlakah satlawel okitlakitayah. Gamaliel omóketski iwa otlanawati makinixtikah n tlatematiltijkeh san achitsi. ³⁵ Otlanki okinmili non oksikimeh tekiwajkeh:

—Tetajmeh de Israel, kuali xikitakah tlan nonkinekih nonkintoktsikeh ninteh tlakah.

³⁶ Kuali xikilnamikikah nomejwah, kenijki yowejka omonexti se tlakatl non omonotsaya Teudas akin okijtoaya weyijkatitok, iwa okinmoyakanalti kemi nawi sientto tlakah. Pero ijkuak okimiktijkeh, nochteh akimeh okinyakanaya ochocholojkeh iwa ompa otlanki nochi. ³⁷ Okachi satapa, itech nekateh tonatijmeh ijkuak okinmachotijtakah nochteh n tlakah de Israel, omonexti Judas non owalewatoka de Galilea. Ye okinmotlatlalwili miakeh tlakah, pero noiwa okimiktijkeh; iwa nochteh akimeh okinyakanaya omoxexelojkeh.

³⁸ Ika noni nomechilia, xikinkawakah ninteh tlakah, iwa amo ximokalakikah inwah. Porke tla nin tlamachtiflistli noso nin tekittl san yejwah kinekih kichiwaskah, pojpoliwis.

³⁹ Pero tla iaxka Dios, mach weletis nonkipopoloskeh. Ximotlachilikah, amo kichiwa nonixnamikiskeh Dios.

Iwa n tlayakankeh okitlakamatkeh n Gamaliel.

⁴⁰ Nochteh n tekiwajkeh omoyolsewijkeh ika tlan Gamaliel okinmili. Ijkuakó okin-notsatoh n tlatematiltijkeh, okinwitekeh iwa okinnawatijkeh ayakmó matlamachtikah itech Itoka n Jesús, iwa satapa okinkajkajkeh. ⁴¹ N tlatematiltijkeh owalkiskeh de kan okatkah n tekiwajkeh ika miak pakilistli, porke Dios okinkawili matlajiyowikah iwa makimpjipinawikah por okitenewayah Itoka n Jesús. ⁴² Iwa nochi tonati itech Weyi Tiopa iwa itech kalmeh, n tlatematiltijkeh otlamachtayah iwa otetlapowiyah Jesús, Ye n Cristo.

6

Okimpejpenkeh chikome tlapalewijkeh

¹ Itech nekateh tonatijmeh, kemi okachi omomiakiliayah akimeh okineltokayah it-lamachtilis n Cristo Jesús non otlajtoayah griego opé mokuejsoah innawak akimeh otlajtoayah hebreo, porke okijtoayah nochi tonati ijkuak omoxexeloaya n tlakuali,

mach okinyektlakualtiayah n iknosiwameh griegas. ² Ijkuakó n májtaktli iwa ome tlatematiltijkeh okinmoololojkeh nochteh non kineltokah Cristo Jesús, iwa okimilijkeh:

—Amo kualí tejwah non tiktematiltiah itlajtol Dios, yej matipewakah matitlatetekakah para matlakuakah. ³ Ijko kiné tokniwah, okachi kualí nomejwah xikimpejpenakah chikome tokniwah non kineltokah Cristo Jesús, non mayetokah milajkameh, matentokah de n Espiritu iwa makipiakah kualí intlanamikilis. Yejwah xikintlalikh makichiwakah non tekitl.

⁴Tejwah tikhijtoskeh toteki; timotiotsajtsiliskeh iwa titetlapowiskeh de itlajtol Totajtsi Dios.

⁵Nochteh okiwilitakeh tlan okinmilijkeh makichiwakah. Iwa okipejpenkeh n Esteban, ye satlawel okipiayah tlaneltokálistli iwa otentoka de Espiritu Santo. Noiwa okipejpenkeh n Felipe, Prócoro, Nicanor, Timón, Pármenas iwa Nicolás non owalewatoka de Antioquia. Nin Nicolás, ijkuak ayamó okineltokaya n Cristo, okiseli intlamachtilis n judíojeteh. ⁶Otlanki okwalinwikakeh innawak tlatematiltijkeh, iwa yejwah okintlalijkeh innawah impah nonteh chikome tlakah iwa omotiotsajtsilijkeh.

⁷Itlajtol Totajtsi Dios opé momati sentetl, iwa ompa Jerusalén okachi omomiakiliayah non kineltokah Cristo Jesús. Asta noiwa miakeh tiopixkeh judíojeteh otlaneltokakeh inawak Cristo Jesús.

Kikitskiah n Esteban iwa kitsakuah

⁸Esteban okatka se tlakatl non otentoka ika itlatiochiwalis iwa iweletilis Dios; iwa okinchiwaya wejweyi milagros inmixpa n tlakah non ompa ochantitokah. ⁹Pero satepa, sikimeh tlakah non omoooloayah kan se sinagoga* non omotokayotiyah Esklavos Libertados, iwa sikimeh tlakah non owalajkeh de Cirene, de Alejandría, de Cilicia iwa de Asia, opé motlatlajtolkopah iwan Esteban. ¹⁰Pero amo oweletiah okitlaniah n Esteban, porke n espíritu okichiwaya matlanankili kemi se akin ixtlamati. ¹¹Ijkuakó san ichtaka okintlatlalwijkeh sikimeh tlakah para matlakajkawawakah yejwah okikakeh ijkuak Esteban otlajtojtoka fiero de Moisés iwa de Dios. ¹²Ijko okichijkeh, okimpajsolojkeh nochteh n tlakah non ompa ochantitokah, noiwa n tetajmeh non tlayakantokah kan Weyi Tiopa iwa non kitemachtiah n tlanawatilistli. Oyajkeh okikitskitoh n Esteban iwa okiwikakeh kan Sanedrín. ¹³Noiwa okintemojkeh sikimeh tlakah xolópijkeh, para matlakajkawawakah iwa makijtokah:

—Nin tlakatl nochipa tlajtojtinemi fiero de tochipawak Weyi Tiopa iwa tlan kijtoa itlanawatil Moisés. ¹⁴Ottikakeh okijto Jesús de Nazaret kixixititsas nin tiopa iwa kipatlas nochi tlan towejkatata Moisés otechnawati matikchiwah.

¹⁵Iwa nochteh n tekiwajkeh iwa akimeh ompa oewatokah, ijkuak okiixtlajtlatakeh n Esteban okitakeh ixko omotaya kemi ixko se ángel.

7

Esteban motlajtolpalewia innawak tekiwajkeh

¹N tiópixki non okachi otlayakantoka okitlajtlani n Esteban:

—¿Milák tlan kijtojtokah?

²Esteban otlanankili:

—Nokniwah iwa tetajmeh, techkakikah, Totajtsi Dios non weyijkatitok okimonextili towejkatata Abraham kan tlali de Mesopotamia, achto de mochantiskia kan tlali de Harán, ³iwa okili: “Xikkakajtewa motlal iwa nochteh non ken tkinmita, iwa xio kan tlali non Ne nimitsititis.” ⁴Ijkuakó Abraham okikakajte n tlali de Caldea iwa ochanchiwato Harán. Satepa omikki ita, iwa Dios okwalík n Abraham itech nin tlali, kan axa nomejwah nonchantitokah. ⁵Pero amitla okiaxkatili itech nin tlali, nion kan kitlalis se ikxi. Pero Dios okikakiti kixaxkatiliskia, iwa keman Abraham mikiskia n tlali kimokawiskiah ipilwah; maya itech nonteh tonatijmeh Abraham ayamó okimpiaya ipilwah. ⁶Dios noiwa okili, ipilwah chantitoskiah itech oksikimeh tlamleh kan amo inmaxka, kinnawatijtoskiah iwa

* 6:9 sinagoga: se kali kan omoooloayah n judíojeteh nochi sábado.

tlaijyowijtoskiah nawi siento xiwitl. ⁷ Pero noiwa Dios okili: “Ne nikitlajtlakoltis n tlakah de non altepetl akimeh kintlaijyowiltiskeh mopilwah, satepa kisaskeh de ompa iwa nechtekichiwiliskeh itech nin tlali.” ⁸ Dios omoyekka iwan Abraham, iwa Abraham okisentlali inawak Dios kichiwas n sirkunsisión kemi se neskayotl. Yika, ijkuak otlákatki ikone Isaac, ipan chikweyi tonati okisirkinsidaro. Gn. 21:4 Noiwa ijko okichi Isaac iwa ikone Jacob, iwa Jacob noijkó okichi iwa ipilwah, akimeh oyajkeh tetajmeh de n májtlaktli iwa ome familias de Israel.

⁹ Ninteh májtlakteh iwa ome ipilwah n Jacob, okatkah totatawah. Yejwah oxikojmikeh de inmikni José, iwa okinamakakeh para makiwikakah Egipto. Pero Dios okatka iwan José, ¹⁰ iwa okipalewi itech nochi tlan otlaijyowiaya. Dios okichi mayeto se ixtlámatki n José iwa okipalewi para ijko n Faraón rey de Egipto makiyekita. Iwa n rey okitlali n José mayeto non okachi weyi tlanawati de ompa Egipto iwa asta makinawatijto icha.

¹¹ Ijkuakó owala miak apisotl iwa miak tlaijyowilistli itech nochi n tlali de Egipto iwa de Canaán, iwa totatawah amo okipiyah tlan kikuaskeh. ¹² Pero ijkuak Jacob okima onka miak trigo kan tlali de Egipto, okintítlanki ompa itelpochwah non okatka totatawah. Ijkuakó sikinika oyajkeh Egipto. ¹³ Ijkuak totatawah oksepa oyajkeh Egipto, José omoteixmatilti innawak ikniwah, iwa ijko n Faraón okima kan owalewatoka n José iwa akimeh ikniwah. ¹⁴ Satepa, José otlatítlanki makualikakah ita Jacob iwa nochteh non ken kinmita. Yejwah okatkah eyi póali iwa káxtoli por nochteh. ¹⁵ Ijko n Jacob otemok ochanchiwato kan tlali de Egipto. Satepa ompa omikki, iwa ompa noiwa omijmikeh nochteh totatawah. ¹⁶ Okachi satepa inkuerpojwah okinwikakeh Siquem iwa okintookakeh ijtk miketékochtli non Abraham okinkuilijka ipilwah n Hamor ompa kan tlali de Siquem.

¹⁷ Ijkuak yoajsiwalaya n tonati para mochiwas tlan Dios yokilijka Abraham, n tokniwah de Israel okachi opé momiakiliah ompa Egipto. ¹⁸ Ijko otlamochi itech tlali de Egipto asta ijkuak opé tlanawatia ok se rey non amo okixma n José. ¹⁹ Nin rey okinkajkaya n tlakah judíojteh iwa okintlaijyowilti totatawah, asta okintokti makinkakajtewakah inselekkonewah para mamikikah. ²⁰ Itech nonteh tonatijmeh otlákatki Moisés. Dios okitlanekili non konetl, iwa itajwah okiskaltijkeh icha san eyi mestli. ²¹ Iwa keman okikajkawatoh n selekkonetl, ichpoch n Faraón, okiwik icha iwa okiskalti kemi yetoskia ikone. ²² Satepa Moisés okixtlamachtijkeh ika nochi tlan egipsios okimatiah, ika noni Moisés okatka se tlakatl non kuali oixtlatmatia itech nochi tlan okijtoaya iwa tlan okichiwaya.

²³ Ijkuak Moisés yokipiaya ome póali (40) xiwitl, okintlajpaloto ikniwah n tlakah de Israel. ²⁴ Ompa okitak se tlakatl egipsio okiwitektoka se israelita, ijkuakó Moisés okipalewi iwa okimikti n egipsio. ²⁵ Moisés ijko okichi porke okimoli chamo kajsikamatiskiah n judíojteh Dios okitítlanki para makimpalewi. Pero yejwah mach okajsikamatkeh. ²⁶ Keman owalmostlatik, Moisés okimitak omotekilmakatokah ome tlakah de Israel, ye okinekia kintlakawaltis, iwa okinmili: “Nomejwah nonmiknimeh; ¿tleka nonmokojoah?” ²⁷ Ijkuakó n tlakatl non otlawitektoka okontope n Moisés, iwa okili: “¿Akin omitstlali kemi titekiwa noso kemi titeyolsewi para ximokalaki towah?” ²⁸ ¿Tikneki techmiktsi, kemi yala otikmiksi n egipsio?” ²⁹ Ijkuak Moisés okikak tlan okili nin tlakatl, ocholo iwa oyá kan tlali de Madián. Ochanchiwato kan amo ialtépeu iwa ompa okimpixki ome ipilwah.

³⁰ Ome póali (40) xiwitl satepa, se tonati Moisés okatka kan amaka chanti, kan tepetl Siná iwa ompa okimonextili se ángel itech se tlátsmoli non otlatlatoka. ³¹ Ijkuak Moisés okitak non neskayotl, omotlajtlachialti, iwa keman omijkuani okachi tlayakapa, ijkuakó okikak itlajtol n Toteko non okiliaya: ³² “Ne Idios nomotatawah, Ne Idios Abraham, Isaac iwa Jacob.” Moisés opé bibioka iwa mach ok omixewiaya kitlajtlatas n tlátsmoli. ³³ Iwa Toteko oksepa okitlapowi iwa, okili: “Xikinkixti mokakuah, porke n tlali kan titlaksatok tlatiochíwali. ³⁴ Ne yonikitak kenomi tlaijyowiah nopilwah akimeh kateh Egipto, Ne yonikinkak kenijki chokah, yika oniwaltmok onikimpalewiko. Axa, xiwiki, porke nimitstlanis Egipto.”

³⁵ 'Maya nomotatawah okitlawelitakeh n Moisés iwa okilijkah: “¿Akin omitsnawati xiyeto totlanawati iwa toteyolsewi?” Dios okitlali n Moisés kemi tekiwa iwa kemi akin kinkixtiskia totatawah de kan tlali de Egipto ika iweletilis n ángel non okimonextili kan tlátsmoli non otlatlatoka. ³⁶ Ye n Moisés akin okinkixtih totatawah kan tlali de Egipto, iwa Ye okinchi milagros iwa neskayolteh itech non tlali, kan weyi atl non kiliah chichilitik iwa kan amaka chanti, ijko okichijtinenki itech ome póali (40) xiwitl. ³⁷ Ye nin Moisés akin okinmili n tlakah de Israel: “Toteko Dios nomechaltitlanilis se profeta non kisas de intech nomokniwah kemi ne onechaltitlanki nomonawak. Xikneltokakah nochi tlan Ye nomechilis.” ³⁸ Ye nin Moisés, akin noiwa okatka iwa n tlakah de Israel kan amaka chanti. Noiwa ye akin omotlapowi iwa n ángel kan tepetl non itoka Siná iwa okinnonotski totatawah. Ye akin okinseli n tlájtoltel non techmachtiah kenijki tiyeknemiskeh iwa otechimpanoltili.

³⁹ 'Pero totatawah mach okinekeh okitlakitakeh, yej omoixkopkeh inawak iwa okinekiah mokopaskeh Egipto. ⁴⁰ 'Ijkuakó okilijkeh n Aarón: “Techinchijchiwili sikimeh diosmeh non kinchijchiwah ika inma non matechyakanakah porke amo tikmatih tlan omochi n Moisés non otechkixti de kan tlali de Egipto.” ⁴¹ 'Ijkuakó okichijchijkeh se “dios” kemi se torojkonetl. Okinmiktijkeh sikimeh yolkameh, okinmanilijkeh iwa opakeh ijkuak okitakeh tlan okichijchijkeh ika inmawah. ⁴² Pero Dios okinkajka makichiwakah tlan yejwah okinekiah, iwa okinka makinweyilikah n tláwilteh non kateh ilwikak. Ijko kemi ijkuilitok itech ilibro n profeta:

Tlakah de Israel, itech nonteh ome póali (40) xiwitl ijkuak ononnentinemiah kan amaka chanti

¿kox Ne ononnechtlamiktijkeh iwa Ne ononnechtlanamilijkeh?

⁴³ Amó, yej nomejwah ononkimamajtinemiah itiopantsi n “dios” Moloc, iwa n sítlali de n “dios” Renfán, non san nomejwah ononkinchijchijkeh ika nomomawah.

Yika, Ne, nomechkixtis de nomopaís iwa nomechtitlanis okachi tlayakapa de Babilonia. *Am. 5:25-27*

⁴⁴ 'Ijkuak totatawah onemiah kan amaka chanti, okiwikatinemiah n tabernákulo, iwa ompa ijtik oyayah n temeh patlawakeh non intech oijkuilitoka n tlanawátili. Moisés okichijchi nin tabernákulo ijko kemi Dios okinawati iwa okinextili makichijchiwa. ⁴⁵ Nin tabernákulo noso mantajtiopantsi non Moisés okichijchi okinmaxkatili totatawah, iwa akimeh owalajkeh nika iwan Josué, okualikakeh n tabernákulo ijkuak okintlanilijkeh intlal n oksikimeh altepemeh. Dios okinkixtili intlalwah akimeh nika ochantitokah iwa okinmaxkatili totatawah. Iwa ijko okatka asta n tonatijmeh ijkuak n rey David onemia. ⁴⁶ Dios okitiochiwaya n David, iwa ye okinekia kichiwas se Weyi Tiopa kan machantito Idios Jacob. ⁴⁷ Pero amo David okichijchiwili iweyitiopa, yej Salomón okichijchiwili. ⁴⁸ Maya tikmatokeh Totajtsi Dios amo chantitok ijtik tiopameh non kinmachijchiwah n tlakah. Kemi okijkuilo n profeta Isafas:

⁴⁹ N ilwikak ye kan niewatok,

iwa n tlaltlfpaktli kan nikinsewia nokxiwah.

¿Tlan kali nonkinekih nonnechijchiwiliskeh nomejwah?, kijtoa n Toteko, ¿noso kan weletis nimosewis?

⁵⁰ ¿Mach amo Ne ika noma onikchijchi nochi tlan onka?

Is. 66:1-2

⁵¹ Iwa Esteban noiwa okinmili n tlayakankeh:

—Nomejwah ayik nonkinekih nontetlakitakeh. Ayik nonkinekih nonkikakiskeh nion nonkinekih nonkichiwaskeh tlan Dios nomechnawatia, ijko kemi kichiwas akimeh amo kixmatih Dios. Ayik nonmotekawiliah manomechyakana n Espiritu Santo, nomejwah ijko nonkichiwah kemi okichijkeh nomotatawah. ⁵² ¿Kox onka se profeta non amo okitlajjowiltijkeh nomotatawah? Nochteh n profetas akimeh yowejka okitematiltijkeh walaskia neká tlakatl yekmilajka, nomotatawah okimiktijkeh. Iwa axa, nin tlakatl yekmilajka yowitsa, pero nomejwah ononkitemaktijkeh iwa ononkimiktijkeh. ⁵³ Iwa maya Dios

okinnawati iangelwah manomechmakakah itlanawatil, nomejwah mach ononkitlakitakeh non tlanawátili.

Kimiktiah n Esteban

⁵⁴ Ijkuak n tlayakankeh okikakeh tlan okijto n Esteban, okualankamikeh iwa asta omotlannetsoniayah. ⁵⁵ Pero Esteban tentok de Espíritu Santo, oajkotláchixki ilwikak iwa okitak iweyijkachiwalis Dios, noiwa okitak n Jesús moke tok ik iyekma n Totajt si Dios. ⁵⁶ Iwa okijto:

—¡Xikitakah! Ne nikita n ilwikak tlapotok, iwa nikita n Jesús Akin omochi tlakatl moke tok ik iyekma Dios.

⁵⁷ Ijkuakó yejwah omonakastsajtsakeh, okojsajtsikeh iwa nochteh oonewakeh ipan Esteban. ⁵⁸ Okikixtijkeh kala de kan altepetl iwa ompa okimojmotlakeh ika tetl. Iwa akimeh okimojmotlakeh n Esteban, okinkajtejkeh intlakenwah makinmokuilawilijto se télpochtli non itoka Saulo.

⁵⁹ Iwa ijkuak okimojmotlatokah, Esteban omotiotsajtsili iwa okijto:

—Noteko Jesús, xikseli noespíritu.

⁶⁰ Omotlankuáketski iwa chikaktik okijto:

—¡Noteko, amo xikintlajtlakolti ninteh tlakah!

San nima ijkuak otlanki omotiotsajtsili, omikki.

8

Saulo kintotojtoka non okineltokayah Cristo Jesús

¹ Saulo okimoli kuali makimiktikah n Esteban.

Itech non tonati, non de Jerusalén opé kintotojtokah porke okineltokayah Cristo Jesús. Nochteh ochocholjkeh omotlajtlaatitoh itech tlalmeh de Judea iwa de Samaria, iwa sanwel n tlatematiltijkeh omokajkeh. ² Sikimeh tokniwah non okimopantiayah Dios, okitookakeh n Esteban iwa satlawel okichokilijkeh. ³ Pero Saulo okintotojtokatinemia non okineltokayah n Cristo, okalakia incha iwa okinkixtiaya kintilantiwits n tlakah iwa n siwameh, iwa okintsakuaya.

Felipe tetlapowia de itlajtol Dios itech tlali de Samaria

⁴ Akimeh ocholjkeh de Jerusalén, sentetl kan ik oyayah otetlapowiyah de n kual-itlajtoli de Dios. ⁵ Felipe, oyá kan se altepetl de Samaria iwa ompa opé kintlapowia de Cristo. ⁶ Miakeh tlakah omoolooyah iwa ika pakilistli okikakiah tlan Felipe okinmiliaya. Okikakiah iwa okimitayah n milagros non ye okinchiwaya. ⁷ Porke miakeh tlakah non okimpiayah espíritus amokualteh opajtiah, iwa ijkuak n espíritus amokualteh okisayah inmijtik nonteh kokoxkeh, chikaktik otsajtsiah. Miakeh koxomeh iwa non amo oweletiah onejnemiah noiwa opajtiah. ⁸ Ika noni, nochteh non ochantitokah itech non altepetl okipiayah miak pakilistli.

⁹ Ompa Samaria ochantitoka se tlakatl non itoka Simón, ye achto otetlajchiwiaya iwa okinkajkayawaya n tlakah non ompa ochantitokah, iwa nochteh okimiliaya ye weletini.

¹⁰ Iwa nochteh okikakiah, non okachi tsijtsikitsi asta non okachi ya teta, iwa okijtoayah:

—Nin tlakatl kipia iweletilis Dios.

¹¹ Nochteh oyayah inawak, porke ika itetlajchiwilis miak xiwitl okinkajkaya. ¹² Pero ijkuak n tlakah de Samaria okineltokakeh tlan Felipe okinmatiltiayah ijkuak ye okintlapowiyah de Cristo Jesús iwa okinmajsikamatiltiayah tlan kijtosneki itlanawatil Dios, miakeh tlakah iwa siwameh omokuaatekiayah. ¹³ Asta inewia n Simón otlaneltokah iwa omokuaateki, iwa opé kiwikatiniemi n Felipe iwa satlawel omotlajtlachialtiayah ijkuak okimitaya n wejweyi milagros iwa neskayolteh non Felipe okinchiwaya.

¹⁴ Iwa ijkuak n tlatematiltijkeh non okatkah Jerusalén okimatkeh miakeh tlakah de Samaria yokiselijkeh itlajtol Dios, okititlankeh n Pedro iwa Juan mawiah ompa. ¹⁵ Ijkuak Pedro iwa Juan okalakitoh Samaria, omotiotsajtsilijkeh inawak Dios para nochteh n tokniwah de Samaria non kineltokah Cristo Jesús, makiselikah n Espíritu Santo. ¹⁶ Porke nion seme de yejwah yokiselijka n Espíritu Santo, porke san ok omokuaatekijkah itech

Itoka n Toteko Jesús. ¹⁷ Ijkuakó Pedro iwa n Juan okintlalijkeh inmawah impah, iwa non kineltokah Cristo Jesús, okiselijkeh n Espíritu Santo.

¹⁸ Ijkuak Simón okitak n Espíritu Santo owaltemoaya ijkuak n tlatematiltijkeh okintlalil-iyah inmawah impah, okinkakiti kinmakas tomi, ¹⁹ iwa okinmili:

—Noiwa ne techmakakah non weletílistli, para ijkuak ne nikintlalis nomawah ipan aka noiwa makiseli n Espíritu Santo.

²⁰ Ijkuakó Pedro okili:

—Motomi mapojpoliwi mowa, ken tikyejyekolia tlan Dios kitemaka weleti mokoa ika tomi. ²¹ Te amitla tikpia towah nion mitsnamiki tikchiwas nin tekittl, porke moyolo amo chipawak inawak Dios. ²² Ximolnamiki, iwa xiktlatlaujti Dios mamitstlapojpolwi, chamo ijko mitslapojpolwilis tlan otikmoli itech moyolo. ²³ Porke nikita moyolo tentok ika miak nexikólistli, iwa n tlajtlákoli mitstakatsojtok.

²⁴ Ijkuakó Simón otlankili:

—Xiktlatlautikah Dios amitla manechajsi ika tlan ononnechilijkeh.

²⁵ Ijkuak yotlankeh okinmatiltijkeh itlajtol Toteko, n tlatematiltijkeh omokopkeh Jerusalén. Iwa itech miakah altepetsitsinteh de Samaria kan ik opanotiyah, ote-
lapowiyah de n kualitlájtol de Dios.

Felipe iwa n tlakatl de Etiopía

²⁶ Satepa se iángel n Toteko okili n Felipe:

—Ximoketsa iwa xio kan talmeh non kateh ik tlatsintla, xikonana n ojtli non temoa de Jerusalén iwa onkisa Gaza.

Ye ni n ojtli non panoa kan tlaltejtéyinki. ²⁷ Felipe owalmóketski iwa oyá, iwa itech ojtli okajsito se tlakatl de Etiopía. Nin tlakatl okatka eunuco* iwa okatka weyi tekiwa iwa tesorero inawak n reina Kandace akin otlanawatiaya kan tlali de Etiopía. Ye yowalmokopaya de Jerusalén kan okiweyijkachiwato Dios. ²⁸ Nin tlakatl yowalmokopaya kan ialtépeu, oewatotiwalaya ipan ikarreta iwa okiamapoaya se amatlajkuiloli non okijkuilo n profeta Isaías. ²⁹ Ijkuakó n Espíritu Santo okili n Felipe:

—Xikajsiti neká karreta iwa ximonetecho inakastla.

³⁰ Ijkuak Felipe okajsito n tlakatl etíope, okikak okiamapoaya itlajkuilol n profeta Isaías, iwa okitlajtlani:

—¿Tikajsikamati tlan tikamapoa?

³¹ N tlakatl okinankili:

—¿Kenomi nikajsikamatis, tla amaka nechajsikamatiltia?

Iwa okitlatlaujti n Felipe matlejko ipan ikarreta iwa mamotlali inakastla.

³² Iwa ye ni n tlájtol n okiamapoaya n tekiwa de Etiopía:

Kemi se ichkatsi okiwikakeh kan tlamiktilo; iwa ijko kemi se ichkakoneti amo tsajtsi ijkuak kiximah, ijko Ye amitla okijto keman okimiktijkeh.

³³ Inmixpah nochteh okipijpinawijkeh iwa amaka okitlajtolpalewi;

¿akin weletis techinmititis ipilwah?, porke okimiktijkeh itech nin taltípkaktli.

Is. 53:7-8

³⁴ N etíope okitlajtlani n Felipe:

—Nimitstlatlaujtia, techili, ¿de akin tlajtoa n profeta, de ye inewia noso de ok se?

³⁵ Ijkuakó Felipe opé kitlapowia de non tlajkuiloli n etíope kan okiamapoaya, iwa opé kajsikamatiltia n kualitlájtol de Jesús. ³⁶ Okalakitoh kan okatka atl, iwa n tekiwa etíope okijto:

—Nika onka atl, amaka nechtsakuilia manimokuaateki.

³⁷ Felipe okili:

—Tla milák titlaneltoka ika nochi moyolo, weletis timokuaatekis.

N tlakatl okinankili:

* 8:27 eunuco: kijtsneki se tlakatl non ayakmó kelewia siwatl iwa nion amo weleti kimpia ipilwah.

—Nikneltoka Cristo Jesús, Ye Ikone n Totajtsi Dios.

³⁸ Ijkuakó otlanawati makiketsaltikah n karreta, iwa san ken ome otemokeh ijtik atl, iwa Felipe okikuaateki n tlakatl etíope. ³⁹ Ijkuak owalkiskeh ijtik atl, Iespíritu n Toteko Dios okiwík n Felipe, iwa n tekiwa etíope ayakmó oksepa okitak; iwa oyá icha ika pakílistli. ⁴⁰ Pero Felipe okalakito kan altepetl de Azoto, iwa opé kitematiltia n kualitlájtolli de Dios itech miakeh altepemeh asta okalakito Cesarea.

9

Saulo kineltoka n Cristo Jesús
(Hch. 22:6-16; 26:12-18)

¹ Saulo ok otlamomojtjinemia iwa okintemojtinemia akimeh kineltokah n Toteko Jesús, porke ye okinekia kinmiktis. Ika noni oyá okitato n tiópixki non okachi otlayakantoka, ² okitlajtlanilito makinmaka amameh ixmachotitokeh para ika kinteititis kan sinagogas de Damasco. Iwa ika noni makikawilikah makinkitski n tlakah noso siwameh akimeh okitlakitayah n kualitlájtolli para kualinwikas kintsakuaki Jerusalén. ³ Pero ijkuak oyaya itech ojtli iwa yoonajsia Damasco, se tláwili non owalaya de ilwikak okualyawalo. ⁴ Ijkuakó n Saulo owetsito ixko tlali, iwa okikak se tlájtolli non okiliaya:

—Saulo, Saulo, ¿tleka techtotojtokatinemi?

⁵ Ijkuakó Saulo otlájtlanki:

—¿Akin tejwatsi Noteko?

Ye okijto:

—Ne Ni Jesús, tleka techtotojtoka. ⁶ Ximoketsa iwa xikalaki kan altepetl. Ompa mitsliliskah tlan tikchiwas.

⁷ N tlakah non oyayah iwan Saulo, satlawel omomojtjikeh ken okikakeh n tlájtolli pero amaka okitakeh. ⁸ Sa okikewaltjikeh n Saulo, pero ijkuak okintlapo ixtolowah mach ok otláchixki. Yika, sa okimatilantiayah iwa okiwikakeh Damasco. ⁹ Eyi tonati amo otlachiaya, amitla okikua nion amitla okonik.

¹⁰ Ompa kan altepetl de Damasco ochantitoka se tlakatl non itoka Ananías non okinel-tokaya Toteko Jesús. N Toteko okimonextili iwa okili:

—¡Ananías!

Ye okinankili:

—Nika nika, Noteko.

¹¹ Ijkuakó n Toteko okili:

—Ximoketsa iwa xio kan ojtli non kiliah Milaktik, iwa ijkuak tjaitsi icha n Judas xitlajtlani kox ompa kajki se tlakatl de Tarso non itoka Saulo. Ye ompa motiotsajtsilijtok, ¹² ye okimonextili se tlakatl non itoka Ananías, okitak non tlakatl okalakia kan ye kajki iwa ipa okintlaliaya imawah para oksepa matlachia.

¹³ Ijkuak Ananías ijkó okikak, okijto:

—Noteko, miakeh yonechtlapowijikeh tlan iteki non tlakatl, iwa nochi tlan yokintokti akimeh mitsneltokah, non chantitokeh Jerusalén. ¹⁴ Iwa axa yowala nika, ye kualinwika amameh de n tiópixkeh non tlayakantokeh para makinwika makintsakuati nochteh akimeh kitenewah Motoka.

¹⁵ Pero n Toteko okili:

—Xio kan nimitstiltantok, porke non tlakatl yonikmopejpenili para manechteixmatilti innawak non amo judójtah iwa inmispah miakeh tlanawatijikeh, iwa innawak n tlakah de Israel. ¹⁶ Ne nikititis kenijki tlaijyowis ijkuak nechteixmatiltis.

¹⁷ Ananías oyá kan okalotitoka n Saulo, iwa ijkuak okalak okintlali imawah ipan Saulo, iwa okili:

—Nokni Saulo, Noteko Jesús, Akin omitsmonextili itech ojtli kan ik otiwalaya, Ye onechaltítlanki para xitlachia oksepa iwa xikseli n Espiritu Santo.

¹⁸ San nima opé tetepewi de kan ixtolowah n Saulo siki kemi itotominyo n michi, iwa oksepa otláchixki. Ijkuakó Saulo omóketski iwa okikuaatekijikeh. ¹⁹ Iwa ijkuak yotlakua,

oksepa okónanki chikawálistli iwa ompa omoka kech tonati inwah tokniwah de Damasco non kineltokah n Cristo Jesús.

Saulo tetlapowia de n kualitlájtoli kan altepetl de Damasco

²⁰ Satepa, Saulo opé tetlapowia de itlajtol Dios kan sinagogas, iwa okimiliaya Jesús Ye Ikone n Totajtsi Dios. ²¹ Nochteh akimeh okikakiah san omotlajtlachialtiayah, iwa okijtoayah:

—¿Amo ye nin tlakatl non nepa kan altepetl de Jerusalén okintemojtinemia iwa okintalajyowiltiayah akimeh motiotsajtsiliah ika Itoka n Jesús? ¿Amo ye non owala okinkitskiko n tokniwah para kintemakatih inmak n tiopixkeh non tlayakantokeh?

²² Pero n Saulo okachi omochikawaya iwa okinkuatlapololtiaya n judíojteh non ochantitokah Damasco, iwa okinmatiltiaya Jesús Ye n Cristo.

Saulo kincholilia sikimeh judíojteh

²³ Ijkuak opanokeh sikimeh tonatijmeh ²⁴ omotlatlalwijkeh kimiktiskeh n Saulo. Pero n Saulo okima tlan okinekia kitoktiskeh n judíojteh. Tlajka iwa n yuak okichichiyah kan ik ikaltenwah n altepetl de Damasco para kimiktiskeh. ²⁵ Pero ijkuak yotleyuak, akimeh okineltokayah Cristo Jesús okontlalijkeh n Saulo ijtik se chikiwitl, iwa okitemowijkeh kan ik tepamitl non okiyawalojtoka non altepetl, iwa ocholo.

Saulo kajki Jerusalén

²⁶ Ijkuak Saulo okalakito Jerusalén, okinekia moseitilis iwa tokniwah non kineltokah Cristo Jesús. Pero nocteh okimawiliayah porke amo okineltokayah kox ye noiwa yokineltokaya n Cristo. ²⁷ Pero Bernabé okiwik n Saulo innawak n tlatematiltijkeh iwa okintlapowi kenijki n Saulo okitak iwa okitlapowi n Toteko ijkuak owalaya itech ojtli. Noiwa okinmili kenijki ika miak chikawálistli okiteixmatilti itoka n Jesús ijkuak okatka kan altepetl de Damasco. ²⁸ Ijkó Saulo omoka Jerusalén inwa n tlaneltokakeh, iwa nochipa onemia sentetl iwa otetlapowijtinemiah ika chikawálistli itech itoka n Toteko Jesús. ²⁹ Noiwa omotlajtolkokopaya iwan judíojteh non otlajtoayah griego, pero yejwah okitemoliayah kenijki kimiktiskeh. ³⁰ Yika, ijkuak n tokniwah okimatkeh tlan okinekiah kitoktiskeh, okiwikakeh Cesarea, iwa de ompa okititlankeh mawia Tarso.

³¹ Ijkuakó non okineltokayah Cristo Jesús okipiyah yowsewlistli itech tlali de Judea, Galilea iwa Samaria. Okachi omoyolchikawayah otlaneltokayah inawak Toteko. Iwa omomiakiliayah ika iweletilis n Espiritu Santo.

Pedro kipajtia n Eneas

³² Ijkuak Pedro oyá okintlajpaloto n tokniwah kan omoooloayah, noiwa oyá okimitato akimeh yokineltokayah Cristo Jesús non ochantitokah Lida. ³³ Ompa okajsito se tlakatl non itoka Eneas, non yokiwikaya chikweyi xiwitl wilantok ipan ipetl, porke oikximijmiktoka. ³⁴ Iwa Pedro okili:

—Eneas, Cristo Jesús mitspajtia. Ximewa iwa xikyeyjektlali mopetl.

Ijkuakó Eneas san nima owalmejtewak. ³⁵ Iwa nocteh non ochantitokah kan altepetl de Lida iwa Sarón okitakeh opajtik n Eneas, okikajkeh tlan achto okineltokayah iwa okineltokakeh n Toteko Jesús.

Pedro kiyolitia n Dorcas

³⁶ Itech nekateh tonatijmeh kan altepetl de Jope ochantitoka se siwatl non okineltokaya n Toteko non itoka Tabita, itech tlájtoli griego mijtoa Dorcas. Non siwatl nochipa okichiwaya tlan kuali iwa okimpalewiaya akimeh amitla okipiyah. ³⁷ Pero itech nonteh tonatijmeh Dorcas owalmokoko iwa omikki. Satepa de okipakeh ikuerpo n Dorcas, okiwilankeh tlakpak kan se cuarto. ³⁸ N altepetl de Jope iwan altepetl de Lida mach wejka omotayah, yika san nima ijkuak n tokniwah non kineltokah Cristo okimatkeh Pedro okatka Lida, okintitlankeh ome tlakah makilitih:

—Xiwiki san nima.

³⁹ Pedro omóketski iwa oyá inwah. Iwa ijkuak yoajsito kan altepetl de Jope, okiwikakeh kan cuarto kan okatka n miketl. Nochteh n iknosiwameh, ochokatokah okiyawalojkeh n

Pedro iwa okiititijkeh nochteh n kuemeh iwa n kotomeh non Dorcas okinchijchi ijkuak oyolitoka. ⁴⁰Otlanki n Pedro okinmili makisakah nochteh, ijkuakó omotlankuáketski iwa omotiotsajtsili; otlanki okontlajtlatak n miketl iwa okili:

—¡Tabita, ximewa!

Ijkuakó okintlapo ixtololowah, iwa ijkuak okitak n Pedro, omotlali. ⁴¹Pedro okimakitski iwa okiketsalti. Otlanki okínnotski non kineltokah Cristo Jesús iwa n iknosiwameh, iwa okinmaktili yolitok. ⁴²Nin milagro omoma itech nochi altepetl de Jope, iwa miakeh okineltokakeh n Toteko Jesús. ⁴³Iwa Pedro omoka miakeh tonatijmeh itech non altepetl, icha n Simón non okintekitia kuftlaxteh.

10

Pedro iwa Cornelio

¹Kan altepetl non itoka Cesarea ochantitoka se tlakatl non itoka Cornelio, ye kapita innawak se sientto de soldadojtech non okintokayotiyah Italianos. ²Cornelio iwa nochi ichantlakawah okimopantiyah iwa okiweyijkachiwayah Dios. Iwa Ye okitemakaya miak tomi para kimpalewis ikniwah n judíojtech akimeh amitla okipiayah, iwa nochipa omotiotsajtsiliaya inawak Dios. ³Se tonati kemi las tres de tiotlak, Cornelio okitak se tlawilnextflistli kemi yaskia se tejtemiktok. Okitak se iángel Totajtsi Dios non owalkalak kan ye okatka, iwa okili:

—¡Cornelio!

⁴Cornelio omoka kisentlajtlatok n ángel porke satlawel okimojti, iwa okijto:

—¿Tlan tikmonekiltia Noteko?

N ángel okili:

—Dios okiseli motiotsajtsilis iwa tlan otikchi ijkuak otikimpalewi non amitla kipiah.

⁵Axa, xikintitlani sikimeh tlakah kan altepetl de Jope para makinotsatih n Simón, akin noiwa itoka Pedro. ⁶Ye mokalotijtok icha n ok se Simón, non kintekiti kuftlaxteh, iwa chantitok itempa n atl, ye mitsilis tlan tikchiwas.

⁷Ijkuak n ángel oyá, Cornelio okínnotski ome itlakawah iwa se isoldado akin okitlakitaya iwa okimopantiyah Dios. ⁸Cornelio okinmatilti nochi tlan otlamochijka, iwa satepa okintítlanki kan altepetl de Jope.

⁹Ijkuak owalmostlatik kemi tlajko tonati, ijkuak oyayah itech ojtli iwa yoonajsiah Jope, Pedro otlejkok omotiotsajtsilito ikpak kali. ¹⁰Non ora oxitlatlatoka iwa okinekia tlakuas. Pero ijkuak okichijchiwilijtokah tlan kikuas, okitak se tlawilnextflistli kemi ijkuak se tejtemiki, ¹¹iwa okitak n ilwikak omotlapo iwa itla kemi se patlawak manta non oilpitiwalaya ik nawi ipuntajwah, owaltemoaya ixko tlali. ¹²Itech non manta owalayah miakeh yolcameh de nawi inmikxiwah, yolcameh non motilana ixko tlali iwa totomeh.

¹³Ijkuakó okikak se tlájtoli non okili:

—Ximoketsa Pedro, xitlamikti iwa xitlakua.

¹⁴Pedro otlankili:

—Amó, Noteko, porke ayik nikuajtika itla tlan amo chipawak nion itla pitsotik.

¹⁵N tlájtoli oksepa okínotski iwa okili:

—Tlan Dios yokichipa, amo xikijto amo chipawak.

¹⁶Ijkó otlamochi eyi welta, iwa san nima n manta oksepa omókopki ilwikak. ¹⁷Pedro omoka san tlakaktok, omokuatlapowijtoka tlan kijtosneki tlan okimonextili. Ijkuakó okalakikoh kan kaltentli itlakawah n Cornelio non otlajtlantlawayah kan icha n Simón. ¹⁸Otlakakalatskeh iwa otlajtlankeh kox ompa okalotitoka se tlakatl non itoka Simón, akin noiwa kinotsah Pedro. ¹⁹Iwa kemi Pedro ok omokuatlapowijtoka tlan kijtosneki tlan okimonextili, n Espíritu Santo okili:

—Xikkaki, eyi tlakah mitstemoah. ²⁰Ximoketsa, xitemo iwa xio inwah. Amo xikmoli kox tias noso amó, porke Ne onikintítlanki.

²¹Ijkuakó Pedro otemok okinmajsito n tlakah non Cornelio okwalintítlanki, iwa okinmili:

—Ye ne akin nomejwah nonkitemoah, ¿tlan nonkimonekiltiah?

²² Yejwah otlanankilijkeh:

—Otechaltitlanki n kapita Cornelio. Ye se tlakatl yekmilajka iwa kitlakita Dios, iwa nochteh n judíojteh kitlakitah iwa kitlasojtlah. Se iángel Dios okili mamitsnotsaki iwa xiwia icha, para makikaki nochi tlan tejwatsi tikilis.

²³ Ijkuakó Pedro okinkalaki ijtik icha iwa okinkaloti non yúali. Keman owalmostlatik Pedro oyá inwah. Sikimeh tokniwah de Jope noiwa oyajkeh inwah.

²⁴ Ijkuak owalbiktlatik okalakitoh Cesarea kan Cornelio sa okinchixtoka. Noiwa ompa okatka ichantlakawah iwa oksikimeh tlakah non satlawel íwa omowikaya. ²⁵ Ijkuak Pedro okalakito, Cornelio okiski okinselito kan kaltentli iwa san nima owalmotlankuáketski iyakapa para kiweyiliskia. ²⁶ Pero Pedro okiketsalti, iwa okili:

—Ximoketsa, porke ne noiwa san ni tlakatl kemi te.

²⁷ Iwa motlapowijtiwih okalakeh sansikah. Ompa ijtik kali Pedro okinmajsito miakeh tlakah. ²⁸ Ijkuakó Pedro okinmili:

—Nomejwah kualí nonkimatokeh itlanawatil Moisés amo techkawilia tejwah akimeh ti judíojteh matimonelokah iwa akimeh amo judíojteh, nion matikalaktinematikah incha. Pero Dios yonechititi amaka manikita kemi yaskia amitla ipati noso amo chipawak inawak Dios. ²⁹ Yíka, san nima ijkuak onechilijkeh maniwiki oniwalewak iwa mach onikijto kox amo niweletis niwits. Axa nikneki nikmatis, tleka onontlatitlankeh manechnotsath.

³⁰ Ijkuakó Cornelio otlanankili:

—Ya kipia nawi tonati, kemi nin ora las tres de tiotlak, ne onimotiotsajtsilijtoka nika nocha, ijkuakó se tlakatl non otsotlania itlakeh, omoketsako noyakapa. ³¹ Iwa onechili: “Cornelio, Dios okikak motiotsajtsilis iwa Ye okilnamik kenijki tikimpalewia akimeh amitla kipiah. ³² Axa kiné, xikintitlani motlakawah kan altepetl de Jope makinotsath n Simón akin noiwa itoka Pedro. Ye kalotitok icha n ok se Simón non kintekiti kuitlaxteh iwa chantitok itempa n atl.” ³³ Yíka totokatijjak onikintitlanki notlakawah mamitstemotih, iwa kualí otikchi otiwala. Axa nika tikateh tinochteh ixpa n Totajtsi Dios, iwa tiknekih tikkakiskah nochi tlan Toteko omitsnawati techiliki.

Pedro tetlapowia icha n Cornelio

³⁴ Ijkuakó Pedro opé tlajtoa iwa okijto:

—Axa nikajsikamati, Dios amo kintlasojtla san sikimeh, iwa oksikimeh amó, ³⁵ yej itech nochi nin taltikpaktli, Dios kinselia akimeh kitlakitah iwa kichiwah tlan kualí. ³⁶ Totajtsi Dios okwáltitlanki Cristo Jesús makinmatiltiki nochteh n tlakah de Israel n kualitlájtohi non kitemakah yolsewlistli, Jesús Ye n Toteko de tejwah tinochteh. ³⁷ Nomejwah kualí nonkimatokeh nochi tlan opanok kan chantitokeh n judíojteh. Opejki kan tlali de Galilea, ijkuak Juan Bautista otlamachti iwa otlakuaateki. ³⁸ Nomejwah nonkimatokeh kenijki Dios okimák weletlistli n Jesús de Nazaret ika n Espíritu Santo, iwa kenijki Ye okitechiwilijtinemia tlan kualí iwa okimpajtiaya nochteh akimeh otlaijyowijtinemia imak n diablo. Jesús okichi nochi noni porke Dios okipalewiaya. ³⁹ Iwa tejwah kualí tikmatokah nochi tlan Jesús okichi ompa kan tlali de Judea iwa itech Jerusalén. Pero satapa okimiktijkeh ipan se krus. ⁴⁰ Iwa ipan eyi tonati, Dios okiyoliti iwa okichi matechmonextili tejwah. ⁴¹ Amo okinmonextili nochteh n tlakah, yej sanwel tejwah akimeh Dios achto yotechpejpenka para matiktematiltikah tlan Jesús okichi. Iwa ijkuak Jesús omoyoliti, tejwah otitlakuajkeh iwa otikonikeh íwa. ⁴² Noiwa otechnawati matitetlapowikah iwa matikinmatiltikah n tlakah, Dios okitlali n Jesús kemi teyolsewi innawak non yolitokah iwa akimeh yomikkeh. ⁴³ Iwa ya wejkawitl, nochteh n profetas yotlajtoayah de Jesús, okijtoayah nochteh akimeh tlaneltokaskiah itech Itoka n Jesús, Dios kintlapojpolwiskia de intlajtlakolwah.

N tlakah non amo judíojteh kiseliah n Espíritu Santo

⁴⁴ Pedro ok otlajtojtoka ijkuak n Espíritu Santo owala intech nochteh akimeh okikak-tokah tlan okimiliaya. ⁴⁵ Iwa n judíojteh non okineltokayah Cristo Jesús non owalajkeh iwan Pedro, san omotlajtlachaltijkeh ijkuak okitakeh Dios noiwa okinmák n Espíritu Santo

akimeh amo judíojtech. ⁴⁶Porke okinkakiah otlajtoayah iwa okiweyijkachiyayah Dios ika oksikimeh tlájtoltel. ⁴⁷Ijkuakó Pedro okinmili:

—Ninteh tlakah noiwa yokiselijkeh n Espiritu Santo kemi tejwah, ¿kox onka se akin amo kitekawilis mamokuaatekikah ninteh tlakah?

⁴⁸Iwa san nima Pedro otlanawah makinkuaatekikah itech Itoka n Cristo Jesús. Otlanki yejwah okitlatlautijkeh n Pedro mamokawa kanaj kech tonati inwah.

11

Pedro oksepa walmokopa Jerusalén

¹N tlatematiltijkeh iwa n tokniwah non okatkah Judea akimeh okineltokayah n Cristo Jesús okimatkeh noiwa non amo judíojtech yokineltokakeh itlajtol Dios. ²Iwa ijkuak Pedro omókopki Jerusalén, okajwakeh sikimeh judíojtech non osirkunsidaritokah iwa yokineltokakeh n Cristo Jesús. ³Yejwah okitlajtlaniykeh:

—¿Tleka tikalaktinemi incha non amo sirkunsidaritokeh, iwa titlakuajtinemi inwah?

⁴Ijkuakó Pedro opé kintlapowia nochi tlan omochi, iwa okinmili:

⁵—Ne onikatka kan altepetl non itoka Jope, iwa ijkuak onimotiotsajtsilijtoka, opé kemi yaskia nitejtemiktok, onikitak owaltemok de ilwikak kemi se manta patlawak non oilpitiwalaya itech nawi ipuntajwah iwa omotlaliko noyakapa. ⁶Ijkuak oniontláchixki ijtik non manta, onikinmitak sikimeh yolkameh non okimpiayah nawi inmixiwah, sikimeh yolkameh tekuanimeh, sikimeh non motilana ixkotlali iwa miakeh totomeh. ⁷Iwa onikak se tlájtoli non onechili: “Ximoketsa Pedro, xitlamikti iwa xitlaku.” ⁸Pero Ne onitlanankili: “Amó, Noteko, porke ayik nikuajtika itla tlan amo chipawak nion itla pitsotik.” ⁹Ijkuakó n tlájtoli non onechaltpowiyaha de ilwikak, oksepa onechili: “Tlan Dios yokichipa, amo xikijto amo chipawak.” ¹⁰Ijkó otlamochi eyi welta, iwa otlanki san ken kajki oksepa otlejkok ilwikak. ¹¹Ijkuakó eyi tlakah okalakitoh kan onikalotitoka. Yejwah okwalintitlankeh desde Cesarea para manechtemokih. ¹²Iwa n Espiritu Santo onechnawati manio inwah, iwa amo manikmoli kox nias noso amó. Noiwa nowa oyajkeh ninteh chikwase n tokniwah non nika kateh. Tinochteh otikalakeh ichan se tlakatl, ¹³non otechtlapowi kenijki ompa icha okitak omoketoka se ángel, iwa okili: “Xikintitlani sikimeh tlakah kan altepetl de Jope makinotsatih n Simón, akin noiwa kinotsah Pedro, ¹⁴ye mitsililis kenomi nomechtlapojpolwiskeh de nomotlajtlakolwah, te iwa nochi mochantlakawah.”

¹⁵Iwa ijkuak opé nikintlapowia, n Espiritu Santo owala intech, ijkó kemi achto owala totech. ¹⁶Ijkuakó onikilnamik tlan okijto n Toteko: “Milák, Juan otlakuateki ika atl, pero nomejwah nonmokuatekiskeh ika n Espiritu Santo.” ¹⁷Iwa tla Totajtsi Dios noiwa yejwah okinmák tlan tejwah otechtlakoli ijkuak otikneltokakeh n Toteko Cristo Jesús, ¿akin ne para nikilis Dios amo ijkó makichiwa?

¹⁸Ijkuak n tokniwah de Jerusalén okikakeh nochi ni tlan Pedro okinmili, omoyolsewijkeh iwa okiweyijkachijkeh Dios, iwa okijtojkeh:

—¡Axa tikajsikamatih Dios noiwa kinkawilia mamolnamikikah non amo judíojtech, iwa makipiakah n semijjak yolílistli!

Kitematiltiah n kualitlájtoli kan altepetl de Antioquía

¹⁹Non tonati ijkuak okimiktijkeh n Esteban, noiwa opé kintotojtokah akimeh noiwa okineltokayah Cristo Jesús, iwa sikimeh ochocholojkeh Fenicia, Chipre iwa Antioquía. Ompa okinmatiltijkeh itlajtol Dios sanwel n judíojtech. ²⁰Pero sikimeh non otlaneltokayah itech Cristo Jesús okatkah de Chipre iwa de Cirene. Ijkuak okalakikoh kan altepetl de Antioquía noiwa opé kitematiltiah n kualitlájtoli de Dios n tlakah de Grecia. ²¹Iweletilis n Toteko Dios okatka inwah iwa okimpalewiaya. Miakeh okineltokakeh iwa omoyolpatlayah inawak Toteko Jesús.

²²Ijkuak n tokniwah de Jerusalén non okineltokayah Cristo Jesús okimatkeh tlan opanotoka kan altepetl de Antioquía, okititlankeh n Bernabé mawia ompa. ²³Ijkuak Bernabé okalakito Antioquía iwa okitak kenijki Dios okintiochijtoka, saikpanoa opakmik. Okinyolchika nochteh, iwa okinmili nochipa makitlakitakah n Toteko ika nochi inyolo.

²⁴ Bernabé okatka kuali tlakatl, otentoka ika n Espiritu Santo iwa okiyekneltokaya n Toteko. Yika miakeh omoseitiliayah inawak n Toteko.

²⁵ Satepa, Bernabé oyá kan altepetl de Tarso okitemoto n Saulo, iwa ijkuak okajsik, okiwik para Antioquía. ²⁶ Saulo iwa Bernabé omokajkeh se xiwitl iwan akimeh kineltokah n Cristo Jesús non ompa ochantitokah, iwa miakeh tlakah okinmactijkeh. Ompa Antioquía opé kintokayotiah cristianos n tokniwah non kineltokah Cristo.

²⁷ Itech nekateh tonatijmeh sikimeh profetas non owalayah de Jerusalén okalakitoh Antioquía. ²⁸ Iwa seme de yejwah non omonotsaya Ágabo, owalmóketski iwa ika ichikawalis n Espiritu okinmatilti n tokniwah non ompa okatkah walaskia se weyi apisotl itech nochi n tlatlfpaktli. Iwa milák ijkó otlamochi itech nekateh tonatijmeh ijkuak Claudio okatka weyi tekiwa de Roma. ²⁹ Ijkuakó n tokniwah de Antioquía akimeh okineltokayah n Cristo Jesús, omotlapowijkeh iwa omokajkeh kimpalewiskeh ika tlan weletis, iwa kintitlaniliskeh n tokniwah non ochantitokah Judea. ³⁰ Iwa milák okichijkeh. Nochi tlan okoolojkeh, okimakakeh n Bernabé iwa Saulo, iwa yejwah oyajkeh okinmakatoh n tetajmeh non ompa tlayakantokah.

12

Kimiktiah n Jacobo iwa kitsakuah n Pedro

¹ Itech nekateh tonatijmeh, n rey Herodes Agripa Primero opé kintotojtoka sikimeh tokniwah non kineltokah Cristo Jesús. ² Otlanawati makimiktikah ika espada n Jacobo, ikni n Juan, ³ iwa kemi okitak okiwilitakeh n judíojeht, noiwa okitsak n Pedro. Ni otlamochi itech ilwitl de Paskua ijkuak mokua n paj non amo kipia levadura. ⁴ Ijkuak Herodes okikitski n Pedro, okitsak telpiloya iwa ompa okintlali nanawi soldadojtech para makimokuitlawijtokah. Herodes okimoliaya kikixtis ixpa n tlakah de non altepetl asta mapano n ilwitl de Paskua. ⁵ Ijkó kiné, Pedro otsaktoka telpiloya iwa kuali okimokuitlawijtokah, pero akimeh okineltokayah Cristo Jesús nochipa omotiotsajtsiliayah por ye.

Dios kikixtia n Pedro de kan otsaktokah

⁶ Pedro okochtoka iwa oilpitoka ika ome kadenajteh, iwa tlanajnastla ome soldadojtech. Noiwa oksikimeh soldadojtech okimokuitlawijtokah kaltempa. Non yúali Herodes okimoli kikixtis n Pedro ijkuak tlanesis, iwa kiteixpantis innawak n tlakah de non altepetl. ⁷ Ijkuakó ompa kan otsaktoka n Pedro owalmonexti se iángel n Toteko Dios iwa se tláwili okintlawilnextili. N ángel okolini n Pedro kan ikespa, okijxiti iwa okili:

—¡Ximejtiwetsi!

Ijkuakó n kadenajteh non ika omailpitoka n Pedro, owetskeh. ⁸ Iwa n ángel okili:

—Ximotlajkoilpi iwa ximokakti.

Ijkuak Pedro yomotlajkotelini iwa yomokakti, n ángel oksepa okili:

—Xikmokenti mokapa iwa xiwiki nowa.

⁹ Pedro oyá iwan ángel maya amo okimatia kox milák noso amo milák tlan okichwaya n ángel. Ye okimoliaya chamo san tejtemiktok. ¹⁰ Pero achto okimpanawijkeh sikimeh soldadojtech non ompa otlamokuitlawijtokah, otlanki okimpanawijkeh oksikimeh soldadojtech. Ijkuak okalakitoh kan sawa de tépostli non okatka itempa n ojtli iselti owalmotlapo, iwa ijkuak yonejnenkeh ok se ojtli sansikah, n ángel okikajte iselti n Pedro.

¹¹ Ijkuakó Pedro okajsikama tlan opanotoka, iwa okijto:

—Axa ya nikajsikamati n Toteko Dios, Ye Akin okwáltlilanki iángel, manechpalewiki imak Herodes iwa de nochi tlan judíojeht okinekih nechtoktiskeh.

¹² Ijkuak kuali yokajsikama milák yokiski de kan otsaktoka, Pedro oyá icha n María, ina n Juan akin noiwa kinotsah Marcos. Ompa okatkah miakeh non omotiotsajtsilijtokah.

¹³ Ijkuak Pedro otlakakálatski itech kaltentli non okatka kan patio, se ichpochtli non itoka Rode otlachiato akin otlakakalatoka. ¹⁴ Pero ijkuak okitenkak n Pedro, mach otlatlapo iwa satlawel opaki. Yej omotlelo tlajitk okimilito, Pedro tlakakalatok itech kaltentli. ¹⁵ Yejwah okilijkeh:

—¡San tikuamimiktik!

Iwa maya ye okimiliaya milák Pedro okatka itech kaltentli, yejwah okijtoayah:

—Mach ye, san íángel.

¹⁶ Pedro omoka tlakakalatok, iwa ijkuak otlatlapojkeh iwa okitakeh, san omotlajtlachialtijkeh. ¹⁷ Pero Pedro san okimanotski amo matlajtokah. Iwa otlanki opé kintlapowia kenijki Toteko Dios okikixti de kan otsaktoka. Iwa okinmili:

—Nochi tlan onomechili, xikmatiltikah n Jacobo iwa n oksikimeh tokniwah.

Ijkuakó okiski iwa oyajki oksika.

¹⁸ Ijkuak otláneski, n soldadojteh opé motletleloah iwa mach okimatiah tlan kichiwaskeh porke amo okimatiah kan ik oyá n Pedro. ¹⁹ Herodes Agripa Primero otlanawati makitemotih n Pedro, pero kemi amo okajsikeh, okintlatsintoki n soldadojteh iwa otlanawati makinmiktikah. Satepa Herodes Agripa Primero okiski de Judea iwa ochanchiwato Cesarea.

Mikki n Herodes Agripa Primero

²⁰ Herodes Agripa Primero okulantoka iwa n tlakah non ochantitokah Tiro iwa Sidón, pero yejwah omotlapowijkeh iwa omoyekkajkeh yaskiah kitatiweh n Herodes para makintlajtolpalewi inawak Agripa, porke n tlakah de Tiro iwa Sidón okonkuiah tlan kikuaskeh kan ipaís n rey. ²¹ Herodes Agripa Primero okitlali se tonati ijkuak motlapowiskia inwah, iwa ijkuak oajsik non tonati, okinmonaki itlakenwah non kinmonakiah n reyes, omoyayanti iwa opé kintlapowia. ²² Ijkuakó n tlakah opé tsajtsih:

—¡Akin tlajtojtok amo san se tlakatl, yej se dios!

²³ San nima ompa kan okatka, se íángel Toteko Dios okichi mamokokojtiwetsi n Herodes Agripa Primero, porke amo okiweyijkachi Dios, ookuloak iwa omikki.

²⁴ Pero itlajtol Dios okachi omoxitiniaya, iwa sentetl omotetlapowiaya.

²⁵ Ijkuak Bernabé iwa Saulo yokitlamijkeh inteki kan altepetl de Jerusalén, owalmokopkeh Antioquía iwa okualikakeh inwah n Juan akin noiwa itoka Marcos.

13

Bernabé iwa Saulo pewah kitematiltiah itlajtol Dios

¹ Itech altepetl de Antioquía kan ooololoayah non kineltokah Cristo Jesús, okatkah profetas iwa tlamachtijkeh. Yejwah ninteh: Bernabé, Simón akin okitokayotiyah Tliliwik, Lucio de Cirene, Manaén, non omoskalti iwan Herodes Antipas Primero n tlanawati de Galilea, iwa Saulo. ² Se tonati, ijkuak yejwah omotiotsajtsilijtokah iwa omosaujtokah, n Espiritu Santo okijto:

—Techxelilikah n Bernabé iwa Saulo para makichiwakah n tekiti non yonikimpejpenili.

³ Satepa, ijkuak yotlankeh omotiotsajtsilijkeh iwa omosaujkeh, okintlalijkeh inmawah impah, iwa okinmakajkeh.

Bernabé iwa Saulo tetlapowiah de itlajtol Dios kan tlali de Chipre

⁴ Satepa, n Espiritu Santo okintflanki n Bernabé iwa Saulo, iwa oyajkeh Seleucia, iwa ompa otlejkokeh itech se barko iwa oyajkeh Chipre. ⁵ Ijkuak okalakitoh kan altepetl de Salamina non kajki itempa n weyi atl, ompa opé kitematiltiah itlajtol Dios kan insinagogajwah n judíojeteh. Juan noiwa oyaya inwah iwa okimpalewiaya. ⁶ Onentinenkeh itech nochi n isla iwa okalakitoh kan altepetl de Pafos, ompa okajsitoh se tetlajchiwi israelita non itoka Barjesús akin otlakajkayawaya iwa okijtoaya ye profeta. ⁷ Nin tetlajchiwi omowikaya iwan tekiwa Sergio Paulo, akin okatka se tlakatl ixtlamatini. Ye otlanawati makinnotsati n Bernabé iwa Saulo, porke okinekia kikakis itemachtilis Dios. ⁸ Pero Barjesús n tetlajchiwi, akin noiwa itoka Elimas, omokuejso iwan Bernabé iwa Saulo, porke amo okinekia makineltoka itlajtol Dios n tekiwa Sergio Paulo. ⁹ Ijkuakó n Saulo, akin noiwa itoka Pablo, kemi okipixtoka n Espiritu Santo, okisentlajtlatak n tetlajchiwi ¹⁰ iwa okili:

—¡Tekajkaya, teyolijtlako! ¡Ikone n diablo iwa tetlawelitalak de nochi tlan kuali! ¿Asta kemia tikinkawas tikinkajkayajtinemis n tlakah para amo makajsikah n milaktik ojli

de Dios? ¹¹ Ika noni, n Toteko Dios mitstlaijyowilts iwa ayakmó weletis titlachias kanaj kech tonati, iwa mach weletis tikitas itlawilnextilis n tonati.

San nima n Elimas owalixtlejtlepuyawakeh itxololowah, iwa sa otlamatemoaya para makimatilanakah ken ayakmó otlachiaya. ¹² Ijkuak n tekiwa okitak tlan opanok, okinel-tokak Toteko, porke okitlajtlachialti itlamachtilis.

Pablo iwa Bernabé yawih Antioquía itech tlali de Pisidia

¹³ Pablo iwa akimeh oyayah inwah otlejkokeh itech barko, okiskeh de Pafos iwa oyajkeh kan altepetl de Perge kan tlali de Panfilia. Pero Juan Marcos okinkakajte iwa omókopki Jerusalén. ¹⁴ Satepa okiskeh de Perge iwa oyajkeh kan altepetl de Antioquía, non kajki itech tlali de Pisidia. Iwa itech sábadó ijkuak mosewia n judíos, okalakeh kan sinagoga iwa ompa omotlajtlalijkeh. ¹⁵ Satepa, ijkuak yotlankeh okiamapojkeh itlanawatil Moisés iwa intlajkuilol n profetas, n tlanawatijkeh de non tiopa, okilijkeh se tlakatl non ompa okatka makoninmiliti n Pablo iwa Bernabé ijki:

—Nokniwah, tla nonkipiah itla tlájtoli non ika weletis nonkinyolchikawaskeh akimeh nika kateh, weletis nonkijtoskeh.

¹⁶ Ijkuakó Pablo owalmóketski, okinmánotski para san matlakaktokah, iwa okijto:

—Xikkakikah tlakah de Israel, iwa nomejwah akimeh nonkitlakitah Dios: ¹⁷ N Dios de Israel okimpéjpenki totatawah. Ye okiweyijkatlali topueblo maya amo intlal ompa kan okatkah ijkuak okatkah kan tlali de Egipto. Iwa satepa ika iweletilis okinkixti de ompa. ¹⁸ Dios okinxikoli nochi tlan yejwah okichiwayah kan amaka chanti kemi ome póali (40) xiwitl, ¹⁹ iwa okimpojjolo n tlakah de chikome nasiones non ochantitokah itech talmeh de Canaán, iwa nonteh talmeh okinmaxkatili totatawah. ²⁰ Satepa, kemi nawisiento iwa ome póali iwa májtlaktli (450) xiwitl, Dios okintlali jueses non okinnawatijtokah asta nekateh tonatijmeh ijkuak owala n profeta Samuel. ²¹ Ijkuakó yejwah okitlajtlanilijkeh Dios makintlalili se rey para makinawatijto, iwa Dios okinmák n Saúl akin okinnawatijtoka ome póali (40) xiwitl. Nin Saúl ye ikone n Cis, iwejkaixwi n Benjamín. ²² Satepa, Dios okipatlak n Saúl, iwa okitlali n David mayeto inrey, iwa Dios okijto: “Yonikajsik David, ikone n Isaí, se tlakatl akin nechpaktia iwa kichiwas nochi tlan Ne nikneki.” ²³ Iwa se ixwi non walewatok de David, Ye n Jesús Akin Dios okitlanki para makinmakixtiki n tlakah de Israel kemi yowejka okijtojka kititlaniskia. ²⁴ Ijkuak Jesús ayamó owalaya, n Juan okinmatiltiaya itlajtol Dios n tlakah de Israel, iwa okimiliaya mamoyolpatlakah inawak Dios iwa mamokuaatekikah. ²⁵ Iwa ijkuak Juan yoyaya mikiti, okijto: “Mach ne akin nomejwah non kimoliah, porke nokuitlapa wits se akin ne amo nimixewia nikaktojtomas.”

²⁶ Nokniwah, nomejwah akimeh nonwalewatokeh de Abraham, iwa nomejwah akimeh amo non judíojteh pero nonkitlakitah Dios: nomejwah nomechtitlaniliah nin tlájtoli non techmakixtia. ²⁷ Porke akimeh ochanchiwayah Jerusalén iwa intlayakanwah mach okimatiah kox Jesús, nion okajsikamatiah intlajtol n profetas maya okiamapoaya itech sinagogas nochi sábadó. Yika, ijkuak okimiktijkeh n Jesús, innewiah okichijkeh tlan ya wejkawitl okijtojkeh n profetas. ²⁸ Iwa maya amo okipiaya itla tlajtlákoli para kimiktiskiah, yejwah okitlajtlanilijkeh n Pilato matlanawati makimiktikah. ²⁹ Satepa ijkuak okitoktijkeh n Jesús nochi tlan oijkulitokah. Okitemowijkeh de kan krus iwa okitookakeh ijtik se miketékochtli. ³⁰ Pero Dios okiyoliti de kan kateh non yomikkeh. ³¹ Iwa miakeh tonatijmeh Jesús okinmonextili akimeh iwa oyajkeh desde Galilea asta Jerusalén. Iwa axa yejwah tetlapowiah de Jesús.

³² Iwa axa, tejwah tomechmatiltijtokeh nin kualitlájtol non yowejka Dios okinmili totatawah kichiwaskiah. ³³ Iwa tejwah ken ipilwah totatawah, Dios yotechchiwili tlan yowejka okinsentlalili totatawah ijkuak okiyoliti n Jesús. Kemi ijkuilitok itech non ipan ome Salmo: “Te tinokone; iwa axa Ne onimitsyoliti.” ³⁴ Dios yokijtojka kiyolitiskia de kan kateh non yomikkeh para ikuerpo amo majtlakawi, ijkoó kemi okijto itech itlajkuilol Dios: “Nomechmakas notlatiochiwalis non yowejka onikili n David nikmakaskia.” ³⁵ Yika noiwa kijtoa itech ok se Salmo: “Amo tikkawas majtlakawi ikuerpo Mokone yolchipawak.”

³⁶ Porke milák matikijtokah, ijkuak David oyolitoka, okimpalewi ikniwah n judíojteh

ijkó kemi Dios okinawati, iwa ijkuak omikki omoseitilito iwa itatawah, iwa ikuerpo opajpálanki. ³⁷ Pero neká akin Dios okiyoliti, ikuerpo mach opajpálanki. ³⁸ Nokniwah, nomejwah nonkipiah nonkimatiskeh sanwel Jesús weletis nomechtlapojpolwis de nomotlajtlakol. ³⁹ Nochteh akimeh kineltokah n Jesús, Dios kintlapojpolwia, mach kemi itlanawatl Moisés amo owéletki okintlapojpolwi. ⁴⁰ Yika, kuali ximotlachilikah, amo kichiwa nomopah wetsiki tlan okijkuilojkeh n profetas, ijkuak okijtojkeh:

⁴¹ Xikkakikah, nomejwah tepijpinawijkeh, ximotlajtlachialtikah iwa xipoliwikah, porke nikchiwas se weyi neskayotl ijkuak ok nonyolitoskeh, kuajkualtsi yetos iwa mach nonkineltokaskeh maya aka manomechtlapowi tlan onikchi.

Hab. 1:5

⁴² Ijkuak Pablo iwa Bernabé okiskeh de insinagoga n judíojtech, sikimeh non amo judíojtech okintlatlaujtijkeh oksepa makintlapowiti de nin tlamachtlistli itech non ok se sábadó. ⁴³ Ijkuak yotlankeh omomachtijkeh iwa yopé kisah de insinagoga, miakeh judíojtech iwa akimeh yokiselijkah intemachtilis n judíojtech, oyajkeh iwan Pablo iwa Bernabé. Iwa yejwah okimiliayah kuali mamoyekketokah itech itlasojtlalis Dios. ⁴⁴ Ijkuak owalchikometik, ipan sábadó, n altepetl de Antioquía omonoki, porke miaktikeh tlakah non ompa ochantitokah owalajkeh okikakikoh itlajtol Dios. ⁴⁵ Pero ijkuak n judíojtech okitakeh miaktikeh n tlakah omoololojkeh, satlawel oxikojmikeh iwa opé kitlajtolkopah n Pablo iwa fiero okitenewayah. ⁴⁶ Ijkuakó n Pablo iwan Bernabé, omoyolchikajkeh iwa okimilijkeh:

—Omonekia matomechmatiltikah itlajtol Dios achto nomejwah judíojtech. Pero kemi amo nonkinekih nonkiseliskeh, iwa kemi amo nonmomachiliah nonkualteh kemi para nonyolitoskeh nochipa, yika okachi kuali tiawih tikinmatiltiteweh itlajtol Dios akimeh amo judíojtech. ⁴⁷ Porke ijko otechnawati n Toteko Dios, ijkuak okijto:

Onimitstlali kemi se tláwili para tikintlawilis nochteh n tlaltikpaktlakah, iwa sentetl tikimpalewis asta kan tlami n tlaltikpaktli.

Is. 49:6

⁴⁸ Ijkuak non amo judíojtech, okikakeh tlan Pablo okijto, oyolpakeh miak iwa opé kijtoah kualtsi itlajtol n Toteko. Iwa okineltokakeh Cristo Jesús nochteh akimeh Dios yokimpejpenka para mayolitokah nochipa. ⁴⁹ Iwa ijko omotetlapowi itlajtol n Toteko itech nochi neká tlali. ⁵⁰ Pero n judíojtech okintlatlapowijkeh sikimeh siwameh yolmilawakeh non okachi okintlakitayah. Noiwa okintlatlalwijkeh sikimeh tlakah non okachi oweyijkatitokah itech non altepetl para makintotojtokakah n Pablo iwa Bernabé iwa makinkixtikah de ompa. ⁵¹ Ijkuakó n tlatematiltijkeh omokxitsejtselojkeh para makitakah amo intlajtlakol tla yejwah amo kiseliah itlajtol Dios, iwa oonewakeh kan altepetl de Iconio. ⁵² Pero n tokniwah non kineltokah Cristo Jesús oyoltentokah ika miak paklistli iwa ika n Espiritu Santo.

14

Pablo iwa Bernabé okalakitoh kan altepetl de Iconio

¹ Ijkuak yokatkah kan altepetl de Iconio, Pablo iwa Bernabé okalakeh sansikah kan insinagoga n judíojtech iwa ika miak weletlistli okintlapowijkeh. Yika, miakeh judíojtech okineltokakeh Cristo Jesús iwa non amo judíojtech noiwa. ² Pero n judíojtech non amo okineltokayah Cristo Jesús, okintlatlapowijkeh akimeh amo judíojtech para amo makikakikah n Pablo nion Bernabé. ³ Pero Pablo iwa Bernabé ompa omokajkeh miakeh tonatijmeh iwa otetlapowiyah ika miak yolchikawálistli. Iwa Toteko Dios okinmakaya weletlistli para makinchiwakah milagros iwa wejweyi neskayolteh, iwa ijko n tlakah makitakah milák tlan yejwah okijtoayah de itlasojtlalis Dios. ⁴ Pero n tlakah non ochantitokah Iconio oxexelitokah, sikimeh okatkah iwan judíojtech iwa oksikimeh iwan tlatematiltijkeh. ⁵ Ijkuakó sikimeh judíojtech iwa non amo judíojtech, omotlatlalwijkeh iwan tekiwijkeh para kinwijwikaltiskeh n tlatematiltijkeh iwa kinmojmotlaskeh ika tetl. ⁶ Pero ijkuak Pablo iwan Bernabé okimatkeh tlan okinekih kintoktiskeh, ocholojkeh iwa oyajkeh

kan altepetl de Listra iwa Derbe, ninteh altepemeh kateh kan tlali de Licaonia. Iwa itech miakeh oksikimeh altepemeh non ik ompa okatkah,⁷ noiwa okitematiltiyah itlajtlot Dios.

Pablo kimojmotlah ika tetl kan altepetl de Listra

⁸ Kan altepetl de Listra okatka se tlakatl non amo oweletia onejnemia. Nin tlakatl ompa oewatoka porke ye ijko otlákatki, iwa ayik onéjnenki. ⁹ Nin tlakatl okikaktoka nochi tlan Pablo okijtoaya, Pablo okiyektlajtlatok iwa okitak non tlakatl milák okineltokaya Dios weletis kipajtis. ¹⁰ Ijkuakó Pablo okili ika chikawak tlájtloti:

—Ximoketsa iwa xikinyekmilawa mokxiwah.

Iwa non tlakatl san nima owalmoketewak iwa opé nejnemi. ¹¹ Ijkuak n tlakah de non altepetl okitakeh tlan okichi n Pablo, opé tsajtsih ika intlajtlot de Licaonia, iwa okijtoayah: —¡N diosmeh kemi tlakah yowaltemokeh tonawak!

¹² Iwa okijtoayah Bernabé okatka n dios Júpiter, iwa n Pablo n dios Mercurio, porke ye akin okachi otlajtoaya. ¹³ Itiopa n dios Júpiter okatka inakastla n altepetl de Licaonia, iwa n tiópixki de Júpiter okualinwík torojteh iwa sikimeh koronajteh non okinmajmankeh ika xochitl. Iwa n tiópixki iwa n tlakah de Licaonia okinekih kinmiktiskeh torojteh para Pablo iwa Bernabé para ika kinweyiliskeh. ¹⁴ Pero ijkuak n Bernabé iwa Pablo okitakeh tlan okinekih kinchiwiliskeh, omotlakentsotsomotskeh, omoxolkopinkeh iwa opanokeh intsalko nonteh tlakah tsajtsitwih:

¹⁵ —¡Tlakah! ¿Tleka ijko nonkichiwah? Tejwah noiwa titlakah de nin tlaltípkaktli kemi nomejwah. Tejwah nika otivalajkeh porke tiknekih tomechiliskeh xikkawakah nochi ni tlan amitla nomechpalewis, noiwa otivalajkeh otomechilikoh xiktlakitakah n Totajtsi Dios non yolitok akin okichijchi n ilwikak, n tlaltípkaktli, n weyi atl iwa nochi tlan itech onka. ¹⁶ Ya wejkwawitl, Dios okinkawili nochteh n tlaltípkaktlakah makichiwakah san tlan yejwah okinekeh. ¹⁷ Pero Ye nochipa okimititiaya Akin Cristo ika nochi tlan kuali okinchiwiliaya. Iwa Ye Akin techaltitlanilia n kiawitl iwa kichiwa kuali matlatlaki, noiwa techmaka tlan techpoloa para matikipakah tlan tikkuaskeh iwa matiyetokah ika pakílistli.

¹⁸ Pero maya nochi noni okimilijkeh, owi oweletkeh okintlakawaltijkeh n tlakah de Licaonia para amo makinmiktilikah torojteh non ika okinekih kinweyiliskeh.

¹⁹ Ijkuakó okalakikoh sikimeh judíojeteh de Antioquía iwa de Iconio. Okintlaltlalwijkeh n tlakah de Licaonia, iwa okimojmotlakeh n Pablo ika tetl. Ijkuak yejwah okiyejyekolijkeh yomikki, okitlaxotontiajkeh iwa okixitijkeh de non altepetl. ²⁰ Pero ijkuak n tokniwah non kineltokah Cristo Jesús okiyawalojkeh n Pablo, ye omóketski iwa oksepa okalak itech altepetl. Iwa ijkuak owalaneski oyá iwa Bernabé kan altepetl de Derbe.

²¹ Ijkuak yokitematiltijkeh n kualitlájtolitl itech n altepetl de Derbe kan miakeh okineltokakeh n Cristo Jesús, omokopkeh Listra, Iconio iwa Antioquía. ²² Iwa itech nekateh altepemeh okinyolchikajkeh akimeh okineltokayah n Cristo Jesús, iwa okimilijkeh makineltokakah nochipa. Noiwa okinmilijkeh tla kixikoskeh n tlaijyowfistli weletis kalakiskeh kan Dios tlanawatia. ²³ Noiwa okimpejpenkeh sikimeh tlayakankeh makinayakanakah n tokniwah kan moololoah. Ijkuak yomotiotsajtsilijkeh iwa omosaujkeh, okintlalijkeh imak n Toteko.

Pablo iwa Bernabé mokopah Antioquía kan tlali de Siria

²⁴ Satepa opanokeh kan tlalmeh de Pisidia iwa okalakitoh Panfilia. ²⁵ Otetlapowijkeh itlajtlot Dios kan altepetl de Perge, iwa satepa oyajkeh Atalía.

²⁶ Ompa otlejkokoh itech se barko iwa oyajkeh Antioquía kan achto okintlalijkeh imak Dios para ika itlasojtlalis makimpalewi itech non tekil non axa yotlankeh okichijkeh.

²⁷ Ijkuak okalakitoh Antioquía, okinmoololojkeh n tokniwah non kineltokah Cristo Jesús iwa okinmatiltijkeh nochi tlan okichijkeh ika iweletilis Dios, iwa kenijki n Toteko okinyolyamani n tlakah non amo judíojeteh para yejwah noiwa makineltokakah n Cristo Jesús.

²⁸ Pablo iwa Bernabé omokajkeh ompa miakeh tonatijmeh inwah tokniwah non kineltokah Cristo Jesús.

N tokniwah moololoah Jerusalén

¹ Itech nekateh tonatijmeh, sikimeh tlakah non okiskeh de Judea iwa oyajkeh kan altepetl de Antioquía, opé kinmachtiah n tokniwah non amo judfojtech mamosirkunsidarokah kemi Moisés otlanawatijka, tla okinekiah momakixtiskeh. ² Pablo iwa Bernabé omokualanijtokah chikawak iwa nonteh tlakah. Yika Pablo, Bernabé iwan oksikimeh tokniwah, okimpejpenkeh mawiah Jerusalén mamoyektlapowitih de n sirkunsisión inwah n tlatematiltijkeh iwa n tlayakankeh de n tokniwah de Jerusalén.

³ N tokniwah de Antioquía, non kineltokah Cristo Jesús, okintitlankeh mawiah Jerusalén Bernabé iwan Pablo. Ijkuak oyajkeh opanokeh kan ik tlalmeh de Fenicia iwa Samaria. Ompa kan ik oyayah, otetlapowiyah kenomi non amo judfojtech okikajkeh tlan achto okineltokayah iwa yopé kineltokah Dios. Nochteh n tokniwah opakiah ijkuak okikakiah tlan okinmiliayah.

⁴ Ijkuak Pablo iwa Bernabé okalakitoh Jerusalén, okinselijeh non okineltokayah Cristo Jesús, noiwa n tlatematiltijkeh iwa n tlayakankeh. Iwa yejwah okintlapowijkeh nochi tlan Dios okichi inwah. ⁵ Pero sikimeh fariseos non noiwa yokineltokakeh Cristo Jesús, omoketskeh iwa okijtojkeh:

—N tlakah non amo judfojtech akimeh noiwa yokineltokakeh Cristo Jesús, moneki mosirkunsidaroskeh. Iwa moneki tikinnawatiskeh makichiwakah tlan kijtoa itlanawatil Moisés.

⁶ Ijkuakó n tlatematiltijkeh iwa n tetajmeh non tlayakantokeh, omooolojkeh para motlapowiskeh tlan kichiwaskeh. ⁷ Ijkuak yomotlapowijkeh, Pedro owalmóketski iwa okinmili:

—Nokniwah, nomejwah kualí nonkimatokeh yowejka Dios onechpéjpenki nomonawak, para manikinmatiliti n kualitlájtoli akimeh amo judfojtech, iwa ijko yejwah noiwa matlaneltokakah. ⁸ Iwa Dios, Akin kimati nochi tlan tikmoliah itech toyolo, noiwa okinmák n Espiritu Santo akimeh amo judfojtech ijko kemi tejwah achto otechmák. Ika noni otechititi de milajka kinselia. ⁹ Dios amo otechseli san tejwah iwa yejwah amó, yej san ken tinochteh otechseli. Yika, ijko kemi tejwah otechyoichipa Dios, noiwa yejwah okinyolchipa porke okineltokakeh Cristo Jesús. ¹⁰ Axa, ¿tleka amo nonkineltokah tlan Dios okichi? Iwa nonmochijchikawah nonkintoktia akimeh yokineltokakeh n Cristo Jesús makichiwakah tlan nion tejwah, ñion totatawah otiveletkeh otikchijkeh! ¹¹ Okachi kualí, tejwah tikneltokah yotimomakixtijkeh porke Jesús miak otechtlasojtlak, noiwa yejwah kineltokah.

¹² Ijkuakó nochteh san owalmokajkeh para kikakiskeh tlan Bernabé iwa Pablo okintlapowiyah kenijki Dios okinmák weletilistli para makinchiwah milagros iwa wejweyi neskáyolteh inmixpah non amo judfojtech. ¹³ Ijkuak yotlankeh otlajtojkeh, Jacobo okijto:

—Nokniwah, techkakikah: ¹⁴ Simón Pedro yotechtlapowi kenomi otlamochi ijkuak sikinika Dios opé kinnotsa akimeh amo judfojtech. Iwa itech okinmopejpeni sikimeh para mayetokah iaxkawah. ¹⁵ Tlan Pedro okijto, ijko okiski tlan okijkuilojkeh n profetas, ijko kemi kijtoa itech itlajkuilol Dios:

¹⁶ Satepa de nochi ni, oksepa niwalmokopas iwa nikyekketsas itabernákulo n David non axa wetok; nikyektalis tlan omoka, iwa oksepa nikajkokuis,

¹⁷ para nochteh n tlaltikpaktlakah makitemokah n Toteko: Nochteh yejwah akimeh yokinmatiltijkeh Notoka.

¹⁸ Ijko kijtoa n Toteko, Akin ya wejkawitl okitematilti tlan axa mochijtok. *Am. 9:11-12*

¹⁹ Yika ne nikijtoa, amo matikinkuejsokah akimeh amo judfojtech iwa yokikajkeh tlan achto okineltokayah iwa axa ya kitlakitah Dios. ²⁰ San matikintlajkuililikah ayakmó makikuakah itla tlan yokinmanilijkeh n diosmeh non kinmachijchiwah. Iwa nion se

télpochtli noso íchpochtli mamomekatijtinemi. Ayakmó makikuakah nakatl de n yolka-meh non san kintoskamalina, nion makikuakah n tlakuali ika innesso. ²¹ Porke yowejka onkateh akimeh kitemachtiah itlanawatil Moisés, iwa nochi sábadó kitemachtijtiwitseh itech nochteh sinagogajteh.

Kintitlanilia se amatlajkuúloli non amo judíojteh

²² Ijkuakó n tlatematiltijkeh iwa n tetajmeh non kinyakantokeh tokniwah non kineltokah Cristo Jesús, okimpejpenkeh sikimeh inmikniwah para kintitlaniseh mawiah iwan Pablo iwa Bernabé kan altepetl de Antioquía. Yejwah okipejpenkeh n Judas, akin noiwa itoka Barsabás, iwa Silas; ninteh tlakah okachi otlayakantokah innawak tokniwah.

²³ Okinmakakeh se amatlajkuúloli non ijki okijtoaya:

“Tejwah akimeh titlatematiltiah, iwa titetajmeh non tikinyakantokeh tokniwah non kineltokah Cristo Jesús, iwa oksikimeh tokniwah non moololoah towah: Tomechont-lajpaloah nomejwah tokniwah non amo judíojteh iwa nochteh akimeh nonchantitokeh Antioquía iwa itech tlahmeh de Siria iwa Cilicia. ²⁴ Otikmatkeh sikimeh tlakah non san yejwah omonawatijkeh oyajkeh onomechkuatlapololtitoh ika intlajtolwah. Yejwah onomechilitoh nomejwah monekih nonmosirkunsidaroskeh iwa monekih nonkitlakitaskah itlanawatil Moisés. ²⁵ Yika, yotimotlapowijkeh iwa yotimoyekkajkeh tikimpejpenaskeh sikimeh tokniwah non kineltokah Cristo Jesús. Tikintitlaniseh manomechitatih sansikah iwa n tokniwah Bernabé iwa Pablo non tikintlasojtlah. ²⁶ Yejwah yokitlalijkeh itech inyolo kitematiltiskeh itoka n Toteko Cristo Jesús maya makinmiktikah. ²⁷ Ika noni tomechtitlanilia n Judas iwa Silas. Yejwah innewiah nomechyekiliseh nochi tlan tomechtlajkuúlijtokeh. ²⁸ Porke n Espíritu Santo iwa tejwah noiwa, yotikijtojkeh amitla ok se tomechnawatiseh xikchiwakah; sanwel ni tlan milák moneki nonkichiwaskeh: ²⁹ Amo xikkuakah nakatl non yokinmanilijkeh n diosmeh non kinmachijchiwah.

Amo xikkuakah estli nion nakatl de n yolkameh non san okintoskamalinkeh, iwa nion se télpochtli noso íchpochtli mamomekatikah ijkuak ayamó monamiktiah nion mamomekatijtinemikah. Tla nonkichiwaskeh tlan tomechnawatiah, kualitlan nonkichiwah. Dios manomechtiochiwa.”

³⁰ Ijko kiné, oonewakeh akimeh okintitlankeh mawiah Antioquía, iwa san nima ijkuak okalakitoh ompa, okinmoololokkeh n tokniwah non kineltokah Cristo Jesús iwa okinmaktijkeh nin amatlajkuúloli. ³¹ Ijkuak n tokniwah okiamapojkeh tlan okijtoaya n amatlajkuúloli, satlawel opakeh ika tlan okijtoaya non amatlajkuúloli. ³² Iwa kemi Judas iwa Silas noiwa okatkah profetas, okinyolsewijkeh iwa okinyolchikajkeh n tokniwah ika miak tlájtoli. ³³ Yejwah omokajkeh kech tonati ompa. Iwa ijkuak ya onewaskiah, n tokniwah okinmakajkeh para mamokopakah innawak akimeh okintitlankah. ³⁴ Pero n Silas okimoli mokawas Antioquía. ³⁵ Pablo iwa n Bernabé noiwa omokajkeh Antioquía. Yejwah iwa oksikimeh tokniwah otlamachtayah iwa otetlapowiyah de itlajtol Toteko.

Pablo oksepa kitelapowia itlajtol Dios

³⁶ Kech tonati satempa, Pablo okili n Bernabé:

—Oksepa matiawah matikintlajpalotih n tokniwah non kateh itech nochteh n altepemeh kan yotitetlapowijkeh de itlajtol n Toteko Dios para matikinmitakah.

³⁷ N Bernabé okinek kiwikas n Juan, akin noiwa omonotsaya Marcos, ³⁸ pero Pablo ayakmó okinek kiwikas, porke achto n Juan okinkakajtejka ijkuak okatkah Panfilia iwa amo okinek otekitik inwah. ³⁹ Iwa kemi amo omoajsikamatkeh, omoxexelokkeh. Bernabé okiwik n Marcos, iwa otlejkok itech se barko iwa oyá Chipre, ⁴⁰ pero Pablo okipéjpenki n Silas. Iwa keman n tokniwah yomototsajtsilijkeh para Dios makinwika ika itlasojtlalis, oonewakeh. ⁴¹ Opanokeh ik tlahmeh de Siria iwa Cilicia. Iwa sentetl kan tokniwah non kineltokah Cristo Jesús omoooloayah, Pablo okinyolchikawayá.

¹ Pablo iwa Silas okalakitoh kan altepetl de Derbe iwa de Listra, ompa okajsitoh se tokni non okineltokaya Cristo Jesús non itoka Timoteo, itelpoch se siwatl israelita non itoka Eunice non otlaneltokaya, pero ita n Timoteo okatka de Grecia. ² Iwa n tokniwah non ochantitokah Listra iwa Iconio kuali otlajtoayah de Timoteo. ³ Pablo okinekia kiwikas n Timoteo, pero achto okitokti mamosirkunsidaro para amo makualanikah n judíojtch non ochantitokah itech nonteh talmeh, porke nochteh okimatiah ita n Timoteo griego. ⁴ Iwa itech nochteh n altepemeh kan ik opanotiayah, okinmatiltiayah n tokniwah non kineltokah Cristo Jesús tlan n tlatematiltijkeh iwa n tetajmeh non kinyakantokeh n tokniwah akimeh moololoah Jerusalén okijtojkeh mamochiwa. ⁵ Iwa ijkó nochteh n tokniwah okachi okineltokayah Cristo Jesús, iwa ixmostla okachi omomiakiliayah.

Pablo kimonextilia se tlakatl non kilia mawia Macedonia

⁶ Kemi n Espíritu Santo amo okinkawili matetlapowikah de itlajtol Dios kan talmeh de Asia, yika san okimpanawijkeh n altepemeh non kateh itech talmeh de Frigia iwa Galacia. ⁷ Iwa ijkuak okalakitoh kan motlalnamikih Misia iwa Bitinia, yejwah okinekia kalakiskeh itech tlali de Bitinia, pero Iespíritu Jesús mach okinkawili. ⁸ Ijkó kiné, san opanotijkeh ik inakastla n tlali de Misia, asta okalakitoh Troas. ⁹ Non yúali ijkuak yokatkah kan tlali de Troas, Dios okitlapowi n Pablo itech itejtemikilis. Ye okitak iyakapa omoketsako se tlakatl de Macedonia non okitlatlaujtia: “Xiompano ik Macedonia iwa techompalewi.” ¹⁰ Ijkuak Pablo okitak non tejtemikilistli, san nima otimotlatlalijkeh para tiaskeh Macedonia, porke kuali otikmatiah Dios otechnotoka matiwiwah matikinmatilitih n kualitlajtoli de Dios.

Pablo iwa Silas yawih Filipos

¹¹ Ompa kan altepetl de Troas otilejkokeh itech se barko iwa otiksenmilajkeh kan ik kajki n isla de Samotracia, iwa ijkuak owaltláneski otikalakitoh Neápolis. ¹² Satepa otikiskeh de ompa iwa otiajkeh Filipos, se altepetl non okachi weyixtok itech talmeh de Macedonia non noiwa inmaxka n romanos. Tejawh ompa otimokajkeh kech tonati. ¹³ Se sábadó ijkuak mosewia n judíos, otikiskeh de non altepetl iwa otikalakitoh inakastla n aweyatli, kan nochipa onmotiotsajtsiliayah n judíojtch. Ompa otimotlajtlalijkeh iwa opé tikinmatiltiah itlajtol Dios n siwameh non ompa omoololojkah. ¹⁴ Seme de yejwah itoka Lidia. Ye owalewatoka de Tiatira iwa okinamakaya tlakemitl non okachi kuali iwa chichiliktik. Nin siwatl non okiweyijkachiwaya Dios, okikaktoka tlan Pablo okijtoaya. Iwa Toteko okiyolyamani kuali makikaki nochi tlan Pablo okijtoaya. ¹⁵ Otlanki, nin siwatl iwa nochi ifamilia omokuatekijkeh. Satepa ye otechtlatlaujt iwa otechili:

—Tla nomejwah nonkiyejyekoliah milák ya nikelntoka n Toteko, xiwikih nocha, ompa nomechkalotis.

Iwa otechtoktih matimokawakah.

¹⁶ Se tonati ijkuak yotiaayah kan nochipa otimotiotsajtsiliayah, itech ojtli otiknamikah se íchpochtli non okiapiaya se espíritu non ika okimatia tlan se mochiwaskia. Iwa ika non tekitl non okichijtinemia non íchpochtli, n tekowajkeh okitlaniah miak tomi. ¹⁷ Nin íchpochtli opé yawi kan ik otiaayah tejawh iwa Pablo. Chikawak otsajtsitinemia tokuitlapa, iwa okijtoaya:

—¡Ninteh tlakah tekitih inawak Dios non okachi weyijkachitok, iwa nomechmatiltiah kenijki nonmomakixtiskeh!

¹⁸ N íchpochtli ijkó okichijtinienki miakah tonatijmeh, pero se tonati n Pablo ayakmó okixiko, owalmókopki iwa okili n amokuali espíritu non okatka ijtik nin íchpochtli:

—Ika Itoka n Toteko Cristo Jesús, nimitsnawatia, xikisa de itech.

Iwa n amokuali espíritu san nima okikakajte. ¹⁹ Pero ijkuak n tekowajkeh de n íchpochtli okitakeh ayakmó kitlaniskiah tomi iwan ye, okikitskijkeh n Pablo iwa Silas iwa okinwikakeh kan portal innawak tekiwajkeh. ²⁰ Okinwikakeh innawak tekiwajkeh iwa okijtojkeh:

—Ninteh judíojtch kimpajsolojtinemih nochteh n tlakah non nika chantitokeh. ²¹ Iwa tlamachtijtinemih ika ok se tlamachtlistli non tejawh mach tiknekih nion mach weletis tikinchiwaskeh, porke tejawh ti romanos.

²² Ijkuakó n tlakah de Filipos okualankeh iwa nochteh oonewakeh impah n tlatematilti-
jkeh. Iwa n tekiwajkeh otlanawatijkeh makintlakentsomonikah iwa makinwitekikah ika
tlakotl. ²³ Iwa ijkuak satlawel yokinwitekeh, okintsakuatoh, iwa okinawatijkeh n tetsak
kuali makinmokuilawli. ²⁴ Iwa ijkuak n tetsak okikak tlan okinawatijkeh, okintsakuato kan
okachi tlajitk, iwa okintlalili inmikiwah intsalko ome kuaujmech kojkyonkeh.

²⁵ Pero ik tlajko yuak, Pablo iwan Silas omotiotsajtsilijtokah iwa okitlakuikilijtokah Dios,
iwa n oksikimeh non ompa otsaktokah okinkaktokah. ²⁶ San nima chikaktik owaltlalólinki
asta okintsejtseló n temeh kan otlaxkilitoka n telpiloya. Ijkuakó nochteh n kaltemeh
owalmotlapojkeh iwa otojtonkeh inkadenajwah non ika oilpitokah n tlakah non ompa
otsaktokah. ²⁷ N tetsak ojsak, iwa ijkuak okimitak n kaltemeh tlajtlapotokeh, okixiti
iespada iwa ya momiktiskia, porke okimoli yocholojkeh akimeh ompa otsaktokah. ²⁸ Pero
n Pablo oksajtsili:

—Amo ximokojko, tinochteh nika tikateh.

²⁹ Ijkuakó n tetsak okitlajtlanki se tláwili, okalaktiwetski bibiokati omotlankuáquetsato
ikxitla n Pablo iwan Silas. ³⁰ Otlanki okwalinkixiti iwa okintlajtlani:

—Tlakah, ¿tlan moneki nikchiwas para nimomakixtis?

³¹ Yejwah okinankilijkeh:

—Xikneltoka n Toteko Cristo Jesús iwa mitsmakixtis te, iwa nochi mochantlakawah.

³² Iwa Pablo iwa Silas okitlapowijkeh de itlajtol n Totajtsi n tetsak iwa nochteh non inwah
ochantitokah. ³³ Iwa san nima non yúali, n tetsak okimpakili kan okinxojxolejkeh, iwa ye
iwa nochi ichantlakawah omokuaatekijkeh. ³⁴ Satepa okinwík icha iwa okintlakuulti, iwa
ye iwa nochteh non ken kinmitah opaktokah porke okineltokakeh Dios.

³⁵ Ijkuak owaltláneski, n tekiwajkeh okinnawatijkeh n soldadojteh makitatih n tetsak,
para makinakjawa n Pablo iwan Silas. ³⁶ Ijkuakó n tetsak okili n Pablo:

—N tekiwajkeh onechnawatijkeh manomechakjawa, ya weletis nonyaskeh, xiwiah ika
yolsewílistli.

³⁷ Pero Pablo okinmili n tlamokuilawijkeh:

—Tejwah tiromanos, otechwitekeh teixpa iwa amo achto otechtlatsintokijkeh, yej
otechtsakeh; ¿Iwa axa kinekij techkajkawaskeh san ichtaka? ¡Amó! Mawikih yejwah
innewiah matechixtikih.

³⁸ N soldadojteh okinmatiltitoh n tekiwajkeh. Iwa ninteh omaujkeh ijkuak okimatkeh
Pablo iwan Silas noiwa romanos. ³⁹ N tekiwajkeh omotlapojpolwitoh innawak, iwa san
nima okinkixtijkeh de kan otsaktokah iwa okintlalaujijkeh mawiah de non altepetl.
⁴⁰ Ijkuak Pablo iwa n Silas yokiskeh de kan otsaktokah, oyajkeh icha n Lidia. Ijkuak
okimitakeh inmikiwah non kineltokah Cristo Jesús okinyolchikajkeh, iwa satepa oyajkeh
de ompa.

17

Mopajsoloah n tlakah de Tesalónica

¹ Pablo iwa Silas opanokeh ik Anfípolis iwa Apolonia, iwa okalakitoh Tesalónica, kan
okipiyah se insinagoga n judiojteh. ² Pablo, ijko kemi nochipa okichiwaya, oyá kan
sinagoga iwa okintlalnamiktiaya itech nonteh eyi sábado. ³ Iwa okinmajsikamatiltiaya
Cristo tlajjyowiskia, iwa satepa de mikiskia, moyolitiskia oksepa kemi nestok itech
itlajkuilol Dios. Iwa okimiliaya:

—Nin Jesús de akin ne nomechtlapowia, Ye n Cristo.

⁴ Ijkuakó sikimeh judiojteh okineltokakeh n Cristo Jesús, iwa omoseitilijkeh iwan Pablo
iwa n Silas. Noiwa okineltokakeh sikimeh griegojteh non okiweyijkachiwayah Dios.
Miakeh siwameh non okachi okintlakitayah itech non altepetl noiwa otlaneltokakeh
inawak Cristo Jesús. ⁵ Pero sikimeh judiojteh non amo okineltokayah itlajtol Dios, oxiko-
jmikih iwa okintlalalwijkeh sikimeh tlakah tlajtlalolchijkeh non san okitokatinemiah
ojtli para makimpajsolokah n tlakah de non altepetl. Satepa okalakitoh icha n Jasón,
okintemojtinemiah n Pablo iwa n Silas, para kinkixtiskeh iwa kintemakaskeh innak n

tlakah de non altepetl. ⁶ Pero kemi amo okinmajsikeh ompa, okiwikakeh tlaxotonti n Jasón sansikah iwa n oksikimeh tokniwah non kineltokah Cristo Jesús, iwa okimixpantitoh innawak tekiwajkeh, iwa chikaktik otsajtsikeh:

—¡Ninteh tlakah, akimeh tekuatlapololtijtinemih itech nochi n tlaltlákaptli, noiwa yowalajkeh nika! ⁷ Iwa Jasón okinkaloti icha. Nochteh yejwah mach kitlakitah itlanawatil n torey César de Roma, porke kijtoah onka ok se rey non yejwah kiliah Jesús.

⁸ Ijkuak nochteh n tlakah iwa n tekiwajkeh de non altepetl okikakeh tlan okijtojkeh nonteh tlakah, okachi omopajsolojkeh. ⁹ Pero Jasón iwa non oksikimeh tokniwah okitlaxtlajkeh tlan okintlajtlanilijkeh n tekiwajkeh, iwa okinkajkajkeh.

Pablo iwa Silas yawih Berea

¹⁰ Niman non tonati ijkuak otleuyak, n tokniwah non kineltokah Cristo Jesús okintitlankeh n Pablo iwa Silas mawiah kan altepetl de Berea. Iwa san nima ijkuak okalakitoh, oyajkeh kan insinagoga n judíojeteh. ¹¹ Ninteh judíojeteh okatkah okachi yolyamankeh ke non ochantitokah Tesalónica. Ika miak pakílistli okiselijkeh itlajtol Totajtsi Dios. Ixmostla okiamapoaya itlajkuilol Dios para kitaskeh kox milák tlan Pablo iwa n Silas okimiliayah. ¹² Ijkó miakeh judíojeteh okineltokakeh Cristo Jesús, iwa miakeh siwameh iwa tlakah griegos non okachi okintlakitayah itech non altepetl noiwa okineltokakeh. ¹³ Pero ijkuak n judíojeteh non ochantitokah Tesalónica okimatkeh Pablo noiwa yotetlapowijtoka de itlajtol Dios kan altepetl de Berea, oyajkeh okimpajsolotoh n tlakah non ompa ochantitokah. ¹⁴ Pero n tokniwah okilitoh n Pablo mawia de ompa iwa makonana n ojtli non onkisa itempa n weyi atl. Pero n Silas iwa Timoteo ok omokajkeh ompa kan altepetl de Berea. ¹⁵ Akimeh oyajkeh iwa n Pablo, okiwikakeh asta Atenas. Satepa owalmokopkeh de ompa iwa okimilijkeh n Silas iwa n Timoteo, Pablo okinmili san nima mawiah makajsitih ompa.

Pablo yawi kan altepetl de Atenas

¹⁶ Ijkuak Pablo okichixtoka n Silas iwa n Timoteo kan altepetl de Atenas, saikpanoa omoyolkoko porke okitak itech non altepetl sentetl omokejketokah diostsitsinteh non san kinmachijchiwah. ¹⁷ Iwa ijkó, itech n sinagoga omotlapowiaya iwan judíojeteh iwan griegos non okiweyijkachiwayah Dios. Iwa nochi tónati itech tiánkistli okintlapowiaya akimeh ompa omoololoayah. ¹⁸ Sikimeh tlakah ixtlamatkeh non okintokayotiyah epicúreos, iwa n oksikimeh ixtlamatkeh non okintokayotiyah estoicos, opé motlatlajtolkopah iwan Pablo. Sikimeh okimoliayah:

—¿Tlan kineki techilis nin tekajkaya?

Iwa oksikimeh okijtoayah:

—Mati tetlapowijtinemi de oksikimeh diosmeh.

Ijkó okimoliayah porke Pablo okinmatiltiayah n kualitlájtohi de Jesús iwa de kenijki oksepa omoyoliti. ¹⁹ Ijkuakó okikitskijkeh iwa okiwikakeh kan lojar non itoka Areópago, kan nochipa omoololoayah, iwa okitlajtlanilijkeh:

—¿Weletis techyekilis tlan kijtosneki nin yankuik tlamachtílistli non te tikualika?

²⁰ Tiktematiltia tlan ayik tikkaktikateh. Yika, tiknekih tikmatiskah tlan kijtosneki nochi noni.

²¹ Yejwah okinekih kimatiskah tlan kijtosneki porke nochteh n tlakah de Atenas, iwa akimeh san owalajkeh ochanchiwakoh ompa, mach itla ok se okichiwayah, sanwel okiwilitayah kikakiskah noso kijtojtinemiskah itla yankuik tlájtoli.

²² Ijkuakó Pablo, omoketsato tlatlajkotia kan Areópago, iwa okijto:

—Tlakah de Atenas, ne nikita nomejwah nonkinmopantiah nomodiositsiwah. ²³ Porke ijkuak onitlajtlachixtinemia kan nomejwah nonkinweyiliah nomodioswah, onikajsik se artal kan ijkuilitok: “Para n Dios non amo tikixmatih”. Neká akin nomejwah nonkimopantiah maya amo nonkixmatih, Ye n Dios de akin ne nomechtlapowia.

²⁴ N Dios Akin okichijchi n tlaltlákaptli iwa nochi tlan itech onka, Ye iaxka n ilwikak iwa n tlaltlákaptli. Ye amo chanti itech tiopameh non kinmachijchiwah n tlakah, ²⁵ nion onka itla

tlan weletis kimakaskeh n tlakah, porke Ye amitla kipoloa, Ye Akin kichiwa matiyolitokah, iwa techmaka toijyotilis, iwa nochi tlan onka wits de Ye.

²⁶ 'San itech se, Dios okinchijchi nochteh n tlakah para mamochajchantikah ipan nochi n tlaltikpaktli. Iwa Ye okitlali kech xiwitl yolitoskeh iwa kan kipiah mochantiskeh. ²⁷ Dios ijko okichi, para n tlaltikpaktlakah makitemokah iwa maya san makimatemokah, makajsikah. Maya milak se makijto, Dios amo wejka kajki de tejwah tinochteh. ²⁸ Porke itech Dios tikateh, timoliniah iwa tiyolitokeh. Asta sikimeh tlajkuiloanah okijtojkeh: "Tejwah titepilwah de Dios." ²⁹ Yika, tla tejwah titepilwah de Dios, amo matikmolikah Dios kemi se tlamachijchiwali non tlakah kichijchiwah de oro, plata, noso tetl kemi yejwah kiyejyekoliah tlachixtok. ³⁰ Ya wejkawitl, Dios okintlapojpolwi ika tlan okichijtinemiah n tlaltikpaktlakah, porke amo okimatiah tlan amo kuali okichiyawah. Pero axa itech ninteh tonatijmeh, Dios kinnawatia nochteh n tlaltikpaktlakah makikawakah nochi tlan amokuali kilnamiktinemih iwa kichijtinemih iwa san Ye makitlakitakah. ³¹ Porke Dios yokitlali se tonati ijkuak tlaixkomakas. Ye kichiwas porke Ye yolmilajka iwa kitlalis n Cristo Jesús makichiwa nin tekitl, akin Ye yowejka okipéjpenki. Iwa tinochteh otikmatkeh Dios yokipéjpenki n Jesús ijkuak okiyoliti.

³² Pero ijkuak okikakeh non yomikkeh moyolitiskeh, sikimeh san okiwetskakeh iwa oksikimeh okijtoayah:

—Ok se tonati timitskakiskeh.

³³ Ijkuako Pablo okinkakajte. ³⁴ Pero sikimeh tlakah okineltokakeh itlajtol Dios iwa oyajkeh iwan Pablo. Seme de yejwah itoka Dionisio, akin noiwa okatka tlayákanki kan Areópago, noiwa se siwatl non itoka Dámaris, iwa miakeh oksikimeh.

18

Pablo yawi kan altepetl de Corinto

¹ Satepa, Pablo okiski de Atenas iwa oyá kan altepetl de Corinto. ² Ompa okajsito se israelita non itoka Aquila, non owalewatoka de Ponto. Ijkuako ayamó okachi owejkawaya, n Aquila iwa isiwa Priscila owalajkeh de Italia porke n rey Claudio otlanawati makisakah de Roma nochteh n judíojteh. Ijkuako n Pablo oyá okintlajpaloto. ³ Iwa kemi Pablo noiwa oweletia okinchijchiwaya manteadojkalmeh kemi yejwah, omoka inwah iwa otekitiah sansikah. ⁴ Iwa nochi sábadó ijkuak mosewia n judíos Pablo okintlapowiyah itech sinagoga, iwa miakeh judíojteh iwa griegos okineltokayah itlajtol Dios.

⁵ Ijkuak Silas iwa Timoteo okalakikoh de Macedonia, Pablo okachi okimosenmák iteki; otetlapowiaya de n kualitlajtol de Dios iwa okimiliaya Jesús Ye n Cristo akin okichixtokah. ⁶ Pero n judíojteh okualankeh iwa opé kiwijwikaltiah, ijkuako n Pablo inmixpa okitsejtselo itlake para makitakah noiwa okualanki iwa okinmili:

—Amo notlajtlakol tla amo nonmomakixtia; ne ayakmó nikpia tlan nikitah. Okachi kuali manomechkawa iwa manio manikinmatiltiti itlajtol Dios non amo judíojteh.

⁷ Okiski de kan sinagoga iwa oyá icha n se tlakatl non itoka Justo, ye okiweyijkachiwaya Dios. Nin tlakatl ochantitoka inakastla n sinagoga. ⁸ Iwa Crispo, se tlayákanki itech sinagoga, okineltokah n Toteko sansikah iwa nochteh ichantlakawah. Noiwa miakeh tlakah de Corinto, ijkuak okikakeh itlajtol Dios, okineltokakeh iwa omokuaatekijkeh. ⁹ Ijkuako, se yúali n Toteko okili n Pablo itech itejtemikilis:

—Amo ximawi, xiktematilti notlajtol iwa ayik ximosotlawa. ¹⁰ Porke Ne nika mowa iwa amaka weletis itla mitstoktis, porke nikimpia miakeh akimeh nechneltokah itech nin altepetl.

¹¹ Yika Pablo omoka Corinto, iwa ompa okitematilti itlajtol Dios se xiwitl iwa n tlajko.

¹² Pero itech n tonatijmeh ijkuak Galión gobernador kan tlalmeh de Acaya, n judíojteh omotlatlalwijkeh iwa oonewakeh ipan Pablo. Okiwikakeh inawak tekiwa, ¹³ iwa okilijkeh n gobernador:

—Nin tlakatl kintlatlalwijtinemi nochteh n tlakah makiweyijkachiwakah Dios, pero amo kemi totlanawatilis kijtoa.

¹⁴Pablo ya tlajtoskia, ijkuak Galión okinmili n judíojteh:

—Techkakikah judíojteh, tla nin tlakatl kichiwaskia itla tlan amokuali noso tla temik-tiskia, nika nika para nomechkakis. ¹⁵Pero san tekil nonkipoah tlan nin tlakatl kitemachtia, ika tlájtoltel de tlakah iwa de nomotlanawatilwah, ompa nomejwah xikitakah. Ne amo nikneki niyetos niteyolsewi itech nomotlanawatilwah.

¹⁶Iwa okwalinkixti de kan jugado. ¹⁷Ijkuakó nochteh n griegos okimokitskilijkeh n Sóstenes, tlanawati itech sinagoga, iwa okiwitekeh ompa ixpa n tlanawati Galión. Pero Galión omochi kemi amo okitak.

Pablo mokopa Antioquía

¹⁸Pablo ok omoka Corinto miakeh tonatijmeh. Satepa omomaaka innawak tokniwah non kineltokah Cristo Jesús, iwa oyá kan tlali de Siria sansikah iwan Priscila iwa n Aquila. Ijkuak ya onewaskia de Cencreas, omokúaxinki porke yokitemakaka itlajtol inawak Dios. ¹⁹Ijkuak okalakitoh kan altepetl de Éfeso, Pablo okinkajteh n Priscila iwa Aquila, iwa oyá kan sinagoga, omotlapowito iwan judíojteh non ompa oomooloayah. ²⁰Yejwah okitlatlautijkeh n Pablo mamokawa ok kech tonati inwah, pero mach okinek. ²¹Ijkuakó omomaaka inwah iwa okinmili:

—Tla Dios kimonekiltia, oksepa niwits nomechontlajpaloki.

Iwa oyá de Éfeso itech barko. ²²Ijkuak okalakito kan altepetl de Cesarea, Pablo otlejkok Jerusalén okintlajpaloto n tokniwah non ompa oomooloayah, iwa satepa oksepa owaltemok kan altepetl de Antioquía. ²³Satepa ijkuak yowejka ompa okatka, oksepa okiski iwa opapanotia itech n altepemeh de Galacia iwa Frigia. Iwa okinyolchikajtiaya nochteh n tokniwah.

Apolos tetlapowia de itlajtol Dios kan altepetl de Éfeso

²⁴Itech nekateh tonatijmeh se israelita non itoka Apolos, non owalaya de se altepetl non itoka Alejandría, oajsiko kan altepetl de Éfeso. Ye okimatia otenonotsaya iwa kuali okixmatia itlajkuilol Dios. ²⁵Ye kuali okimachtijkeh itlamachtilis Toteko, iwa ijkuak otenonotsaya, kualsi otetlapowiaya. Okitemachtia de Jesús ika miak chikawálistli, maya ye sanwel okixmatia n tlakuaatekílistli non Juan okitemachtli. ²⁶Apolos opé tetlapowia ika miak yolchikawálistli. Pero ijkuak n Priscila iwa Aquila okikakeh, okinotskeh iwa okiyekajsikamatiltijkeh itlamachtilis Dios. ²⁷Satepa ijkuak Apolos okijto yas kan tlali de Acaya, n tokniwah okiyolchikajkeh mawja ompa, iwa okintitlanilijkeh se amatlajkuiloli n tokniwah non kineltokah Cristo Jesús non okatkah de Acaya para kuali makiselikah n Apolos. Ijkuak okalakito Acaya, okimpalewi miak akimeh Dios ika itlasojtlalis okichi matlaneltokakah itech Cristo. ²⁸Apolos omonanankiliaya iwan judíojteh non amo okineltokaya Jesús, iwa ika itemachtilis n tiotlajkuiloli okinnextiliaya Jesús okatka n temakixti.

19

Pablo yawi kan altepetl de Éfeso

¹Ijkuak Apolos ok okatka Corinto, Pablo okintlajpalojtiah kan ik altepemeh non kateh okachi tlakpak, asta okalakito kan altepetl de Éfeso. Ompa okinmajsito sikimeh tokniwah non kineltokah Cristo Jesús. ²Iwa okintlajtlani:

—¿Ononkiselijkeh n Espíritu Santo ijkuak ononkineltokakeh Cristo Jesús?

Yejwah okinankilijkeh:

—Ayik tikkaki kox onka Espíritu Santo.

³Ijkuakó n Pablo okintlajtlani:

—¿Tlan tlakuaatekílistli ononkiselijkeh?

Yejwah okinankilijkeh:

—N tlakuaatekílistli non Juan okitemachtli.

⁴Pablo okinmili:

—Milák, Juan okinmiliaya n tlakah mamokuaatekikah iwa makiteititikah yejwah de milajka okinekiah kikawaskeh tlan amo kuali okichijtinemiah, pero okimiliaya omonekiah kineltokaskeh akin walaskia satepa de ye, kijtosneki makineltokakah n Cristo.

⁵ Ijkuak okikakeh tlan Pablo okinmili, omokuaatekijkeh itech Itoka n Toteko Jesús. ⁶ Iwa ijkuak Pablo okintlali imawah impah, n Espiritu Santo owala intech iwa opé tlajtoah ika oksikimeh tlájtoltel iwa okitematiltijkeh tlan Dios okimiliaya tlamochiwaskia. ⁷ Yejwah okatkah kemi májtlaktli iwa n ome tlakah.

⁸ Eyi mestli Pablo oyaya kan se sinagoga. Ye ompa okitematiltiaya itlajtol Dios ika miak yolchikawálistli. Okinnonotsaya n judíojeteh noiwa makalakikah kan Dios tlanawatijtok. ⁹ Pero sikimeh oyoltlakuawakeh iwa mach okineltokakeh itlajtol Dios, yej teixpa otlajtoayah fiero de n kualitlájtohi. Ijkuakó Pablo omoxelo de yejwah, iwa okinwik n tokniwah kan se kali kan momachtilo de se tlakatl non itoka Tirano, iwa ixmostla ompa omotlapowiyah. ¹⁰ Ome xiwitl otetlapowi de itlajtol Dios, iwa ijko nochteh non ochantitokah itech tlalmeh de Asia, n judíojeteh iwa non amo judíojeteh okikakeh itlajtol n Toteko Jesús. ¹¹ Iwa Pablo okinchiwaya wejweyih milagros ika iweletilis Dios. ¹² Iwa asta sikimeh pañojteh noso tsótsolteh non Pablo okintelkojka, okinwikiliayah inkokoxwah, iwa ijkuak okintlaliliayah impah, n kokoxkeh opajtiah iwa n espíritus amokualteh okisayah de intech.

¹³ Pero sikimeh judíojeteh non okinkixtiayah espíritus amokualteh, noiwa okinekiah kinkixtiskel n espíritus amokualteh ika Itoka n Toteko Jesús, iwa ijki okimilijkeh n espíritus amokualteh:

—Ika Itoka n Jesús non Pablo kitematiltia tomechnawatiah, xikisakah!

¹⁴ Ijko okichiwayah chikome itelpochwah se tlakatl non itoka Esceva, akin okatka se tiópixki israelita non okachi otlayakantoka. ¹⁵ Pero ijkuak ijko okichijkeh, n espíritus amokuali okinnankili:

—Nikixmati n Jesús, iwa nikmati akin Pablo; ¿pero akimeh nomejwah?

¹⁶ Iwa san nima ijkuak ijko okinmili, n tlakatl non okipixtoka n espíritus amokuali omokajka impah, iwa kemi non amokuali espíritus okatka satlawel chikaktik, nochteh okinwitek iwa sa okicholilijkeh de non kali xipetstikheh iwa sa ejestikheh. ¹⁷ Nochteh non ochantitokah Éfeso, judíojeteh iwa amo judíojeteh, okimatkeh iwa satlawel omomojtijkeh, iwa okiyektenewayah Itoka n Toteko Jesús.

¹⁸ Noiwa miakeh non okineltokakeh Cristo Jesús owalayah iwa okimokuitiayah tlan amokuali okichiwayah. ¹⁹ Noiwa miakeh non otetlajchiwayah, okwalinwikakeh intlajkuilolwah non intech omomachtayah para tetlajchiwiskeh iwa teixpa okinchichinojkeh. Iwa ijkuak okiyejekolijkeh kech impati nonteh tlajkufulolteh, okijtojkeh ome póali iwa n májtlaktli mil (50,000) platajtomí. ²⁰ Ijko itlajtol Totajtsi okachi omoxitiniaya iwa okitenextiaya iweletilis.

²¹ Satepa ijkuak nochi ni yopanok, Pablo okitlali itech iyolo yas para Macedonia iwa Acaya iwa asta kalakiti Jerusalén. Noiwa okimoliaya yaskia Roma. ²² Ijkuakó Pablo okintítlanki ome itlakawah mawiah Macedonia, Timoteo iwa Erasto, porke ye ok mokawaskia kech tonati itech tlalmeh de Asia.

Kualankamikh n tlakah de Éfeso

²³ Itech nekateh tonatijmeh opé mokuakualaniah n tlakah por n kualitlájtohi de Dios. ²⁴ Otlapewalti se tlakatl non itoka Demetrio, non okinmachijchiwaya ika plata tiopantsitsinteh de se diosa non itoka Diana, iwa akimeh otekitiah para Demetrio kuájkwali tomi okitlaniah. ²⁵ Demetrio okinmoololo itlakawah iwa oksikimeh tlakah non noiwa okitekitiah n plata, iwa okinmili:

—Tlakah, nomejwah kualí nonkimatokeh kualí tiktlanih ika nin tekítl non tejwah tikchiwah. ²⁶ Pero ijko kemi nomejwah nonkithah iwa nonkikakih, nin tlakatl non itoka Pablo kijtojinemi n diostsitsinteh non san kinmachijchiwah n tlakah, amo milák diosmeh. Iwa miakeh tlakah yokineltokakeh tlan kimilia, iwa amo san non de nika Éfeso, yej noiwa itech nochteh altepemeh non kateh kan tlalmeh de Asia. ²⁷ Semi amokuali tlan

kichijtinemi, porke weletis tikpoloskeh toteki iwa itiopa n todiosa Diana ayakmó ok kitlakitaskesh. Iwa nin diosa non nochteh n tlakah de Asia iwa de nochi n tlaltl'k'paktli kiweyiliah, kipolos iweyilis iwa mach ok kiweyiliskesh.

²⁸ Ijkuak okikakeh nin tlájtoli, okualankamikeh iwa opé tsajtsih:

—¡Matikweyilikah n Diana, todiosa de Éfeso!

²⁹ Ijkó, n tlakah de non altepetl okualankamikeh. Okikitskijkeh n Gayo iwa Aristarco, ome tlakah de Macedonia non oyayah iwan Pablo, okintlaxotontiajkeh asta kan kali kan yejwah omoolooyah. ³⁰ Pablo okinekia kalakis ompa para kintlapowis n tlakah, pero n tokniwah non kineltokah Cristo Jesús mach okikawilijkeh. ³¹ Noiwa sikimeh tekiwajkeh de Asia non inwah omowikaya n Pablo, otlatitlankeh makilitih n Pablo amo makalaki ompa kan oololitokeh. ³² Pero ompa kan oololitokah, san de miak okijtoyah, iwa miakeh nion amo okimatiah tleka ompa okatkah. ³³ Pero sikimeh judíojteh okwalkixtijkeh n Alejandro iwa okiketsatoh tlayakapa. Alejandro okiketski ima para ayakmó matsajtsikah, iwa ijko weletis motlajtolpalewis inawak nonteh tlakah. ³⁴ Pero ijkuak n tlakah okimatkeh Alejandro okatka israelita, nochteh otsajtsikeh iwa ijko otsajtsitokah kemi ome ora:

—¡Maweyixto n Diana, todiosa de Éfeso!

³⁵ Ijkuak n tekiwa non kinmijkuiloo amameh itech non altepetl owéletki okintlakawalti n tlakah de Éfeso, okinmili:

—Tlakah de Éfeso, nochteh kimatokeh tejwah tikmokuilawiah itiopa n Diana noiwa tikmokuilawiah itlamachijchiwal Diana non owetsiko de ilwikak.* ³⁶ Iwa kemi amo onka se akin weletis kijtos amo milák, ayakmó okachi xikualanikah iwa amitla xikchiwakah tla amo nonkimatih tlan nonkichiwah. ³⁷ Porke ninteh tlakah non nomejwah ononkualinwikakeh, amitla fiero okitenejkeh de todiosa nion itla okichtekilijkeh kan itiopa. ³⁸ Tla Demetrio iwa itlakawah kinekih kiteiliskesh aka, yika onkateh tekiwajkeh kan moteiliskesh. ³⁹ Iwa tla owijtitok tlan nomejwah nonkitlajtlanih, nonkipiah de nonyaskesh nonmoyektlatiweh innawak tekiwajkeh. ⁴⁰ Porke tla amó, ika tlan axa opanok weletis techteiliskesh iwa kijtoskeh tikimpajsojtinemih n tlakah; iwa amitla tikpiah tlan ika weletis timotlajtolpalewiskeh.

⁴¹ Satepa, ijkuak yotlanki okintlapowi, okinmili mawiah nochteh non ompa omoolojkeh.

20

Pablo oyá Macedonia iwa Grecia

¹ Ijkuak nochteh n tlakah omoyolsewijkeh, Pablo okínnotski n tokniwah non kineltokah Cristo Jesús. Okinyolchika iwa satepa omomaaka inwah iwa oyá Macedonia. ² Pablo okintlajpalajtia nochteh n tokniwah non ochantitokah itech nekateh tlahmeh, iwa ika miak tlájtoli okinyolchikajtiaya asta okalakito Grecia. ³ Ompa omoka eyi mestli, iwa sa okichixtoka tonati para tlejkos itech barko iwa kalakiti kan tlali de Siria, keman okima n judíojteh okinekia kimiktiskesh, okisentlali oksepa panos ik Macedonia. ⁴ Pablo oyaya iwan Sópater de Berea, Aristarco iwa n Segundo non owalewatokah de Tesalónica, Gayo iwa n Timoteo de Derbe, Tíquico iwa n Tróximo non owalewatokah de Asia. ⁵ Ninteh tokniwah otlayakankeh iwa otechchiatoh kan altepetl de Troas. ⁶ Pero tejwah otikiskesh de Filipos satepa de opanok n ilwitl de Paskua ijkuak mokua n paj non amo kipia levadura, iwa otiajkeh itech barko iwa ipan mákuili tonati otikinmajsitoh Troas. Ompa otimokajkeh chikome tonati.

Pablo konintlajpaloa non kateh kan altepetl de Troas

⁷ N domingo otimoolojkeh para tiksepankuaskeh n paj, iwa Pablo okinmachtijtoka n tokniwah non kineltokah Cristo Jesús. Iwa kemi Pablo onewaskia ijkuak tlanesiskia, yika okinmachi asta tlajko yuak. ⁸ Pablo otechmachtijtoka itech se cuarto non okatka tlapak. Non cuarto okimpiaya miakeh tláwilteh. ⁹ Se télpochtli non itoka Eutico oewatoka

* 19:35 se meteorito

kan bentana. Iwa kemi Pablo owejka otemachtijtoka, n télpochtli okochtlamila iwa owalwetsiko desde ipan eyi piso, iwa ijkuak okajkokuitoh yomikki. ¹⁰ Ijkuakó n Pablo otemok, omoixtlapacho ipan télpochtli okinawajtek iwa okinmili n tokniwah:

—Amo ximomojtikah, ye yolitok.

¹¹ Otlanki n Pablo oksepa otlejkok kan kuarto, okitlajkotlápanki n paj, iwa okisepankua-
jkeh iwa oksepa okintlapowi asta otláneski. Iwa satepa oyá. ¹² N télpochtli okiwikakeh
yolitok, iwa nochteh okachi omoyolchikajkeh.

Pablo kisa de Troas iwa yawi Mileto

¹³ Tejwah otitlayakankeh itech barko iwa otikalakitoh kan altepetl de Asón, ompa
otiknotikiskeh n Pablo, ijko kemi otimokajkeh iwa, porke ye okinek nejnemis. ¹⁴ Ijkuak
otimajsito iwan Pablo kan altepetl de Asón, otlejkok towah itech barko iwa sansikah
otiajkeh para Mitilene. ¹⁵ Otikiskeh de ompa, iwa ijkuak owalmostatik otipanokeh
inakastla n isla de Quío, iwa itech ok se tonati otikalakitoh kan altepetl de Samos, kan
onkalakiah n barkojteh. Otimosewijkeh itech altepetl non itoka Trogilio, iwa ijkuak
owalmostatik otikalakitoh Mileto. ¹⁶ Ijko otikchijkeh, porke Pablo amo okinek panos ik
Éfeso, para amo mokawas miakeh tonatijmeh kan talmeh de Asia, porke ye okinekia san
nima onajsiskia Jerusalén, para ompa yetos itech tonati de pentecostés.

Pablo kintlapowia n tlayakankeh kan moololoah ompa Éfeso

¹⁷ Ijkuak Pablo yokatka kan altepetl de Mileto, otlatítlanki makinnotsatih n tokniwah de
Éfeso non tlayakantokeh non kineltokah Jesús. ¹⁸ Ijkuak owalajkeh okinmili:

—Nomejwah kualí nonkimatokeh kenijki nimoyekwika nomowah desde neká tonati
ijkuak onikalakiko nika Asia. ¹⁹ Ne miak yonitekitek inawak Toteko Jesús, iwa itech nochi
oniktlakitak. Miak welta onichokak iwa miak onitlajyowi por tlan onechtoktijkeh n
judíojeteh. ²⁰ Amayik onimosotla nomechmatiltis tlan nomechpalewis para nonyekne-
miskeh. Iwa teixpa onomechmachi iwa itech nomocha. ²¹ Ne nochteh onikinnonotski,
n judíojeteh iwa non amo judíojeteh, nochteh onikinmili ayakmó makichiwakah tlan amo
kuali iwa manemikah kemi Dios kimonekiltia iwa makineltokakah Toteko Cristo Jesús.
²² Iwa axa n Espiritu nechwika Jerusalén, iwa mach nikmati tlan nechchia ompa. ²³ Sanwel
nikmatok itech nochteh n altepemeh kan ik nio, n Espiritu Santo nechilia sa nechchixtok
telpiloya kan nechtsakuaskeh iwa miak tlajjyowílistli nechchia. ²⁴ Pero amitla ok se
nechtekipachoa, nion manimikki. Ne sanwel niknekiskia nikchiwas nochi tlan Toteko
Cristo Jesús onechnawati manikchiwa. Kijtosneki manitetlapowi de n kualitlajtoli non
techmatiltia kenijki Dios satlawel techtlasojtla.

²⁵ Iwa axa kualí nikmatok nion seme de nomejwah, akimeh onomechmatilti tlan
Dios kimonekiltia, oksepa nechitas. ²⁶ Yika nikneki axa nomechilis nik amo notlajtlakol
tla aka amo momaxitistis. ²⁷ Porke ne onomechmatilti nochi tlan Dios kimonekiltia,
iwa amitla onomechtlaatili. ²⁸ Yika, ximotlachilikah nomejwah iwa xikinyekwikakah
nomokniwah non kineltokah Cristo Jesús, porke n Espiritu Santo onomechtlati kemi
nontlajpixkeh para xikinyakanakah akimeh kineltokah n Toteko Jesús, non Ye okinko
ika iesso. ²⁹ Porke kualí nikmatok ijkuak ne nias, witseh sikimeh tlakah xolópijeh
kintlajtlamiskah n tokniwah porke yejwah mokopah kemi kokoyomeh tekuanimeh non
kintlajtlamiah n ichkameh. ³⁰ Iwa itech nomejwah kisaskeh akimeh kitemachtiskah tlan
amo milák, para kinyakanaskeh akimeh kineltoka Dios. ³¹ Ijko kiné, ximotlachilikah, iwa
kualí xikilnamikikah itech eyi xiwitl onomechnonotsaya, tlajka iwa n yuak, iwa maya
onichokaya ayik onimosotla.

³² Iwa nokniwah, nomechkawa imak Dios iwa imak itlatiochiwaltlajtol non
kipia weletílistli para nomechylchikawas iwa nomechmakas se lojar iwa akimeh
omotemakakeh inawak. ³³ Amaka onikelewili itomi nion itlake, ³⁴ yej kualí nonkimatokeh
onitekitek ika ninteh nomawah para nikmotlanilis tlan ika nipanotos, ne iwa
akimeh okatkah nowa. ³⁵ Nochipa onomechititi kenijki moneki nontekitiskah para
nonkimpalewiskeh akimeh amitla kipiah, iwa xikilnamiktokah tlan okijto n Toteko

Jesús: “Okachi makipia pakílistli n tlakatl non tlapalewia ika tlan kipia, iwa amo akin kipalewiah.”

³⁶ Ijkuak ijko okijto n Pablo, omotlankuáketski iwa omotiotsajtsili iwan nochteh tokniwah de Éfeso. ³⁷ Nochteh ochokakeh, okinawajtekeh iwa okitennamikeh n Pablo. ³⁸ Iwa saikpanoa omoyolkokojkeh porke n Pablo okinmili ayakmó kitaskiah. Satepa okimakawatoh kan barko.

21

Pablo yawi Jerusalén

¹ Ijkuak otikinkajtejkeh, otitlejkokeh itech se barko iwa milaktik otiajkeh kan isla de Cos. Ijkuak owalmostlatik otiajkeh kan isla de Rodas, iwa de ompa otikalakitoh kan altepetl de Pátara. ² Ompa itech non altepetl otikajsikeh se barko non oyaya para Fenicia, otitlejkokeh itech barko iwa otiajkeh. ³ Ijkuak onejmentoka n barko, otiktakeh n isla de Chipre non otikpanawijkeh ik toopochma iwa otikonmilajkeh para Siria asta otikalakitoh kan altepetl de Tiro ken ompa kitlatemowiliskiah itlamamal n barko. ⁴ Ompa otikinmajsikeh sikimeh tokniwah, iwa otimokajkeh inwah chikome tonati. Yejwah okilijkeh n Pablo amo mawia Jerusalén, ijko kemi okinnejmacthi n Espiritu. ⁵ Pero ijkuak owalchikometik otikiskeh de ompa. Nochteh tokniwah non kineltokah Cristo Jesús iwa insiwawah iwa impilwah, otechmakawatoh itempa n weyi atl, iwa ompa otimotlankuaketskeh iwa otimotiotsajtsilijkeh. ⁶ Ijkuakó otimonanawajtekeh, iwa otimomakajkeh iwa otitlejkokeh itech barko iwa yejwah omokopkeh incha.

⁷ Satepa otiajkeh okachi tlayakapa iwa otikalakitoh kan altepetl de Tolemaida. Ompa otikintlajpalojkeh n tokniwah iwa otimokajkeh inwah se tonati. ⁸ Ijkuak owalmostlatik, otikiskeh de ompa iwa otikalakitoh kan altepetl de Cesarea. De ompa otiajkeh icha n Felipe, non otetlapowiaya n kualitlájtohi de Dios. Ye se de n chikome non okintlamakayah n tokniwah de Jerusalén. Ompa otimokajkeh icha. ⁹ Felipe okimpiaya nawi ichpochwah non ayamó omonamiktiayah. Yejwah okitematiltiayah tlan okiselayah de Dios. ¹⁰ Yotikatkah kech tonati ompa ijkuak oajsiko de Judea se profeta non itoka Ágabo, ¹¹ non owala otechtlajpaloko. Ye okontflanki n kuiflaxtli non ika omotlajkoilpiaya n Pablo, okimilpi ikniwah iwa imawah iwa okijto:

—N Espiritu Santo kijtoa, nepa kan altepetl de Jerusalén, n judíojech ijki kiijlispiseh n tekowa de nin kuiflaxtli iwa kitemaktiskeh inmak n tlakah non amo judíojech.

¹² Ijkuak otikkakeh tlan okijto n Ágabo, tejwah iwa non de Cesarea otiktlatlajtojkeh n Pablo amo mawia Jerusalén. ¹³ Pero Pablo otechnankili:

—¿Tleka nonchokah iwa nonkichiwah manimoyolkoko? Ne amo nimawi tla nechijlispiseh noso tla nechmiktiskeh ompa Jerusalén por niktematiltijtinemi Itoka n Toteko Jesús.

¹⁴ Iwa kemi amo okinek techkakis, otikkajkeh iwa sa otikijtojkeh:

—Mamochiwa tlan Dios kimonekiltis.

¹⁵ Ijkuak yopanokeh kechmeh tonatijmeh, otimotlatlalijkeh iwa otiajkeh Jerusalén. ¹⁶ Iwa oyajkeh towah sikimeh tokniwah de Cesarea, yejwah okwalikayah se tlakatl de Chipre non itoka Nasón, nin tlakatl yowejka okineltokaya n Cristo Jesús iwa ye techkalotiskia icha.

Pablo kontlajpaloa n Jacobo

¹⁷ Ijkuak otikalakitoh Jerusalén, n tokniwah non kineltokah Cristo Jesús otechselijkeh ika pakílistli. ¹⁸ Ijkuak owalmostlatik, otiajkeh iwan Pablo otiktalajpalotoh n Jacobo, noiwa ompa okatkah nochteh n tokniwah tetajmeh non tlayakantokeh kan omoololoyah. ¹⁹ Pablo okintlajpalo iwa okintlapowi nochi tlan Dios okichi innawak non amo judíojech ika iteki non Totajtsi Dios okimaktili. ²⁰ Ijkuak okikakeh nochi tlan Pablo okintlapowi, okiweyijkachijkeh Dios. Iwa okilijkeh:

—Toknitsi Pablo, yotikitak onkateh miaktikeh judíojech non yotlaneltokakeh, pero nochteh yejwah kijtoah moneki matiktalakitakah itlanawatil Moisés. ²¹ Iwa yokimilijkeh

tejwatsi tikinmacthia nochteh n judíojteh non chantitokeh itech oksikimeh altepe-meh, iwa ayakmó makitlakitakah tlan Moisés otlanawati. Noiwa kijtoah te tikinmilia amo makinsirkunsidarokah impilwah nion makichiwakah tlan otechititijkeh totatawah. ²² ¿Tlan tikchiwaskeh? Porke n tlakah moololoskeh ijkuak kimatiskeh otiwala. ²³ Okachi kuali ijki xikchiwa: Nika kateh towah nawi tlakah akimeh yokitemakakeh intlajtol inawak Dios. ²⁴ Xikinwika mowah iwa ximochipawati inwah inawak Dios iwa xiktlaxtlawa para makinkuaximakah. Ijko nochteh kimatiskeh mach milák tlan okintlatapowijkeh, yej kitaskeh tejwatsi noiwa tiktlakita itlanawatil Moisés. ²⁵ Pero n tokniwah non kineltokah Cristo Jesús non amo judíojteh, yotikintlajkuililijkeh iwa otikinmilijkeh amo makintekipacho nochi ni, sanwel amo makikuakah nakatl non yokinmanilijkah n diosmeh non kinmachijchiwah, nion estli, nion nakatl de yolkameh non san kintoskapatskah. Iwa amaka non yomonamikti mamomekatijtinemi.

Kikitskiah n Pablo kan Weyi Tiopa

²⁶ Ijkuakó Pablo okinwík nonteh nawi tlakah, iwa ijkuak owaltláneski sansikah omochipajkeh. Otlanki okalak kan Weyi Tiopa okimilito tlan tonati tlamis mochipawaskeh, iwa kemia kinmiktiskeh n yolkameh para kinmaniliskeh Dios.

²⁷ Pero ijkuak yokitlamiayah chikome tonati de omochipajtokah, sikimeh judíojteh non owalajkeh de Asia okitakeh n Pablo kan Weyi Tiopa iwa opé kimpajsoloah n tlakah. Okikitskijkeh n Pablo ²⁸ iwa otsajtsikoh:

—¡Tlakah de Israel, techpalewukah! Ye nin tlakatl akin sentetl kitemachtijtinemi matikinmixnamikakah itlanawatilwah Moisés, iwa amo matitlakitakah toweyi Tiopa. Iwa axa noiwa yokinkalaki itech toweyi Tiopa sikimeh griegos, iwa okipochewakoh nin chipawak Tiopa.

²⁹ Ijko okijtoayah porke ompa Jerusalén, yokitakah n Pablo iwa Trófimo non owalewawaka de Éfeso; yika okimoliayah Pablo noiwa yokikalakijka kan Weyi Tiopa.

³⁰ Nochteh n tlakah omopajsolojkeh, iwa owalmoololojtiwetskeh. Ijkuakó okikitskijkeh n Pablo, okitlaxotontiajkeh iwa okikixtijkeh de kan Weyi Tiopa, iwa okintsaktiwetskeh ikaltenwah. ³¹ Ya kimiktiskiah n Pablo ijkuak n soldado tlayákanki romano okima nochteh n tlakah de Jerusalén opajsolitokah. ³² San nima n soldado tlayákanki okinmoololo isoldadojwah iwa okintlelochi kan omopajsolojtokah. Ijkuak n tlakah okitakeh n soldado tlayákanki iwa isoldadojwah, okikajkeh n Pablo iwa ayakmó okiwitekeh. ³³ Ijkuak n soldado tlayákanki okalakito, okikitski n Pablo iwa otlanawati makiiijlpikah ika ome kadenajteh. San nima n soldado tlayákanki okintlajtlani akin ye iwa tlan okichi. ³⁴ Kemi nochteh otsajtsiah, n soldado tlayákanki amitla okajsikamatia, yika otlanawati makitsakuatih n Pablo. ³⁵ Ijkuak okalakitoh kan kitsakuaskiah n Pablo, n soldadojteh sa okikechpanojtiayah porke n tlakah saikpanoa okualantokah. ³⁶ Iwa nochteh owaltsajtsiwalayah inkuitlapa:

—¡Mamikki!

Pablo motlajtolpalewia inmixpah n tlakah

³⁷ Ijkuak ya kikalakiskiah kan kuártel, Pablo okili n soldado tlayákanki:

—¿Weletis nimitsontlapowis?

N soldado tlayákanki okinankili:

—¿Titlajtoa griego?

³⁸ Ijkuakó n soldado tlayákanki okili:

—¿Amo te n egipcio non yowejka otikixnamik n weyi tlanawati, iwa otikinwík nawi mil temiktijkeh kan tlaltejtéyinki?

³⁹ Pablo otlanankili:

—¡Mach ne! Ne niwalewatok de Israel, iwa onitlákakati kan altepetl de Tarso, non altepetl weyi kijtosneki itech tlali de Cilicia. Pero nimitstlatlaujtia techonkawili manikintlapowi n tlakah.

⁴⁰N soldado tlayákanki okikawili matlajto, iwa n Pablo omóketski kan nochteh kitaskiah, iwa ika ima okintlakawaltih n tlakah. Ijkuakó nochteh san owalmokajkeh iwa Pablo opé tlajtoa ika hebreo, iwa okinmili:

22

¹—Nokniwah iwa tetajmeh, xikkakikah tlan ika nimotlajtolpalewis nomonawak.

²Ijkuak okikakeh okintlapowiaya ika tlájtoli hebreo, san owalmokajkeh. Iwa n Pablo okinmili:

³—Ne ni judío. Onitlákati kan altepetl de Tarso non kajki kan tlali de Cilicia, pero onimoskalti nika Jerusalén, iwa Gamaliel onechixtlamachtli itlanawatilwah totatawah. Nochipa nimochijchikawa niktekitilia Dios ika nochi noyolo, ijko kemi nochteh nomejwah nonkichiwah. ⁴Ya wejkawitl, ne onikintotojtokaya akimeh okitlakitaya itemachtilis n Toteko Jesús, iwa por notlajtlakol miakeh okinmiktijkeh. Ne onikinkitskiaya tlakah iwa siwameh iwa onikintsakuaya. ⁵N tiópixki non okachi tlayakantok iwa nochteh n tetajmeh non tlayakantokheh kual kimatokeh ijko onikchiwaya. Porke yejwah innewiah onechinmakayah amatlajkuílotheh para manikinkitski n tokniwah judíojteh non chanchiwayah Damasco. Yika onia onikintemoto n tlakah non kineltokah Cristo Jesús para nikualinwikas nika Jerusalén para makintlaijowiltikah.

Pablo kintlapowia kenijki okineltokah Jesús

(Hch. 9:1-19; 26:12-18)

⁶Se tonati ijkuak oniaya itech ojtli, kemi ik tlajko tonati iwa yononkalakia Damasco, se chikawak tlawilnextlistli non owalaya de ilwikak onechyawalo. ⁷Ijkuakó oniwetsito ixko tlali iwa onikak se tlájtoli non onechiliaya: “Saulo, Saulo, ¿tleka techtotojtoka?”

⁸Ne onitlanankili: “¿Akin Tejwatsi?” Ye onechnankili: “Ne Jesús de Nazaret akin te tiktotojtoka.” ⁹Non oyayah nowa okitakeh n tláwili iwa omomojtijkeh, pero mach okikakeh n tlájtoli akin onechtlapowiaya. ¹⁰Ijkuakó ne onikili: “¿Tlan nikchiwas, Notoke?” Notoke onechili: “Ximoketsa iwa xio Damasco, ompa mitsiliskeh tlan tikchiwas.” ¹¹Iwa kemi non tláwili onechixmijmikti, ne ayakmó onitlachiaya, yika n tlakah akimeh nowa oyayah sa onechmatilantiajkeh asta otikalakitoh Damasco.

¹²Ompa okatka se tlakatl non itoka Ananías, akin okintlakitaya itlanawatilwah Moisés, iwa nochteh n judíojteh non ochantitokah Damasco okitlakitayah. ¹³Ye owala nonawak iwa onechili: “Nokni Saulo, oksepa xitlachia.” Ijkuakó oniwaltláchixki, iwa onikitak Ananías. ¹⁴Ijkuakó onechili: “Idios totatawah omitspéjpenki para xixixmati tlan Ye kimonekiltia, para xikita n Yolmilajka* iwa xikkakili itlajtol. ¹⁵Te tikteixmatiltis innawak nochteh n tlatitkaptlakah iwa tikinmatiltis nochi tlan otikitak iwa otikkak. ¹⁶Iwa axa, ¿tlan tikchia? Ximoketsa, ximokuaateki iwa ximochipawa de motlajtlakolwah, iwa xiktenewa itoka.”

Pablo kijtoa kenomi Dios okitlanki makinmatiltiti n kualitlájtolli non amo judíojteh

¹⁷Ijkuak onimókopki Jerusalén, onia onimotiotsajtsililito kan Weyi Tiopa, iwa kemi yaskia nitejtemiktok, ¹⁸onikitak iwa onechiliaya: “Xikistiwetsi de Jerusalén, porke amo kiseliskeh motlajtol ijkuak techteixmatiltis.” ¹⁹Ijkuakó ne onikili: “Notoke, yejwah kual kimatokeh ne onikajkalaktinemia itech nochteh n sinagogas iwa onikinwitekia iwa onikintsakuamigya nochteh akimeh omitsneltokayah. ²⁰Iwa ijkuak okimiktijkeh n Esteban akin omitseixmatiltiaya, ne ompa onikatka, oniktekawili makimiktikah iwa asta onikinmokuilawili intlakenwah akimeh okimiktijtakah.” ²¹Pero Jesús onechili: “Xio, porke Ne nimitstilanis wejka, innawak non amo judíojteh.”

Pablo imak n soldado tlayákanki

²²Asta ompa okikakilijkeh itlajtol, otlanki opé tsajtsih:

—¡Xikmiktikah non tlakatli! ¡Ayakmó mayolito!

²³Satlawel otsajtsiah iwa tlakpak okintlamotlayah intlakenwah iwa miak tlali okitlamotlayah tlakpak. ²⁴N soldado tlayákanki otlanawati makikalakikah n Pablo kan kuártel.

* 22:14 Yolmilajka ye n Cristo Jesús

Otlanki otlanawati makiwitekikah para makijto tleka n tlakah satlawel okualaniah iwa fiero oksajtsiah. ²⁵ Pero ijkuak kuali yokijilpijkeh iwa yoyayah kiwitekitiweh, Pablo okili n kapita non ompa okatka:

—¿Weletis nonkiwitekiskesh se tlakatl romano non ayamó nonkimatih kox milák tlajtlakole noso amó?

²⁶ Ijkuak n soldado tlayákanki okikak tlan Pablo okijto, totokatijjak okimatiltito n soldado tlanawati iwa okili:

—Kuali xikita tlan tikchiwas, nin tlakatl romano.

²⁷ Ijkuakó n soldado tlayákanki owalmijkuani inawak Pablo iwa okitlajtlani:

—¿Milák te tiromano?

Pablo okinankili:

—Milák.

²⁸ Ijkuakó n soldadojtlayákanki okili:

—Ne oniktlatla miak tomi para onimochi ni romano.

Iwa n Pablo okinankili:

—Ne onitlákakti kan altepetl de Tarso, yika ni romano.

²⁹ Yika, akimeh kiwitekiskiah n Pablo okikajkeh; iwa ijkuak n soldadojtlayákanki, okima Pablo noiwa romano, omaujki porke yotlanawatijka makijilpikah.

Pablo kiwukah kan Sanedrín

³⁰ Ijkuak owalmostlatik, n soldado tlayákanki okinekia kimatis tleka n judójtch okiteiliayah n Pablo. Otlanawati makintojtomilikah n kadenajteh iwa mamoololokah n tiopixkeh non tlayakantokeh iwa nochteh non de Sanedrín[†]. Ijkuakó okikixti n Pablo iwa okiwikah innawak tlayakankeh judójtch.

23

Pablo inawak tekiwajkeh de Sanedrín

¹ Pablo okintlajtlatak non de Sanedrín iwa okinmili:

—Nokniwah, asta axa ne kuali ninemi ika notlamachilis chipawak inawak Dios.

² Ijkuakó Ananías n tiópixki non okachi otlayakantoka, okinnawati non okatkah in-akastla n Pablo, makikamatlatsinikah. ³ Pero Pablo okinankili:

—¡Íxkoptli, te noiwa Dios mitskamatlatsinis! Tla te nonka tietawatok para techistlakos kemi kijtoa n tlanawátili, ¿tleka kiné tikixpanawia n tlanawátili iwa titlanawatia manehkamatlatsinikah?

⁴ Non ompa okatkah okilijkeh n Pablo:

—¿Timixewia ijkó tiknanankilia n weyi tiópixki de Dios?

⁵ Pablo okijto:

—Nokniwah, ne mach onikmatia kox ye n tiópixki non okachi otlayakantoka; porke itech itlajkuilol Dios kijtoa: “Ayik fiero tiktenewas se tekiwa itech moaltepeu.”

⁶ Ijkuakó Pablo okajsikama sikimeh tekiwajkeh okatkah saduseos iwa oksikimeh fariseos, yika chikaktik okijto:

—Nokniwah, ne nifariseo, iwa miakeh nochantlakawah noiwa fariseos; iwa ken niknel-toka non yomikkeh moyolitiskesh, nomejwah nonnechtlajtlakoltiah.

⁷ Ijkuak ijkó okijto n Pablo, n fariseos iwa n saduseos opé motlatlajtolwiah, iwa omoxelokeh. ⁸ Porke n saduseos kijtoah non yomikkeh mach moyolitiah. Noiwa kijtoa mach onkateh ángelteh nion espíritus. Pero n fariseos kijtoah nochi ni onka. ⁹ Nochteh otsajtsiah; iwa sikimeh tlamachtijkeh de itlanawatil Moisés, non okatkah iwa n fariseos, owalmokeketskeh iwa okijtojkeh:

—Nin tlakatl amitla fiero okichi. Chamo milák se ángel noso se espíritu okitlapowi. Tejwah amo para tikixnamikiskesh Dios.

[†] 22:30 Sanedrín: nin grupo kimajmanah kemi 50 tetajmeh non tlaixkomakah ijkuak kinteiliah akimeh amo kitlakitah itlanawatil Moisés.

¹⁰ Inkualanilis n fariseos iwa n saduseos omókopki se weyi momakalo. N soldado tlayákanki opé majmawi makikitsikah n Pablo iwa fiero makikojkokah. Yika okínnotski sikimeh isoldadojwah para makitekixtilikah iwa oksepa makiwikakah kan kuártel.

¹¹ Ipan ok se tonati ijkuak otleyuak, n Toteko Jesús okimonextili n Pablo iwa okili:

—Pablo, ximoyolchikawa, porke ijko kemi otechteixmatilti nika Jerusalén, ijko techteixmatiltis Roma.

Motlatlalwiah kichtakamiktiskeh n Pablo

¹² Ipan ok se tonati, sikimeh judfojtech omotlatlalwijkeh kimiktiskeh n Pablo, iwa okisentlalijkeh amo tlakuaskeh nion atliskeh asta makimiktikah. ¹³ Iwa nonteh tlakah non okisentlalijkeh ijko kichiwaskeh, okatkah okachi de ome póali (40) tlakah. ¹⁴ Yejwah oyajkeh okinmitatoh n tiopixkeh non tlajakantokeh iwa n tetajmeh non tlajakantokeh, iwa okinmilijkeh:

—Tejwah yotiksentalijkeh amo titlakuaskeh nion tiatliskeh asta matikmiktikah n Pablo. Iwa tla amó, okachi kuali itla matimochiwakah. ¹⁵ Axa nomejwah, iwa n oksikimeh tekijwajkeh de n Sanedrín, xiktlajtlanilikah n soldado tlayákanki, mostla manomechwalikili n Pablo. Xikilikah nonkinekih okachi nonkitlatlajtlaniskeh, iwa tejwah sa tikchixtoskeh itech ojtili tikmiktiskeh keman ayamó onkalaki.

¹⁶ Pero itelpoch iwelti n Pablo okima, iwa oyá kan kuártel okimatiltito n Pablo. ¹⁷ Ijkuakó n Pablo okínnotski se soldado tlanawati iwa okili:

—Xikwika nin télpochtli inawak n soldado tlanawati, porke moneki motlapowis íwa.

¹⁸ N soldado tlayákanki okiwik n télpochtli inawak n soldado tlajákanki, iwa okili:

—Pablo non tsaktok, onéchnotski iwa onechili manimitsalikili nin télpochtli, porke moneki motlapowis mowa.

¹⁹ N soldado okimatilanki n télpochtli, iwa okitlakaltecho iwa okitlajtlani:

—¿Tlan tikneki techilis?

²⁰ N télpochtli okili:

—N tlajakankah judfos yomotlatlalwijkeh mitstlajtlaniliskeh mostla xikintlanili n Pablo innawak non de Sanedrín, yejwah mochiwaskeh kemi kinekih itla kiyektlajtlaniskeh.

²¹ Pero amo xikinneltoka; porke okachi de ome póali (40) tlakah ichtaka kichiatiweh, iwa okisentlalijkeh amo tlakuaskeh nion atliskeh asta makimiktikah n Pablo, iwa axa sa kichixtokeh tlan tikijtos.

²² Ijkuakó n soldado tlajákanki, okimaaka n télpochtli iwa okinawati amaka makili tlan okimatilti.

Pablo inawak n gobernador Félix

²³ N soldado tlajákanki okínnotski ome isoldado tlanawatijkeh iwa okinnawati makintlatlalikah ome siento soldadojtech non san nejnemih, eyi póali iwa n májtlakteh soldadojtech ika inkaboyojwah, iwa ome sienton non kinwikah teposteh non yakawitstikeh, iwa okinnawati maonewakah Cesarea las nueve de yuak. ²⁴ Noiwa otlanawati makipejpechtikah se kabayo para ipa matlejko n Pablo, iwa okinnawati makiyekmokuilawikah itech ojtili para kiteixpantiskeh kan n weyi tlanawati Félix. ²⁵ N soldado tlajákanki okijkuilili n gobernador Félix se amatlajkuiloli:

²⁶ “Ne Claudio Lisias itech nin amatlajkuiloli nimitsontlajpaloa tejwatsi gobernador Félix: ²⁷ N judfojtech okikitsikijkeh nin tlakatl iwa ya kimiktiskiah, pero ijkuak ne onikma ye romano, onikinwik nosoldadojwah iwa onikteixtilito. ²⁸ Iwa kemi onikneka nikmatis tleka okiteiliayah, onikkuik innawak n tekijwajkeh de Sanedrín, ²⁹ iwa ijkuak onikma okiteiliayah san por intlanawatil, ne onikmoli mach para kimiktiskeh, nion para kitsakuaskeh ika noni. ³⁰ Pero ne onikma n judfojtech yomotlatlalwijkeh kimiktiskeh, yika nimitsontlanilia, iwa akimeh kiteiliah noiwa onikinnmili mawiah monawak iwa mamitsilikah tleka kiteiliah. Kualiyetia iwa ok se tonati timotlajpaloskeh.”

³¹ N soldadojtech okichijkeh ijko kemi okinnawatijkeh iwa non yúali okiwikakeh n Pablo kan weyi kuártel non itoka Antípatris. ³² Ijkuak owalmostlatik, n soldadojtech non san onejentiayah owalmokopatoh para Jerusalén, iwa non oyayah ipan kabayo okiwikakeh

n Pablo. ³³ Ijkuak okalakitoh kan altepetl de Cesarea, okimakakeh n amatlajkuifloli n gobernador Félix noiwa okitemaktijkeh n Pablo. ³⁴ Ijkuak n gobernador okiamapo n amatlajkuifloli, okitlajtlani n Pablo kan otlákatki, iwa ijkuak okima Pablo otlákatki Cilicia, ³⁵ okili:

—Nimitskakis ijkuak witseh akimeh mitsteiliah.

Otlanki otlanawati makiyekmokitlawikah itech ipalasio n Herodes.

24

Pablo motlajtolpalewia ipa n Félix

¹ Mákuili tonati satepa, n weyi tiópixki Ananías, okalakito kan altepetl de Cesarea iwa n sikimeh tetajmeh non tlayakantokeh iwa se tlajtolpalewi non itoka Tértulo. Ninteh omoteixpantitoh inawak n gobernador Félix para kiteiliskeh n Pablo. ² Ijkuak okualikakeh n Pablo, Tértulo opé kiteilia, iwa okili n gobernador Félix:

—Satlawel timotlasojkamatih monawak gobernador, porke kuali tikateh, iwa nochi kuali kajki porke saikpanoa tiixtlamati. ³ Por nochi tlan tejwatsi sentetl tikchiwa, tejwah tipakih iwa timotlasojkamatih monawak gobernador Félix. ⁴ Iwa kemi amo tiknekih timitsnaktiskeh, timitsontlatlaujtiah xikoninkaki san kanaj kech tlájtoltel. ⁵ Tejwah kuali tikmatokeh nin tlakatl se weyi tekokolismák, iwa san kan ik nentinemi kinpajsolojtinemi n judíojteh; iwa kinyayakantinemi sikimeh tlakah non kinmiliah nazarenos. ⁶ Iwa okinekia tlajtlalolchias kan Weyi Tiopa, yika tejwah otikitskijkeh iwa otiknekih tiktsakuaskeh. ⁷ Pero n soldado tlayákanki Lisias omokalaki iwa otechmakixtili n Pablo. ⁸ Iwa trato okinnawati akimeh okiteiliayah mawikih monawak. Axa tejwatsi monewia weletis tikonyolkuitis iwa tikonmatis tleka tikteiliah.

⁹ N judíojteh non ompa okalakikoh, okijtoayah milák tlan okijtojtoka n Tértulo. ¹⁰ Ijkuakó n gobernador okimanotski n Pablo para matlajto, iwa Pablo okijto:

—Ika miak pakilistli nimotlajtolpalewis monawak, porke nikmatok tejwatsi yowejka titekiwajtitok itech nin weyi tlali. ¹¹ Tejwatsi monewia weletis tikmatis kox milák tlan nimitsonilijtok noso amó, sikin kipia májtlaktli iwa ome tonati oniajsiko nika Jerusalén onikweyijkachiwako Dios. ¹² Mach onechajsikeh nimokualanijtok nion onechajsikeh nixinxelojtok n tlakah, nion onikimpajsolojtinemia n tlakah ijtik n Weyi Tiopa, noso kan sinagogas, noso oksika. ¹³ Ijkó kiné, ninteh tlakah mach weletis mitsnextiliskeh tlan ika nechteiliah. ¹⁴ Axa, monawak nikmokitia ne nikmopantia Dios, Idios notatawah ijko kemi nechnextilia n yankuik ojtli, non yejwah kitokayotiah sekta, porke nikneltoka nochi tlan ijkuilitok itech itlanawatil iwa itech intlajkuilol n profetas. ¹⁵ Ne nikchia inawak Dios tlan yejwah noiwa kichiah, nochteh non yomikkeh moyolitiskeh, akimeh otlájtlatolchijkeh iwa akimeh amó. ¹⁶ Yika, nochipa nikchiwa tlan kuali, para notlamachilis amo manechtlajtlakolti inawak Dios nion innawak n tlakah.

¹⁷ 'Miak xiwitl oniajtoka wejka itech oksikimeh talmeh, iwa ijkuak onimókopki kan nopafs, onia onikimpalewito akimeh amitla kipiah iwa oniktemakato notlatlitolkil. ¹⁸ Ne ijko onikchijtoka ijtik n Weyi Tiopa ijkuak sikimeh judíojteh non owalayah de Asia onechajsitoh ompa. Ijkuakó ne yonimochipajka kemi kijtoa n tlanawátli, iwa mach miakeh ompa okatkah nion aka omopajsoloaya. ¹⁹ Tla itla amokuali onikchi iwa kinekih nechteiliskeh, mawikih akimeh ompa okatkah. ²⁰ Iwa tla amó, ninteh akimeh nika kateh makijtokah tlan amokuali onechajxililijkeh ijkuak onimotlajtolpalewijtoka kan Sanedrín.* ²¹ Noso chamo nechteilijtokeh porke ijkuak ompa onikatka, inmixpa chikaktik onikijto: "Nomejwah axa nonnechtlajtlakoltiah porke nikneltoka moyolitiskeh non yomikkeh."

²² Ijkuak Félix okikak tlan Pablo okijto, iwa ye kuali okimatia tlan kijtosneki n ojtli de Cristo, okika nochi para ok se tonati iwa okinmili:

—Ijkuak wits n soldado tlayákanki Lisias nikyektlajtlanis tleka nonkiteiliah, iwa ijkuakó niktas tlan nikchias iwan Pablo.

* 24:20 Sanedrín: nin grupo kimajmanah kemi 50 tetajmeh non tlaixkomakah ijkuak kinteiliah akimeh amo kuali kitlakitah itlanawatil.

²³ Ijkuakó Félix okinawati n soldado tlanawati ok matsakto n Pablo, pero makinkawili non iwa omowikaya makitlajjalokih iwa makimakakah tlan kipolos.

²⁴ Kech tonati satepa, oksepa owala n gobernador Félix iwa Drusila isiwa, ye israelita. Félix otlanawati makinotsatih n Pablo para makitlapowiki de n kualitlájtolí de Cristo Jesús.

²⁵ Pablo opé kitlapowia kenijki moneki mayeknemi, iwa kenijki se moyeknawatis. Noiwa okili Dios se tonati techtlaxtlawaltis nochi tlan otikchijkeh, ika noni Félix omomojti iwa okili:

—San ika ye. Ijkuak nimajxilis oksepa nitlatitlanis mamitsnotsatih.

²⁶ N gobernador Félix tekil otlatitlania makinotsatih n Pablo para motlapowis iwa, porke okinekia makimaka itla tomi para kikajkawas. ²⁷ Ome xiwitl ijkó okichijtoka n gobernador Félix asta ijkuak omopatlak iwa okalak n Porcio Festo. Iwa kemi Félix okinekia kualí mokawas iwan judfójtēh, okika n Pablo matsakto.

25

Pablo ixpa n gobernador Festo

¹ Festo owala okiseliko iteki de gobernador, iwa eyi tonati satepa okiski de Cesarea iwa oyá Jerusalén. ² Ompa n tiopixkeh non tlayakantokeh iwa n tlayakankeh judfójtēh oyajkeh inawak n gobernador Festo okiteilitoh n Pablo. ³ Iwa okitlatlautijkeh matlanawati makualikakah n Pablo ompa Jerusalén. Ijki okilijkeh porke omotlatlalwijkeh kimonepachwiskeh n Pablo itech ojtli para kimiktiskēh. ⁴ Pero Festo okinmili Pablo otsaktoka Cesarea, iwa kech tonati satepa ye yaskia ompa. ⁵ Iwa okinmili:

—Yika, akimeh nika nontekiwajkeh xiwiah nowa Cesarea, iwa tla non tlakatl okichi itla amokuali, ompa weletis nonkiteiliskeh.

⁶ N gobernador Festo okatka kan altepetl de Jerusalén san kemi chikweyi noso májtlaktli tonati, iwa omókopki kan altepetl de Cesarea. Ijkuak owalmostlatik omoyayanti kan jusgado, iwa otlanawati makualikilikah n Pablo. ⁷ Ijkuak Pablo okalakito ixpa n gobernador, omopachojkeh n judfójtēh non owalajkeh de Jerusalén. Opé kiteiliah san de miak, pero mach itla oweletkeh okinextilijkeh. ⁸ Ijkuakó Pablo, opé motlajtolpalewia ika nin lájtoli:

—Ne mach onikchi itla tlajtlákolí, nion itech intlanawatilwah n judfójtēh nion ijtki n Weyi Tiopa. Nion onikixpanawi n rey César.

⁹ Pero kemi n gobernador Festo okinekia mokawas kualí iwan judfójtēh, okitlajtlani n Pablo:

—¿Tikneki tias Jerusalén para ompa nimitstlatsintokis?

¹⁰ Pablo otlanankili:

—Ya nika ixpa n César kan tlaixkomaka, kan moneki manechtatsintokikah ika tlan nechteiliah. Tejwatsi kualí tikmatok, amo onikchi itla amokuali innawak n judfójtēh.

¹¹ Porke tla onikchi itla amokuali iwa moneki manechmiktikah, ¡manechmiktikah! Pero tla san nechtlamamaltijtokeh iwa amo milák niktewikilia, amaka weletis nechemakas inmak n tlayakankeh judfójtēh. Ne nikneki manechwikakah inawak n weyi tlanawati César para ye manechtatsintoki.

¹² Satepa ijkuak n gobernador Festo yokintlajtolti non oksikimeh itekiwajkawah, okili n Pablo:

—Te otikmotlajtlanili matimitswikakah inawak n César. Tias inawak.

Pablo ixpa n rey Agripa Segundo iwa n Berenice

¹³ Kech tonati satepa, n rey Agripa Segundo* iwa n Berenice† oyajkeh Cesarea okitlajjalotoh n gobernador Festo. ¹⁴ Iwa kemi ompa omokajkeh miakēh tonatijmeh, Festo okitlapowi n rey Agripa tleka otsaktoka n Pablo, iwa okili:

—Nika kajki se tlakatl akin Félix okitsaktewak. ¹⁵ Iwa ijkuak onikatka Jerusalén, n tiopixkeh non tlayakantokeh iwa n tetajmeh non tlayakantokeh kan Weyi Tiopa okiteilikoh nonawak, iwa onechtlajtlanilijkeh maniktalajtlakolti. ¹⁶ Ne onikinnankili n

* 25:13 Marcos Julio Agripa Segundo: okatka tekone de Herodes Agripa Primero. † 25:13 Berenice: iwelti n Herodes Agripa Primero iwa Herodes Felipe Primero.

tlanawatijkeh romanos mach kitekawiliah aka makimiktikah tla ayamó achto motlajtolpalewia innawak akimeh kiteiliah. ¹⁷ Yika, ijkuak yejwah owalajkeh nika, san nima ipan ok se tonati onimoyayanti kan nitlaixkomaka iwa onitlanawati makualikakah non tlakatl. ¹⁸ Pero akimeh okiteilikoh n Pablo, mach itla okijtojkeh ika tlan ne onikyejyekoliaya. ¹⁹ Sanwel okiteiliayah de intlamachtilis, iwa de se tlakatl non itoka Jesús, Akin yomikki iwa Pablo kijtoa yolitok. ²⁰ Iwa kemi ne amo onikmatia tlan nikchiwas, oniktlatlanli n Pablo kox okinekia yas Jerusalén para ompa makitlatsintokikah. ²¹ Pero kemi ye okimotlajtlanili makitlatsintoki n César Augusto, onitlanawati matsakto asta ijkuak weletis niktitlanis inawak n César.

²² Ijkuakó Agripa okili n Festo:

—Ne noiwa nikkekiskia nikkakis non tlakatl.

Festo okinankili:

—Niman mostla weletis tikkakis.

²³ Ijkuak owalmostlatik, Agripa Segundo iwa Berenice okalakikoh kan kiyolwitiskiah n Pablo, okalakeh tlakentitiwitseh ika kuájkuali tlakemitl kemi motlakentiah n wejweyi tlanawatijkeh itech nin taltikpaktili. Noiwa owalajkeh n soldado tlayakankeh iwa n tekiwajkeh de non altepetl. N gobernador Festo otlanawati makualikakah n Pablo.

²⁴ Ijkuakó n gobernador Festo okijto:

—Rey Agripa, iwa nochteh akimeh nika nonkateh, nika kajki n tlakatl akin nomejwah nonkiteiliah. Iwa nika Cesarea iwa Jerusalén, miakeh tlayakankeh judíojeteh kiteiliah nonawak, iwa nechtlajtlaniliah manimikti. ²⁵ Pero ne mach itla weyi tlajtlákolli onikajsik kemi para se makimikti, iwa kemi ye inewia okimotlajtlanili makitlatsintoki n César, yika onikmoli niktitlanis inawak. ²⁶ Iwa kemi amo nikajsi itla tlan ika weletis niktlatjkuililis n César, yika nomechalikilia nin tlakatl, iwa okachi monawak tejwatsi rey Agripa, para tejwatsi xiktlatsintoki iwa ijko manikpia itla tlan ika niktlatjkuililis n César. ²⁷ Porke ne nikita amo kuali ka maniktitlanli se non tsaktok iwa amo manikteili tleka kiteiliah.

26

Pablo motlajtolpalewia inawak n rey Agripa

¹ Ijkuakó n rey Agripa okili n Pablo:

—Weletis timotlajtolpalewis.

Ijkuakó Pablo okajkok ima iwa ijki opé tlajtoa:

² —Niyolpaki miak porke weletis nitlajtos monawak rey Agripa, iwa nimotlajtolpalewis de nochi tlan nechteiliah n tlayakankeh judíojeteh. ³ Iwa okachi, porke tejwatsi kualitimatok nochi tlan tejwah akimeh tijudíojeteh ya wejkawitl tikchijtiwitseh, iwa tikmatok tlan techtoktia matimotlatlajtolwikah. Yika nimitsontlatlajtia xikonkaki nochi tlan nikijtos.

Pablo kimokuitia teixpa kenijki onemia keman ayamó okineltokaya Cristo Jesús

⁴ Nochteh n judíojeteh kualitimatok kenijki oninenki kan altepetl de Tarso iwa kan altepetl de Jerusalén desde ni chokotsi. ⁵ Yejwah yowejka nechixmatih onikatka nifariseo, iwa onikatka seme de akimeh okachi tikmopantiah totlanawatil. ⁶ Iwa axa nika onechalikakeh nechteiliah. Nechteiliah porke ninkneltoka Dios kinyolitis akimeh yomikkeh, kemi Ye okisentlali kichiwas ijkuak okinkakiti totatawah. ⁷ N tlakah non walewatokeh itech n májtlakteh iwa ome familias de Israel kichiah mamochiwa tlan Dios okinkakiti, yika kiweyijkachiwah iwa tlajka iwa n yuak tikmopantiah. Iwa porke ne noiwa ninkneltoka tlan yejwah kineltokah, yika axa, tejwatsi rey Agripa, n judíojeteh nechteiliah. ⁸ Nomejwah nonkineltokah Dios kinyolitia non yomikkeh.

Pablo kimokuitia kenijki okintlajjowiltiaya non kineltokah Cristo Jesús

⁹ Ya wejkawitl, ne onikmoliaya omonekia manikintlajjowilti akimeh kineltokah Jesús de Nazaret. ¹⁰ Ijko onikchi kan altepetl de Jerusalén. Ika intlanekilis n tiopixkeh non tlayakantokah onikintsak miakeh tlakah non kineltokah Cristo Jesús. Iwa ijkuak okiyejyekoliayah kinmiktskeh ne onikijto kuali ka. ¹¹ Miak welta ne onikintlajjowiltiaya

itech n sinagogas iwa onikintoktiaya makijtokah itla pitsotik de Cristo Jesús. Satlawel onechkualaniayah, yika wejka onikintemojtinemia itech miakeh altepemeh.

*Pablo oksepa kintlapowia kenijki okineltokak n Jesús
(Hch. 9:1-19; 22:6-16)*

¹² Ika intlanekilis n tiopixkeh non tlayakantokeh iwa n tetajmeh non tlayakantokeh, se tonati oniaya nikintemoti n tlakah non kineltokah Jesús kan altepetl de Damasco. ¹³ Pero ik tlajko tonati, ijkuak oniaya itech ojtli onikitak se tláwili non owalaya de kan ilwikak okachi teixmijmikti ke n tonati. Non tláwili onechyawalo, iwa akimeh oyayah nowa noiwa okinyawalo. ¹⁴ Tinochteh otiwewetsitoh ixko tlali, iwa onikak se tlájtoli non onechiliaya ika tlájtoli hebreo: “Saulo, Saulo, ¿tleka techtotojtoka? Monewia timokojkojtok, kemi ijkuak se toro kiteliksa itla yakawitstik iwa san ye inewia mokojkao.” ¹⁵ Ne oniktajtlani: “¿Akin tejwatsi Noteko?” Ye onechnankili: “Ne Jesús, akin te tiktotojtoka. ¹⁶ Pero ximoketsa, porke ne onimitsmonextili para xiyeto notékitki iwa xiktematilti tlan axa yotikitak iwa tlan satepa nimitsnextilijτίας. ¹⁷ Ne nimitsmokuilawis innak n judíojtch iwa innak non amo judíojtch, kan axa nimitstiltani ¹⁸ para tikinmixtlajtlapos iwa ayakmó manemikah kan tlatleyua yej manemikah kan onka tláwili para ayakmó makinmapixto n sataná, yej makitlakitakah Dios; iwa manechneltokakah, iwa ijkó makiselikah tlajopolwílistli iwa se tlatliokólili inwah akimeh Dios yokinmopejpenili.”

Pablo kichiwa tlan Dios okinawati ijkuak okimonextili

¹⁹ Ijkó kiné, tejwatsi rey Agripa, ne oniktakama tlan onechnawati non tlájtoli non onikak de ilwikak. ²⁰ Acho onikinmatilti itlajtol Dios akimeh chantitokeh Damasco, otlanki akimeh kateh Jerusalén iwa itech nochi n tlali de Judea. Noiwa non amo judíojtch onikintlalwi makinkawakah intlajtlakolwah iwa makichiwakah tlan kuali inawak Dios, para mamota de milajka omoyolpatlakah. ²¹ Yika, n judíojtch onechkitskijkeh kan Weyi Tiopa iwa okinekiah nechmiktiskeh. ²² Pero ken Dios onechpalewi ya nika nitlanti, nikinmatiltijtiwits itlajtol Dios akimeh weyijkatitokeh iwa non tsitsikitkeh. Ayik itla oksé onikinmili tlamochiwaskia, sanwel tlan okijtojkeh n profetas iwa Moisés, ²³ Cristo tlajijyowiskia, iwa ijkuak mikiskia, Ye ocho moyolitiskia de kan mikemeh, iwa kitematiltiskia itlajtol Dios innawak n judíojtch iwa non amo judíojtch.

Pablo kichijchikawa n rey Agripa Segundo matlaneltoka

²⁴ Ijkuak Pablo okimijto ninteh tlájtoltch non ika omotlajtolpalewiaya, Festo otsajtsik: —¡Yotikuatlapolo, Pablo! Yotikuatlapolo porke saikpanoa otimoixtlamachti.

²⁵ Pero Pablo otlanankili:

—Tejwatsi gobernador Festo, mach nikuatlapolojtch. Tlan nikijtoa kuali kajki iwa milák.

²⁶ Nika kajki n rey Agripa, akin kuali kimati tlan nikijtojtok, yika nimixewia nitlajtoa ika yolchikawálistli ixpa, ken kuali nikmatok ye ya kimatok tlan nikijtojtok, porke nochi tlan mochijtiwits, amo san moichtakachijtiwits. ²⁷ Rey Agripa, ¿tikneltoka tlan okijtojkeh n profetas? Ne kuali nikmatok tikneltoka.

²⁸ N rey Agripa okinankili:

—Sa ika achitsi otikchiwaya manimokopa nicristiano.

²⁹ Pablo okili:

—Tla sa ika achitsi noso ika miak, niktlajtlanilia Dios makichiwa tejwatsi noiwa xiknel-toka Cristo Jesús. Pero amo san tejwatsi, yej noiwa nochteh akimeh nika nechkaktokch, mamoyolkopakah kemi ne. Pero amo maikxiilpitokah ika kadena kemi ne.

³⁰ Ijkuak Pablo okimijto ninteh tlájtoltch, n rey Agripa omóketski iwan Berenice, noiwa Festo iwa nochteh non ompa okatkah, ³¹ iwa inmixkoya omotlapowitoh. Iwa okimoliayah:

—Nin tlakatl amitla fiero okichi kemi para se makimikti, nion amo para tsaktos.

³² Iwa Agripa okili n Festo:

—Nin tlakatl weletiskia tikkajkawaskiah, tla amo kitlajtlaniskia yas inawak César.

Pablo kititlanih Roma

¹ Ijkuak okijtojkeh techtitlaniskeh Italia, Pablo iwa n oksikimeh tlakah non noiwa oikxilpitiayah, okinmaktilijkeh n soldado tlanawati non itoka Julio. Ye okatka kapita de se sientto de soldadojtech iaxkawah n César Augusto. ² Otitlajkokeh itech se barko non owalaya de kan puerto de Adramitio iwa ya onewaskia Asia. Noiwa okatka towah Aristarco, se tlakatl de Tesalónica non kajki kan tlali de Macedonia. ³ Iwa ijkuak owalmostlatik otikalakitoh kan puerto de Sidón; ompa n soldadojtlanawati Julio opé kiyeknotsa n Pablo iwa okikawili makintlajpaloti non iwa omowikaya para makipalewikah. ⁴ Ijkuak otikiskeh de kan puerto de Sidón ipan barko, otikonmilajkeh kan ik isla de Chipre, porke n ejekatl otechixnamiktiwalaya. ⁵ Otitlakotontiajkeh itech weyi atl iwa otipanokeh iyakapa n altepetl de Cilicia iwa Panfilia. Satepa otikalakitoh kan altepetl de Mira non kajki kan tlali de Licia.

⁶ Ompa n soldado tlanawati okitak se barko non owalaya de kan altepetl de Alejandría iwa oyaya para Italia, iwa n ye otechnawati matitlajkokeh itech non barko. ⁷ Otipanokeh miak tonati ipan weyi atl porke yolik onejnemia n barko, yika satlawel otiwejkajkeh iwa ika miak tlajjowlistli otikalakitoh iyakapa n altepetl de Gnido. Iwa kemi n ejekatl ok otechixnamiktiwalaya, otikyawalojkeh n isla de Creta iwa otipanokeh iyakapa n altepetl non itoka Salmón. ⁸ Semi owi otiajkeh ik nochi tlátentli asta otikalakitoh kan puerto non kiliah Buenos Puertos. Non puerto mach ok wejka okatka de kan altepetl non itoka Lasea.

⁹ Miakeh tonatijmeh yotinejntokah itech weyi atl. Yokatka temojti para se yas itech weyi atl, ken yoajsitiwalaya n sewaya, iwa ijkuak osewaya okinmixnamiktiwalaya n ejekatl chikaktik. Noiwa yopanoka n ilwitl de Yom Kippur* keman mosawah n judíojtech. Yika, Pablo okintlapowi akimeh ompa oyayah, ¹⁰ iwa okinmili:

—Tlakah, nikita mach ok weletis tiaskah okachi itech weyi atl porke weletis itla timochiwaskeh. Iwa amo san tikpoloskeh n barko iwa itlamamal, yej asta tejwah noiwa weletis timikiskeh.

¹¹ Pero n soldado tlanawati okachi okineltokaya n tekowa de n barko iwa akin okinejnemitiaya, iwa amo okikakia tlan okiliaya n Pablo. ¹² Iwa kemi non puerto amo okatka kualo para se mokawas ompa itech sewaya, miakeh okijtojkeh okachi kualo matikisakah de ompa. Matikyejyekokah chamo tonkalakitiweh Fenice, se puerto de Creta non tlachixtok kan ik kalaki tonati iwa ompa timochiaskiah asta mapano n sewaya.

Tlawelchikawak kiawi iwa ejeka itech weyi atl

¹³ Iwa kemi okitakeh opé nejnantsi ejeka ik tlatsintla, okimolijkeh chamo ya weletiskia onewaskiah. Okiskeh de ompa, iwa san ik tlátentli okiyawalojtiajkeh n isla de Creta. ¹⁴ Iwa ayamó wejka oyayah ijkuak se ejekatl chikaktik kemi se siklón okimomakako n barko. ¹⁵ N ejekatl opé kiwika n barko. Iwa kemi ayakmó otiweletkeh otiknejnemitiayah n barko, otikkawilijkeh makiwika n ejekatl. ¹⁶ Otipanokeh ikuitlapa se isla non itoka Clauda, kan ik ejekatl amo chikawak otlawitekia, iwa ika miak tekil otiweletkeh otiktlejoltijkeh n barkajtsi non okitilantiwalaya n barko. ¹⁷ Satepa ijkuak yokitlejoltijkeh n barkajtsi, okitlajkoilpijkeh n weyi barko ika miak mekatl; iwa kemi okimawiliayah maixtsoptoniti ijtik xali non kiliah Sirte, okintemowilijkeh ilonajwah iwa sa ijko okikajkeh makiwika n ejekatl. ¹⁸ Iwa ijkuak owalmostlatik, ok oejekatoka chikaktik, okitlamochilijkeh siki itlamamal n barko ijtik atl; ¹⁹ iwa ijkuak obiktlatik, innewiah ika inmawah okintlamotlakeh ijtik weyi atl ilonajwah iwa oksiki tlan okitekiltitlah itech barko. ²⁰ Miakeh tonatijmeh otlamixtentoka iwa amo otiktakeh nion tonati nion sítlaltech, iwa ika neká chikaktik kiawiejekatl non topa owetsia otikmolijkeh timikiskiah.

²¹ Kemi ya miak tonati amo otitlakuyah, Pablo omóketski tlatlajkotia iwa okijto:

* 27:9 Yom Kippur: Nochi xiwitl n judíojtech omosawayah itlajkotia n septiembre para motlapojpolwiskeh inawak Dios de intlajtlakolwah.

—Tlakah, okachi kuali nonnechkakiskiah iwa amo tikisaskiah de Creta. Ijkó amo titlajiyowiskiah nion nonkipoloskiah itlamamal n barko. ²² Pero amo ximosotlawakah, porke maya tikpoloskeh n barko, nion se de nomejwah mikkis. ²³ Porke nin yúali onechmonextili se iángel Dios, akin niteaxka inawak iwa niktekitilia. ²⁴ N ángel onechili: “Amo ximawi Pablo, porke tikpia de timoteixpantiti inawak n César, iwa por te Dios amo kikawas mamikki nion se non kateh mowah itech nin barko.” ²⁵ Yika, ximoyolchikawakah tlakah, porke ne nikneltoka Dios, iwa kuali nikmatok Ye kichiwas nochi tlan iángel onechili. ²⁶ Pero moneki matechtlamotlati n ejekatl inakastla n isla.

N barko omokawato itempa n isla

²⁷ Ijkuak opanokeh májtlaktli iwa nawi tonati, non yúali n ejekatl otechwiwikaya itech weyi atl non itoka Adriático. Iwa kemi ik tlajko yúali akimeh okinejnemitiayah n barko, okimachiliayah ya onajsiah kan onka tlali. ²⁸ Ijkuakó okitamachijkeh n atl kox ok wejkatla, iwa okipiaya sempóali iwa n káxtoli iwa n se metro (36) tlawejkatla. Okachi tlajakapa oksepa okitamachijkeh iwa okipiaya sempóali iwa n chikome (27) metro tlawejkatla. ²⁹ Ken okimawiliayah kimomakatiweh itla weyi tetl, okinkajkajkeh nawi wejweyi ganchojtech de tépostli ik ikuitlapan n barko para makitsekokah, iwa sa okichixtokah matlanestiwetsi. ³⁰ Pero akimeh okinejnemitiayah n barko okinekiah choloskeh, iwa opé kitemowiah n barkajtsi non okitekitiltiayah ijkuak oapolakia n barko. Yejewah omochijkeh yawih kinkajkawatiweh ijtik n weyi atl n téposteh ik iyakapa n barko para kitsekoskeh. ³¹ Ijkuakó Pablo okili n soldado tlanawati iwa isoldadojwah:

—Tla ninteh tlakah amo mokawah itech barko, nomejwah noiwa nonmikiskeh.

³² Ijkuakó n soldadojtech okintekeh n mekameh non ika oilpitoka n barkajtsi iwa okikajkeh makiwika n atl.

³³ Ijkuak yotlatlanestiwalaya, Pablo okinyolchikawaya nochteh matlakuakah, iwa okinmili:

—Yokaxtoltik iwa nomejwah amo nonkochtikateh nion itla nonkikuajtikateh.

³⁴ Nomechtlatlaujtia xitlakuakah para nonkipiaskeh chikawálistli, porke amaka de nomejwah kipolos nion se itsonkal.

³⁵ Ijkuak ijki okijto n Pablo, okónanki se paj, omotlasojkama inawak Dios inmixpa n nochteh, okitlajkotlápanki iwa opé kikua. ³⁶ San nima nochteh omoyolchikajkeh iwa opé tluakah. ³⁷ Nochteh akimeh otiayah itech barko, otikatkah ome sienta iwa n eyi póali iwa n káxtoli iwa n se (276). ³⁸ Iwa ijkuak nochteh kuali yoixwikeh, okontlamotlakeh n trigo ijtik atl para maejkautia n barko.

Apolaki n barko

³⁹ Ijkuak otláneski, n tlakah non okinejnemitiayah n barko mach omixmoskalijkeh kan okatkah, pero okitakeh se weyi imamayo n weyi atl iwa onkalaktoka itech non tlali, iwa ompa okinekiah kijkuaniskeh n barko, porke omotaya okatka miak xali. ⁴⁰ Okintejtekeh n mekameh non ika oilpitokah n téposteh non okitsekojtokah n barko, iwa ompa okinkajkeh ijtik atl. Okinkaxanijkeh n mekameh non ika oilpitoka n timón non kiyakana n barko. Okitlejkoltijkeh ilona n barko para makinejnemiti n ejekatl, satepa n barko opé mijkuania ik tlátentli. ⁴¹ Pero okalakito kan omoixnamikiah ome ameh, iwa n barko oyakatsoponito ijtik xali iwa ompa omoka, iwa opé xixini ik ikuitlapan, porke n amemélotleh omotlawitekiah chikaktik ipan barko. ⁴² Ijkuakó n soldadojtech okinekiah kinmiktiskeh n tlakah non konintsakuaskiah, para amo mamotlamotlakah ijtik atl iwa machocholokah. ⁴³ Pero n soldado tlanawati okinekia kipalewis n Pablo, iwa amo okitekawili makinmiktikah, yej okinnawati akimeh oweletiah ajkuiah achto mamokajkawakah ijtik atl para makalakitih tlátentli. ⁴⁴ Iwa akimeh amo oweletiah ajkuiah, okinnawati mawiah ipan tablajteh noso ipan kuaujmeh non opostekah de n barko. Iwa ijko nochteh okalakitoh tlátentli.

¹ Ijkuak yotimomakixtijkeh tinochteh, otechilijkeh non isla itoka Malta. ² Non ompa ochanchiwayah otechyexselijkeh; okixotlaltijkeh se weyi tlékuili, iwa kemi okiaujtoka iwa osewatoka, otechtlalwijkeh matimijkuanikah iyakapa n tlékuili. ³ Ijkuakó Pablo okoololoto siki kuawitl non yowaki. Pero ijkuak okontlamotlak n kuawitl ijtik tletl, se koatl owalkistewak, iwa omopilo itech ima. ⁴ Ijkuak n tlakah non ochantitokah itech non isla okitakeh n koatl pilkatok itech ima n Pablo, okimolijkeh:

—Nin tlakatl se temikti, porke maya omomakixti itech weyi atl, mach kikawiliah mayolito.

⁵ Pero Pablo omomatsejtselo iwa n koatl owetski ijtik tletl, iwa ye amitla omochi.

⁶ Nochteh okichixtokah maposawa ima, noso mawetsi ya miketl. Pero kemi owejka omochixtokah iwa amitla omochiwaya, okipatlakeh intlayejyekolis iwa opé kijtoah Pablo se dios.

⁷ Ik ompa okatkah sikimeh tlalmeh non okatkah iaxkawah se tlakatl non itoka Publio. Ye otlanawatiaya itech non isla, iwa eyi tonati otechkaloti icha iwa otechtlakualti.

⁸ Ita n Publio owetoka porke okiapiaya totonik iwa tsonkuálaktli. Pablo okitlajpaloto n kókoaxi, omototsajtsili iwa ipa okintlali imawah iwa okipajti. ⁹ Satepa ijkuak ijkó opanok, akimeh ochantitokah itech non isla iwa omokokoayah, owalayah inawak Pablo iwa ye okimpajtiaya. ¹⁰ Iwa satlawel otechtlakitakeh, iwa ijkuak ya tionewaskiah itech barko, otechmakakeh nochi tlan tikmonekiltiskiah itech ojtli.

Pablo onkalaki Roma

¹¹ Satepa de otikatkah eyi mestli itech non isla, otilejkokeh itech se barko non ompa okichixki mapano n sewaya. Non barko owalewatoka de kan altepetl de Alejandría iwa ik iyakapa okiapiaya inmixneskayo de Cástor iwa Pólux. ¹² Satepa otikalakitoh kan altepetl de Siracusa, iwa ompa otimokajkeh eyi tonati, ¹³ otlanki otiajkeh itech se barko ik nochi tlátentli iwa otikalakitoh kan altepetl de Regio. Ijkuak owalmostlatik, opé ejeka ik tlatsintlawik, iwa ipan ome tonati otikalakitoh kan altepetl de Puteoli. ¹⁴ Ompa otikinmajsih sikimeh tokniwah, yejwah otechtlalwijkeh matimokawakah inwah chikome tonati, satepa otikiskah iwa otiajkeh Roma. ¹⁵ Ijkuak tokniwah non ochantitokah Roma okimatkeh yotiaayah para ompa, owalajkeh otechnamikikoh kan tiánkistli de Apio iwa oksikimeh okachi tlayakapa kan kiliah Tres Tabernas. Iwa ijkuak Pablo okimitak, omotlasojkama inawak Dios iwa omoyolchika. ¹⁶ Ijkuak otikalakitoh Roma, Pablo okikawilijkeh mamokalotiti ixkoya iwa se soldado okimokuiltlawijtoka.

Pablo tetlapowia de Jesús kan altepetl de Roma

¹⁷ Eyi tonati satepa, Pablo otlatlflanki makinnotsatih akimeh otlayakantokah innawak judíojteh ompa Roma. Iwa ijkuak yomoololjkeh okinmili:

—Nokniwah, maya amo onikinmixnamik n tokniwah judíojteh, nion onikinmixpanawi intlanawatilwah totatawah, maya ijkó, yejwah onechtemaktijkeh innak n tlakah de Roma kan Jerusalén. ¹⁸ Ijkuak onechyolkuitijkeh okinekah nechkajkawaskeh, porke amitla amokuali okajsikeh kemi para nechmiktiskah. ¹⁹ Pero n judíojteh amo okitekawilijkeh, yika onikmotlajtlanih maniwiki inawak n rey César para ye manechtlajtlakolti, pero ne amo oniwala onikinteiliko nokniwah. ²⁰ Yika, ne onoméchnotski para nomechitas iwa para nimotlapowis nomowah; porke nikelntoka Cristo Jesús yowala, yika ne axa niixxilpitok ika kadena.

²¹ Ijkuakó okilijkeh:

—Tejwah mach tikselijtikateh nion se amatlajkufloli non wits de kan altepetl de Judea matlajtojtiwika de te, nion aka tokni akin nika wits fiero mitstenewa. ²² Pero tiknekih tikkakiskah tlan te tikijtoa, porke tikmatih sentetl n tlakah fiero tlajtoah de nin yankuik tlamachtlistli.

²³ Ijkó kiné, okitlalijkeh se tonati, iwa miakeh tokniwah omoololjkeh kan Pablo omokalotiaya. Iwa desde kualka asta tiótlaki, Pablo okinmatilti kenijki Dios tlanawatia. Iwa okichiwaya makineltokakah n Jesús ika itlanawatil Moisés iwa ika intlajkuilol n

profetas. ²⁴ Sikimeh okiselijkeh tlan Pablo okijtoaya, pero oksikimeh mach okineltokakeh.

²⁵ Iwa kemi amo nochteh okineltokakeh, opé yajyawih. Ijkuakó Pablo okinmili:

—Milák tlan n Espiritu Santo okintlapowi totatawah ika itlajtol n profeta Isaías, ijkuak okijto:

²⁶ Xio iwa xikinmili nekateh tlakah:

Nomejwah nontlakakiskeh pero mach nonkajsikamatiskeh,

iwa maya nontlaciaskeh mach itla nonkitaskeh.

²⁷ Porke ninteh tlakah oyoltlakuawakeh,

iwa mach yektlakakih,

iwa ixtsaktokeh,

para amo matlachiakah ika inmixonolowah,

nion matlakakikah ika innakaswah,

nion makimachilikah itech inyolo,

nion mamoyolpatlakah nonawak,

para manikimpajti.

Is. 6:9-10

²⁸ Axa xikmatikah, nin itemakixtilis Dios pewas kinmatiltiskeh non amo judíojtch, iwa yejwah kikakiskeh.

²⁹ Ijkuak Pablo ijko otlajto, n judíojtch okiskeh iwa oyajkeh mokualanijtiwih.

³⁰ Pablo omoka ome xiwitl ompa Roma itech se kali kan okitlanejtoka, iwa okinseliaya nochteh akimeh okontlajpaloayah. ³¹ Iwa okintlapowiaya kenijki Dios tlanawatia, iwa okinmachiaya itlajtol Toteko Cristo Jesús. Amayik opinawaya iwa amaka itla okiliaya.

San Pablo kintlajkuililia n Romanos

Pablo kintlajkuililia n tokniwah tlaneltokakeh non chantitokeh Roma

¹ Ne Pablo, niktetikilia n Cristo Jesús. Dios onéchnotski iwa onechpéjpenki maniktem-atilti n kualitlájtole de Dios.

² Nin kualitlájtole, yowejka Dios okinkakiti itech itlajkuilol, ijkuak iprofetajwah oki-ijkuilojkeh. ³ Nin kualitlájtole kinextia Cristo Jesús otlákatki kemi tejwah titlakatih, iwa walewatok itech rey David. ⁴ Pero ijkuak omoyoliti de kan kateh non yomikkeh, n Espiritu Santo okinmatilti nochteh Cristo milák Ikone n Totajtsi Dios iwa kipia weletílistli. ⁵ Por Cristo Jesús, Dios onechnextili itlasojtlalis iwa onechtítlanki para maniketlapowi itlajtol, iwa ijko nochteh n tlaltikpaktlakah makineltokakah iwa makitlakitakah. ⁶ Nomejwah noiwa Dios onoméchnotski para xiyetokah iaxkawah n Cristo Jesús. ⁷ Yika, nomechtlajkuililia nomejwah akimeh nonchantitokeh Roma. Dios nomechtlasojtla iwa onoméchnotski para xiyetokah nonyolchipawakeh inawak. Totajtsi Dios iwa Toteko Cristo Jesús manomechmakakah intlatiochiwalis iwa inyolsewilis.

Pablo kineki yas Roma

⁸ Achto nimotlasojkamati inawak Dios itech itoka n Toteko Cristo Jesús, por nochteh nomejwah. Porke itech nochi n tlaltikpaktli, motlapowia de nomotlaneltokalis. ⁹ Porke Dios kuali kimatok, iwa niktetikilia ika nochi noespíritu kemandikematiltia n kualitlájtole de Ikone, iwa ne nochipa nomechilnamiki ijkuak nimotiotsajtsilia. ¹⁰ Ixmostla niktlatlaujtia Dios, manechkawili manomechontlajpaloti, tla ye kimonekiltia. ¹¹ Porke nikneki nomechitas iwa nomechtiochiwas ika n Espiritu para ijko okachi ximochikawakah. ¹² Ijki nomechilia para matimoyolchikawakah tosepah itech totlaneltokalis non tiksepampixtokeh.

¹³ Nokniwah, nikneki xikmatikah, miak welta niknektok nias nomechtlajpaloti, pero asta axa itla nechtsakuilia iwa amo weleti nio. Yowejka niknektok nias nomechitati para nikinmoololoti oksikimeh tokniwah non kateh nomowah, ijko kemi onikinmoololo oksikimeh tokniwah non amo judójtch. ¹⁴ Porke ye non noteki, iwa saman trato nikpia de nikintlapowis akimeh tlajtoah griego iwa akimeh amó, akimeh ixtlamatih iwa akimeh amo ixtlamatih. ¹⁵ Yika, sa nimochixtok nomechmatiltiti n kualitlájtole de Dios nomejwah akimeh nonchantitokeh Roma.

N kualitlájtole de Dios kipia weletílistli

¹⁶ Ne amo nipinawa niktetlapowis n kualitlájtole, porke ye iweletilis Dios para mamomakixtikah nochteh akimeh kineltokah. Achto oajsito kan judójtch, pero axa noiwa oajsito kan amo judójtch.

¹⁷ Porke n kualitlájtole non temaxitia techititia kenijki Dios techita tichipawakeh ijkuak titlaneltokah inawak. Sanwel ika totlaneltokalis, kemi kijtoa itlajkuilol Dios: “N yolchipawak ika itlaneltokalis yolitos.” *Hab. 2:4*

Intlajtlakol n tlaltikpaktlakah

¹⁸ De milajka, ikualanilis Dios moteititia de ilwikak, impan nochteh n tlakah amokualteh iwa non amo kitlakita Dios, iwa por non tlajtlákole non kichiwah, kitsakuilia tlan milák, para oksikimeh amo makimatikah. ¹⁹ Nochteh n tlaltikpaktlakah kimatih onka Dios, porke Ye inewia kinmoititia. ²⁰ Maski se amo weleti kita n Totajtsi Dios, weleti tikitah itech nochi tlan ye okichijchi. Iwa desde ijkuak okichijchi n tlaltikpaktli, nochi technextilia onka Dios iwa kipia weletílistli non ayik tlamis, yika, amaka weletis kijtos amo okimatia kox onka Dios. ²¹ Maya okimatkeh Dios milák onka, amo okiweyijkachijkeh nion omotlasojkamateh inawak. Yej ok se okichijkeh iwa san tlan okinekeh opé kiyeyjekoliah tlan amitla ipati. Semi oyoltlakuawakeh iwa asta mach ok itla weletih kajsikamatih. ²² Yejwah momachiliah ixtlamateh, pero san kuatlapolojtch. ²³ Yejwah ayakmó kiweyijkachiwah Dios non ayik

mikki, yej kinweyiliah diosmeh kemi tlakah non mikkih, kemi totomeh, koameh iwa non kimpiah nawi inmikxiwah, ninteh san kinmachijchiwah n tlakah akimeh noiwa mikkih.

²⁴Yika Dios okinkajka makichijtinemikah san tlan pitsotik kelewia inkuervo iwa tepinati nochi tlan kimotoktijtinemih. ²⁵Porke okipatlakeh Dios non de milajka, iwa okineltokakeh tlan amo milák. Okitlakitakeh iwa okiweyilijkeh nochi tlan Dios okichijchi, iwa amo okiweyijkachijkeh Dios, Akin moneki se makiweyijkachiwa nochipa. Ijkó mamochiwa.

²⁶Yika, Dios okinkajka makichiwakah tlan amo kuali kelewia inkuervo. Iwa axa asta n siwameh yomoixkopkeh iwa yopé mowilitah san yejwah. ²⁷Ijkó noiwa, sikimeh tlakah ayakmó kineki kochiskeh iwan insiwa, porke yopé chikawak kinmelewiah oksikimeh tlakah iwa kinekih kochiskeh inwah. Semi weyi tepinati tlan kimotoktijtinemih, iwa ijkó inselti kimotlaniliah tlaijyowiskeh ika kokólisteh non kinmajsih itech tlan amo kuali kichiwah.

²⁸Yika, kemi amo okinekeh kichiwaskeh tlan Dios kijtoa, Dios okinkajka itech intlanamikilis pitsotik, iwa opé kichiwah tlan amo moneki kichiwaskeh. ²⁹Tentokeh ika tlan amokuali. Mopitsotilijtinemih ika inkuervo, amo yolmilajkameh, tominápisteh iwa teixpolojkeh. Semi xíkojteh, temiktijkeh, kichiwah mamokualanikah oksikimeh, teka-jkayajkeh, kinmixtlapololtiah oksikimeh itech tlan pitsotik, iwa xolópijteh, ³⁰tepojpojkeh, kikokoliah Dios, tlaijwikaltiah, moweyiliah iwa xankuameh. Satlawel kimatih kenomi kitemachtiskeh tlan amokuali, amo kintlakitah intajwah, ³¹amo kimatih tlakakih, amo kichiwah tlan kijtoah, amo kimatih tetlasojtlah, amo kimatih tetlapojpolwiah, iwa amo kimatih teiknomatih. ³²Nonteh tlakah kuali kimatih tlan Dios yotlanawati, yejwah kuali kimatih akimeh ijkó kichiwah kuali mamikikah, pero mixewia ok kichijtinemih tlajtlákoli, iwa kita ika pakflístli ijkuak oksikimeh ijkó kichiwah.

2

Dios techyolkuitis ika tlan milák

¹Ijkó kiné, tla te titepojpoa amo mitstlapojpolwiskeh, mach mitsita akin te, porke ijkuak tikpojpoa se mokni, san te monewia timotlajtlakoltia, porke noiwa tikchiwa tlan yejwah kichiwah. ²Tejwah tikmatokeh Dios kintlaijyowiltis kemi moneki, akimeh ijkó kichiwah. ³Iwa te, non tikiinpojpoa oksikimeh iwa noiwa tikchiwa tlan yejwah kichiwah, amo xikmoli ticholos ijkuak Dios tetlaijyowiltis. ⁴Mach amo tikmati tikixnamiki itlasojtlalis Dios, iwa amo tikkajsikamati iteiknomatilis mitstoktia ximoyolpatla. ⁵Pero te yotiyoltlakuawak iwa amo tikneki timoyolpatlas inawak Dios. Yika san te monewia tikmotetemilijtok miak tlaijyowílistli. Non tlaijyowílistli wetsis mopa itech neká tonati ijkuak Dios wits kintlajtlakoltiki ika tlan milák akimeh okichijkeh tlan amokuali. ⁶Ijkuak Dios tetlaxtlawiki ijkó kemi ti sejsmeh otikchijkeh: ⁷Dios kinmakas yankuik nemílistli akimeh kitemoa imawistilis, iwa kinyektenewaskeh iwa kinmakas tlan onka ilwikak akimeh nochipa kichiwah tlan kuali. ⁸Pero Dios kintlaijyowiltis ika ikualanilis nekateh akimeh moweyiliah iwa amo kitlakitah tlan milák, yej kichiwah tlan amokuali. ⁹Yetos tlaijyowílistli iwa neyolkókoli para nochteh non kichijtinemih tlan amokuali, achto n judíojteh iwa non amo judíos noiwa. ¹⁰Pero akimeh kichiwah tlan kuali, Dios kichiwas makinweyijkatlalakah iwa makintlakitakah. Noiwa kinmakas yosewílistli, achto n judíojteh iwa non amo judíos noiwa.

¹¹Porke Dios amo san techikotlasojtla, ¹²yika, nochteh akimeh kichiwah tlajtlákoli iwa amo kixmatih n tlanawatílistli, mikiskeh maya amo okixmatkeh non tlanawatílistli. Iwa akimeh kichiwah tlajtlákoli iwa kixmatih n tlanawatílistli, Dios kinmixkomakas ika tlan kijtoa non tlanawatílistli. ¹³Porke Dios amo kinmita yolmilajkameh akimeh san kikakih n tlanawátili, yej akimeh kichiwah. ¹⁴N tlakah non amo judíojteh, non amo kipiah n tlanawátili, pero kichiwah tlan kijtoa n tlanawátili maya amo kixmatih, yejwah innewiah kipixtokeh intlanawatil. ¹⁵Iwa ika tlan kichiwah kiteititiah nik kipixtokeh non tlanawátili itech inyolo. Iwa intlayejyekolis kiteititia, iwa tlan kiyeyekoliah kinteilis noso

kintlapojpolwis, ¹⁶ itech neká iksemi tonati ijkuak Dios kinmixkomakas n tlaltikpaktlakah. Ijkó kemi kijtoa n kualitlájtohi de Cristo Jesús non ne niktetlapowijtinemi. Ap. 20.11-15

N tlanawátli iwa n judíojteh

¹⁷ Pero te tikijtoa ti judío, iwa timotlaxilia itech motlanawatil iwa timoweyilia itech Modios. ¹⁸ Tikixmati tlan Dios kipaktia, iwa n tlanawátli mitsititia kenijki tikpejpenas tlan okachi kuali. ¹⁹ Tikmolia tikmati kenomi tikinyakanas akimeh amo tlachiah, iwa tikmachilia tiweletis tikintlawilis akimeh nemih kan tleyua. ²⁰ Timomachilia tikmati kenomi tikinmachtis akimeh amitla kimatih, iwa kenijki tikinyakanas akimeh ok kateh kemi kokoneh inawak Dios, porke kemi tikpixtok n tlanawátli timomachilia tiixtlamatini iwa tikixmati nochi tlan milák. ²¹ Yika, tla te tikinmachtia oksikimeh, ¿tleka amo timomachtia san te monewia? Iwa tla tikinmilia oksikimeh amokuali se matlachteki, ¿tleka te titlachteki? ²² Tla te monewia tikijtoa amo kuali se mamomekati, ¿tleka timomekati? Tla te tikinkokolia n diosmeh non kinmachijchiwah, ¿tleka titlachteki kan intiopa? ²³ Semi timoweyilia porke tikixmati itlanawatil Moisés, pero tikixpanawia Dios porke amo tiktlakita non tlanawátli. ²⁴ Yika itlajkuilol Dios kijtoa: “Akimeh amo judíojteh tlajtoah fiero de Dios por nomotlajtlakol.” Ez. 36:20

²⁵ Milák, akin mosirkunsidarao iwa kichiwa tlan kijtoa itlanawatil Moisés, n sirkunsisión kipalewia. Pero tla amo tiktlakita n tlanawátli, mach itla ipati mosirkunsisión. ²⁶ Yika akin amo kajki sirkunsidado pero kichiwa tlan kijtoa n tlanawátli, Dios kita kemi yetoskia sirkunsidado maya amo kajki sirkunsidado. ²⁷ Akin amo sirkunsidaritok itech ikuerpo, pero kichiwa tlan kijtoa n tlanawátli, mitstlajtlakoltis te akin amo tiktlakita non tlanawátli maya tikpixtok itlajkuilol iwa tisirkunsidaritok. ²⁸ Porke mach ti judío san por tisirkunsidaritok itech mokuerpo. N de milajka sirkunsisión amo non techtlaliliah itech tokuerpo. ²⁹ Se non de milajka judío, ye akin kitlakita Dios ika nochi iyolo, iwa kajki sirkunsidado itech iyolo. Non sirkunsisión techtlalilia n Espiritu iwa amo porke se kitlakita tlan kijtoa itlanawatil Moisés. Yika, se mochiwa judío, porke Dios ijko techita, iwa amo por tlan kijtoah n tlakah.

3

Dios kichiwa tlan kijtoa

¹ Ijkó kiné, ¿tlan kipalewia se tlakatl mayeto judío? noso ¿tlan ipati n sirkunsisión? ² Sa tlawel ipati. Ahto, Dios okinmaktili itlajtol n judíojteh. ³ Pero ¿tlanón mochiwaskeh tla sikimeh de yejwah ayakmó kineltokah? ¿Nonkiyejyekoliah Dios noiwa ayakmó kichiwas tlan yokijto? ⁴ ¡Ayik! Dios nochipa kijtoa tlan milák, maya nochteh n tlakah mayetokah tekajkayajkeh. Kemi kijtoa itlajkuilol Dios:

Ika tlan tikijtoa, timoteixmatiltis tikijtoa tlan milák, iwa titlatlanis ijkuak mitstlatsintokiskeh.

Sal. 51:4

⁵ Pero tla tejwah titlajtlakolchiwah tikteititiah Dios Ye yolmilajka, tla ijko, ¿tlanón tikijtoskeh? ¿Weletis tikijtoskeh amokuali tlan Dios kichiwa por techtlajjowiltia? Nitlajtoa kemi tlajtoah n tlaltikpaktlakah. ⁶ ¡Mach ijko! Porke tla Dios kichiwa tlan amokuali, ¿kenomi weletis kintlajtlakoltis n tlaltikpaktlakah?

⁷ Pero ijkuak ne nitlakajkayawa nikteititia okachi itlajtol Dios milák, iwa okachi kiselia weyflistli, ¿tleka kiné non nechteilia kemi nitlajtlakole? ⁸ Ijkó kiné: ¿Tleka se amo kichiwa tlan amokuali para mawiki tlan kuali? Ye ni tlan sikimeh techpojpojtinemih, tejwah ijko titlamachtiah. Pero akimeh ijko kijtojtinemih, kuali makintlajjowiltikah.

Tinochteh titlajtlakolejkeh

⁹ ¿Tlan tikijtoskeh? ¿Tejwah ti judíos okachi tikualteh ke non amo judíos? ¡Amó! Porke yomotak n judíojteh iwa non amo judíojteh, tinochteh titlajtlakolejkeh. ¹⁰ Itlajkuilol Dios kijtoa:

Amo onka nion se tlakatl yekmilajka, nion se.

¹¹ Amo onka nion se non makajsikamati tlan Dios kimonekiltia;

amo onka nion se non de milajka kitemoa Dios.

¹²Nochteh okonankeh ok se ojtli, nocteh omoixpolojkeh.

Amo onka nion se non makichiwa tlan kuali, nion se.

Sal. 14:1-3; Ec. 7:20

¹³Intoskak kemi se miketékochtli non tlapotok;

ika innenepil tlakajkayajtinemih.

Itech intentsi kipixtokeh beneno kemi se koatl.

¹⁴Intlajtol tentok ika tlan amo kuali iwa tlan teyolkoko.

Sal. 10:7

¹⁵Ika inmikxiwah motleloah para temiktiskeh.

Is. 59:7

¹⁶Sentetl kan ik yawih texixiniah iwa teixpoloah.

¹⁷Iwa amo kixmatih n ojtli non kinmakas yolseklistli.

Is. 59:8

¹⁸Iwa amo kilnamikih kox moneki se makiimakajsi Dios.

Sal. 36:1

¹⁹Kuali tikmatokeh nik nochi tlan ijkuilitok itech n tlanawatlistli, kinmilia akimeh kinawatjtok non tlanawatlistli. Yika, nocteh maktsakuakah inkamak iwa kitemakaskkeh kuenta inawak Dios. ²⁰Porke amaka weletis motlajtlakolchipawas inawak Dios por kitlakita tlan kijtoa n tlanawatlistli, porke n tlanawatlistli sanwel techititia tejwah titlajtlakolejkeh.

Timomakixtiah por titlaneltokah inawak Cristo

²¹Pero axa, ayakmó matikonwilanakah n tlanawatlistli, Dios yotechmatiltiko kenomi techtlapojpolwia inawak, iwa ye noni tlan tikajsikamatih ijkuak tikitah n tlanawatlistli iwa nochi intlajkuilol n profetas. ²²Ijkuak tikneltokah Cristo Jesús, ijkuakó Dios techita tichipawakeh de nochi totlajtlakol. Dios ijko kinmita nocteh akimeh kineltokah, iwa amo san sikimeh iwa oksikimeh amó. ²³Porke nocteh otlajtlakolchijkeh, iwa okimopolilijkeh iweyijkachiwalis Dios. ²⁴Pero Dios ika iteiknomatilis techchipawa tinochteh san ijki, akimeh tikneltokah, porke Cristo Jesús okitlaxtla ika iesso por totlajtlakolwah. ²⁵Totajtsi okiteixpanti n Cristo kemi se tlamánali ijkuak okitoya iesso, para ika matechtlapojpolwihak tla tikneltokah. Ijko okichi para technextilis kenijki yekmilajka. Yowejka, Ye okichi kemi amo okimitak totlajtlakolwah. ²⁶Pero axa itech ninteh tonatijmeh Dios techititia Ye kichiwa tlan kuali, porke Ye ya techita tichipawakeh de nochi totlajtlakolwah ijkuak titlaneltokah inawak Cristo Jesús.

²⁷Ijko kiné, ¿kanin ka n weyijkachiwálistli? ¡Opojpoliwik! ¡Tleka!, por tlan se kichiwa. ¡Amó!, yej por tikneltokah Cristo Jesús.

²⁸Kuali tikmatokeh Dios kitlapojpolwia n tlakatl non kitlalia itlaneltokalis itech Cristo Jesús, iwa amo por kitlakita n tlanawatlistli.

²⁹N Totajtsi Dios amo sanwel Dios de n judfojteh. Ye noiwa Dios de nocteh non amo judfojteh. Milák, Ye noiwa Dios de nocteh n tlaltikpaktlakah. ³⁰Porke sanwel se Dios onka, iwa Ye kinmita yolchipawakeh nocteh akimeh kineltokah n Cristo Jesús, iwa amo kita kox kateh sirkunsidados noso amó. ³¹Axa, ¿kijtosneki tiktekitiltjtokeh n tlaneltokálistli para tiktsikitsintiliskeh n tlanawatlistli? ¡Amó! Yej tikteititiah kipia ichikawalis.

4

Matiktakah tlan okichi Abraham

¹Axa, tlan weletis tikkajsiskeh, ¿tlan okitlanki towjekatata Abraham? ²Tla Abraham okiseli Dios kemi yekmilajka por tlan okichi, ye kipiaskia tlan ika moweyiliskia innawak oksikimeh tlakah, pero amo inawak Dios. ³Yika, n tiotlajkuiloli kijtoa, “Dios okiseli Abraham, porke Abraham okineltokak, yika Dios okitak kemi se tlakatl yolchipawak.” *Gn. 15:6* ⁴Ijko kiné, se tetlakewáli, ijkuak kitlaxtlawiah, itlaxtlawil amo kitliokolia, yej kimakah porke ya kiwikiliah. ⁵Pero tla se tlakatl amitla kichiwa para momakixtis, pero kineltoka Dios kitlapojpolwis porke ye kintlapojpolwia n tlajtlakolejkeh, Dios kiselia non tlakatl porke inawak otlaneltokak. ⁶Inewia n David okijto, satlawel miak tlatiochiwálistli kipia neká tlakatl non Dios kiselia kemi yolchipawak iwa amo kita tlan yokichijka non tlakatl. ⁷David okijto:

¡Dios kintiochiwas nekateh akimeh Dios kintlapojpolwia de nochi tlan amokuali okichijkeh iwa kinmilkawilia intlajtlakolwah!

⁸ Miak pakílistli kipia n tlakatl akin Totajtsi amo kitilia tlan amokuali okichi. *Sal. 32:1-2*

⁹ Milák, n tlatiochiwálistli weletis kipiaskheh non kateh sirkunsidados, iwa non amo kateh sirkunsidados. Dios okiseli Abraham kemi se tlakatl yolchipawak por itlaneltokalis.

¹⁰ ¿Kemia Dios okijto Abraham okatka se tlakatl yolchipawak? ¿Ijkuak omosirkunsidaro, noso ijkuak ayamó? Amo satepa, yej achto de mosirkunsidaros. ¹¹ Iwa satepa, Abraham okiseli n sirkunsisión itech inakayo, kemi se ixneskayotl noso kemi se señas non ika motaskia nik Dios achto okitak Abraham yolchipawak porke milák okineltokak. Yika Abraham omochiwako teta de nochteh akimeh milák kineltokah Dios maya amo kateh sirkunsidados, iwa ijko Dios noiwa kinselia kemi yolchipawakeh. ¹² Milák, Abraham teta de akimeh kateh sirkunsidados, pero amo san por kateh sirkunsidados, yej porke milák kineltokah Dios kemi Abraham okineltokaya desde ijkuak ayamó okatka sirkunsidado.

Dios okimák n Abraham tlan yokilijka por okineltokak

¹³ Dios okitlajtolsentlalili n Abraham iwa iwejkaixwihwah kinmaxkatiliskia n tlaltípkaktli. Okisentlalili, amo por Abraham okitlakitak tlan kijtoa n tlanawatílistli, yej por okineltokak Dios. Yika por itlaneltokalis, Dios okiseli n Abraham. ¹⁴ Porke tla akimeh kitlakitah n tlanawatílistli sanwel yejwah kiseliskiah tlan Dios yokijto techaxkatilis, n tlaneltokálistli ayakmó kipiaskia ipati, iwa tlan Dios okisentlali noiwa kipoloskia ipati. ¹⁵ Porke kan onka se tlanawátili iwa amo kitlakitah kitlajiyowiltiah akin amo kitlakita. Pero kan amo onka tlanawátili, amaka weletis kitlajtlakoltiskeh.

¹⁶ Yika, tlan Dios okisentlalili Abraham iwa nochteh iwejkaixwihwah, wits ika tlaneltokálistli. Ijko kiné, Dios amo okisentlalili sanwel akimeh kitlakitah n tlanawatílistli, yej noiwa para nochteh akimeh tlaneltokah kemi Abraham otlaneltokak. Axa Abraham mochiwa teta de nochteh akimeh tlaneltokah. ¹⁷ Kemi kijtoa n tiotlajkuíloli: “Onimitlali titeta itech miaktikeh tlaltípkaktlakah.” *Gn. 17:5*

Porke Dios non Abraham okineltokak, kinyolitia non yomikkeh, iwa kinotsa tlan ayamó onka kemi ya yetoskia.

¹⁸ Dios okisentlalili Abraham kimpías miaktikeh ipilwah, Abraham amo okimatia kenomi tlamochiwaskia, maya ijko okineltokak Dios. Yika, Abraham omochi “teta de miaktikeh tlaltípkaktlakah”. *Gn. 15:5*

¹⁹ Abraham amo okipolo itlaneltokalis, maya yokipiaya makuilipóali xiwitl iwa yokimatia ye iwa isiwa Sara satlawel ya tetajtsintsinteh iwa ya mikiskiah, yika ayakmó weletiskiah kimpíaskiah impilwah. ²⁰ Abraham mach okimoli kox milák noso amo milák tlan Dios okikakiti kimakas. Yej okachi okineltokak iwa omoyolchikawaya inawak Dios iwa okiweyijkachiwaya. ²¹ Abraham kualí okimatia Dios kipia weletílistli para kichiwas nochi tlan kisentlalia kitemakas: ²² Yika Dios okitak Abraham kemi yolchipawak por itlaneltokalis. *Gn. 15:6*

²³ Tlan omoijkuilo itech itlaneltokalis Abraham, amo san para ye omoijkuilo, ²⁴ yej noiwa omoijkuilo por tejwah, porke ika totlaneltokalis, Dios noiwa techselia kemi tiyolchipawakeh akimeh tikneltokah akin okiyoliti n Jesús Toteko, ²⁵ akin okitemaktijkeh para makajkokuika itech krus por totlajtlakolwah, iwa omoyoliti para matitlaneltokakah inawak.

5

Pakílistli iwa yolsekílistli

¹ Ijko kiné, ken otikneltokakeh Cristo Jesús ya tikpiah yolsekílistli, iwa axa Dios ya techita tiyolchipawakeh. ² Yika, por Cristo Jesús iwa ken otikneltokakeh, kualí titlakxilitokeh iwa tipakih, porke tikmatokeh tiyetoskeh ilwikak inawak Dios. ³ Iwa amo san noni, noiwa tipakih ijkuak titlajiyowiah, porke tikmatokeh ijkuak titlajiyowiah techpalewia para matitlaxikokah. ⁴ Iwa ijkuak tikxikoah nochi tlajiyowílistli, okachi timoyekchikawah. Ijkuak timoyekchikawah okachi timoyolchikawah. ⁵ Iwa kualí tikmatokeh nik tikseliskeh

tlan Dios yokisentlali techmakas, porke Dios yokitemiti toyolo ika miak tlasojtlálistli non Iespíritu Santo otechmák.

⁶ Porke neká tonati ijkuak tonewiah amo otiweletiah otimomakixtiayah, Cristo owala omikiko por nochteh n tlajtlakolejkeh. ⁷ Mach aka kinakis motekawilis makimiktikah ipatka ok se tlakatl; maya mayeto de milajka kuali tlakatl, pero mixewis aka kinakis makimiktikah ipatka se akin kualitlakatl. ⁸ Pero Dios techititia itlasojtlalis keman Cristo Jesús omikki topatka, maya otikatkah titlajtlakolejkeh. ⁹ Iwa axa tla Dios ya techita tiyolchipawakeh de totlajtlakolwah por iesso n Cristo Jesús Akin okitoya ijkuak okimiktijkeh, axa okachi kuali tikmatih Cristo techmakixtis de ikualanilis Dios. ¹⁰ Porke tla Dios otechtlapojpolwi ika imikilis Ikone ijkuak tejwah ok otikkokoliayah, axa okachi tla Ye yotechtlapojpolwi, yotimomakixtijkeh por Cristo Jesús. ¹¹ Iwa amo san noni, yey noiwa titlawelpakih inawak Dios por tlan okichi n Toteko Cristo Jesús. Yika, por Cristo yotimoyekkajkeh inawak Dios.

Adán iwa Cristo

¹² Ijkó kiné, por itlajtlakol se tlakatl n tlajtlákoli okalak itech nin tlatlíkpaktli iwa okualík mikílistli, ijkó noiwa nochteh mikkih porke nochteh otlajtlakolchijkeh. ¹³ Ijkuak itlanawatil Moisés ayamó okatka, yokatka miak tlajtlákoli itech nin tlatlíkpaktli. Pero kan amo moixmati n tlanawatílistli, amaka kitlajtlakoltiskeh. ¹⁴ Pero nochteh n tlatlíkpaktlakah non onenkeh desde Adán asta Moisés omikkeh porke okichijntinkeh tlajtlákoli, pero mach por amo okitlakitakeh se tlanawáteli, kemi okichi Adán; akin amo okitlakitak itlanawatil Dios. Pero Adán omotaya kemi non satepa walaskia.

¹⁵ Pero itlajtlakol Adán, mach weletis motamachiwas ika tlan Dios techtliokolia. Porke ika itlajtlakol se tlakatl, miakeh omikkeh. Pero n tlasojtlálistli iwa n tlatliokólili wits de Dios iwa momiakilia san por se tlakatl, Ye, Cristo Jesús. Okachi weyi kijtosneki iwa miaktikeh tlakah kimpalewia. ¹⁶ Itlajtlakol Adán mach weletis motamachiwas ika itemakixtilis non Dios techtliokolia. San por se tlajtlákoli, owala itlajiyowilis Dios intech n tlatlíkpaktlakah. Pero maya miak tlajtlákoli okichijkeh n tlatlíkpaktlakah, axa Totajtsi Dios techmaka n tlatliokólili non kichiwa matechita Dios ken tichipawakeh de totlajtlakolwah. ¹⁷ Porke tla ika itlajtlakol se tlakatl, Adán, nochteh n tlakah mikkih, axa akimeh kiseliah n weyi tlatliokólili ika n tetlapojpolwílistli non Dios kitemaka sanijki, yolitoskeh nochipa san por se tlakatl, Ye, Cristo Jesús.

¹⁸ Por itlajtlakol Adán nochteh n tlakah okintlajtlakoltijkeh, ijkó noiwa por se tlakatl non Itoka Cristo Jesús, non okichiwako tlan kuali. Nochteh n tlakah weletis yetoskeh chipawakeh de intlajtlakol para yeknemiskeh. ¹⁹ Kijtosneki, por se tlakatl non amo otelakitak, miakeh omokopkeh tlajtlakolejkeh. Pero ijkó noiwa, por se tlakatl, Cristo non otelakitak, miakeh tlakah yetoskeh chipawakeh de intlajtlakol.

²⁰ Itlanawatilis Moisés owala para matikmatikah miak tlajtlákoli tikpiah, pero ijkuak tikmatih miak tlajtlákoli tikpiah, iteiknomatilis Dios omomiakili. ²¹ Yika, ijkó kemi n tlajtlákoli otlanawatijtiwalayah iwa okualík mikílistli, axa noiwa itlasojtlalis Dios matlanawati ika iyekmilawalis para matikpiakah nemílistli nochipa, por Toteko Cristo Jesús.

6

Yotimikkeh itech totlajtlakolwah pero tiyolitokeh iwan Cristo Jesús

¹ Tlan tikijtoskeh? ² Okachi titlajtlakolchijntinemiskeh para mamomiakili iteiknomatilis Dios? ³ Saman amó! Porke tla tejwah yotimikkeh imak tlajtlákoli, ¿kenijki ok weletis titlajtlakolchijntinemiskeh? ⁴ Mach amo nonkimatih nomejwah nochteh akimeh timoseitiliah iwan Cristo Jesús ijkuak timokuaatekiah, noiwa timoseitiliah itech imikilis? ⁵ Porke ijkuak otimokuaatekijkeh, otechtookakeh sansikah iwan Cristo, iwa otimiktokah para satepa matechylolitikah iwa axa tiyolitoskeh nochipa kan ilwikak. Ijkó noiwa Totajtsi Dios ika iweletilis okiyoliti n Cristo Jesús.

⁵ Porke tla tejwah yotimoseitilijkeh iwan Cristo itech imikilis, noiwa otimoseitilijkeh ijkuak Ye omoyoliti. ⁶ Ya tikmatokeh, tlan achto otikchiwayah opojpoliwiw ijkuak okikrusifikarojkeh n Cristo, para mapojpoliwi ichikawalis tlan amo kuali kelewia tokuerpo, iwa ayakmó matechmapixto n tlajtlákolli. ⁷ Porke akin yomikki, ayakmó kichijtinemi tlajtlákolli. ⁸ Yika, tla tejwah yotimikkeh iwan Cristo, tikneltokah noiwa tiyolitoskeh iwan Ye, ⁹ porke tikmatokeh Cristo Jesús yomoyoliti itsalko n mikemeh, iwa ayik oksepa mikkis. N mikílistli ayakmó kinawatia n Cristo. ¹⁰ Ijkuak Cristo omikki, omikki san semi imak tlajtlákolli. Pero ijkuak omoyoliti, omoyoliti para kichiwas tlan Dios kimonekiltia. ¹¹ Ijkó noiwa, xikajsikamatikah nomejwah yononmikeh imak n tlajtlákolli, pero nonyolitokah para Dios por nonseititokah iwan Cristo Jesús Toteko.

¹² Yika, nomejwah amo xikkawilikah manomechnawati n tlajtlákolli itech nomokuervo non mikkis, para amo manomechtojtowepa itech tlan amokuali kineki kichiwas nomokuervo. ¹³ Amo xiktemakakah nomokuervo itech tlajtlákolli para kichiwas tlan amokuali. Jej ximotemaktikah inawak Dios kemi yaskia ononmikkeh iwa ononmoyolitijkeh. Xiktemakakah nomokuervo ika yekmilawálistli para Dios. ¹⁴ Ijkó n tlajtlákolli ayakmó kípías weletílistli nomotech, porke nomejwah ayakmó nonkateh imak itlanawatil Moisés yěj nonkateh imak itlasojtlalis Dios.

Ya ti iaxkawah Dios para tikchiwaskeh tlan kuali

¹⁵ Ijkó kiné, ¿okachi titlajtlakolchiwaskeh porke amo tikateh imak itlanawatil Moisés, yěj itech itlasojtlalis Dios? ¡Amó! ¡Ayik ijko xikmolikah! ¹⁶ Nomejwah kuali nonkimatih, tla aka tlakatl motemaktia kemi tlanémaktli imak se iteko moneki makitlakita, tla nomejwah itla nonkitlakitah nonmochiwah nontlanémakteh, ijko kiné, tla tiktlakita n tlajtlákolli, noni kualika mikílistli, pero tla tiktlakitas Dios, mochiwa Moteko para tikchiwas tlan kuali. ¹⁷ Niktlasojkamati Dios porke maya achto ononmotemaktijkeh itech tlajtlákolli kemi nonyetoskiah nontlanémakteh, nomejwah ya nonkitlakitah ika nomoyolo n tlamachtílistli non onomechmatiltijkeh. ¹⁸ Axa ken ayakmó nomechnawatia n tlajtlákolli, nomejwah axa ya nontlanémakteh itech n yekmilawálistli. ¹⁹ Nomechtlapowia kemi se tlatikpaktlakatl, ijko kemi achto ononkitemaktijkeh nomokuervo kemi tlanémaktli itech tlan pitsotik, iwa itech tlan amokuali para nontlajtlakolchiwaskeh, axa, xiktemaktikah nomokuervo kemi tlanémaktli para nonkichiwaskeh n yekmilawálistli iwa para nomechylolchipawaskeh.

²⁰ Ijkuak ononilpitokah itech tlajtlákolli, nomejwah mach ononnemiah ika nomoyolo chipawak. ²¹ Pero, ¿tlan ononkitlankeh de nochi tlan ononkichijtineneh, ika tlan axa nonpinawah? Porke nochi non tlajtlákolli kualika mikílistli. ²² Pero axa nomejwah ayakmó nomechmapixtok n tlajtlákolli, yěj axa ya nonteaxkatitokah inawak Dios para nonkitlakitaskeh. Noni kema nomechpalewia, porke kichiwa xinemikah ika nomoyolo chipawak inawak Dios, iwa nonkípíaskeh nemílistli non ayik tlami kan ilwikak. ²³ Porke n tlajtlákolli tetlaxtlawia ika mikílistli, pero tlan Dios kitetliokolia ye n nemílistli non ayik tlami keman tiseititokah iwan Toteko Cristo Jesús.

7

Axa titeaxkawah inawak Cristo

¹ Nokniwah, nomejwah akimeh nonkixmatih itlanawatil Moisés, ya nonkimatih nik non tlanawátilli sanwel tlanawatia ijkuak se yolitok. ² Xikkakikah, n tlanawátilli kijtoa, se siwatl non yomonamikti trato seititos iwan iokich tla ok onka. Pero tla iokich mikki, ompa tlami nochi, iwa makisa itech non tlanawátilli non okipixtoka iwan iokich. ³ Yika, tla non siwatl monepano iwa ok se tlakatl iwa iokich ok onka, kijtosneki san kimomekatijtok non tlakatl. Pero tla iokich mikki, n tlanawátilli ayakmó kinawatijtos iwa ye ya weletis monamiktis iwa n ok se tlakatl, iwa mach ok san kimomekatijtos.

⁴ Ijkó kiné nokniwah, nomejwah noiwa yononmikkeh inawak non tlanawátilli keman ononmikkeh iwan Cristo, para xiyetokah nonteaxkawah de Akin omoyoliti de kan mikemeh, para ijko se weletis kichiwas tlan Dios kineki. ⁵ Porke ijkuak ok otikchiwayah

tlan tokuerpo okelewiaya, nochipa otechyoltilanaya n tlajtlákoli para matikchiwakah tlan amo kuali. Nochipa otikchiwayah tlan itlanawatil Moisés okijtoaya amo matikchiwakah, iwa n tlajtlákoli otechwikaya matimikikah. ⁶ Pero axa yotimikkeh imak n tlanawátili non otechmapixtoka, iwa ayakmitla techsakuilia para tikmopantiskeh Dios itech nin yánuik nemílistli non techmaka n Espíritu, iwa amo itech n ya wewe tlanawátili non ijkuilitok.

N tlajtlákoli non kajki notech

⁷ Axa, ¿tlan tikijoskeh? ¿N tlanawátili, ye tlajtlákoli? ¡Amó! Pero tla amo por n tlanawátili ne amo nikixmatiskia tlan se kelewia tlajtlákoli. Porke n tlanawátili kijtoa: “Amo xikelewi tlan amo moaxka.” Éx. 20:17

⁸ Pero n tlajtlákoli omokitski itech n tlanawátili, iwa onechtokti manikchiwa tlan amo oniknekiya porke n tlajtlákoli omokitski itech n tlanawátili, porke kan amo onka tlanawátili n tlajtlákoli kemi yetoskia yomikki. ⁹ Yowejka amo onikixmatia n tlanawátili, pero ijkuak n tlanawátili owala, n tlajtlákoli omoyoliti, iwa ne onimik. ¹⁰ Ika noni, axa mota itlanawatil Moisés non kichiwasia maniyolito, san onechmák nomikilis. ¹¹ Porke n tlajtlákoli omopalewi itech n tlanawátili iwa onechkajkaya, iwa ika non tlanawátili onechmikti.

¹² Yika, inewia n tlanawátili chipawak, iwa tlan tlanawatia noiwa chipawak, yekmilajka iwa kuali. ¹³ Ijkó kiné, ¿kijtosneki n tlanawátili onechwik manimiki? ¡Amó! N tlajtlákoli ye akin onechmikti, iwa ijko omotenexti nik milák tlajtlákoli. N tlajtlákoli mach omotaya ijkuak amo okatka n tlanawátili, yika itlanawatil Moisés okitenexti n tlajtlákoli mach kuali.

¹⁴ Tikmatih n tlanawatílistli walewatok itech Espíritu. Pero ne ni tlaltikpaktlakatl onimonamák imak tlajtlákoli. ¹⁵ Amo nikajsikamati tlan nikchiwa, porke amo nikchiwa tlan ne nikneki, yej nikchiwa tlan ne nikkokolia. ¹⁶ Pero tlan amo nikneki nikchiwas, ye nikchiwa, ompa nikajsikamati n tlanawátili milák kuali. ¹⁷ Ijkó kiné, ayakmó ne akin nikchiwa, yej kichiwa n tlajtlákoli non kajki nojtitik. ¹⁸ Ne nikmati itech nonemilis amitla kuali onka, ne niknekiskia nikchiwas tlan milák, pero amo niweleti nikchiwa. ¹⁹ Amo nikchiwa tlan milák non ne nikneki, yej nikchiwa tlan amo kuali non amo nikneki. ²⁰ Axa, tla nikchiwa non amo nikneki nikchiwas, ayakmó ne akin kichiwa, yej n tlajtlákoli non kajki nojtitik.

²¹ Yika, ijkuak nikneki nikchiwas tlan kuali, nikita nin tlanawátili amo kuali kajki nojtitik. ²² Ijtitik noyolo nechpaktia itlanawatil Dios, ²³ pero noiwa nikita nojtitik onka ok se tlanawatílistli, ye tlan nechyoltilana manitlatlajkolchiwa, non kixnamiki notlanamikilis, ye ichikawalis n tlajtlákoli non kajki nojtitik iwa nechilpijtok.

²⁴ ¡Nimialma! ¿Akin weletis nechmakixtis itech nin kuerpo non nechwika manimiki?

²⁵ Sanwel Dios weleti ika tlan Cristo Jesús okichiwako. ¡Niktlasojkamati Dios! Iwa ika notlayejyekolis nikchiwa tlan kijtoa itlanawatilis Dios, pero ika nokuerpo nikneki nikchiwas itlanawatilis n tlajtlákoli.

8

N Espíritu kiyakana tonemilis

¹ Ijkó kiné, amo kintlajtlakoltiskeh akimeh seititokeh iwan Cristo Jesús, porke non-teh ayakmó nemi kemi nemi n tlaltikpaktlakah, yej nemi kemi kinyakana n Espíritu. ² Porke itlanawatilis n Espíritu non kitemaka yolílistli por Cristo Jesús onechmakixti imak iweletilis n tlajtlákoli iwa imak iweletilis n mikílistli. ³ N tlanawatílistli amo owéletki otechmakixti imak tolewilis, yika Dios okitítlanki Ikone kemi seme de tejwah ti tlaltikpaktlakah. Jesús omikki iwa omotemakti kemi tlamánali para kintlaxtlawas totlajtlakolwah, iwa ijko okipojpolo ichikawalis n tlajtlákoli. ⁴ Dios ijko okichi para tejwah matiweletikah matikchiwakah tlan kijtoa n tlanawátili, porke ayakmó tinemih kemi nemi n tlaltikpaktlakah, yej kemi n Espíritu kineki.

⁵ Porke akimeh nemih kemi nemi n tlaltikpaktlakah, okachi kintekipachoa tlan onka itech nin tlaltikpaktli, pero akimeh nemih kemi n Espíritu kineki, yejwah okachi kintekipachoa kichiwaskeh tlan n Espíritu kineki. ⁶ Iwa akin sa kilnamiktok kichiwas tlan

ikuerpo kelewia, san semi moixpolos. Pero akin motekipachoa kichiwas tlan n Espírítu kineki, yolitos iwa kiplas yolsewílistli. ⁷Itlayejyekolis n tlajtlakolchi kikokoliah Dios. Porke amo kinekih kitlakitaskesh nion weletih kichiwas tlan kijtoa n tlanawátli. ⁸Yika, akimeh sanwel kinekih kichijtinemiskesh tlan kichiwas n tlaltikpaktlakah amo weletih kipaktiah Dios.

⁹Pero tla Iespírítu Dios chanchiwa nomotech, nomejwah ayakmó nonkichijtinemih tlan kelewiah n tlaltikpaktlakah, yej nonnemi kemi kineki n Espírítu. Akin amo kipixtok Iespírítu n Cristo, amo seititok iwan Cristo. ¹⁰Pero tla Cristo kajki itech nomoyolo, maya n tlajtlákoli yokimikti nomokuerpo, n Espírítu yolitok nomotech porke Dios yonomechyoichipa de nomotlajtlakolwah. ¹¹Iwa tla itech nomoyolo chanchiwa Iespírítu Dios Akin okiyoliti n Jesús ijkuak okimiktijkeh, ika non Espírítu non kajki itech nomoyolo, Dios kiyolitis nomokuerpo non mikki.

¹²Ijó kiné, nokniwah, tikpia se weyi tektil, pero amo matinemikah kemi nemi n tlaltikpaktlakah. ¹³Porke tla nomejwah nonkichijtinemiskesh tlan nomokuerpo kineki, nonmikiskesh. Pero tla ika n Espírítu nonkipojpolah nochi tlajtlákoli tlan nomokuerpo kichijtinemi, ijkuakó nonyolitoskesh nochipa.

¹⁴Nochteh akimeh kinyakana Iespírítu Dios, yejwah tepilwah de Dios. ¹⁵Porke amo ononkiselijkeh se espírítu non teijilpia iwa manomechtokti oksepa ximawikah, yej ononkiselijkeh n Espírítu non ika nonmochiwah ipilwah Dios. Iwa nin Espírítu techkawilia matikijtokah: “¡Abba, Totajtsi!” ¹⁶Nin Espírítu moseitilia iwan toespírítu iwa techilia tejwah ya ti tepilwah de Dios. ¹⁷Iwa ken ya titepilwah de Dios, noiwa tikseliskesh tlan Dios yokijto techtlaaxkatilis sansikah iwa n Cristo, porke axa noiwa tejwah titlajiyowiah iwa n Cristo para satepa noiwa tiyetoskesh ilwikak iwan Ye.

N weyílistli non satepa tikpiaskesh

¹⁸Kuali nikmatok n tlajiyowílistli non axa tipanoah mach weletis motamachiwas iwa n weyílistli non satepa tikpiaskesh. ¹⁹Porke nochi tlan Dios okichijchi, sa kichixtok tonati para mamonextikah akimeh ipilwah Dios. ²⁰Porke nochi tlan Dios okichijchi ojtlakawik, pero amo por ye inewia okinek ijtlakawis, yej porke Dios ijó okimonekilti. Pero maya ijó omochi, ok onka tlan itech se weletis moyolchikajtos ²¹porke ajsiki n tonati ijkuak nochi tlan onka itech nin tlaltikpaktli momakixtis, iwa ayakmó ijtlakawis. Ijkuakó momakixtisesh ipilwah n Dios iwa ijó sansikah kiplaskeh weyílistli. ²²Tejwah tikmatih nochi tlan Dios okichijchi asta axa tenna iwa choka kemi se siwatl ijkuak ya kipiati ikone. ²³Iwa amo san tlan Dios okichijchi tlajiyowia, yej tejwah noiwa akimeh ya tikpixtokeh n Espírítu Santo non Dios yotechmák kemi se tlayakánali para matikmatikah tlan satepa techmakas. Tejwah noiwa satlawel timoyolkokoah, iwa sa tikchixtokeh tonati ijkuak Dios techselis kemi ipilwah, ijkuak kiyankuilis tokuerpo non mikki. ²⁴Porke ika tlan otikchiayah otechmakixtijkeh; pero tlan otikchiayah ayakmó tikchiah porke yotiktakeh. Porke tlan se yokitak, ayakmó para kichias. ²⁵Pero tla tikchiah tlan ayamó tikitah, matikyekchiakah ika pakílistli iwa amo matimosotlawakah.

²⁶Ijó noiwa n Espírítu techpalewia ijkuak timosotlawah. Porke amo timotiotsajtsiliah kemi moneki, pero inewia n Espírítu motlatlajtia inawak Dios por tejwah, ika tiotsajtsílistli non tejwah amo tiweletih tiktenkixtia ika totlajtol. ²⁷Iwa Dios, Akin kixmati toyolo, kimati tlan n Espírítu kineki techilis porke n Espírítu motlatlajtia kemi Dios kipaktia por akimeh iaxkawah.

Tejwah titlatlanih porke tikateh iwa n Cristo

²⁸Tejwah tikmatih nocteh akimeh kitlasojtlah Dios, nochi tlan kichiwas kimpalewia, porke okimpejpenki iwa okinnotski para inwa kichiwas tlan Ye yokimoli. ²⁹Porke akimeh Dios yokinmixmatia desde ijkuak ayamó okatka n tlaltikpaktli, Ye okimonekilti mayetokah kemi Ikone, para ijó Ikone mayeto intetiachka de miaktikeh iknimeh. ³⁰Iwa akimeh Dios okimonekilti mayetokah iaxkawah, Ye okínnotski. Iwa akimeh okínnotski, Dios okimitak ya chipawakeh de intlajtlakol. Iwa akimeh okimitak ya chipawakeh de intlajtlakol, noiwa okinmák iweyilis non Ye kipla.

³¹ ¿Tlan weletis tikijtoskeh de nochi ni? Tla Dios kajki towah, ¿akin weletis itla techtoktis? ³²Dios amo okiyolkoko kitemaktis Ikone, yej okitemakti makimiktikah topatka. Axa ¿nonkineltokah amo techmakas sansikah iwan Ikone non kitlasojtla nochi tlan techilia techmakas? ³³ ¿Akin weletis kinteilis akimeh Dios yokimpéjpenki?, amaka, porke inewia Dios yokintlapojpolwi. ³⁴ ¡Axa amaka techtlajtlakoltis! Cristo Jesús Ye Akin omikki iwa oksepa omoyoliti iwa ewatok ik iyekma n Totajts Dios kan motlatlaujtijtok por tejwah. ³⁵ ¿Akin weletis techachiwas de itlasojtlalis Cristo?

¿N tlaijyowílistli,
n neyolkókoli,
tla techtotojtokah,
n apisotl,
tla techpoloa totlakeh
noso por timikiskeh?

³⁶ Kemi kijtoa itlajkuilol Dios:

Por timitsneltokah, n tlakah nochipa kinekih techmiktiskeh;
techtah kemi ichkameh non kinwikah kan tlamiktilo.

Sal. 44:22

³⁷ Pero itech nochi ni tlan tipanoah, Cristo techmaka chikawálistli para matitlatlanikah porke Ye techtlasojtla. ³⁸ Kualí nikmatok amitla weletis techachiwas de itech itlasojtlalis Dios.

Nion tla timikiskeh,
nion tla tiyolitoskeh,
nion ángelteh,
nion inweletilis noso inchikawalis n espíritus amokualteh,
nion tlan axa tipanotokeh
nion tlan sikin wits,
³⁹ nion tlan wejkapá,
nion tlan wejkatla,
nion itla ok se tlan Dios okichijchi

weletis techachiwas de itech itlasojtlalis, non Ye techmaka por Toteko Cristo Jesús.

9

Dios okimpéjpenki n tlakah de Israel

¹ Ne nikijtoa tlan milák porke nitlaneltoka inawak Cristo, iwa amo nitlakajkawawa, porke n Espiritu Santo kiyakantinemi notlanamikilis, iwa notlanamikilis nechilia milák tlan nikijtoa. ² Ne sa tlawel nimoyolkokoa iwa itech noyolo nochipa onka neyolkókoli, ³ porke asta ne nonewia niknekiskia manechtlajtlakoltikah, manechachiwakah de inawak Cristo, tla ika noni weletiskia nikinmakixtiskia nokniwah judíos non ken nikinmita. ⁴ Yejwah walewatokeh de itech tlakah de Israel, iwa Dios okinseli kemi ipilwah. Dios okatka inwah ika iweyijkachiwalis iwa omoyekka inwah, noiwa okinmák itlanawatil, okinmili kenomi kiweyijkachiwaskeh iwa okinkakiti tlan kinmakaskia. ⁵ Yejwah noiwa walewatokeh itech totatawah; Abraham, Isaac iwa Jacob, iwa Cristo Akin otlakatiko kemi tejwah titlakah de nin tlaltípkaktli noiwa itech walewatok. Iwa Cristo Ye Dios Akin tlanawatijtok itech nochi, ¡Akin moneki matikweyilikah nochipa! Ijkó mamochiwa.

⁶ Pero amo kijtosneki tlan Dios okinkakiti n judíoiteh amo omochi; yej ika noni mota nik amo nochteh akimeh walewatokeh de Israel milák ipilwah Dios. ⁷ Amo nochteh non walewatokeh de Abraham milák ipilwah, porke Dios okili n Abraham: “Sanwel ipilwah mokone Isaac mitsinmakas mowejaixwiwah.” *Gn. 21:12*

⁸ Noni kijtosneki, amo nochteh akimeh ixwiwah Abraham milák ipilwah Dios, yej sanwel akimeh kineltokah tlan Dios okikakiti Abraham, iwa kenijki momakixtiskeh akimeh kineltokaskeh n kualitlájtolí. ⁹ Ye ni tlan Dios okisentlali kimakas Abraham: “Nikan se xiwitl niwits, iwa mosiwa Sara kias se ikone.” *Gn. 18:10*

¹⁰ Iwa amo san noni. N ome ipilwah n Rebeca san se inta okipixkeh, ye totata Isaac.

¹¹ Ayamó otlakatah n kuatsitsinteh nion ayamó okichiyawah tlan kualí noso tlan amokuali

keman Dios okili n Rebeca: ¹²“Mokone non teteachka kitekitilis non tsoyotl.” Gn. 25:23 ¹³Ijkó kemi kijtoa itlajkuilol Dios: “Satlawel oniktlasojtlak n Jacob, pero Esaú oniktlawelitalak.” Mal. 1:1-2 Ijkó omotak sanwel Dios kijtoa akin kipejpenas, ijkoó kemi Ye kimonekiltia; iwa sanwel Ye kijtoa akin kinotsas iwa amo kita tlan yokichi.

¹⁴¿Tlan tikijtoskeh kiné? ¿Tikijtoskeh Dios mach ompa tlan kichiwa? ¿Amó, ayik ijkoó xikmolikah! ¹⁵Porke Dios okili n Moisés: “Niktlapojpolwis akin Ne nikneki niktlapojpolwis, iwa nikiknomatis akin Ne nikneki niktlapojpolwis.” Éx. 33:19 ¹⁶Yika, itlasojtlalis Dios amo tikseliah san por tikneki noso por timochijchikawah ika itla tektil, yej tikseliah porke Ye techiknomati. ¹⁷Porke itech itlajkuilol Dios kilia n rey de Egipto: “Onimitstlali tirey para motech nikteititis noweletilis, iwa para makixmatikah Notoka itech nochi n tlaltikpaktli.” Éx. 9:16 ¹⁸Ijkó kiné, Dios kinknomati akin Ye kineki kiyoltlakuawaltis.

¹⁹Pero te weletis techilis: “Tla ijkoó kiné, ¿tleka Dios kintlajtlakoltia n tlakah, porke akin weletis kixnamikis Dios?” ²⁰¡Mialma nokni! ¿Akin te para timotlatlajtolkopas iwan Dios? Weletis n xoktsi kilis akin okichijchi: “¿Tleka ijkoó otechchijchi?” ²¹Porke akin kinchijchiwa xoktsimeh weletis kichijchiwas ika n sokitl san tlan ye kineki; ika non sokitl weletis kichijchiwas se xoktsi non motekitiltia ijkuak ilwichiwas, iwa ok se xoktsi non ixmostla kitekitiltiah.

²²Dios okinek kiteititis ikualanilis iwa iweletilis, yika yokinxiko nekateh akimeh okimotlanilijkeh kintlajiyowiltis iwa iksemi tonati kimpopolos. ²³Ye ijkoó okichi para kiteititis iweyijkachiwas para akimeh Ye kinmiknomati, iwa akimeh Ye achto okimpéjpenki para makiselikah mawistilistli. ²⁴Dios amo okinnotski sanwel non walewatokeh itech judíojeteh, yej noiwa okinnótski akimeh amo judíojeteh.

²⁵Kemi kijtoa itlajkuilol n profeta Oseas:

Akimeh amo okatkah noaltepeltlakawah, nikinnotsas noaltepeltlakawah, iwa akimeh amo oniktlasojtlaya, axa nikintlasojtlas.

Os. 2:23

²⁶Iwa kan achto onomechilijkeh: “Nomejwah amo nopilwah”, ompa nomechnotsaskeh nontepilwah de Dios non yolitok.

Os. 1:10

²⁷Isaías noiwa okinteneh n tlakah de Israel iwa okijto: “Maya non walewatokeh de Israel mayetokah senmiaktikeh kemi xali non kajki itempa n weyi atl, san kanaj kechmeh momakixtiseh, ²⁸porke n Toteko Weletini kichiwas itech nin tlaltikpaktli tlan Ye yokijto, iwa san totokatijak nochi kichiwas.” Is. 10:22 ²⁹Ijkó kemi yowejka okijto Isaías:

Tla n Toteko non saikpanoa Weletini, amo techinkawiliskia towejkaixwiah, timochiwaskiah kemi n altepemeh de Sodoma iwa Gomorra.

Is. 1:9

Ijkuak titlaneltokah inawak Cristo tikajsih tlapojpolwílistli

³⁰¿Tlan tikijtoskeh? Akimeh amo judíos, non amo okitemoayah kenijki motlapojpolwiskeh inawak Dios okachi okajsikeh tlapojpolwílistli por okineltokakeh. ³¹Pero n Israelitas, maya omochijchikawayah kajsiseh se yekmilawálistli ika intlanawatilis, amo oweletkeh. ³²¿Iwa tleka amo oweletkeh? Amo oweletkeh porke okineki motlapojpolwiskeh ika tlan kijtoa intlanawatilis, ika tlan okichiwah para Dios iwa amo por intlaneltokalis. Yika omoixitlanwijkeh ipan “tetl non teikxitlanwia”, ³³kemi kijtoa n tiotlajkuíloli:

Xikitakah, Ne niktllalia itech Sión se tetl non ika moikxitlanwiskeh, se tetl non kintoktis mawetsikah; akin tlaneltokas ítech, ayik mopijpinatis.

Is. 28:16

10

¹Nokniwah, ika nochi noyolo niktlatlajtia Dios mamomakixtikah nochteh n tlakah de Israel. ²Porke ne nikmatok yejwah kimopantiah Dios ika nochi inyolo, pero amo kiyekajsikamatih. ³Yejwah amo kimatih kenijki Dios tetlapojpolwia, yej innewiah kitemoliah tlan ika motlapojpolwiskeh inawak Dios. Iwa amo kineki kitlakitaskeh tlan Dios yokijto itech

itlajtol. ⁴Porke itech Cristo omochiwako nochi tlan kijtoa itlanawatil. Iwa ijkó nochteh akimeh kineltokah n Cristo, Dios kinmita ya chipawakeh de intlajtlakol.

⁵Moisés yowejka okijkulo kenijki motlapojpolwis inawak Dios neká tlakatl non kinekis motlapojpolwis ika tlan kijtoa n tlanawátili, iwa ijkí okijto: “Akin kichiwas nochi tlan kijtoa n tlanawátili, yolitos por non tlanawátili.” *Lv. 18:5**

⁶Pero Dios ya techita tichipawakeh de totlajtlakolwah porke titlaneltokah inawak Cristo. Porke itlajkuilol Dios ijkí kijtoa: “Amo xikijto itech moyolo: ¿Kenijki niweletis nitlejkos ilwikak?”, —noni kijtosneki oksepa tikneki mawaltemo n Cristo—, ⁷nion xikijto: ¿Akin temos kan kateh non yomikeh? —noni kijtosneki tikneki makikixtitih n Cristo kan kateh non yomikeh. ⁸Itlajkuilol Dios noiwa kijtoa: “Itlajtol Dios kajki monawak, itech mokamak iwa itech moyolo.” *Dt. 30:14* Ye ni n tlájtoli non tejwah tikneltokah iwa tiktematiltiah: ⁹Tla ika mokamak tikijtos Cristo Jesús ye Moteko, iwa itech moyolo tikneltoka Dios okiyoliti de kan mikemeh, Dios mitsmakixtis. ¹⁰Porke ika moyolo titlaneltoka iwa Dios mitsita tichipawak, pero ika mokamak tiktematiltia tikneltoka Cristo para mitsmakixtis.

¹¹N tiotlajkuiloli kijtoa: “Nochteh akimeh kineltokah n Cristo, ayik mopijpinatiskeh.” *Is. 28:16* ¹²Porke Dios amo sanwel kintlasojtla n judíojeteh iwa non oksikimeh amó, porke tinochteh tikpiah san se Toteko. Iwa Ye satlawel kintiochiwa nochteh akimeh kitlajtlani-
liah makimpalewi. ¹³Porke nochteh akimeh kitlajtlani-
liskah n Toteko makintlapojpolwi, Ye kinmakixtis. *Joel 2:32*

¹⁴Pero, ¿kenomi kitlajtlani-
liskah n Toteko makintlapojpolwi tla ayamó kineltokah? ¿Iwa kenomi kineltokaskeh, tla ayamó kewan kikakih akin Dios? ¿Iwa kenomi kikakiskeh, tla amaka kinmatiltia itlajtol? ¹⁵¿Iwa kenomi kitematiltiskeh n kualitlájtol tla amaka kintitlani? Kemi kijtoa n tiotlajkuiloli: “¿Satlawel miak pakílistli ijkuak tikselsi akin kualikah yolsewílistli iwa kitematiltia n kualitlájtol!” *Is. 52:7*

¹⁶Pero amo nochteh kineltokah n kualitlájtol non techmakixtia. Ijkó kemi Isaías okijkulo: “Noteko, ¿akin okineltokak tlan tiktematiltiah?” *Is. 53:1* ¹⁷Ijkó kiné, titlaneltokah ijkuak tikkakih n kualitlájtol, iwa tlan tikkakih, ye itemachtilis Cristo.

¹⁸Pero ne nomechtlajtlania: ¿Kox amo okikakeh n kualitlájtol? ¿Milák, okikakeh!
Intlajtol omokak itech nochi n tlaltípkaktli, iwa intlamachtilis yomoma sentetl asta kan tlami nin tlaltípkaktli. *Sal. 19:4*

¹⁹Oksepa nitlajtlani: ¿Kox n tlakah de Israel ayamó kajsikamatih? Moisés noiwa kijtoa: Ne nomechtoktis xichawatikah iwa oksikimeh tlakah non amo judíojeteh; iwa nomechtoktis xikualanikah iwa oksikimeh tlakah non amo tetlakita. *Dt. 32:21*

²⁰Noiwa Isaías omixewi okijto: Akimeh amo onechtemoayah, onechajsikah; iwa akimeh amo otlajtlaniah Akin Ne, onikinmoititi. *Is. 65:1*

²¹Isaías noiwa okijkulo de n tlakah de Israel, iwa okijto: “Nochi tonati nikinnotok sikimeh tlakah non amo tetlakitakeh iwa teixnamikah.” *Is. 65:2*

11

San sikimeh tlakah de Israel Dios okinmakixti

¹Axa, nitlajtlani: ¿Kox Dios okinmilka itlaneltokawah de Israel? ¿Amó! Porke ne noiwa niisraelita, niwalewatok itech Abraham iwa niteixwi de Benjamín. ²Dios yowejka okinmitak n judíojeteh kemi ipilwah; iwa asta axa amo kinmixnamiki. ¿Mach amó nonkimatih tlan kijtoa n tiotlajkuiloli de n tiotlajto Elías, ompa nestok kenijki okinteili n tlakah de Israel ijkuak omotiotsajtsilijtoka inawak Dios? Ye okijto: ³“Noteko, yokinmiktijkeh motiotlajtojkwah iwa yokinxixititskeh moartalwah, iwa axa sanwel ne onimoka, iwa ne noiwa kinekik nechmiktiskeh.” *1 Re. 19:10*

⁴Pero okinnankili Dios: “Onikinmoxelili chikome mil tlakah non ayik omotlankuaketskeh

* ^{10:5} Moisés kijtoa nochteh n judíojeteh moneki mamosirkunsidarokah ijkuak kipiah chikweyi tonati de otlakakkeh. N sirkunsiyón ye tlan okintekiliayah inmewayo non kikuatsaktok intlakayo.

ixpa n dios tlachijchíwali Baal.”

1

Re. 19:18 ⁵Ijkó axa, itech ninteh tonatijmeh, yomokajkeh kanaj kechmeh tlakah, non Dios ika itlasojtlalis okimpéjpenki. ⁶Iwa tla Dios okimpéjpenki por itlasojtlalis, kijtosneki amo se momakixtia por itla kuali se kichiwa. Porke tla Dios kimpejpenaskia por okichijkeh itla kuali, kijtosneki ayakmó monekiskia itlasojtlalis Dios.

⁷Ijkó kiné, n tlakah de Israel amo okajsikeh tlan okitemoayah, pero akimeh Dios okimpéjpenki okajsikeh tlapojpolwílistli. Pero non oksikimeh oyoltlakuawakeh. ⁸Kemi kijtoa n tiotlajkuífoli: “Dios okinkawili mamoyoltlakuawakah, okinmák inmixtolowah non amo tlachiah, iwa innakaswah non amo tlakakih, iwa asta axa ijkó kateh.” Dt. 29:4

⁹David noiwa kijtoa:

Inmilwihah mamokopakah kemi ayatl kan monepachwiah,
kan moixxitlanwiah iwa ijkó motlajjyowiltiah.

¹⁰Inmixtolowah ayakmó matlachiakah,
iwa nochipa mamotompocho inkuitlapah.

Sal. 69:22-23

Kenomi Dios kinmakixtia non amo judíojtech

¹¹Axa ne nitlajtlani: ¿N judíojtech ijkuak omoixxitlanwijkeh ompa omokajkeh? ¿Amo! Porke ijkuak n judíojtech amo okitlakitakeh Dios, non amo judíojtech oweletkeh omomakixtijkeh. Yika, n judíojtech xikojmikih. ¹²Ijkó kiné, keman n judíojtech amo okineltokakeh Dios, non amo judíojtech okiselijkeh itlatiochiwalis Dios. ¿Okachi kintiochias Dios tla n judíojtech moyolpatlaskeh inawak Dios!

¹³Pero nikneki nomechilis se tlájtoli nomejwah akimeh amo non judíojtech. Dios onechtítlanki manikinmatiliti itlajtol akimeh amo judíojtech, yika ne nikmopantia noteki.

¹⁴Porke nikneki sikimeh judíojtech kemi ne, machawatikah nomowa para makinekikah momakixtiskeh kemi nomejwah, iwa ijkó mamomakixtikah sikimeh. ¹⁵Ijkuak Dios okinmixnamik n judíojtech, okajsikeh tlapojpolwílistli inawak Dios non amo judíojtech, yika, ijkuak Dios kinselis n judíojtech ¿amo okachi yetos pakílistli? Kemi ijkuak moyolitia se non yomikki. ¹⁶Porke ijkuak tikaxkatiliah Dios se paj non tikixtiah itech siki textli, noiwa nochi n textli iaxka Dios.

Nm. 15:19

Iwa tla inelwayo se kuawitl iaxka Dios, noiwa imamayowah n kuawitl iaxkawah.

¹⁷Sikimeh judíojtech, kemi non de milajka imamayowah n olivoskuawitl okimpostekah, iwa te non amo ti israelita impatka omitsalajkeh. Ijkó otikpixki kuali nelwatl de non olivos. ¹⁸Pero amo ximoweyili inwa imamayowah, te noiwa weletis mitsmatsayanas, amo te akin tikchikajtok n nelwatl, yej n nelwatl mitschikajtok.

¹⁹Weletis tikmolis: “Milák ijkó, pero imamayowah n olivoskuawitl okinmatsayankeh iwa ne onechsalokeh ítech.” ²⁰Milák. Okinmatsayankeh porke yejwah amo otlaneltokakeh, iwa te kuali titlaxxilitok por otlaneltokak. Yika amo ximoweyili, yej xikiimakajsi.

²¹Porke tla Dios okinmatsayankeh non Ye imamayowah, te noiwa weletis mitsmatsayanas.

²²Xikita, Dios saikpanoa teiknoma, pero noiwa kema tetlajjyowilti. Ye kintlajjyowiltia akimeh yowetskeh. Ye noiwa saikpanoa teiknoma. Pero moneki xiseitito íwa. Tla amó, te noiwa mitsmatsayanas. ²³Iwa tla n judíojtech kineltokaskeh n Cristo, oksepa kinsaloskeh itech n olivoskuawitl, porke Dios satlawel weletini iwa weletis kinsalos oksepa kan okimpostekah. ²⁴Porke tla te omistekah itech se olivoskuawitl non iselti oixwak kan tlakuaujyo, iwa omitsalajkeh itech se olivoskuawitl non kualí, ¿amo tikyejyekolia okachi amo owi kinsaloskeh n judíojtech itech olivoskuawitl kan okinmatekeh!

Non de israel momakixtiskeh

²⁵Nokniwah, nikneki kualí xikmatikah tlan Dios yokimolijka kichiwas iwa amaka okimatia, para amo xikmolikah satlawel nonmixtlataminih: sikimeh judíojtech oyoltlakuawakeh, pero sanwel asta makalakikah nochteh non amo de Israel. ²⁶Ijkuak ijkó tlamochiwas, nochteh n tlakah de Israel momakixtiskeh, kemi kijtoa n tiotlajkuífoli:

N Temakixti walewatos de kan altepetl de Sión,
iwa kinchipawas nochteh ipilwah n Jacob ika tlan pitsotik okichiwayah.

²⁷Iwa ijkó mochiwas tlan yowejka onikinsentalililh kichiwaskia inwah,

ijkuak kinkixtilis intlajtlakolwah.

Is. 59:20

²⁸ Ijkuak non amo judfojteh okineltokakeh n kualitlajtoli, n judfojteh okikokolijkeh Dios. Pero Dios yejwah kintlasojtla porke okinseli inwejkatatawah. ²⁹ Porke tlan Dios kitemaka amo oksepa kitekixtilia, nion mitsachiwa tla omítsnotski. ³⁰ Achto nomejwah, amo ononkitlakitayah Dios, pero kemi n judfojteh amo okitlakitakeh, Dios onomechiknoma nomejwah. ³¹ Ijkó noiwa, yejwah amo okitlakitakeh para Dios manomechiknomati ijkó kemi axa yejwah kinnmiknomati. ³² Yika, Dios otechka nomejwah iwa tejwah matitlajtlakolchiwakah, para ijkó matechiknomati.

³³ ¡Milák, kema weyi iteiknomatilis Dios, iwa kema weyi iixtlamatilis! Iwa iajsikamatilis, amaka weleti kiteajsikamatilia tlan Dios kichiwa, nion amaka kajsikamati tlan kichiwa nion kenomi kichiwa. ³⁴ Noso, “¿akin weleti kajsikamati itlayejyekolis n Toteko?, noso ¿akin okiixtlamachti? Is. 40:13 ³⁵ ¿Akin achto itla okitliokoli n Toteko, para makiseli itlaxtlawil?”

³⁶ Porke nochi tlan onka, walewatok de Dios, iwa onka por Ye, iwa Ye nochi iaxka. Job 41:11

¡Matikweyilikah Totajtzi Dios nochipa! Ijkó mamochiwa.

12

N yan kuik nemílistli

¹ Nokniwah, nomechtlatlaujtia ika iteiknomatilis Dios, ximotemaktikah nomejwah nomonewiah kemi se tlamiktli non yolitok, chipawak ijkó kemi Ye kipaktia. Ye ni tlan milák ipati inawak Dios. ² Ayakmó xinemikah kemi nemih n taltikpaktlakah, yej xikpatlakah nomotlayejyekolis para ijkó manomechyankuili nomonemilis. Ijkó weletis nonkimatiskeh tlan kimonekiltia Dios, xikchiwakah tlan kuali, tlan kipaktia, iwa tlan yekmilajka.

³ Dios satlawel onechiknoma iwa onechmák nin tekittl para manomechili tlan moneki nonkichiwaskeh, yika nomechilia ayik xikmolikah nomejwah okachi nonkualteh ke oksikimeh, yej ximoyejyekokah ijkó kemi Dios onomechmajmák nomotlaneltokalis. ⁴ Porke ijkó kemi se kuerpo sasalitok ika miakeh iomiowah, amo nochteh kichiwah san se tekittl. ⁵ Ijkó noiwa tejwah, maya timiaktikeh, timochijtokeh san se kuerpo itech Cristo, iwa tisejsemeh tisasalitokeh itech non kuerpo.

⁶ Dios otechmajmák tlatlamantli toteki, ijkó kemi Ye okimonekilti techmajmakas. Yika, tla Dios okichi matiweletikah, matiktetlapowikah itlajtol non tikseliah de Ye, moneki tikchiwaskeh ijkó kemi tikneltokah Cristo. ⁷ Tla Dios otechmák n tekittl para matitepalewikah, matikinyekpalewikah. Akin weleti tlamachtia, makimopanti mayektlamachti. ⁸ Akin kimati teyolchikawa, makinyolchikawa oksikimeh. Akin kitemaka itla, makitemaka ika kuali iyolo. Akin teyakana, mamochijchikawa kuali mateyakana; akin kimpalewia akimeh kimpoloo tlan ika panotoskeh, makimpalewi ika pakílistli.

Kenomi moneki manemikah n tlaneltokakeh

⁹ Nonnochteh ximotlasojtlakah ika nomoyolo chipawak. Xiktlawelitakah nochi tlan amokuali, iwa xikchiwakah tlan kuali. ¹⁰ Ximotlasojtlakah non nochteh kemi nonmiknimeh, iwa okachi ximosepantlasojtlakah nomejwah akimeh non kineltokah Cristo.

¹¹ Ximochijchikawakah, amo xiyetokah nontlatsijkeh, iwa ika nochi nomoyolo xiktekitilikah n Toteko.

¹² Nochipa xipaktinemikah ika tlan nomechchia ilwikak. Amo ximosotlawakah ijkuak nontlajjowiah, yej nochipa ximotiotsajtsilijtokah.

¹³ Xikimpalewikah n tokniwah ika tlan kimpoloo, iwa xikinyekselikah akimeh nomechontlajpaloah.

¹⁴ Xiktalajtlanilikah Dios makintiochiwa akimeh nomechtlajjowiltiah, amo xiktalajtlanilikah makintlajjowiltikah, yej makintiochiwakah.

¹⁵ Xipakikah inwah akimeh pakih, iwa xichokakah inwah akimeh chokah.

¹⁶Ximoyekwikakah non nochteh. Amo ximoweyilikah, yej xiyetokah nonyolyamankeh kemi akimeh kimatih tetlakitah. Amo ximomachilikah nonmixtlatamkeh.

¹⁷Tla aka nomechtoktia itla amokuali, nomejwah amo xikmokopilikah, yej nochipa xikchiwakah tlan kuali inmixpa n nochteh. ¹⁸Asta kan weletis, nomejwah xiktemolikh kenijki nonmoyekwikaskeh ika yolsekwílistli iwan nochteh. ¹⁹Notlasojikniwah, tla nomechtoktia tlan amokuali, amo san nomejwah ximomakopakah, yej xikkawilikah Dios, Ye, makintlaijyowilti. Porke n tiotlajkuíloli kijtoa: “Sanwel Ne nitetlaijyowiltis; Ne nitetlaxtlawis, kijtoa n Toteko.” *Dt. 32:35* ²⁰N tiotlajkuíloli noiwa kijtoa: “Tla mokokolikni apismiki, xikmaka tlan kikuas; iwa tla amiki, xikmaka maatli. Porke tla ijkó tikchiwas, ye pinawatinemis.” *Pr. 25:21-22* ²¹Amo xikmokawili mamitstlani tlan amokuali, yej ika tlan kuali xiktlanili tlan amokuali.

13

¹Nochteh n tlakah moneki makintlakitakah n tekiwajkeh. Porke amo onka se tekiwa non Dios amo okitlali, porke nochteh n tekiwajkeh non axa tlanawatijtokeh, Dios okitlali.

²Yika, akin amo kintlakita n tekiwajkeh, kijtosneki amo kitlakita tlan Dios okitlali. Iwa akimeh amo kinekih kintlakitaskah, innewiah kimotemolijtokeh makintlaijyowiltikah.

³Porke n tekiwajkeh amo kateh para makinmawilikah akimeh kichiwah tlan kuali, yej para mamawikah akimeh kichijtinemih tlan amokuali. Tla te amo tikneki mamitsmomojtikah n tekiwajkeh; xikchiwa tlan kuali iwa n tekiwajkeh mitsyekitaskah. ⁴Porke n tekiwajkeh Dios okitlali para mamitspalewikah. Pero tla tikchiwa tlan amokuali, xikinmawili, porke weletis tlanawatiskeh mamitstlaijyowiltikah. Yejwah itekitwah Dios iwa kateh para kintlaijyowiltiskeh akimeh kichiwah tlan amokuali. ⁵Yika, nomejwah xikintlakitakah n tekiwajkeh amo san para amo makualanikah, yej por nonkimatokeh ijkó moneki nonkichiwaskeh. ⁶Ika noni nomejwah nonkitlaxtlawah impuestos; porke n tekiwajkeh kichijtokeh n tekítl non Dios okinmák makichiwakah.

⁷Xiktlatlawakah nochi tlan moneki nonkitlaxtlawaskeh. Xiktlatlawakah impuestos, xiktlatlawakah patente, iwa akin moneki xiktlakitakah, xiktlakitakah, iwa akin moneki nonkiweyijkamatiskeh, xikweyijkamatikah. ⁸Amaka itla xikwikilikah, yej ximotlasojtlakah non nochteh; porke akin kitlasojtla itlakaikni, ika noni yokichi tlan kijtoa n tlanawatílistli. ⁹Porke n tlanawatílistli kijtoa: “Amo ximomekati, amo xiteichtakamikti, amo xitlachteki, amo xitlakajkawaw, amo xikelewi tlan amo moaxka.” *Éx. 20:13-15,17* Nochteh ninteh iwa n oksikimeh tlanawátitlèh mochiwah san se, iwa ye ni tlan kijtosneki: “Xiktlasojtla mokni kemi te timotlasojtla.” *Lv. 19:18* ¹⁰Akin kimati tetlasojtla, amo kinchiwilia tlan amokuali n oksikimeh. Yika akin milák tetlasojtla, ika noni ya kichijtok nochi tlan kijtoa n tlanawátili.

¹¹Kuali xikitakah itech tlan tonatijmeh tikateh, xikmatikah ayakmó para tikochtoskeh. Porke n tonati ijkuak techmakixtis Cristo ayakmó ka wejka, kemi ijkuak siki otitlaneltokakeh. ¹²N yúali ya panoti iwa ya tlanestiwiws; yika matikkawakah nochi tlan amokuali, tlan se kichiwa ijkuak se nemi itech tleyuálistli iwa matimoyankuilikah kemi akimeh nemih itech tláwili. ¹³Matinemikah ika totalnamikilis chipawak kemi se nemi ijkuak tlanestok. Amo matinemikah itech ilwimeh kan tlatlakualo, nion matitlawantinemikah, amo matikchijtinemikah tlan amokuali kiyoltlana tokuerpo, amo matimokualantinemikah nion matixikojmikikah. ¹⁴Yej okachi kuali, matimotlakentikah ika ichikawalis n Toteko Cristo Jesús, iwa amo matiknekikah matikchiwakah tlan pitsotik.

14

Amo xikpjinawi mokni akin ayamó chikawak itlaneltokalis

¹Tla se mokni ayamó chikawak itlaneltokalis, xikyekseli iwa amo ximotlatlajtolkopa iwa, tla ayamó mitsajsikamati. ²Kuali xikmatikah, sikimeh tokniwah kineltokah weleti kikuah nochi tlákuali, iwa onkateh oksikimeh non amo chikawak itlaneltokalis, kikuah san kilitl.

³Yika, akin kikuah nochi tlákuali, amo makipojpoa akin kikuah san kilitl, iwa akin kikuah san kilitl, amo makipojpoa akin kikuah nochi tlákuali, porke Totajtsi Dios yotechseli tinochteh.

⁴Ijkó kiné, ¿tleka tikpojpoa itlakewal ok se tlakatl? Tla kichiwa kuali noso amokuali, ompa ye makita. Pero kuali mokawas íwa, porke Toteko Weletini para kipalewis makichiwa tlan kuali.

⁵Noiwa sikimeh tokniwah kijtoah se tonati okachi ipati ke ok se tonati, iwa oksikimeh kimoliah nochteh n tonatijmeh san se impati. Nochteh kuali makimatokah itech inyolo tleka ijkó kiyejyekoliah. ⁶Akin mosewia itech se tonati, mosewia porke kineki kiweyijkachiwas Toteko Dios. Iwa akin amo mosewia itech non tonati, amo mosewia porke kineki kiwejkachiwas Toteko Dios. Iwa akin kikua nochi tlákuali, kikua para kiweyijkachiwas Toteko Dios, porke motlasojkamati inawak. Iwa akin kikua san kilitl, ijkó kichiwa para kiweyijkachiwas Toteko Dios, iwa motlasojkamati inawak.

⁷Porke amaka tlakatl yolitok san por ye kineki monawatis, nion amaka tlakatl mikki san por ye kineki mikkis. ⁸Porke tla tiyolitokeh, tiyolitokeh para tiktektiliskeh n Toteko; iwa tla timikiskeh, timikiskeh para Toteko Jesús. Ijkó kiné, tla tiyolitoskeh noso tla timikiskeh, tejwah ti teaxkawah inawak Toteko. ⁹Porke Cristo omikki iwa oksepa omoyoliti, para yetos Inteko de akimeh yomikkeh iwa de akimeh yolitokeh.

¹⁰Iwa axa, ¿te, tleka tikpojpoa mokni? Noso ¿tleka tiktlawelita? Kuali xikmati tinochteh timoteixpantiskeh inawak Cristo iwa Ye kijtos akin tlajtlakole iwa akin amó.

¹¹Porke ijkuilitok:

Ne niyolitok, kijtoa n Toteko Dios,
nochteh motlankuaketsaskeh nonawak
iwa nochteh kijtoskeh teixpa milák Ne Ni Dios.

Is. 45:23

¹²Ijkó kiné, tosejselti tikmokuitskeh inawak Dios nochi tlan otikhijkeh.

Xikpalewi mokni amo matlajtlakolchiwa

¹³Yika, nomechilia ayakmó ximopojpojinemikah. Yej ximoyekwikakah iwa amo xikchiwakah itla non makixitlanwi nomokni, nion xiktoktikah matlajtlakolchiwa. ¹⁴Ne kuali nikmati amitla tlákuali techijtlakoa, ne kuali nikmati porke nikelntoka Cristo Jesús, pero tla aka kimolia itla tlákuali amo chipawak, non tlákuali amo chipawak para ye. ¹⁵Ijkó kiné, tla te tikyolkokoa se mokni por tlan tikkua, kijtosneki amo tiktlasojtla mokni. Amo xikchiwa mamoiexpo se tokni akin Cristo omikki por ye, san por tikkua itla tlákuali. ¹⁶Amo xiktekawilikah, makijtokah nonkichiwah n amokuali, maya nomejwah nonkimatokeh kuali tlan nonkichiwah. ¹⁷Porke kan Dios tlanawatia amitla kijtosneki tlan se kikua noso tlan se koni, yej okachi weyi kijtosneki matikpiakah toyeknemilis, yolsekilistli, pakilistli, nochi noni sanwel techmaka n Espíritu Santo. ¹⁸Akin ijkó kimpantia Cristo, kipaktia Dios iwa n tlakah kiseliah.

¹⁹Ijkó kiné, matiktemokah nochi tlan techmaka yolsekilistli, iwa matimosepam-palewikah para okachi mamoskalti totlaneltokalis. ²⁰Amo xikijtlako iteki n Totajtsi Dios san por siki tlákuali non te tikua. Kuali momatok nochi tlákuali chipawak. Amokuali tla tikkuah itla iwa ika noni tiktoktia matlajtlakolchiwa se tokni. ²¹Satlawel kuali tla amo tikkua nakatl, nion tikonis vino, nion tikchiwas itla non ika matlajtlakolchiwa mokni. ²²N tlaneltokálistli non te tikpíxtok, kuali matlakxilito inawak Dios. ¡Miak pakilistli kipia n tlakatl akin itlanamikilis amo kitlajtlakoltia por tlan kichiwa, iwa kineltoka tlan kichijtok kuali kajki! ²³Poro akin kikua siki tlákuali iwa itlanamikilis kiteilia, kichiwa tlajtlákoli ijkuak kikua, pero maya okikua, kiyolkuajtok. Iwa nochi tlan se kichiwa iwa tlami kiyolkuajtinemi, noni tlajtlákoli.

15

Matikimpaktikah oksikimeh, iwa amo san tejwah matimopaktikah

¹Akimeh tichikawakeh itech totlaneltokalis, moneki matikimpalewikah akimeh amo chikawak intlaneltokalis, iwa amo san tejwah matimopaktikah. ²Tisejsemeh moneki matikpaktikah se tokni iwa ijkó okachi moskaltis itlaneltokalis itech Cristo. ³Porke nion Cristo okichi san tlan ye inewia okipaktiaya, yej itech Ye omochi tlan kijtoa n tiotlajkuúfóli: "Intlawikaltis akimeh omitswikaltijkeh nopaj owetsiko." *Sal. 69:9* ⁴Nochi tlan yowejka

omoiykuilo itech tiotlajkuíloli, omoiykuilo para matimoixtlamachtikah, para matikchiakah ika yolsekwílistli tlan Ye yokijto techmakas. ⁵Iwa Dios, Akin teyolsekwia iwa teyolchikawa, manomechpalewi para ximosepanyekwikakah, ijkó kemi Cristo Jesús kineki. ⁶Iwa ijkó nonnochteh, san ika se nomotlájtoli, xikweyijkachiwakah Dios, Itajtsi n Toteko Cristo Jesús.

Kinmatiltiah n kualitlájtoli akimeh amo judíojtah

⁷Ijkó kiné, ximoselikah non nochteh, ijkó kemi Cristo otechseli, para matikweyilikah Totajtsi Dios. ⁸Porke ne nikijtoa, Cristo owala kemi se tlakéwali para n judíojtah, para mamochiwa tlan Dios okinsentlalili towejkatawawah, iwa ijkó makitakah Dios kichiwa tlan kijtoa. ⁹Cristo noiwa owala innawak n tlaltikpaktlakah para makiweyijkachiwakah Dios porke Ye satlawel teiknomati, kemi kijtoa n tiotlajkuíloli:

Yika, nimitsmawistilis innawak miaktikeh tlakah non amo judíojtah,
iwa niktakuikilis Motoka para ika nimitsweyilis.

Sal. 18:49

¹⁰Noiwa kijtoa n tiotlajkuíloli:

Nomejwah akimeh amo non judíojtah,
xipakikah iwan itlaneltokawah Dios.

Dt. 32:43

¹¹Iwa oksika noiwa kijtoa:

Xikweyijkachiwakah Toteko, nochteh akimeh amo judíojtah,
iwa nochteh n tlaltikpaktlakah xiktakuikilikah.

Sal. 117:1

¹²Isaías noiwa okijkuilo:

Tlakatis se iwejkaixwi n Isaí,
ye majkokuis iwa kinnawatis miakeh tlalmeh kan amo judíojtah,
iwa yejwah moyolchikajtoskeh ítech.

Is. 11:10

¹³Iwa Dios Akin itech se moyolchikawa, manomechmaka miak pakílistli iwa yolsekwílistli ijkuak itech nontlaneltokah, para nontentoskeh ika iweletilis n Espiritu Santo.

N tekítli non Dios okimaktili n Pablo

¹⁴Nokniwah, kualí nikmatok nomejwah satlawel nonteiknomatih iwa kualí nonmixt-lamatih, iwa nonkimatih kenijki nonmononotsaskeh. ¹⁵Pero itech nin amatlajkuíloli onimixewi nomechijilis ika yekmilajka tlájtoli, para amo xikilkawakah. Ijkí nikchiwa porke Dios ika iteiknomatilis onechnawati manikchiwa, ¹⁶maniktekichiwili n Cristo kan amo judíojtah. N tekítli non ne nikchiwa, niktematiltia n kualí tlájtoli non temakixtia, para nochteh non amo judíojtah mayetokah kemi se tlamánali inawak Dios non Ye kinselis, non n Espiritu Santo yokinchipa.

¹⁷Yika, nikpiaskia tlan ika nimosijsinis inawak Cristo Jesús, por niktekichiwilia. ¹⁸Porke amo nimixewiskia nomechtlapowis ika tlan ne onikchi, yej sanwel tlan Cristo okichi notech para manikinmacti akimeh amo judíojtah kenomi kitlakitaskeh Dios. Iwa yejwah okineltokakeh Dios ika tlan onikinmacti iwa ika tlan onechitakeh onikchi, ¹⁹ika neskáyolteh iwa milagros non onikinchi ika iweletilis n Espiritu Santo. Iwa ijkó, desde Jerusalén asta kan tlali de Ilírico, yonitetlapowijtínenki de n kualitlájtoli de Cristo non techmakixtia. ²⁰Ijkó, ne onimochijchika niktetlapowis n kualitlájtoli non temakixtia kan ayamó kema okikakiah itoka n Cristo, porke amo oniknek nitetlapowis kan ok se yotekitik.

²¹Yej nikchiwa kemi kijtoa n tiotlajkuíloli:

Kitaskeh akimeh ayik okintlapowijkeh de Ye,
iwa kajsikamatiskah akimeh ayik okikakiah de Ye.

Is. 52:15

Pablo kimolia yas Roma

²²Yika, maya satlawel oniknektoka nias nomechontlajpaloti, mach owéletki onia. ²³Pero axa kemi yoniktiami noteki itech ninteh tlalmeh, iwa kemi yowejka niknektok nias nomechonitatih, ²⁴ijkuak nias Spaña ik ompa nomechontlajpalojtikisas. Iwa ijkuak yonikpixki non pakílistli, chamo nomejwah weletis nonnechpalewiskeh ika tlan nechpolos para maniajsiti Spaña. ²⁵Pero axa nio Jerusalén, nikimpalewiti non ompa chantitokeh iwa iaxkawah Dios. ²⁶Porke n tokniwah de Macedonia iwa Acaya ika pakílistli okoololojkeh siki tomi para kintitlaniliskah tokniwah próbesteh de Jerusalén. ²⁷Yejwah okimolijkeh

omonekia ijkó kichiwaskeh, porke okimachiliayah kinwikiliah miak; porke ijkó kemi n tlaneltokakeh judfojtech okitejtemakakeh tlan Dios okintliokoli innawak inmikniwah non amo judfojtech, ninteh moneki makinpalewihak n tlaneltokakeh judfós ika tlan yejwah kipiah. ²⁸ Ijkó kiné, ijuak yotlanki onikchi nin tekittl iya yonikinmaktili nin tomi, nionewas Spaña iwa ik ompa nomechontlajpalojtikisas. ²⁹ Ne kuali nikmatok, ijuak ne nias nomechitati, nikwikas miak tlatiochiwálistli non Cristo kitemaka.

³⁰ Nokniwah nomechtlatlaujtia, por Toteko Cristo Jesús iwa por n tlasojtlálistli non n Espiritu techmaka, nomejwah noiwa ximotiotsajtsilikah para Dios manechpalewi.

³¹ Nokniwah nomechtlatlaujtia, por Toteko Cristo Jesús iwa por n tlasojtlálistli non n Espiritu techmaka, nomejwah noiwa ximotiotsajtsilikah para Dios manechpalewi. ³² Iwa tla Dios kimonekiltis, manechkawili maniajsiti nomowah ika paklistli iwa ompa nimosewis.

³³ N Totajsi Dios Akin techmaka yolsekwiistli, mayeto nomowah. Ijkó mamochiwa.

16

Pablo kintlatlajpaloa non kinmixmati

¹ Nikneki xikyekselihah se tokni siwatl non itoka Febe. Ye tekipanoa itech tiopa iwan tokniwah tlaneltokakeh non moololoah Cencreas. ² Kuali xikselikah itech Itoka n Toteko, kemi moneki iwan tokniwah tlaneltokakeh, iwa xikpalewihak ika tlan kipoloa. Porke ye miakeh yokimpalewi, asta ne noiwa onechpalewi.

³ Xiktlajpalokah n Priscila iwa n Aquila, yejwah noiiki kitekitiliah Cristo Jesús ijkó kemi ne. ⁴ Yejwah omixewijkeh onechpalewijkeh maya noiwa ya kinmiktsikah. Yika nimotlasojkamati innawak iwa amo san ne, yej noiwa motlasojkamatih n tokniwah non de oksikimeh tiopameh non amo judfós. ⁵ Noiwa xikintlajpalokah n tokniwah non kineltokah Cristo Jesús non moololoah icha n Priscila iwa n Aquila. Xiktlajpalokah notlasoj Epeneto; ye akin achto okineltokak Cristo kan tlali de Acaya. ⁶ Xikontlajpalokah n María, akin miak yotekitik nomonawak. ⁷ Xikintlajpalokah nokniwah non kineltokah Cristo Jesús, Andrónico iwa Junias, yejwah ken nikinmita, inwah onitsaktoka. Nochteh n tlatematiltijkeh kintlakitah, yejwah achto okineltokakeh Cristo, iwa ne satepa.

⁸ Xikontlajpalokah n Amplias, nokni non satlawel niktlasojtla akin noiwa kineltoka n Toteko. ⁹ Xikontlajpalokah n Urbano, akin towah kitekitilia n Toteko Cristo Jesús, iwa Estaquis, notlasoj. ¹⁰ Xikontlajpalokah Apeles, akin milák kineltoka Cristo. Noiwa xikonintlajpalokah ichanejkawah n Aristóbulo.

¹¹ Xikontlajpalokah n israelita Herodión non ken nikita, iwa ichanejkawah n Narciso akimeh noiwa kineltokah n Toteko Jesús. ¹² Xikontlajpalokah n Trifena iwa n Trifosa akimeh noiwa tekittih itech iteki n Toteko Jesús; noiwa xikontlajpalokah toknitsi Pérsida, akin miak yotekitik inawak Toteko Jesús. ¹³ Xikontlajpalokah n Rufo, non Dios okimopejpenili, noiwa xiktlajpalokah ína, ye kajki kemi yetoskia nomamá. ¹⁴ Xikontlajpalokah Asíncrito, Flegonte, Hermes, Patrobas, Hermas iwa nochteh tokniwah non inwah kateh. ¹⁵ Noiwa xikontlajpalokah n Filólogo iwa n Julia, Nereo iwa iwelti. Noiwa Olimpas iwa nochteh n tokniwah non inwah kateh.

¹⁶ Ximosepantlajpalokah iwa ximoixtenamikikah ika chipawak nomoyolo. Nochteh tokniwah tlaneltokakeh nomechontlajpaloah.

¹⁷ Nokniwah, nomechtlatlaujtia kuali xikinmitakah akimeh kinekih kinxexeloskeh tokniwah iwa tekuatlapololthah ika tlan kitemachtiah, porke yejwah amo kitemachtiah tlan yonomechmachtijkeh. Amo inwah ximowikakah, ¹⁸ porke nonteh amo kitekichiwiliah n Toteko Cristo Jesús, yej san intlalax kitekitiliah. Iwa ika inyamankatlajtol kinkajkayajtinemih akimeh amo kiyekajsikamatih. ¹⁹ Nochteh n tokniwah kimatokeh nomejwah nonkichiwah tlan Dios kineki; yika nipaki, iwa nikneki xiyetokah nomixtlamatkeh para nonkichiwaskeh tlan kuali, iwa amo para nonkichiwaskeh tlan amokuali. ²⁰ Iwa Dios non teyolsekwia, san nima kitlajtlaksas n sataná itlampa nomokxiwah. Itlasojtlalis Toteko Cristo Jesús mayeto nomowah.

²¹Nomechontlajpaloa Timoteo akin nowa tekiti. Noiwa nomechontlajpaloah nokniwah judíojteh Lucio, Jasón iwa Sosípater non ken nikinmita.

²²Ne, Tercio, akin onikijkuilo nin amatlajkufloli, noiwa nomechontlajpaloa itech itoka n Toteko Jesús.

²³Noiwa nomechontlajpaloa Gayo, akin icha nimokalotijtok, iwa kitetlanetijtok icha para ompa mamoololokah nochteh n tokniwah non kineltokah Cristo Jesús.

Nomechontlajpaloa Erasto, ye n tominololo itech nin altepetl, iwa n tokni Cuarto noiwa nomechontlajpaloa.

²⁴N Toteko Cristo Jesús manomechtiochiwa nochteh nomejwah.

Pablo kiweyijkachiwa Dios

²⁵Axa, matikweyilikah Totajtsi Dios, Akin weletis okachi nomechchikawas ika n kual-itlájtohi non ne niktematiltia iwa itemachtilis n Toteko Cristo Jesús. Ye tlan yowejka amaka okimatia porke Dios ayamó okinekia makixmatikah, ²⁶pero axa yomoteixmatiltiko ika intlajkuilolwah n profetas, ijkó kemi Dios Akin nochipa yolitok otlanawati. Nin tlamachtílistli non ayamakah okimatia, axa yomotetlapowi sentetl para nochteh n tlaltikpaktlakah makineltokakah iwa makitlakitakah Dios.

²⁷¡N Totajtsi Dios, Akin sanwel Ye saikpanoa ixtlamati, nochipa matikweyilikah ika tlan Cristo Jesús kichiwa totech!

Ijkó mamochiwa.

San Pablo sikinika kintlajkuililia non de Corinto

Pablo kintlajkuililia n tlaneltokakeh de Corinto

¹ Ne Pablo, Dios onechnotski iwa ika itlanekilis okimonekilti maniyeto itlatematilti n Cristo Jesús, san sika iwa n tokni Sóstenes, ² tomechtlajkuililia nomejwah tokniwah tlaneltokakeh akimeh nonchantitokeh Corinto, akimeh iaxkawah Dios iwa nonseititokeh iwan Cristo Jesús. Dios onoméchnotski xiyetokah iaxkawah, san sika iwan nochteh non kitenewa Itoka n Toteko Cristo Jesús, non yejwah Inteko iwa tejwah noiwa Toteko. ³ Dios Totajtsi iwa n Toteko Cristo Jesús manomechmakakah intiochiwalis iwa inyolsewilis.

Pablo motlasojkamati inawak Dios

⁴ Nochipa nimotlasojkamati inawak Dios por nomejwah, ken onomechtiochi por Cristo Jesús. ⁵ Por nonseititokeh iwa n Cristo, Dios onomechmák nochi itiochiwalis non wits de ilwikak, itech nochi tlan nonkijtoah iwa itech nochi ixtlamatlistli. ⁶ Ijkó kiné, nochi tlan yomijto de Cristo, ya yomochiwako nomotech. ⁷ Yika, amitla nomechpoloa tlan Dios kitetliokolia, ijkuak nonkichiah n tonati keman Toteko Cristo Jesús walmokopas. ⁸ Ye nomechchikajtos asta iksemi, para amaka manomechtlajlakolti asta itonati n Toteko Cristo Jesús. ⁹ Dios nochipa kichiwa tlan kijtoa, iwa Ye onoméchnotski para xiseititokah iwan Ikone Cristo Jesús, Toteko.

Amo ximoxexelokah

¹⁰ Nokniwah, itech Itoka n Toteko Cristo Jesús, nomechtlatlajutia ximoajsikamatikah iwa amo ximoxexelokah. Okachi kuali ximoyekwikakah iwa ximokuanamikikah. ¹¹ Nokniwah, ijki nomechilia, porke ichanejkawah n Cloé yonechtlapowijkeh sikimeh de nomejwah nonmixtokatokeh. ¹² Ika ni nikneki nomechilis sikimeh de nomejwah nonkijtoah: “Ne nika iwan Pablo”.

Oksikimeh kijtoah: “Ne nika iwan Apolos”.

Oksikimeh “Ne nika iwan Pedro”.

Iwa oksikimeh: “Ne nika iwan Cristo.” ¹³ ¿Nonkiyejekoliah Cristo xexelitok? Noso ¿ne Pablo onimik nomopatka ipan krus? ¿Noso onomechkuaatekijkeh itech notoka?

¹⁴ Niktlasojkamati Dios porke mach aka ok se onikkuaateki, sanwel Crispo iwa n Gayo;

¹⁵ ijkó, amaka weletis kijtojinemis omokuaateki itech notoka. ¹⁶ Noiwa onikinkuaateki ichanejkawah n Estéfanas, iwa amo nikilnamiki kox aka ok se onikkuaateki. ¹⁷ Porke Cristo amo onechtítlanki manitlakuaateki, yej onechtítlanki maniktematilti n kualitlájtolli non temakixtia, pero amo onechtítlanki manitetlapowi ika kuájkuali tlájtolli, porke tlamo sanenka omikki n Cristo.

Cristo Ye ichikawalis iwa ixtlamatilis Dios

¹⁸ Para akimeh moixpolojtinemih, kijtoah mach itla ipati tlan motemachtia de imikilis n Cristo itech krus. Pero tejwah akimeh timomakixtijtokeh, tikneltokah nin tlájtolli ye iweletilis Dios. ¹⁹ N tiotlajkuíloli kijtoa:

Nikimpojpólilis tlan satlawel kimatih n ixtlamatkeh,

iwa akimeh nochi kajsikamatih nikchiwas ayakmitla makajsikamatikah.

Is. 29:14

²⁰ ¿Kanin ka n ixtlamatki noso kanin ka n tlamachtia noso non kimolia nochi kimati? Inmixtlamátilis n taltikpaktlakah, Dios okíkopki itech tlan tepinati. ²¹ Dios, Akin kimati tlan kichiwa, amo okinkawili n taltikpaktlakah makixmatikah san ika yejwah inmixtlamátilis, yej Dios okinek kinmakixtis ika itemachtilis “tontotik” akimeh kineltokah.

²² N judíojteh kinekih kinmitaskeh milagros, iwa n tlakah de Grecia kitemoah ixtlamachtílistli, ²³ pero tejwah tiktematiltiah n Cristo, Akin okikrusifikarójkeh. N judíojteh kinkuejsoa tlan titetlapowiah, iwa non amo judíojteh kijtoah mach kipia tlanamíktlistli.

²⁴ Pero akimeh Dios yokínnotski, judíojteh noso amo judíojteh, Cristo ye ichikawalis iwa ixtlamatilis Dios. ²⁵ Porke tlan kimoliah amitla ipati itech ixtlamatilis Dios, okachi kipia

ixtlatmatilistli ke inmixtlatmatilis n tlaltikpaktlakah. Iwa tlan kimoliah amo chikawak de Dios, okachi chikawak ke inchikawalis n tlaltikpaktlakah. ²⁶Nokniwah, xikajsikamatikah Dios onoméchnotski, maya n tlaltikpaktlakah kijtoah nomejwah mach nonmixtlatmatkeh, noso nomechitah amo nonweyijkatitokeh nion nomechitah nontominyojkeh. ²⁷Pero Dios, okimpéjpenki non amo ixtlatmatkeh itech nin tlaltikpaktli, para kimpijpinatis non motenewah ixtlatmatkeh, iwa okimpéjpenki non amo chikawakeh, para kimpijpinatis akimeh motenewah chikawakeh. ²⁸Noiwa Dios okimpéjpenki akimeh itech nin tlaltikpaktli amaka kintlakitah iwa amaka kinyekita, matikijtokah non amitla impati, para kimpojpolilis impati akimeh satlawel kimatih moweyiliah. ²⁹Ijkó amaka weletis moweyijkachiwas ixa n Dios. ³⁰Yika, inewia Dios okichi xiseititokah iwan Cristo Jesús, noiwa okichi n Cristo mayeto toixtlatmatilis, iwa por Cristo tiyolchipawatokeh ika iesso. ³¹Ijkó kiné, kemi kijtoa n tiotlajkuífoli: “Tla aka kineki moweyijkachiwas, okachi kuali makiweyijkachiwa Toteko.” Jr. 9:24

2

Itemachtilis Cristo Akin okikrusifikarojkeh

¹Nokniwah, ijkuak ne onomechmatiltito tlan milák okichiwako lkone Dios, ne mach onomechtlapowi ika intlajtol ixtlatmatkeh nion ika kuájkuali tlájtoli. ²Porke ijkuak onikatka nomowah, mach itla ok se oniknek nomechmachtis, yej sanwel de Cristo Jesús Akin okikrusifikarojkeh. ³Ijkuak onikatka nomowah onechpolaoya nochikawalis iwa satlawel onimawia. ⁴Ijkuak onomechmatilti itemachtilis Cristo, amo oniknek nomechtlaneltoktis ika kuajkuali tlájtoli, yej ika ichikawalis n Espiritu iwa iweletilis Dios, ⁵para ijko nomotlaneltokalis matlaxxilito itech iweletilis Dios iwa amo itech inmixtlatmatilis n tlakah.

Dios techmoixmatiltia ika Iespíritu

⁶Yika, timotlapowiah ika ixtlatmatilistli inwah akimeh yochikawak n tlaneltokalis. Pero nin ixtlatmatilistli amo walewa itech nin tlaltikpaktli, nion intech akimeh tlanawatiah itech nin tlaltikpaktli non pojpoliwiskeh. ⁷Ijkó kiné, tikteixmatiltiah iixtlatmatilis Dios, nin ixtlatmatilistli amaka okimatia iwa amo onestoka, nin ixtlatmatilis kijtosneki itemakixtilis Dios, non yokipejpenka para techaxkatis desde ijkuak ayamó okichijchiwaya n tlaltikpaktli. ⁸Nion se tlanawati itech nin tlaltikpaktli okajsikama nin iixtlatmatilis Dios. Porke tla kajsikamatiskiah, amo tlanawatiskiah makikrusifikarokah n Toteko Cristo Jesús, Akin nochipa weyijkatitok. ⁹Kemi kijtoa n tiotlajkuífoli:

Amaka okitak,
amaka okikak,

nion amaka tlakatl okajsikama tlan Dios okijto kinmakas akimeh kintlasojtla. Is. 64:4

¹⁰Dios otechnextili ika Iespíritu nochi tlan amaka okimatia, porke Iespíritu nochi kimati asta tlan Totajtsi Dios kiyolpixtok.

¹¹Porke nion se tlakatl kimati tlan kiyolpixtok ok se tlakatl, sanwel n espíritu non kajki ijtik kimati tlan kipia itech iyolo. Ijkó noiwa, amaka kimati tlan kiyeyjekolia n Totajtsi Dios, sanwel Iespíritu Dios kimati. ¹²Tejwah amo otikselijkeh se espíritu de nin tlaltikpaktli, yej otikselijkeh Iespíritu Dios, para matikajsikamatikah nochi tlan Dios itech iteiknomatilis otechthliokoli. ¹³Tejwah titlajtoah ika tlájtolteh non Iespíritu n Dios otechinmajsikamatilti, iwa amo ika tlájtolteh non san tonewiah otikinmomachtijkeh. Ijkó tikinmajsikamatiltiah tlan n Espiritu kimonekiltia, akimeh kipiah n Espiritu itech inyolo.

¹⁴Pero akimeh amo kipiah Iespíritu n Totajtsi Dios itech inyolo, amo kiseliah n ixtlatmatilistli non Dios kitemaka ika Iespíritu, porke kimoliah san se kuatlapolojtok. Amo weletih kajsikamatih, porke non tlamachtilistli sanwel kajsikamatih akimeh kipiah n Espiritu. ¹⁵Pero akin kipia Iespíritu n Dios, nochi kitemoa iwa nochi kixmatih. Pero akimeh amo kipiah n Espiritu, amo weleti kajsikamatia akimeh ejé kipiah n Espiritu. ¹⁶Porke n tiotlajkuífoli kijtoa: “¿Akin kimati tlan kiyeyjekolia Toteko? ¿Akin weletis kimachtis Dios?” Is. 40:13

Pero tejwah tikajsikamatih itlayejyekolis n Cristo.

3

Tiitekitekheh Dios

¹ Nokniwah, ne mach oniwéletki onomechnónotski kemi nikinnonotsa akimeh kinyakana n Espíritu Santo, yej onomechnonotski kemi akimeh ok kichijtinemih tlan yejwah kinekih, kemi nonyaskiah nonselekkokoneh inawak Cristo. ² Onomechmacthi ika tlájtoli non amo tekio, porke nomejwah kemi nonselekkokoneh non amo weletih tlakuah, yej san ok chichih, iwa asta axa ayamó nonweletih nonkiyekkajsikamatih. ³ Porke tla ok nonxikojmikih, iwa amo nonmoyekwikah iwa nonmoxexeloah, kijtosneki ok non tlaltikpaktlakah, porke nonkimokawiliah manomechyoltilana tlan kineki nomokuerpo kemi kichiwah nochteh n tlaltikpaktlakah.

⁴ Porke ijkuak aka kijtoa: “Ne nika iwan Pablo”, iwa ok se kijtoa: “Ne nika iwan Apolos”. Tla ijko nonkiyejekoliah, nonkichiwah kemi kichiwah n tlaltikpaktlakah.

⁵ Porke, ¿akin Pablo?, noso ¿akin Apolos? Tejwah sanwel tiktektiliah Dios, iwa nomejwah ononkineltokakeh n Toteko ika tlan otomechmatiltijkeh. Yika, tejwah sanwel otikhijkeh n tekittl tlan Dios otechnawati matikchiwahak.

⁶ Ne Pablo onitook, Apolos okaateki, pero Dios, Ye akin okiskalti. ⁷ Ijko kiné, akin tooqa, iwa akin kiaatekia, amitla impati, yej Dios Akin kiskaltia n tlátoktli.

⁸ Akin tooqa iwa akin kiaatekia, san se impati, pero Dios kintlaxtlawis ijko kemi otekitikeh. ⁹ Porke tejwah san titlapalewijkeh itech iteki Dios, iwa nomejwah nonkateh kemi itlal non Dios kitekititok.

Nomejwah noiwa kemi se kali non Dios kimochijchiwilitok.

¹⁰ Ne Pablo nika kemi se kalchijchi, non Dios onechkawili maniktsimpewalti n kali, pero ok se okitlali makiskalti non kali. Iwa tinochteh moneki matiktlachilikah kenijki tikiskaltiskeh non kali. ¹¹ Porke amaka weletis kitsimpewaltis ok se kali, porke n atlátentli ya kajki iwa Ye n Cristo. ¹² Se kalchijchi weletis kiskaltis se kali ipan non atlátentli ika oro, plata ika temeh non tsotsotlanih, noso ika kuawitl, oasakatl noso akatl. ¹³ Pero nochi tekittl non otikhijkeh motenextis itech n iksemi tonati, porke itech neká tonati toteki moyeyekos ika tletl, iwa nochi amokuali tekittl tlatlas iwa nochi kuali tekittl kixikos n tletl. ¹⁴ Tla iteki se tlakatl kixikos n tletl, Dios kuali kitlaxtlawis. ¹⁵ Pero tla iteki amo okixiko n tletl, kipolos nochi, pero weletis momakixtis kemi ijkuak aka tlakatl kicholilia n tletl.

¹⁶ ¿Mach amo nonkimatih nomejwah icha Dios, iwa Iespíritu Dios chantitok nomotech?

¹⁷ Tla se tlakatl kixixinia itiopa Dios, Dios kipojpolos non tlakatl. Porke itiopa Dios tiochitok, iwa non tiopa nomejwah nonkimajmanah.

¹⁸ Amaka mamokajkayawa. Tla aka momachilia semi ixtlamati itech nin tlaltikpaktli, mamochiwa kemi se non amitla kimati, para ijko yetos se non milák ixtlamati. ¹⁹ Porke inmixtlatatilis n tlaltikpaktlakah amitla ipati ixa n Dios. Kemi ijkuilitok: “Dios kinkajkawa n ixtlamatkeh mamokajkayawah inselti.” *Job 5:13*

²⁰ Noiwa kijtoa: “N Toteko kimati inlayejekolis n ixtlamatinih, amitla ipati.”

Sal. 94:11

²¹ Yika, amaka mamoweyijkamati por inmixtlatatilis n tlaltikpaktlakah, porke nochi tlan onka nomoaxka.

²² Pablo,
Apolos,
Pedro,
n tlaltikpaktli,
n yolflistli
n mikilistli,
tlan axa onka,
noso tlan satepa yetos,

nochi nomoaxka, ²³ iwa nomejwah nonteaxkawah inawak Cristo, iwa Cristo teaxka inawak Dios.

4

Inteki itlatitlanilwah Dios

¹Ijkó moneki matechitakah n tlakah kemi titekitek de Cristo, iwa matiktematiltikah itlajtol Dios non otlaititoka. ²Ijkó kiné, akin kiselia se tekintl, moneki mayeto yekmilajka. ³Pero ne mach nimotekipachoa tla nomejwah noso n tekiwajkeh de nin tlaltípkaktli nechistlakoa. Iwa nion ne nimixewis nikijtos kox kuali noteki noso amó. ⁴Porke maya notlalnamikilis amo nechteilia, amo kijtosneki amo nikpia tlajtlákoli. Porke Noteko kijtos kox nitlajtlakole noso amó. ⁵Ijkó kiné, amaka san nima xiktalajtlakoltikah, yej ximochiakah maajsiki n tonati ijkuak Toteko wits iwa kinextis tlan tlaaitok itech iyolo n tlakatl, n Toteko kichiwas mamonexti tlan se okichi, ijkuakó se kiselis tlan okimotlanili.

⁶Nokniwah, ijki nomechtlapowia para manomechpalewi. Ne Pablo yonomechajsikamatilti Apolos iwa ne san titekitek inawak Dios. Ijki nomechtlapowia para amaka makixpanawi itlajkuilol Dios, iwa amaka makiweyili se tlamachti iwa ok se makitlawelita. ⁷Yika, ¿akin omitsili okachi miak timopati? ¿Mach amo Dios omitsmaktili nochi tlan tikpia? Iwa tla Ye omitsmaktili, ¿tleka timoweyilia kemi yaskia san te monewia otikmotlanili?

⁸Nomejwah ayakmitla nomechpoloa, ya nonkitlawelpiah nochi tlan ononkinekeh. Nomejwah yononmochijkeh wejweyi reyes, iwa tejwah onontechilkajkeh. ¡Nipakiskia tla de milajka nomejwah nonyaskiah wejweyi reyes, iwa ijko titlanawatijoskiah sansikah! ⁹Ne nikita ken yaskia Dios otechka sa iksemi tejwah akimeh tittelapowiah de itlajtol Dios. Tikateh kemi non ya kinmiktitiweh. Nochteh techmawisoah, asta n ángelteh iwa n tlaltípkaktlakah. ¹⁰N tlakah techitah mach ok ajsitok totlalnamikilis porke titlamachtiah de Cristo, pero nomejwah nonmomachilia nonmixtlatamatkeh itech itlajtol Cristo. Tejawh amo tichikawakeh, iwa nomejwah nonchikawakeh. N tlaltípkaktlakah techtlawelitalah iwa nomejwah nomechtlakitalah. ¹¹Asta axa, tejwah tiapismikih, tiamikih iwa amo tikpiah tlan tikmokentiskeh, n tlakah techtlajjowiltiah iwa amo tikpiah tocha, ¹²tisotlawah ijkuak titekitek ika tomawah. Ijkuak n tlakah fiero techtenewah, tejwah tiktlatlaujtiah Dios makintiochiwa, ijkuak techtotojtokah tejwah tikxikoah. ¹³Tla techpojpoah, tejwah tikinyeknotsah. Iwa asta axa n tlaltípkaktlakah techitah kemi se tlájsoli noso kemi itla non ayakmó kuali.

¹⁴Amo nomechtlajkuililia para nomechpijpinatis, yej para nomechnonotsas kemi nikinnonotsa nopolwah non nikintlasojtla. ¹⁵Porke maya nonkimpiaskeh májtlaktli mil temachtijkeh, amo nonkimpiah miakeh nomotajwah, ne onitlapewalti onomechmachtitiamachtilis Cristo, yika ne onimochi kemi nomota. ¹⁶Ijkó kiné, nomechtlatlaujtiah xikchiwakah ijko kemi ne nikchiwa.

¹⁷Yika, nomechtlalanilia n Timoteo, nokone akin niktlasojtla itech Toteko. Ye nomechilnamiktis kenijki onínenki ixpa n Cristo, ijko kemi niktlemachtia kan moololoah n tokniwah non kineltokah Cristo Jesús. ¹⁸Sikimeh de nomejwah semi nonmoweyilialah, porke non kimoliah mach nias nomechitati. ¹⁹Pero, tla Dios kimonekiltia, nias nomechitati san nima. Ijkuakó niktas kox milák kipiah weletlistli nekateh akimeh satlawel moweyilialah, noso san kimatih tlatlajtoah. ²⁰Porke n tlakah non kimokawiliah Dios makinawati amo san tlatlajtoah, yej kinextia ichikawalis Dios itech innemilis. ²¹¿Tlan nonkinekih? ¿Nonkinekih manomechtlajjowiltiti?, noso ¿nonkinekih manomechtlapowiti ika tlasojtlálistli iwa ika tlájtoli yámanki?

5

Xiktotokakah n tlakatl non omonepano iwa ichawana

¹Yomoma seme de nomejwah omonepano iwan ichawana. Nin se weyi tlajtlákoli, asta non amo kineltokah Dios mach para ijko kichiwaskeh.

²¡Iwa maya ijko nomejwah ok nonmoweyilialah! ¡Okachi kuali nonyetoskiah ika neyolkókoli! Akin okichi nin weyi tlajtlákoli xiktotokakah iwa ayakmó mamoseitili nomowah.

³Maya ne amo nika nomowah, noespíritu kajki nomowah, iwa yoniktalajtlakolti akin okichi non weyi tlajtlákoli, kemi ne niyetoskia ompa nomowah. ⁴Ximoololokah itech Itoka n

Toteko Cristo Jesús, iwa ne niyetos nomowah itech noesprítu. Iwa iweletilis n Toteko yetos nomowah. ⁵Non tlakatl moneki makitemaktikah imak satanáas para makitlajiyowiltili ikuerpo, iwa ijko n Toteko makimakixti iesprítu non tlakatl itech neká iksemi tonati ijkuak Cristo wits.

⁶Nomejwah amo ximoweyilikah ika tlan nonkichijtokeh. ¿Ayamá nonkikakah n tlájtoli non kijtoa: “Achitsi levadura kisamawa nochi n textli?” ⁷Yika, xikmokixtilikah nochi tlan nomecholyitlakojtok, para xiyetokah kemi n paj non mokua itech ilwitl de paskuah, non kichijchiwah ika n yankuik textli non amo kipia levadura, porke Cristo okimiktijkeh topatka kemi n ichkatsi non okimiktiayah itech ilwitl de Paskua.

⁸Ijko, n paj non kipia levadura kijtosneki ye n tlajtlácoli iwa nochi tlan amokuali se kichiwa. Okachi kuali matikchiwahak nin ilwitl de Paskua ika de milajka toyolo chipawak, iwa matiyetokah kemi n paj non amo kipia levadura.

⁹Itech non ok se noamatlajkuilol onomechili amo ximonelokah iwa non momekatiah. ¹⁰Ika tlan onomechili amo kijtosneki ximoxelokah de akimeh momekatijtinemih, n tominápih, n ichtekeh, noso akimeh kinweyilia n diosmeh non san kinmachijchiwah, porke para ayakmó nonmowikaskeh inwah, san semi nonkikakajtewaskiah nin tlaltíkpaktli. ¹¹Tlan ne oniknek nomechilis ye ni: Amo ximowikakah iwa akin kijtoa nomokni itech Cristo, iwa ok momekatijtinemi, noso tominápih, noso kinweyilia diosmeh non kinmachijchiwah, noso xolópijtli, tláwanki, noso tlachteh, iwa non tlakatl nion amo íwa xitlakuakah. ¹²Porke ne amo oniwala onikintlajtlakoltiko non amo kixmatih Dios. Pero nomejwah moneki nonkintlajtlakoltiskeh n tlaneltokakeh non moololoah nomowah. ¹³Yika moneki xikkixtikah non tlajtlakole nomonawak.

6

Amo ximotejteilikah inmixpa n tekiwajkeh non amo kitlakitah Dios

¹Ijkuak nomejwah nonkinekih nonmoteliskeh iwan ok se tokni, ¿tleka nonmixewiah non yawih nonmotejteilitiweh xpa se tekiwa non amo kitlakita Dios? Iwa amo non yawi xpa se non tlayakantok non kineltokah Cristo Jesús. ²¿Mach amo nonkimatih nomejwah akimeh nonkitlakitah Dios nonkinmixkomakaskeh n tlaltíkpaktlakah? Iwa tla nomejwah nonkinmixkomakaskeh, ¿mach amo nonweletiskeh nonkinyolsewiskeh akimeh moteiliah san ika amitla? ³¿Amo nonkimatih noiwa tikinmixkomakaskeh n ángelteh? ¿Tla ijko, okachi tiweletiskeh tikinyolsewiskeh akimeh motejteiliah itech nin tlaltíkpaktli! ⁴Tla nonmokualaniah iwa aka ok se, ¿tleka nonmoteiliah xpa n tekiwajkeh non amo kitlakitah Dios? ⁵Ijki onomechili para xipinawakah. ¿Mach amo onka se nomokni tlaneltokak akin kimatis kenijki nomechnonotsas ijkuak nonmokualaniah? ⁶Ijkuak se tokni mokualania iwa ok se tokni, ¿kox kuali ka mawiah mamoteilitih innawak tekiwajkeh non amo kitlakitah Dios?

⁷De milajka, nomechilia, tla ok nonmokuakualaniah iwa n oksikimeh nomokniwah, sanenka nochi tlan ya nonkichiwah. Okachi kuali xikijyowikah tlan amokuali nomechtoktiah, noso xikmokawilikah manomechtlachtekih. ⁸Pero nomejwah nonkichiwah tlan amo kuali iwa asta nonkintlachtekih nomokniwah.

⁹¿Mach amo nonkimatih akimeh amo yolchipawakeh amo weletis kalakiskeh kan Dios tlanawatijtok? Amo manomechkajyawakah; porke nochteh akimeh

kochtinemih itech tlajtlácoli,
akimeh kinweyilia diosmeh non kinmachijchiwah,
akimeh momekatijtinemih,
akimeh kichijtinemih tlan pitsotik iwa tetlajyalti,
n tlakah non kinmelewiah n tlakah,

¹⁰n tlachtekeh,
n tominápih,
n tlawankeh,
n tepojpokeh,

iwa akimeh tekajkawah para tlachtekeskeh, mach kalakiskeh kan Dios tlanawatijtok.

¹¹ Sikimeh de nomejwah achto ijko ononkichijtinemiah. Pero axa ya nonyolchipawakeh, iwa ya nonteaxkawah inawak Dios. Iwa axa Dios ya kajki nomowah, por Cristo Jesús iwa por Iespiritu Dios.

Amo matikpitsotilikah tokuerpo porke ika tikweyiliah Toteko

¹² Ijki mijtoa: “Nochi tlan ne niknekis nikchiwas, weletis nikchiwas”, pero amo nochi nechpalewis. Milák weletis nikchiwas san tlan niknekis, pero amo nikmokawilis itla manechyoltilana. ¹³ Nochi tlákuali omochi para totlalax, iwa totlalax para makiseli n tlákuali, pero se tonati Dios kimpojpolos san ken ome. Noijki tokuerpo amo omochijchi para matiawilnemikah, yej tokuerpo omochijchi para matikweyilikah n Toteko, iwa n Toteko machantito totech. ¹⁴ Iwa ijko kemi Dios okiyoliti n Toteko, noiwa tejwah techyolitis ika iweletilis.

¹⁵ ¿Mach amo nonkimatih nochteh nomejwah nonseititokeh itech ikuervo n Cristo? Tla ijko, ne akin niseititok itech ikuervo n Cristo, ¿weletis nikseitiliti nokuervo iwan ikuervo se awilsiwatl? ¡Ayik! ¹⁶ ¿Mach amo nonkimatih ijuak se tlakatl moseitilia iwan se awilsiwatl, mokopah san se kuerpo? Porke itlajkuilol Dios kijtoa: “Yejwah ome mochiwa san se.” ¹⁷ Pero akin moseitilia iwan Toteko, mochiwa sa se itech Iespiritu.

¹⁸ Xikcholilikah n awilnemilistli. Nochi tlajtlakoli tlan se kichiwa, mokawa panixko itech ikuervo, pero akin momekatia, tlajtlakolchiwa iwa inewia kijtlakoa ikuervo. ¹⁹ ¿Amo nonkimatih nomokuervo icha n Espiritu Santo non Dios onomechmák, iwa n Espiritu Santo yolitok nomotech? Iwa nomokuervo mach ok nomoaxka, ²⁰ porke Dios onomechko saikpanoa patio. Yika, moneki nonkiweyijkachiwaskah Dios ika nomokuervo iwa ika nomoespiritu, porke nochi iaxka n Dios.

7

Ijki moneki manemikah non yomonamiktijkeh

¹ Axa, manomechnankili tlan ononnechtlajtlanjikeh ijuak ononnechtlajkuililijkeh. Milák, kuali ka tla se tlakatl amo monamiktis; ² pero kemi miakeh momekatiah, okachi kuali nochi tlakatl makipia isiwa, iwa nochi siwatl makipia iokich. ³ N teokich moneki mamotemakti san iwa isiwa, iwa n tesiwa mamotemakti san iwa iokich. ⁴ Porke n siwatl non ya kipia iokich, ikuervo ayakmo iaxka, yej iaxka iokich. Noiwa n tlakatl non ya kipia isiwa, ikuervo ayakmo iaxka, yej iaxka isiwa. ⁵ Yika, amo ximonenekikah. Pero tla nonmomeh yononmoyekakjkeh nonkochiskah nonmijixkoyah kanaj kech tonati para non motiotsajtsiliskah, kuali ka. Pero satepa oksepa ximoseitilikah. Amo kichiwa ayakmo nonweletiskah nonmoxikoskeh, iwa n satanas nomechyltilanas para xitlajtlakolchiwahak.

⁶ Tlan nomechilijtok, amo xikitakah kemi se tlanawátli, yej tla nonkitah kuali ka, ijko xikchiwahak. ⁷ Ne niknekiskia nochteh n tlakah mayetokah kemi ne, pero tisejsemeh Dios otechmajmák tlatlámantli toyalis.

⁸ Yika, ne nikinmilia n tepochwewemeh iwa n iknosiwameh, okachi kuali mamokawakah inselti kemi ne. ⁹ Pero tla amo nonmoxikoah, ximonamiktikah. Porke okachi kuali ximonamiktikah, para amo manomechyoltilana tlan kelewia nomokuervo.

¹⁰ Pero akimeh yomonamiktijkeh, ijki nikinawatia, n tesiwa amo makikajkawa iokich. Nin tlanawátli amo noaxka, yej Toteko Dios itlanawatil. ¹¹ Pero tla n tesiwa kikajkawa iokich, ayakmo oksepa mamonomikti, noso mamotlapojpolwi iwa n iokich, iwa n teokich amo makikajkawa isiwa.

¹² N oksikimeh, nikinmilia tlan ne nikyejyekolia; iwa amo tlan Toteko kijtoa: tla se tokni kipia isiwa amo tlaneltokak, pero isiwa kineki yetos íwa, non tokni amo makikajkawa isiwa. ¹³ Iwa tla se siwatl kipia iokich amo tlaneltokak, iwa ye kineki yetos íwa, amo makikajkawa iokich. ¹⁴ Porke n teokich non amo tlaneltokak kiselial itlatiochiwalis Dios por isiwa. Iwa n siwatl non amo tlaneltokak, kiselial itlatiochiwalis Dios por iokich. Tla amo ijko yetoskia, nomopilwah mach kiseliskiah itlatiochiwalis Dios, pero axa yolchipawakeh. ¹⁵ Pero tla n teokich noso n tesiwa non amo kineltokah Cristo, mochijchikawa kikajkawas se tokni,

makikajkawa. Porke Dios otéchnotski para matiyetokah ika yolsekwílistli. ¹⁶ ¿Ken tikmati te siwatl, kox weletis tikpalewis mokich iwa Dios kimakixtis? ¿Noso te tlakatl ken tikmati kox satepa Dios kimakixtis mosiwa?

¹⁷ Tisejsemeh matipakikah ika tlan Toteko otechmajmák ijkó kemi ijkuak otéchnotski, nochi ni nikinnajnewatia n tokniwah tlaneltokakeh. ¹⁸ Tla Dios kinotsas aka non ya kajki sirkunsidado, ijkó mamokawa. Iwa tla aka okínotski non ayamó kajki sirkunsidado ijkó mamokawa. ¹⁹ Amitla ipati tla se kajki sirkunsidado noso amó, tlan milák ipati, matikintlakitakah itlanawatilwah Dios. ²⁰ Yika, nonsejsemeh mamokawa kemi ijkuak Dios okínotski. ²¹ Tla aka okatka tlanémaktli* ijkuak okineltokak Cristo, amo mamotekipacho, pero tla aka weletis momakixtis imak iteko, mamomakixti. ²² Akin okatka tlanémaktli ijkuak okínotski n Toteko, axa non tlakatl yomákiski iwa ya weletis kitekitilis n Toteko. Iwa akin omonewatiaya san ye inewia axa ya kajki kemi tlanémaktli inawak Cristo. ²³ Dios saikpanoa onomechko patío, ayakmó oksepa xikmokawilikah manomechchiwakah nontlanémakteh. ²⁴ Ijkó kiné nokniwah, ximokawakah ijkó kemi ijkuak Dios onoméchnotski.

²⁵ Para akimeh ayamó nonmonamiktiah, amo nikpia itla yanquik tlanawátli tlan Toteko nomechnawatia, pero kualiká tla nonkichiwaskeh tlan ne nikyejyekolia porke Dios ika itlasojtlalis nechyakana. ²⁶ Ne nikyejyekolia okachi kuali tla se tlakatl noso se siwatl mokawa kemi kajki, porke ninteh tonatijmeh saikpanoa owijkeh. ²⁷ Tla tikpia mosiwa, amo xikkajkawa, iwa tla ayamó tikpia mosiwa, amo xikmotemoli. ²⁸ Pero tla se tlakatl monamiktia, amo tlajtlalochiwa, iwa tla se íchpochtli monamiktia, noiwa amo tlajtlalochiwa. Pero akimeh monamiktiah, panoskeh itech miak tlaijyowílistli, ne niknekiskia amo ijkó mapanokah.

²⁹ Nokniwah, tlan ne nikneki xikajsikamatikah ye ni: ayakmó tikpiah miak tonati. Yika, akimeh ya kipiah insiwa manemikah kemi akimeh ayamó monamiktiah, para makitekitilikah n Toteko. ³⁰ Akimeh moyolkokojothokeh, manemikah kemi amo moyolkokojtoskiah; akimeh yolpaktokah, manemikah kemi amo yolpaktoskiah; iwa akimeh motlajtlakowiah, makichiwakah kemi amo yetoskia inmaxka tlan okimokowijkeh. ³¹ Akimeh kinyolpaktia tlan onka itech nin tlaltípkaktli, ayakmó makimokawilikah makinoyoltilanto; porke tlan onka itech nin tlaltípkaktli, pojpoliwis.

³² Ne niknekiskia amitla manomechtekipacho. Ijkuak se tlakatl ayamó monamiktia, okachi kitekipachoa kenijki kitekitilis n Toteko. ³³ Pero ijkuak yomonamikti, okachi kitekipachoa tlan onka itech nin tlaltípkaktli para kipaktis isiwa, ³⁴ iwa itlayejyekolis xexelítok. N siwatl non ayamó kipia iokich iwa non ok íchpochtli okachi kitekipachoa kiyolpaktiskeh Toteko. Pero se siwatl non ya kipia iokich, okachi kitekipachoa tlan onka itech nin tlaltípkaktli para kipaktis iokich. ³⁵ Nochi ni nomechilia para nomechpalewis, iwa amo para nomechtlakawaltis. Xinemikah ika nomoyolo chipawak para ijkó nochipa nonkitekitiliskeh n Toteko.

³⁶ Tla se teta, kiyejyekolia okachi kuali mamonomikti íchpoch porke ya kipia xiwitl, makikawili tla kiyejyekolia kuali tlan kichijtok. N íchpochtli weletis monamiktis iwa amo tlajtlalochiwa. ³⁷ Pero tla ok se teta, kitlalia itech iyolo iwa kiyejyekolia okachi kuali amo mamonomikti íchpoch, kuali tlan kichiwa. ³⁸ Yika, tla se teta kitemaktia íchpoch mamonomikti, kuali ka. Pero tla se teta kineki íchpoch mamokawa iselti para kimopantis Dios, okachi kuali kichiwa.

³⁹ Se siwatl non ya kipia iokich kinawatijtos iokich tla ok onka. Pero tla iokich yomikki, n iknosiwatl weletis oksepa monamiktis iwa akin ye kinekis, pero mayeto se tlakatl non kineltoka Toteko Dios. ⁴⁰ Pero, tla ayakmó kinekis monamiktis, ne nikijtoa okachi kipiás pakílistli. Ye ni tlan ne nikyejyekolia, ijkí nomechilia porke nikneltoka Iespíritu Dios onechinmák ninteh tlájtoltelch para manomechnonotsa.

* 7:21 Esklavos: kijtosneki ijkuak n tlakah okitewikiliayah miak tomi iwa ayakmó oweletiah okikopayah omotemaktiayah imak iteko.

8

N tlákuali non se kimana

¹Tlan axa nomechilis kox weletis nonkikuaskeh n tlákuali non nonkimanah. Tinochteh tikpiah ixtlamatflistli, n ixtlamatflistli san ika se moweyiliah. Pero n tlasojtlálistli kichikawa totlaneltokalis. ²Tla aka kimolia ya kimati itla, kitenextia ayamitla kimati kemi moneki kimatis. ³Pero tla aka kitlasojtla Dios, Dios kuali kiyekixmati.

⁴Yika, tla tikkuaskeh noso amo tikkuaskeh n nakatl non yokinmanilijkah n diosmeh non kinmachijchiwah, tikmatokeh amitla impati itech nin tlaltípkaktli, porke sanwel se Dios onka. ⁵Porke maski mayetokah miakeh diosmeh iwa tekowajkeh kan ilwikak noso itech tlaltípkaktli, ⁶tejwah san se Dios tikpiah, Totajtsi. Totajtsi okichijchi nochi tlan onka, iwa tejwah tiyolitokeh para Ye. Onka san se Toteko, Ye n Cristo Jesús. Iwa por Ye omochi nochi tlan onka itech nin tlaltípkaktli, iwa tejwah noiwa tiyolitokeh por Ye.

⁷Pero amo nochteh n tlaneltokakeh kimatih. Sikimeh non yomomatkeh kinweyiliah diosmeh non kinmachijchiwah, ok kikuah n tlákuali non kinmaniliah nonteh diosmeh non kinmachijchiwah ika sokitl, iwa inmixtlamachilis ken amo chikawak, kimachiliah okichijkeh tlajtlákoli. ⁸Milák, tlan tikuah amo techyolchipawa inawak Dios. Porke amo okachi tiyolchipawatoskeh tla tikkuaskeh, nion okachi timotlajtlakoltiskeh tla amo tikkuaskeh. ⁹Pero ximotlachilikah amo xikchiwahak itla tlan ika weletis kitlajtlakolchiwaltis nomokni, non ayamó chikawak itlaneltokalis itech Cristo. ¹⁰Matikijtokah, tla se tokni non amo chikawak itlaneltokalis mitsita titlakuajtok kan kintlamaniliah n diosmeh non san kinmachijchiwah, ye weletis moyolchikawas kikuas tlan te tikkuajtok. ¹¹Iwa kemi te ya tikmati, tikchiwa mamoi xpolo mokni non ayamó chikawak itlaneltokalis itech Cristo Jesús, Akin omikki por ye. ¹²Ijkó kiné, ijkuak tikinkojkoa intlayejyekolis mokniwah non ayamó chikawak itlaneltokalis, nomejwah nontlajtlakolchijtokeh inawak Cristo. ¹³Yika, tla niktajtlakolchiwaltia se nokni ika tlan nikkua, ayik nikkuas non nakatl, para amo maniktajtlakolchiwalti nokni.

9

Tlan kichiwa se itlatematilti Cristo

¹¿Mach amo niweletis nikchiwas tlan oksikimeh tlatematiltijkeh kichiwah, iwa nikmotlanilis tlan yejwah kimotlaniliah? Ne onikitak n Toteko Jesús, iwa nomejwah ononkineltokakeh ijkuak onomechmatilti itlajtol Toteko. ²Tla innawak oksikimeh ne amo nitlatitlánili, para nomejwah ne nitlatitlánili, porke nomejwah ononkineltokakeh Cristo Jesús ijkuak ne onomechmachi, iwa ika noni nomotech motenextia noteki milák nitlatitlánili.

³Tla aka amo kipaktia tlan nikchiwa, ijki nimotlajtolpalewis: ⁴Kemi nitlatitlánili weletis nikmomajsewis iwa nikonis nochi tlan nechmakaskeh, ⁵noiwa niweletis nikwikatinemis se nosiwa non kineltoka Cristo Jesús, ijko kemi kichiwah n oksikimeh itlatitlanilwah Dios, ikniwah n Toteko, iwa Pedro. ⁶¿Noso nonkiyejyekoliah san ne iwa Bernabé tikpia titekitiskeh para tikmotlaniliskeh tlan tikkuaskeh? ⁷Tla aka tekkitok kemi soldado, amo kipia ok se iteki para ika tlakuas. Akin kitooka uvas, noiwa kinkua. Akin tlajpia ¿amo koni lechi ijkuak tlapatska? ⁸Iwa amo xikmolikah san ne nikiyejyekolia tlan nomechilijtok, porke itech itlanawatil Moisés noiwa ijko kijtoa. ⁹Itech itlanawatil Moisés ijkuilitok: “Amo xiktalilili itempoxa n toro ijkuak kitlaxa n trigo.”

Dt. 25:4

Dios amo ijko okijto, por kintekipachoa n torojteh, ¹⁰yej techajsikamatiltia. Nin tlanawátili omoijkuiulo para matimopalewikah. Porke akin kitekiti n tlali iwa akin pixka, mochiah ika pakilistli para kiseliskeh tlan inmaxka. ¹¹Yika, tla tejwah otiktookakeh itlajtol Dios itech nomoyolo, ijko noiwa weletis tikselseh itla tlan ika tipanotoskeh. ¹²Tla oksikimeh tlamachtijkeh nonkinmakah tlan ika panotoskeh, nomejwah okachi moneki techpalewiskeh.

Pero tejwah amo tomechtlajtlaniliah techpalewikah. Yej nochi tikxikojtivitseh, para amo tiktsakuiliskeh n kualitlájitoli non temaxitia. ¹³Nomejwah kuali nonkimatokeh, akimeh tekith kan Weyi Tiopa, kikuah tlan onka itech tiopa, iwa akimeh tlajektlaliah

kan artal kan se tlamana, kiseliah tlan kimanah. ¹⁴ Ijkó noiwa, Toteko otlanawati akimeh kitemachtijtjinemih itlajtol, mapanotiwiah ika tlan kinmakah akimeh kinmachtiah. ¹⁵ Pero ne amo oniktekitilti nomonawak nin tlanawátli, amo ijki nomechtlajkuililia para techmakakah itla. ¡Okachi kuali manimiki pero amo manikpolo nin paklistli non nkipia!

¹⁶ Ne amo nimosijsinia por niktetlapowia n kualitlajtoli non temakixtia. Porke notech powi maniktetlapowi. ¡Nimialma tla amo oniktetlapowi! ¹⁷ Yika, tla nitlamachtijtjinemi porke nechpaktia nitlamachtijtjinemih, nikmotlanilis notlatliokolil. Pero tla nitlamachtia porke onechnawatijkeh, trato nitlamachtijtjinemih, porke Dios onechmaktili nin tektil. ¹⁸ Ijkó kiné, ¿katie notlaxtlawil? Ne nikselia notlaxtlawil ijkuak niktetlapowia n kualitlajtoli iwa amitla niktiani. Ijkó nikchiwa iwa amo niktinlajtlanilia tlan yonikmotlanili por niktetlapowia itlajtol Dios.

¹⁹ Maya amaka inawak niteaxkatitok, ne nimoteaxkatia inmixpa n nochteh, para okachi miakeh manikintlaneltokti. ²⁰ Ijkuak nika iwan judójtch nimochiwa kemi nijudío, para manikintlaneltokti inawak Cristo, akimeh kitlakitah intlanawatil, maya ne ayakmó niktakita n tlanawatilistli nikchiwa kemi niktakitaskia, para niktinlaneltoktis akimeh kitlakitah non tlanawatilistli. ²¹ Ijkó noiwa, ijkuak nika iwa non amo kitlakitah intlanawatil, nimochiwa kemi yejwah, maya nikmatok moneki niktakitas itlanawatil Dios, porke nika itech itlanawatil Cristo. ²² Ijkuak nika iwa non ayamó chikawak intlaneltokalis ne nikinmoiknitia, ne ijko nimochiwa para makineltokakah Cristo iwa para sikimeh mamomakixtikah. ²³ Ne ijko nikchiwa para miakeh makikakikah n kualitlajtoli, iwa ne noiwa manikseli n tlatiochiwálistli, non kualika nin kualitlajtoli.

²⁴ Nomejwah kuali nonkimatih ijkuak se motleloa kan motlatlanih, miakeh motleloah, pero sanwel se tlatlani iwa sanwel ye kiseliah n tlatliokólili. Ijkó nomejwah ximotlelokah iwa xitlatlanikah. ²⁵ Nochteh akimeh motlatlanih, momalwiah para amitla makinkojko. Ijkó kichiwah san por kinekiah kitlaniskeh se korona non kinkuonakiltiah iwa sa niman waki. Pero tejwah timochijchikawah para tikselskeh se tlatliokólili non ayik piliwis. ²⁶ Pero ne mach nimotleloa san ken wetsi, nion sanenka nimotekilmaka kemi niktakil-makatoskia n ejekatl, ²⁷ yej niknajnawatia nokuero iwa niktoktia manechtlakita, para amo san ne nonewia nimokawas kala, ijkuak yotlanki onikinmacthi oksikimeh.

10

Pablo kinnonotsa amo makinweyilikah diosmeh non san kinmachijchiwah

¹ Nokniwah, nikneki xikmatikah, ya wejkawitl towejkatawaw onenkeh itlampa se mextli, iwa nochteh opanokeh itlajko n weyi atl non itoka chichiltik. ² Ijkó nochteh omokuaatekijkeh itech mextli iwa itech weyi atl para techyakanas Moisés. ³ Iwa nochteh okisepanmajsewijkeh n tlákuali non owaltemok de ilwikak non Dios okintitlanili. ⁴ Iwa nochteh okonikah san se atl. Porke okoniayah n atl non omextoka itech non Tetl, iwa non Tetl oyaya inwah. Iwa non Tetl Ye n Cristo. ⁵ Pero san ome okipaktijkeh Dios, yika nochteh non oksikimeh omijmikeh kan tlattejtéyinki.

⁶ Nochi ni otlamochi para tejwah matikkajsikamatikah, para amo matiknekikah tlan amokuali, kemi yejwah okichijkeh. ⁷ Yika, nomejwah amo xikinweyilikah diosmeh non san kinmachijchiwah, kemi sikimeh okichijkeh. Itlajkuilol Dios kijtoa: “Yejwah omotlajtlalijkeh, otlakuajkeh iwa otlawankeh iwa satapa omijtotijkeh inmixpa in diostsitsiwah.” *Éx. 32:6* ⁸ Amo matimomekatikah kemi sikimeh de yejwah okichijkeh, iwa omikeh sempóali iwa eyi mil (23,000) san itech se tonati. ⁹ Nion amo matikyejyekokah n Toteko, kemi sikimeh de yejwah okichijkeh, iwa omikkeh ijkuak okinkuajkuajkeh n koameh. ¹⁰ Nion xixixtokilikah Dios kemi sikimeh okichijkeh, yika okinmijmikti n ángel non temiktiani.

¹¹ Nochi ni okijyowijkeh towejkatawaw. Omoijkuilo itech tiotlajkuólili para matikil-namiktokah iwa amo ijko matikchiwah, tejwah akimeh tiyolitokah itech ninteh iksemi tonatijmeh. ¹² Yika, akin kimolia amitla weletis kitlajtlakolchiwaltis, kuali mamotlakxili iwa mamotlachili para amo matlajtlakolchiwa. ¹³ Nochi tlan nomechyotilana, noiwa mochiwah nochteh n tlatlaktlakah. Pero kemi Dios nochipa kiyekchiwa tlan kijtoa,

Ye amo kitekawilis manomechyoltilana okachi tla ayakmó nontlaxikoah. Ye nomechilis kenomi nonmakisaskeh, iwa ijko nontlaxikoskeh.

¹⁴Yika, notlasojikniwah amo xikinweyijkachiwakah diosmeh non san kinmachijchiwah. ¹⁵Ne nomechtlapowia porke nikmati nonteajsikamatkeh, nomejwah xikyeyjekolikah tlan nomechilia. ¹⁶Ijkuak tiktlajtlanilia Dios makitiochiwa n vino non tikonih itech isena n Toteko, tiknextiah timoseitilijtokeh iwan Cristo por iesz non okitoya. Iwa ijkuak tiksepanmajsewiah n paj non tiktlapanah, tiknextiah Cristo okitemák ikuerpo iwa omikki topatka. ¹⁷Maya tejwah timiaktikeh, tinochteh tikkuah san se paj, yika timochiwah san se kuerpo.

¹⁸Xikinmitakah n tlakah de Israel, akimeh kikuah tlan yokimankeh itech artal, yejwah moseitilia ika tlan kimanah kan artal. ¹⁹¿Tlan nikijtoa? N “dios” non san kinmachijchiwah amitla ipati, nion amitla ipati tlan se kimana iyakapa non “dios”. ²⁰Akimeh kitlamanilia non “dios” kitlamanilia n demóniojteh iwa amo Dios, iwa ne amo nikneki xikinmoiknitikah akimeh kintlamanilia n demóniojteh. ²¹Mach weletis nonkoniskeh itech ikopa n Toteko, iwa itech inkopa n demóniojteh. Nion weletis nontlakuaskeh itech imesa n Toteko, iwa itech inmesa n demóniojteh. ²²Noso, ¿nonkinkeh machawati n Toteko? ¿Kox tejwah okachi tichikawakeh ke Ye?

Matikimpalewiah akimeh ayamó chikawak intlaneltokalis

²³Milák, tejwah weletis tikchiwaskeh san tlan tejwah tiknekiskeh pero amo nochi techpalewis. Weletis tikchiwaskeh san tlan tejwah tiknekiskeh pero amo techpalewis para okachi mamochikawa totlaneltokalis. ²⁴Amaka mamotekipacho tlan ye kineki kichiwah, yej noiwa mamotekipacho kenomi kinyolchikawas oksikimeh.

²⁵Nomejwah weletis nonkikuaskeh nochi n nakatl non monamaka tiánkistli, iwa amitla xitlajtlanikah, para amo manomechyolkaujto nomotlalnamikilis. ²⁶Porke n tlaltípkaktli, iwa nochi tlan onka itech, iaxka n Toteko.

²⁷Tla aka non amo tlaneltokak nomechtlalwia xitlakuatih icha, xikkuakah nochi tlan nomechmakas. Amo xitlajtlanikah kox okimanki, para amo manomechyolkaujto nomotlalnamikilis. ²⁸Pero tla aka nomechilia: “Nin nakatl yokinmanilijkah n diosmeh non san kinmachijchiwah.” Ijkuakó kiné amo xikkua non nakatl, para amo tiktlajtlakolchialwaltis akin ijko omitsili, iwa para amo tikkojkos itlalnamikilis. ²⁹Nomechtlapowijtok de intlannamikilis oksikimeh, amo nomotlalnamikilis.

“¿Tleka amo niweleti nikchiwa tlan ne nikmolia kuali ka, san por ok se kiyeyjekolia amokuali?” ³⁰Tla niktlasojkamati Dios ijkuak itla nikmomajsewia, ¿tleka nechpojpoah ijkuak nikkuah? ³¹Ijko, tla nontlakuah, noso nonkonih, noso itla ok se nonkichiwah, nochi xikchiwakah para nonkiweyijkachiwaskeh n Totajtsi Dios. ³²Amitla xikchiwakah non ika nonkintoktiskeh matlajtlakolchiwakah n judíojteh, noso se non amo judío, noso se non ya kitlakita Dios. ³³Ne niktlemolia kenijki nikimpaktis nochteh. Amo nikmotemolia san tlan ne nechpalewis, yej tlan oksikimeh kimpalewis para mamomaxiktikah.

11

¹Nomejwah xikchiwakah tlan ne nikchiwa, porke ne nikchiwa tlan Cristo okichi.

Kenijki moneki mayetokah n siwameh kan nonmoololoah

²Nokniwah, nipaki nomowah porke nochipa nonnechilnamiktokeh iwa nonkitlakitah n tlamachtlistli non onomechmakah. ³Nikneki xikajsikamatikah Cristo Ye n tlayákanki, itech nochi tlakatl non kitlakita. Iwa n teokich ye akin kiyakana isiwa, ijko kemi Dios kinawatia Cristo. ⁴Tla se tlakatl mokuatlakentia ijkuak motiotsajtsilia noso ijkuak kitemachtia n Tlájtoli de Dios, kijtosneki amo kitlakita Cristo. ⁵Pero tla se siwatl amo mokuatlakentia ijkuak motiotsajtsilia noso ijkuak kijtoa itla tlájtoli non Dios okimák, kipijpinatia iokich, porke tla ijko kichiwa kijtosneki kemi kuaxintoskia. ⁶Tla se siwatl amo mokuatlakentia, okachi kuali makimotekili nochi itsonkal. Pero tla pinawa mokuaximas, mamokuatlakenti. ⁷N tlakatl amo moneki mamokuatlakenti, porke ye kitenextia itlachialis iwa iweyijkachiwalis Dios. Pero n siwatl kitenextia iweyilis n tlakatl. ⁸Porke

ijkuak Dios okichijchi n tlakatl, amo okikixti itech siwatl, yej n siwatl, okikixti itech tlakatl. ⁹Dios amo okichijchi n tlakatl para n siwatl, yej okichijchi n siwatl para n tlakatl. ¹⁰Yika, moneki n siwatl mamokuatlakenti para makitakah n ángeltech milák kitlakita iokich. ¹¹Maya ijko, inawak Toteko nion tlakatl nion siwatl ijixkoyantitokeh. ¹²Porke maya n siwatl walewatok itech tlakatl, noiwa n tlakatl tlakati itech siwatl. Pero nochi walewa de Dios. ¹³Nomejwah xikyeyjekolikah kox kuali tla se siwatl amo mokuatlakentia keman motiotsajtsilia. ¹⁴Totlalnamikilis techilia tepinati tla se tlakatl nemis ika itsonkal weyak. ¹⁵Pero n siwatl amo tepinati makipia itsonkal weyak, porke Dios okimák itsonkal para ika mamouatsakua. ¹⁶Pero tla aka kineki kixnamikis nin tlamachtlistli, makimati tejwah nion itlaneltokawah Dios, tikixmatih ok se tlamachtlistli.

Sikimeh de Corinto mach okitlakitayah isena n Toteko

¹⁷Ne nikneki nomechilis amo nechpaktia tlan nonkichiwah, porke ijkuak nonmoololoah amo nonmoyolchikawah, yej nonkintlawelitalah n oksikimeh. ¹⁸Ijkuak nonmoololoah, nikkaki nonmoxexeloah, iwa mati nikneltoka. ¹⁹Porke moneki nonmoxexeloskeh para ijko mamota akimeh de milajka kitlakitah Dios. Mt.

^{13:24-30} ²⁰Yika, ijkuak nonmoololoah para nonkimomajsewiskah isena n Toteko, mach ok ye tlan nonkichiwah. ²¹Porke ijkuak nonmotlamajsewiah, pewa nonmoijixkoyantiah iwa nonkimotlatlaniliah tlan nonkimomajsewiskah. Ijko sikimeh mokawah apismiktokah iwa oksikimeh asta mowintiah. ²²¿Mach amo nonkipiah nomocha kan weletis nontlakuaskeh iwa nonkoniskeh? Yika nomechilia, ijkuak ijko nonkichiwah, nonkiteititiah mach nonkintlasojtlah nomokniwah, iwa nonkimpijpinatiah akimeh amitla kipiah. Iwa axa, ¿tlan weletis nomechilis? ¿Nomechilis kuali tlan nonkichiwah? ¿Kan mayeto kuali?

Isena n Toteko Jesús

(Mt. 26:26-29; Mr. 14:22-25; Lc. 22:14-20)

²³Porke tlan Toteko otechititi, ye noni tlan ne nomechmacthia: Non yúali ijkuak kitemaktiskiah n Toteko Jesús, okónanki n paj, ²⁴iwa ijkuak yomotlasojkama inawak Dios, okitlápanki n paj iwa okijto: “Xikmomajsewukah; Ye ni nokuerno non niktemaka por nomejwah. Ijki xikchiwahak para nonnechilnamikiskeh.” ²⁵Ijko noiwa, ijkuak yomotlamajsewijkeh, okónanki n vino iwa okijto: “Nin vino ye noesso tlan ika timoyekkawah, ijkuak nonkoniskeh, techilnamikikah.” ²⁶Nochipa ijkuak nonkikuaskeh nin paj iwa nonkoniskeh nin vino, nomejwah nonkinextiah imikilis n Toteko Jesús, asta Ye walmuikas.

Kenomi moneki se kimomajsewis isena n Toteko

²⁷Ijko kiné, akin kiku n paj noso koni ivino n Toteko Jesús, pero amo kemi Toteko kimonekiltia, tlajtlakolchiwa inawak ikuerno iwa iesso n Toteko Cristo Jesús. ²⁸Yika, nomejwah nomonewiah ximoyeyjekokah kox kuali nomotlayeyjekolis inawak Dios ijkuak ya nonkimomajsewiskah n paj iwa ya nonkonitiweh n vino. ²⁹Dios kitlajiyowiltis akin kikuas non paj noso konis non vino, porke amo kitlakita imikilis n Toteko Cristo. ³⁰Yika miakah nomokniwah amo chikawakeh, sikimeh nochipa mokokoah, iwa sikimeh yomikkeh.* ³¹Pero tla san tejwah timotlakitaskiah, amaka techtlajtlakoltiskia. ³²Pero ijkuak techtlajtlakoltia n Toteko, Ye techtlajiyowiltiah, para amo matechtlajiyowiltikah iwa non amo kineltokah.

³³Yika, nokniwah, ijkuak nonmoololoah para nonkimomajsewiskah isena n Toteko Jesús, ximochiakah non nochteh para sansikah nonmotlamajsewiskah. ³⁴Tla aka xitlatla, matlakuajtewa icha, para ijko Dios amo manomechtlajtlakolti porke amo ye tlan nonkichiwah ijkuak nonmoololoah.

Oskiki nikyektlalis ijkuak nomechonitati.

12

N weletlistli non techmaka n Espiritu

* 11:30 N griego kipia kochih. Xikitakah 1 Ts. 4:15.

¹ Nokniwah, nikneki xikmatikah ke n Espiritu techmajmaka iweletilis tinochteh. ² Nomejwah kualí nonkimatih, ijkuak ayamó ononkineltokayah Cristo Jesús, onomechtok-tiayah xikinweyilikah diosmeh non kinmachijchiwah iwa amo tlajtoah. ³ Yika, axa nikneki kualí xikmatikah akin tlajtoa ika iweletilis n Espiritu amo weletis kiwijwikaltis n Cristo Jesús. Noiwa akin amo tlajtoa ika iweletilis n Espiritu, mach weletis kijtos, “¡Jesús, Ye Noteko!”

⁴ Onka tlatlámantli tlatliokólili non se weletis kiselis, pero san se Espiritu akin kitemaka.

⁵ Onka tlatlámantli toteki tlan ika weletis tiktekichiwiliskeh, pero onka san se Toteko.

⁶ Weletis tikchiwaskeh san miak, pero onka san se Dios akin kichiwa nochi tekittl itech n tlakah. ⁷ N Espiritu sejse kinmaka se weletlistli para manomechompalewi.

⁸ Sikimeh n Espiritu kinmaka weletlistli para matetlapowikah ika ixtlamatlistli.

Iwa oksikimeh kinmaka weletlistli para matlajtokah tlan oksikimeh amo okimatiah.

⁹ Iwa oksikimeh, n Espiritu kinmaka weletlistli para matlaneltokakah.

Oksikimeh kiseliah weletlistli para makimpajtikah kokoxkeh san ika se Espiritu.

¹⁰ Oksikimeh, n Espiritu kinmaka weletlistli para makinchiwakah milagros,

iwa oksikimeh para matetlapowikah tlan Dios kineki matikchiwakah.

Oksikimeh, n Espiritu kinchiwa mayetokah ixtlamatkeh para makimatikah katliejmeh tlajtojtokeh ika Espiritu iwa katliejmeh amó.

Oksikimeh, n Espiritu Santo kinmaka weletlistli para matlajtokah ika oksikimeh tlájtoltel.

Iwa oksikimeh, n Espiritu kinmaka weletlistli para makinmajsikamatikah nonteh tlájtoltel yankuikah iwa makijtokah tlanón kijtosnekih.

¹¹ Pero nochi noni kichiwa non san Ye se Espiritu, Akin kinxejelilia iweletilis nochteh ijko kemi Ye kimonekiltia.

Tinochteh tikateh san itech se kuerpo

¹² Cristo kemi se kuerpo non kimpia miakeh iomiowah, iwa ninteh iomiowah maya mi-akeh kimajmana san se kuerpo. ¹³ Porke tejwah tinochteh, tla tiyetoskeh tijudíojtet noso amo tijudíojtet, titlanémakteh noso amó, ijkuak otimokuaatekijkeh, axa ya tikmajmana san se kuerpo porke tikpiah san se Espiritu, iwa tinochteh otitlaonikah san itech non Espiritu.

¹⁴ Se kuerpo amo majmantok san ika se omitl, yej ika miakeh omiomeh. ¹⁵ Tla se tokxi kijtoskia: “Ne amo nimaitl, yika ne amo niteaxka itech nin kuerpo”, amo por noni ayakmó yetos teaxka itech non kuerpo. ¹⁶ Iwa tla se tonakas kijtoskia: “Ne amo niixtololotl, yika ne amo niteaxka itech nin kuerpo”, amo por noni ayakmó yetos teaxka itech non kuerpo.

¹⁷ Yika, tla nochi n kuerpo yaskia ixtololotl, ¿kenomi titlakakiskiah? Noso tla nochi n kuerpo yaskia nákastli, ¿kenomi titlajnekuiskiah? ¹⁸ Pero Dios okimájmanki tokuerpo kemi Ye okimonekilti. ¹⁹ Tla nochi tokuerpo yaskia ixtololotl, ¿kenomi yaskia tokuerpo?

²⁰ Yika, maya tikpiah toma, tonakas, toixtololo noso tokxi, san se kuerpo tikpiah.

²¹ Toixtololo amo weletis kilis n toma: “Amo techpoloa”; nion totsonteko weletis kinmilis tokxiwah: “Amo nonnechpoloah.” ²² Mach ijko, porke tlan itech tokuerpo tikmoliah amo chikawak, ye tlan okachi moneki. ²³ Tlan tikmoliah amo weyi kijtosneki itech tokuerpo, ye tlan okachi tikmokuilawiah. Iwa tlan itech tokuerpo nikmoliah amo okachi ipati, ye tlan okachi tikyektlakentia. ²⁴ Porke tlan okachi kualtsi itech tokuerpo, amo moneki matikyekchijchiwakah. Ijko Dios okiyekchijchi tokuerpo para tlan tikmoliah amo okachi ipati, moneki mamotlakita okachi. ²⁵ Ijko okichijchi para amo mamoxelo tokuerpo, yej nochi tlan kimajmantok tokuerpo mamosepantlachilikah. ²⁶ Yika, ijkuak se tokxi noso se toma mokokoa, nochi tokuerpo tlaijyowia. Iwa tla se tokxi noso se toma okachi tikmokuilawiah, nochi tokuerpo mokawa ika paklistli.

²⁷ Ijko kiné, nochteh nomejwah nonkimajmanah ikuero n Cristo, iwa non sejemeh non sasalitokeh itech non kuerpo.

²⁸ Ijko, Dios okinmajmak tlatlamantli tekittl non Ye okinpéjpenki. Achte, okintlali tlatematiltikah,

satepa non kitematiltiah itlajtol Dios non Ye kinmilia makitematiltikah,

satepa, tlamachtijkeh,
 satepa, non kinchiwah milagros,
 satepa, non kimpajtiah kokoxkeh,
 oksikimeh non tlapalewiah,
 oksikimeh non tlayakana,
 iwa oksikimeh matlajtakah ika oksikimeh tlájtolteh.

²⁹ Xikitakah, amo nochteh tlatematiltijkeh, nion amo nochteh profetas. Amo nochteh tlamachtijkeh, nion amo nochteh kinchiwah milagros. ³⁰ Amo nochteh okiselijkeh weletlistli para kimpajtiskeh kokoxkeh, amo nochteh tlajtoah ika oksikimeh tlájtolteh, nion amo nochteh weletih kiteajsikamatiltiah tlan kijtoah nonteh tlájtolteh. ³¹ Nomejwah xiktajltlanilikah manomechmaka tlan okachi kuali itlatliokolil Dios.

Pero ne nomechititis ok se nemlistli tlan okachi ipati.

13

N tlasojtlálistli okachi weyi kijtosneki

¹ Tla ne nitlajtoa ika intlajtol nochteh n tlaltikpaktlakah iwa ika intlajtol n ángeltech, pero amo nitetlasojtla, notlajtol amitla ipati, yej san tekui, noso san chalani kemi se tépostli. ² Tla nikselia itlajtol Dios, iwa nikajsikamatiskia nochi tlan oksikimeh amo kajsikamatih, iwa niyetoskia satlawel niixtlamati, iwa tla nitlaneltokaskia asta nikinmijkuanis tepemeh, pero amo nitetlasojtla, amitla nopati. ³ Tla nikxejxelo nochi tlan nikpia, iwa tla nimotemaktia manechchichinokah, pero amo nitetlasojtla, amitla nopati.

⁴ Akin tetlasojtla, kimati texikoa; semi yolyámanki iwa amo xikojmiki; amo xankuatl nion moweyilia. ⁵ Amo tlawijwikaltia nion kitemoa san tlan ye kipaktia; amo kimati kualani nion tekokolia. ⁶ Amo paki ijkuak kinmita oksikimeh tlaijyowiah por intlajtlakol, yej paki ijkuak pankisa tlan milák. ⁷ Akin tetlasojtla nochi kiyowia, nochi kineltoka, kimati moyekchia iwa nochi kixikoa.

⁸ N tlasojtlálistli ayik tlamis. Pero ajsiki tonati akimeh omotlapowia iwan Dios ayakmó motlapowiskeh iwa, nion ayakmakah tlajtos ika oksikimeh tlájtolteh, nion ayakmó motekitiltis n ixtlamatílistli. ⁹ Porke san siki tikmatokeh, iwa ijkuak tlajtoa Dios, san siki tikteajsikamatiltiah. ¹⁰ Pero ijkuak nochi tikajsikamatiskih, ijkuakó tlamis nochi non amo moteajsikamati.

¹¹ Ijkuak onikatka ni chokotsi, onitlajtoaya, onikyejyekoliaya iwa onitlaajsikamatia kemi nichokotsi. Pero ijkuak onimochi nitlakatl, onika tlan onikchiwaya ijkuak onikatka nichokotsi. ¹² Ijkó noywa, axa titlachiah kemi itla non amo moyekita itech se teskatl. Pero itech n iksemi tonati, timoixtlajtlataskeh. Axa san achitsi nikixmati, pero ijkuakó nikyekixmatis, ijkó kemi Dios nechyekixmati. ¹³ Ijkó kiné, nochipa tikpiaskeh tlaneltokálistli, noywa tikpiaskeh tlan itech timoyolchikajtoskeh iwa nochipa timotlasojtlaskeh. Pero tlan okachi ipati itech ninteh eyi, ye n tlasojtlálistli.

14

Pablo kinnonotsa akimeh tlajtoah ika oksikimeh tlájtolteh

¹ Ijkó kiné, nomejwah okachi ximotlasojtlakah, iwa xiktajltlanilikah n Espiritu manomechpalewi para kuali nonkiteajsikamatiltiskeh itlajtol Dios. ² Porke akin tlajtoa ika ok se tlájtoli, motlapowia iwan Dios iwa amo iwan tokniwah, porke amaka kajsikamati tlan kijtoa. Non tokni tlajtoa ika n Espiritu, pero amaka kajsikamati. ³ Pero akin kitematiltia tlan Dios kineki makimatikah, okachi kinmiskaltilia intlaneltokalis, kinyolchikawa iwa kinyolsewiah. ⁴ Akin tlajtoa ika ok se tlájtoli, san ye mochikawa itlaneltokalis. Pero akin kiteajsikamatiltia tlan Dios okili makinnextili n tlaneltokakeh, okachi kinmiskaltiliah intlaneltokalis iwa kinchikawa.

⁵ Ne niknekiskia nochteh nomejwah xitlajtokah ika oksikimeh tlájtolteh. Pero okachi niknekiskia xikteajsikamatiltikah tlan Dios kineki xikmatikah. Porke okachi ipati matikteajsikamatiltikah tlan Dios kineki matikmatikah iwa amo san matitlajtokah ika oksikimeh

tlájtolteh. Pero tla nonweletih nonkinmajsikamatiltiah nonteh tlájtolteh, kuali ka, para mamoskalti intlaneltokalis n tokniwah tlaneltokakeh. ⁶ Yika nokniwah, mach itla ipati tla nias iwa pewas nomechtlapowis ika oksikimeh tlájtolteh, ejé nomechpalewiskia tla nomechnextiliskia itla yankuik noso itla tlan Dios kineki xikmatikah.

⁷ Xikkakikah: tla se arpa iwa se akatlapítsali kipiaskiah san se tlatotsónálistli, amo tikmatiskiah katlie kitsotsontokeh. ⁸ Ijkuak motekilmakatiweh, tla n tlapítsali amo moyekkaki, n soldados amo motlatlaliah. ⁹ Noijkó nomejwah: tla itech nomotlajtol amo nonkijtoah tlájtoli tlan weletis moajsikamatis, ¿kenijki aka weletis kajsikamatis tlan nonkijtoah? Tla ijkó nontlajtoah, tlan nonkijtoah san kiwika n ejekatli iwa amo tepalewia. ¹⁰ Itech nin taltikpaktli nochteh n taltikpaktlakah kipiah intlajtol, iwa nochi tlájtoli moajsikamatih kan ijkó tlajtoah. ¹¹ Pero tla ne amo nikajsikamatis itlajtol ijkuak aka nechtlapowia, ne nikitás kemi se non amo chanti itech noaltepeu, iwa ye noijkó nechitas. ¹² Yika, tla nomejwah satlawel nonmochijchikawah nonkichiwaskeh nochi tekitl, okachi kuali xikpankixtikah n tekitl non ika weletis nonkimpalewiskeh nomokniwah tlaneltokakeh.

¹³ Yika, ijkuak aka tlajtoa ika ok se tlájtoli, makitlajtlanili Dios maweleti makinmajsikamatilti tlan kijtosneki non tlájtoli. ¹⁴ Porke tla nimotiotsajtsilia ika se tlájtoli non amaka kixmati, nimotiotsajtsilia itech noespíritu, pero itech notlanlamikilis amitla mokawa. ¹⁵ ¿Tlanón nikchiwas kiné? Nimotiotsajtsilis ika noespíritu pero noiwa ika notlanlamikilis. Nitlakuikas ika noespíritu, pero noiwa ika notlanlamikilis. ¹⁶ Porke tla tikweyilia Dios san ika moespíritu, mokni akin mitskaktok amo weletis moseitilis itech motiotsajtsilis, porke amo kajsikamati tlanón tikijtoa. ¹⁷ Yika, maya kualtsi timotiotsajtsilia ijkuak timotlasojkamati inawak Dios, mokni akin mitskaktok mach itla kipalewia para okachi matlaneltoka. ¹⁸ Nimotlasojkamati inawak Dios porke niweleti nitlajtoa ika oksikimeh tlájtolteh, okachi ke nomejwah. ¹⁹ Pero ijkuak nimoseitilia iwa n tokniwah non kineltokah Cristo Jesús, okachi nikwelita nikijtos san kanaj mákuili tlájtoli non kuali makajsikamatikah, iwa amo májtaktli mil tlájtolteh non amo weletis kajsikamatiskah.

²⁰ Nokniwah, amo xitlayejyekolikah kemi pípilteh. Xiyetokah kemi pípilteh ijkuak kichiwah tlan amokuali, pero xitlanamiktokah kemi tlakah yekmilajkameh. ²¹ Itech tiotlajkuíloli kijtoa: “Nikintitlanis tlakah non tlajtoah ika oksikimeh tlájtolteh para makinnonotsakah ninteh tlakah. Maya ijkó nikchiwas, ninteh tlakah amo nechkakiskah kijtoa n Toteko.”

Is. 28:11 ²² Ijkó kiné, ijkuak Dios kichiwa aka matlajto ika ok se tlájtoli, kintlajtlachialtia non ayamó kineltokah Cristo iwa amo non yokineltokakeh. Pero akin weleti kinmajsikamatiltia itlajtol Dios, kimpalewia n tokniwah non kineltokah Cristo iwa amó non ayamó kineltokah. ²³ Yika, ijkuak nonmoololoah nomejwah non yononkineltokakeh Cristo iwa non nochteh pewa non motiotsajtsilia ika oksikimeh tlájtolteh, iwa onkalakih sikimeh non ayamó kineltokah Dios, ¿amo kimoliskeh yononkuatlapoljkeh? ²⁴ Pero tla non nochteh nonkiteajsikamatiltijtokeh tlan Dios kineki xikmatikah, iwa kalaki se non ayamó kineltoka Dios, ye motlajtlakoltis iwa moyolpatlas ijkuak kikakis nochi tlan nomejwah nonkijtoah. ²⁵ Ijkó nochi tlan kitlaatijtok itech iyolo nonextis, ijkuakó ye motlankuaketsas iwa kiweyilis Dios, iwa kijtos Dios milák kajki nomowah.

Nochi mamochiwa kemi moneki

²⁶ Ijkó kiné nokniwah, ye ni tlan moneki nonkichiwaskeh ijkuak nonmoololoskeh: sikimeh makintlakuikakah salmos, oksikimeh matlamachtikah, oksikimeh makitematiltikah tlan achto Dios okitlaatijtoka iwa axa okinnextili, oksikimeh matlajtokah ika oksikimeh tlájtolteh, iwa oksikimeh makinteajsikamatiltikah nonteh oksikimeh tlájtolteh. Nochi ni mamochiwa para makimpalewi n tokniwah makineltokakah Cristo Jesús. ²⁷ Iwa tla onkateh non tlajtoah ika oksikimeh tlájtolteh, matlajtokah san kanaj ome noso eyi, iwa se por se. Pero aka makiteajsikamatilti tlan kijtojtokeh. ²⁸ Pero tla amaka weleti kinteajsikamatiltia nonteh tlájtolteh, okachi kuali amaka matlajto ika nonteh oksikimeh tlájtolteh, yej san mamotlapowikah iwan Dios itech inyolo. ²⁹ Ijkó noiwa, tla

onkateh akimeh weletih kiteajsikamatiltiah tlan Dios kinmatiltia, san kanaj ome noso eyi matlajtakah, iwa n oksikimeh kuali makitakah kox milák tlan okijtojkeh. ³⁰ Pero tla Dios kimaka ok se tlájtoli se tokni non ompa ewatok, non tlajtojtok ayakmó matlajto. ³¹ Ijkó, nochteh nomejwah akimeh nonkiseliah itlajtol Dios, moneki se por se matlajtakah. Iwa ijkó nochteh makajsikah iwa mamoyolchikajtiwiah. ³² Ijkuak se espíritu kinextilia itla tlájtoli aka tiotlajto, ye kinawatia non espíritu iwa n tiotlajto weletis tlajtos noso amó. ³³ Porke Dios mach kiwilita san nochteh matlajtakah porke mach tikmatischeh tlan kijtoah, Ye kiwilita nochi kuali matikyekchiwakah.

Ijkó kemi kichiwah kan mooloah n oksikimeh tokniwah non kineltokah Cristo Jesús, ³⁴ n siwameh amo matlajtakah kan nonmooloah, yejwah san matlakaktokah, iwa matlakitakah, kemi kijtoa itlanawatilis Dios. ³⁵ Tla n siwameh kinekih itla kimatischeh, makintlajlanikah inmokich itech kali, porke amokuali se siwatl amo matelakita kan nonmooloah.

³⁶ Xikilnamikah, itlajtol Dios amo achto owala nomonawak, nion mach san nomejwah akimeh ononkiselijkeh. ³⁷ Tla aka kimolia milák kineltoka Dios, noso kimolia Iespíritu Dios kiyakana, makitlakita tlan nomechtlajkuililijtok. ³⁸ Pero tla amo kitlakita tlan ne nomechtlajkuililia, noiwa amo xitlakitakah itemachtilis.

³⁹ Nokniwah, xiktlawelnekikah nonkiteixmatiltiskeh itlajtol Dios, iwa amo xikintlakawaltikah akimeh tlajtoah ika oksikimeh tlájtoltel. ⁴⁰ Pero nochi xikyekchiwakah ika kuali iwa kemi moneki.

15

Cristo Jesús omoyoliti

¹ Nokniwah, nikneki xikilnamikikah n kualitlájtol non ne onomechmatilti. Ye ni n kualitlájtol non nomejwah ononkiselijkeh, iwa axa itech nontlakxilitokel. ² Noiwa ika nin kualitlájtol nomejwah nonmomakixtiskeh, tla nonkineltokaskeh tlan onomechmatilti, iwa tla amo sanenka onontlaneltokakeh.

³ Ne onomechmachtli tlan achto ne onechmachtijkeh. Ijkuak tejwah otitlajtlakolchihwayah, Cristo omikki topatka kemi yokijtojka itlajkuilol Dios. ⁴ Okitookakeh, iwa ipan eyi tonati omoyoliti, ijkó kemi noiwa yokijtojka n tiotlajkuiloli, ⁵ iwa ijkuak omoyoliti, achto okimonextili n Pedro*, iwa satepa okinmonextili n májtaktli iwa n ome tlatematiltijkeh. ⁶ Okachi satepa okinmonextili mákuili sienta tokniwah. Miakeh ok onkateh, iwa sikimeh yomikkeh. ⁷ Satepa okimonextili n Jacobo, iwa satepa nochteh n tlatematiltijkeh.

⁸ Sa iksemi, ne noiwa onechmonextili, kemi se konetl non yopanok tonati para tlakatis. ⁹ Porke ne innawak n oksikimeh tlatematiltijkeh okachi amitla nopati, iwa nion amo nechnamiki manechnotsakah nitlatematilti, porke yowejka onikintlaijyowiltijtínenki akimeh okineltokayah Cristo. ¹⁰ Pero ken Dios onechtlasojtak axa ni itlatematilti. Iwa iteknomatilis nonawak amo sanenka, porke innawak n oksikimeh tlatematiltijkeh, ne okachi yonitekitik. Pero amo ne onikchi, yej Dios ika iteknomatilis non kajki nowa. ¹¹ Iwa maya yejwah otetlapowijkeh, noso ne onitetlapowi, san ye n temachtlistli non ika ononkineltokakeh Cristo.

N tonati ijkuak Dios kinyolitis non yomikkeh

¹² Pero tla tejwah tomechmachtiah Cristo omoyoliti de kan mikemeh, ¿tleka sikimeh nonkijtoah ke non yomikkeh mach ok moyolitiskeh? ¹³ Porke tla non yomikkeh ayakmó moyolitiskeh, kijtosneki Cristo mach omoyoliti. ¹⁴ Tla Cristo amo omoyoliti, tlan tejwah titetlapowiah amitla ipati, iwa nomotlaneltokalis amitla ipati. ¹⁵ Tla Cristo amo omoyoliti, tejwah timochiwah titekajkayajkeh, porke tejwah yotitetlapowijkeh Dios okiyoliti n Cristo, iwa tla non yomikkeh ayakmó moyolitiah kijtosneki amo milák Dios okiyoliti n Cristo. ¹⁶ Porke tla non yomikkeh ayakmó weletih moyolitiah, nion Cristo omoyoliti. ¹⁷ Iwa tla Cristo amo omoyoliti, sanenka nomotlaneltokalis iwa ok onkateh itech nomotlajtlakol. ¹⁸ Noiwa tla ijkó yetoskia, non yomikkeh iwa okineltokakeh Cristo, opolikeh.

* 15:5 n griego kijtoa Cefas, kijtosneki Pedro

¹⁹ Tla tikneltokah ke Cristo techpalewia sanwel ijkuak tiyolitokeh itech nin tlaltípkaktli, timiálmasteh iwa okachi amitla topatih innawak nochteh n tlaltípkaktlakah.

²⁰ De milajka, ¡Cristo omikki iwa omoyoliti! Ye omochi Akin achto omoyoliti para ayakmó mikkis. Axa kuali tikmatokeh, akimeh yomikkeh, moyolitiseh. ²¹ Porke ijko yej n mikfílistli owala por se tlakatl (Adán), ijko noiwa por se tlakatl (Jesús) moyolitiseh non yomikkeh. ²² Ijko kemi nochteh n tlaltípkaktlakah mikkih porke walewatokeh de Adán, ijko noiwa nochteh akimeh tiklakitah Cristo, nochipa yolitoskeh por Ye. ²³ Pero nochteh motojtokatiaskeh kemi Dios kineki: Achto Cristo omoyoliti, satepa, ijkuak Ye walmuikas, nochteh iaxkawah, moyolitiseh. ²⁴ Ijkuakó waltlajtlamis nin tlaltípkaktli. Non tonati Cristo kimpopolos nochteh n wejweyi tlayakankeh, n tekiwajkeh iwan chikawálisteh non kateh ilwikak. Ijkuakó kinmaktilis Itajtsi Dios nochteh akimeh okineltokakeh. ²⁵ Porke Cristo pewas tlanawatis asta ijkuak Dios kintlalilis itlampa ikxiwah nochteh akimeh okikoliayah. ²⁶ Iwa ikokolikni non sa iksemi kipojpolos ye n mikfílistli. Porke Dios okitlali nochi itlampa ikxiwah n Cristo. ²⁷ N tiotlajkuúfíloli kijtoa: Dios nochi okimaktli para makinawatijto, amo kijtosneki noiwa kinawatijtos Dios, porke Ye Akin nochi okimaktli n Cristo. *Sal. 8:6* ²⁸ Ijkuak Cristo ya nochi kinawatijtos, Ye inewia motemaktis inawak Dios Akin nochi okimaktli. Ijkuakó Dios, kinawatijtos nochi tlan onka.

²⁹ Tla non yomikkeh ayakmó moyolitiseh, ¿tleka sikimeh mokuatekiah impatka non yomikkeh? Tla amo nonkineltokah ke non yomikkeh moyolitiseh ¿tleka ijko nonkichiawah?

³⁰ ¿Tleka tejwah tikateh imak n owijkayotl? ³¹ Maya ijko, niyolpalmiki porke yononkineltokakeh Cristo Jesús Toteko. ³² Ijkuak onikatka Éfeso, miakeh tlakah onechixnamikem kemi yaskiah yolcameh tekuanimeh. Pero ¿tlan onikmotlanilisi? Tla milák non yomikkeh ayakmó moyolitiseh, okachi kuali matikchiwahak kemi sikimeh kijtoa:

Matitlakuakah iwa matikonikah, porke mostla timikiseh.

Is. 22:13

³³ Amo xikmokawilikah manomechkajkawawah. Kemi kijtoa se tlájtoli:

Tla nonnemiseh iwa akimeh kichiawah tlan amokuali, kipatlaskeh nomotlayejyekolis iwa nomechijtlakoskeh.

Pr. 22:25

³⁴ Nomejwah ximoyolpatlakah iwa ximilajkanemikah, iwa ayakmó xitlajtlakolchiwahak, porke non sikimeh amo kixmati Dios. Ijki nomechilia para xipinawahak.

Kenomi moyolitiseh non yomikkeh

³⁵ Chamo aka tlajtlanis: “¿Kenomi, moyolitiseh non yomikkeh? ¿Tlan kuerpo kipiaseh?” ³⁶ San kuatlapolojtok akin ijko tlajtlani. Porke ijkuak itla xínachtli kitookah, achto palani ijtik tlali iwa satepa ixwa. ³⁷ Amo motooka ixuijyo n tlátoktli, yej nonkitookah itla xínachtli de trigo noso ok se xínachtli. ³⁸ Iwa ijkuak ixwa n tlátoktli, Dios kimaka ixuijyotsi kemi Ye kimonekiltia, iwa sejsen xínachtli tlatlámantli moxiujyotia. ³⁹ Amo nochi nakatl san se intlachialis kipiah: n tlakah, n yolcameh, n totomeh, iwa n michimeh, nochteh tlatlámantli innakayo kipiah. ⁴⁰ Kan ilwikak iwa kan tlaltípkaktli onkateh kuerpos, pero non kateh kan ilwikak kipiah mawistílistli iwa non kateh kan tlaltípkaktli ok se inkualtsinyo. ⁴¹ Itlawilnextilis n tonati, mach kemi itlawilnextilis n metsi, noijkó intlawilnextilis n sítlalteh mach kemi itlawilnextilis n tonati iwa n metsi, iwa nochteh n sítlalteh tlatlámantli intlawilnextilis kipiah. ⁴² Ijko tlamochiwas ijkuak moyolitiseh non yomikkeh. Kintookah iwa palani, pero majkokuis se kuerpo non ayakmó ijtlakawis. ⁴³ Ijkuak kitookah se miketl satlawel kinyolkokoah, pero ijkuak moyolitisi non miketl, kipias mawistílistli. Tlan kitookah wijwixtik, moyolitia ika chikawálistli. ⁴⁴ Kitookah se tlakatl de nin tlaltípkaktli, pero moyolitia se tlakatl de ilwikak.

Tla onkateh tlaltípkaktlakah, noiwa onkateh tlakah de ilwikak. ⁴⁵ N tiotlajkuúfíloli kijtoa: Non achto tlakatl itoka Adán, omochi se tlakatl non oyolitoka.

Pero non sa iksemi Adán, Ye n Cristo non kichiwa se mayolito. ⁴⁶ Yika, amo achto tikseliah tokuerpo de ilwikak, yej achto tikseliah tokuerpo de nin tlaltípkaktli, iwa satepa tokuerpo de ilwikak. ⁴⁷ Non sikinika tlakatl, *Adán*, Dios okichijchi ika tlali, itech nin tlaltípkaktli. Pero n ojpatiah tlakatl Ye Toteko walewatok de

ilwikak. ⁴⁸N tlaltikpaktlakah kateh kemi Adán akin chijchitok ika tlali. Pero n tlakah non nemih kemi Dios kimonekiltia, yetoskeh kemi Cristo non walewatok de ilwikak. ⁴⁹Se mota kemi tlakatl de nin tlali, noijkó se motas kemi non owala de ilwikak.

⁵⁰Nokniwah, nikneki nomechilis, tonakayo iwan toesso mach weletis kintlaxkatiliskeh kan ilwikak, kan ayik tlapalani. ⁵¹Xikakikah, nikneki nomechmatiltis tlan achto amaka okimatia: Amo tinochteh timikiskeh. Pero Dios tinochteh techpatilis tokuerpo. ⁵²Totokatijkak, kemi ijkuak se ixkuejkueyoni, ijkuak mokakis n saiksemi tlapítsali non yomikkeh moyolitiskeh iwa ayik palaniskeh. Iwa tejwah techmakas se yankuik kuerpo. ⁵³Porke tokuerpo non amo wejwawa, motlakentis ika ok se kuerpo non nochipa wejwawas. Iwa tokuerpo non mikki, motlakentis ika ok se non ayik mikkis. ⁵⁴Iwa ijkuak tokuerpo non palani yomopatlak ika se kuerpo non nochipa wejwawas, iwa ijkuak tokuerpo non mikki yomopatlak ika se kuerpo non ayik mikkis, ijkuakó mochiwas nochi tlan kijtoa n tiotlajkuúfóli:

N weletfístli okwaltolo n mikílistli.

Is. 25:8

⁵⁵¡Mialma mikílistli! ¿Kan omoka momintsi non ika otechkojkoaya?

¿Mikílistli kanin ka moweletilis?

Os. 13:14

⁵⁶Imintsi n tlajtlákoli kimaka chikawálistli n mikílistli, iwa n tlajtlákoli kimaka chikawálistli n tlanawatfístli. ⁵⁷Pero matiktlasojkamatikah Dios, porke Ye techmaka iweletilis para tiktlaniliskeh n mikílistli por Toteko Cristo Jesús.

⁵⁸Yika, notlasojikniwah xiyektalxilitokah iwa nochipa xiyeknemikah iwan Toteko, xikmopantikah iteki n Toteko. Ya nonkimatokeh, n tekittl non tiksepanchiwah, amo sanenka.

16

Kooloola tomi para kimpalewiskeh n tokniwah de Jerusalén

¹Ijkuak nonkoololoskeh n tomi non ika nonkimpalewiskeh n tokniwah de Jerusalén, xikchiwahak kemi yonikinnajawati n tokniwah de Galacia. ²Itech ipewayá n semana, nonnochteh xixkelokah siki nomotomi ijkó kemi ononkimotlanilijkeh* itech nomoteki. Sa xikoololotjiwah para amo sikin pewas nonkoololoskeh ijkuak niajsiti nomonawak. ³Iwa ijkuak nomechajisiti, nikintitlanis Jerusalén n tokniwah non nomejwah nonkimpejpe-naskeh. Nikinmakas amatlajkuúfólteh, para makinwikilikah iwan tomi non okitemakakeh para n tokniwah de Jerusalén. ⁴Iwa tla niktas moneki manio, inwah nias.

Pablo kiteilia tlan kiniki kichiwas

⁵Ijkuak nias nomechitati, nipanotikisas kan tlali de Macedonia, iwa satepa niajsiti Corinto kan nonchantitokeh. ⁶Chamo weletis nimokawas ompa nomowah kanaj kech tonati, noso nimokawas ompa asta mapano n sewaya, iwa satepa nomejwah weletis nonnechpalewiskeh ika tlan monekis para maniajsiti kan nio. ⁷Pero amo nikneki san nomechitikisas, yej nikneki nimokawas nomowah kanaj kech tonati, tla Dios kimonekiltia. ⁸Pero nimokawas nika Éfeso asta mapano n ilwitl de Pentecostés, ⁹porke nikita sa tlawel weletis niktetikitis Dios iwa miakeh kineltokaskeh, maya onkateh miakeh akimeh amo kimpaktia tlan nikchiwa.

¹⁰Iwa tla ik ompa kalakiti n Timoteo, xikyekselikah iwa mayeto ika pakfístli, porke ye noiwa kitekitilia n Toteko ijkó kemi ne. ¹¹Yika, amo xiktlawelitakah, yej xikpalewikah ika tlan kimonekiltis para manechajisiki ika kualí, porke nikchixtok manechajisiki sansikah iwa oksikimeh tokniwah non iwa witseh.

¹²Tokni Apolos yoniktlatlaujti mawia iwan oksikimeh tokniwah manomechontlaj-palotih, pero axa ye mach okinek. Pero ijkuak majxilil, yas nomechitati.

Pablo momakawa

¹³Kualí xitlachixtokah, kualí xitlaneltokakah, ximochijchikawakah iwa ximoyolchikaj-tokah. ¹⁴Nochi tlan nonkichiwaskeh, xikchiwahak ika tlasojtlálistli.

* 16:2 Nochi domingo nomechtlaxtlawiah nomotomi de samano iwa nonkipiah para nonkimpalewiskeh nomokniwah.

¹⁵ Nokniwah, nomejwah ya nonkimatokeh Estéfanas iwan ichanikniwah, yejwah achto okineltokakeh Cristo Jesús ijkuak okixmatkeh itlajtol ompa kan tlali de Acaya. Yejwah yokiyoltlalijkeh kintekichiwiliskeh n tokniwah non kineltokah Cristo Jesús. ¹⁶ Yika, nikneki nomejwah xikintlakitakah n tokniwah nontekitih kemi yejwah, noiwa akimeh tepalewiah iwa tekitih. ¹⁷ Nipaki porke owalajkeh n Estéfanas, Fortunato iwa Acaico. Porke yejwah onechpalewijkeh nomopatka. ¹⁸ Yejwah nechylchikajtokeh kemi nomejwah onomechylchikajkeh. N tlakah kemi yejwah kual matikintlakitakah.

¹⁹ N tokniwah non moololoah Asia nomechontlajpaloah. Aquila iwa Priscila, iwa n tokniwah non moololoah incha, noiwa nomechontlajpaloah itech Itoka n Toteko Jesús.

²⁰ Nochteh n tokniwah non nika kateh nomechontlajpaloah. Ximotlatlajpalokah non nochteh iwa ika chipawak nomoyolo ximoixtenamikikah.

²¹ Ne Pablo nomechtlajpaloa. Nomechtlajkuililia ika noma.

²² Tla aka amo kitlasojtla n Toteko, makitlajtlakoltikah. ¡Xiwiki Toteko Jesús!

²³ Iteiknomatilis n Toteko Cristo Jesús mayeto nomowah.

²⁴ Nonnochteh nomechtlasojtla ika itlasojtlalis Cristo Jesús.

San Pablo ojpa kintlajkuililia non de Corinto

Pablo kintlajkuililia n tlaneltokakeh de Corinto

¹ Ne Pablo, Dios okimonekilti maniyeto itlatematilti n Cristo Jesús. Ne iwan Timoteo tikijkuiloah nin amatlajkuiloli para n tokniwah non moololoah Corinto iwa nochteh akimeh nonchantitokeh itech nochteh n tlalmeh de Acaya.* ² Totajtsi Dios iwan Toteko Cristo Jesús manomechtiochiwahak iwa makichiwakah xiyetokah ika yolsekilistli.

Kenjiki otlajjowyijtínenki Pablo

³ Matikweyijkachiwakah Dios, Itajtsi n Toteko Cristo Jesús. Ye n Teta non nochipa techknomati iwa nochipa techyolchikawa. ⁴ Ye nochipa techyolchikawa ijkuak titlajjowyowiah, para ijko tejwah noiwa matikinyolchikawakah akimeh tlajjowyowiah, ijko kemi Dios techyolchikawa. ⁵ Porke ijko kemi titlajjowyowiah kemi Cristo otlajjowyowiko, noiwa por Cristo tikseliah miak yolsekilistli.

⁶ Yika, tla tejwah titlajjowyowiah, titlajjowyowiah para nomejwah okachi ximoyolchikawakah iwa ximomakixtikah. Iwa tla Dios techyolchikawa, techyolchikawa para nomejwah noiwa ximoyolchikawakah, iwa ijko noiwa nonkinxikoskeh n tlajjowyolisteh non tejwah ipa tipanotiwitseh. ⁷ Tejwah timoyolchikawah nomonawak, porke tikmatih ijko kemi nontlajjowyowiah kemi tejwah, noijko nonmoyolchikawaskeh.

⁸ Nokniwah, tiknekih xikmatikah kenjiki otitlajjowyijtinenkeh kan tlalmeh de Asia. Sa ken otixikojkeh non tlajjowyolistli, asta otikmoliayah timikiskiah. ⁹ Otikmachiliayah kemi non ya kinmiktitiweh. Noni otechpalewi para amo matikneltokakah nochi weletis tikchiwaskeh, yej okachi matitlaneltokakah inawak Dios Akin kinyolitia non yomikkeh. ¹⁰ Dios otechmakixti, iwa techmakixtis imak mikilistli. Tejwah timoyolchikajtinemih itech Dios, iwa Ye nochipa techmakixtijtinemi, ¹¹ tla nomejwah nontechpalewiskeh ika nomotiotsajtsilis. Tla miak non motiotsajtsiliah para Dios matechpalewi, noiwa miakheh kitlajkamatiskeh Dios ijkuak tejwah techtiochiwas.

Tleka Pablo amo oyá Corinto

¹² Satlawel tipakih, porke totlalnamikilis techmatiltia nochipa tinemih ika toyolo chipawak, iwa timilajkameh ixpa n tlaltikpaktlakah, iwa okachi nomonawak. Iwa tla tiweletih tinemih ika toyolo chipawak, amo por saikpanoa ti ixtlamatih, yej porke Dios ika itlasojtlalis techpalewia matiyeknemikah. ¹³ Itech toamatlajkuilolwah amitla ok se tomechtlajkuililiah, yej san tlan weletis nonkiamapoaskeh iwa weletis nonkajsikamatiskah. Nikneki kualí xikyekajsikamatikah. ¹⁴ Maya axa, ayamó nochi nonkajsikamatih ijkuak Toteko Jesús walmokopas, nomejwah weletis nompakiskah por tlan otomechmachtijkeh. Noiwa tejwah tipakiskah nomowah.

¹⁵ Ye ni tlan nechylchikawa, iwa yika oniknektoka achto nomejwah nomechonitaskia, iwa ijkuak niwalmokopas, nomechtlajpalos oksepa. ¹⁶ Ne onikmoli nomechontlajpalos ijkuak niaskia Macedonia, iwa ijkuak niwalmokopaskia oksepa nomechontlajpalojtikiskas-kia. Ijko nomejwah nonnechonmakawah para maniajsiti Judea. ¹⁷ Ijkuak ijki onikmoli nikchiwas, ¿san ijki onikyeyekoli? Amo nikchiwa kemi n tlaltikpaktlakah non san kijtoah ejé, ejé; iwa san nima kijtoah, amó. ¹⁸ Pero Dios kualí kimatok tejwah amo tomechiliah “ejé” iwa tlami amo tikchiwah. ¹⁹ Porke Ikone n Totajtsi Dios, Cristo Jesús akin Silvano, Timoteo iwa ne Pablo tiktematiltijtinemih nomoixpa, ayik okijto “ejé” iwa san nima “amó”, yej nochipa “ejé”. ²⁰ Porke itech Cristo Jesús tikseliah nochi tlan Dios okisentlali techmakas. Yika, por Cristo tikijtoah “ijko jemochiwa”; iwa ijko Dios kiselia weylilistli. ²¹ Dios Ye Akin techchikawa tejwah iwa nomejwah itech Cristo. Iwa ya tikateh iaxkawah. ²² Ye yotechneskayoti ika Iespíritu itech toyolo, kemi se tlayakánali tlan satempa tikselsiskeh.

* 1:1 Acaya: ninteh tlalmeh kateh tlatsintlawik de Grecia

²³ Dios kuali kimatok amo niajtika Corinto kemi onikmoliaya, porke amo oniknek nomechyolkokoti. ²⁴ Amo tiknekih tomechnajawatiskeh kenomi nonkipiaskeh tlaneltokálistli, porke nomejwah ya nonchikawakeh itech tlan nonkineltokah, yej tiknekih titekitiskeh nomowah para xikpiakah okachi pakfistli.

2

¹ Yika, ne onikmoli amo nomechontlajpaloti para ximoyolkokokah. ² Porke tla ne nikchiwa ximoyolkokokah, ¿akin nechyolpaktis amo san nomejwah non ne onikinyolkoko? ³ Yika, ijkó onomechtlajkuilili, porke amo oniknek nias san para nimoyolkokos por tlan nonkichiwah, porke nomejwah nonkateh para nonnechmakaskeh pakfistli. Ne kuali nikmatok, tla ne niyolpaktoskia nomejwah noiwa nonpaktoskia. ⁴ Porke ijkuak onomechtlajkuilili, satlawel onimotekipachoaya iwa onimoyolkokoaya iwa onichokaya. Pero amo onomechtlajkuilili para nomechyolkokos, yej para xikmatikah satlawel nomechtlasojtla.

Xiktlapojpolwikah akin otlajtlakolchi

⁵ Tla aka onechyolkoko, amo san ne onechyolkoko, matikijtokah nomejwah noiwa para amo manitlajtolpano. ⁶ Tla nomejwah yononkitlajtlakoltijkeh non tokni, san ika noni ya kuali. ⁷ Yika, axa moneki xiktlapojpolwikah iwa xikyolchikawakah, amo kichiwa saikpanoa moyolkokos iwa mosotlawas. ⁸ Yika ne nomechtlatlaujtia xikititakah milák nonkitlasojtlah. ⁹ Itech ok se noamatlajkuilol yonomechnajawati ijkó xikchiwah, para nomechyejyekos kox milák nonkitlakitah tlan nomechnawatia. ¹⁰ Tla aka nonkitlapojpolwiskeh tlan amo kuali okichi, ne noiwa niktlapojpolwis. Tla okatka itla tlan motetlapojpolwis, yoniktlapojpolwi por nomejwah inawak Cristo. ¹¹ Ne yoniktlapojpolwi para amo kichiwa techtlanis n sataná, porke kuali tikixmatih kenomi tlakajyawawa.

Pablo amo yekkejki kan altepetl de Troas

¹² Ijkuak onikalakito Troas para niktetlapowis n kualitlajtoli de Cristo, onikitak amitla nechtsakuilis para niktetlapowis. ¹³ Pero noyolojtsi, amokuali omomachiliaya, porke amo onikajsito n tokni Tito. Yika, onimomaaka iwa n tokniwah de Troas iwa onia para Macedonia.

Titlatlanih ijkuak tikneltokah Cristo

¹⁴ Pero tiktlasojkamatih Dios, porke Ye Akin kichiwa matitlatlanikah por tikateh itech Cristo. Ika n tekittl non otechmaktili, totech kinextia itlasojtlalis, kemi se ajwiálistli non sentetl xitini. ¹⁵ Porke tejwah kemi itla ajwiálistli non Cristo kimaktilia Dios, iwa non ajwiálistli xitini ixpa akimeh momakixtiah iwa ixpa akimeh moixpoloah. ¹⁶ Para akimeh moixpoloah, nin ajwiálistli kijnekuih kemi itla tsojyak non temiktia. Pero akimeh momakixtiah, kijnekuih kemi itla ajwiálistli non kinmaka yollistli. Pero ¿akin weleti kiyekchiwa nin tekittl non Dios otechmaktili? ¹⁷ Tejawah amo tiktemachtijtinemih itlajtol Totajtsi Dios san para tiktlaniskeh tomi, kemi ik nonka sikimeh kichijtinemih, Dios kuali techita titetlapowiah tlan milák, porke Cristo otechtitlanki matiktekitilikah iwa matiseititokah íwa.

3

Pablo kitemachtia se yankuik tlajtoli non Dios okisentlali

¹ Ijkuak ijki tikijtoah, ¿nomejwah nonkimoliah chamo san tejwah tonewiah timoweyiliah nomonawak? Noso, ¿moneki matomechixpantilikah se amatlajkuíloli kan matlajto kuali de tejwah, noso matomechtlajtlanilikah se amatlajkuíloli kemi oksikimeh kichiwah? ² Amó, mach ok moneki, porke nomejwah nonkixnextiah toteki, iwa nomejwah kemi se amatlajkuíloli non ijkuilitok itech toyolo, akimeh nochteh n tlakah weletis kixmatiskeh iwa kipotoskeh. ³ Nomejwah kemi se amatlajkuíloli non Cristo okijkuilo non tejwah otkittitlankeh. Nomejwah se amatlajkuíloli non amo ijkuilitok ika tlápali, yej ika Iespíritu

Dios Akin nochipa yolitok. Nin amatlajkuúloli amo ijkuilitok itech se tetl patlawak, yej itech inyolo n tlaltikpaktlakah.

⁴ Tejwah timoyolchikawa inawak Dios, ika Cristo Jesús. ⁵ Amo tikijtoah nochi weleti tikchiwah toselti, yej nochi tlan tiweletih tikchiwah, Dios techpalewia matikchiwahak.

⁶ Dios otechmák weletílistli para matitekitikah itech nin yankuik tlájtoli, non amo motlaxilia itech itla tlanawátili. Yej itech se tlájtoli non ika timoyekkawah kisa de itech Espírиту. Porke n tlanawatílistli kualika mikílistli, pero n Espírиту kitemaka yolílistli.

⁷ Tlanawatil Moisés omijkuilo itech patlawak tetl, iwa owala ika se weyi tlawilnextílistli. Ijkuak Moisés okiseli non patlawak tetl, ixko otsotlania iwa n tlakah de Israel amo oweletiah okiixtlajtlataya, pero maya n tlanawátili ijko owala, itsotlanilis oseujtiaya. Tla non tlanawátili otehlajjowiltiaya ika mikílistli iwa oneski ika tlawilnextílistli, ⁸ jaxa okachi kípias tlawilnextílistli n yankuik tlájtoli non kitematiltiskeh ika n Espírиту! ⁹ Tla n tlanawátili non otehlajtlakoltiaya ika mikílistli, okitetlapowijkeh ika miak tlawilnextílistli, jaxa okachi miak weyílistli kípia itlajtol Dios non techtoktia matiyetokah tiyolchipawakeh inawak! ¹⁰ Porke n tlanawátili non yowejka okipiaya tlawilnextílistli, axa ayakmó kípia tlawilnextílistli, porke nin yankuik tlájtoli kípia okachi weyi itlawilnextilis. ¹¹ Porke tlan amo owejka okipixki tlawilnextílistli, okachi miak kípias tlawilnextílistli tlan ayik pojpoliwis.

¹² Yika ken timoyolchikajtokeh itech tlan milák, titlajtoah ika weletílistli. ¹³ Tejwah amo tikchiwah kemi Moisés, non omoixtsakuaya ika se tsótsoli para n tlakah de Israel amo makitakah ya pojpoliti non tsotlanílistli non ayakmó tsotlantoskia. ¹⁴ Pero yejwah mach okajsikamatia porke omotsak inmíxtlamatilis, asta axa, ijkuak kiamapoa non achto tiotlajkuúloli, amo weletih kajsikamatih porke ixtsaktokeh ika se tsótsoli. Pero ika Cristo weletis moixtlajtlaposkeh. ¹⁵ Iwa asta axa ijkuak kiamapoa itlanawatil Moisés, mach itla kajsikamatih, porke kipixtokeh kemi se tsótsoli non kinmixtsakuilijtok intlalnamikilis. ¹⁶ Pero ijkuak aka kineltoka n Totajtsi Dios, moachiwa tlan okixtsaktoka itlalnamikilis. ¹⁷ Porke n Toteko Ye n Espírиту, iwa kan kajki Iespírиту Toteko ayakmó tiilpitos itech tlajtlákolli. ¹⁸ Iwa kemi tejwah ayakmó tiixtlakentitokah, tejwah tikateh kemi se teskatl non tiknextiah iweyilis n Toteko Dios. Ijko tejwah tonewia timochiwaskeh okachi kemi Toteko. Porke nochi tonati tikpiah itlawilnextilis Toteko, Ye Akin techmaka n Espírиту.

4

Itlatematiltiwah Cristo

¹ Yika amo matimosotlawakah, porke Dios, techiknomati iwa Ye yotechmaktili nin tekítl. ² Yotikkajkeh nochi tlan moichtakachiwa iwa tepinati. Amo titlakajkayajtinemih nion tikpapatlah itlamachtilis Dios. Yej tejwah tiktemachtiah tlan milák, iwa timotemaktiah innawak oksikimeh, para yejwah makijtokah kox kualí tlan tikchiwah ixpa n Dios. ³ Pero tla n kualítlájtoli non tejwah tiktematiltiah amo kajsikamati, sanwel amo kajsikamatih akimeh moixpoloah. ⁴ Porke kemi yejwah amo tlaneltokah, n *dios* non kinawatijtok nin tlaltikpaktli kinmixtlapoyawaltia para amo makajsikamatikah, iwa para amo makitakah itlawilnextilis n kualítlájtoli de Cristo non weyíkatitok, Ye Akin kixnextia n Dios non yolitok. ⁵ Ijkuak titetlapowiah, amo tikintlapowiah tlan tejwah tikchiwah, yej titetlapowiah Jesús Ye n Toteko, iwa tejwah timochiwah kemi nomotekitwah, por tiktlasojtla Jesús. ⁶ Porke inewia Dios okijto: “Kan achto otleyuatoka, n tláwili tsotlanis.” Ye Akin okitlawili toyolo, para ika non tlawilnextílistli matiweletikah matikixmatikah iweyilis Dios, non tsotlani itech ixkotsi Toteko Cristo. Gn. 1:3

Nochipa matitlaneltokakah inawak Dios

⁷ Pero tikpixtokeh nin totlaneltokalis non tlawel miak ipati ijtik nin xoktsi*, para mamota n weletílistli amo toaxka, yej wits de Dios. ⁸ Yika, maya nochipa timotekipa-chojtokeh, nochipa timakisah; iwa maya tikpiah tlan techtekipachoa, ayik timosotlawah.

* 4:7 xoktsi kijosneki tokuerpo

⁹ Maya techtotojtokah, amo techilkawa, maya techtlamotla, amo techpojpoloskeh. ¹⁰ San kan ik tiawih, tikwikah itech tokuerpo imikilis n Jesús, para matiktenextikah kenijki yolitok n Jesús totech. ¹¹ Porke tiyolitokeh, weletis techmiktiskeh porke tiktekitiliah n Jesús, para ijko weletis tikixnextiskeh Jesús yolitok itech tokuerpo non mikki. ¹² Yika tejwah ditemaktitokeh imak mikilistli para nomejwah xiyolitokah.

¹³ N tiotlajkuiloli kijtoa: "Onitlaneltokak, yika onitlajto." Yika, tejwah noiwa, ika non totlaneltokalis, titetlapowiah. ¹⁴ Porke tikmatih Dios, Akin okiyoliti n Toteko Jesús, noiwa tejwah techyolitis iwan Jesús, iwa sansikah nomowah techwikas kan ye muistika. ¹⁵ Nochi tlan titlajjowiah, kuali manomechpalewi. Porke tla miakeh kiseliskeh itlatiochiwalis Dios, noiwa miakeh titlasojkamatiskeh, iwa ijko okachi tikweyiliskeh Dios.

¹⁶ Yika, ayik timosotlawah, porke maya tokuerpo wewejtiti iwa tlanti, toespíritu moy-ankuiljiti iwa mochikajti. ¹⁷ Porke tlan tikijjowiah itech nin tlaltikpaktli, amo wel chikawak iwa san panao. Pero techalikilia se weylistli non ayik tlami, iwa non weyijkachiwálistli saikpanoa mawistik. ¹⁸ Porke amo tiktlaliah totlachialis itech tlan mota, yej itech tlan amo mota. Porke nochi tlan mota amo wejkawa, pero tlan amo mota, nochipa wejkawas.

5

Tocha kan ilwikak

¹ Tikmatih tokuerpo pojpoliwis kemi se kali non amo wejkawa itech nin tlaltikpaktli. Dios techmakas ok se kuerpo ompa ilwikak non ayik pojpoliwis, iwa tokuerpo mach yetos kemi se kali non kichijiwah n tlakah. ² Milák, ok tiyolitokeh itech nin tokuerpo titenna, titlajjowiah, iwa ya tiknekiskiah tikyankuiliskeh tocha kan ilwikak, ³ para ika matitlakentitokah iwa amo matiyetokah tixipetstikeh. ⁴ Milák ok tiyolitokeh itech nin kuerpo, titenna iwa timosotlawah. Amo kijtosneki tiknekih matechixitilikah tokuerpo non ya wewe, yej tiknekih makiyankuilikah tokuerpo, para mapojpoliwi tokuerpo non mikki iwa matikpiakah se kuerpo non ayik mikki. ⁵ Dios Ye Akin ijko otechtlali, iwa yotechmák n Espiritu para matikmatikah tikselskeh tlan otechkakiti.

⁶ Yika nochipa timoyolchikawah, porke kuali tikmatih ijuak tinentinemih itech nin tokuerpo, kijtosneki ayamó tichantitokeh sansikah iwan Toteko. ⁷ Yika, tejwah tinemih ika tlaneltokálistli maya amo tikitah. ⁸ Pero timoyolchikawah, iwa tiknekiskiah yotikkajkeh nin kuerpo para matichanchiwatih iwan Toteko. ⁹ Yika maya ok tiyolitokeh itech nin tokuerpo noso ayamó, tejwah nochipa tiknekih tikyolpaktiskeh n Toteko. ¹⁰ Porke tejwah tinochteh timoteixpantiskeh kan Cristo tlaixkomaka, para techyolkuitis iwa techtlaxtlawis ika tlan kuali noso tlan amokuali otikchijkeh, ijuak otiyolitokah itech nin tokuerpo.

N temachtlistli non teyolsewia

¹¹ Yika, ken tikmatih tikiimakajsi n Toteko, timochijchikawah tikinyolpatlaskeh n tlaltikpaktlakah para makitlakitakah Dios. Ye kuali techixmatok, iwa nikneki nomejwah noiwa kuali techixmatikah. ¹² Amo xikijtokah oksepa san tejwah timoweyiliah mononawak, yej tiknekih xiyolopaktokah por n tekintl non tikchijtinemih. Ijko xiweletikah xikinnankilikah akimeh moweyiliah porke oksikimeh kuali kintenewah pero amo kimatih tlan kipixtokeh ijtik inyolo. ¹³ Tla techiliah yotikuatlapolojkeh, ika noni matikweyilikah Dios. Iwa tla techiliah titlalnamikilisejkeh, tikateh para tomechpalewiskeh. ¹⁴ Itlasojtlalis Cristo Jesús technawatia ijko matikchiwahak, porke kuali tikmatih Ye okimiktijkeh topatka, iwa noni kijtosneki tinochteh otimikeh iwan Cristo.

Ro.

14:7-8 ¹⁵ Cristo omikki por nochteh n tlaltikpaktlakah, para akimeh yolitokeh ayamó san yejwah mamonawatikah, yej makichiwakah tlan Cristo kimonekiltia, Akin omikki iwa omoyoliti por yejwah. ¹⁶ Yika, tejwah ayamó tikinmistlakoah oksikimeh kemi kichiwah n tlaltikpaktlakah; maya yowejka noiwa ijko otikistlakojkeh n Cristo, axa ayamó ijko tikchiwah. ¹⁷ Ijko kiné, akin kajki inawak Cristo, mochiwa se yankuik tlakatl. Nochi tlan achto okichiwaya pojpoliwi, iwa axa nochi moyankuilia.

¹⁸ Nochi tlan onka Dios techmaka, iwa otechyekseli itech Cristo, iwa otechnawati matikinmatiltikah kenijki nochteh weletis kualiyetoskeh íwa. ¹⁹ Yika, por Cristo Jesús, Dios omoyolsewi iwan nochteh n tlaltikpaktlakah. Ayakmó okimitak intlajtlakolwah n tlakah. Tejawh otechnawatih matiktematiltikah n kualitlájtolí kenijki se weletis yetos kualiy iwan Dios. ²⁰ Ijkó kiné, tejwah tiwitseh nomonawak porke Cristo techtitlani. Kemi yaskia inewia Dios nomechtlatlaujtia ximoyolkopakah inawak. Yika, kemi Cristo techtitlani, tomechtlatlaujtiah: xiyetokah ika kualiy inawak Dios. ²¹ Cristo ayik otlajtlakolchi. Pero Dios okinmamaltili totlajtlakolwah kemi yaskia Ye otlajtlakolchi. Iwa ken tiseititokah iwan Cristo, ayakmó techita titlajtlakolejkeh.

6

¹ Ijkó kiné, kemi titekítkeh itech nin tekítl non Dios otechmaktili, tomechtlatlaujtiah amo san xikawilmatikah iteiknomatilis Dios, non Ye yonomehnextili. ² Porke itech itlajkuilol kijtoa:

Ijkuak otéchnotski onimitskak,

itech tonati ijkuak omonekia timomakixtis onimitspalewi.

Iwa axa ye nin tonati ijkuak Dios nomechmakixtis.

Is. 49:8

³ Amitla tikchiwah non makixxitlanwi aka tokni, para amaka makixnamiki toteki. ⁴ Jej ika nochi tlan tikchiwah, tikixnextiah milák titekítih inawak Dios, porke nochi tikxikoah ijkuak titlajjyowiah, keman itla techpoloa, noso itla techtekipachojtinemi, noso ijkuak techwitekih. ⁵ Miak welta yotechtsakeh. Miakeh tlakah techixnamikih iwa chikawak titekítinemi. Kualchiwa amo tikochih iwa kualchiwa amo titlakuah. ⁶ Noiwa tikteititiah tinemih

ika toyolo chipawak,

ika toixtlamatilis,

ika totlaxikolis itech tlajjyowílistli,

ika n teiknomatílistli non tomechpialiah,

por n Espíritu Santo non kajki towah,

iwa totlasojtlalis chipawak.

⁷ Yika, otomechmachtijkeh tlan milák iwa Dios okitenexti iweletilis itech nochi tlan otikchijkeh. Iwa nochipa tichipaujkanemi para timotlajtolpalewiskeh ijkuak techixnamikih. ⁸ Sikimeh techtlakitah iwa sikimeh amo techtlakitah. Kanaj amo techseliah iwa kanaj techyekseliyah kemi yekmilajkameh. Noiwa kanaj techiliah titekajkayajkeh maya tkinmiliah tlan milák. ⁹ Kualchiwa techitah kemi non amo techixmatiskiah, maya ya techixmatih. Kimoliah ya timikitiweh, pero ok tiyolitokah, techtlajjyowíltiah, pero amo techmiktiah. ¹⁰ Maya techitah tiixpachiwh, tejwah tiyolpaktokah, maya nesi amitla topatih, miakeh tkinpalewiah tlan ika panotoskeh, iwa tikpiah tlan okachi ipati.

¹¹ Tokniwah de Corinto, yotomechtlapowijkeh ika milák totlajtol, iwa yotomechmatiltijkeh tlan okipiaya toyolo. ¹² Tejawh tomechtlasojtlah miak. Pero nomejwah amo nontechtlasojtlah kemi tejwah. ¹³ Nomechtlatlaujtia kemi ijkuak se teta kinyeknonotsa ipilwah: techontlasojtlakah kemi ne nomechtlasojtla.

Amo ximowikatinemikah inwah akimeh amo kitlakitah Cristo

¹⁴ Amo ximowikatinemikah inwah akimeh amo kitlakitah Cristo. ¿Kox weletis moseitilis tlan kualiy iwan tlan amokuali? Noso ¿weletis yetoskeh sansikah n tláwili iwa n tleuálistli?

¹⁵ ¿Weletis moyekwikaskeh Cristo iwan sataná? Noso ¿weletis moyekuikaskeh se tlaneltokak iwa se non amo tlaneltokak? ¹⁶ ¿Kox weletis sansikah yetoskeh itiopa n Dios iwa n diosmeh non kinmachijchiwah? Tejawh timochiwah icha n Dios non yolitok, ijkó kemi Ye inewia okijto:

Niyolitos iwa niyetos inwah;

Ne niyetos in Dios,

iwa yejwah yetoskeh noaxkawah.

Lv. 26:12

¹⁷ Yika noiwa kijtoa n Toteko Dios:

Xikinkakajtewakah, iwa ayakmó inwah ximonelokah;

amo xiktelkokah tlan teyolijtlakoa.

Ijkuakó Ne nomechselis.

Is. 52:11

¹⁸Ne niyetos nomotajtsi,

iwa nomejwah nonyetoskeh nopilwah iwa nochpochwah,

kijtoa n Toteko Dios non satlawel weletini.

2 Sa. 7:14

7

¹Ijkó kiné nokniwah non satlawel nomechtlasojtla, kemi ninteh tlájtoltel yotechkakiti-jkeh, moneki tinemiskesh kualí iwa amo matikchiwah tlan weletis kijtlakos tokuerpo iwa toespíritu. Matiktlakitakah Dios, iwa matiktlasojtlakah iwa nochipa matikmopantikah.

Pablo yolpaki innawak n tlakah de Corinto

²¡Tchselikah itech nomoyolo! Amaka itla amo kualí otikchiwilijkeh, nion aka otikititijkeh se amo kualí ojtli, nion amaka otikkajkayajkeh. ³Amo ijki nikijtoa para nomechtlajtlakoltis. Porke ne yonomechili nomejwah nonkateh itech noyolo. Tla tiyolitoskeh noso timikiskesh, nochipa nomechpixtos itech noyolo. ⁴Ne kualí nikmatok nomejwah nonnechpalewiskeh iwa amo nonnechkawaskeh noselti, iwa nonkichiwah manimosisini iwa maniyolpaki por nomejwah. Maya nipanoa itech miak tlaijyowílistli, mach nimosotlawa, yej ika no niyolpaki.

⁵Ijkuak otajtsikoh Macedonia, mach timosewijtikateh, yej sentetl techixnamikih iwa techtlaijyowiltiah, iwa toyolo satlawel mawi. ⁶Pero Dios, Akin kinyolchikawa akimeh mosotlawah, otechyolchika ijkuak okalakiko Tito. ⁷Iwa amo san por Tito owala, yej porke nomejwah ononkiyolchikajkeh ijkuak ononkiyekselijkeh. Ye otechili ika nochi nomoyolo nonkinekih nontechitaskesh, iwa otechmatilti kenijki nonmoyolkokoah iwa nonmotekipachoah por ne. Ijkuak ijko onikma, okachi onipak.

⁸Maya amo onomechpakti tlan onomechtlajkuilili, amo nimolnamikki. San kech tonati onechtekipacho porke onikma onomechyolkoko. ⁹Axa nipaki. Pero amo por ononmoyolkokojkeh, yej porke ijkuak ononmoyolkokojkeh okichi ximoyolpatlakah inawak Dios. Nomejwah ononkixikojkeh n neyolkókoli iwa Dios okipakti, yika tejwah amaka itla otiktoktijkeh. ¹⁰Porke n neyolkókoli non Dios techmaka, techpalewia para matimoyolpatlakah iwa techmakixtia. Noso n neyolkókoli de nin tlaltfkpaktli, kualika mikílistli.

¹¹Nomejwah ononkixikojkeh n neyolkókoli kemi Dios kimonekiltia, axa ¡xikitakah kenomi onomechpalewi! Onomechajsikamatilti tlan amokuali ononkichijkah. Onomechtokti xikualanikah iwa ximawikah. Otlanki ononkinekeh nonnechitaskesh, iwa ononkitakeh kualí ka nonkitlajyowiltiskesh neká akin otlajtlakolchijka. Itech nochi ni, nomejwah ononkitenextijkeh mach ononkipiyah itla tlajtlákoli. ¹²Ijkó kiné, ijkuak onomechtitlanili non amatlajkuíloli, amo onomechtitlanili por neká akin otlajtlakolchi nion por neká akin okijyowi n tlajtlákoli, yej para mamota kenijki nonmotekipachoah por tejwah ixpa n Dios.

¹³Ye ni tlan techyolchikawa.

Por okachi tipakh porke tikitah n Tito satlawel yolpaktok, porke nochteh ononkiyolchikajkeh. ¹⁴Amo ononpipinatí ixpa Tito, ijkuak onikili nimosijsinia de nomejwah. Porke milák nochi tlan tejwah tomechiliah, ijko nochi kualí okisato kemi otikilijkah n Tito.

¹⁵Iwa Tito okachi nomechtlasojtla ijkuak kilnamiki kenijki non nochteh ononkitlakitakeh iwa kenijki ononkiselijkeh iwa ononkimopantijkeh. ¹⁶Satlawel nipaki porke nomejwah nonkichiwah tlan se nomechilia, yika nomechneltoka.

8

Kintlaliokoliah tokniwah de Jerusalén

¹Nokniwah, axa tiknekih tomechmatiltiskesh kenomi itlasojtlalis Dios yomotenexti iwan tokniwah de Macedonia. ²Maya ipan miak tlaijyowílistli yopanokeh, yejwah kipiah pakílistli, iwa maya semi próbesteh, yejwah miak yokitemakakeh kemi se non kitlawelpia.

³Ne nonewia onikinmitak kenomi ika pakílistli okitemakakeh nochi tlan oweletkeh

iwa okachi okitemakakeh. ⁴Yejwah otechtlatlautijkeh matikinkawilikah noiwa makimpalewikah n tokniwah. ⁵Iwa amo kemi otikchiayah, porke achto omotemaktijkeh imak Dios iwa satepa tonawak, para kichiwaskeh tlan Dios kimonekiltia. ⁶Yika otiktlatlautijkeh n Tito makoololoti nomotlatliokolil, ijko kemi okipewalti ijko noiwa makiyektlami n tektil. ⁷Yika, nomejwah okachi non tlayakantokeh itech nochi.

Nomejwah

semi nontlaneltokah,
semi kualit non tlamachtiah,
semi non ixtlamatih,
semi nonteyolchikawah
iwa semi techtlasojtlah.

Ijko kiné, kemi nomejwah nonpankisa itech nochi, nika weletis motas kenijki nonkim-palewiskeh n probesteh ika nomotomi.

⁸Amo nomechilia kemi se tlanawátli, sanwel nikneki xikmatikah kenomi sikimeh ika miak paklistli tlapalewiah, para nikitax kox milák nontetlasojtlah. ⁹Nomejwah ya nonximatih itlasojtlalis n Toteko Cristo Jesús. Ye nochi okipiaya kan ilwikak, pero kemi saikpanoa techtlasojtla, nochi okwalkakajte para ijko nomejwah xiktlawelpiakah.

¹⁰Nikneki nomechilis tlan ne nikmolia weletis nomechpalewis para nonkoololoskeh n tlatliokólili. Ya se xiwitl, nomejwah onontlapewaltijkeh onontlapalewijkeh ika nomotomi iwa ononpejkeh ika paklistli. ¹¹Yika, ijko nomejwah ika paklistli ononkimolijkeh nonkoololoskeh se tlatliokólili, ijko noiwa xikyakatlamikah nomoteki iwa xiktemakakah kemi nonkipiah. ¹²Porke tla se tlakatl ika nochi iyolo kitemaka kech ye weleti kitemaka, Dios kiselia, porke Ye amo techtlajtlania tlan amo tikpiah.

¹³Amo nomechilia xikinmakakah miak akimeh kimpoloo iwa tlamis nomejwah noiwa manomechpolo, yej moneki nion yejwah nion nomejwah amitla manomechpolo. ¹⁴Nomejwah axa nonkipiah tlan ika weletis nonkimpalewiskeh. Mostla noso biktla yejwah kipiaskah tlan nomejwah nomechpolos. Ijko, nochipa ximosepampapalewikah. ¹⁵Kemi kijtoa n tiotlajkuiloli: “Akin okooolo miak, amo okipixki okachi; iwa akin amo miak okooolo, mach okipolo.”

Éx. 16:18

Tito iwa itekipanojkawah

¹⁶Nimotlasojkamati inawak Dios, porke Ye okichi mamotekipacho n Tito, ijko kemi ne nimotekipachoa por nomejwah. ¹⁷Ijkuak otiktajtlanjijkeh manomechitati n Tito, amo sanwel okinek yas, yej ika miak paklistli oyá onomechontlajpaloto.

¹⁸Sansikah iwa n Tito tiktittlantokeh se tokni non kineltoka Dios, non kitlakitah nochteh tokniwah por kualit kichiwa iteki ijkuak tetlapowia de n kualitlajtoli. ¹⁹Iwa amo san noni, yej nochteh tokniwah okipejpenkeh non tokni mawia towah iwa matechpalewi matiktemakatih n tlatliokólili. Tikchijtokeh nin tektil porke tiknekih tikweyiliskah n Toteko Dios iwa tiktenextiskah sa tiknektokah titepalewiskeh. ²⁰Ijko otikchijkeh para amo makijtokah tikchikowiskah non tomi. ²¹Tiknekih tikiskasah tichipawakeh itech nin tektil, iwa amo sanwel ixpa n Toteko Dios, yej noiwa inmixpah nochteh tokniwah.

²²Sansikah iwa nonteh tokniwah, tomechtitlanilijtokeh ok se tokni non yotikitakeh kiwilita tepalewis, iwa axa okachi porke kualit moyolchikawa nomowah. ²³Tla aka tlajtlani akí n Tito, xikilikah ye tekiti nowa para tomechpalewiskeh. Noso tla nomechtlajtlaniah akimeh ninteh ok ome tokniwah, xikinmilikah kintitlanih n tokniwah non moololoah nika, iwa kimawistiliah Cristo Jesús. ²⁴Yika, xikintlasojtlakah ninteh tokniwah, ijko innewiah kitaskah milák tlan onikimilih, iwa ijko kajsikamatiskeh tleka kualit tomechyek-tenewah.

9

Koololoah tomi para n tokniwah

¹Keman nonkinpalewiskeh n tokniwah tlaneltokakeh, ayakmo moneki manomecht-lajkuilili. ²Porke ya nikmatok nomejwah nonkimatih nontepalewiah. Iwa ijkuak nika

inwah non chantitokeh Macedonia, nikinmilia nomejwah non de Acaya yosexiujtik sa non mochixtokeh non tepalewiskeh. Yika ijkuak tokniwah de Macedonia okimatkeh non tepalewiskeh, noiwa miakeh omoyolchikajkeh tlapalewiskeh. ³ Axa nomechintitlanilia ninteh tokniwah makitakah milák sa nonmochixtokeh. Nomechnejmachtia sa ximochixtokah para makitakah milák tlan onikimili. ⁴ Amo kichiwa sikimeh de Macedonia yaskeh nowa iwa nomechajsiwih ayamó nonmotlatlaliah. Noni techpíjpinatis, iwa okachi nomejwah, ken yotikintlapowijkeh sa nonmochixtokeh nontepalewiskeh. ⁵ Yika onikitak kuali ka manikintlajtlanili ninteh tokniwah sa matlayakanakah manomechitatih, iwa matlamikah makoololokah n tomi non nomejwah yononkijtojkeh nonkitemakaskeh. Ijkó nomotlatliokolil sa yetos, iwa motas milák ononkitemakakeh porke nontetlasojtlah, iwa amo san por otomechhijchikajkeh.

⁶ Kuali xikilnamikikah tlan nomechilia: Akin amo miak tooka, amo miak kipixka; iwa akin miak tooka, miak kipixka. ⁷ Xiktemakakah ijko kemi yononkitlalijkeh itech nomoyolo, amo manomechixkoko nion xiktemakakah ijkuak nomechhijchikawah, porke Dios kitlasojtla akin kitemaka ika pakílistli. ⁸ Dios weletis nomechtiochiwas para amitla manomechpolo, iwa ijko nochipa xikpiakah tlan nonkimonekiltiskeh iwa ijko weletis nonkimpalewiskeh oksikimeh. ⁹ N tiotlajkuíloli kijtoa: Dios okinxejelilih tlan iaxka n próbesteh,

iwa iyekchiwalis nochipa wejkwaw.

¹⁰ Dios, Akin kitemaka n xínachtli non se kitooka iwa kitemaka tlan se kimomajsewia, nomechmakas tlan nonkimonekiltiskeh ijkuak nontlatookaskeh, iwa kiskaltis iwa kuali kitlakiltis nomotlatookal iwa ijko nochipa xiweletikah xitepalewikah. ¹¹ Ijko nomejwah nonkitlawelpiaskeh iwa weletis nonkimpalewiskeh oksikimeh ika pakílistli. Iwa ijkuak tejwah tikinwikiliskeh nomotlatliokolil, motlasojkamatiskeh inawak Dios. ¹² Nin tomi non nomejwah nonkintitlanilia, amo sanwel kimpalewia itech tlan kimpoloo, wej noiwa kichiwa mamotlasojkamatikah inawak Dios. ¹³ Iwa yejwah kiweyijkachiwaskeh Dios, porke nin tomi kinnextilis nomejwah milák nonkitlakitah tlan kijtoa n kualitlajtoli de Cristo. Noiwa yejwah kitlakitaskah Totajtsi Dios por nomotlatliokolil non nomejwah nonkitemakah para yejwah iwa para nochteh. ¹⁴ Iwa yejwah noiwa motiotsajtsiliskeh por nomejwah, iwa nomechtlasojkamatiskeh porke Dios okinnextili itlasojtlalis nomotech. ¹⁵ Timotlasojkamatih inawak Dios porke otechmák se tlatliokólili weyijkachitok, non amo tiweletih tikteajsikamatiltiah ika tlájtoli!

10

Pablo kipia tekiwajyotl kemi itlatematilti n Cristo

¹ Ne Pablo, nomechtlatlajutia ika itlasojtlalis iwa iteiknomatilis Cristo. Sikimeh kijtoah ijkuak nika nomowah satlawel niyolyámanki, iwa keman wejka nika nomechtlajkuililia ika chikawak tlájtoli. ² Ijko kiné, nomechtlatlajutia ijkuak nias nomechitati, amo techtoktikah manikintlapowi ika chikawak tlájtoli akimeh techteiliah san intemachtilis n tlakah tiktemachtiah. Porke yoniksentali nikinchikawaknonotsas akimeh nechtlajtoltemoliah. ³ Maya titlaltikpaktlakah, ayakmó tinemih kemi n taltikpaktlakah. ⁴ Porke tlan tejwah tiktekiltitiah amo walewa nika n taltikpaktli, wej kipia weletílistli de Dios para kimpopolos espíritu amokualteh. ⁵ Ijko tikpopolooah nochi tlan amo kuali kixnamiki, iwa amo kitekawilia mamotematilti itlajtoli Dios. Nochteh akimeh ijko kiyejyekoliah tikintoktiah makitlakita Cristo. ⁶ Ijkuak tikitaskah nomejwah kuali ya nonkitlakitah Cristo, tejwah tikintlajyowiltiskeh akimeh amo kinekíh kitlakitaskah Cristo.

⁷ Nomejwah san nonkitah tlanón se kichiwa. Tla aka kimolia ye de Cristo, kuali xikmatikah tejwah noiwa de Cristo. ⁸ Maya nimoweyilia ika notekiwajyo, amo nipinawa, porke n Toteko otechmák ichikawalis iwa itlanawatil para tomechylchikawaskeh iwa amo para tomechsojstlawaskeh. ⁹ Amo xikyejyekolikah nikneki nomechmomojtsi ika noamatlajkuilolwah. ¹⁰ Sikimeh kijtoah noamatlajkuilolwah techikawaknonotsah, pero ijkuak nika teixpa, nechita amo nichikawak iwa ijkuak nitlajtoa amaka kipaktia. ¹¹ Pero

akin ijkó kijtojinemi, kuali makimati ke ijkó kemi tomechnonotsah chikawak ijkuak tomechtlajkuililiah ijkuak wejka tikateh, ijkó noiwa tomechnonotsaskeh chikawak ijkuak tiyetoskeh nomowah.

¹² Tejawah amo timixewiah timotamachiwaskeh noso tikchiwaskeh kemi kichiawah akimeh innewiah moweyiliah. Porke ijkuak motamachiwah iwan oksikimeh iwa motlatlanih, san yejwah innewiah moweyiliah. Yika, tlan yejwah kichiawah amitla ipati. ¹³ Pero tejawah amo timoweyiliskeh ika tlan amo tikpiah, yej tiktlatikaskeh tlan Dios otechnawati matikchiwahak, iwa Ye otechmák nin tlanawátili para matomechnonotsakah nomejwah akimeh nonchantitokeh Corinto. ¹⁴ Yika, amo otikchijkeh tlan amo otechnawatijkeh ijkuak otikalakitoh kan nomejwah. Porke tejawah achto otikalakitoh kan nomejwah ika n kualitlájtol de Cristo. ¹⁵ Iwa amo timoweyiliah ika oksikimeh inteki. Yej kualitkmatokeh tla okachi nontlaneltokah, weletis titekitiskeh nomowah, pero sanwel kan otechnajawatijkeh. ¹⁶ Noiwa tiknekih tiktetlapowitiweh n kualitlájtol, okachi wejka de kan nomejwah nonkateh, iwa amo timoweyiliskeh ika oksikimeh inteki.

¹⁷ Tla aka kineki moweyilis, mamoweyili ika tlan Toteko kichiwa.

Jr. 9:24

¹⁸ Porke n tlakatl non kiyekseliah, amo ye akin inewia moyektenewa, yej neka akin Toteko kiyektenewa.

11

Pablo de milajka itlatematilti Dios

¹ Chamo weletis nonkixikoskeh kanaj kech tlájtol, kemi se tlakatl non yokuatlapolo, milák nonnechxikoah. ² Ne nichawati nomonawak ijkó kemi Dios nomechtlasojtla, iwa yonomechteaxkati imak Cristo, kemi se ichpochtli chipawak non monamiktia iwan iokich. ³ Iwa ijkó kemi n koatl okikajkaya n Eva ika xolopijkayotl, ne nimawi manomechka-jkayawakah iwa ayakmó xikneltokakah n Cristo. ⁴ Nomejwah nonkinseliah akimeh nomechmatiltiah ok se Jesús non tejawah amo otomechmatiltijkeh. Iwa nonkineltokah ok se espíritu, iwa nomejwah ya nonkipixtokeh se. Kenomi nonweletih nonkiseliah ok se tlamachtlistli iwa amo kemi non tejawah otomechmachtijkeh. ⁵ San ne nikmolia ne noiwa nopati kemi n oksikimeh tlatematiltijkeh non momachiliah semi wejweyijtekeh, akimeh nomejwah nonkineltokah.

⁶ Maya nimotlajtolpoloa ijkuak nitlajtoa, ne kuali nikmati tlan niktemachtia. Nochteh nomejwah yononkitakeh itech tektil non tikchijtinemih.

⁷ ¿Kox amokuali onikchi ijkuak onimoiknoma nomonawak, iwa amo onomechili techt-laxtlawikah ijkuak onomechmatilti itlajtol Dios? ⁸ Ne onikinkixtili n tomi oksikimeh tlaneltokakeh, iwa ika onipanotoka ijkuak onomechmatilti itlajtol Dios. ⁹ Keman onikatka nomowah iwa itla onechpolo, amaka oniktlatlanili porke n tokniwah non owalajkeh de Macedonia onechmakakeh nochi tlan onechpoloaya. Iwa ijkó onikchi porke amo oniknek nomechtekimakas, iwa ijkó nochipa nikchiwas. ¹⁰ Ijkó kuali nikmatok milák nikixmati tlan Cristo kimonekiltia, ijkó noiwa nikmatok itech nochi n tlali de Acaya, amaka weletis nechixnamikis. ¹¹ ¿Tleka? ¿Mach amo nomechtlasojtla? Dios kuali kimatok kenomi nomechontlasojtla.

¹² Pero tlan nikchijtiwits, ok nikchijtinemis, para mamoteixmatiltikah nekateh akimeh motenewah noiwa tlatematiltijkeh kemi tejawah. ¹³ Porke ninteh amo milák tlatitlaniltih, yej san tekajkayajkeh, iwa motlakentiah kemi yaskiah itlatitlanilwah n Cristo. ¹⁴ Iwa ni, amo tetlajtlachialti porke inewia n satanás kimati moixpatla kemi se ángel non tsotlani. ¹⁵ Yika, amo matechtlajtlachialti tla noiwa itekitwah moixpatlah kemi yaskiah tekkitkeh yolchipawakeh. ¡Yejwah kiseliskeh intlaxtlawil ijkó kemi kichiwah!

Kenomi otlajjyowijtinenki Pablo

¹⁶ Oksepa techkawilikah manomechili: Amaka makimoli ne yonikuatlapolo, tla ijkó non kimoliah, techkawilikah manomechtlapowi kemi se non yokuatlapolo, iwa ne noiwa manimoweyili achitsi. ¹⁷ Tlan axa nomechilia amo onechnawati Toteko, yej san kemi yaskia

yonikuatlapolo porke nomechilia nikneki nimoweyilis. ¹⁸ Ijkó kemi miakeh moweyiliah por tlan weletih kichiwah, ne noiwa nimoweyilis. ¹⁹ Nomejwah non kimoliah non ixtlamatil, iwa non kinkakih ika paklistli akimeh kuatlapolojtokeh. ²⁰ Iwa nonkiwilitah nonkinkakiskah nekateh akimeh nomechtekimiktiah noso nomechcakayawah, nomechtlawelatih iwa nomechixtlatsiniah. ²¹ Maya nipinawa nikijtos, ¡tejwah mach otimixewijkeh ijkó otomechtoktijkeh!

Tla oksikimeh mixewiah moweyiliah, noiwa ne weletis nimixewis maya tlan nomechilia nikijtoa kemi tlajtoa se non yokuatlapolo. ²² ¿Yejwah hebreos? Ne noiwa. ¿Yejwah tlakah de Israel? Ne noiwa. ¿Yejwah teixwiwah de Abraham? Ne noiwa. ²³ ¿Yejwah itekitwah Cristo? Ne okachi ni tlakéwali de Cristo, maya nitlajtojtok kemi se non yokuatlapolo. Ne okachi yonitekikit, ne okachi yonechwitekeh, miak welta yonechtsakeh, iwa miak welta ya nechmiktsikiah. ²⁴ Iwa mákuili welta n judíojteh onechtsonwitekeh ika sempóali iwa káxtoli iwa nawi (39) tsonwitekílisteh non kinotsah azote. ²⁵ Eyi welta onechkuaujtenkeh, iwa se welta onechmojmotlakah ika tetl. Eyi welta oapolak n barko non itech oniaya, iwa se welta onimoka se tonati iwa se yúali itlajko n weyi atl. ²⁶ Ne wejka yoninentfenki, iwa miak welta onimokokopato itempa n miketékochtili ijkuak oniaya itech río, innak tlachtekeh, innak nokniwah n judíojteh iwa innak non amo judíojteh. Noiwa onikchikoitak n mikílistli itech weyi altepetl, kan amaka chanti, itech weyi atl, iwa innak akimeh motenewah kineltokah Dios. ²⁷ Miak tekipachólistli iwa tlajjowílistli yonipanok. Miak welta onimokochmikti, kanaj amo onikpiaya tlan nikkuas nion tlan nikonis, yika miak welta oniajapismik, iwa miak welta onisekmik porke amo onikpiaya tlan nikmokentis.

²⁸ Nochi ni nikijyowia, pero noiwa ixmostla nechtekipachoa kenomi kateh sentetl n tokniwah. ²⁹ Tla aka mokokoa noiwa ne nikmachilia ikokolis. Tla se tokni kitoktia ok se tokni mawetsi itech tlajtlákoli, ne nechyolkokoa. ³⁰ Tla onka itla tlan ika weletis nimoweyilis, sanwel nimoweyilis ijkuak nikita amo nichikawak. ³¹ Totajtsi Dios, Itajtsi n Toteko Cristo Jesús, Akin nochipa moneki matikweyijkachiwah, Ye kimatok milák tlan ne nikijtoa. ³² Ijkuak onikatka Damasco, n weyi tlanawati non okitekítliya n rey Aretas, okintlali tlamokuitlawijkeh makimokuitlawijtokah n kaltentli de non altepetl, para ijkuak nikisaskia ik ompa manehkitsikah iwa manechtsakuatih, ³³ pero ik se bentana kan tepamitl, onechtemowijkeh ijtik se weyi chikiwitl, iwa ijkó onikcholili n rey.

12

Dios okinextili n Pablo tlan onka ilwikak

¹ Ne amitla niktlaní tla san ne nimoweyilia, moneki manomechtlapowi tlan Toteko onechnextili iwa onechajsikamatilti. ² Nikixmati se tlakatl non kineltoka Cristo, non ya kipia májtlaktli iwa n nawi xiwitl okiwikakeh ipan eyi ilwikak. Amo nikmati kox okiwikakeh ika ikuerpo noso san iespíritu, sanwel Dios kimati. ³ Amo nikmati kox ika ikuerpo noso amo ika ikuerpo okiwikakeh, sanwel Dios kimati. ⁴ Okiwikakeh xochitlalpan, iwa ompa okinkak tlájtoltel non amaka tlakah kikawiliah makinmijto. ⁵ Ne weletis nimoweyilis de se tlakatl kemi ye, pero amo nimoweyilis san ne nonewia, yej sanwel ijkuak nimomachilia amo nichikawak. ⁶ Tla ne niknekiskia nimoweyiliskia, noni amo kijtosneki yonikuatlapolo, yej sanwel nomechilijtoskia tlan milák. Pero ne amo ijkó nikchiwa porke amo nikneki aka makimoli okachi nimoweyilia ika tlan nechitaskeh nikchiwa, noso nechkakiskah nikijtoa, ⁷ nochi tlan Dios onechnextili saikpanoa kuajkualtsi. Iwa para ne amo manimoweyili ika tlan Toteko onechnextili, onechkawili matsoponto kemi itla witstli kemi yaskia n sataná s onechtlalili itech nokuerpo, para manechtlajjowilti. ⁸ Eyi welta yoniktlajtlanili n Toteko manehkixtili nin tlajjowílistli. ⁹ Pero n Toteko onechili: “Tikpíxtok notlasojtlalis, amitla ok se mitspoloa; noweletilis okachi motenextia itech non amo chikawakeh.” Yika nipaki ken amo nichikawak, para notech mamotenexti iweletilis Cristo. ¹⁰ Iwa nipaki keman itla nechyoltlaná, ijkuak nechwijwikaltiah, keman

itla nechpoloa, keman nechtotojtokah iwa keman nitlajiyowia por Cristo; porke keman amo nichikawak, Cristo nechchikawa.

Pablo motekipachoa por n tlaneltokakeh de Corinto

¹¹ Kemi se non yokuatlapolo onimoweyitene, pero nomejwah ononnechtoktijkeh ijkó manikchiwa. Omonekia nomejwah kual nontlajtoskiah de ne. Pero ne noiwa nopati kemi nekateh wejweyi tlatitlaniltih akimeh nomejwah nonkintokatinemih maya ne amitla nopati. ¹² Itech noteki non onikchi ika miak noyolika nomowah, omotak ika neskayolteh tetlajtlachialtijkeh iwa ika milagros non onikinchi ika iweletilis Dios. Ika noni, moteixmatiltia ne de milajka itlatematilti. ¹³ Nomejwah amo onomechitak kemi amitla nomopati innawak n oksikimeh tokniwah. Pero chamo ejé ijkó onomechitak, porke amo onomechtekimák, ¡techtlapojpolwikah por amo onomechtekimák!

¹⁴ Axa ya nimotlatlalijtok nomechtaljpaloti, iwa ika ni, ya eyi welta nomechontlajpalos, porke amo niktemoa tlan nonkipiah, yej nomejwah nomechtemoa, porke n tetajmeh kipiah de koololoskeh tomi para impilwah, iwa amo n tepilwah para intajwah. ¹⁵ Iwa ne ika nochi noyolo niktemakas nochi tlan nikpia, iwa asta manehmiktikah para nomejwah ximomakixtikah; maya nikita ijkuak ne okachi nomechtlasojtla, nomejwah okachi ayakmó nonnechtlasojtlah.

¹⁶ Porke sikimeh maya kijtoah amitla onomechtlajtlanili, kijtoah ke ika noixtlamatilis onomechkajkaya. ¹⁷ ¿Kox onomechkajkaya, ijkuak onomechtlanili aka tokni? ¹⁸ Ne oniktlatlauji Tito manomechtaljpaloti, iwa oniktítlanki mawia iwa n ok se tokni. ¿Onomechkajkaya n Tito? ¿Mach amo milák san ken tiomeh timilajkanemih itech san se totlamachtilis?

¹⁹ Chamo non kimoliah tejwah san timotlajtolpalewijtokeh nomowah. Pero amo ijkó; Dios iwa n Cristo kimatokeh milák tlan tomechiliah. Nokniwah non semi nomechtlasojtla, ijki nikchiwa para okachi ximoskaltikah itech nomotlaneltokalis. ²⁰ Porke nimawi kenijki nomechajtsiti ijkuak nias nomechitati, chamo amo nomechajtsiti kemi ne niknekiskia, iwa chamo nion nomejwah nonnechitaskah kemi nomejwah nonkinekiskiah.

Nikmawilia nomechajtsiti,

nonmokuajtokeh,

nonmoxikoah,

nonmokualanijtokeh,

nonmoxexeloah,

nonxolopijteh,

nontepojpoah,

nonmoweyiliah,

noso manomechajtsiti nonpapajsolitokah.

²¹ Noiwa nimawi tla ijkuak nias nomechtaljpaloti Nodios manechpijpinati nomoixpa, iwa tlawel manichoka ika tlan nonkichiwah, nomejwah yonontlajtlakolchijtineneh iwa ayamó nonyekmilajkanemih, nonmomekatiah iwan ok nonkichiwah tlan pitsotik.

13

Pablo tenonotsa iwa momakawa iwan tokniwah de Corinto

¹ Ika ni ya eyi welta nomechontlajpaloti. Tla itla nonkiyektlaliskeh moneki mayetokah ome noso eyi tokniwah akimeh milák okitakeh tlan otlamochi. *Dt. 19:15* ² Ne achto yonomechilijka ijkuak onomechtaljpaloto, iwa axa oksepa nomechilia kemi niyetoskia ompa nomowah. Nitlajkuiloo para akimeh otlajtlakolchijkeh, iwan oksikimeh noiwa, tla oksepa nias amo nomechiknomatis. ³ Ijkuakó nomejwah nonkajsikamatiskeh milák Cristo kitenkixtia itlajtol notech. Iwa Cristo amo monextia nomonawak kemi se non amo kipia chikawálistli, yej kiteititia iweletilis nomotech. ⁴ Milák, Cristo okikrusifikarojkeh kemi se non amo chikawak, pero axa yolitok ika iweletilis Dios. Ijkó noiwa timochiwah kemi Ye, pero tla tiseititoskeh iwan Cristo tiyolitoskeh ika iweletilis Dios para tomechpalewiskeh.

⁵ Nomejwah nomonewiah ximoyejyekokah kox milák nonkipiah tlaneltokálistli. Ijkó nonkimatiskeh kox nonteaxkawah inawak Cristo, noso san nonmíxkopteh. ⁶ Pero nikneki nomonewiah xikajsikamatikah, tejwah milák titeaxkawah inawak Cristo. ⁷ Tejwah timotiotsajtsiliah inawak Dios, para amo xikchiwakah tlan amokuali. Amo timotiotsajtsiliah para xikitakah kualí tikchiwah toteki, yej para xikchiwakah tlan kualí; maya oksikimeh makijtokah mach ompa tlan tikchiwah. ⁸ Porke amo onka tlan ika weletis tikixnamikiskeh tlan milák, yej sanwel tikchiwah tlan kipalewia tlan milák. ⁹ Yika, tejwah tipakih ijkuak tikitah amo tichikawakeh iwa nomejwah nonchikawakeh, iwa timotiotsajtsilijtoskeh para ixmostla ximoyolchipajtiwiah. ¹⁰ Axa ken ayamó nomechontlajpaloa, nomechtlajkuililia para ijkuak nias nomechitati, amo chikawak manomechnonotsa ika n tekiwajyotl non Toteko Dios onechmaktili, para mamoskalti nomotlaneltokalis iwa amo para nomechp-jpolilis.

Pablo iksemi momakawa

¹¹ Iwa axa nokniwah xiyolpakikah, ximoskaltijtiwiah itech itlajtlo Dios, xiyeknemikah, ximoyolchikawakah iwa ximosepanyekwikakah. Iwa Dios non teyolsewia iwa tetlasojtla, yetos nomowah. ¹² Ximosepantlajalokah iwa ika chipawak nomoyolo ximoixtenamikikah.

Nochteh n tokniwah non kineltokah Cristo Jesús nomechontlajpaloah.

¹³ Iteiknomatilis Toteko Cristo Jesús, itlasojtlalis Dios, iwa isepanyekuikalis n Espíritu Santo mayeto nomowah.

San Pablo kintlajkuililia non de Galacia

Pablo kintlajkuililia n tlaneltokakeh non chantitokeh Galácia

¹ Ne, Pablo, nitlatitlanili. Amo onechtíflanki nion onechtekitlali aka tlakatl, yej inewia Cristo Jesús, iwa n Totajtsi Dios Akin okiyoliti n Jesús ijkuak omikki, yejwah onechmakakeh nin tekítl. ² Ne, iwa nochteh tokniwah akimeh kateh nowa, tomechontlajkuililiah nomejwah tlaneltokakeh akimeh chantitokeh kan tlali de Galacia. ³ Totajtsi Dios iwa n Toteko Cristo Jesús manomechmakakah intiochiwalis iwa inyolsewilis. ⁴ Akin omotemák makimiktikah para kintlaxtlawas totlajtlakolwah, iwa ijko techmakixtis imak tlajtlákolí non onka itech nin amokuali tlaltípkaktli. Ijko okiyekchi tlan Totajtsi Dios okimonekilti. ⁵ ¡Matikweyilikah nochipa n Dios! Ijko mamochiwa.

Amo onka ok se tlamachtílistli non maweleti matemakixti

⁶ Satlawel nechtlajtlachialtia kenijki nomejwah ya nonkikajtiwih Dios, Akin onoméchnotski ika n tlasojtlálistli non Cristo techpialia, iwa yopé nonkineltokah ok se tlamachtílistli. ⁷ Amo kijtosneki onka ok se kualitlájtolí de Dios. Yej onkateh sikimeh akimeh kinekih nomechkuatlapololtiskeh iwa kipatlaskeh n kualitlájtolí de Cristo. ⁸ Tla aka, san akin yetos, maya seme de tejwah noso se ángel de ilwikak, nomechmachtia ok se tlájtoli non tejwah amo ijko otomechmachtijkeh, mawetsi ipa ikualanilis Dios iwa makitlajjowilti. ⁹ Ne yonomechilijka iwa axa oksepa nomechilia: Tla aka tlakatl nomechmachtiki ika ok se tlájtoli non makijto noiwa techmakixtia, pero amo kemi non yotomechmatiltijkah, ma Dios makitlajjowilti ika ikualanilis.

¹⁰ ¿Nomejwah nonkiyejekoliah niktemojtinemi manechyekitakah n tlakah noso manechyekita Dios? Nonkiyejekoliah nikneki nimokawas kuali iwan tlakah. Tla san niktemoskia nimokawas kuali iwan tlakah, ayakmó niyetoskia itetlakewal Cristo.

Pablo kitemachtia tlan Dios okinextili

¹¹ Nikneki xikmatikah nokniwah, nin kualitlájtolí non kichiwa ximomakixtikah non ne niktetlapowia, amaka tlakatl onechititi. ¹² Amo onechmaktili aka tlakatl, nion aka onechmachtí, yej inewia n Cristo Jesús onechmatilti.

¹³ Nomejwah ya nonkimatih tlan onikchiwaya ijkuak oniktlakitaya intlamachtilis n judíojteh. Ne onikintotojtokaya akimeh okineltokayah Cristo Jesús, porke onikneka nikimpojpoulos. ¹⁴ Itech intlamachtilis n judíojteh, miakeh non inwah onimoskalti onikint-laniaya, porke ne okachi onikmopantiaya tlan onechkajtewilijkeh iwa onechmachtijkeh nowejkatatawah. ¹⁵ Pero ijkuak ayamó onitlakatia, Dios ika itlasojtlalis onechpéjpenki para maniyeto itékitki. Yika, ijkuak Ye okimonekilti, ¹⁶ onechixmatilti Ikone, para manikinmatilti n kualitlájtolí non kichiwa mamomakixtikah non amo judíojteh. Ijkuak ijko otlamochi, amaka inawak onimatlajoltito, ¹⁷ nion onikinmitato Jerusalén akimeh achto Dios okintlali mayetokah itlatitlanilwah. Yej san nima onia Arabia, iwa satepa oksepa oniwalmókopki Damasco.

¹⁸ Iwa eyi xiwitl satepa onia Jerusalén onikontlajpaloto n Pedro, iwa ompa onimoka káxtoli tonatijmeh iwan ye. ¹⁹ Pero ijkuak ompa onikatka amaka ok se tlatitlanili onikitak, sanwel Jacobo, ikni n Toteko Jesús. ²⁰ Dios kuali kimatok nochi tlan nomechijkuililijtok milák.

²¹ Satepa, onia kan tlalmeh de Siria iwa Cilicia. ²² Pero ayamó onechixmatiah n tlaneltokakeh de Cristo, non chantitokeh kan tlali de Judea. ²³ San okikakiah tlan okijtoayah non oksikimeh: “N tlakatl non achto okineka kipojpolos n kualitlájtolí de Cristo Jesús, axa inewia tetlapowijtinemi de nin tlájtoli.” ²⁴ Iwa, okiweyijkachiyawah Dios ika tlan onikinmatiltiaya.

2

N oksikimeh itlatitlanilwah n Totajtsi Dios kiyekseliah n Pablo

¹ Ijkuak yopanok májtlatkli iwa nawi xiwitl, oksepa onia Jerusalén. Ijkuakó onikinwik n Bernabé iwa n Tito. ² Onia Jerusalén porke Dios onechnextili maniwia ompa. Iwa ompa, oksika onimotlapowi, iwa onikinmajsikamatilti n kualitlájtolli non temakixtia non ne nikinmatiltia non amo judíojeteh. Ijkó onikchi para amaka makijto sanenka tlan nikchijtok. ³ Pero maya nowa okatka n Tito, mach okitoktijkeh mamosirkunsidaro, porke ye amo judío. ⁴ Milák noiwa ompa okatkah sikimeh tlakah non omotenewayah tokniwah pero mach milák. Ninteh san ichtaka okalakeh kan otimoololoayah san para techistlakoskeh kenijki otiwetlekeh otimomatotjonkeh imak intlanawatil, yejwah okinekiahtechtoktiskeh matiktakitakah intlanawatil. ⁵ Pero tejwah amo otikmokawilijkeh oksepa matechilpikah itech itlanawatil Moisés, porke nochipa otiknekih mayeto nomowah n kualitlájtolli non techmakixtia.

⁶ Pero nekateh tokniwah non tlayakantokoh, amitla yankuik onechnawatijkeh manikchiwa. Ne mach noteki tla yejwah wejweyi tlayakankeh noso amó, porke Dios amo san techikotlasojtla. ⁷ Yika, yejwah okajsikamatkeh Dios onechnawati manikinmatilti nin kualitlájtolli non temakixtia, akimeh amo judíojeteh, ijkó kemi Pedro okinawatijkeh makinmatiltiti n kualitlájtolli n judíojeteh. ⁸ Porke Dios Akin okinawati n Pedro makinmatiltiti n kualitlájtolli n judíojeteh, Ye Akin noiwa onechtítlanki manikinmatiltiti n kualitlájtolli non amo judíojeteh.

⁹ Yika Jacobo, Pedro iwa Juan, akimeh okachi otlayakantokah, okajsikamatkeh Dios onechmaktilli nin tekittl, yika onechmatlajpalojkeh iwa onechselijkeh ne iwa Bernabé. Okitayah kualitlájtolli tejwah matikintlapowikah non amo judíojeteh, iwa yejwah kintlapowiskah n judíojeteh. ¹⁰ Yejwah otechtlatlautijkeh amo matikinmilkawakah n tokniwah akimeh amitla okipiayah, iwa ye ni tlan onikmoli nikchiwas.

Pablo kajwa n Pedro kan tlali de Antioquía

¹¹ Pero ijkuak Pedro owala Antioquía, onikili ixkotika amokuali tlan okichijtoka. ¹² Porke achto otakuayah inwah non amo judíojeteh iwa omowikaya inwah, pero ijkuak okalakikoh sikimeh tlakah non Jacobo okwalintítlanki, Pedro opé moixkoyantia innawak non amo judíojeteh. Ayakmó okinek otlakua inwah, porke okinmawiliayah n tlakah akimeh okijtoayah mamosirkunsidarokah. ¹³ Ijkuakó n oksikimeh judíojeteh non kineltokah Cristo Jesús iwa ochantitokah Antioquía, noiwa okipixkeh ome inmixko, porke okichijkeh kemi Pedro okichi, iwa asta Bernabé noiwa ijkó okichi. ¹⁴ Pero ijkuak onikinmitak amo okichijtokah kemi kitemachtia n kualitlájtolli de Dios non temakixtia, inyakapa nochteh tokniwah non ompa okatkah, onikili n Pedro: “Maya te ti judío, tikchijtinemi kemi kichiwah non amo judíojeteh, iwa amo kemi n judíojeteh; ¿kenijki kiné tikinchijchikawa akimeh amo judíojeteh mamokopakah judíojeteh?”

Ika totlaneltokalis Dios techita tiyolchipawakeh

¹⁵ Tejawh otitlakatkeh Israel yika tijudíojeteh, iwa amo kemi non amo judíojeteh, tlajtlakolchijkeh. ¹⁶ Pero kualitlájtolli tikmatokoh amaka kitlapojpolwiskeh por okichi tlan tlanawatia n tlanawátilli de Dios, yej se momakixtia tla se kitlalia itlaneltokalis itech Cristo Jesús. Yika, tejwah noiwa yotikneltokakeh Cristo Jesús, para Dios matechtlapojpolwi por yotitlaneltokakeh inawak iwa amo por tikchiwah tlan kijtoa n tlanawátilli. Porke amaka weletis momakixtis sanwel por kitlakita n tlanawátilli.

¹⁷ Axa, tla tikneltokah yotechtlapojpolwijkeh por otikneltokakeh Cristo, ika noni motenextia tejwah titlajtlakolejkeh. ¿Kijtosneki Cristo techtoktia matiyetokah titlajtlakolejkeh? ¡Amó, ayik ijkó matikmolikah! ¹⁸ Pero tla oksepa niktlakita itlanawatil Moisés non ayakmó oniktakitaya, nimotlajtlakoltia. ¹⁹ Porke inawak n tlanawátilli ne yonimik iwa ayakmó weleti nechnawatia, axa niyolitok sanwel para Dios. ²⁰ Ijkuak Cristo omikki ipan krus ne noiwa onimik. Yika, axa mach ok ne akin niyolitok, yej Cristo yolitok notech. Iwa tla axa niyolitok itech nin kuerpo, niyolitok porke onikneltokah ikone n Totajtsi

Dios, Akin satlawel onechtlasojtlak iwa omotemák makimiktikah nopatka. ²¹ Ne mach nikneki nikixpanawis itlasojtlalis Dios; porke tla timotlapojpolwiskiah inawak Dios san por tikneltokah itlanawatil Moisés, sanenka omikki n Cristo.

3

Tikselia n Espiritu tla tikneltokah Cristo

¹ ¡Miálmasteh Gálatas, nontlapolojtokeh!

¿Akin onomechtlajchiwih, para amo xikneltokakah n kualitlájtolli non milák? Itech totemachtillis otomechajsikamatiltijkeh kenomi nonkitaskiah ika nomoixtololowah n Cristo Jesús Akin omikki itech krus. ² Sanwel nikneki technankilikah tlan nomechtlajtlanis: ¿Ononkiselijkeh Iespíritu n Dios por ononkitlakitakeh n tlanawatílistli noso por ononk-neltokakeh n Cristo? ³ ¡Semi amo nontlakakih! Nomejwah opé non nemih iwan Espiritu ijkuak onontlaneltokakeh inawak Cristo. Iwa axa, ¿nonkinekih nonkichiwaskeh tlan kijtoa itlanawatil Moisés para weletis nonyetoskeh kemi Dios kineki? ⁴ ¿Nonkiyejekoliah amitla onomechpalewi nochi tlan yonontlajiyowijkeh? ⁵ ¡Ijkuak Dios nomechmaka Iespíritu iwa nomechchiwilia milagros, ¿tleka kichiwa? Amo kichiwa por nonkitlakitah tlan kijtoa itlanawatil Moisés yej por ononkineltokakeh tlan ononkikakeh de Cristo.

⁶ Abraham okineltokak Dios, yika Dios okiyekseli kemi yolchipawak. ⁷ Yika, kuali xikmatikah akimeh milák iwejkaixwih Abraham yejwah akimeh milák tlaneltokah. ⁸ N tiotlajkufloli okijto tlan satepa tlamochiwaskia ika non amo judíos, por intlaneltokalis. Dios okisentlalili n Abraham ninteh kualitlájtolteh: “Por motlaneltokalis nikintiochiwas nochteh n taltikpaktlakah.” *Gn. 12:3*

⁹ ¡Jkó kiné, nochteh akimeh kineltokah, Dios kintiochiwa sansikah iwan Abraham. ¹⁰ Pero akimeh moyolchikawah itech itlanawatil Moisés, kateh itech tlajtlákoli. Porke n tiotlajkufloli kijtoa: “Miak tlajiyowilistli kiplas akin amo makiyekchiwa tlan kijtoa n tlanawátili.” *Dt. 27:26*

¹¹ Yika, kuali moajsikamati, amaka weleti momaxixtia de itlajtlakolwah san por kichiwa tlan kijtoa n tlanawatílistli; porke n tiotlajkuiloli kijtoa: “N yolchipawak ika itlaneltokalis yolitos.” *Hab. 2:4* ¹² Porke n tlanawatílistli amo motlaxkilia itech n tlaneltokálistli, yej kijtoa: “Akin kineki yolitos iwa kitlakitas n tlanawátili, moneki makitlakita nochi tlan kinawatia non tlanawátili.” *Lv. 18:5*

¹³ Cristo okitlaxtlawako totemaxixtilis non otechmamaltiaya n tlanawatili ijkuak omot-lajtlakolmamaltiko por tejwah. Porke kajki ijkuilitok: “Satlawel kitlajtlakoltia akin kipiloah itech se kuawitl.” *Dt. 21:23*

¹⁴ ¡Jkí otlamochi para n tlatiochiwálistli non Dios okisentlalili n Abraham makinmakakah por Cristo, akimeh amo judfojtech, iwa ¡jkó nochteh matikselikah ika totlaneltokalis itech n Espiritu non Dios techmaka.

N Tlanawátili iwa n tlájtoli non Dios okisentlali

¹⁵ Nokniwah, techkawilikah manomechajsikamatilti tlan kijtosneki nin tlájtoli non Dios okisentlali. Ijkuak ome tlakah kispantlalial se tlájtoli itech se amatl, amaka weletis kixpanawis noso itla kajxitilis. ¹⁶ ¡Jkó kiné, Dios okisentlalili Abraham iwa iwejkaixwi. Amo kijtoa: “Para nochteh iwejkaixwih”, kemi yaskiah miakeh, porke amo miakeh yej san se: “Para akin motech wawatos.” Sanwel Ye n Cristo. ¹⁷ Ye nin tlan ne nikijtoa: Dios okisentlalili Abraham, iwa omotlajtolsenka íwa. Yika itlanawatilis, non owala nawi sientio iwa sempóali iwa n májtlaktli (430) xiwitl satepa, mach weletis kipojpolos tlan Dios okisentlali nion kipolilis ipati tlan Dios yokijto kimakas Abraham. ¹⁸ Yika, tlan Dios okisentlali techaxkatilis amo tikseliah por tiktlakitah n tlanawatílistli, porke tla tikselsikah por tiktlakitah n tlanawatílistli ayakmó yetoskia porke Dios okisentlali ika itlajtol. Pero Dios okitiochi n Abraham ¡jkó kemi okili kitiowiwaskia sanijki.

¹⁹ Tla ¡jkó, ¿tlan ipati itlanawatil? Non tlanawátili otechmaktijkeh para matikajsikamatikah tlan tlajtlákoli iwa tlan amó, iwa sanwel motekitiltiskia asta ijkuak ayamó owalaya Akin Dios okisentlali kualitlanis. Non tlanawátili n ángeltech okimaktijkeh n Moisés, iwa

tejwah otikselijkeh imak Moisés. ²⁰ Ijkuak Dios okisentlali kitiochiwas n Abraham, inewia Dios okili iwa amo omonek aka ok se matetlapowiki, porke Dios inewia okichi.

Pablo kiteajsikamatiltia tleka omotlali itlanawatil Moisés

²¹ ¿Kox weletis n tlanawatílistli kixnamikis tlan Dios okisentlali kichiwas? ¡Amó, ayik! Porke tla motemakaskia se tlanawátili non weletiskia techmakaskia yolílistli, ijkuakó ya tichipawatoskiah de totlajtlakolwah inawak Dios. ²² N tiotlajkuiloli kijtoa, tinochteh techmapixtok n tlajtlákolí, ijko nochteh akimeh kineltokaskeh n Cristo, makiselikah tlan Dios okisentlali kinmakas.

²³ Ijkuak ayamó otikmatiah tlan tlaneltokálistli, n tlanawátili otechmapixtoka asta ijkuak omoteixmatilti n tlaneltokálistli. ²⁴ Ijko kiné, n tlanawatílistli okatka kemi akin techmokuilawia asta ijkuak owala Cristo. Iwa ijko matimochipawakah por Ye. ²⁵ Iwa axa, kemi yotikneltokaskeh n Cristo, itlanawatil Moisés ayamó moneki matechyakanto.

²⁶ Porke nonnochteh nontepilwah de Dios por nonkineltokasheh Cristo Jesús. ²⁷ Porke nochteh akimeh omokuaatekijkeh itech Itoka n Cristo, yomoyankuiktlakentijkeh de Cristo. ²⁸ Axa inawak Dios, ayamó onkateh judíos noso amo judíos, tlanemakteh noso san yejwah monawatiah, noso tlakatl noso siwatl, porke tinochteh tiseititokeh iwan Cristo Jesús. ²⁹ Tla nomejwah non iaxkawah Cristo, milák nonteixwihwah de Abraham, iwa nonkiseliskeh tlan Dios okisentlalili kimakas Abraham.

4

¹ Ye ni tlan nikneki xikajsikamatikah: Ijkuak ok chokotsi n tekone akin kitlaaxkatiskeh, kajki san kemi se itlakewal n teta, maya momatok ye iaxka nochi tlan kipia ita. ² Onkateh akimeh kimokuilawiah non chokotsi iwa kitiliah tlan okiaxkatilijkeh. Satepa ijkuak motlami tlakatl, ya weletis kiselis tlan iaxka. ³ Tejwah ijko otipanokeh, ijkuak otikatkah titelpokameh otechyoltanaya nochi tlan okichiwayah n taltikpaktlakah. ⁴ Pero ijkuak oajsiko n tonati, Dios okwáltlanki Ikone non otlákatki itech siwatl, iwa omoskalti imak n tlanawatílistli. ⁵ Ye okitlaxtla iwa okinmakixti akimeh okatkah imak non tlanawátili, ijko Dios otechseli kemi ipilwah.

⁶ Iwa ken ya titepilwah, Dios okítlanki itech toyolo Iespíritu Ikone, iwa Iespíritu techpalewia matiknotsakah: “¡Abba, Totata!” ⁷ Ijko kiné, te ayamó tika kemi se tetlakéwali inawak Dios, yej titekone. Iwa tla titekone noiwa Dios mitstlaaxkatilis.

Pablo motekipachoa por non kineltokasheh Cristo Jesús

⁸ Ijkuak nomejwah ayamó ononkixmatiah Totajtsi, ononkinmopantiyah n diosmeh non kinmachijchiwah non amo milák diosmeh. ⁹ Pero axa nomejwah ya nonkixmatih Dios, noso okachi kuali Dios ya nomechixmati. ¿Kenijki oksepa nonkinekih nonkitlakitaskah tlan amitla ipati nion tepalewia, iwa oksepa manomechmapixtinemi? ¹⁰ Nomejwah ok non kilwichiwiliah se tonati, yankuik mestli, yankuik xiwitl noso itla ok se tonati. ¹¹ Kualchiwa nechtekupachoa kox amo sanenka n tekítl non onikchi nomowah.

¹² Nokniwah nomechtlatlaujtia ximokopakah kemi ne, ijko kemi ne onimokopki kemi nomejwah. Nomejwah ayik itla amokuali ononnechtoktijkeh. ¹³ Nomejwah kuali nonkimatokeh ijkuak sikinika onomechmachi n kualitlájtolí de Dios non techmakixtia, ne onimokokoaya. ¹⁴ Maya onomechtekimák ika nokokolis non onikipiaya, nomejwah mach ononnechtlawelitakeh nion onomechtlajyalti. Yej ononnechyekselijkeh kemi se iángel Dios; noso kemi ne nonewia niyetoskia Cristo Jesús. ¹⁵ ¿Kani omoka non pakílistli non ononnechpialiyah? Ne kuali nikmatok, nomejwah asta nonkinkopinaskiah nomoixtololowah iwa nonnechinmakaskiah. ¹⁶ Iwa axa, ¿nomejwah nonnechkokoliah por onomechili tlan milák?

¹⁷ Nekateh tlamachtijkeh tekajkayajkeh kinekih xikitakah nonkinmopantiah, pero amo ika kuali inyolo kichiwah. Yejwah kinekih nomechxeloskeh tonawak, para nonyaskah inwah. ¹⁸ Semi kuali tla sikimeh nomechmopantiah, pero mayeto ika kuali inyolo nochipa, iwa amo san ijkuak nika nomowah. ¹⁹ Nopilwah, oksepa nitlajiyowijtok por nomejwah, kemi ijkuak se siwatl ya kipiati ikone, asta mayeto Cristo itech nomoyolo. ²⁰ ¡Niknekiskia

axa niyetos nomowah iwa nomechnonotsas ika noyamankatlajtol, porke ayakmó nikmati tlan okachi nomechilis!

Agar iwa Sara

²¹Nomejwah akimeh nonkinekih nonkitlakitaskeh itlanawatil Moisés, techilikah: ¿amo nonkikakikateh tlan kijtoa non tlanawátili? ²²Itlajkuilol Dios kijtoa Abraham okímpixki ome ipilwah: se iwan iteska Agar, iwa ok se iwa isiwa Sara. ²³Agar okímpixki se ikone non itoka Ismael kemi nochi siwatl kipia ikone, pero n Sara okímpixki ikone Isaac para mamochiwa nochi tlan Dios okisentlali kichiwaschia para Abraham. ²⁴Ninteh ome siwameh kinteajsikamatiltiah ninteh ome tlájtoltel non Dios okisentlali. Agar kiteititia n tlájtoli non Dios okisentlali kan tepetl Sinaí, iwa akimeh kitlakitah non tlanawátili, ijilpitokeh itech. ²⁵¿Agar kitenextia n tepetl non itoka Sinaí non kajki kan tlali de Arabia!, ye n axa Jerusalén. Nin altepetl iwa ipilwah kateh kemi yaskia ilpitokeh itech nin tlanawátili. ²⁶Pero n Jerusalén non kajki ilwikak amo kajki imak non tlanawátili, iwa tejwah titepilwah de non Jerusalén. ²⁷N tiotlajkuiloli kijtoa:

Xipaki te siwatl non amo tikimpia mopilwah;

xitsajtsi ika pakflistli te non amo tikixmati kenijki tekoko ijkuak se siwatl kipia se ikone.

Porke n siwatl non okikakajtejkeh kimpias okachi ipilwah

iwa amo n siwatl non kipia iokich.

Is. 54:1

²⁸Nokniwah, tejwah timochiawah kemi Isaac, tejwah titepilwah non Dios okisentlali kimakas n Abraham. ²⁹Pero ijko kemi Ismael, non otlákatki kemi tlakatih nochteh n kokoneh, okitlawelital n Isaac, non otlákatki ika iweletilis Espíritu. Ijko axa noiwa tlamochijtok. ³⁰Pero itlajkuilol Dios technextilia tlan Dios okili Abraham: “Xikixti de mocha moteska Agar iwa ikone, porke ikone moteska amo weletis tiktlaaxkatiskeh sansikah iwa n ikone mosiwa Sara.”

Gn. 21:10

³¹Ijko kiné nokniwah, tejwah amo ipilwah Agar non okatka tlanémaktli, * yej titepilwah de Sara non amayik okatka tlanémaktli.

5

Cristo otechtojtomako imak tlanawatili

¹Cristo otechtojtomako imak tlanawatilistli. Yika xiyeknemikah, iwa amo xikmokawilikah oksepa manomechijilpi n tlanawátili. ²¿Xikkakikah! Ne Pablo, nomechilia: Tla nomejwah nonmokawiliah manomechsirkunsidarokah, amo okachi nomechpalewis Cristo. ³Oksepa nomechilia, nochi tlakatl akin kimokawilia makisirkunsidarokah moneki kichiwas nochi tlan kijtoa n tlanawatilistli. ⁴Nomejwah akimeh nonkinekih manomechitakah kemi non yolchipawakeh por nonkitlakitah n tlanawatilistli, yononmoixkoyantijkeh de Cristo, iwa ayakmó nonkateh itech ikualtilis Dios. ⁵Tejwah tikmatokeh n Espíritu techpalewia, iwa tikneltokah Dios techtlapojpolwis por totlaneltokalis. ⁶Porke tla tikateh iwan Cristo Jesús, amitla ipati tla tisirkunsidaritokeh noso amó. Tlan milák ipati, matikneltokakah Cristo Jesús, iwa ika non tlaneltokálistli matimotlasojtlakah.

⁷Nomejwah ya kualí ononyayah. ¿Akin onomechtoktih ayakmó xiktlakitakah tlan milák? ⁸Porke non tlamachtflistli amo walewatok itech neká akin onoméchnotski. ⁹Kualí xikmatikah: “San ika achitsi levadura kismawa nochi n textli.” ¹⁰Ne nomechneltoka mach nonkikawaskeh tlan nonkineltokah itech Cristo. Pero Dios kitlajiyowiltis neká akin nomechkuatlapololtijtinemi, maya san akin yetos.

¹¹Nokniwah, tla ne ok niktemachtijtinemiskia n sirkunsisión, n judíojeteh amo nechtototokaskiah, porke tla ijko yetoskia, amo kimpajsoloskia tlan niktemachtia de ikrus n Cristo.

* 4:31 Eslava: Acho ijkuak se siwatl okitewikiliaya miak tomi iwa ayakmó oweletia okikopaya omokawaya esklava. Satepa n tlakatl non okiwikiliaya non tomi, okinamakaya kemi yolkameh monamakah. Iwa ijko okimokopiliaya itomi, iwa ijkuak okitekiliaya n siwatl non omoko amitla okitlania. Iwa iteko okipixtoka itech icha iwa okitekiltiaya san tlan oras okinekia porke amo okipixtoka kemi se tlakéwale yej kemi se esklava.

¹² Pero akimeh nomechchijchikawah ximosirkunsidarokah, ꞑniknekiskia yejwah innewiah san semi makimotekilikah intlakayo!

¹³ Nokniwah Dios onoméchnotski para ayakmó xiilpitokah itech non tlanawátili, pero noni amo kijtosneki weletis nonkichiwaskeh nochi tlan amokuali kelewia nomokuerpo. Yej okachi kuali ximosepampapalewukah ika tlasojtlálistli. ¹⁴ Porke nochi n tlanawatílistli mochiwa sa se tlanawátili: “Xiktlasojtla mokni kemi te monewia timotlasojtla.” ¹⁵ Pero tla san nomejwah nonmokuah iwa nonmotlawelitalah, ximotlachilikah, amo kichiwa san nomejwah nonmotlajtlamiskeh.

Tlan kineki tokuerpo amo ye tlan kineki n Espiritu

¹⁶ Yika nomechilia: Xikkawilikah manomechyakana n Espiritu, iwa ijkó amo nomechy-oltilanas tlan amokuali kelewia nomokuerpo. ¹⁷ Porke tlan kelewia tokuerpo, kixnamiki tlan kipaktia Iespíritu Dios, iwa n Espiritu kikokolia tlan amokuali kelewia tokuerpo. Ninteh ome mixnamikih, yika amo nonweletih nonkichiwah tlan nonkinekiskiah. ¹⁸ Tla nomechyakantinemi n Espiritu, ayakmó nomechnawatijtok n tlanawátili.

¹⁹ Amo owi motah akimeh kichiwah tlan kinyoltilana inkuerpo:

momekatijtinemih,
kichiwah tlan pitsotik,
kichiwah tlan teixpolo,

²⁰ kinweyilia diosmeh non san kinmachijchawah,
tetlajchawah,

tekokoliah,
kichiwah mamokuakualanikah oksikimeh,
chawatih,

kualankamikih,
kichiwah itla san para makinmitakah,
kinxexeloah n tokniwah,
kinmachtiah tlan amo milák,

²¹ xikojmikih,
tlawankeh,
fiero mopaktiah itech ilwimeh,
iwa kinchawah oksikimeh tlajtlákolteh kemi ninteh.

Ne nomechilia, kemi achto yonomechili, akimeh ijkó kichiwah, mach kalakiskeh ilwikak kan Dios tlanawatijtok.

²² Pero ijuak n Espiritu kiyakana se tlakatl, ye ni tlan kichiwah:

tetlasojtla,
kipia pakílistli,
kipia yolsewílistli,

nochi kixikoa,
kuali tlakatl,
teiknomati,
tlaneltokak,

²³ yolyamanki,
kuali monawatia.

Akimeh ijkí moyakanah n tlanawatílistli amo weleti kinnawatia. ²⁴ Iwa akimeh iaxkawah Cristo, mach ok kimokawiliah makinoyoltilana tlan kineki inkuerpo, kemi yaskia yokikrusi-fikarojkeh tlan amo kuali kelewia inkuerpo. ²⁵ Ijkó kiné, tla n Espiritu techmakah tonemilis matimokawilikah matechyakana n Espiritu.

²⁶ Amo matimoweyilikah, nion matimoxijxikokah iwan totlaneltokaikniwah.

6

Matimosepampapalewukah

¹ Nokniwah, tla aka tokni owalwetski itech tlajtlákolí, nomejwah akimeh nomechyakantinemi n Espiritu, xikpalewukah mamoyektli. Pero xiknonotsakah

ika kuali nomoyolo, iwa ximotlachilikah amo kichiwa noiwa nomechyoltlanas n tlajtlákolí. ² Ximosepampapalewikah nonnochteh ijkuak itla nomechtekipachoa, ijkó nonkitlakitaskeh tlan kijtoa itlanawatil Cristo.

³ Akin kimolia weyijkatitok, iwa amo milák, san ye inewia mokajkayawah. ⁴ Yika, san tejwah matimoyejyekokah kox kuali tinemih, iwa tla tikmachiliah kuali tiyeknemih, matipakikah iwa amo matikimitakah kox kuali noso amo kuali tlan kichiwah oksikimeh. ⁵ Porke tinochteh moneki matikyekchiwakah toteki.

⁶ Akin kiselia ixlamatlistli itech itlajtol Dios, makipalewi ika tlan panotos akin kiixtlamachtia.

⁷ Amo ximokajkayawah: amaka weletis kikajkayawas Dios. Nochteh kipixkah tlan kitookah. ⁸ Tla se tlakatl kichiwa san tlan kineki ikuerpo, san ye inewia kimotemolia imikilis. Pero akin kichiwa tlan kimonekiltia n Espiritu, kiselis nemlistli non ayik tlamis. ⁹ Ijkó kiné, nochipa matikchiwakah tlan kuali iwa amo matimosotlawakah, porke ajsiki n tonati tipixkaskeh, tla amo timosotlawah. ¹⁰ Yika, ijkuak weletis tikinpalewiskeh tokniwah tlaneltokakeh, matikinpalewikah.

Pablo kinnejmachtia n tokniwah iwa momakawa inwah

¹¹ Nokniwah, xikitakah kenijki ika wejweyi tlajkuilolteh nonewia ika noma nomechont-lajkuililijtok. ¹² Nekateh akimeh nomechchijchikawah ximosirkunsidarokah, kichiwah san para kimpaktiskeh n oksikimeh, iwa ijkó amo makintotojtokakah por kineltokah n Cristo Jesús. ¹³ Porke akimeh kateh sirkunsidados amo kiyektlakitah n tlanawatlistli. Pero yejwah kinekih ximosirkunsidarokah, san para moweyiliskeh iwa makijtokah ononkimokawilijkeh ximosirkunsidarokah itech nomokuerpo. ¹⁴ Pero ne amo nikneki nimoweyilis, yej ne nikneki nimoweyilis ika imikilis n Toteko Cristo Jesús ipan krus. Porke ika imikilis Cristo ipan krus, omikki nochi tlan onechyoltlanaya, iwa ne ayakmó niteaxka itech nin tlaltfkpaktli. ¹⁵ Amitla ipati kox tisirkunsidaritokeh noso amó, tlan milák ipati se makiyankuili iyolo. ¹⁶ Makiselikah yolseklistli iwa teiknomatlistli nochteh akimeh kitlakitah nin tlanawátli, iwa nochteh akimeh milák iaxkawah Dios.

¹⁷ Axa ik tlayakapa ayakmó nikneki aka manechtlajtoltemoli, porke itech nokuerpo nestok kenomi onechtlaijyowiltijkeh ken nikneltoka Jesús.

¹⁸ Nokniwah iteiknomatilis Toteko Cristo Jesús mayeto iwan nomoespíritu. Ijkó mamochiwa.

San Pablo kintlajkuililia non de Éfeso

Pablo kintlajkuililia n tokniwah de Éfeso

¹ Ne Pablo, akin Dios okimonekilti maniyeto itlatitlanil n Cristo Jesús. Ne nomechtla-
jkuililia nomejwah non nonchantitokeh Éfeso, nomejwah akimeh nonteaxkawah de Dios
iwa nonkineltokah Cristo Jesús. ² Totajtsi Dios iwan Toteko Cristo Jesús, manomech-
makakah intlatiochiwalis iwa inyolsewilis.

Totajtsi Dios techmaka itiochiwalis por Cristo Jesús

³ Maweyijkachito Dios, Itajtsi n Toteko Cristo Jesús, Akin yotechtiochi ika nochi
tlatiochiwálistli tlan onka ilwikak por Cristo. ⁴ Dios otechpéjpenki por Cristo desde ijkuak
ayamó okatka n tlaltfcpaktli, para matiyetokah tiyolchipawakeh por itlasojtlalis iwa amo
matikpiakah tlajtlákoli inawak. ⁵ Dios, okisentlali techseliskia kemi titepilwah por Cristo
Jesús, ijko kemi Ye okimonekilti. ⁶ Yika, nochipa tikweyijkachiwah Dios por itlasojtlalis non
techpialia por tikateh iwan Ikone non satlawel kitlasojtla. ⁷ Iwa Cristo ika iesso okintlaxtla
totlajtlakolwah, iwa Dios yotechtlapojpolwi por itlasojtlalis non saikpanoa. ⁸ Dios okipixki
teiknomatilis ijkuak otechmák nochi ixlamatlistli iwa tlanamiklistli. ⁹ Iwa otechmatilti
tlan Ye kimonekiltia, iwa tlan Ye inewia okijto kichiwasia non amaka okimatia. ¹⁰ Ye
ni tlan kichiwas ijkuak ajsiki n tonati, Dios kiseitilis nochi tlan onka ilwikak iwa itech n
tlaltfcpaktli imak Cristo para makinawatijto.

¹¹ Akimeh tikateh iwan Cristo, Dios yotechpéjpenki desde ocho para matiksulikah tlan
yotechkakitijkeh techmakaskeh. Iwa nochi ni mochiwas kemi Dios yokijto kichiwas, Akin
nochi kichiwa kemi Ye kimonekiltia. ¹² Ijko, tejwah akimeh ocho yotikneltokakeh Cristo,
matinemikah kemi Ye kiwelita para ijko weletis kiyektenewaskeh iweyilis. ¹³ Nomejwah,
ononkikakeh n kualitlájtolli de Dios non temakixtia iwa ononkineltokakeh n Cristo Jesús.
Onomechneskayotijkeh iwan Ye, ika Iespíritu Santo non Ye okisentlali kitemakas. ¹⁴ Dios
ika n Espiritu Santo kisentlalia techmakas tlan yotechkakitijka techmakas. Ijkuak Ye kin-
mopejpenis iwa yokitlaxtla totemakixtilis non Ye iaxkawah. Para makiweyijkachiwah
por iweyilis.

Pablo kitlatlaujtia Dios makinmaka ixlamatlistli n tlaneltokakeh

¹⁵ Yika, ne kualitlákmatok nomejwah nonkineltokah n Toteko Cristo Jesús iwa nonkintlasojtlah
akimeh kitlakitah Dios, ¹⁶ amo nimosotlawa nimotiotsajtsilis iwa nimotlasojkamatis por
nomejwah. ¹⁷ Niktlajtlanilia Dios Itajtsi n Toteko Cristo Jesús, n Totajtsi non weyikajtitok,
manomechmaka ixlamatlistli iwa mamotenexti nomotech por iespíritu. ¹⁸ Noiwa nik-
tlajtlanilia Dios manomechtlawili nomotlanamikilis*, iwa ijko nonkimatiskeh tlan para
onomechnotski iwa tlan nomechmakas. Porke weyi iwa mawistik tlan Ye kinmaxkatilis
iaxkawah. ¹⁹ Iwa xikmatika sa weyijtik iweletilis, non amo keman tlamis, non techpalewia
akimeh tikneltokah. Nin weletlistli ye non Dios okitenexti ika miak chikawálistli, ²⁰ ijkuak
okiyolitli n Cristo de kan mikemeh iwa okiyayanti ik iyekma ompa ilwikak. ²¹ Dios okimák
n Cristo weyi tekiwájyotl, iwa okiweyijkatlali ipan nochteh n tekiwajkeh, n tlanawatijkeh,
iwa ipan nochi tlan onka iwa nochi tlan motenewa itech ninteh tonatijmeh, iwa non satapa
witseh. ²² Dios okitlali nochi iikxitla n Cristo, iwa Ye okitlali tlayákanki de nochteh n
tlaneltokakeh non tikmajmana itlapejpenilwah. ²³ Tejawah ye ikuerpo n Cristo iwa Ye n
tlayákanki. Porke ika Cristo nochi ajsitok iwa amitla kipoloo.

2

Dios techmakixtia ika itlasojtlalis

* 1:18 n griego kijtoa ixtolowah de nomoyolo

¹Dios onomechyloliti ijkuak nomejwah ononmiktokah itech nomotlajtlakol. ²Nomejwah ononkichiwayah tlan kichiwah n tlaltikpaktlakah. Ononkichiwayah tlan kiwilita non tlanawatia kan ejekatl, iwa axa kinyakantok akimeh amo kitlakitah Dios. ³Itech oksikimeh tonatijmeh tejwah noiwa ijko otikchiwayah. Otikchijtinenkeh tlan kichiwah n tlaltikpaktlakah, iwa tlan amo kuali otechyoltilanaya. Yika, ika totlajtlakolwah yotikmotlanilijtokah n tlaijyowilistli non kiseliskeh akimeh tlajtlakolchijtinemih. ⁴Pero Dios ken satlawel teiknoma, iwa ken miak techtlasojtla, ⁵maya ok otimiktokah por totlajtlakolwah, Ye okichi matiyolitokah sansikah iwan Cristo Jesús. Yika, Dios otechmakixtikok porke otechtlasojtla. ⁶Dios noiwa otechyoliti sansikah iwan Cristo Jesús, iwa otechyayanti iwan Ye, kan ilwikak. ⁷Ijki okichi, para kiteititis itech tonatijmeh non sikin witseh nenijki saikpanoa techtlasojtla iwa saikpanoa techiknomati por Cristo Jesús. ⁸Yika por itlasojtlalis Dios, nomejwah ononmomakixtijkeh por ononkinetokakeh, amo nomotech kisa, yej porke Dios onomechtliokoli. ⁹Amo onomechmaktilijkeh n temakixtilistli por ononkichiijkeh tlan kuali, para amaka mamoweyili. ¹⁰Tejwah Dios otexchijchi, otexchijchi para matikchiwakah tlan kuali kemi Cristo, Dios ijko yokimajmanka matikchiwakah.

Ika imikilis Cristo, Dios otechtlapojpolwi

¹¹Ijko kiné, nomejwah akimeh amo non judíojeht xikilnamikikah kenomi ononkatkah. Nomejwah akimeh amo nonmixewayotekih, nomechtokayotiah amo non “sirkunsidados”^{*} nekateh akimeh monotsah “sirkunsidados” non san kinmixewayotekih n tlakah, iwa motokayotiah sirkunsidados. ¹²Acho nomejwah mach ononkimatiah n Cristo, nion amo ononkatkah judíojeht, nion ononkimatiah tlan Dios okinmili kinmakas n judíos ijkuak omosenka inwah. Amitla ononkipayah tlan ika nonmoyolchikajtoskiah itech nin tlaltikpaktli nion ononkixmatiah Dios. ¹³Pero axa nomejwah akimeh achto ononkatkah wejka de Dios, axa por iesso Cristo Jesús ya nonkateh íwa. ¹⁴Cristo Jesús otechalikili yolsekilistli: Ijkuak Cristo omikki itech krus okichi kemi yaskia okixitini se tepamitl non okintlajkokelojtokah judíojeht iwa non amo judíojeht porke omokokoliaya, iwa okinseitiliko. ¹⁵Ika imikilis, Cristo okichiwakok mapojpoliwi n tlanawátli non achto otlawatijtoka. De nonteh ome altepemeh san se yankuik altepetl okitlali, non mayeto itech Cristo. Ijko sansikah okinseitili iwa okinyolyankuili n tlakah para mayetokah kemi Ye, iwa makipiakah yolsekilistli. ¹⁶Cristo omikki itech krus para mamotlapojpolwikah iwan Dios nochteh n judíojeht iwa non amo judíojeht, iwa okichi mayetokah íwa kemi yaskia san se kuervo. Ijko Dios okipojpolo n nexikólistli non okipiaya se iwan ok se.

¹⁷Cristo owala iwa okitematilti n kualitlájto de yolsekilistli. Onomechmatilti nomejwah akimeh ononkatkah wejka de Dios, noiwa okinmatilti non amo wejka okatkah. ¹⁸Yika, por Cristo, tijudíojeht noso amo tijudíojeht weletis timijkuanskeh kan Totajtsi Dios san ika se Espírítu. ¹⁹Yika, nomejwah akimeh amo non judíojeht ayakmó nonkateh kemi se non san mokalotiah, yej noiwa nomechaxkatilis nomejwah tlan iaxka n Dios. Axa nomejwah noiwa yononmochijkeh ipilwah n Dios. ²⁰Nomejwah kemi se weyi kali, iwa nontlaxxilitokah itech inltamachtilis n tlatitlánilti iwa n profetas. Cristo Jesús, Ye non okachi weyi tetl, non kitlaxxilijtok non kali. ²¹Iwa kemi nin kali tlaxxilitok itech Cristo, moajkokti iwa moyekiskaltijti asta mamotlamiti se tiokali chipawak para Toteko. ²²Ijko nomejwah ken nonseititokah iwan Cristo, nonnochteh nonmoseitiliah para nonkimajmanaskeh san se kali iwa ompa chantis Dios ika Iespírítu.

3

Dios kititlani n Pablo makinmatilti n kualitlájto non amo judíojeht

¹Ne Pablo, ni tsaktok por onomechmatilti nomejwah akimeh amo judíojeht n kualitlájto de Cristo. ²Nomejwah kualitlájto nonkimatokah, por itlasojtlalis Dios onechmák nin tektil para nomechpalowis. ³Dios onechnextili tlan achto otlaatitoka, iwa onechmatilti, ijko kemi achto yonomechtlajkuilili kech tlájto. ⁴Ijkuak non kiamapoaskeh tlan

* 2:11 insirkunsisos: okintokayotiyah insirkunsisos nochteh non amo okiuawewayotekiah inltakayo.

nomechtlajkuililia, nonkajsikamatiskeh milák nikmati tlan Cristo onechmatilti. ⁵ Semi yowejka, amo okititi nion se taltikpaktlakatl tlan Dios okisentlali kichiwas. Pero axa, ika Iespiritu yokinnextili itlatitlanilwah iwa iprofetajwah yolchipawakeh. ⁶ Iwa ye ni tlan amaka okimatia: n kualitlájtolli de Dios non techmakixtia, techmatiltia nomejwah akimeh amo non judójtch noiwa nomechtlaaxkatiskeh iwan judójtch. Noiwa nomechmatiltia nomejwah ya nonseititokeh itech ikuerpo n Cristo, iwa nonkiseliskeh tlan Dios okisentlali kinmakas akimeh kineltokah Cristo Jesús.

⁷ Dios satlawel onechtlasojtlak iwa ika iweletilis onechtliokoli nin tekittl para maniktematilti n kualitlájtolli. ⁸ Maski amitla nopati innawak n yekmilajkameh non iaxkawah Dios, Ye onechtliokoli nin tekittl para manikinmatilti non amo judójtch n kualitlájtolli non amaka weleti kajsikamati. ⁹ Onechtlali manikinmajsikamatilti n taltikpaktlakah nochi tlan Dios yowejka okitlatijtoka, Ye Akin okichijchi nochi tlan onka.

¹⁰ Axa ijki moneki, nochteh akimeh kineltokah Cristo, makiteixmatiltikah iixtlamatilis, iweletilis iwa ichikawalis Dios, para makixmatikah akimeh tlanawatiah tlakpak.

¹¹ Dios ijki okichi por Toteko Cristo Jesús, kemi Ye yokimolijka kichiwaskia desde ijkuak ayamó okatka n taltikpaktli. ¹² Iwa axa kemi ya tikneltokah Cristo Jesús, timijkuaniah inawak Dios, iwa ayakmitla tikmawiliah por n tlaneltokálistli non tikpiah itech. ¹³ Yika, nomechtlatlaujtia amo ximosotlawakah ijkuak nonnechitah nitlajjowijotok, xiyolpakikah porke non tlajjowílistli nomechpalewis iwa nomechmaka tlakitálistli.

Itlasojtlalis Cristo

¹⁴ Yika, nimotlankuaketsa inawak Dios Itajtsi n Toteko Cristo Jesús. ¹⁵ Akin itech motenewah intokah, kan ilwikak iwa itech taltikpaktli. ¹⁶ Niktlatlaujtia Notajtsi manomechmaka tlan Ye kitlawelpia itech iweyilis, noiwa manomechmaka weletílistli iwa chikawálistli itech nomoyolo por Iespiritu, ¹⁷ para machantito Cristo itech nomoyolo porke ijko nonkineltokah. Ijko nomejwah xitlakxilitokah iwa kuali xinelayotitokah itech nomotetlasojtlalis. ¹⁸ Ijko nomejwah nonweletiskeh nonkajsikamatiskeh iwan nochteh n tokniwah non kineltokah Cristo Jesús, kenijki saikpanoa

patlawak
weyak
wejkatla iwa
wejkapa

itlasojtlalis n Toteko Dios.

¹⁹ Yika, niktlatlanilia Dios, xikixmatikah non tlasojtlálistli, non kipanawia nochi tlan tikixmatih, para ijko nonweletiskeh nonkiseliskeh nochi tlan Dios kipixtok para nomejwah.

²⁰ Matikweyilikah Dios, Akin kipia miak weletílistli para kichiwas okachi miak de tlan tejwah tiktlajtlaní noso tiknejnawiliah por iweletilis non tekitti totech.

²¹ Matikweyijkachiwahak nochipa Dios kan timololoah, por Cristo Jesús tejwah akimeh Ye otéchnotski, por nochteh non sikin tlakatijtiaseh, axa iwa nochipa!

4

N Espiritu Santo techseitilijtok

¹ Ne Pablo, nitsaktok por niktetikilia n Toteko Jesús, nomechtlatlaujtia xiyeknemikah kemi moneki, porke nomejwah Dios onoméchnotski para xiyetokah iaxkawah. ² Nochipa ximoiknelikah iwa xitenotsakah, ximosepanyekwikakah iwa ximosepanxikokah ika tlasojtlálistli. ³ Ximochijchikawakah para n Espiritu maseitito nomowah, ika n yolsewílistli, non seititok nomowah. ⁴ Onka san se kuerpo, iwa onka san se Espiritu, iwa onka san se tlan tikchiah akimeh Dios otéchnotski. ⁵ Onka san se Toteko, san se totlaneltokalis, iwa san se totlakuatekilis. ⁶ San se Todios, iwa Totajtsi tikpiah, Akin tlanawatia totech, Ye tekitti totech iwa kajki itech tinochteh.

⁷ Tinochteh otikinselijkeh tlatliokolilteh non Cristo okinek technimakas. ⁸ Yika itlajkuilol Dios kijtoa:
Cristo otlejkok ilwikak,

okitsakuato tlan otechmapixtoka,
iwa okinmák iweletilis n tlakah kemi se tlatliokólili.

Sal. 68:18

⁹Iwa, ¿tlan kijtosneki “otlejok ilwikak”? Kijtosneki achto otemok nika ipan tlaltlípaktli kan okachi tlawejkatla. ¹⁰Akin otemok, Ye Akin oksepa otlejok ilwikak kan okachi tlakpak, para Ye kitemitis nochi tlan onka. ¹¹Ye inewia okinmajmák sejse inteki, sikimeh okintlali mayetokah tlatitlánilti, oksikimeh profetas, oksikimeh matetlapowikah n kualitlájtohi, oksikimeh okintlali mayetokah tlajpikkeh, oksikimeh temachtijkeh.

¹²Ijkó okinmititi iaxkawah para mawetlekeh matekitikah iwa matikyekiskaltikah ikuervo Cristo, ¹³asta tinochteh matiajsitih matiseititokah itech totlaneltokalis iwa tinochteh matikyekixmatikah Ikone Dios. Noiwa matimoyekchikawakah kemi se tlakatl yekmilajka, ijkó timoskaltiseh iwa timotlamitiweh kemi Cristo. ¹⁴Ayakmó tiyetoskeh kemi tikokoneh, non san kipapatlah intlalnamiikilis ijuak kikakih itla ok se yankuik tlamachtitlistli, iwa kimokawiliah makinkajkawakah nekateh akimeh kinekih kinkuatlapololtiseh para kinwikaskeh itech oksikimeh ojmech non amo kualteh. ¹⁵Nochipa matitetlapowikah tlan milák ika totlasojtlalis, iwa ijkó timoskaltijtiaseh iwa n Cristo porke Ye itsonteko n kuervo. ¹⁶Iwa por Cristo nochi n kuervo moseitilijtih iwa mosalojtiweh nochteh n omimeh. Iwa ijuak nochi kualit tekutih, kualit moskaltijtih iwa mochikajti ika tlasojtlálistli.

Cristo okichi matiyolitokah nochipa

¹⁷Ye ni tlan nomechnawatia itech Itoka n Toteko Jesús: Ayakmó xinentinemikah kemi nemih akimeh amo kineltokah Dios, porke yejwah moixpolojtinemih itech tlan amo kualit kiyejekoliah. ¹⁸Intlalnamiikilis kajki kan tleuálistli, yejwah amo kipiah n nemilistli non Dios kitemaka, porke oyoltlakuawakeh, yika, amo kajsikamatih tlan Dios kineki makichiwakah. ¹⁹Yejwah ayakmó pinawah iwa yomosenkajkajkeh itech tlan kelewia, iwa amo ixwih kichijtinemiseh nochi tlan teyolijtlakoa. ²⁰Pero nomejwah amo ononkixmatkeh n Cristo para axa ijkó nonkichijtinemiseh. ²¹Tla de milajka ononkikakeh n Jesús, iwa onomechmachi, nomejwah ononkajsikamatkeh Ye kijtoa tlan milák. ²²Kemi yonomechitijkeh, xikkawakah tlan achto ononkichijtinemih, porke nochi noni onomechixpoloaya iwa onomechyolijtlakoa ika tlan okelewiaya nomokuervo, ²³iwa xikyankuilikah nomoixtlamatilis ika nomoespíritu. ²⁴Ijkó ximoyolpatlakah, ika se yankuik nomonemilis kemi Ye inewia yetoskia ika se nomonemilis chipawak iwa yekmilajka.

²⁵Yika, ayakmó ximokajkawakah, yej nochipa xikijtokah tlan milák, porke tinochteh titeaxkawah itech ikuervo Cristo.

²⁶Tla nonkualanih, amo xitlajtlakolchiwakah. Amo xikkawilikah makalaki n tonati iwa nomejwah ayamó nonmoyolsewiah. ²⁷Amo xikkawilikah n diablo manomechkajkawaki para nonkichiwaskeh tlan amokuali.

²⁸Akin otlachtekia, ayakmó matlachteki, yej mapewa matekiti ika imawah para makipia tlan ika kimpalewis akimeh kimpolaa.

²⁹Amo xikimijtokah tlájtoltel pitsotikeh, yej xiktenewakah kualit tlájtoli tlan ika kinyolchikawas, kimpalewis iwa kintiochikas akimeh kikakih non tlájtoli. ³⁰Amo xikchiwakah mamoyolkoko Iespíritu Santo n Totajtsi Dios, porke ika n Espíritu onomechneskayotijkeh kemi iaxkawah Dios, asta ijuak ajsiki n tonati ijuak Ye nomechselis non yolchipawakeh.

³¹Xikkawakah nochi tlan nomechkuejsoa, iwa nomotlawelitalis, ayakmó ximotsatsajtsikah, nion ximowijwikaltikah, iwa xikmokixtilikah nochi tlan amokuali. ³²Moneki xiyetokah nonkualtentlakah iwa xiteiknomatikah. Ximosepantlapojpolwikah ijkó kemi Dios otechlapojpolwi por Cristo.

5

Kenomi kipiah de yeknemiskeh ipilwah n Dios

¹ Nomejwah akimeh ya nontepilwah de Dios, ximilajkanemikah kemi Ye yekmilajka. ² Nochipa xitetlasojtlakah kemi Cristo otechtlasojtlak, iwa omotemakti para makimiktikah topatka kemi se tlamánali ajwiak inawak Dios.

³ Kemi nomejwah ya nonchipawakeh inawak Dios, ayakmó xikintenewakah akimeh momekatiah, nion itla ok se tlajtlákoli, noso akimeh kitlawelneki kipiaskah tomi. ⁴ Amo xipitsotlajtokah ika tlan tepinati, nion xikinmijtokah tlájtoltel non amo milajkameh, porke ayakmó technamiki ijko titlajtojtinemiskeh, yej nochipa ximotlasojkamatikah inawak Dios. ⁵ Porke ya nonkimatokeh, tla aka momekatia, noso kichijtinemi tlajtlákoli, noso kitlawelneki tomi, kijtosneki kemi kiweyilijtoskia se “dios” non san kimachijchiwah, nochteh akimeh ijko kichiwah, amo kalakiskeh kan tlanawatia Cristo iwa Dios. ⁶ Amaka manomechkajkayawa ika tlájtoltel non amitla impati, porke ikualanilis Dios, wits ipan nochteh akimeh kichiwah tlajtlákoli, iwa amo tetlakitah. ⁷ Yika, amo ximonelokah, inwah akimeh ijko kichiwah.

⁸ Itech oksikimeh tonatijmeh nomejwah ononnemimah kan tleyua, pero axa ya nonnemih itech tlawilnextlistli, porke Toteko Dios nomechyakantinemi. Yika, xiyeknemikah kemi non ya kipiah itlawil n Toteko Dios, ⁹ porke itlawil Dios techyolpatla, iwa kichiwa matitetlasojtlakah, matikijtokah tlan milák iwa matiyetokah timilajkameh. ¹⁰ Yika, xikmatikah tlanón kipaktia n Toteko. ¹¹ Amo xikchiwahak tlan amo tepalewia non kichiwah akimeh nemih kan tleyua, okachi kuali xikinmilikah amokuali tlan kichiwah. ¹² Porke satlawel tepinati tiktenewaskeh tlan yejwah kiichtakachijtinemih. ¹³ Pero nochi tlan kitlawilia n tláwili, mota kenijki kajki. ¹⁴ Porke n tláwili kichiwa mamota nochi. Yika kijtoa:

Xiijsa te non tikochtok

ximewa te non tika kemi timiktok,

iwa Cristo mitstlawilis itech monemilis.

Is. 60:1

¹⁵ Ijko kiné, ximotlachilikah kenijki nonnentinemih. Amo xinemikah kemi non amitla kinekih kajsikamatiskeh, yej xiyeknemikah kemi non ya kixmatih itlajtol Dios. ¹⁶ Yika xikintiotilikah n tonatijmeh iwa nochipa xikchiwahak nochi tlan kuali kemi Dios kinonekiltia, porke itech ninteh tonatijmeh yomomiakili tlan amokuali. ¹⁷ Xitlalnamiaktokah para ijko nonkajsikamatiskeh tlan Dios kinonekiltia xikchiwahak. ¹⁸ Amo ximotlawantikah, porke noni teixpoloa, okachi kuali, matemi nomoyolo ika n Espiritu, para ye manomechyakana. ¹⁹ Ximosepanyolchikawakah iwa xikintlakuikakah salmos, tlauíkalteh, tiotlakuikálisteh, iwa xikweyilikah n Toteko Dios ika nochi nomoyolo. ²⁰ Nochipa matimotlasojkamatikah inawak n Totajtsi Dios por nochi tlan nonkiselijtokeh, itech Itoka n Toteko Cristo Jesús.

Kenomi moneki mamoyekwikakah non yomonamiktijkeh

²¹ Ximosepantlakitakah, ijko motas milák nonkitlakitah Cristo.

²² Nomejwah siwameh, moneki xikmokawilikah manomechyakana nomookich, ijko kemi nonmotekawillah manomechyakana n Toteko Cristo. ²³ Porke n tlakatl ye akin kiyakanas isiwa, ijko kemi Cristo kinyakana akimeh kineltokah, noiwa Ye Akin kinmakixtia n tokniwah non kineltokah iwa kimajmanah ikuerpo. ²⁴ Ijko kemi non Dios okimpéjpenki kitlakitah Cristo, ijko noiwa n siwameh moneki makitlakitakah inmokich.

²⁵ Tlakatl non yotimonamikti, xiktlasojtla mosiwa, ijko kemi Cristo otechtlasojtlak tejwah non Dios okimpéjpenki iwa omotemakti para makimiktikah por tejwah. ²⁶ Iwa Ye okinmoyolchipawili ika atl, non atl ye itlajtol, ²⁷ para techixpantis ipxa, tejwah non Dios okimpéjpenki kemi se tiopa non tsotlantok, chipawak amo xojxolochtik nion itla ok se non makijtlako, ijko Ye kinéki matietokah tichipawakeh iwa amo matikiapakah tlajtlákoli.

²⁸ Noiwa moneki n tlakatl makitlasojtla isiwa, kemi ye inewia kitlasojtla ikuerpo. Porke akin kitlasojtla isiwa, noiwa ye motlasojtla. ²⁹ Porke amaka kikokolia ikuerpo, yej kimalwia iwa kitlakualtia. Ijko noiwa kichiwa Cristo inwah non kimajmanah ikuerpo. ³⁰ Tejawh tikmajmanah ikuerpo n Cristo. ³¹ Yika itlajkuilol Dios kijtoa: “N tlakatl kikajtewas ita iwa

ina iwa moseitilis iwan isiwa. Ijkó n tlakatl iwan siwatl mochiwaskeh sa se kuerpo.” *Gn. 2:24* ³²Nin tlájtoli, owi moajsikamati, pero ne nitlajtojtok de Cristo iwa de non moololoah itech Itoka. ³³Ijkó noiwa, nochi tlakatl makitlasojtla isiwa kemi ye inewia motlasojtla, iwa n tesiwa noiwa makitlakita iokich.

6

Tepilwah iwa tetajmeh

¹Tepilwah, xikintlakitakah nomotajwah, porke ijkó otlanawati Dios. ²“Xiktlakita mopapá iwa xiktlakita momamá,” ye n achto tlanawátili non kipia tiochiwálistli, ³“ijkó tikpias miak pakílistli iwa tiyolitos miak xiwitl itech nin tlali.” *Éx. 20:12; Dt. 5:16*

⁴Nomejwah tetajmeh, amo xikinkuakualanikah nomopilwah, yej xikinyekiskaltikah ika tlanonotsálistli iwa ika itlajtol n Toteko.

⁵Nomejwah akimeh nomechpixtokeh kemi tlanémakteh,* xiktlakitakah nomoteko iwa xikijmakajsikah. Xiktektilikah ika nochi nomoyolo kemi non kitekilitiskia Toteko Cristo Jesús.

⁶Amo xiyektekitikah sanwel ijkuak nomoteko nomechalitok, san para nonmokawaskeh kuali inawak, yej kuali xikchiwakah nomoteki kemi nontekitkeh de Cristo, iwa ijkó nochipa xikchiwakah ika paklistli tlan Dios kimonekiltia. ⁷Xikchiwakah nomoteki ika paklistli, kemi nonkitekilitijoskiah n Toteko Cristo, iwa amo xikmolikah titekítitokeh san para se tlakatl. ⁸Porke ya nonkimatokeh tla aka tlanémaktli noso amo tlanémaktli, n Toteko kitlaxtlawis tla kichiwas tlan kuali.

⁹Iwa nomejwah tekowajkeh, noiwa moneki ijkó xikchiwakah iwa nomotekitwah, iwa amo san xikinmomojtjtokah. Xikilnamikikah nomejwah iwa yejwah nonkipiah san se Nomoteko itech ilwikah, iwa Dios amo san se kitlawelita iwa ok se amó.

N chikawálistli non Dios techmaka

¹⁰Nokniwah, Ximochijchikawakah itech ichikawalis n Toteko Cristo. ¹¹Ximopalewikah ika iweletilis non Dios nomechmaka, iwa ijkó weletis nonkitlaniskeh n amokualitlakatl ijkuak kinakis nomechkajkayawas. ¹²Porke amo timotekilmakatokeh iwan tlakah non kipiah inesso kemi tejwah, yej iwan espíritus amokualteh non nemih tlakpak, iwa kipiah weletlistli. Yejwah kinnawatjtokeh akimeh kichijtinemih tlan amokuali ken nemih itech tleyuálistli. ¹³Yika, xiktekiltikah n chikawálistli non Dios onomechmák ika nontlaxikoskeh ijkuak wits n tonati ijkuak nomechyoltlanaki n amokualitlakatl, iwa ijkó xiktlanilikah iwa ximochikawakah iwa ximoyekketokah. ¹⁴Ijkó kiné, ximoyekketokah, ximotlajkotelinikah ika n milák tlájtoli, iwa xitlakentitokah kemi ijkuak se soldado konakia ikoto de tépostli para makipalewi. ¹⁵Sa ximokaktikah para nontetlapowitiweh de n kualitlájtohi non techmaka yolseklistli, ijkó kemi mokaktia se soldado ijkuak yawi motekilmakati. ¹⁶Noiwa xikpiakah nomotlaneltokalis kemi se tépostli non ika nonmopalewiskeh iwa nonkiksakuiliskah ijkuak n diablo nomechmojtmas ika kuawitl non xotlatok. ¹⁷Ximokuaonakiltikah n tépostli non ika timomaxixtia, noiwa xikpiakah itlajtol Dios kemi se espada non techmaka n Espiritu Santo. ¹⁸Nochipa ximotiotsajtsilikah, iwa n Espiritu Santo manomechyakana ijkuak nonmotlatlajutiskeh iwa nonkitlajtlaniliskah Dios manomechpalewi. Ixmostla ximosepantiotsajtsilijtokah iwa amo ximosotlawakah, yej nochipa xiktalajtlanilikah Dios makimpalewi nomokniwah non iaxkawah Dios. ¹⁹Noiwa xiktlatlajutikah n Toteko manechpalewi, iwa manechinmaka tlájtoltel ijkuak monekis nitetlapowis. Iwa manechmaka yolchikawálistli iwa maniweleti manikinteajsikamatilti non amo kixmatih de n kualitlájtohi. ²⁰Dios onechtflanki manitetlapowiti de n kualitlájtohi de Dios non techmakixtia non ika axa onechtsakeh. Ximotiotsajtsilikah manimoyolchikawa manitetlapowi nin kualitlájtohi kemi moneki.

Pablo iksemi momakawa

* ^{6:5} Achto ijkuak n tlakah okitewikiliyah miak tomi iwa ayakmó oweletiah okikopayah omotemaktiyah esclavos.

²¹Tokni Tíquico totlasoj, se kuali tepalewi itech iteki n Toteko nomechmatiltis kenomi nika iwa tlan nikchijtok. ²²Yika nomechtitlanilia para manomechili kenomi tikateh, iwa manomechylchikawa.

²³Dios Totajtsi, iwa n Toteko Cristo Jesús makinmakakah n tokniwah yolsewílistli, tlasojtlálistli iwa tlaneltokálistli. ²⁴Dios makintiochiwa nochteh akimeh milák kitlasojtlan n Toteko Cristo Jesús, ika tlasojtlálistli non ayik tlami.

San Pablo kintlajkuililia non de Filipos

Pablo kan tsaktok, kintlajkuililia n tlaneltokakeh de Filipos

¹ Ne Pablo iwan tokni Timoteo, tlakéwalteh de Cristo Jesús, tomechtlajpaloah akimeh tlayakanah, iwa nochteh akimeh nomechpalewiah, non chantitokeh Filipos. Nomejwah iaxkawah Dios iwa nonseititokeh iwan Cristo Jesús. ² Totajtsi Dios iwa n Toteko Cristo Jesús manomechmakakah inkualtilis iwa inyolsewilis.

Pablo motiotsajtsilia por akimeh kineltokah Cristo Jesús

³ Nochipa nimotlasojkamati inawak Dios keman nomechilnamiki, ⁴ iwa nochipa keman nimotiotsajtsilia por nomejwah, nikchiwa ika pakilistli. ⁵ Porke desde ijkuak ononkiselijkeh n kualitlájtolli non temakixtia, nomejwah nontekititiwitseh nowa, para makikakikah n kualitlájtolli. ⁶ Kualí nikmatok Dios Akin opé kichiwa se kualí tekitl itech nomoyolo, kiyekchijτίας asta ijkuak Cristo Jesús oksepa walmokopas. ⁷ Ijkó nikyejyekolia de nomejwah, porke nochipa nomechwikatinemi itech noyolo, iwa sansikah tikseliah itlatiochiwalis Dios, maya nitsaktos, noso ijkuak nika inmixpah n tekiwajkeh niknextia n kualitlájtolli non tlajtoa de nochi tlan milák. ⁸ Dios kualí kimatok kenijki nomechtlasojtla ika nochi noyolo kemi Cristo Jesús nomechtlasojtla. ⁹ Ne niktalajtlania Dios keman nimotiotsajtsilia xikpiakah okachi miak tlasojtlálistli, iwa xikpiakah okachi ixtlamatílistli iwa tlanamikílistli. ¹⁰ Ijkó nochipa nonkimatiseh ken ijki nonkipejpenaskeh tlan okachi kualí. Ijkó weletis nonkipiaskeh se nemílistli chipawak, ijkó amaka weletis itla nomecht-lajtlakoltis itech neká tonati keman Cristo wits.

Ap. 20:11 ¹¹ Ijkó

Cristo nomechpalewis. Nochipa xiweletikah xikchiwakah tlan kualí, iwa ijkó Dios kiselis iweyilis iwa kualí kiyektenewaskeh.

Ne sanwel niyolitok para Cristo

¹² Nokniwah, nikneki xikmatikah, nochi n tlaijyowílistli tlan itech yonipanok, okachi okipalewi mamoxitini n kualitlájtolli. ¹³ Yika, n soldados non kimokuitlawijtokeh n palasio iwa nochteh oksikimeh kualí kimatokeh ne nitsaktok porke nitetlapowia de itlajtol Cristo. ¹⁴ Iwa kemi okimatkeh nitsaktok, miakah tokniwah tlaneltokakeh, omoyolchikajkeh tetlapowiskeh de itlajtol Dios, iwa asta ayakmó mawi.

¹⁵ Milák, sikimeh kitetlapowiah itemachtilis Cristo san por xikojmkih nowa iwa kinekih nechixpanawiskeh, pero oksikimeh kitemachtiah ika kualí inyolo. ¹⁶ Ninteh tetlapowiah de Cristo ken milák kitlasojtlah. Yejwah kualí kimatokeh nitsaktok por oniktetlapowia itlajtol Cristo. ¹⁷ Pero oksikimeh tetlapowiah de itlajtol Cristo san por kinekih nechixpanawiskeh. Yejwah kinekih okachi manimoyolkoko nika kan nitsaktok. ¹⁸ Amo tleno, tla yejwah tetlapowiah ika kualí noso amó, ne nochipa nipaktos, porke yejwah tetlapowiah de Cristo.

Iwa okachi niyolpaki, ¹⁹ ken kualí nikmati nimakisas, ken nomejwah nonkitlajtlani-ijtokeh Dios manechpalewi, iwa Iespíritu Cristo Jesús noiwa nechpalewia. ²⁰ Ne amo niknekiskia nikchiwas itla tlan ika nimopjpinatis, yej okachi manimoyolchikawa para niktetlapowis itlajtol Dios, para mamotenexti notech iweyilis Cristo, maya tla ok niyolitos noso nechmiktiseh. ²¹ Tla ne niyolitos, niyolitos para Cristo. Iwa tla ne nimiki nikselsi notlatliokolil. ²² Pero tla ok niyolitos itech nin kuerpo, okachi miakah weletis nikinyakanas inawak Cristo, yika mach ok nikmati tlan okachi kualí. ²³ Iwa amo nikmati tlan okachi nikmonekiltia: kualchiwa niknekiskia manimiki para maniyeto iwan Cristo, noni okachi kualí. ²⁴ Pero nomonawak, okachi kualí maniyolito. ²⁵ Iwa axa ne ya nikmatok moneki manomechpalewi, yika nikneki niyolitos para manomechpalewi ximoskaltikah iwa xikpiakah pakílistli itech nomotlaneltokalis. ²⁶ Yika ijkuak oksepa nomowah nietos, nomejwah okachi nonkiweyiliseh n Cristo ijkuak oksepa nomowah nietos.

²⁷ Yika, nomejwah xiyeknemikah kemi akimeh yokiselijkeh n kualitlájtohi. Ijkó tla ne nias nomechontlajpaloti noso wejka ninemis, ne nikneki nikkakis nonmilajkanemih sansikah iwa nonkipiah san se nomoyolo. Iwa nikneki nikkakis nontekitih san ika se tlamachtlístli para oksikimeh makineltokakah n kualitlájtohi. ²⁸ Iwa amo xikmotekawilikah manomechmomojtikah akimeh nomechkokoliah, porke ijkuak nomechkokoliskeh por nontetlapowiah n kualitlájtohi, yejwah kitenextiskeh moixpolojtokeh, pero nomejwah nomechmakixtis. Ye wits de Dios. ²⁹ Ken Dios okimonekilti xitlaneltokakah inawak Cristo, yej noiwa okimonekilti xitlajjowikah por Ye. ³⁰ Nomejwah ya nonkimatokeh kenijki se tlajjowia, iwa axa yononkikakeh nitlajjowijtinemi.

2

Cristo omoiknoma iwa Dios okiweyili

¹ Tla Cristo nomechyolchikajtok, tla itlasojtlalis nomechyolsewia, tla Iespíritu nomechyakantinemi, tla milák nontetlasojtlah iwa nonteiknomatih, ² xikchiwahak maniy-olpaki. Ximoyekwikakah non nochteh. Ximosepantlasojtlakah, iwa ximokuanamikikah keman itla nonkichiwaskeh. ³ Amitla xikchiwahak san por aka nonkinekih nonkixpanawiskeh, noso para manomechweyilikah, yej ximoiknomatikah tenawak, iwa xikinmitakah n oksikimeh kemi okachi weyijkatitokeh. ⁴ Amaka makimotemoli san tlan ye kipalewia, yej makitemo tlan ika weletis kimpalewis oksikimeh. ⁵ Xikpiakah nomotlayejyekolis ijko kemi Cristo okípixki, ijkuak owala itech nin tlaltípkaktli.

⁶ Maya Cristo noiwa Dios,

amo omochijchika makiweyilikah kemi Dios,

⁷ yej okika nochi tlan okipiaya,

iwa omochiwako kemi se tetlakewáli,

Ye otlatatki kemi tlakatih n tlakah itech nin tlaltípkaktli.

⁸ Ijkuak yomochiwako tlakatl,

omoikneli inawak Itajtsi Dios

iwa okitlakitak asta imikilis,

iwa omikki itech se krus.*

⁹ Yika, Totajtsi Dios okiweyijkatlali,

iwa okimák se Itoka non okachi weyi ke oksikimeh intokah,

¹⁰ ijko, ijkuak kitenewaskeh Itoka n Jesús, mamotlankuaketsakah nochteh akimeh kateh ilwikak,

akimeh nemih ipan tlaltípkaktli,

iwa akimeh kateh itlampa tlali.

¹¹ Ijko nochteh makiyekixmatikah

iwa makimokuitikah Cristo Jesús Ye Inteko,

iwa ijko Totajtsi Dios makiseli weyílistli.

N tlaneltokakeh tláwilteh itech nin tlaltípkaktli

¹² Notlasojikniwah, ijko kemi nochipa nonnechtlakitah ijkuak nika nomowah, okachi techtlakitakah axa maya wejka nika. Xikmosenmakakah itech nomotemakixtilis ika miak tetlakitálistli iwa mawílistli. ¹³ Porke Dios Ye akin nomechtlalilia itech nomoyolo tlan kuali nonkichiwaskeh, iwa nomechpalewia xikinchiwahak, ijko kemi Ye kimonekiltia.

¹⁴ Kikyekchiwahak nometekih iwa amo ximoixtokatokah, ¹⁵ para amaka manomechtlajtlakolti, intsalko n amokualteh iwa n tlajtlakolchijkeh, xiyeknemikah para manomechitakah milák ipilwah Dios. Nomejwah nontlawiah kemi n sítlalteh ixpa n tlaltípkaktlakah.

¹⁶ Nonkinnextilia n kualitlájtohi non ika yolitoskeh nochipa. Iwa ijkuak Cristo wits, satlawel nipakis porke nikmatis amo sanenka onitekitik nomowah. ¹⁷ Iwa maya manechkixtilikah noyolilis, ika mamaojxiti n tlanamali non nomejwah nonkimanilia Dios ika nomotlaneltokalis, ne nipaki iwa nipaki nomowah. ¹⁸ Nomejwah noiwa xiyolpakikah iwa xipaktokah nowa.

* 2:8 Krus: satlawel tepinati keman se tlakatl okipiloayah itech se krus para ompa mamiki

Timoteo iwa Epafrodito yawih Filipos

¹⁹ Tla Toteko Cristo Jesús kimonekiltis, san nima niktitlanis n Timoteo manomechonitani. Ne nipakis ijkuak nechmatiltis kenijki nonkateh. ²⁰ Porke sanwel Timoteo satlawel motlamia por nomejwah kemi ne. ²¹ Nochteh n oksikimeh okachi kintekipachoa san tlan yejwah kinekih iwa amo tlan Cristo Jesús kimonekiltia. ²² Nomejwah kual nonkimatokeh kenijki yektekiti n Timoteo, iwa nonkimatokeh noiwa kenijki onechpalewi kemi se tekone non kipalewia ita, ijkuak otitetlapowijkeh n kualitlájtolí. ²³ San manikmatí tlan kichiwaskeh nowa nomechontitlanilis n Timoteo. ²⁴ Malki kualí níkmatok Dios nechkawilis manomechontlajpaloti san nima.

²⁵ Ne nikyejekolia, kualiká noiwa manomechontitlanili n tokni Epafrodito, akin nomejwah ononkualtitlankeh manechpalewíki itech tlan monekis, iwa ye otekítitfínenki iwa otlajjowijtinenki nowa kemi se soldado. ²⁶ Ye san okinektoka yas nomechitani, iwa omotekipachojtinemia ken nomejwah ononkimatkeh ye chikawak omokokoaya. ²⁷ Iwa milák chikawak omokokoaya, iwa ya mikiskia. Pero Dios okiknoma, iwa amo san ye okiiknoma, yej ne noiwa onechiknoma, yika okipajti para ne noiwa ayakmó okachi manimoyolkokojtinemi. ²⁸ Yika axa sannima níkneki nomechontitlanilis n Epafrodito, para xiyolpakikah ijkuak oksepa nonkitaskeh. Iwa ne ayakmó okachi manimotekipachojtinemi. ²⁹ Xikselikah ika pakílistli kemi nonkinseliah nochteh n tokniwah non kateh iwan Toteko Jesús, iwa nochipa xikintlakitakah akimeh nemih kemi ye. ³⁰ San ika achitsi ya mikiskia por okitekítitljotoka Cristo, iwa onechpalewíki itech tlan nomejwah amo ononweletkeh nomonewiah ononkichiwakoh.

3

Sanwel itech Cristo níktlajtok notlachialis

¹ Axa nokniwah, xipakikah itech Toteko. Ne amo nimosotlawa tla oksepa nomechijkuililis tlan yonomechijkuilili, porke níkmatok kualí nomechchikawas nomejwah. ² Ximotlachilikah de n tlakah amokualteh, non ken chichimeh.* Yejwah tlamachtiah iwa kijoah moneki nonmosirkunsidaroskeh para Dios weletis nomechmakixtis. ³ Porke tejwah milák tisirkunsidaritokeh itech toyolo, amo yejwah. Tejwah tikweyijkachiwah Dios ika n Espíritu, tipakih porke titeaxkawah de Cristo Jesús, iwa amo tíktlalia totlaneltokalis itech ichikawalis aka tlakatli. ⁴ Ne noiwa níkipia tlan ika weletis nimoweyilis. Tla aka kichiwaschia itla tlan ika momakixtiskia, ne okachi. ⁵ Onechsirkunsidarojkeh ijkuak onikipiaya chikweyí tonati de onitlakatki. Ne ni tlakatli de Israel, iwa ne iwejkaixwi n Benjamín. Ne milák ni hebreo notajwah hebreos. Iwa ne fariseo, iwa onikmopantiaya intlanawatilis n judíos.† ⁶ Ne onikchawatiliaya notlanawatilis, yika onikintotojtokaya akimeh okineltokayah Cristo. Satlawel onikmopantiaya n tlanawatílistli, yika amaka itla onechiliaya. ⁷ Yika, nochi noni tlan achto itech onimoweyiliaya, axa níkajsikamati amitla ipati ipa Cristo. ⁸ Iwa nochi tlan achto onikmoliaya ipati, axa níkiti mach itla ipati porke yonikixma Noteko Cristo Jesús Akin kipanawia nochi tlan onikmoliaya ipati. Por Cristo, nochi tlan onikpixtoka yonikpolo. Porke níkiti nemi tlájsoli, yika axa nimochijchikawa níkmotlanilis n Cristo ⁹ para íwa níseititos. Axa Dios nechyekselia, amo por oniktlakitak n tlanawatílistli, yej onechylchipa por onikneltokak Cristo. ¹⁰ Níkneki okachi níkyekixmatis n Cristo, iwa níkneki níkixmatis n weletílistli non Ye okípíxki ijkuak omoyoliti de kan mikemeh. Noiwa níkneki nítlajjowis kemi Ye otlajjowí maya manechmiktikah kemi Ye. ¹¹ Porke ne noiwa níkneki nímayolitís ijkuak moyolitískeh non yomikkeh.

Matimochijchikawakah tíkalakitiweh kan Dios moitstika

¹² Amo yonikajsik nochi tlan onikséntlali níkajsis, nion satlawel ya níyolchípawak. Pero nimochijchikawa weletis níkajxilís níyolitós nochipa íjkó kemi Cristo onechajsik.

* 3:2 N judíojeht okinnotsayah nochteh non amo judíojeht 'chichimeh'. Pablo kinteilia yejwah innewiah kateh kemi 'chichimeh'. † 3:5 Fariseos: Se partido de akimeh okitlakitayah iwa semi okimopantiayah itlanawatil Moisés iwa nochi tlan yejwah okajxitilijkah. Iwa okintoktiayah n oksikimeh makitlakitakah tlan yejwah otlamachtiah.

¹³ Nokniwah, amo nomechilia yonikalakito kan onikneka nikalakiti. Pero ne axa nikmosenmaka tlan nikita okachi ipati, iwa ye ni tlan ne nikchiwa, nikilkawa nochi tlan omoka tlakuitlapa, iwa nikmosenmaka nikajisiti tlan yonikitak tlayakapa. ¹⁴ Nikneki nikyektlamis noteki non Dios onechmák para weletis nikselsis notlatliokolil non Ye techmajmakas kan ilwihak por tikateh iwan Cristo Jesús.

¹⁵ Yika, tinochteh akimeh yochikawak totlaneltokalis, moneki ijko matikyeyjekolikah. Iwa tla seme de tejwah ok se kiyeyjekolia, Dios kajsikamatiltis. ¹⁶ Ijko kiné, tlan yotikajilijkeh moneki matimoajsikamatikah iwa nochipa matiyeknemikah ijko kemi ya tikyechijtiwitseh.

¹⁷ Nokniwah, xinemikah kemi ne niyeknemi, iwa xikchiwahak tlan kichiwah akimeh yeknemih, ijko kemi tejwah otomechmachtijkeh. ¹⁸ Ne yonomechilijtiwalaya, iwa axa nichoka keman oksepa nomechilia, onkateh miakeh akimeh kitlawelitalah ikrus n Cristo kemi yetoskia amitla ipati. ¹⁹ Ninteh kimpopoloskeh. N dios de yejwah sanwel tlan kelewia, iwa moweyiliah ika tlan tepinati. Sanwel kinekih kipiaskah tlan onka itech nin tlatltpaktli. Yika kimpopoloskeh. ²⁰ Pero tejwah, tocha kajki ilwihak, iwa sa tikchixtokeh ika miak pakilistli mawalmokopa Totemakixti, Ye Toteko Cristo Jesús. ²¹ Ye kiyankuilis tokuerpo non mikki, iwa techmakas se yankuik kuerpo mawistik kemi non de Ye. Cristo kipia weletilistli para ijko kichiwas, porke Ye weleti kichiwa makitlakita nochi tlan onka.

4

Nochipa xipakikah itech Toteko

¹ Yika, notlasojkniwah non satlawel nomechilnamikih, nomejwah nopakilis iwa notlatliokolilwah, nochipa ximochikawakah inawak Toteko.

² Niktlatlaujtia n Evodia iwa n Sintike mamoyekwikakah kemi iknimeh inawak Toteko.

³ Iwa te Sísigo, nokni non nochipa otechpalewijtinenki, nimitstlatlaujtia xikinpalewi n Evodia iwa n Sintike. Yejwah chikawak otekitikeh nowa ijkuak otiktematiltijkeh n kualitlajtoli sansikah iwa n Clemente iwa n oksikimeh tokniwah. Intokah ya ijkuilitok itech Amatljakuiloli kan machiotitokeh akimeh kiseliskeh Yolilistli. *Ap. 20:12*

⁴ Nochipa xipakikah itech Toteko. Oksepa nomechilia: ¡Xipakikah itech Toteko!

⁵ Nochteh manomechixmatikah non teajsikamatkeh. N Toteko Jesús ya wits.

⁶ Amitla manomechtekipacho, yej nochipa xikilikah n Toteko tlan nonkinekih keman nonmotiotsajsiliah, xiktlatlanilikah iwa ximotlasojkamatikah. ⁷ Iyolsewilis Dios, non amaka weleti kajsikamati, kimokuitlawis nomoyolo iwa nomotlayeyjekolis por Cristo Jesús.

Nochipa xikilnamiktokah tlan kuali

⁸ Nokniwah, ye ni tlan sa iksemi nikneki nomechilis: nochipa xikpixtokah itech nomotlamachilis

tlan milák,
tlan kipia nonkitlakitaskeh,
tlan mijmilaktik,
tlan chipawak,
tlan teyolpakti iwa
tlan moneki se kiyektenewas.

Xikilnamikikah nochi tlan kuali iwa tlan moneki se kuali kiyektenewas.

⁹ Xikchiwahak tlan onomechmacht, tlan onomechnajnewati, tlan onomechili iwa tlan ononkitakeh onikchi: ijko xikchiwahak, iwa Totajtsi Dios Akin kichiwa matikpiakah yolsewflistli, yetos nomowah.

Pablo kintlasojkamati akimeh okipalewijkeh

¹⁰ Ne satlawel nipaki inawak Toteko ken oksepa ononnechilnamikah. Kuali nikmatok nomejwah ayik ononnechilkajkeh iwa ononkinekiah nonnechpalewiskeh, pero amo ononkimatiah kenomi. ¹¹ Amo ijki nomechilia porke nechpoloa. Ne nipaki san ika tlan nikpia. ¹² Nikmatok kenijki nipanos ijkuak onka san achitsi noso ijkuak onka miak. Noiwa

nikmati kenijki nikchiwas ijkuak niajapismiki noso niixwitok, iwa amo nechmojtia tla niktlawelpias noso tla amitla nikpias. ¹³Nochi weleti nikchiwa, ken Cristo nechmaka chikawálistli. ¹⁴Maski ijko nomejwah kual ononkichijkeh ijkuak ononnechpalewijkeh itech notlajjowilis.

¹⁵Ijkuak opé niktematiltia n kuali tlájtoli, nomejwah nokniwah de Filipos kuali nonkimatokeh sanwel nomejwah ononnechpalewijkeh ika siki tomi, iwa nion aka ok se onechpalewi. ¹⁶Ijkuak onichanchiwaya Tesalónica, nomejwah miak welta ononnechtitanilijkeh tlan ika manipano. ¹⁷Amo niktemoa techmakakah tlan ika nipanotos, yej nikneki xikmiakilikah nomotlatliokolil ixpa n Dios. ¹⁸Ne axa ya nikpia nochi tlan onechpoloaya, iwa ika tlan Epafrodito ononkimakakeh manechmaktiliki, ayakmitla nechpoloa. Tlan nomejwah ononnechmakakeh Dios kipaktia, iwa kiselia kemi se ajwiálistli non kualtsi ajwiak. ¹⁹Notajtsi Dios nomechmakas nochi tlan nomechpoloa, ika iweyilis non Ye kipia itech Cristo Jesús. ²⁰¡Nochipa matikweyijkachiwakah Totajtsi Dios! Ijko mamochiwa.

Pablo momakawa

²¹Xikonintlajpalajtikisakah nochteh n tokniwah yolchipawakeh itech Cristo Jesús. N tokniwah non kateh nowa noiwa nomechtlajpaloah. ²²Nochteh non nika kateh iwa teaxkawah inawak Dios, nomechontlajpaloah, iwa okachi n tokniwah non tekititokeh icha n César.

²³Itlasojtlalis n Toteko Cristo Jesús mayeto nomowa iwan nomoespíritu.

San Pablo kintlajkuililia non de Colosas

Pablo kintlajkuililia n tlaneltokakeh de Colosas

¹ Ne Pablo, Dios okimonekilti maniyeto itlatematilti n Cristo Jesús. Ne iwa n tokni Timoteo, ² nomechtlajkuililia nomejwah tokniwah de Colosas akimeh nontexkawah inawak Dios:

Dios manomechtiochiwa ika iyekchiwalis iwa manomechmaka yolsekwílistli itech nomoy-olo.

Pablo motiotsajtsilia por tokniwah de Colosas

³ Nochipa timotlasojkamatih inawak Dios Itajtsi n Toteko Cristo Jesús ijkuak timotiot-sajtsilia por nomejwah. ⁴ Porke yotikmatkeh kenijki milák nonkineltokah n Toteko Cristo Jesús, iwa kuali nonkintlasojtlah nomokniwah iaxkawah Dios. ⁵ Nomejwah nonmoy-olchikawah itech tlan nomechchia ilwikak. Porke nochi ni yononkikakeh omotetlapowi ijkuak ononkimatkeh n de milajka kualitlájtoli. ⁶ Nin kualitlájtoli non onomechtlapowijkeh, sentetl itech nin tlaltípkaktli motetlapowijtinemi iwa miakeh kineltokatokeh. Ijkó kemi opé tlamochiwa nomowah desde neká tonati ijkuak sikin onomechtlapowijkeh itlasojtlalis Dios, iwa nomejwah ononkajsikamatkeh milák Dios nomechtlasojtla. ⁷ Nin kualitlájtoli onomechajsikamatilti tokni non tiktlasojtlah Epafras akin tekiti towah. Nomejwah ya nonkimatokeh ye se kuali tékitki inawak Cristo. ⁸ Ye yotechtlapowi kenomi nonkateh iwa otechmatilti kenijki nontelasojtlah ika ichikawalis n Espíritu.

⁹ Yika, keman otikmatkeh, opé timotiotsajtsilia inawak Dios para makichiwa tlan Ye kimonekiltia. Iwa itech nomoespíritu makichiwa xiixtlamatikah iwa nochi kuali xikajsikamatikah. ¹⁰ Ijkó weletis nonyeknemiskeh kemi kipiah de yeknemiskeh akimeh milák iaxkawah n Toteko, iwa nochipa weletis nonkichiwaskeh tlan kuali iwa tlan kipaktia, iwa ixmostla okachi nonkixmatiskeh n Totajtsi Dios. ¹¹ Tejwah tiktlajtlanilia Dios manomechchikawa ika iweletilis non weyixtok, para xixxikokah n tlajjyowílistli ika chikawálistli iwa pakílistli, ¹² iwa nochipa matiktlasojkamatikah n Totajtsi Dios porke yotechyolyankuili para matikselikah tlan toaxka iwa n nochteh akimeh iaxkawah iwa nemih itech tláwili. ¹³ Dios otechmakixti imak iweletilis n tleyuálistli, iwa otechtlali kan tlanawatia ikone non saikpanoa kitlasojtla, ¹⁴ Akin otechmakixti, iwa otechtlapojpolwi de toltajtlakolwah.

Cristo Ye Akin nochi kinawatia

¹⁵ Dios, Akin amo mota, omoteititiko itech Ikone, Akin okatka teteachka de nochi tlan Dios okichijchi.

¹⁶ Por Cristo, Dios okichijchi nochi tlan onka kan ilwikak iwa itech tlaltípkaktli, nochi tlan amo mota iwa nochi tlan mota. Noiwa okinchijchi n espíritus non tlanawatiah, iwa kipiah weletílistli ipan nochi tlan onka, iwa tlan omochijchi por Ye iwa para Ye.

¹⁷ Cristo yokatka ijkuak ayamitla okatka, iwa ika ichikawalis nochi tlan onka kuali kajki.

¹⁸ Iwa nomejwah noiwa ya nonkimatokeh Cristo kinyakana akimeh kineltokah, iwa akimeh kineltokah kimajmanah ikuerpo.

Iwa Cristo kiyolitijtok non kuerpo, Ye Akin tetiachka omoyoliti de kan mikemeh, para Ye matlanawatijto itech nochi tlan onka.

¹⁹ Ijkó Dios okinek kinextis nochi iweyilis itech Cristo Jesús,

²⁰ Dios noiwa okimonekilti nochi tlan onka itech nin tlaltípkaktli iwa tlan onka ilwikak makipia tlapojpolwílistli inawak,

iwa non tlapojpolwílistli otechmák ika tlan Cristo Jesús okichi ijkuak omikki iwa okitoya iesso ipan krus.

²¹ Achte, nomejwah ononkatkah wejka de Dios por tlan amo kuali ononkiyejyekoliayah iwa ononkichijtinemiah. ²² Pero axa Dios ken okinekia nomechtlalis iyakapa nonyolchipawakeh iwa nion se tlajtlákoli xikpiakah nion itla amo kuali manomechtlajtlakolti. Onomechtlapojpolwi ika imikilis Cristo Jesús non okijyowi itech ikuerpo. ²³ Yika, moneki xiyektlakxilitokah iwa nochipa xikneltokakah ika nochi nomoyolo tlan ononkikakeh itech nin kualitlájtolli non temakixtia. Nin kualitlájtolli motetlapowijtok itech nochi n taltikpaktli, iwa ne Pablo, nitlapalewia mamotetlapowi nin kualitlájtolli.

Pablo kinmatiltia n kualitlájtolli

²⁴ Axa nipaki maya nitlajiyowia por nomejwah, porke ijko nikajxitijti itech nokuerpo tlan okipolo kijyowis Cristo Jesús por akimeh kineltokah, yejwah non kimajmanah ikuerpo. ²⁵ Dios onechtllali manitekiti para n tokniwah iwa manomechmatilti nochi itlajtol Dios. ²⁶ Ijko kemi moneki makixmatikah tlan yowejka Dios okitlaaitjtoka iwa amaka okinextiliaya, pero axa Ye yokinnextiliko akimeh iaxkawah. ²⁷ Dios okimonekilti makixmatikah akimeh iaxkawah nin weyi iwa kuajkualtsi tlatliokólili non kinmakas akimeh amo judíojteh. Iwa ye ni tlan nomejwah amo ononkimatih, Cristo axa yolitok nomotech. Yika nonmoyolchikajtokeh itech tlan nonkiseliskeh ilwikak.

²⁸ Tejwah titetlapowiah de itlajtol Cristo, iwa nochteh tikinyeknonotsah makajsikamatikah kuali, iwa mapewa mamoyekskaltijtiwah asta mamochikawakah kemi Cristo. ²⁹ Ye ni tlan ika nimotekimaka, iwa nimochijchikawa ika nochi n chikawálistli iwa n weletlistli non Cristo nechmaka.

2

¹ Nikneki xikmatikah satlawel nimochijchikawa ni tekiti por nomejwah, iwa por non chantitokeh Laodisea, noiwa por nochteh non amo nechixmatih. ² Nimotekimaka para yejwah mamoyolchikawakah iwa mamotlasojtlakah, iwa ika kuali intlalnamiikilis, okachi mamochikawakah para makixmatikah tlan yowejka okitlaaitjtoka Dios. Non tlatliokólili non otlaaittoka, Ye n Cristo. ³ Porke itech Cristo tlaaittok tlan miak ipati de tlan se weletis tlaixmatis iwa tlan se weletis kajsikamatis. ⁴ Ni nomechilia para amaka manomechkajkayawa ika kualtsi tlájtolli non amo milák. ⁵ Porke maya amo nonewia nika nomowah, noespiritu kajki nomowah, iwa nipaki ijkuak nikmati nomejwah kuali nonyeknemih iwa nochipa nontlaneltokah itech Cristo.

⁶ Yika, ijko kemi ononkiselijkeh n Toteko Cristo Jesús, ijko ixpa xinemikah, ⁷ ximoyektlakxilikah iwa ximoskaltijtiwah itech Ye, iwa xiyektlaneltokakah kemi onomechmachtijkeh, iwa nochipa ximotlasojkamatikah inawak Dios. ⁸ Ximotlachilikah; amo kichiwa nomechkuatlapoltiskeh iwa nomechkajkayawaskeh nekateh tlamachtijkeh ika tlamachtlisteh non amitla impati, porke yejwah amo kitemachtiah itlajtol Cristo, yej san tlan kiyejekoliah n taltikpaktlakah. ⁹ Porke nochi tlan kajki itech Dios, moixmatiltia itech Cristo. ¹⁰ Nomejwah nonkipixtokeh Dios itech nomoyolo, porke nonkitlakitah Cristo. Iwa Ye kinnawatia nochteh espíritus non kipiah weletlistli iwa tlanawatiah.

N sirkunsión de Cristo

¹¹ Iwa nomejwah akimeh nonkineltokah Cristo, noiwa nonsirkunsidaritokeh, pero amo porke onomechsirkunsidarojkeh itech nomonakayo, yej porke Cristo yonomechinkixtiliko nomotlajtlakolwah. Ye ni n sirkunsión non Cristo techmaka. ¹² Porke ijkuak ononmokuatekijkeh, noni kijtosneki onomechtookakeh iwan Cristo, iwa ijko noiwa onomechyolitijkeh iwan Ye, porke ononkineltokakeh iweletilis Dios okiyoliti de kan mikemeh. ¹³ Achte nomejwah ononmiktokah ixpa n Dios, porke onontlajtlakolchijtinemiah iwa porke amo ononsirkunsidaritokah. Pero axa Dios yonomechyoliti iwa Cristo, iwa yonomechtlapojpolwi de nochteh nomotlajtlakolwah. ¹⁴ Dios yotechtlapojpolwi nochi tlan yotiktewikiliayah por amo otiktlakitakeh n tlanawátli. Yika Ye okipojpolo itech krus nochi tlan amo otiewetiah otiktaxtlawayah. ¹⁵ Ijkuak Cristo omikki itech krus,

okinkixtili inweletilis iwa n tekiwajyotl n espíritus amokualteh. Iwa ijkuak yokiwikayah kimiktitiweh, okiteititi kenijki okintlantokah n espíritus amokualteh.

Xiktemokah tlan milák ipati ipxa n Dios

¹⁶ Yika, amaka manomechpijpinawi por tlan nonkikuah noso nonkonih, noso por amo non ilwichiwah ijkuak yankuik metsi, noso por amo nonkintlakitah n sábados tonatijmeh ijkuak mosewia n judíos. ¹⁷ Porke nochi noni, san otechixnextiliaya kemi se tlasekawilo Akin satepa walaskia, iwa Akin milák satepa walaskia, Ye ikuervo Cristo. ¹⁸ Amo xikmokawilikah manomechxixtilikah nomotlatliokolil nekateh akimeh san mochijtinemih iknomeh iwa kinweyiliah n ángeles. Yejwah kijtojtinemih itech intejtemikilis kinmonextiliah ángeles. Pero mach milák. Semi moweyiliah san ika tlan yejwah kiyejyekoliah. ¹⁹ Yejwah mach kinekih kitlakitaskeh Cristo, Akin techyakana kemi itsonteko tinochteh non tikneltokah. Tejwah tikateh itech Cristo, kemi se kuerpo non asalitokeh iomiowah, ijko kemi Dios okimonekilti; iwa timoskaltiah iwa timochikawah ika n chikawálistli non Ye techmaka.

²⁰ Tla nomejwah yononmikkeh iwan Cristo, iwa ayakmó nonkitlakitah tlan kitlakitah n tlaltikpaktlakah, ¿tleka ok nonkimokawiliah manomechyakanakah ika tlanawátilteh kemi ninteh? ²¹ “Amo xikonana, amo xikkua, amo xiktelko.” ²² Nochi tlákuali iwa nochi tlan se koni tlami ijkuak se kitekitiltia, iwa nochi tlan ika onomechnawatiayah san okintlalijkeh n tlaltikpaktlakah. ²³ Tlan yejwah otlawatijkeh, mota kemi milák techpalewiskia. Porke ijkuak yejwah motlajiyowiltiah iwa moiknotlasojtlah, nesi kemi okachi kimatih kenijki kiweyiliskeh Dios. Pero nochi tlan kichiwah mach weleti kimpalewia ijkuak kinyoltilana tlan amokuali kelewiah inkuervo.

3

¹ Yika, tla nomejwah yononmoyolitijkeh iwan Cristo, xiktemokah nochi tlan onka itech ilwikah, kan Cristo ewatok iyekma n Totajtsi Dios. ² Xiktlalikhah nomotlachialis itech tlan onka ilwikah, iwa amo itech tlan onka itech nin tlaltikpaktli. ³ Porke nomejwah yononmikkeh iwan Cristo, iwa axa nonkipiah nomoyolitilis tlaaitok iwa Cristo itech Dios. ⁴ Cristo Ye Akin kichiwa matiyolitokah, iwa ijkuak walmuikas, nomejwah íwa nonyetoskeh, iwa nonkispampiaskeh iweyilis.

Tlan achto otikchiwayah moneki pojpoliwis

⁵ Yika, xikpojpolokah tlan amo kuali kelewia nomokuervo. Amaka mamokalakijtinemi iwan se non amo isiwa, nion manemi itech tlan pitsotik, nion mamotemaka imak tlan amokuali kelewia ikuervo, nion makitlawelneki tomi, porke tla ijko nonkichiawah, noni yaskia kemi nonkinweyilijtoskiah diostsitsinteh. ⁶ Por nochi ni, walmuikas ikualanilis Dios impah akimeh amo kitlakitah. ⁷ Iwa nomejwah, achto ijko ononntinemiah itech ninteh tlajtlákolteh.

⁸ Pero axa xikinkawakah nochteh ninteh tlajtlákolteh: Ayakmó xikualankamikikah, ayakmó xikualanikah, ayakmó xitewikaltikah, ayakmó fiero xitlajtokah de oksikimeh, nion ayakmó ximokamanalwikah. ⁹ Ayakmó ximokajyawakah, porke nomejwah yononkikajkeh tlan achto onomechyolijtlakoaya iwa yononmoyankuilijkeh. ¹⁰ Pero axa Dios yonomechyankuili. Yika, ximoixtlamachtikah itech Cristo iwa ixmostla ximoyolpatlatiwah para nonyetoskeh kemi n Totajtsi Akin otechhijchi. ¹¹ Inawak Dios ayakmitla ipati tla se judío noso amó, tla se kajki sirkunsidado noso amó. Amitla ipati tla se de wejka, tla se amo tlaixmati, tla se tlanémaktli noso amó. Porke Cristo okachi miak ipati ke nochi tlan onka, iwa Ye kajki intech nochteh akimeh kineltokah.

¹² Dios nomechtlasojtla iwa yonomechpéjpenki para xikmajmanakah ialtépeu yolchipawak, yika ximokemelokah ika nochi tlan nomechpalewis iwa xiteiknomatikah, xiktechiwilikah tlan kuali, ximotsikitsintilikah, xiyetokah nonyolyamankeh iwa xitexikokah. ¹³ Xitexikokah iwa ximotlapojpolwikah. Iwa tla se nomokni onomechchiwili itla amo kuali, xiktlapojpolwikah, ijko kemi Cristo onomechtlapojpolwi. ¹⁴ Iwa tlan okachi ipati, iwa weyi kijtosneki: ximotlasojtlakah iwan oksikimeh, porke n tlasojtlálistli, ye tlan

techyekseitilia. ¹⁵Noiwa xikkawilikah Dios makiyakana ika iyolsewilis nomoyolo, yika Dios onoméchnotski para xikmajmanakah san se kuerpo. Iwa nochipa ximotlasojkamatikah.

¹⁶Itlajtól Cristo machantito nochipa itech nomoyolo. Ximosepannonotsakah iwa ximosepanyekuikakah ika kuali ixtlamatlistli. Xiktlaquikilikah Dios ika nochi nomoyolo ika salmos iwa ika tlakuikalthé non kiweyiliah, iwa ika tlakuikalthé non tlatiochiwah. ¹⁷Iwa nochi tlan nonkichiwah noso nonkijtoah, xikchiwahak itech Itoka n Toteko Cristo Jesús, iwa ximotlasojkamatikah inawak Totajtsi Dios itech Cristo Jesús.

Kenomi moneki manemikah tokniwah

¹⁸Siwameh, xiktlakitakah nomookich, porke ijko moneki kichiwaské akimé kitlakitah Dios. ¹⁹Tlakah, xiktlasojtlakah nomosiwa iwa amo san xikinmajwatokah. ²⁰Tepilwah, xikintlakitakah nomotajwah porke ijko kipaktia n Toteko. ²¹Tetajmeh, amo xikinkuakualanikah nomopilwah, para amo mamosojstolawakah. ²²Tlanémakti,* xiktlakitakah nomoteko, amo sanwel ijkuak nomechonitok, san para kuali nonmokawaskeh iwa, yej xiyektekitikah para nonkipaktiskeh n Toteko. ²³Nochi tlan nonkichiwah, xikyekchiwahak, kemi nonkichiwilijtoskiah n Toteko Cristo Jesús iwa amo san para n tlakah. ²⁴Porke ya nonkimatokeh, Toteko Dios nomechmakas n tlatliokólili non yonomechili nomechmakas. Porke nonkitekitiliah Cristo akin milák Nomoteko. ²⁵Pero akin kichiwa tlan amokuali, kiselis itlaxtlawil de tlan amokuali yokichi. Porke Totajtsi Dios amo san techikotlasojtla.

4

¹Nomejwah tekowajkeh xikinyekwikakah nomotlakawah. Xikilnamikikah nomejwah noiwa nontetlakawah inawak Dios non kajki ilwikak.

²Nochipa ximotiotsajtsilikah, xijsatokah iwa ximotlasojkamatikah inawak Dios. ³Noiwa ximotiotsajtsilikah por tejwah, para Dios matechkawili matitetlapowikah de n kualitlajtoli de Cristo, porke por nin kualitlajtoli non amaka okimatia axa onechtsakeh. ⁴Ximotiotsajtsilikah para ijkuak nitetlapowis de nin kualitlajtoli, kuali manikteajtsikamatilti.

⁵Xikmatikah ximowikakah kuali iwa n tlakah non amo kineltokah Dios, para amo sanenka nonkintlapowiskeh. ⁶Nomotlajtól nochipa mateyolpakti iwa amo xikinsojsotlawakah, iwa xikmatikah kenomi nontlanankiliskeh ijkuak itla nomechtlajtlaniskeh.

Pablo kintlajpaloa iwa momakawa

⁷Tokni Tíquico non satlawel tiktlasojtlah, nomechtlapowis kenomi nika, ye se tékiti yekmilajka iwa nechpalewia itech iteki n Toteko. ⁸Yika, onomechtitlanili para manomechmatilti kenijki tikateh iwa manomechycholchikawa. ⁹Noiwa yawi tokni non satlawel tiktlasojtlah Onésimo, ye se de nomejwah. Yejwah nomechiliskeh nochi tlan tlamochijtok ik nika.

¹⁰Nomechtlajpaloa Aristarco, non iwa nitsaktok, noiwa nomechtlajpaloa n Marcos, iprimo n Bernabé. Ya nonkimatokeh kenijki nonkiyekseliskeh n Marcos tla nomechtlajpaloti. ¹¹Noiwa nomechontlajpaloa Jesús, akin noiwa kinotsa Justo. Sanwel ninteh judojteh non kineltokah Cristo Jesús tekititiwitseh nowa itech iteki n Totajtsi Dios, iwa akimé itech nimoyolchikawa. ¹²Noiwa nomechtlajpaloa Epafras, ye de nomoaltepeu iwa kuali kitekitilia n Cristo Jesús. Ye nochipa motiotsajtsilia chikawak por nomejwah para kuali ximokitskijtokah itech Cristo, para xikmosenmakakah itech tlan Dios kimonekiltia xikchiwahak. ¹³Ne nonewia onikitak Epafras satlawel motekipachoa por nomejwah, noiwa por non chantitokeh Laodisea iwa Hierápolis. ¹⁴Nomechtlajpaloa n tepajti Lucas non satlawel niktlasojtla, noiwa n Demas nomechontlajpaloa.

* 3:22 tlanémakti: Acho ijkuak n tlakah okitewikiliah miak tomi iwa ayakmo oweletiah okikopayah, okinamakayah. N tlakatl non okitewikiliah non tomi, okinamakaya kemi yolkameh monamakah. Iwa ijko okimokopiliaya itomi, iwa ijkuak okitekitiliah n tlakatl non okinko amitla okintlaxtlawiaya. Iwa okimpixtoka icha iwa okintekitiltiaya san tlan oras okinekia porke amo okinpixtoka kemi tlakéwalteh yej kemi tlanemakti.

¹⁵Xikintlajpalokah n tokniwah non chantitokeh Laodisea. Noiwa xiktlajpalokah n Ninfas iwa nochteh non moololoah icha. ¹⁶Satapa ijkuak yononkiamapojkeh nin amatlajkufloli, xiktitlanikah Laodisea para ompa makiamapoakah n tokniwah.

Nomejwah noiwa xikamapoakah n amatlajkufloli non yejwah nomechaltitlaniliskeh.

¹⁷Noiwa xikilikah n Arquipo: “Xikyekchiwa n tekittl non Toteko Cristo omitsmaktili.”

¹⁸Ne Pablo, nonewia nomechtlajkuililia. Xikilnamikikah nitsaktok.

Dios manomechtiochiwa ika iyekchialis.

San Pablo sikinika kintlajkuililia non de Tesalónica

Pablo kintlajpaloa n tokniwah de Tesalónica

¹ Pablo, Silvano iwa Timoteo, tomechtlajkuililia tokniwah akimeh nonchanchiwah Tesalónica, inawak Dios n Teta iwa n Toteko Cristo Jesús: Xikselikah intlatiochiwalis iwa inyolsewilis.

Miakeh okixmatiah intlaneltokalis non de Tesalónica

² Nochipa timotlasojkamatih inawak Dios por nochteh nomejwah, iwa tomechilnamikih ijkuak timotiotsajtsiliah. ³ Ixmstla tikilnamikih iyakapa Dios n Teta, kenijki yonontek-itikeh ika miak tlaneltokálistli, iwa ika miak tlasojtlálistli nontekititiwitseh. Nomoy-olchikawalis itech Cristo Jesús chikawak iwa amo nonmosotlawah. ⁴ Nokniwah, Dios nomechtlasojtla, iwa tikmatokeh Ye onomechpéjpenki. ⁵ Porke ijkuak otomechmatitijkeh n kualitlájtolli, amo san ika totlajtol, yej noiwa ika n Espiritu Santo iwa iweletilis otik-intlaneltoktijkeh. Nomejwah nonkimatokeh otiyeknenkeh ika yolchipawálistli nomowah, para tomechchiwiliskeh tlan kuali.

⁶ Nomejwah noiwa opé nonnemih ika nomoyolo chipawak kemi tejwah tinemih ika toyolo chipawak inawak Toteko, iwa maya miak onontlajjowyijkeh, ononkiselijkeh n kualitlájtolli ika pakílistli non techmaka n Espiritu Santo. ⁷ Ika noni, axa kuali nomechtenewah iwa nomechyekitah n tokniwah tlaneltokakeh, non chantitokeh itech talmeh de Macedonia iwa Acaya. ⁸ Porke nomejwah yononkixitiniykeh itlajtol n Toteko, iwa amo san itech talmeh de Macedonia iwa Acaya, yej sentetl kimatokeh kenomi nontlaneltokah inawak Dios, iwa mach ok moneki matomechtenewakah. ⁹ Porke innewiah techtlapowiah kenijki onontechyekselijkeh ijkuak otomechtlajpalotah, iwa kenijki ononkinkajkeh n dios-meh non kinmachijchiwah iwa kenijki ononmoyolpatlakeh inawak n de milajka Dios non yolitok, para nonkitekichiwiliskeh. ¹⁰ Noiwa nomejwah nonkixixtokeh mawalmokopa de ilwikak n Jesús Ikone n Totajtsi Dios, Akin okiyoliti de kan mikemeh. Jesús Ye Akin techmakixtis de n tlajjowyílistli temojti non wits.

2

N tekitl non Pablo kichiwa itech tlali de Tesalónica

¹ Nokniwah, nomejwah kualí nonkimatih amo sanenka otomechtlajpalotah. ² Nomejwah nonkimatih, achto yotechwijwikaltijkah iwa yotechtlajjowyiltijkah kan altepetl de Filipos. Dios otechpalewi matomechmatiltikah n kualitlájtolli de Dios, ika miak tlaneltokálistli itlajko miak tlajjowyílistli. ³ Porke ijkuak otomechmatitijkeh n kualitlájtolli, amo otomechititijkeh tlan amo milák, nion otomechtlapowijkeh ika totlalnamikilis amo chipawak, nion otomechtlapowijkeh para tomechkajyawaskeh. ⁴ Yej otomechtlapowijkeh porke Dios yotechyejyekojka iwa otechmák n tekitl para matitetlapowikah de n kualitlájtolli de Dios non techmakixtia. Iwa tejwah titlamachtiah amo san para tikimpaktiskeh n tlakah, yej para tikpaktiskeh n Totajtsi Dios Akin kixmati toyolo. ⁵ Dios kualí kimatok, iwa nomejwah noiwa nonkimatokeh tejwah ayik otomechweyilijkeh ika totlajtolwah, nion otitek-itiltijkeh n kualitlájtolli para tiklaniskeh tomi. ⁶ Tejwah mach tiknekih aka matechweyili, nion nomejwah nion oksikimeh, maya otikpiayah tlanawátilli para tomechnawatiskiah techmopantikah porke tejwah itlatitlanilwah Cristo. ⁷ Pero tejwah amo ijko otikchijkeh nomowah, yej otomechtlasojtlakeh kemi se tena kintlasojtla iwa kinyekmokuilawia ipilwah. ⁸ Kemi satlawel tomechtlasojtlah, yika otiknekiah tomechmaktiliskeh amo sanwel itlajtol Dios, yej asta toyolilis. ¡Porke satlawel tomechtlasojtlah! ⁹ Nokniwah, nomejwah nonkilnamikih kenijki otitekitiyeh para ika ttipanoayah. Ijkuak otomechmatitlayah itlajtol Dios, otitekitiyah tlajka iwa n yuak para amaka tiktekimakaskeh.

¹⁰ Nomejwah ononkitakeh, iwa Totajtsi Dios kualí kimatok nomonawak otiyeknenkeh ika toyolo chipawak, iwa ayik aka otiktiktijkeh itla amo kualí kemi para matechtlajtlakolti.

¹¹ Noiwa nonkimatih, kenijki otomechylchikajkeh iwa otomechylsewijkeh, kemi se teta kichiwa iwan ipilwah. ¹² Tejawh yotomechylchikajkeh, yotomechylsewijkeh, iwa yotomechnotskeh kenijki kipiah de yeknemiskeh ipilwah Dios, Akin nomechnotok xiyetokah kan Ye tlanawatia iwa xikselikah iweyilis.

¹³ Yika, tejwah nochipa timotlasojkamatih inawak Dios, porke ijkuak nomejwah ononkikakeh itlajtol Dios non tejwah otomechmatiltijkeh, nomejwah ononkiselijkeh kemi milák itlajtol Dios iwa amo san kemi intlajtol n tlakah. Iwa nin tlájtoli milák itlajtol Totajtsi Dios non tekititok itech nomoyolo nomejwah akimeh nontlaneltokah.

¹⁴ Nokniwah, ijkó kemi onomechtlaijyowiltijkeh n tlakah de nomoaltepeu, ijkó noiwa okintlaijyowiltijkeh n tlaneltokakeh non chantitokeh Judea akimeh iaxkawah n Cristo, yejwah noiwa okintotojtokakeh n Judíos de inmaltépeu. ¹⁵ Ninteh judíojteh okimiktijkeh n Toteko Jesús, ijkó kemi okimiktijkeh improfetajwah, iwa tejwah noiwa otechalkixitijkeh de ompa. Yejwah amo kichiwah tlan kipaktia Dios, iwa kintlawelitalh nochteh n tlakah.

¹⁶ Porke ijkuak tiknekih tikintlapowiskeh non amo judíojteh para mamomakixitika, amo techkawiliah matikintlapowikah. Yika san yejwah kimotetemilijtokeh okachi tlajtlákoli. Pero axa ikualanilis Dios yowala impah.

Pablo oksepa kineki yas kintlajpaloti non chantitokeh Tesalónica

¹⁷ Nokniwah, ijkuak otomech kajtewayah kanaj kech tonati, maya amo otomechitayah, nochipa otomechwikatinemiah itech toyolo, iwa satlawel otiknekiah tomechitatiweh.

¹⁸ Otiknekiah tiaskah tomechitatiweh, iwa ne Pablo okachi oniknekia nias, pero nochipa otechsatsakuiliaya n satanás. ¹⁹ Porke akimeh, ¿tla amo nomejwah, akimeh inwah timoyolchikawaskeh, tiyolpakiskeh, iwa timoweyiliskeh inawak Toteko Cristo Jesús, ijkuak Ye walmokopas? ²⁰ Milák, nomejwah toweyilis iwa topakilis.

3

¹ Yika, kemi ayakmó okachi otikxikojkeh, otikmolijkeh okachi kuali matimokawakah toselti kan altepetl de Atenas, ² iwa otiktitlankeh tokni Timoteo manomechitati, porke ye itlakewal Dios, iwa yotekitik towah ijkuak otiktematiltijkeh n kualitlájtol de Cristo. Yika otiktitlankeh para manomechyekektsa iwa manomechylchikawa itech nomotlaneltokalis, ³ para amaka mamosotlawa ika nochi tlan kijyowia. Porke nomejwah nonkimatokeh moneki matitlaijyowikah. ⁴ Iwa ijkuak ok otikatkah nomowah, otomechilijkeh tipanoskiah miak tlaijyowilistli; iwa ijkó otlamochi kemi nomejwah yononkimatokah.

⁵ Yika, kemi ayakmó owéletki okachi onikxiko, oniktítlanki n Timoteo manomechitati kenomi ononnemiah itech tlan nontlaneltokah, porke onechtekipachoaya nikmatis n tekajkaya yonomechtlajtlakolchiwalti, iwa toteki sanenka tlan otikchijkeh.

⁶ Pero axa Timoteo yomokopato ompa Tesalónica, iwa techtlapowia satlawel nonkineltokah Dios iwa kenijki saikpanoa nonkimatih nontelasojtlah. Ye techilia nomejwah nochipa nontechilnamikih ika tlasojtlálistli iwa nonkinekiskiah nontechitaskah ijkó kemi tejwah tiknekiskiah tomechitaskiah. ⁷ Yika nokniwah, maya otimotekipachojtokah iwa otitlaijyowijtokah, axa tiyolpakih porke otikmatkeh nomejwah kuali non moyekketokeh itech tlan nonkineltokah. ⁸ Iwa axa ken ya tikmatih kuali nonnemih inawak Dios, tejwah kemi yaskia otimoyolitijkeh. ⁹ Yika mach tikpiahl tlan ika weletis tiktlasojkamatiskeh Dios por nochi n pakílistli non nomejwah nontechmakah inawak. ¹⁰ Tlajka iwa n yuak tiktlatlaujtiah Totajtsi Dios, matechkawili oksepa matomechitatih nomonewiah, iwa ijkó matomechmatiltikah tlan kipolaa nomotlaneltokalis.

¹¹ Totajtsi Dios iwa n Toteko Cristo Jesús, makimonekiltikah techonpalewiskeh para tiweletiskeh tiaskah tomechontlajpalotiweh. ¹² Iwa Dios manomechchikawa iwa makimiakili okachi nomotlasojtlalis, iwa ximotlasojtlakah non nochteh iwan oksikimeh noiwa xikintlasojtlakah, ijkó kemi tejwah tomechtlasojtlah. ¹³ Makichikawa nomoyolo iwa xinemikah ika yolchipawálistli inawak, iwa ijkó amaka manomechtlajtlakolti ijkuak walmuikas Toteko Cristo Jesús iwa n nochteh akimeh iaxkawah.

4

Matinemikah kemi Totajtsi Dios kipaktia

¹Axa nokniwah, tomechnonotsah iwa tomechnawatiah itech Itoka n Toteko Cristo Jesús, ijkó kemi tejwah otomechmachtijkeh iwa nomejwah ya nonkichijtiwitseh, okachi xiyeknemikah para nonkipaktiskeh Dios. ²Nomejwah ya nonkimatokeh tlan Toteko Cristo Jesús otechnawati matomechnawatikah. ³Dios kineki ximoyolchipawakah inawak, iwa amaka mamomekatijtiniemi. ⁴Yika, nochi tlakatl makimati kenomi kiyeknawatis ikuerpo ika chipawálistli iwa tlakítálistli. ⁵Iwa amo xikkawilikah makelewi itla nomokuerpo kemi kichiwah akimeh amo kixmatih n Totajtsi Dios. ⁶Amaka mamixewi makikajkayawa ikni itech itla tekitl, porke Toteko Dios kitlajiyowiltis chikawak akin ijkó kichiwas, tejwah achto yotomechilijkeh. ⁷Porke Dios amo otéchnotski para matinemikah itech tlajtlákolli, yej para matinemikah inawak ika toyolo chipawak. ⁸Ijkó kiné, akin amo kiselia nin tlanawátilli, amo kineltoka itlajtl Dios, porke amo wits de n tlaltikpaktlakah, yej wits de Dios, Akin otechmák Iespíritu Santo.

⁹Axa, mach ok moneki manomechtlajkuilili, kenijki moneki nonkintlasojtlaskeh tokniwah, porke inewia Totajtsi Dios yonomechmachtii kenijki moneki nonmotlasojtlaskeh non nochteh. ¹⁰Porke ya momatok kenijki nonkintlasojtlah n tokniwah non chantitokeh kan tlali de Macedonia. Pero axa tokniwah, tomechtlatlaujtiah okachi mamomiakili nomotlasojtlalis. ¹¹Ximochijchikawakah xietokah ika yolsekílistli, iwa xikchiwahak nomoteki iwa xiyektekitikah ika nomowah, ijkó kemi otomechititijkeh. ¹²Ijkuakó non amo kineltokah Dios nomechitaskah kenomi nonyeknemih, iwa ayakmó nonmotlajtlaniskeh tlan ika panotoskeh.

Toteko Cristo Jesús oksepa wits

¹³Nokniwah, tiknekih xikmatikah tlan mochiwaskeh non yomikkeh, para amo ximoyolkokokah kemi n oksikimeh non amo kipiah tlan itech moyolchikajtoskeh. ¹⁴Porke tejwah tikneltokah Jesús omikki iwa oksepa omoyoliti, yika noiwa tikneltokah Dios kinyolitish akimeh yomikkeh iwa okineltokakeh n Toteko Jesús.

¹⁵Yika, tomechmatiltiah nin itlajtl Toteko Jesús: Ijkuak Ye wits, tejwah akimeh axa tiyolitokeh, amo tikinmoyakanaltiskeh non yomikkeh. ¹⁶Porke inewia n Toteko waltemos de ilwikak ika chikawak tlájtoli kemi se tekiwa. Tlajtos kemi se non kinyakana n ángelteh, iwa tikkakiskeh ijkuak kipitsas itlapitsal Dios, ijkuakó akimeh omikkeh iwa okineltokakeh n Cristo achto moyolitishkeh. ¹⁷Tlami akimeh ok tiyolitoskeh, techwikaskeh inwah ipan mexтли para timonamikiskeh iwan Toteko Jesús nepa tlakpak. Iwa ijkó nochipa tiyetoskeh iwan Toteko. ¹⁸Yika, ximosepanyolchikawakah ika ninteh tlájtoltel.

5

¹Tokniwah, mach moneki matomechijkuililikah tlan tonati noso tlan ora walmuikas n Toteko. ²Porke nomejwah ya nonkimatokeh ijkuak Toteko walmuikas amaka kimati non tonati, Ye kalakiki ijkuak amaka kichia, kemi se yuali ijkuak se tlachteh walkalaki. ³Ijkuak n tlaltikpaktlakah kimoliskeh: “Axa kema ya tikateh ika kualii, iwa ya tikpiah yolsekílistli”, ijkuakó kualinmajsiki n tlaixpoliwílistli, kemi ijkuak se siwatl pewa ijtikualo ijkuak ya kipiatii ikone. Iwa amaka weletis cholos. ⁴Pero nomejwah, nokniwah, ayakmó nonkateh kan tleyua, yika itech neká iksemi tonati ijkuak walmuikas Toteko Jesús, amo manomechkochwi kemi se ichtek. ⁵Porke nochteh nomejwah ya nontepilwah de n tláwili. Tejwah amo titepilwah de n yúali nion de n sentleyuálistli. ⁶Yika, amo matikochtokah kemi n oksikimeh, yej matiisatokah ika kualii totlalnamikilis. ⁷Porke akimeh kochi, kochi de yuak, iwa akimeh tlawanah, yual wintitokeh. ⁸Ken tejwah tinemih itech tláwili, moneki matiisatokah. Matikmoelpankentikah ika totlaneltokalis iwa ika totlasojtlalis, iwa matimokuauonakiltikah iwa matikchiakah totemakixtilis. ⁹Porke Dios amo otechtlali para techtlajiyowiltis, yej para techmakixtis por Toteko Cristo Jesús. ¹⁰Cristo Jesús omikki topatka, tla techajsiki ok tiyolitokeh noso tla yotimijmikeh, noiwa

matiyolitokah nochipa íwa. ¹¹ Yika, ximosepanyolchikawakah iwa ximochikawakah ijkó kemi ya nonkichijtiwitseh.

Pablo kinnonotsa n tlaneltokakeh

¹² Tokniwah, tomechtlatlaujtiah xikintlakitakah akimeh tekitokeh nomowah. Yejwah nomechyanah iwa nomechnonotsah kemi Toteko kineki xinemikah. ¹³ Xikintlakitakah iwa xikintlasojtlakah por n tekittl non kichijtokeh. Iwa kuali ximoyekwikakah nochteh nomejwah.

¹⁴ Noiwa tomechtlatlaujtiah xikinnonotsakah chikawak akimeh amo kinekih tekitiseh. Xikinyolchikawakah akimeh mosotlawah. Xikimpalewikah akimeh amo chikawak intlaneltokalis, iwa xikinmajsikamatiltikah nochteh n oksikimeh.

¹⁵ Tla aka nomechchiwilia tlan amokuali, amo ximomakopakah. Yej nochipa ximosepanchiwilikah tlan kuali.

¹⁶ Nochipa xipaktokah. ¹⁷ Ixmostla ximotiotsajtsilijtokah. ¹⁸ Xiktlasojkamatikah n Totajtsi Dios por nochi tlan nonpanotokeh, porke ye ni tlan Dios kineki xikchiwakah nomejwah akimeh nonkineltokah Cristo Jesús.

¹⁹ Xikyekkakikah tlan nomechiliah n Espíritu. ²⁰ Amo san xikajawilmaticah n tlajtóli non nomechmatiltiah n profetas. ²¹ Kuali xikkakikah tlan nomechmatiltiah iwa xikmokawikah tlan kuali. ²² Xikkawakah nochi tlan amokuali.

²³ Inewia Dios non teyolsewi, sansemi manomechyolchipawa iwa makimokuitlawi nomoespíritu, nomoalma iwa nomokuervo, para amo xikpiakah nion se tlajtlákoli ijkuak walmokopas n Toteko Cristo Jesús. ²⁴ Akin onoméchnotski yekmilajka, iwa kiyekchiwas nochi ni.

Pablo iksemi kintlajpaloa iwa kintiochiwa

²⁵ Nokniwah, ximotiotsajtsilikah por tejwah.

²⁶ Xikintlajpalokah nochteh tokniwah iwa ika chipawak nomoyolo xikinixtenamikikah.

²⁷ Nomechtlatlaujtia ika itekiwajyo n Toteko, xikinamapoilikah nin amatlajkufloli nochteh n tokniwah.

²⁸ Itlatiochiwalis n Toteko Cristo Jesús mayeto nomowah.

San Pablo ojpa kintlajkuililia non de Tesalónica

Pablo kintlajpaloa n tokniwah de Tesalónica

¹ Ne Pablo, Silvano iwa Timoteo, tomechtlajkuililiah nomejwah tokniwah akimeh nonchanchiwah Tesalónica, nomejwah nonseititokeh inawak Dios n Teta iwa n Toteko Cristo Jesús. ² Xikselikah itiochiwalis iwa iyolsewilis n Totajtsi Dios, iwa n Toteko Cristo Jesús.

Pablo kinmiknomati non motekipachoah

³ Nokniwah, moneki nochipa matimotlasojkamatikah inawak Dios por nomejwah, kemi moneki tikchiwaskeh, porke mochikajti nomotlaneltokalis, iwa nomotlasojtlalis inawak oksikimeh okachi momiakilijti. ⁴ Yika, sentetl kan moololoah n tokniwah non kineltokah Cristo Jesús, tejawh tomechyektenewah innawak, porke maya nomechtotojtokah iwa nomechtlajjowiltiah, nomejwah nonkixikoah n tlajjowilistli por nontlaneltokah inawak Cristo Jesús. ⁵ Noni kinextia Dios nochipa kichiwa tlan kuali, ijkuak nomechita non yolchipawakeh para nonkalakiseh kan Ye tlanawatia, yika nontlajjowijtokeh.

⁶ Tikmatih Dios yekmilajka, yika kintlajjowiltis akimeh nomechtlajjowiltiah, ⁷ iwa nomejwah akimeh nontlajjowiah, Ye kichiwas ximosewikah ijko kemi tejawh noiwa timosewiseh, itech neká tonati ijkuak Toteko Jesús waltemos ijtk tletl de ilwikak iwa iangelwah weletin, ⁸ para kintlajjowiltis akimeh amo kineltokah Dios nion kitlakitah n kualitlajtoli de Toteko Cristo Jesús. ⁹ Ninteh tlajtlakolchijkeh kintlajjowiltiseh ika tlajjowilistli non ayik tlamis. Iwa wejka kintlamotlaskeh, kan amo weletis kitaskeh iweyilis nion iweletilis n Toteko, ¹⁰ ijkuak wits Toteko itech neká tonati para makiweyijkachiwakah iaxkawah iwa kitaskeh ika pakilistli nochteh akimeh okineltokakeh. Nomejwah ononkineltokakeh n kualitlajtoli non tejawh otomechmatiltijkeh.

¹¹ Yika, ixmostla timotiotsajtsiliah por nomejwah, para xinemikah nonyolchipawakeh kemi Ye onoméchnotski para xikneltokakah itlajtol. Nomotech makitekiliti iweletilis, para makisa kuali nochi n tekitl non nomejwah nonkinkeh nonkichiwaskeh ika tlan axa nonkineltokah. ¹² Iwa ijko Itoka n Toteko Cristo Jesús kiweyiliseh por tlan kuali nomejwah nonkichiwah, iwa Ye noiwa nomechweyilis por itlasojtlalis Totajtsi Dios iwa n Toteko Cristo Jesús.

2

Ijkuak walmuikas n Toteko Cristo Jesús

¹ Axa nokniwah, ijkuak Toteko Cristo Jesús techseitilikih inawak, tomechtlatlaujtiah ² amo xikmokawilikah manomechixtlapololtikah nion manomechmomojtikah, tlanomechiliseh okinmatilti se espíritu, noso tlanomechiliah okikakeh noso okiselijkeh se amatlajkuiloli kan nestok tejawh otikijtojkeh yoajsiko itonati n Toteko. ³ ¡Amo xikmokawilikah manomechkajkawakah! Porke ijkuak ajsiki non tonati, miakeh non axa kijoah kineltokah n Toteko Dios, kitlawelitaskeh, iwa tlamis monextis n tlakatl tetlajtlakolchiwalti, non teaxkatitok miktla. ⁴ Ye nin tetlajtlakolchiwalti non kixnamiki iwa majkoku i xpa nochi tlan motenewa de Dios. Motlalia kan itiopa n Dios kemi ye yetoskia se dios iwa inewia motenewa kemi dios.

⁵ ¿Amo nonkilnamikih, ijkuak onikatka nomowah onomechiliaya nochi ni? ⁶ Iwa axa nomejwah ya nonkimatih tlan kitsakuilijtok non tlakatl tetlajtlakolchiwalti, para mamotenexti asta ijkuak kalakiki non tonati. ⁷ Porke n amokualitlakatl tetlajtlakolchiwalti ya ichtakatekititok; iwa sa kichixtok makachiwakah akin kitsakuilijtok. ⁸ Ijkuako walmonextis neká tetlajtlakolchiwalti, akin Toteko Jesús kimiktis ika itlajtol weletini, iwa kipojpolos ika itlawilnextilis ijkuak wits. ⁹ N satanás kualitlanis n tetlajtlakolchiwalti, iwa kimakas iweletilis para makinchiwa wejweyi milagros iwa neskýolteh non san ika

teixkajkayawas. ¹⁰ Kitekitiltis nochi tlan amokuali para kinkajkayawas akimeh moyakan-tokeh kan amo tlakualka porke amo okinekeh okikakeh tlan milák para momakixtiskeh. ¹¹ Yika, Dios kinkawilia mamokajkayawakah iwa makineltokakah tlan amo milák, ¹² para kintlajjowiltis nochteh akimeh amo okinekeh kineltokaskeh tlan milák, yej okachi kimpaktia kichiwaskeh tlan amokuali.

Dios otechpéjpenki matimomakixtikah

¹³ Tejwah nochipa moneki timotlasojkamatiskeh inawak Dios por nomejwah, tokniwah non Dios nomechtlasojtla. Porke Totajtsi achto yonomechpéjpenki kemi se tlamánali para nomechmakixtis por n Espíritu non nomechycholchipawa inawak, iwa ika itlajtol non nomejwah ya nonkineltokah. ¹⁴ Dios onoméchnotski ijkuak tejwah otomechtlapowijkeh n kualitlájtolli non temakixtia, iwa ijko nomejwah xikselikah iweyilis n Toteko Cristo Jesús.

¹⁵ Ijko kiné, nokniwah, ximochikawakah, iwa amo xikilkawakah tlan otomechmachtijkeh tejwah tonewiah noso ika se amatlajkuiloli. ¹⁶ Inewia n Toteko Cristo Jesús, sansikah iwa n Totajtsi Dios, Akin techtlasojtla iwa kichiwa matimochiakah ika pakílistli para tiaskeh inawak, kichiwa porke de milajka techiknomati, ¹⁷ manomechycholchikawa iwa manomechmaka chikawálistli para xikijtokah iwa xikchiwahak nochipa tlan kuali.

3

Xiktlatlanilikah n Totajtsi Dios matechpalewi

¹ Tokniwah, noiwa tomechtlatlaniliah ximotiotsajtsilikah inawak Dios para matechpalewi, iwa ijko sentetl makixmatikah itlajtol n Toteko Jesús, iwa miakeh makiyekselikah ika tlasojtlálistli kemi nomejwah ononkiselijkeh. ² Noiwa ximotiotsajtsilikah para amitla matechtoktikah n tlakah non amo kualteh iwa tlajtlakolchijkeh, porke amo nochteh kineltokah Dios. ³ Pero n Toteko Cristo, nochipa kichiwa tlan kijtoa, iwa Ye nomechmakas chikawálistli iwa nomechpalewis para amo xiwetsikah imak n amokualitlakatl. ⁴ Iwa tejwah titlaneltokah ixpa n Toteko nomejwah nonkichiwah iwa nochipa nonkichijtoskeh tlan tejwah yotomechnajawatijkeh. ⁵ N Toteko Jesús makiyakana nomoyolo iwa nochipa xiktlasojtlakah n Totajtsi Dios iwa xiweletikah xixkikokah n tlajjowilistli kemi Cristo okixiko.

Moneki matitekitikah n tlaneltokakeh

⁶ Tokniwah, tomechnawatiah itech itoka n Toteko Cristo Jesús, amo ximowikakah iwan tokniwah non amo kinekih tekitiskeh, nion kinekih yeknemiskeh kemi tejwah yotomechmachtijkeh. ⁷ Porke nomejwah kuali nonkimatokeh kenijki nonyeknemiskeh. Porke ijkuak otichantitokah nomowah, nochi otikyekchijkeh. ⁸ Amitla otikkuajkeh sanijki. Yej otitekitekah tlajka iwan yúak, para amaka tiktekimakaskeh. ⁹ Maya otiwelatih tomechtlatlaniliskiah techpalewikah, amo ijko otikchijkeh, yej otitekitekah iwa nomejwah noijkó xikchiwahak. ¹⁰ Keman otikatkah nomowah, otomechilijkeh tla aka amo kineki tekitis, amo matlakua. ¹¹ Porke otikmatkeh sikimeh de nomejwah san tlan yejwah kinekih kichijtinemih iwa amo kiwilitah tekitiskeh, yej san kintsatsakuilijtinemih akimeh kichijtokeh intekih. ¹² Nonteh tokniwah, tikinnawatiah ika n tlanawátilli non Toteko Cristo Jesús otechmák, mayektekitikah para kimotlaniliskeh tlan kikuaskeh iwa amo makinkuesokah oksikimeh.

¹³ Nokniwah, nochipa xikchiwahak tlan kuali iwa amo ximosotlawakah. ¹⁴ Tla aka amo kichiwa tlan tikijtoah itech nin amatlajkuiloli, kuali xikitakah akí, iwa ayakmó iwa ximonelokah, para ijko mapinawa. ¹⁵ Amo xikkokolikah, yej xiknonotsakah porke noiwa nomokni.

Pablo momakawa

¹⁶ Inewia Toteko non kitemaka yolsewílistli, manomechmaka iyolsewilis nochipa itech nochi tlan nonpanoskeh. N Toteko nochipa mayeto nomowah.

¹⁷ Ne Pablo, nomechontlajpaloa iwa nomechijkuililia ika noma. Nochteh noamatlajkuilolwah ijki nikinmixmachiotia para xikmatikah milák ne nomechintitlanilia.

¹⁸ N Toteko Cristo Jesús manomechmaka itiochiwalis nochteh nomejwah.

San Pablo sikinika kitlajkuililia n Timoteo

Pablo kitlajkuililia n Timoteo

¹ Ne Pablo, ni itlatitlanil Cristo Jesús ika itlanawatil Dios Totemakixti iwa Cristo Jesús, Akin itech timoyolchikawah. ² Nimitsontlajkuililia Timoteo, akin otimochiwako tinokone ken otikneltokak Cristo Jesús ijkuak ne onimitsmatiltil itlajtol. Dios Totajtsi iwa Cristo Jesús Toteko mamitstlasojtlakah iwa mamitstiochiwakah iwa mamitsmakakah yolseklistli.

Monextiskeh tlamachtijkeh tekajkayajkeh

³ Ijkuak onia Macedonia, onimitsstlatlaujti ximokawa Éfeso iwa xikinnawati sikimeh tlakah amo makitemachtikah ok se tlamachtiflistli, ⁴ nion makinkakikah tlájtolteh teka-manalwijkeh noso kenijki okichiyayah intatawah ijkuak onemiah. Noni san kichiwa mamokualanikah iwa amo techpalewiah matikchiwakah n tekittl non Dios otechnawati matikchiwakah ika tlaneltokálistli.

⁵ Tlan axa nomechnawatijtok, nikneki xikajsikamatikah nonkipiah nonmotlasojtlaskah ika nomoyolo chipawak, kemi tetlasojtlah akimeh kipiah intlanamikilis iwa intlaneltokalis chipawak. ⁶ Sikimeh yokikakajtejkeh nochi tlan kuali, iwa yomoixpolojkeh itech nonteh tlájtolteh non amitla impati. ⁷ Yejwah kinekih kitemachtiskeh intlanawatil,* pero nion yejwah innewiah kajsikamatih, amo milák tlan kitemachtiah ika nochi inyolo.

⁸ Tikmatokeh milák kuali itlanawatil Moisés tla se kiyektekitiltia kemi Dios kimonekiltia. ⁹ Noiwa tikmatokeh n tlanawátili mach omoijkuilo para akimeh kichiwah tlan kuali. Yej omoijkuilo para non amo teneltokakeh, iwa n tlajtlakolchijkeh, non amo kineltokah Dios iwa fiero kitenewah. Noiwa para non kinmiktiah intajwah, iwa nochteh n temiktijkeh, ¹⁰ noiwa para non ayamó monamiktiah iwa ya pewa momekatiah, iwa n tlakah non kinwilitah tlakah, iwa n kinmichtekih tlakah iwa satepa kinnamakah, noiwa akimeh xolopijtinemih, akimeh kijtojinemih itla tlan amo milák. Nochteh ninteh tlajtlákolteh kixpanawiah n chipawak tlamachtiflistli. ¹¹ Ye ni tlan kitemachtia n kualitlájtoli non kuajkualtsi iwa techmakixtia, non Dios weyijkatitok onechnawati manitetlapowi.

Pablo motlasojkamati ken Dios teiknomati

¹² Niktlasojkamati n Toteko Cristo Jesús, Akin onechmák chikawálistli para manitetlapowi de itlajtol, porke Ye okitak nikmati niktlakita. ¹³ Achte fiero onitlajtoaya de Cristo iwa onikintotojtokaya iwa onikinwijwikaltiaya akimeh okineltokayah. Dios onechiknoma maya ne ayamó onikneltokaya, iwa mach onikmatia tlan onikchiwaya. ¹⁴ Ijkó kiné, n Toteko onechiknoma, yika satlawel onechtiochi iwa ijko manikneltoka iwa manitetlasojtla kemi Cristo Jesús.

¹⁵ Nin tlájtoli milák, iwa nochteh kipiah kineltokaskeh: Cristo Jesús owala nika itech tlaltikpaktili okinmakixtiko n tlajtlakolejkeh, iwa ne okachi nitlajtlakolchi de nochteh n tlajtlakolchijkeh. ¹⁶ Yika, ken ne onikatka okachi amo nikuali, Dios onechiknoma iwa ijko notech okiteititi kenijki tetlasojtla. Ijko akimeh kineltokaskeh kipiaskah yolflistli non ayik tlami. ¹⁷ ¡Yika, matiktlakitakah iwa matikweyilikah Torey non nochipa yolitok, iwa ayik miki, non amaka kitika, non sanwel Ye Dios! ¡Ijko mamochiwa!

¹⁸ Timoteo nokone, nikneki kuali xikchiwa tlan nimitsnawatia iwa xiktlanili tlan amokuali ika motlaneltokalis iwa ika kuali motlanamikilis, ijko kemi n profetas okitenkixtijkeh tlan Dios okinmili tikchiwaskia. ¹⁹ Amo xikchiwa kemi sikimeh non amo okinekeh okikakeh intlanamikilis iwa ijko okipoljkeh itlaneltokalis. ²⁰ Ijko okichijkeh n Himeneo iwa Alejandro, non ne onikintemák imak satanás para mamomachtikah amo fiero makitenewakah Dios.

* 1:7 Porke nomejwah nonkikawah tlan Dios technawatia, matikchiwakah iwa san nonkitlakitah tlan okichiyayah nomotatawah. Xikamapoa Marcos 7:8-13.

2

Kenijki moneki timotiotsajtsilikah

¹ Ne nomechtlajtlanilia ximotiotsajtsilikah por nochteh n tlakah, noiwa xiktlajtlani-likah Dios makintiochiwa iwa makimpalewi itech tlan kimpoloah. Nochipa ximotlasojkamatikah. ² Ximotiotsajtsilikah por akimeh nomechnawatiah iwa por nochteh n tekiwajkeh, para matiyetokah ika pakilistli iwa mayeto yolsekwilitli, iwa matinemikah ika toyolo chipawak inawak Totajtsi Dios itech nochi tlan tikchiwah. ³ Porke ye ni tlan kuali iwa kiyolpaktia Dios Totemakixti, ⁴ Ye kineki mamomakixtikah nochteh iwa makixmatikah tlan milák. ⁵ Sanwel onka se Dios, iwa sanwel se Tlakatl weleti kintlajtolpalewia n tlaltikpaktlakah para Dios makintlapojpolwi: non Tlakatl, Ye n Cristo Jesús. ⁶ Cristo Jesús omotemák makimiktikah para tinochteh otechtlaxtlawili totemakixtilis, iwa nochi noni omoteixmatilti keman oajsik non tonati. ⁷ Yika Dios onechtlali manitetlapowi itlajtol iwa maniyeto itlatematilti, para manikinmacthi n kualitlájtolli non amo judíojeteh. Amo nitlakajkayawa, milák tlan nikijtoa.

⁸ Yika, sentetl nikneki mamotiotsajtsilikah n tlakah. Iwa ijkuak motiotsajtsilikah, makinmajkokuikah inmawah ika inyolo chipawak, amo makichiwakah ijkuak kualantokah noso ijkuak mokuakualanijtokeh. ⁹ N siwameh makimotlalilikah intlakeh kemi Dios tlanawatia, iwa amo mamochijchiwah ika tlakemilt patio, ika oro, ika perlas, amo satlawel makiyektlalilikah intsonkal para moweyiliskah. ¹⁰ Okachi kuali, n tokniwah makinmitakah por tlan kuali kichiwah, kemi moneki makichiwakah n siwameh non ya kitlakitah n Totajtsi Dios. ¹¹ Noiwa n siwameh ijkuak moololoah para kikakiskeh itlajtol Dios, moneki san matlakaktokah iwa makimatikah matetlakitakah. ¹² Porke ne amo niktekawilia se siwatl matlamacthi nion makinawatijto n tlakatli, yej san mamokajtia. ¹³ Porke Dios achto okichijchi Adán, iwa satepa n Eva. ¹⁴ Amo okikajkayajkeh Adán, yej Eva, iwa ijkuak okikajkayajkeh n siwatli, ijkuakó oneski n tlajtlákoli. ¹⁵ Pero n tesiwa momakixtis tla kuali kinmokuitlawis ipilwah, tla kineltokas Toteko Cristo Jesús, tla tetlasojtlas, tla nemis ika iyolo chipawak iwa mayeto yekmilajka.

3

Kenomi moneki manemikah n tlayakankeh

¹ Nin tlájtoli non axa nomechilis, milák: tla aka kineki kinyakanas n tokniwah non kineltokah Cristo Jesús, kuali tekittl kineki kichiwah. ² Yika, akin kinyakantinemi n tokniwah, moneki yetos se tlakatli yekmilajka para amaka makiteili tenawak. Non tlakatli makipia san se isiwa, iwa mayeto tlanamakiliso. Noiwa mayeto yekmilajka iwa kuali mamoyekkuika iwan oksikimeh. Nochipa makinyekseli icha akimeh kontlajpaloh, iwa makimati kenijki temachtis. ³ Amo matlawana nion san mamokualanijtinemi. Mayeto se kuali tlakatli teyolsekwi, iwa amo san makilnamikto n tomi. ⁴ Makimati kenijki tlanawatis itech icha, iwa makinmititi ipilwah mateneltokakah iwa matetlakitakah. ⁵ Porke tla se amo kimati kenomi kinyakanas non de icha, amo weletis kinyakanas non moololoah itech Itoka Cristo Jesús. ⁶ Yika, se tlayákanki amo mayeto se non sikin okineltokak Cristo Jesús, amo kichiwa pewas moweyilis iwa wetsis kemi owetski n amokualitlakatl. ⁷ Noiwa se tlayákanki moneki mayeto se akin noiwa makitlakitakah non amo kineltokah Dios, para amo fiero matlajtokah de ye iwa ika no mawetsiti imak n amokualitlakatl.

Kenomi moneki manemikah non tlapalewiah kan mooloah

⁸ Ijkó noiwa akimeh kimpalewiah n tlayakankeh moneki nochteh makinyektlakitakah, makichiwakah tlan kijtoah, amo matlawanakah, nion makitlawelnekikah kitlaniskah tomi non amo ika kuali motlani. ⁹ Makitlakitakah itlajtol Dios non otomechmatiltijkeh, iwa tejwah tikneltokah. Noiwa makipiakah intlalnamikilis chipawak. ¹⁰ Achto makinyejyekokah kox weletis kichiwaseh non tekittl, iwa tla nonteh tlakah kuali kichiwah inteki, ijkuakó makintlalikah matekitikah. ¹¹ Insiwa nonteh tlapalewijkeh kipiah de kintlakitaskeh iwa amo matepojpojtinematikah, nion matlakajkayawakah. ¹² N tlapalewi moneki makipia san se isiwa, iwa makimati kenijki kinyakanas ipilwah iwa nochteh non

de icha. ¹³ Porke n tlapalewijkeh non kiyekchiwah inteki, kimotlaniliah tlakítalistli iwa ijko okachi moyolchikawah kintlalwiskeh oksikimeh noiwa makineltokakah Cristo Jesús.

Semi weyi tlan Dios otechnextili

¹⁴ Niknektok nias totoka nimitsontlajpaloti, achto nimitstlajkuililia. ¹⁵ Porke tla ok niwejkawas nika, nikneki xikmati kenomi moneki timoyekwikas iwa n tokniwah non kineltokah Cristo Jesús. Yejwah akimeh kimajmanah itlaneltokawah Dios, Akin milák yolitok. Iwa ninteh kitlaxilijtok iwa itech mokitskijtok tlan milák. ¹⁶ Tinochteh tikmatokeh nik weyi kijtosneki tlan Dios otechnextili itech tlan axa tikneltokah:

Ye omochiwako tlakatl, iwa omonextiko tonawak;
n Espiritu okiteixpanti yolchipawak
iwa n ángeles okitakeh.

Otetlapowijkeh de Ye kan chantitokeh non amo judíojeteh.

N tlaltikpaktlakah okineltokakeh
iwa Totajtsi Dios okiseli kan ilwikak.

4

Itech iksemi tonatijmeh miakeh ayakmó kineltokaskeh n Cristo Jesús

¹ N Espiritu techyekmatilia itech iksemi tonatijmeh sikimeh mach ok kineltokaskeh. Yej okachi kintlakitaskesh espíritu tekajkayajkeh iwa intlamachtilis n demonios. ² Kinkakiskeh n íxkopteh iwa tekajkayajkeh, nonteh ayakmó pinawah ijkuak kichiwah tlan amokuali, ken sepowi intlalnamikilis kemi ijkuak sepowi se toma noso se tokxi. ³ Nonteh tlakah tekajkayajkeh mach ok kitekawiliskeh se mamonamikti, nion se makikua itla tlákuali, maya Dios okichijchi nochi tlan mokua. Akimeh kineltokah iwa akimeh kixmatih tlan milák, makitlasojkamatikah iwa makimomajsewikah. ⁴ Nochi tlákuali non Dios okichijchi, kuali se kimomajsewis. Yika, amo ik nepa xiktalikalih, yej xikselikah iwa xiktlasojkamatikah n Totajtsi Dios. ⁵ Porke ika itlajtol Dios iwa ika tiotsajtsilistli, n tlákuali mokawa chipawak inawak Dios.

Se kuali tékitki de Cristo Jesús

⁶ Tla tikinmachtis n tokniwah nochi tlan nimitsilijtok, te tiyetos se kuali tlakéwale de Cristo Jesús. Ijko okachi timochikajtias ika n kualitlájtol non tejwah tikneltokah iwa ika nochi kuali tlamachtilistli non otimitsachtijkeh iwa te tikneltokatiwits. ⁷ Pero amo xikinneltoka n tlapóalisteh non amitla tepalewiah iwa san tekuatlapololiah. Te okachi ximomachtis kenomi timotemakas ika nochi moyolo imak Dios, ⁸ tla tiktekitiltiah tokuerpo iwa tikchijchikawah, okachitsi techpalewia, pero tla timosenmakaskeh imak Dios okachi techpalewis, porke techmakas nochi tlan kuali axa ijkuak tiyolitokeh, iwa satepa ijkuak oksepa timoyolitiskeh. ⁹ Nin tlájtol milák iwa moneki nochteh makineltokakah. ¹⁰ Por noni, tejwah titekith chikawak maya fiero techtoktiah, porke timochixtokeh itech Totajtsi Dios non yolitok, Ye Akin techmakixtia, iwa okachi nekateh akimeh kimopantiah.

¹¹ Ye ni tlan moneki tikinnawatis. ¹² Amitla xikchiwa tlan ika weletis tlajtoskeh fiero de te por ok titélpochtli. Yej motech makitakah n tokniwah

kenijki kipiah de tlajtoskeh,
kenijki yeknemiskeh,
kenijki tetlasojtlaskeh,
kenijki kipiaskesh tlaneltokálistli iwa
kenijki nemiskeh ika inyolo chipawak.

¹³ Asta keman maniajsiti ompa, te nochipa xikimpoilijto n kualitlájtol nochteh n tokniwah xikinyolchikawa iwa xikinmachtis. ¹⁴ Xitekiti ipan tekittl non Dios omitsmák ijkuak tokniwah non tlayakantokeh motech okintlalijkeh inawah. 2 Ti. 1:6

¹⁵ Xikmosenmaka nochi tlan yonimitsnawnawati, iwa ijko nochteh kitaskeh tikyekchiwa moteki. ¹⁶ Ximotlachili te monewia iwa kuali xikita tlan tiktemachtia, iwa ayik ximosoj-sotlawa. Tla ijko tikchiwas, amo san te timomakixtis, yej noiwa momakixtiskeh akimeh mitskakiskeh.

5

Kenomi moneki timowikas iwa n mokniwah tlaneltokakeh

¹Amo xikajwa se non ya tetajtsi, okachi kuali xikyekonotsa kemi yetoskia mota, iwan telpokameh xikinyekonotsa kemi yetoskia mokniwah. ²Noiwa n tenantsitsinteh xikinyekonotsa kemi yetoskia mona, iwan ichpokameh xikinnonotsa ika moyolo chipawak kemi yetoskia moweltiwah.

³Xikimpalewi n iknosiwameh non milák amo kipiah akin kimpalewis. ⁴Pero tla se iknosiwatl kimpia ipilwah noso ixwiwah, yejwah moneki kipalewiskeh iwa kintlasojt-laskeh intajwah, ijkó kinkopiliskeh n tlasojtlálistli non intajwah yokinmakakeh. Ijkó kipaktiskeh n Toteko Dios. ⁵Se iknosiwatl non milák yomoka iselti, kitlalia itlaneltokalis inawak Dios, tlajka iwa n yuak motiotsajtsilia iwa kichia makipalewi. ⁶Pero n iknosiwatl non san mokalakijtinemi iwan tlakah, miktok inawak Dios maya ok yolitok. ⁷Nochi ni xikinnajawati para amaka fiero makintenewah. ⁸Porke tla aka amo kimpalewia non ken kimita, iwa okachi tla amo kimpalewia non de icha, non tlakatl inewia kitenextia mach milák tlaneltoka iwa okachi amokuali kichijtok ke non amo kineltokah n Toteko Dios.

⁹N iknosiwatl non tikmachotis makipalewikah itech tiopa, moneki mayeto se non ya kipia eyi póali (60) xiwitl iwa ijkuak omoka iselti ayakmó oksepa omonamikti. ¹⁰Mayeto se siwatl non mamoixmato ika tlan kuali okichi, kijtosneki, kuali okinyayákanki ipilwah, otekalotiaya icha, okimpakiliaya inmikiwah n tokniwah non kineltokah Cristo Jesús. Noiwa ye okimpalewiaya akimeh otlaijyowiayah, noso itla ok se kuali tekittl okitechiwili.

¹¹Amo xikinmachotikah n iknosiwameh non ayamó kipiah eyi póali (60) xiwitl. Porke ijkuak kinyoltilana tlan kelewia inkuerpo, mach ok kinekih kimopantiskeh Cristo iwa oksepa kinekih monamiktiskeh, ¹²ijkó san yejwah motlajtlakolmamaltiah porke amo kichiwah tlan okisentlalijkeh kichiwaskeh inawak Dios. ¹³Iwa okachi mokopah tlat-sijkeh iwa pewah techankajlakatinemih, iwa amo san tlat-sijkeh, yej noiwa mokopah xolópijteh, iwa san kan yetos mokajkalakijtinemih iwa tepojpojinemih iwa kijtojinemih tlan amo inteki. ¹⁴Yika ne nikneki non omokajkeh iknosiwameh iwa ok ichpochtikeh, mamonamiktikah, makimpiakah impilwah, iwa makiyekmokuittlawikah incha para amaka makimpjpoa. ¹⁵Porke sikimeh iknosiwameh ayakmó kineltokah Cristo yej kichiwah tlan kipaktia sataná.

¹⁶Tla se siwatl non yokineltokah Cristo, kipia se iknosiwatl non ken kita, moneki kipalewis, para amo makintekimaka n tokniwah. Ijkó yejwah weletiskeh kimpalewiskeh n iknosiwameh non milák amo kipiah akin kimpalewis.

¹⁷N tlayakankeh non kichiwa kuali inteki, moneki okachi makintlakitakah. Okachi non kitematiltiah iwa kitemachtiah itlajtol Dios. ¹⁸Porke itlajkuilol Dios kijtoa: “Amo xiktalili itempoxa n toro ijkuak kitlajtlaksatok n trigo.” *Dt. 25:4* Noiwa kijtoa: “N tlakéwale moneki makimakakah itlaxtlawil.” *Lc. 10:7*

¹⁹Tla seme de nomejwah wits kiteiliki se tokni non tlayakantok, amo san nima xiktla-jtlakoltikah tla amo onkateh amo noso eyi akimeh makijtokah tlan milák. ²⁰Pero akimeh ok kichijtinemih tlajtlákoli, xikinmajwa ixpa n nochteh, ijkó n oksikimeh tokniwah non kineltokah Cristo Jesús mamawikah iwa amo matlajtlakolchiwakah. ²¹Nimitsnawatia ixpa n Dios, ixpa n Toteko Cristo Jesús, iwa ixpa iangelwah yolchipawakeh, xikchiwa nochi tlan yonimitsnawati, iwa amo san xikpejpena tlan mitspaktia tikchiwas. ²²Ijkuak tikpejpenas se tlayákanki, kuali xiximati akin tiktalalia, porke tla non tokni kichiwa tlan amo kuali, te noiwa mitsonwilanakeh. Te nochipa xikchiwa tlan kuali.

²³Kemi nochipa mitskokojiwits moijti, ayakmó xikoni san atl, noijki xikoni achitsi vino.

²⁴Intlajtlakolwah sikimeh tlakah san nima motah maya ayamó kintlatsintokiah, pero intlajtlakolwah n oksikimeh, mach niman motah, yej satepa. ²⁵Ijkó noiwa, san nima momati ijkuak se kichiwa tlan kuali, iwa kualchiwa maya amo san nima mota tlan kuali se kichiwa, amo weletis tlaatitos nochipa.

6

¹ N tokni non kineltoka Cristo iwa kajki kemi se tlanémaktli,* moneki makitlakita kuali iteko, iwa ijko amaka fiero kitenewas Itoka Totajtsi Dios nion tlan tiktemachtiah. ² Iwa akimeh tekutih inawak se tekowa non kineltoka n Toteko Jesús, moneki okachi makiektlakitakah porke noiwa tlaneltokakeh. Iwa okachi moneki kiyektektiliskeh, porke akin kitekitilijtokeh, noiwa se non kineltoka n Toteko Dios.

Tlan okachi ipati

Xiktemachtia iwa xiktetlapowi de nin tlájtoli. ³Tla aka tlamachtia iwa amo ye tlan milák itlajtlotl Cristo Jesús, amo ye tlan kitemachtia n kualitlájtolli non tejwah tikneltokah. ⁴Akin ijko tlamachtia mach itla kimati iwa satlawel moweyilia. Ye mochiwa kemi se kokólistli porke nochipa motlanetewiltijtok ika oksikimeh tlájtlotleh, yika wits n nexikólistli, mox-exeloah, fiero motenewah iwa ayakmó moneltokah, ⁵iwa nochipa mokuakualanijtinemih porke amo kuali intlanamikilis iwa amo kixmatih tlan milák. Non temachtia kiyeyekolia weletis motomintis ika itlajtlotl Dios. ⁶Milák, miak ipati iwa techpalewia n kualitlájtolli non itech titlaneltokah, pero sanwel akin yolpaki ika tlan kipia. ⁷Tejwah amitla otikwalikakeh itech nin tlaltlákpakli iwa amitla weletis tikwikaskeh. ⁸Yika, tla tikpia tlan tikkuaskeh iwa tlan tikmokentiskeh, san ika ye matipakikah. ⁹Pero akimeh kinekkih motomintiskeh, wetsih imak n tlajtlákoli porke san tlan kajsih pewa kichiwha para okachi kitlaniskeh tomi. Yika nochi no kinkuatlapololtia, iwa mixpojpolaoh. ¹⁰Yika keman se kitlalia iyolo itech tomi, pewa kichiwa nochi tlan amokuali. Miakeh kikawah Dios, iwa san yejwah innewiah kimotetemiliah intlajiyowilis.

Pablo kiyolchikawa n Timoteo

¹¹ Pero te Timoteo, te titlakatl de Dios, xikcholili nochi ni iwa nochipa ximilajkanemi, ximotemakti inawak Dios iwa kuali xitlaneltoka, xitetasojtla, xixkiko nochi tlan tipanos, iwa ayik ximoweyitlali.

¹² Ximochijchikawa itech motlaneltokalis, iwa xikmoaxkati tlan ika tiyolitos nochipa, non ika omitsnotskeh iwa inmixpa n miakeh tokniwha otikijto titlaneltoka. ¹³ Axa, ixpa n Totajtsi Dios, akin kitemaka yolflistli itech nochi tlan onka, iwa ixpa n Cristo Jesús, akin noiwa kuali otlajto iyakapa n Poncio Pilato, ne nimitsnawatia ¹⁴xiktlakita nochi tlan nimitsilia para amaka mamitsixnamiki. Ijko xikchijto asta mawalmuika Toteko Cristo Jesús. ¹⁵Ijkuak ajsiki non tonati, Dios kinextis n Tlakatl tlatichiwali iwa weletini, Ye n Rey Akin kinnawatijtok nochteh n reyes iwa Tekowa de nochteh n tekowajkeh. ¹⁶Sanwel Dios Ye Akin ayik mikki, iwa kajki ijtik tlawilnextflistli kan amaka weleti mijkuania. Amaka tlakatl yokitak nion weletis kitas. ¡Nochipa iaxka n weyflistli iwa n weletiflistli! Ijko mamochiwa.

¹⁷ Akimeh kitlawelpiah tomi itech nin tlaltlákpakli, xikinnawati amo mamoweyijkamatikah, nion makitlalikah inyolo itech tlan kipiah, porke noni kimati tlami. Okachi kuali, makitlalikah inyolo itech Totajtsi Dios, Akin yolitok iwa techmaka nochi tlan techpoloa para matipaktokah. ¹⁸Xikinnawati makichiwahak nochipa tlan kuali, makitemakakah iwa makixelokah tlan kipiah, iwa ijko motomintiskeh inawak Dios. ¹⁹Ijko, kipiaskeh kan ilwikak tlan ayik kipolos ipati, iwa kipiaskeh n nemilistli non ayik tlami.

²⁰ Timoteo, kuali xikchiwa tlan Dios omitsnawati. Amo xikinkaki oksikimeh tlájtlotleh non amitla impati, nion tlájtlotleh tekuatlapololtijkeh. N tlaltlákpaklakah kimoliah kuali

* 6:1 Tlanémaktli: Acho ijkuak se tlakatl okitewikiliaya miak tomi iwa ayakmó okikopaya, okinamakaya. N tlakatl non okitewikiliaya non tomi, okinamakaya kemi yolcameh monamakah. Iwa ijko okimokopiliaya itomi, iwa ijkuak okitekitiliaya n tlakatl non okiko amitla okitlaxlawiaya. Iwa okipixtoka itech icha iwa okitekitiliaya san tlan oras okinekia porke amo okipixtoka kemi se tlakéwale yej kemi se tlanémaktli.

tlamáchtli, san ika noni moixkajkawah. ²¹ Porke sikimeh non okineltokakeh non tlamáchtli amo kual, omoixpolojkeh iwa ayakmó tlaneltokah.

Itiochwalis Dios mayeto nomowah.

San Pablo ojpa kitlajkuililia n Timoteo

Pablo kitlajkuililia n Timoteo

¹ Ne Pablo ni itlatitlanil n Cristo Jesús, Dios ijko okimonekilti maniktematilti nin yankuik nemilistli non Dios okijto kinmakas akimeh milak kineltokaskeh n Cristo Jesús. ² Nimitstlajkuililia nin amatlajkuilili te notlasojkone Timoteo, nimotlatlaujtia inawak Dios Totajtsi iwan Toteko Cristo Jesús mamitsmakakah tlatiochiwálistli, teiknomatlistli iwa yolsewilistli. ³ Nochipa nimitsilnamiki ijkuak nimotiotsajtsilia, tlajka iwa n yuak nimotlasojkamati inawak Notajtsi Dios Akin niktekitilia ika chipawak notlalnamikilis kemi okichijkeh notatawah. ⁴ Ijkuak nikilnamiki kenijki otichokak, niknekiskia oksepa nimitsitas iwa ijko niyolpakis. ⁵ Porke nikilnamiki kenijki milak ika nochi moyolo tikneltoka Dios, ijko kemi oyektlaneltokakeh monanatsi Loida iwa mona Eunice, iwa ne kuali nikmatok te milak titlaneltoka.

⁶ Yika nimitsilnamiktia xiktekitilti n weletlistli non Dios omitsmak ijkuak mopa onim-itsintlalili nomawah. ⁷ Dios amo otechmak Iespíritu para matimaujtinemikah, yej para matikpiakah weletlistli, matitelasojtlakah iwa matikmatikah matikxikokah tlan amo kuali techtoktiah. ⁸ Yika, amo xipinawa tiktetlapowis itlajtol Toteko Jesús, nion xipinawa tla nitsaktok. Yej ika iweletilis n Totajtsi Dios xixkiko n tlajjowilistli por tiktetlapowia n kualitlajtoli. ⁹ Dios otechmakixti iwa otéchnotski matinemikah ika toyolo chipawak. Amo por otikchijkeh itla kuali, yej porke Dios ijko okimonekilti, iwa por ikuartilis non techpialia ken tiseititokeh inawak Cristo Jesús, desde ijkuak ayamó okatka nin tlatlákaptli. ¹⁰ Iwa axa Dios okiteititi itlasojtlalis ijkuak owala Totemakixti Cristo Jesús, Akin okitlanki iweletilis n miklistli, iwa por n kualitlajtoli non temakixtia, okitenexti n nemilistli non ayik tlamis.

¹¹ Dios onechtlali maniktematilti nin kualitlajtoli, Ye onechtflanki kemi itlatitlanil iwa tlamachtinawak non amo judíos. *1Ti. 2:7* ¹² Yika, ne nitlajjowia, iwa mach nipinawa, ne kuali nikmati akin inawak nitlaneltoka. Noiwa kuali nikmatok Ye kipia weletlistli para kimokuitlawis tlan yoniktlati imak, asta neká tonati ijkuak oksepa wits Cristo.

¹³ Nochipa xikinmachtin n kualitlajtoli non ne onimitsmachtin, iwa xinemi ika tlaneltokálistli iwa tlasojtlálistli non tikpiah por tiseititokeh iwan Cristo Jesús. ¹⁴ Ika ichikawalis n Espiritu Santo non kajki itech toyolo, xikmokuitlawi n kuali tlamachtlistli non Dios omitsmaktli.

¹⁵ Ijko ken te ya tikmati, nochteh n tokniwah non chantitokeh Asia onechkakajtejkeh, noiwa n Figelo iwa n Hermógenes. ¹⁶ N Toteko makinmiknomati ichanejkawah Onesiforo, ye miak welta onechylchika, iwa amayik opinawak ijkuak onechitak nitsaktok. ¹⁷ Yej ijkuak okatka Roma, onechtemojtinenki, iwa amo omosewi asta onechajsik. ¹⁸ N Totajtsi Dios makiknomati n Onesiforo itech iksemi tonati. Timoteo te kuali tikmati kenomi miak otechpalewih n tokni Onesiforo ompa Éfeso.

2

Xiyeto se kuali soldado n Cristo Jesús

¹ Te nokone, ximoyolchikawa por tikpiah ikuartilis Cristo Jesús. ² Tlan te yotechkakili onikijto inmixpah miakeh tlaneltokakeh, noni xikinmachtin n tokniwah non milak motemaktiah inawak Dios, ijko yejwah noiwa kinmaktiskeh oksikimeh.

³ Ijko kiné, te xixkiko nochi tlajjowilistli, kemi se kuali soldado de Cristo Jesús. ⁴ Nion se soldado weleti mokalakia itech ok se tekitl, porke sa mochixtok kichiwas tlan kinawatis akin kiyakana. ⁵ Ijko noiwa, se non motlatlani iwan oksikimeh, amo kimakah tlan okimotlanili, tla amo okichi kemi omonekia kichiwas. ⁶ Akin tekiti itlala, kuali makikua achto tlan kitooka. ⁷ Kuali xikyeyekoli tlan nimitsilijtok, iwa Toteko Cristo Jesús mitsajskamatiltis nochi.

⁸ Xikilnamiki n Cristo Jesús non walewatok de Rey David, iwa omoyoliti intsalko mikemeh ijko kemi kijtoa n kualitlajtoli non ne niktemachtia. ⁹ Por niktemachtia nin kualitlajtoli axa nitlajjowia, nitsaktok iwa nechikxilpiah ika kadena kemi niyetoskia se temikti. Pero itlajtol Dios amo ilpitok. ¹⁰ Ika no, nochi nikxikoa por akimeh Dios okimpéjpenki. Ijko yejwah kipiaskah n temakixtílistli non techmakah Cristo Jesús iwa ijko tiyetoskeh nochipa itech imawistilis non ayik tlami.

¹¹ Tlan kijtoa nin tlajtoli milák:

Tla yotimikeh iwan Cristo,
noiwa tiyolitoskeh iwan Ye.

¹² Tla tikxikoah n tlajjowílistli,
noiwa titlanawatiskeh iwan Ye.
Tla tikijtoah amo tikixmatih,

Ye noiwa kijtos amo techixmati.

¹³ Maya tejwah amo tikchawah tlan otikilijkeh,
Ye kichiwa tlan kijtoa,
porke Dios ayik motlajtolpatla.

Xiyeto se kualitlajtoli

¹⁴ Xikinmilnamikti n tlaneltokah tlan nimitsilis, iwa ixpa n Totajtsi Dios xikinnaj-nawati amo mamotlatlajtolkopakah ika tlajtolteh non amitla impati, nonteh tlajtolteh san kinkuatlapololtiah akimeh kinkakih. ¹⁵ Ximochijchikawa xikchiwa tlan kualitlajtoli, ijko weletis timoyekixpantis inawak Dios kemi se kualitlajtoli non amo kipia tlan ika pinawas, porke tikyektektilia n kualitlajtoli non techmatilia tlan milák. ¹⁶ Amo ximotlatlajtolkopa ika tlajtolteh non amitla impati, porke akimeh ijko tlajtoah okachi mokajkawah itech tlan amokuali, ¹⁷ iwa intemachtilis pewas moxixitinis kemi itla kokólistli non kipalanaltia tokuerpo. Himeneo iwa n Fileto ijko kichijtinemih, ¹⁸ porke mach ok kitemachtiah tlan milák, iwa kijtojinemih yopanok n tonati ijkuak Dios kinyolitis n mikemeh, iwa ijko kinkuatlapololtiah sikimeh intlaneltokalis. ¹⁹ Pero itlajtol Dios kajki kemi se tetl non tetlakxilia, iwa kipia se neskayotl: “N Toteko kinmixmatok nochteh iaxkawah”; Nm. 16:5 noiwa kijtoa: “Nochteh akimeh kitenewah itoka n Toteko kipiah kikawaskah nochi tlan amokuali.” Nm. 16:26

²⁰ Itech se weyi kali, amo sanwel onkateh xoktsimeh de oro iwa plata, noiwa onkateh de kuawitl iwa tepalkatl. Non patiojkeh, motekitiltiah san itech itla ilwitl, iwa non amo patiojkeh, nochipa kintekitiltijtokeh. ²¹ Yika, tla se kikawa nochi tlan amokuali, yetos kemi se xoktsi non patio imak Toteko Dios, Ye kitekitiltis itech nochi kualitlajtoli.

²² Xikcholili tlan amokuali kinyoltilana n telpokameh. Te nochipa xikchiwa tlan kualitlajtoli, nochipa xitlaneltoka, iwa ika tlasojtlálistli iwa yolsewílistli ximowika iwa akimeh ika inyolo chipawak kitenewah itokah n Toteko. ²³ Amo xikinkaki tlajtolteh non amitla impati iwa tekuatlapololtia, porke ya tikmatok sanwel ika se mokualania. ²⁴ Se itékitki n Toteko mach kinamiki mamokalanijtinemi, yej moneki mamoyekwika iwan nochteh. Makimati kenomi tlamachtis iwa makixiko ijkuak itla kitoktia. ²⁵ Iwa ika iyamankatlajtol makinnonotsa akimeh amo kinekih tetlakitaskeh, iwa ijko chamo Dios kinkawilis mamoy-olpatlakah para makimatikah tlan milák. ²⁶ Ijko makimatikah kenijki momakixtiskeh de imak n diablo non kinkitskijtok iwa kintoktia makichiwakah san tlan ye kineki.

3

Kenomi yetoskeh n tlaltikpaktlakah itech iksemi tonatijmeh

¹ Timoteo, noiwa moneki xikmati, itech iksemi tonatijmeh yetos miak tlajjowílistli. ² N tlakah yetoskeh xikojeteh, satlawel kiwilitaskeh tomi, moweyiliskah iwa xaxankuatiskah. Tlajtoskeh fiero de Dios, iwa mach kintlakitaskeh intajwah. Amo kimatiskeh motlasojkamatiskeh iwa mach ok kitlakitaskeh Dios. ³ Mach kimatiskeh tetlasojtlaskeh nion tetlapojpolwiskeh. Satlawel kiwilitaskeh tepojpoaskeh iwa amo kixikoskeh tlan amokuali

kelewis inkuervo, tetlajjowiltiskeh iwa kikokoliskeh tlan kuali. ⁴ Yetoskeh teichtakaw-ijkeh, ayakmó pinawaskeh nion mach itla kixmawiliskeh. Moyolpaktijtinemiskeh ika tlan amo kuali kelewia inkuervo, iwa ayakmó kitemoskeh Dios. ⁵ Kichiwaskeh kemi yetoskiah de milajka kineltokah Dios, pero ika tlan kichiwaskeh moixmatiskeh amo milák kineltokah. Iwa nonteh amo inwah ximowika.

⁶ Porke sikimeh de nonteh tlakah kiwilitah techankajkalaktinemiskeh, ika kinkajkayawaskeh n siwameh non amo tlalnamikilisejkeh iwa tlajtlakolejkeh. Ninteh siwameh nochipa kinectokeh mopaktiskeh ika tlan inkuervo kiniki. ⁷ Nochipa momachtijtokeh, pero mach ayik weletih kajsikamatih tlan milák. ⁸ Ijkó kemi Janes iwa n Jambres okixnamikah n Moisés, ijkó noiwa nonteh tlakah kitlawelitalah tlan milák. Nonteh tlakah ayakmó kuali tlan kiyejyekoliah iwa mach weletih kajsikamatih itlajtol Dios. ⁹ Nonteh mach wejka kalakitiweh, porke nochteh kinmitaskeh kuatlapolojtokeh, ijkó kemi omochijkeh n Janes iwa n Jambres non okixnamikah n Moisés.

Pablo kinajnowatia n Timoteo

¹⁰ Te tikchijtiwits tlan onimitsmacthi, tikmati kenomi niyeknemi, tikmati tlan nikneki nikchiwas, tikixmati notlaneltokalis, tikmati kenomi nikmati nimochia, tikixmati notlasojtlalis, iwa tikmati kenomi nikxikoa nochi tlan nopa wits. ¹¹ Onechtotojtokakeh iwa onechtlajjowiltijkeh Antioquía, Iconio iwa Listra, iwa nochi tlan nitlajjowijtiwits pero n Toteko nochipa onechpalewi. ¹² Iwa milák, nochteh akimeh kinekiskeh kimosenmakaskeh Cristo Jesús, san kan yaskeh kintlajjowiltiskeh. ¹³ Pero non amokualteh iwa tekajkayajkeh okachi kijtlakojtiaskeh inyolo, tlakajkayawaskeh iwa yejwah noiwa kinkajkayawaskeh.

¹⁴ Te Timoteo, nochipa xikneltoka tlan omitsmacthijkeh, non te yotikyekneltokah. Te kuali tikmatok akin omitsixtlamacthi, ¹⁵ desde tiselekonetl tikmatok tlan kijtoa itlajkuilol Dios. Ayik xikilkawa tlan kijtoa, porke mitsixtlamacthis iwa mitsmakixtis ken titlaneltoka itech Cristo Jesús. ¹⁶ Nochi tiotlajkufloli Dios otlanawati makijkuilokah, kuali matechmacthikah, ika matechnonotsakah, ika matechmilawakah iwa matechititikhah kenijki tinemiskeh inawak Dios. ¹⁷ Ijkó nochi akin ya tekone inawak Dios, kuali mamoixtlamacthi iwa makimati kenijki kichiwas nochi tlan kuali.

4

Nochipa xiktetlapowi itlajtol Totajtsi Dios

¹ Ixpan Dios iwa ixpa n Toteko Cristo Jesús, Akin wits kemi Rey para kintlajtlakoltis non yolitoskeh iwa non yomikkeh, ne saikpanoa nimitslatlaujtia, ² xiktematilti itlajtol Dios. Ximochijchikawa xitlajto ijkuak kinekiskeh noso ijkuak amo kinekiskeh mit-skakiskeh. Xikinmajsikamatilti, xikintlakawalti iwa xikinnonotsa, ayik ximosotlawa iwa xikinkajtewilijti se kuali tlamachtflistli. ³ Porke ajsiki n tonati ijkuak mach ok kinekiskeh kikakiskeh n kuali tlamáchtli, yej kintemoskeh miakeh temachtijkeh para makinmacthikah san tlan yejwah kimpaktis kikakiskeh. ⁴ Ayakmó kikakiskeh tlan milák, yej okachi kinkakiskeh akimeh kimpoah tlapoálisteh non amo milák.

⁵ Pero te nochipa xitlalnamihtinememi, xixkiko nochi tlajjowiflistli, xikmosenmaka xiktetlapowi n kualitlajtoli, iwa nochipa xikyekchiwa n tekitl non Dios omitsmák.

⁶ Ne ya nechmiktiskeh kemi se tlamánali. Ya walajsi n ora para nimikis. ⁷ Ne kuali yonikchi iteki n Dios, kemi se tlakatl non tewa motlatlani, iwa ayik onikpolo notlaneltokalis. ⁸ Axa sa nechchixtok kan ilwikak nokorona non Cristo n teyolsewi yekmilajka nechmakas neká iksemi tonati ijkuak Ye wits. Iwa amo san ne nechmaktilis, yej noiwa kinmakas nochteh akimeh sa kichixtokeh mawalmuika.

Pablo kinajnowatia n Timoteo

⁹ Xiktemoli kenijki san nima techonitaki. ¹⁰ Demas, yonechkakajte, ye okachi okiyoltlanki tlan onka itech nin tlaltífpaktli iwa yoyajki Tesalónica. Crescente oyá Galacia iwa Tito oyá Dalmacia. ¹¹ Sanwel Lucas nowa kajki. Xiktemo n Marcos iwa mowa xikwalika ijkuak tiwits, porke ye weletis nechpalewis itech noteki. ¹² N Tíquico oniktflanki mawia

Éfeso. ¹³Ijkuak tiwits, techalikili notlakeh non weyak non onikualkajte Troas icha n Carpo. Noiwa techalinwikili noamawah, pero okachi nikneki techalinwikili n ewameh.

¹⁴Alejandro n teposwitek san miak yonechtokti, n Toteko kitlaxtlawaltis san kemi onechtokti. ¹⁵Yika, te noijki ximotlachili de ye, porke kixnamiki tlan tiktemachtiah.

¹⁶Ijkuak sikinika onimotlajtolpalewi innawak n tekiwajkeh, amaka onechpalewi, nochteh onechkakajtejkeh noselti. N Totajtsi Dios makintlapojpolwi. ¹⁷Pero n Toteko onechpalewi iwa onechmák chikawálistli. Yika, oniwéletki onitetlapowi de n kualitlájtohi non temakixtia iwa onikchi makikakikah nochteh non amo judíohteh. Ijkó Dios onechpalewi iwa amo okitekawili manechmiktikah. ¹⁸Iwa n Toteko Dios nechmakixtis itech nochi tlan amokuali iwa nechwikas ilwikak kan Ye tlanawatia. ¡Nochipa matikweyilikah Dios! Ijkó mamochiwa.

Pablo iksemi momakawa

¹⁹Noiwa xikontlajpalo n Priscila iwa n Aquila, iwa ichanejkawah n Onesíforo.

²⁰Erasto omoka Corinto, iwa n Trófimo onikualkajte Mileto ken mokokoa. ²¹Xikchiwa xiwiki achto de mapewa n sewaya. Mitsontlajpaloah n Eubulo, Pudente, Lino, Claudia iwa nochteh n tokniwah non kineltokah Cristo.

²²N Toteko Cristo Jesús mayeto itech moyolo, iwa Dios manomechtiochiwa ika ikualtilis nochteh nomejwah.

San Pablo kitlajkuililia n Tito

Pablo kitlajkuililia n Tito

¹ Ne Pablo, ni itetlakewal Dios iwa ni itlatitlanil Cristo Jesús. Ye onechtítlanki manikintlaneltokti akimeh Dios yokimpéjpenki para kualí makajsikamatikah kenomi tiyeknemiskeh, ² iwa tikchiah nin yankuik nemílistli non Dios non amo tlakajkayawa yotechilih techmakas desde ijkuak ayamó okatka nin taltífpaktli. ³ Iwa axa, itech ninteh tonatijmeh, Dios Totemakixti otechnextili itlajtól iwa onechmomachiti maniktetlapowi nin tlájtoli. ⁴ Tito, ijki nimitsontlajkuililia, te tinokone porke san ken tiomeh tikneltokah Dios. Totajtsi Dios iwa Toteko Cristo Jesús mamitstlasojtlakah iwa mamitstiochiwahak iwa mamitmakakah yolsewílistli.

Kenomi moneki manemikah n tlayakankeh

⁵ Ne onimitskajte kan isla de Creta para xikyakatlami n tekítl non ayakmó oniwéletki onikyakatlami, iwa para xikíntlali tetajmeh non matlayakantokah kan moololoah n tlaneltokakeh, ijki kimi onimitsnawati xikchiwa. ⁶ Se akin kinyakanas n tokniwah moneki mayeknemi ika iyolo chipawak ijki amaka makitlajtlakolti. Amo makikajkayawa isiwa, iwa ipilwah makineltokakah Cristo Jesús para amaka makinteili kox amo tetlakitakeh noso teixnamikeh. ⁷ Porke, se akin okitekítlalijkeh makin yakana n tokniwah, imak kipixtok tlan iaxka Dios. Yika nochipa mayeknemi para amaka makitlajtlakolti. Matetlakita, amo mayeto satlawel kujejsi. Amo matlawantinemi nion mamokualanijtinemi, nion makineki tomi non amo chipawak. ⁸ Yej moneki mayeto se tlakatl non ika pakílistli maksineli akimeh kontlajpaloah icha, makichiwa nochipa tlan kualí, makipia kualí itlanamikilis, mayeto yolchipawak, mamotemakti inawak Dios, iwa makimati kenomi moyeknawatis. ⁹ Nochipa makitemachti tlan milák kijtoa n kualítlájtoli non okimachtijkeh, para weletis kinyolchikawas oksikimeh ika kualí tlamáchtli, iwa makimati kenomi kinnankilis akimeh kitlajtolkokopah.

¹⁰ Porke onkateh miakeh non amo kinekih tetlakitaskeh, iwa tekil kipojtinemih tlan mach itla ipati iwa san tlakajkayajtinemih, ijki kimi kichiwah akimeh kinekih ok matimosirkunsidarokah. ¹¹ Nonteh moneki matikinkamatsakuakah, porke kinkuatlapololtojtokeh miakeh tokniwah intech inchajcha ika se amo kualí tlamachtílistli san para kitlaniskeh tomi.

¹² Se profeta de ompa Creta, okijto: “N tlakah de Creta xolópijtech, toxkomeh, tlatsijkeh, iwa sa kimi yolkameh non tekuani.” ¹³ Iwa milák tlan okijto, yika te chikawak xikinonotsa, para mamochikawa intlaneltokalis inawak Dios, ¹⁴ iwa amo makineltokakah tlan kipojtinemih n judíojtch, nion makintlakitakah akimeh ayakmó kineltokah tlan milák.

¹⁵ Akimeh kipia intlanamikilis chipawak, nochí tlan onka chipawak, pero akimeh amo tlaneltokah nion kipia chipawak intlanamikilis, amitla onka chipawak. Asta kipia intlanamikilis iwa intlamachilis pochiktik. ¹⁶ Yejwah kijtoah kixmatih Dios, pero ika tlan kichijtinemih kinextiah amo milák. Semi tetlajyalti tlan kichijtinemih iwa amo kinekih kichiwaskah tlan Dios tlanawatia, iwa nion se kualí tekítl weletih kichiwah.

2

N kualí tlamachtílistli

¹ Tito, nochipa xitlajto kimi kijtoa n kualí tlamachtílistli. ² Xikinmili n tetajmeh non tlayakantokah mayetokah yekmilajkameh, kualí matlanamiktokah, iwa matetlakitakah, mayektlaneltokakah, matetlasojtlakah iwa mateajsikamatikah. ³ Noiwa n tenameh non tlayakantokah manemikah kimi Dios kimonekiltia, iwa amo maxolopijtinemikah, nion mamowintikah. Yej mayetokah tenameh yekmilajkameh para makinonotsakah ⁴ n siwameh non ok ichpokameh, kenomi moneki kintlasojtlaskah inmokich iwa impilwah.

⁵ Noiwa makiapiakah kualii intlanamikiis, mayetokah yolchipawakeh, makiyekmokuit-lawikah incha, mayetokah kualteh n siwameh iwa makintlakitakah inmokich, ijkó amaka kimawistetepewas itlajtol Dios.

⁶ Noiwa xikinyolchikawa n telpokameh manemikah ika kualii intlanamikiis. ⁷ Te monewia kualii xikinmachi iwa mamitsitakah kualii tlan tikchiwa. Ijkuak tikinmachiis, xikinmachi ika moyolo chipawak iwa xiyeto tiyekmilajka. ⁸ Ika kualii motlajtol xikin-nonotsa para amaka makijto amo ijkó tikinnonotsa. Ijkó san akin yetos, ijkuak kinekis nomechtlajtolkopas, mopijpinatis.

⁹ Xikinajnawati n tlanémakteh* makintlakitakah intekowajwah. Nochi makichiwakah ika kualii inyolo iwa amo san matlananankilijtokah, ¹⁰ amo makintlachtekiikah, yej makintlachilikah, ijkó oksikimeh makitakah kenijki kualtsi ijkuak itlajtol Dios Totemakixti techyakaninemi itech nochi tlan tikchiwah.

¹¹ Dios, yotechnextili kenijki satlawel techtlasojtla, iwa ika non tlasojtlálistli non Ye techpialia, nochteh n taltikpaktlakah weletis momakixtiskeh. ¹² Itlasojtlalis Dios techmachi matikkawakah nochi tlan amokuali techyoltlanah itech nin taltikpaktli. Nochipa matinemikah ika totlanamikiis chipawak, matinemikah ika yosewflistli iwa matikmopantikah Dios. ¹³ Noiwa techititika matikchixtokah ika pakflistli n iksemi tonati ijkuak walmuikas Toweyi Dios iwa Totemakixti Cristo Jesús ika nochi itlawilnextilis. ¹⁴ Cristo inewia omotemák para techmakixtis imak nochi tlan amokuali, iwa techchipawas de totlajtlakolwah iwa ijkó kinpejpenas tlakah yolchipawakeh, para makichiwakah tlan kualii.

¹⁵ Ye nin tlan moneki tikinmachiis, xikinnonotsa iwa xikinyolchikawa ika miak tekiwajyotl. Iwa amo xiktekawili aka mamitsixpanawi.

3

Tlan moneki makichiwakah n tokniwah non kineltokah Cristo Jesús

¹ Xikinmilnamikti n tlaneltokakeh makintlakitakah n tlanawatijkeh iwa n oksikimeh tekiwajkeh. Iwa sa makichixtokah ijkuak weletis kichiwaskah tlan kualii. ² Amo matepojpoakah, amo mamotekilmakakah, yej mayetokah kualteh n tlakah, iwa mamoyekwikakah iwan nochteh.

³ Yowejka, tejwah noiwa amaka otiktlakitaya iwa otikchiwaya san tlan tejwah otiknekiah. Otimoixpolojtinemiah iwa otikelewiayah tlan pitsotik. Iwa otikchijtinemiah tlan amokuali iwa otixikojmikiah, otechkokoliayah iwa otitekoliayah. ⁴ Pero ijkuak Dios Totemakixti okinnextili iteiknomatilis iwa itlasojtlalis n taltikpaktlakah, ⁵ ijkuakó otechmakixtiko, amo por tejwah otikchijkeh itla kualii, yej porke Ye satlawel otechiknoma, iwa otechmakixti ika Iespíritu Santo. Ye otechpajpak para tikpiaskeh n yankuik nemilistli iwa otechyánkuili. ⁶ Iwa por Cristo Jesús Totemakixti, Dios otechmokemi ika Iespíritu Santo. ⁷ Ika itlasojtlalis Dios yotechseli kemi tiyolchipawakeh, iwa weletis tikpiaskeh nemilistli non áyik tlamis tla tikchiah tlan Dios yokijto techaxkatilis.

⁸ Nochi tlan nimitsilijtok milák. Yika nikneki nochipa xikinmilnamiktijto, ijkó akimeh kineltokah Dios nochipa makichiwakah tlan kualii. Nin tlamachtflistli tlawel kualii iwa weletis kimpalewis nochteh. ⁹ Amo ximonanankilikah ika tlájtoltel non amitla impati, nion amo ximonanankilikah ika tlapoálisteh non nomowejkatatawah onomechintlapow-ijkeh noso ika tlan kijtoa intlanawatil. Nochi noni amitla ipati iwa amo nomechpalewia.

¹⁰ Tla aka kinxexeloa n tlaneltokakeh, xiknonotsa se noso ojpatia, iwa tla amo mitskaki, xikonewalti mawia iwa ayakmó xikkawili mawalmokopa. ¹¹ Ika noni ya tikmatis non tlakatl yokikalaki itech itsonteko tlan amokuali, iwa inewia motlajtlakoltia ika tlan kichiwa.

¹² Ijkuak nimitstilanilis n Artemas noso n Tíquico, techajtsi Nicópolis, porke yonikijto ompa nikpanoltis n sewaya. ¹³ Xikinpalewi ika nochi tlan tiweletis n abogado Zenas, iwa n Apolos, amitla makimpolo itech ojtli. ¹⁴ Ijkó tokniwah mamomachtikah makichiwakah tlan

* Tlanémakteh: N tlanémakteh kijtosneki non omonamakakeh

kuali iwa matlapalewikah ika tlan moneki akimeh kimpoloo, ijkó innemilis amo mayeto sanenka.

Pablo momakawa iwan Tito

¹⁵Nochteh akimeh nika kateh nowa mitsontlajpaloah. Ompa techintlajpalili n totlasojikniwah tlaneltokakeh.

Dios manomechtiochiwa nocteh nomejwah.

San Pablo kitlajkuililia Filemón

Pablo kitlajkuililia Filemón

¹ Ne Pablo nitsaktok por niktekitilia n Toteko Cristo Jesús. Ne iwan tokni Timoteo, timitsijkuililiah nin amatlajkuiloli te Filemón, tokni non satlawel timitstlasojtlah, ken noiwa titekiti inawak Cristo kemi tejwah. ² Noiwa tikintlajkuililiah nochteh akimeh moololoah mocha, noiwa tikontlajpaloah n tokni siwatl Apia, iwan tokni Arquipo akin mach mosotlawa iwa nochipa techpalewijninemi itech nin tekintl. ³ Totajtsi Dios iwa n Toteko Cristo Jesús, manomechtiochiwahak iwa manomechmaka yolsekwiistli.

Filemón kuali tetlasojtla iwa kuali tlaneltoka

⁴ Nochipa nimitsilnamiki ijkuak nimotiotsajtsilia, iwa nimotlasojkamati inawak Dios, ⁵ ken nechiliah te satlawel tikmati titetlasojtla iwa mitsitah kuali titlaneltoka inawak Toteko Cristo Jesús iwa tikintlasojtla nochteh akimeh iaxkawah Dios. ⁶ Niktlajtlanilia Totajtsi Dios nochteh akimeh yokineltokakeh Cristo por okitakeh motlaneltokalis, kuali makajsikamatikah n tlatiochiwálistli non Cristo Jesús techmaka. ⁷ Miak nipaki, ken titetlasojtla yika nimoyolchikawa, porke te notlasojiknitsi satlawel yotikinyolchika n tokniwah non kineltoka Cristo Jesús.

Pablo kitlatlajtia n Filemón makitlapojpolwi n Onésimo

⁸ Yika, maya niweleti nimitsnawatis tlan tikchiwas, ⁹ okachi kuali nimitstlatlajtia ika notlasojtialis. Ne Pablo, ya nitetajtsi, iwa axa nitsaktok por oniktetlapowijninemia itlajtol Cristo Jesús. ¹⁰ Nimitstlatlajtia por Onésimo, akin yomochiwako nopiltsi ijkuak okineltokak Cristo Jesús, nika kan nitsaktok.

¹¹ Itech oksikimeh tonatijmeh Onésimo okatka se motlanemak non amitla oweletia okichiwaya, pero axa kuali tekiti nonawak iwa te noiwa kuali weletis mitstekitilis. ¹² Yika oksepa nimitsontitlanilia, xikseli kemi techseliskia ne nonewia. ¹³ Ne niknekiskia mamokawa nowa, para makichiwa n tekintl non te tikchiwaskia nika kan onechtsakeh por oniktetlapowijninemia n kualitlajtoli. ¹⁴ Pero ne amo nikneki nikchiwas itla tlan te amo mitspaktia, ijko tlan te techchiwilis, amo xikchiwa san por nimitsnawatia yej makisa itech moyolo. ¹⁵ Chamo Onésimo omitscholili kech tonati, iwa axa mawalmokopati mamokawa nochipa mowa, ¹⁶ pero axa ayakmo kemi motlanemak, yej kemi mokni non tiktlasojtla. Ne kuali niktlasojtla, pero te okachi xiktlasojtla, amo kemi se tlakatl de nin tlaltlaktli yej kemi se mokni non kineltoka n Toteko Jesús.

¹⁷ Ijko kiné, tla milák techita kemi titekipanojkeh, xikyekseli n Onésimo kemi techseliskia ne nonewia. ¹⁸ Tla omitsstokti itla amokuali, noso tla itla mitswikilia, ne nimitstlaxtlawilis. ¹⁹ Ne Pablo, nikijkuilolia nin amatlajkuiloli ika noma, para xikmati ne nimitstlaxtlawilis, maya noiwa weletiskia nimitsilnamiktiskia te noiwa techwikilia, asta moalma. ²⁰ Ijko kiné nokni, kemi tikneltokah Toteko Cristo Jesús, nimitstlatlajtia techonchiwili tlan nimitsontlajtlanilijtok, techyolchikawa kemi tiiknimeh inawak Cristo.

²¹ Nimitstlajkuililia porke nimitsixmatok titetlakitak, iwa kuali nikmatok te tikchiwas okachi de tlan nimitstlajtlanilia. ²² Noiwa nimitstlatlajtia techmajmanili kan nimokalotis ompa mocha, porke nikneltoka nik Dios kikakis nomotiotsajtsilis iwa nechkawilis maniwa manomechitati.

Pablo momakawa

²³ Mitsontlajpaloa Epafras, akin nowa tsaktok ken iaxka Cristo Jesús. ²⁴ Noiwa mitsontlajpaloa Marcos, Aristarco, Demas iwa Lucas, akimeh nechpalewiah itech noteki.

²⁵ Tlatiochiwalis n Toteko Cristo Jesús mayeto iwan nomoespiritu.

N amatlajkuíloli non omoijkuilo para Hebreos

Dios technonotiwits itech Ikone

¹ Semi ya wejkawitl Dios okintlapowi totatawah miak welta, kualchiwa ika tlájtoli iwa kualchiwa ika itla tejtemiklistli non okinmitaya n profetajteh. ² Iwa axa itech ninteh iksemi tonatijmeh yotechtlapowi ika itlajtol Ikone. Akin kiaxkatilijtok nochi tlan onka, iwa por Ye okichijchi nochi tlan onka itech ilwikak iwa ipan tlaltfkpaktli. ³ Ikone Ye itlawiltotlanilis n Dios, iwa inewia otechnextiliko Akin Dios, iwa ika itlajtol weletini kichikajtok nochi tlan onka. Iwa satepa ijkuak yotechchipa de totlajtlakolwah, omotlali ik iyekma n Totajtsi Dios nepa kan ilwikak.

Ikone Dios okachi weyijkatitok ke n ángelteh

⁴ Ikone Dios yomochiwako okachi weyi ke nochteh n ángelteh, porke Ye okimakakeh Itoka non okachi weyixtok ke yejwah. ⁵ Porke Totajtsi Dios ayik okili se ángel:

Te ti Nokone

Ne axa onimitschijchi;

Sal. 2:7

nion aka ángel okili:

Ne niyetos ita,

iwa ye yetos Nokone.

2 Sam. 7:14

⁶ Keman okitítlanki non san Ye se ikone itech tlaltfkpaktli, okijto:
Nochteh iangelwah Dios makiweyilikah.

⁷ Iwa ijkuak Dios otlajto de iángelwah, ijkí okijto:

Ye kichiwa mayetokah iangelwah espíritus,

iwa itekitwah kintoktia mayetokah tletl.

Sal. 104:4

⁸ Ijkuak kitenewa Ikone kijtoa:

Motlanawatilis Tejwatsi Dios, nochipa yetos;

Tejwatsi kuali tiyektlanawatia ken moneki.

⁹ Mitspaktia nochi tlan kuali iwa tikkokolia tlan amokuali.

Yika Dios, Modios omitsmák

okachi miak pakílistli ke n oksikimeh non inwah titekiti.

Sal. 45:6-7

¹⁰ Noiwa kijtoa:

Tejwatsi Toteko Dios keman ayamitla okatka, Tejwatsi otikchijchi n tlaltfkpaktli, iwa ika momawah otikchijchi n ilwikak.

¹¹ N tlaltfkpaktli iwa ilwikak pojpoliwiskeh, pero Tejwatsi nochipa tiyetos.

Nochi tlan onka wewejtis kemi wewejtí n tlakemitl.

¹² Tikinkuekuelpachos kemi se tlakemitl,

tikimpatlas kemi aka kipatla itlake.

Pero Tejwatsi amo kema timopatla,

iwa monemilis amo keman tlamis.

Sal. 102:25-27

¹³ Dios ayik okili se ángel:

Ximotlali ik noyekma, asta manikintlali itlampa mokxiwah akimeh mitskokoliah.

Sal.

110:1

¹⁴ Porke nochteh n ángelteh yejwah san espíritus non tekititokeh inawak Dios, iwa Dios okwalintítlanki para makimpalewikah akimeh kinmakixtiskeh.

2

Kuali matiktlachilikah totemakixtilis

¹ Yika, moneki okachi matikmopantikah n kualitlájtole tlan yotikakeh, para amo matimoxelokah itech ojtli non Dios yotechititi. ² N kualitlájtole non yowejka okualikakeh n ángeles, nochi kuali okiski, pero akimeh otlajtlakolchijkeh iwa amo okinekeh okitlakitakeh Dios, okintlajiyowiltijkeh ken omonekia. ³ Yika, ¿kenomi tejwah ticholoskeh, tla amo

tikmokuilawiah nin weyi temakixtílistli? Porke achto inewia Toteko Cristo Jesús okitem-atilti nin kualitlájtolí non techmakixtia, iwa satepa akimeh okikakeh ijkuak okitakeh milák tlan kijtoa, tejwah otechmatiltijkeh. ⁴Totajtsi Dios noiwa otechmatilti milák tlan kijtoa n kualitlájtolí. Ye otechnextili itlajtolí ika tlan Ye okiteititi, ika miaktikeh milagros non Ye okinchi, iwa ika miakeh neskayolteh non Espíritu Santo kintemaka iwa kinxejxelo kemi Ye kimonekiltia.

Cristo Jesús omochi tlakatl iwa ijko techmakixtis

⁵Dios amo okintekiawaji n ángeles para matlanawatikah itech tlaltípkaktli non satepa wits. ⁶Yej kemi aka okijto itech itlajkuilol Dios:

¿Tlan ipati n tlakatl para tikilnamiktos?,

iwa ¿tlan ipati se tlakatl de nin tlaltípkaktli para timotekipachojtos por ye? Sal. 8:4

⁷N tlakatl okachitsi otiktsikitsintili ke n ángelteh,

iwa otikchi maweyixto iwa matlanawati.

Sal. 8:5

⁸Nochi otikmaktili makinawatijto. Otikmák weletílistli itech nochi tlan otikchijchi. Iwa tla Dios okimák weletílistli itech nochi tlan okichijchi, noni kijtosneki nochi tlan onka kinawatis n tlakatl, pero tikonitokeh ayamó nochi kitlakitah. ⁹Pero axa tikitah n Jesús, akin Dios okitlali okachi tsjtsikitsi ke n ángelteh san kanaj kech tonati. Dios itech itlasojtlalis okinek mamiki n Cristo por tinochteh, iwa axa kipia weyílistli iwa mawistílistli porke omikki por tejwah. ¹⁰Dios okichijchi nochi tlan onka, para Ye inewia, iwa okinekia kintliokolis iweyilis ipilwah. Yika okinekia kiweyilis n Jesús ika n tlajjowílistli, porke Ye akin techwika imak temakixtílistli.

Jn. 1:3 ¹¹Akin teyolchipawa kemi non

kiyolchipawah walewatokeh san itech se teta. Yika Jesús amo pinawa kinnotsas ikniwah.

¹²Itlajkuilol Dios kijtoa:

Ne nikinmatiltis nokniwah motoka,
iwa nimitstlakuikilis kan timoololoh.

Sal. 22:22

¹³Noiwa kijtoa:

Ne nitlaneltokas inawak Dios.

Is. 8:17

Iwa oksepa kijtoa:

Nika nika, iwan ipilwah non Dios onechinmák.

Is. 8:18

¹⁴Ijko kemi tejwah tikpiah tonakayo iwa toesso. Ijko noiwa Jesús omochiwako tlakatl kemi nochteh n tlaltípkaktlakah. Yika owéletki omikki iwa ijko okixtílistli iweletilis n amokualitlakatl non okinmiktiaya n tlaltípkaktlakah. ¹⁵Ijko okinmakixtiko nochteh akimeh okimawiliayah mikiskeh, iwa itech nochi tonati san noni okintekipachojtinemia. ¹⁶Pero Jesús amo owala okimpalewiko n ángeles, yej owala okimpalewiko akimeh walewatokeh itech Abraham. ¹⁷Ika no omonekia Jesús mamochiwa tlakatl kemi tejwah, para mamotlamiti se Tiópixki non teiknoma inawak Dios, iwa para kinkixtilis intlajtlakolwah n tlaltípkaktlakah, por imikilis kemi se tlamiktílistli. ¹⁸Iwa ken Jesús inewia otlajjowi iwa n amokualitlakatl okinekia matlajtlakolchiwa, axa Jesús weleti kimpalewia akimeh noiwa n amokualitlakatl kineki matlajtlakolchiwakah.

3

Jesús okachi weyijkatitok ke Moisés

¹Nokniwah yolchipawakeh, Dios onomechpéjpenki para xiyetokah iaxkawah. Yika xikyekitakah n Cristo Jesús, porke Ye totlatematilti iwa non okachi weyi tiópixki itech tlan tejwah tikneltokah. ²Porke Jesús nochipa kichiwa tlan Dios kinawatia, ijko kemi Moisés okichi nochi tlan okinawatijkeh makichiwa inawak n israelitajtlakah. ³Pero moneki okachi matikweyilikah n Jesús ke Moisés, ijko kemi tikweyiliah akin okichijchi se kali, iwa amo n kali. ⁴Nochi kali non tikitah, onka se akin okichijchi, pero nochi tlan onka ilwikah iwa ipan tlaltípkaktli, Dios okichijchi. ⁵Moisés okitekítli Dios, iwa nochipa okitlakitak, porke okimpalewi itlakaikniwah ijko kemi Dios okinawati, iwa okijto tlan Dios satepa kijtoskia. ⁶Pero Cristo ken ikone Dios, kema tetlakitak iwa kimpalewia akimeh tikneltokah, iwa

nonteh ye n tejwah. Iwa tejwah tikmajmana non ialtepetlakawah tla tikneltokah ika pakfistli n temakixtflistli non tikseliskeh.

Ximotlachilikah para amo nonyetoskeh kemi non amo tlaneltokah

⁷Yika, matikchiwahak tlan Espiritu Santo kijtoa:

Tla axa nonkikakih itlajtol Dios,

⁸amo ximoyoltlakuawakah, kemi okichijkeh n judíojtch, non amo otelakitakeh kan tlaltejtéyinki.

Yejwah okinekiah kitaskeh asta kani Dios kinxikoskia ika tlan amokuali okichiwayah.

⁹Ompa onechyejyekojkeh nomotatawah, maya ome póali xiwitl okitakeh nochi tlan ne onikichi.

¹⁰Yika onikuálanki inwah nonteh tlakah, iwa onikijto: “Inyolo nochipa kineki kichiwas tlan amokuali, iwa amo motekawiliah manikinyakana.”

¹¹Yika onikuálanki inwah, iwa oniksentali, ayik nikinkawilis makalakikah kan Ne onikijto mosewiskia.

Sal. 95:7-11

¹²Nokniwah, kuali ximotlachilikah, amo kichiwa se de nomejwah moyoltlakuawas iwa kipolos itlaneltokalis, iwa moixkoyantis inawak Dios non yolitok. ¹³Jey nomechilia, nochipa ximosepanyolchikawakah nochi tonati, para ijko amaka matlajtlakolchiwa, iwa amo manomechtokti xiyoltlakuawakah. ¹⁴Porke tejwah timochiwah iaxkawah Cristo tla nochipa titlaneltokaskeh inawak Ye kemi achto.

¹⁵Yika kijtoa itlajkuilol Dios:

Tla itech nin tonati nonkikakih tlan Dios kijtoa, amo ximoyoltlakuawakah kemi okichijkeh n judíojtch ijkuak okixnamikch.

¹⁶¿Iwa akimeh okikakeh itlajtol Dios iwa amo okitlakamatkeh? Yejwah akimeh Moisés okinkixti de kan tlali de Egipto. ¹⁷Iwa ¿akimeh nekateh non inwah okualantoka Dios ome póali (40) xiwitl? Dios okualantoka iwan akimeh otlajtlakolchijkeh, non satapa omijmikch kan amaka chanti. ¹⁸¿Akimeh nekateh non Dios okinmili amo kalakiskiah kan Ye mosewia? Ijko okinmili akimeh amo okitlakitakeh. ¹⁹Milák, amo oweletkeh okalakeh kan tlali de Canaán kan mosewiskiah, porke amo okineltokakeh Dios.

4

¹Ijko kiné, matimotlachilikah, axa ken ok tikpixtokeh tlan Dios otechsentlalili, amo kichiwa aka mokawas kala iwa amo kalakis itech imosewilis Dios. ²Porke tejwah otikkakeh n kualitlájtol de Dios, ijko kemi okikakeh n Israelitas non okiskeh de Egipto. Pero maya okikakeh, mach okimpalewi, porke maya okikakeh mach okineltokakeh. ³Pero tejwah, akimeh otikneltokakeh non kualitlájtol, tikalakiskeh itech imosewilis Dios, ijko kemi yokijto:

Yika onikualanki inwah, iwa onikinmilajkaili:

“Amo nikinkawilis makalakikah kan tlali kan onikinmili mosewiskch.”

Ijkuak Dios ijki okijto, otlajtojtoka itech tonati ijkuak omosewi ijkuak okitlami okichijchi n tlaltfipaktli. ⁴Itech tiotlajkuiloli ijkuilitok tlan Dios okichi itech chikome tonati:

Dios omosewi ipan chikomeh tonati ijkuak otlanki otekitik.

Gn. 2:2

⁵Iwa oksepa mijtoa itech itlajkuilol Dios:

Nomejwah ayik nonkalakiskeh kan Ne nimosewia.

Sal. 95:11

⁶Pero ok poliwi oksikimeh makalakikah kan Dios yotlayektli para se mosewis, iwa akimeh achto okikakeh n kualitlájtol non temakixtia amo okalakeh porke amo okitlakitakeh. ⁷Yika, Dios okipépenki ok se tonati: iwa non tonati, ye non axa itech tikateh. Dios otechtlapowi de nin tonati non okipépenki ijkuak okili n David makijto:

Tla itech nin tonati nonkikakih tlan Dios nomechilia, amo xiktlakuawakah nomoyolo.

Sal. 95:7-8

⁸Tla Josué kinyakanaskia n Israelitas kan mosewiskiah, Dios ayakmo oksepa kitenewaskia ok se tonati. ⁹Pero, tejwah itlaneltokawah n Dios, ok tikchiah neka tonati ijkuak weletis

timosewiskah iwan Dios. ¹⁰Porke akin kalaki kan Dios mosewia, mosewia de nochi iteki ijkó kemi Dios omosewi ijuak okitlami iteki. ¹¹Yika, tejwah matimochijchikawakah iwa matikalakikah kan Dios mosewia, amo kichiwa aka de nomejwah kichiwas kemi nekateh non amo otetlakitakeh.

¹²Porke itlajtol Dios yolitok iwa kipia weletlistli. Nin tlájtoli okachi yakawitstik ke se espada non ojka tlateki, keman kalaki tlaxelojti itjik toyolo iwa toespíritu, iwa techajsikamatiltia tlan kuali iwa tlan amo kuali. ¹³Amitla onka tlan Dios okichijchi non weletis moixtlaatis inawak, nochi tlan Ye okichijchi, kita ik pánixko iwa ik tlajitk, iwa se tonati timoteixpantitiweh inawak iwa techilis nochi tlan otikchijkeh.

Jesús Ye non okachi Weyi Tiópixki

¹⁴Jesús Ikone Dios, Ye n Toweyi Tiópixki non yotlejkok ilwikak. Yika tejwah matimoyolchikajtokah iwa nochipa matitlaneltokakah. ¹⁵Tikpiah se Toweyi Tiópixki non techiknomati, porke Ye inewia okiyejekojkeh kemi tejwah techeyekoah pero Ye amo otlajtlakolchi. ¹⁶Yika, matimijkuanikah ika tlaneltokálistli inawak Totajtsi Dios kan yayantitok. Para matechiknomati ika ikualtilis iwa matechpalewi keman itla techpoloa.

5

¹Nochi weyi tiópixki judfo kipejpenah innawak miakeh tlakah, iwa kitekitlaliah para makintlajtolpalewi n tlakah inawak Dios, iwa kinteixpantis tlamánalteh iwa tlamákitilteh por n tlajtlákolteh. ²Kemi nin tiópixki noiwa kimachilia tlan nochteh n tlakah kinyoltilana, yika kimati kinmiknomati akimeh amitla kimatih iwa akimeh moixpolojtinemih itech intlajtlakolwah. ³Yika, n tiópixki moneki kinteixpantis tlamákitilteh ixpa n Dios, para makitlapojpolwih de itlajtlakolwah iwa de intlajtlakolwah n tlakah.

⁴Amaka weletis yetos tiópixki sanwel por ye kineki, yej Dios kipejpena akin kineki mayeto tiópixki iwa kimaka nin weyilistli kemi okichi iwa n Aarón. ⁵Ijkó kiné, Cristo amo omochi tiopixkatlayákanki san por Ye okinek, yej Dios okipéjpenki iwa okimák non weyijkachiwálistli. Inewia Dios okili:

Te ti Nokone;

Ne onimitschijchi.

Sal. 2:7

⁶Iwa ok sika noiwa kijtoa:

Te nochipa Titiópixki,

ijkó kemi okatka Melquisedec.

Sal. 110:4

⁷Ijuak Cristo onenki itech nin tlaltfkpaktli, chikawak omototsajtsili iwa ochokak; okitlatlaujti Dios makimakixti imak mikfistli; iwa Dios okikak porke Cristo nochipa okitlakitak, yika okikak itlotsajtsilis. ⁸Ijkó kiné, maya Cristo Tekone inawak Dios, ika nochi tlan okijyowi okima kenomi tetlakitas. ⁹Ijkó, kemi Cristo okichi nochi tlan Dios okinawati, omochi temakixti non kitemakah yolifistli semijkak, innawak nochteh akimeh kitlakitah. ¹⁰Yika, Totajtsi Dios okitlali weyi Tiópixki ijkó kemi n Melquisedec.

Miálmasteh akimeh kikawah iwa ayakmó kineltokah n Cristo Jesús

¹¹Onka miak tlan weletis tomechtlapowiskah de nin tlájtoli, pero achitsi owi tomechajsikamatiltiskah, ken nomejwah yolik nonkajsikamatih. ¹²Nomejwah ya nonyetoskiah nontlamachtijkeh ken yowejka nonkikaktiwitseh nin tlamáchtli. Pero maya yononwejkajkeh, axa ok nonkinekih se manomechmachtli tlan okachi amo owi se weletis kajsikamatis itech itlamachtilis Dios. Nonkichiwah kemi nonkokoneh, nonkinekih se manomechmaka lechi ken amo nonweletih nonkikuah itla tlákuali. ¹³Porke nochi akin yolitok san ika lechi, kijtosneki ayamó kixmati katlie n kuali tlamachtifistli, ken ok konetl. ¹⁴Pero akimeh yochikawak intlaneltokalis, ya weletih kikuah nochi tlákuali, porke yejwah ya kuali kimatih kiyejekoliah tlan kuali iwa tlan amokuali.

6

¹Ijkó kiné, ayakmó matikmomachtikah tlan sikinika otechmachtijkeh de Cristo, matimoskaltikah itech totlaneltokalis iwa matiyetokah kemi Cristo. Ayakmó moneki

oksepa matechmachtikah kemi ijkuak sikinika otitlaneltokakeh. Kemi otechmachtijkeh matimoyolpatlakah para ayakmó matitlajtlakolchiwakah iwa porke noni techwika imak mikílistli, yej matiktalikalikah totlaneltokalis inawak Dios. ²Noiwa otechmachtijkeh tleka se mokuuaatekia, iwa tlan kijtosneki ijkuak se kintlalilia inmawah impa oksikimeh tokniwah, noiwa otechmachtijkeh kenomi moyolitischeh n mikemeh iwa kenijki Dios kinmixkomakas n tlakah iwa kijtos akimeh tlaijyowiskeh nochipa. ³Ijkó tikchiwaskeh, tla Dios kimonekiltia.

⁴Akimeh se tonati okajsikamatkeh n kualí tlájtoli non kitemakah temakixtílistli, iwa okiselijkeh n tlatliokólili non Dios okinmák, okipixkeh n Espíritu Santo itech inyolo ⁵iwa okixmatkeh itlajtol Dios iwa kipiaskheh weletílistli itech n tonati non satepa wits, ⁶tla nonteh tlakah oksepa wetsi, ayakmó weletis moyolkopaskeh porke yejwah oksepa kikrusifikarojtokeh Ikone Dios iwa kipijpinatia inmixpa n tlakah. ⁷N tlali non satlawel kiawilo kitlakiltia kualí itlakilo iwa ijko Dios kintiochiwa akimeh tookah. ⁸Pero tla kitlakiltia wistli iwa tetestixiwitl, amitla ipati non tlali, Dios kitlajyowiltis non tlali iwa satepa kichichinos. ⁹Totlasojikniwah, maya ijki tomechtlapowiah, kualí tikmatih nomejwah nonkichiwaskeh tlan kualí ijko kemi kichiwah n tlakah non Dios yokinmakixti de intlajtlakolah. ¹⁰Porke Totajtsi Dios yolmilajka, iwa ayik kilkawas tlan nomejwah ononkichijkeh iwa nonkichijtokeh keman nonkimpalewiah nomokniwah tlaneltokakeh. Ijko nonkiteixmatiltiah nonkitlasojtlah n Cristo Jesús. ¹¹Pero tiknekiskiah non nochteh xitepalewikah ika pakílistli asta ijkuak nonmikiskeh. Ijko nonkiseliskeh nochi tlan kualí, tlan nonkichixtokeh ika pakílistli. ¹²Amo tiknekih ximokopakah nontlatsijkeh. Yej, ijkchiwakah kemi kichiwah akimeh kineltokah Dios, porke ijko nomejwah nonkiseliskeh tlan Dios yonomechsentalili.

¹³Porke ijkuak Dios okitlajtolsentalili Abraham, okisentlali ika inewia Itoka, porke amo okatka ok se okachi maweyixto ke Ye, ¹⁴iwa okijto: “De milajka, miak nimitstiochiwas iwa nimitsinmakas miaktikeh moxwiiwah.” *Gn. 22:16-17* ¹⁵Abraham wejkawitl omochixki iwa ijko okiseli tlan Dios okilijka kimakaskia. ¹⁶Ijkuak n tlakah kinekih moyekkawaskeh, motlajtolsentalia por se akin okachi weyijkatitok, iwa ijkuak ijko kichiwah, ayakmó motlajtolkopah. ¹⁷Yika, Dios okinek kiteititis milák kichiwas tlan okijto, okitlajtolsentali kitemakaskia tlan yokisentlali iwa amitla kipatlaskia. ¹⁸Ijko kiné, onka ome tlájtoli non amo weletis mopatlas. Ika no moajsikamati Dios amo weletis techkajyawas. Noni techyolsewia, ken tejwah tiknekih Dios matechmokuilawí, iwa tikneltokah Ye techmakas tlan yotechkakitijka. ¹⁹Tlan tejwah tikchiah, tikchiah ika totlaneltokalis, kemi se tépostli ankla non kitsoponia ijtik atl iwa amo kikawilia mamolini n barko, nin tlaneltokálistli techmakah n Cristo, non opanok itsalko n kortina itech itioapa n Dios itech ilwikak iwa okalak itech lojar santo non chipaktik. ²⁰Jesús ijko okichi iwa otechtlapoli n lojar inawak Dios, porke Cristo Ye n Weyi Tiópixki semijjak kemi okatka Melquisedec.

7

Jesús Weyi Tiópixki kemi Melquisedec

¹Nin Melquisedec, okatka rey de Salem iwa weyi tiópixki inawak Totajtsi Dios. Keman Abraham omokopato kan omotekilmakato iwan oksikimeh reyes non okintlanki, Melquisedec oyá okinamikito Abraham iwa okitiochi, ²iwa Abraham okimák n Melquisedec n májtaktli por sientto de nochi tlan okintlanilito akimeh inwah omotekilmák. Melquisedec kijtosneki “Rey yekmilajka”, iwa “Rey de Salem” kijtosneki “Rey teyolsewi”. ³Amo momati akin ita nion akin ina, noso akimeh itatawah, amo momati kan otlákatki nion kermania omikki. Ijko omoteixnextiko kemi ikone Dios, kemi se weyi tiópixki semijjak.

⁴Axa kualí xikitakah kenijki saikpanoa oweyijkatitoka n Melquisedec, yika inewia totata Abraham okimaktili májtaktli por sientto de tlan okintlanili n reyes kan omotekilmakato.

⁵Itech itlanawatil Moisés, onka se tlanawátli kan kijtoa, n tiopixkeh non walewatokeh

de Leví makiselikah májtlaktli por sientio itech tlan kitlanih inmikniwah judíos, maya yejwah noiwa walewatokeh de Abraham. ⁶ Pero maya Melquisedec amo owalewatoka de Leví, Abraham okimák n májtlaktli por sientio itech tlan okimotlanilito. Melquisedec okitiochi Abraham akin Dios okisentlali kitiochiwaskia. ⁷ Amaka weletis kixtlatis akin tlatiochiwa okachi weyijkatitok ke akin kitiochiwa. ⁸ Iwa nika ipan tlaltípkaktli akimeh kiseliah n májtlaktli por sientio, san tlaltípkaktlakah non mikkih. Pero itlajkuilol Dios kinextiah ke Melquisedec yolitok. ⁹ Iwa weletis se kijtos Leví iwa nochteh n tiopixkeh non itech walewatokeh, non axa kiseliah májtlaktli por sientio itech tlan se kitlani, noiwa okitlaxtlawilijkeh n Melquisedec májtlaktli por sientio ijkuak Abraham okitlaxtlawi. ¹⁰ Porke n tiopixkeh non walewatokeh de Leví maya ayamó otlakatiah, ok okatkah itech iesso Abraham ijkuak okinamikito n Melquisedec.

¹¹ N tlakah de Israel okiselijkeh n tlanawátili por n tiopixkeh levitas non walewatokeh de Aarón. Axa, tla non tlanawátili weletiskia kinyektlalis akimeh kitlakitah non tlanawátili, ayakmó monekiskia mamonexti ok se tiópixki kemi non walewatok de Aarón, yej se kemi Melquisedec. ¹² Porke keman mopatla n tiopixkeh, noiwa moneki mamopatla n tlanawátili. ¹³ Iwa Jesús, akin nika tlapoa n tiotlajkuiloli, Ye de ok se tribu, kan amaka tiópixki ompa okiski. ¹⁴ Porke kualo momatok Toteko Cristo Jesús walewatok de tribu de Judá, iwa Moisés amitla okijto kox de ompa kisaskiah tiopixkeh.

¹⁵ Iwa okachi moajsikamati ijkuak tikitah n yankuik tiópixki se kemi Melquisedec. ¹⁶ Jesús amo omochi tiópixki por owalewatoka de se familia kan walewatokeh n tiopixkeh kemi kijtoa itlanawatil Moisés, yej omochi tiópixki porke itech okiopia n weletilistli non kipia se non ayik mikki. ¹⁷ Porke Dios ijki tlajtoa de Cristo:

Te se titiópixki non ayik mikkis,
ijkó kemi Melquisedec.

Sal. 110:4

¹⁸ Ika noni, itlanawatil Moisés non achto otechmakakeh ayakmitla ipati, porke amo chikawak iwa amo otechpalewiaya. ¹⁹ Nin tlanawatilistli amaka okichipa de itlajtlakol. Yika, axa tikchia ika pakilistli Dios matechmaka tlan okachi kuali, iwa ijkó ya weleti timijkuaniah inawak Dios.

²⁰ Ijkuak Dios ijki okichi, Ye achto okisentlali ijkó mochiwas. ²¹ Ijkuak okimpejpenkeh n oksikimeh tiopixkeh amaka itla okisentlali, pero ijkuak okipejpenkeh n Cristo, Dios okisentlali. Porke itech itlajkuilol Dios kijtoa:

Noteko okisentlali, iwa ayik kipatlas itlajtol:

“Te nochipa tiyetos tiópixki ik nochipa.”

Sal. 110:4

²² Yika, Jesús Ye akin axa techyekkawa iwan Dios, iwa amo kemi non achto tlanawátili.

²³ Achto otikimpiayah miakeh tiopixkeh, porke nion seme de yejwah nochipa oyolitokah.

²⁴ Pero kemi Jesús amo mikki, mach aka ok se moneki kipatlayotis iteki kemi tiópixki.

²⁵ Yika, Jesús weletis kinmakixtis semijjak akimeh mijkuaniah inawak Dios por Ye, porke Cristo nochipa yolitok, iwa motlatlautijtos inawak Dios por yejwah.

²⁶ Ijkó kiné, Jesús Ye n Weyi Tiópixki non tejwah otechpoloaya. Ye yolchipawak iwa amitla tlajtlakóli okichi, iwa xelitok de n tlajtlakolejkeh. Iwa okachi weyijkatitok ke n ilwikak. ²⁷ Ye amo moneki kichiwas tlan oksikimeh tiopixkeh kichiwah. Porke non oksikimeh tiopixkeh nochi tonati tlananah inawak Dios para makintlapojpolwili intlajtlakolwah. Iwa satepa tlananah por intlajtlakolwah oksikimeh tlakah. Pero Jesús amo ijkó okichi, porke ijkuak Jesús omikki, san se welta omotemakti kemi se chipawak tlamánali iwa ika noni tinochteh otechlapojpolwi. ²⁸ N tiopixkeh non kimpejpena kemi kijtoa n tlanawátili, tlajtlakolchiwah. Pero satepa ijkuak yokinmák itlanawatil Dios, okisentlali techmakas se tiópixki non Ye ikone non tlayakantos, akin amayik otlajtlakolchi.

8

Jesús Toweyi Tiópixki inawak Dios

¹ Tlan okachi weyi kijtosneki, tikpiah se tiopixkatlayákanki non kajki ilwikak, Ye ewatok ik iyekma n Totajtsi Dios, ² Non Tiópixki Ye n Cristo Jesús iwa ompa kichiwa iteki, kan

milajka tiopa, non Dios inewia okichijchi iwa amo okichijchijkeh n tlakah. ³Nochteh n wejweyi tiopixkeh kintlalialia para makitemakakah itla tlamánali iwa tlamíktili para makinchichinokah yolcameh kan artal, yika Jesús noiwa kipia tlan kitemakas imak Dios. ⁴Tla Jesús yetoskia itech nin tlaltípkaktli, amo yetoskia tiópixki, porke ok onkateh tiopixkeh non kinteixpantiah tlamánalteh ijko kemi tlanawatia n tlanawatílistli. ⁵Pero intekih ninteh tiopixkeh, san nejma technextiliah noso itlasekawilo tlan kichiwayah nepa ilwikak. Yika ijkuak Moisés kichijchiwaskia n tiopa, Dios okili: “Kuali techkaki, kuali nonkimajmantiashkeh n tiopa, kemi onimitsili nepa kan tepetl. *Éx. 25:40* ⁶Pero n tekítl non Jesús okiseli okachi weyi ke non yejwah okichiwayah, porke Ye axa omotlajtolsentlali itech tlan okachi ipati, iwa techilia tiyetoskeh okachi kuali.

⁷Porke tla yetoskia kuali keman sakinika omoyekakjkeh, amo monekiskia mopatlas.

⁸Pero Dios okitak n tlakah amo okitlakitayah kemi Ye okinekia, iwa okijto:

Ajsiki tonati ijkuak niktalilis se yankuik tlájtoli
iwan tlakah de Israel iwan tlakah de Judá.

⁹Amo nikchiwas kemi onimotlajtolsenka iwa nomowejkatatawah,
n tonati keman onikinmatilanki iwa onikinkixti de Egipto,
porke amo okichijkeh tlan onikinmili makichiwayah,
yika onikinkajka, kijtoa n Toteko.

¹⁰Ye ni tlan ika nimotlajtolsenkawas iwan tlakah de Israel itech nekateh tonatijmeh non
sikin witseh, ye ni itlajtol Dios:

Nikintlalilis notlanawatilwah itech intlalnamikilis
iwa nikintlalilis itech inyolo,
iwa Ne niyetos in Dios
iwa yejwah yetoskeh noaltepeltakawah.

¹¹Ayakmó monekis aka makimachti se itlakaikni,
nion aka kilis ikni:

—Xikixmati n Toteko Dios—,
porke nocteh nechixmatiskeh,
n kokoneh asta non ya tetajmeh.

¹²Iwa Ne nikintlapojpolwis nochi tlan amokuali okichijkeh,
iwa ayik nikinmilnamikis intlajtlakolwah.

Jr. 31:31-34

¹³Ijkuak Dios kijtoa oksepa inwah nimoyekawas, kijtosneki ya wewe n tlájtoli non ika
omoyekka inwah, iwa tlan ya wewejtitok iwa ya panotok, mach ok wejkawas iwa sannima
pojpoliwis.

9

Onka se tlaltípkaktiopa iwa se ilwikaktiopa

¹Ijkuak sakinika Dios omotlajtolsenka, okijto kenijki kiweyijkachiwaskiah itech se lojar non san kichijchiwah itech nin tlaltípkaktli. ²Non tiopa ijki omochijchi: kan ipewayah n tiopa, omonotsaya lojar Santo, ompa okatka n kandelero iwa n mesa kan omotlaliayah n pameh non oxelitokah para Dios. ³Iwa okachi tlajitk, kan otlajkoxelitoka ika weyi tsótsoli, ompa okiliayah Lojar Santísimo. ⁴Ompa okatka se artal de oro kan okichichinoayah n kópali. Noiwa ompa okatka n tlatiochiwalkaxa non oixaltitoka ika oro. Ijtik non kaxa okatka se xoktsi de oro non okipixtoka n paj non itoka maná, noiwa ompa okatka ibasto Aarón non omokópinki iwan tetl patlawak kan oijkuilitokah intlanawatilis. ⁵Ikpak non tlatiochiwalkaxa okatkah ome ángelteh non intokah querubines, yejwah okitenextiayah Dios ompa okatka ika iweyilis. Nonteh querubines ika inmajaswah okixtsaktokah ikamat-saka n tlatiochiwalkaxa kan motlapojpolwilo. Axa amo weletis timoyektlapowiskeh tlan ompa omochiwaya.

⁶Keman ya tlamajmantok ompa tlajitk, n tiopixkeh kalakih nochi tonati kan Lojar Santo para kichiwaskeh inteki. ⁷Pero kan Lojar Santísimo kalaki sanwel n tiopixkatlayákanki san se welta itech se xiwitl. Iwa keman kalaki, kiwika inmeso n yolcameh non ika

motlatlaujtis inawak Dios iwa makitlapojpolwikah de itlajtlakolwah iwa de itlajtlakolwah n oksikimeh tlakah. ⁸Ika noni n Espírítu Santo techajsikamatiltia ijkuak okatka n Lojar Santo, amo okalakia kan Lojar Santísimo. ⁹Nochi ni techititia itech ninteh tonatijmeh, ijkuak titlamanah noso ijkuak titlamiktiah, ika noni amo weleti kinchipawiliah intlal-namikilis akimeh ijko kichiwah. ¹⁰Nochi ni san itlanawatilwah n tlakah, ijkuak se tlakua, noso tlan se koni, noiwa kenijki mochipawah ika atl. N tlanawátili sanwel kinmilia tlanón kichiwaskah, pero amo techpalewia kenijki tinemiskah. Nonteh tlanawátitltech yetoskeh asta Dios matechimpatili ika ok se tlanawatili okachi kuali.

¹¹Cristo yowala, iwa axa Ye n Tiopixkatlayákanki. Axa Ye techmakah nochi tlan kuali. Porke n tiopa kan Ye tiópixki, okachi kuali iwa milajka. Porke amo san tlakah okichijchijkeh, yika amo de nin tlatlákaptli. ¹²Cristo okalak kan milák Lojar Santísimo, ayakmo para kimanah innesso n yolcameh, yej para kitemaktis non Ye iesso. Ye okalak san se wuelta, iwa ijko okitlaxtla topatka iwa otechmák tonemilis semijjak. ¹³Acho, innesso n torojteh iwa n tentsomeh, iwa itlekonex n beserra non okichichinoayah kan artal iwa satapa okitejtepewayah impah akimeh amo chipawakeh okatkah, okipiaya weletlistli para kinchipawas inawak Dios san ik pánixko. ¹⁴Iwa tla innesso n yolcameh kipia weletlistli, jlesso n Cristo Jesús okachi kipia weletlistli ke innesso nonteh yolcameh! Porke ika ichikawalis n Espírítu Santo non nochipa yolitok, Cristo inewia omotemák makimiktikah kemi se tlamánali senchipawah. Iesso techchipawa iwa ya tikmatokoh milák otechchipa. Iwa ijko ya tiweleti tiktekichiwiliskah Dios non yolitok.

¹⁵Cristo techyekkawa itech se yankuik tlájtoli, imikilis Cristo okitlaxtla topatka nochi tlan amokuali okichijkeh itech non sakinika tlanawátili, iwa akimeh Dios okinnotski mawetikah makiselikah intlaltliokolil non Ye yokinkakitijka. ¹⁶Porke ya nonkimatokoh, ijkuak aka mikki, kikajtewa se amatl kan otlaxexelo, nochi tlan kijtoa itech non amatl, weletis mochiwas sanwel tla yomikki akin okitlali non amatl. ¹⁷Porke non amatl kan kijtojtok otlaxexelo amitla ipati tla akin okijkuilo ok yolitok, non amatl amitla ipati asta ijkuak miki akin okitlali. ¹⁸Yika, ijkuak Dios okitlali non sakinika tlamamatl, noiwa omot-lajtolsenka ika estli. ¹⁹Moisés okinmatilti n tlanawátitltech nochteh n israelitas. Otlanki okónanki intsojmio n ichka iwa se isopojkuawitl, okinsia itech atl nelitok ika innesso n torojkokoneh iwa n tentsomeh, satapa okajtselwi n tlanawátili non Moisés okinchijchi, noiwa okinmajtselwi nochteh n israelitas. ²⁰Iwa okinmili: “Nin estli kisentlalia n tlamamatl non Dios onomechtlanili.” Éx. 24:8 ²¹Moisés noiwa okajtselwi ika estli n tabernákulo iwa nochi tlan ompa okitekiltitayah ijkuak okiweyijkachiwayah Dios. ²²Ijko kiné, n tlanawátili techititia miak tlajtlákoli omochipawaya ika estli, iwa amitla motlaxtlawah tla amo motoyawa estli.

Imikilis Cristo kipjpoloa n tlajtlákoli

²³Ijko kiné, omonekia ninteh tlamkiltltech para mochipawas san itlachijchiwilis noso itlasekawilo itech tlan onka ilwikak. Pero tlan milák onka ilwikak kinekíh okachi weyi tlamiktli iwa amo san innesso n yolcameh. ²⁴Porke Cristo amo okalak itech tabernákulo non san tlakah okichijchijkeh. Noni okatka san se tlachijchiwali kemi n milák tabernákulo non kajki ilwikak. Ye okalak kan ilwikak, kan axa kitlatlautijtjok Dios matechtlapojpolwi. ²⁵N weyi tiópixki, kalaki nochi xiwitl kan Lojar Santísimo iwa kimana estli non amo iesso, pero Cristo amo okalak miak welta para motemaktis. ²⁶Tla ijko yetoskia, Cristo mikiskia miak welta desde ijkuak Dios okichijchi n tlatlákaptli. Pero Ye omonextiko itech ninteh iksemi tonatijmeh iwa inewia omotemák makimiktikah, iwa ijko, ika iesso okimpojpoloko totlajtlakolwah. ²⁷Tejwah tinochtech timikiskah san se welta, iwa satapa Dios techixkomakas. ²⁸Ijko noiwa Cristo omotemák san se welta para makimiktikah iwa ijko matechtlapojpolwikah de totlajtlakolwah. Satapa Ye oksepa walmokopas, iwa ayakmo mikkis por totlajtlakolwah, yej para techmakixtis tejwah akimeh tikchixtokeh mawiki.

10

Iltanawatilis Moisés amo weleti kinkixtia tlajtlákolteh

¹ Iltanawatil Moisés sanwel itlasekawilo tlan satepa walaskia, iwa amo tlan milák techmakaskia. Yika, n tlanawátili amo weleti kinchipawa akimeh yawi nochi xiwitl inawak Dios, iwa kitlamanilia. ² Tla milák n tlanawatlistli weletiskia kinchipawas tlajtlákolteh, amo momachiliskia tlajtlakolejkeh iwa ayakmó kinmanaskiah yolcameh. ³ Pero nochi xiwitl, ninteh tlamiktilteh sanwel nomechtoktiah xikinmilnamikikah nomotlajtlakolwah, ⁴ porke innesso n torojteh iwa n tentsomeh non kinmiktiah amo weletih kimpopolwah tlajtlákolteh.

⁵ Yika, ijkuak owala Cristo ipan tlatlfpaktli, Ye okijto:

Tejwatsi amo otiknek mamitsinmiktilikah yolcameh nion mamitstlamanilikah, yika otechkawili manitlakatiki iwa satepa manimitsmaktili nokuerpo kemi se tlamíktli.

⁶ Tejwatsi amo omitspakti mamitsinmiktilikah yolcameh non okinchichinoayah ipan artal para tikintlapopolwis de intlajtlakolwah.

⁷ Ijkuakó onikijto: “Nika nika Tejwatsi Dios, ken ijkuilitok, nikchiwas tlan Tejwatsi tikmonekiltia.” *Sal. 40:6-8*

⁸ Achto kijtoa, Dios amo kinneki tlamíktilteh, nion matitlamanakah, nion yolcameh non kinchichinoah ipan artal non techtlajtlakolchipawas, amo kiwelitah maya n tlanawátili kijtoa matitlamanakah. ⁹ Iwa satepa kijtoa: Nika niwits iwa nikchiwas tlan Tejwatsi Dios tikmonekiltia. Matikijtokah Cristo okinpopoloko nekateh tlamíktilteh non achto okinchiwayah, iwa okitlali ok se. ¹⁰ Dios yotexchipa de totlajtlakolwah porke Cristo okichi tlan Dios kimonekiltia, ijkuak omikki ipan krus, iwa okitemák ikuerpo kemi se tlamíktli san se welta iwa nochipa.

¹¹ N tiópixki judío, nochi tonati kinmana tlamíktilteh, iwa ixmostla kojpatilia tlan kimantok, pero ninteh tlananalteh mach weletih kimpopolwah tlajtlákolteh. ¹² Pero Cristo san se welta omotemák makimiktikah para kintlaxtlawas totlajtlakolwah nochipa. Iwa axa ewatok ik iyekma Totajtsi Dios. ¹³ Iwa ompa mochixtok asta ijkuak Dios kintlalis itlampa ikxiwah akimeh kikokoliah, ¹⁴ porke san ika se tlamánali, Cristo Jesús okinsenchipa de intlajtlakolwah nochteh akimeh kinyolchipajtok. ¹⁵ Noiwa nochi ni, n Espíritu Santo techonmatiltia kan kijtoa:

¹⁶ Ye ni n tlájtoli non satepa nimoyekkawas iwan yejwah, kijtoa n Toteko:

Niktllalis notlanawatil itech inyolo,
iwa nikinmijkuilos itech intlanamikilis.

Jr. 31:33

¹⁷ Iwa kijtoa:

Ayik oksepa nikinmilnamikis
intlajtlakolwah nion tlan amokuali okichijkeh.

Jr. 31:34

¹⁸ Ijkó kiné, keman yotechtlapopolwijkeh ayakmó moneki itla makimanakah para matechtlapopolwikah.

Matimijkuanikah inawak Dios.

¹⁹ Ijkó kiné nokniwah, axa ya weletis tikalakiskeh kan Lojar Santísimo ken Cristo Jesús okitoya iesso ijkuak omikki. ²⁰ Ijkuak Jesús omikki, ikuerpo omochi n yankuik ojtlí yolitok non okitlapo n kortina kan Lojar Santísimo, ²¹ iwa axa Cristo Jesús Ye n Weyi Tiópixki akin tlajakantok icha n Dios. ²² Matimijkuanikah inawak Dios ika toyolo chipawak iwa kualí matitlaneltokakah, porke Ye yokichipa toyolo nochi tlan amokuali, para ayakmó matimomachilikah titlajtlakolejkeh, ken nochi tokuerpo yokichipa ika atl chipawak. ²³ Axa, kualí matitlaneltokakah itech tlan tikchiah, porke kualí tikmatokeh, Dios techmakas nochi tlan oksentlali techmakas. ²⁴ Matiktemolikah kenijki timosepampapalewiseh, matimotlasojtlakah iwa matikchiwakah tlan kualí. ²⁵ Yika, nochipa matimololokah iwan oksikimeh tokniwah, amo matikchiwakah kemi sikimeh yomomatkeh amo kinekih mololoskeh. Tejawah moneki matimosepanyolchikawakah, iwa axa okachi por ya tikitah n tonati ijkuak Toteko wits ya walajsi.

²⁶Porke tla tiknekiskeh titlajtlakolchijtinemiskeh maya ya tikixmati tlan milák, ayakmó weletis techmakaskeh ok se tlamíktli por totlajtlakolwah. ²⁷Sanwel tikchiah n weyi iwa temojti tlaijyowilistli itech tletl xotlatok non kimpopolos akimeh kikokoliah Dios. ²⁸Ijkuak aka kixpanawia itlanawatil Moisés, iwa onkateh ome noso eyi akimeh milák okitakeh, ayakmó kitlapojpolwiah nion kiknomatih yej nima kimiktiah. ²⁹¡Amo nonkiyejyekoliah okachi kintlaijyowiltiskeh akimeh kixpanawiah Ikone Dios iwa kitah kemi amitla ipati imikilis n Cristo ijkuak okitoya iesso! Porke ijkuak ijko kichiwa kimawistetepewa Iespíritu Dios non techtlasojtla. Noiwa kimawistetepewa imikilis n Cristo, non ika omoyekkawako, iwa ika non estli yotechtlapojpolwiko de totlajtlakolwah. ³⁰Tikmatokeh tlan Totajtsi Dios okijto: “Ne Akin nitelaijyowiltis, iwa Ne nitetlaxtlawis.” Dt. 32:35 Noiwa okijto: “Toteko Dios kintlaxtlawiki noso kintlaijyowiltiki itlaneltokawah.” Dt. 32:36 ³¹¡Kema temojti tla otiwetsito imak Dios akin nochipa yolitok!

³²Xikinmilnamikikah n tonatijmeh ijkuak sikin ononkiselijkeh n kualitlájto. Maya onomechtlaijyowiltijkeh nomejwah nochipa ononkineltokakeh n kualitlájto. ³³Miak welta onomechpjinatijkeh ijkuak teixpa onomechwitekiah, iwa ijkuak oksikimeh nomokniwah okintlaijyowiltiyah, nomejwah noiwa onontlaijyowiyah. ³⁴Nomejwah ononkinommatkeh akimeh otsaktokah, iwa ika pakílistli ononkimotekawilijkeh manomechkixtilikah tlan nomoaxka, porke nonkimatokeh itech ilwikak nonkipiah tlan okachi kuali iwa ayik tlami. ³⁵Amo xikpolokah nomotlaneltokalis itech Cristo, porke nomotlaneltokalis nomechmakas se kualitlaxtlawili kan ilwikak. ³⁶Nomejwah xixkikokah nochi n tlaijyowilistli iwa xikchiwakah tlan Dios kineki, iwa ijko manomechmaka tlan Ye yokijto kitemakas. ³⁷Itlajkuilol Dios kijtoa:

San nima kalakiki, Akin saman wits,
ayakmó wejkawas.

³⁸Akin yolmilajka ika itlaneltokalis yolitos.

Pero tla ayakmó nechneltoka,

ayakmó nipaktos iwa.

Hab. 2:3

³⁹Tejwah, amo kemi nonmotsinkixtiah iwa moixpoloah. Tejwah timopoah iwan nekateh akimeh kineltokah Dios iwa ijko kinmakixtiah inmalma.

11

N tlaneltokálistli

¹Ijko kiné, n tlaneltokálistli ye tlan se kichia ika nochi iyolo, maya se amo kita. ²Dios okinyekseli towejkataatawah ken okineltokakeh.

³Ika totlaneltokalis tikmatih Dios ika itlajtol okichijchi n tlaltikpakli. Nochi tlan axa tikatih, n ilwikak iwa n tlaltikpak, nochi Dios okichijchi itech tlan amo omotaya.

⁴Abel otlaneltokaya inawak Dios, yika okimanili se tlamíktli iwa Dios okachi okitlasojkamah ke non de Caín. Dios okiseli Abel yolmilajka iwa okiseli itlamanal. Ijko kiné, maya Abel yowejka omikki, ok techixtlamachtijtok itlaneltokalis.

⁵Por itlaneltokalis Enok amo omikki, iwa Dios okiwik kan ilwikak yolitok, yika ayakmó okajsikeh. N tiotlajkuiloli kijtoa, ijkuak ayamó okiwikaya Enok, ye okipakti Dios ika iyeknemilis. ⁶Pero tla se amo kipia tlaneltokálistli, mach weletis tikpaktis Dios, porke akin mijkuania inawak Dios, moneki makineltoka Ye onka, iwa Ye kinmakas intlaliokolil akimeh kitemoah.

⁷Por itlaneltokalis Noé ijkuak Dios okili tlamochiwaskia, tlan ayamó omotaya, Noé otlaneltokah iwa opé kichijchiwa se weyi barko, non ika kinmakixtiskia non ken kimita. Ika non tlaneltokálistli okintlaijyowiltih nochteh n tlaltikpaklakah. Ijko Dios okitak n Noé kemi se tlakatl yolchipawak por okineltokah tlan okili.

⁸Por itlaneltokalis Abraham, ijkuak Dios okínotski, ye okitlakitak iwa oyá kan se tlali non Dios kixkatiliskia. Abraham okikakajte itlal iwa amo okimatia kan oyaya. ⁹Por itlaneltokalis Abraham ochanchiwaya itech ok se tlali san kemi se nénenki, kan Dios yokilijka kixkatiskia. Abraham ochantitoka ijtik kaltsótsoli ijko kemi Isaac iwa Jacob,

kemi Dios yokinmilijka kinmakaskia non tlali. ¹⁰ Abraham okichi tlan Dios okinawati, porke okinekia kitas neká altepetl non kual iyehtlakxilitok iwa ayik wetsis, non altepetl Dios okimájmaniki iwa okichijchi.

¹¹ Ika non itlaneltokalis Abraham, maya Sara amo oweletia okimpiaya ipilwah iwa okatka ya tenantsi, okiseli itlatiochiwalis Dios iwa okípíxki se ikone, porke Abraham okineltokak Dios nochipa kichiwa tlan kijtoa. ¹² Ijkó, maya Abraham yokatka ya tetajtsi iwa sa okichixtoka imikilis, ok oweletki okipixki se ikone iwa satepa okimpíxki satlawel miaktikeh iwejkaixwihwah, non amaka oweletia kimpoaskia, kemi n sítlalteh non kateh ilwikak iwa kemi n xali non kajki itempa n weyi atl.

¹³ Nochteh ninteh tlakah otlaneltokakeh asta omikkeh. Iwa mach okiselijkeh tlan Dios okinmili kinmakas, pero ken otlaneltokakeh, san wejka okitakeh tlan kinmakaskiah iwa opakeh. Iwa okijtojkeh amo omokawakoh itech nin tlaltípkaktli, yey san kech tonati onenemikoh. ¹⁴ Iwa akimeh íjkó kijtoah, kijtosneki ok kitemojtinemih se tlali kan chanchiwaskah. ¹⁵ Tla yejwah kilnamiktoskiah n tlali kan owalkiskeh, weletiskia oksepa onmokopaskiah kan owalewakeh. ¹⁶ Pero yejwah okitemoayah se tlali okachi kuali kan chanchiwaskiah, kijtosneki okinekiah chanchiwaskah ilwikak. Yika Dios amo pinawa makilikah Inteko de yejwah, porke Ye yokinmajmanili se altepetl kan ilwikak.

¹⁷ Por itlaneltokalis Abraham, keman Dios okiyejyeko, para kimiktis ikone Isaac, Abraham kichiwaskia tlan Dios okinawati porke okineltokaya. ¹⁸ Porke Dios yokilijka: “Ika mokone Isaac tikimpías miaktikeh mowejkaixwihwah.” *Gn. 21:12* ¹⁹ Abraham okimatia Dios kipia weletílistli para kiyolitis se non yomikki, yika weletis tikijtoskeh Abraham oksepa okiseli ikone Isaac kemi yetoskia yomikka.

²⁰ Ika itlaneltokalis, Isaac okintiochi n Jacob iwa n Esaú iwa okinmili tlan kiseliskia satepa. ²¹ Noiwa ika itlaneltokalis, ijkuak ya mikiskia n Jacob, omotlakxili ipan ibasto iwa okintiochi ipilwah n José, iwa okiweyijkachi Dios. ²² Iwa ika itlaneltokalis ijkuak ya mikiskia n José, okinmili n israelitas satepa kisaskiah itech tlali de Egipto, iwa okinnajawatijtehawk tlan kichiwaskiah iwan iomiowah.

²³ Ika intlaneltokalis, ijkuak otlákatki Moisés, itajwah okitlatijkeh eyi mestli, porke okitakeh kuajkualtsi n konetl, iwa amo okimawilijkeh itlanawatil n rey akin otlanawatijka makinmiktikah nochteh n kokoneh. ²⁴ Ika itlaneltokalis Moisés ijkuak yokatka tlakatl, amo okinek makinotsakah ikone ichpoch n rey de Egipto. ²⁵ Yey okinek sansikah makitlajjowiltikah iwan ipilwah n Dios, iwa amo san kech tonati mopaktijtinemis itech inmelewilis n tlajtlákoli. ²⁶ Moisés okimatia nochi tlan se kiyowia por Cristo, okachi ipati ke nochi tlan okipiaya n rey de Egipto, ken itlachialis yokitlalijka itech n tlatliokólili non Dios kimakaskia. ²⁷ Ika itlaneltokalis Moisés okiski de Egipto, iwa amo okimawili ikualanilis n Rey de Egipto, Moisés amo omosotla, ken okimatia Dios okatka iwa, maya amo okitaya.

²⁸ Ika itlaneltokalis Moisés, okipewalti ilwitl de Paskua. Iwa okinnawati n tlakah de Israel makajtselwikah inajnastlah inkaltenwah ika inmeso ichkameh, íjkó n ángel non kualinmiktiskia n kokoneh teteachkameh, amo makinmikti nion se chokotsi teteachka itech impilwah n tlakah de Israel. *Éx. 12:7*

²⁹ Iwa ika intlaneltokalis, n tlakah de Israel opanokeh itlajko atl non itoka mar chichilitik kemi yetoskia nejnentiwih ixko tlali waki, iwa ijkuak n egipsios okinekiah panoskeh kemi yejwah, oapolakeh iwa omikkeh.

³⁰ Iwa ika intlaneltokalis, n tlakah de Israel onenenkeh iwa okiyawalojkeh chikomeh tonati n weyi tepamitl non kiyawalojtok n altepetl de Jericó iwa owetskeh n tepamimeh.

³¹ Iwa ika itlaneltokalis n awilsiwatl Rahab, amo omikki iwan amo tetlakitakeh, porke okinseli icha n ichtakateistlakojkeh de Israel.

³² ¿Tlan okachi weletis nomechilis? Amo nikajxilís nomechtlapowis de Gedeón, Barac, Sansón, Jefté, David, Samuel iwa n profetas. ³³ Porke otlaneltokayah inawak Dios, yika okintlankeh oksikimeh paismeh, iwa kuali otekiwajtikeh iwa okiselijkeh nochi tlan Dios okinmili kinmakas. Iwa okinkamatsakeh liomeh, ³⁴ okinsewjikeh wejweyi tlemeh, oweletkeh omakiskeh ijkuak kinmiktiskia ika espada. Non okatka amo chikawakeh okiselijkeh chikawálistli iwa omotlamitoh chikawakeh kan momijmiktilo, iwa okintoktijkeh

matsinkisakah n soldadojteh non inkokolikniwah. ³⁵ Ika intlaneltokalis sikimeh siwameh, Dios okichi oksepa mamoyolitikah ichantlakawah non yomikkeh.

Oksikimeh tlaneltokakeh mach okikajkeh Dios maya okintlajiyowiltijkeh, yej okimokawilijkeh makinmiktikah, ken yokimatiah moyolitiskiah iwa ijko kiseliskeh ok se yankuik yolitilistli. ³⁶ Oksikimeh okimpipinawayah teixpa iwa okinwitekeh, sikimeh okinmilpiayah ika kadena iwa oksikimeh okintsakuayah. ³⁷ Sikimeh okinmiktijkeh ika tetl, sikimeh okintlajkotekeh ika serrrote, iwa sikimeh okinmiktijkeh ika espada. Nika iwa nepa onentinemiah ken amo okinkawiliayah machanchiwakah, omotlakentijtinemiah sanwel ika inmewayo n ichkameh noso tentsomeh iwa satlawel próbesteh okatkah. Nochteh okintlawelitayah iwa okintlajiyowiltayah. ³⁸ Ninteh tokniwah okatkah saikpanoa kualteh n tlakah itech nin tlaltlfpaktli. Setetl onentinemiah kan amaka chanti, kan tepeyo, ijtik kúyokteh iwa wejweyi kuevajteh.

³⁹ Nochteh ninteh maya kuali okinselijkeh por intlaneltokalis, amo okiselijkeh tlan okinkakitijkah. ⁴⁰ Ijko otlamochi, para yejwah amo achto makalakiti iwa tejwah satempa. Tlamó Dios kimajmanaskia itla okachi kuali para tejwah.

12

Matiktalikalik totlachialis itech Jesús

¹ Yika, tejwah noiwah, non tikateh intlajko miakeh tokniwah non kuali yokiteititijkeh intlaneltokalis, matiktalikaltechokah nochi tlan techtsakuilia, n tlajtlakoli non techijilpia. Iwa ika miak yolchikawálistli matimotleloka itech nin ojtlí non kajki toyakapa.

² Matiktalikalik totlachialis itech Jesús, porke imak wits nochi totlaneltokalis, porke Ye otechititi kenomi titlaneltokaskeh. Jesús otlajiyowi itech krus, iwa mach omotekipacho kox saikpanoa tepinati ijkuak se mikki itech krus, porke okimatia satempa de itlajiyowilis kipiaskia miak pakílistli, iwa axa ewatok ik iyekma kan Dios yayantitok.

³ Yika, tla kemia nonmosotlawah, san xikilnamikikah kenomi Jesús okixiko nochi tlan okitoktijkeh n tlajtlakolejkeh. ⁴ Porke maya nonkixikojtokeh n tlajiyowílistli para amo nontlajtlakolchiaskeh, nomejwah ayamaka nomechmiktia. ⁵ Nomejwah yononkillakjkeh kenijki Dios kinnonotsa akimeh ipilwah. Ijki kijtoa n tiotlajkuiloli:

Nokone, amo san xikawilmati ijkuak Toteko Dios mitsnonotsa,

nion ximosotlawa ijkuak chikawak mitsajwa.

⁶ Porke Toteko Dios kimilawa akin kitlasojtla,

iwa kitsonwiteki akin kiselia kemi ikone.

Pr. 3:11-12

⁷ Xikxikokah kema Dios nomechmilawa, porke amo onka se teta non amo kimilawa ikone.

⁸ Porke tla amo timomilawah, kemi se kinmilawa ipilwah, kijtosneki tejwah amo ipilwah n Dios, iwa Ye amo techselia. ⁹ Ijkuak tejwah otikatkah tikokoneh, totajwah tlaltlfpaktlakah otechmilawayah, iwa tejwah otikintlakitayah. Axa okachi tikpia tiktlakitaskeh Dios, ken Ye Teta de n espíritu, iwa ijko tikpiaskeh yolílistli. ¹⁰ Nika ipan tlaltlfpaktli totajwah otechmilawayah kemi yejwah okiyejekoliayah kuali para matimomilawakah. Pero Dios techmilawah porke milák kineki techpalewis, para matiyetokah tiyolchipawakeh kemi Ye.

¹¹ Ijkuak aka techmilawa, amo tikwelitah, porke techkokoa. Pero akin moyektlalia kipiaskias yolsewílistli iwa yeknemis.

Xinemikah kemi Dios kiniki

¹² Ijko kiné, xikonanakah chikawálistli, nomomawah amo san machapantokah, iwa nomokxiwah amo san makuijuiktlaxiwikah. ¹³ Xiktemokah n ojtlí milaktik. Ijko, nomokxi non omonekuilo, pajtis iwa ayakmó oksepa monekuilos.

¹⁴ Xiktemolikah kenomi weletis nonmoyekwikaskeh non nocteh, akin amo nemis ika iyolo chipawak, ayik kitas Totajtsi Dios. ¹⁵ Kuali ximotlachilikah nonnochteh xikajsikah ikualtilis Dios, iwa amaka mayeto kemi n chichik xiwitl non teijtla iwa kinchichiyaltia oksikimeh. ¹⁶ Nion se de nomejwah mamomekati, nion makajawilmati tlan Dios tlanawatia, porke ijko okichi Esaú, akin okawilo tlan ita kimakaskia kemi teteachka, san por siki

tlákuai. ¹⁷ Ijkuak Esaú okinek makitiochiwa ita kemi teteachka, ita ayakmó okitiochi, iwa maya miak ochokak Esaú, ayakmó owéletki okiyektlali tlan okichi.

¹⁸ Nomejwah mach ononmijkuanijkeh kemi n israelitas itsintla n tepetl Sinaí non se weleti kitelkoa, kan oxotlatoka tletl, kan otleuyatoka ika mexтли, okatka tleyuálistli iwa chikawak oejekaya. ¹⁹ Noiwa mach ononkikakeh ijkuak okipitskeh se tlapítsali, nion itlajtol Dios ijkuak okintlapowi. Akimeh okikakeh non tlájtoli, okitlatlautijkeh ayakmó okachi makintlapowi, ²⁰ porke ayakmó okixikoayah non tlanawátli non okijtoaya: “Tla aka tlakatl noso yolkatl kontlalis ikxi ipan tepetl Sinaí, makimojmotlakah ika tetl asta mamiki.” *Éx. 19:12* ²¹ Semi temojti tlan okitayah, yika asta inewia Moisés okijto: “Semi nimomojtia, asta nibibioka.” *Dt. 9:19*

²² Pero nomejwah ononmijkuanijkeh kan tepetl Sión, kan weyi altepetl de Dios non yolitok, kijtosneki kan yankuik Jerusalén non kajki ilwikak, innawak miaktikeh ángeles, ²³ ompa ololitokeh ipilwah teteachkameh non machotitokeh kan ilwikak. Nomejwah ya nonkateh ompa inawak Dios n teyolsewi. Noiwa ompakateh inmespíritus n yolchipawakeh. ²⁴ Yononmijkuanijkeh inawak Jesús, Akin techtlajtolpalewia inawak Dios, porke Ye otechalikili n yankuik tlájtoli non Dios otechmák. Iwa ika iesso Jesús non okitoya ijkuak omikki, Dios yotechtlapojpolwi de totlajtlakolwah. Yika Jesús okachi weyijkatitok ke Abel, porke iesso n Abel amo techtlapojpolwia yej kitlajtlani makimiktikah akin okimikti.

²⁵ Ximotlachilikah, amo kichiwa amo nonkikakiskeh Dios Akin nomechnonotsa. Porke amo omakiskeh towekataatawah non amo okikakeh Dios keman okinonotsaya kan tepetl Sinaí. Okachi tejwah amo timakiskaskeh tla amo tikkaki akin techalnonotok desde ilwikak. ²⁶ Itech nekateh tonatijmeh ijkuak Dios okintlapowi n tlakah de israel, otlalólinki. Iwa axa kijtoa: “Oksepa nikchiwas matlalolini, iwa axa amo san tlaltíkpaktli niktsejtselos, yej noiwa n ilwikak.” *Hag. 2:6* ²⁷ Iwa ijkuak okijto “oksepa”, non tlájtoli kijtosneki pojpoliwis nochi tlan molinia, iwa mokawas sanwel tlan amo mota. ²⁸ Iwa tejwah Dios techmaka se lojar kan Ye tlanawatijtok iwa ayik molinis. Yika, matiktlasojkamatikah iwa matikweyijkachiwah ika weyílistli iwa tlasojtlálistli non Ye kipaktia, ²⁹ porke Totajtsi Dios se tletl non nochi kipaaltilia.

13

Kenomi weletis tikpaktis Dios

¹ Nochipa matimosepantlasojtlakah kemi tiiknimeh. ² Nochipa xitekalotikah keman nomechtlajtlanih, porke akimeh tekalotiah, amo kimatih okinkalotijkeh ángeles.

³ Xikinmilnamikikah non tsaktokoh, ken yaskia nomejwah inwah nontsaktokoh. Xikinmilnamikikah akimeh kintekipanoltiah, kemi yaskia mononewiah.

⁴ Nochteh akimeh yomonamiktijkeh moneki mamotlakitakah, machipaujkanemikah iwa amo mamomekatikah; porke Dios kintlajjowiltis akimeh momekatiah noso awilnemi, non yomonamiktijkeh iwa non ayamó monamiktiah.

⁵ Amo xikapisnekikah tomi, xipakikah ika tlan ya nonkipiah, porke Dios yokijto: “Ayik nimitskajtewas moselti, nion nimitsilkawas.” *Dt. 31:6* ⁶ Yika, tejwah weletis tikijtoskeh ika miak tlaneltokálistli tlan kijtoa itlajtol Dios:

Amo nimawi, amaka weletis itla nechtoktis porke Dios nechpalewia.

⁷ Xikinmilnamikikah n tokniwah tlayakankeh akimeh onomechmachtijkeh itlajtol Dios, xikilnamikikah tlan kualí okichijkeh itech innemilis iwa xikchiwahak tlan yejwah okichijkeh.

⁸ Cristo Ye inewia, yala, axa iwa nochipa. ⁹ Yika, amo xikintlakitakah tlamachtílisteh non amo keman mokakih. Okachi kualí matechchikawa itlasojtlalis Dios, iwa amo n tlamachtílisteh non kijtoah tlan se weletis kikuas iwa tlan amó, porke nonteh tlamachtílisteh amitla techpalewiah.

¹⁰ N tiopixkeh non otlamanayah kan achto artal, mach para kikuaskeh tlan tikpiah itech toartal. ¹¹ N tiópixki non tlayakantok, kiwika innesso n yolkameh kan Lojar

Santísimo, kemi se tlamánali para kimpojpoulos tlajtlákolteh, pero innakayo nonteh yolkameh mochichinoa kala. ¹² Yika, Jesús noiwa okimiktijkeh kala, de n altepetl de Jerusalén, ye omikki para kintlajtlakolchipawas n tlakah ika iesso. ¹³ Ijkó kiné, tejwáh noiwah matikisakah iwa matiwiad kan okiwikakeh Jesús, para matechpípinawikah kemi ye okipípinawijkeh. ¹⁴ Porke itech nin tlaltípkaktli amo tikpiah se altepetl non wejkawas nochipa. Tejwáh tiktemoah non sikin wits. ¹⁵ Yika, nochipa matikweyijkachiwakah Dios, ika Itoka n Toteko Cristo Jesús, nin weyijkachiwálistli ye n tlamánali non tikpiah tikmakaskeh. Matikweyijkachiwakah ika totlajtol iwa matiktenewakah Itoka. ¹⁶ Iwa amo xikilkawakah nonkichiwaskeh tlan kuali. Xikimpalewikah akimeh amitla kipiah, ye tlan Dios kipaktia.

¹⁷ Xikintlakitakah akimeh nomechyanah iwa xikchiwakah tlan nomechnawatiah, porke yejwáh nomechmokitlawia, iwa kuali kimatokeh Dios kintlajtlanis kenomi onomechyankeh. Xikintlakitakah para makichiwakah intekih ika pakílistli, iwa amo san matsoyontokah. Porke noni amitla nomechpalewis.

¹⁸ Ximotiotsajtsilikah por tejwáh. Tejwáh kuali tikmatokeh amitla tlajtlákoli tikpiah, porke tiknekih tikchiwaskeh nochi tlan kuali. ¹⁹ Nomechtlajtlanilia ximotiotsajtsilikah por ne, para Dios manechkawili sanima manomechitati.

Motiotsajtsilia iwa momakawa inwah

²⁰ N Dios teyolsewi, Ye akin okiyoliti n Toteko Cristo Jesús. Tejwáh inawak Jesús kemi tiichkameh, iwa Ye Toweyi Tlájpíxki. Ika iesso non okitoya ijkuak omikki, Dios omotlajtolsenka towa semijkak. ²¹ Ye manomechmachtli nochi tlan kuali para nonkichiwaskeh tlan Ye kimonekiltia. Iwa por Cristo Jesús, Dios makichiwa itech nomonemilis tlan kimonekiltia. ¡Nochipa maweyijkatito n Toteko Cristo Jesús! Ijkó mamochiwa.

²² Nokniwah, nomechtlatlaujtia xikinselikah ika kuali ninteh tlájtoltel non ika nomech-nonotsa, porke san kanaj kech tlájtoli onomechtlajkuilili.

²³ Nikneki xikmatikah tokni Timoteo yokikajkajkeh de kan otsaktoka, iwa tla sanima owala, nikuikas ijkuak nias nomechitati.

²⁴ Xikintlajpalokah nochteh akimeh nomechyanah, iwa nochteh n tokniwah tlanel-tokakeh.

N tokniwah de Italia nomechtlajpaloah.

²⁵ Ikualtilis Dios mayeto nomowa.

N amatlajkuíloli non okijkuilo Santiago

Santiago kintlajkuililia non xitintokeh itech nochi n tlaltípkaktli

¹Ne, Santiago (Jacobo), ni itlakewal n Totajtsi Dios iwa n Toteko Cristo Jesús, niktintlaj-paloa n májtlakteh iwa n ome tribus non xitintokeh itech nochi n tlaltípkaktli.

Dios techmaka ixtlamatílistli

²Nokniwah tlaneltokakeh, xipakikah ijkuak nomecheyjekoskeh. ³Porke ya nonkimatih ijkuak kiyejyekoa nomotlaneltokalis, nomechmakah yolsekílistli. ⁴Pero xiktemolikah kenijki nontlaxikoskeh asta iksemi, iwa ijko nonyetoskeh okachi non kualteh iwa non-kichiwaskeh nochi tlan nomechnawatiskeh.

⁵Tla seme de nomejwah amo kipia ixtlamatílistli, makitlajtlani Dios. Ye nomechmakas miak ixtlamatílistli iwa amo nomechixtokilis. ⁶Pero, ijkuak itla tiktajtlanis, xiktajtlani ika nochi motlaneltokalis. Porke akin amo tlaneltoka ijkuak kitlajtlani, noni kemi se ameméloli non kajki itech weyi atl, iwa n ejekatl san kiwiwika. ⁷Akin ijki iyalis, amo makijto, Dios itla kimakas. ⁸Porke akin kiwilita kipapatlatos itlayejyekolis, amayik kichiwas tlan kimolia kichiwas.

⁹Tla aka probe, mapaki porke miak ipati inawak Dios. ¹⁰Tla aka tominyo, mapaki ijkuak kita kemi non amitla ipati. Porke n tominyo kemi se xochitl non amo wejka iwa saniman waki. ¹¹Ijkuak kisa n tonati iwa pewa chikawak tona, n xiwitl piliwi iwa wetsi ixochio. Iwa san ompa tlami nochi tlan kuajkualtsi. Ijko mochiwa n tominyo, nion ye, nion itomi wejkaskeh.

Matilaxikakah ijkuak itla tipanoah

¹²Miak pakílistli kípías n tlakatl akin kixikoa nochi tlan kiyoltilana, porke ijkuak kixikoa, mach ok mikkis. Iwa kiselis ikorona non kijtosneki yolitos nochipa kan ilwikak, non Dios okijto kinmakas akimeh kitlakitah. ¹³Ijkuak itla nomechyoltilana, amo xikijtokah Dios onomechtokti manomechyoltilana tlan amo kuali. Porke n amokuali amo weletis kitoktis Dios matlajtlakolchiwa, nion Dios weletis amaka kiyoltilanas matlajtlakolchiwa. ¹⁴Mach ijko, se tlakatl wetsi itech tlajtlákolli ijkuak kimokawilia makiyoltilana tlan amokuali mokuatlapowijtok. ¹⁵Yika, tlan amokuali tikyejyekolia tlaakati n tlajtlákolli, iwa ijkuak moskaltia n tlajtlákolli techmiktia.

¹⁶Notlasojikniwah, amo xikuatlapolokah, amo ximokajkayawakah. ¹⁷Nochi tlan kuali iwa yekmilajka wits de ilwikak iwa Dios techmaka. Inewia Dios okinchijchi n sítlalteh non kateh ilwikak, iwa ayik kipatlas. ¹⁸Dios okinek matitlaakatikah ijkuak otikkakeh itlajtol non milák, para matiyetokah titetiachkameh non okachi kuali itlakilo tlan okichijchi.

Matikchiwahak tlan kijtoa n kualitlájtolli

¹⁹Notlasojikniwah, kuali xikkakikah tlan nomechilis: Nonnochteh san xitlamatokah ijkuak nonkinkakiskah oksikimeh, amo san nima xitlajtokah nion xikualanikah. ²⁰Porke ijkuak se tlakatl kualantok, amo kichiwa tlan Dios kipaktia. ²¹Ijko kiné, xikkawakah nochi tlan teyolijtlakoa iwa nochi tlajtlákolli tlan onka, iwa xiyetokah nonyolyamankeh, iwa xikselikah n kualitlájtolli non yomotook nomotech. Porke non kualitlájtolli kipia weletílistli para nomechmakixtis.

²²Nomejwah amo san xikkakikah itlajtol Dios, yej xikchiwahak tlan kijtoa, porke tla amo nonkichiwah san nonmokajkayajtokeh. ²³Akin kikaki itlajtol Dios, iwa amo kichiwa tlan kijtoa, noni kemi se tlakatl non moixtlajtlata itech se teskatl, ²⁴iwa ijkuak omoixtlajtlata, yawi iwa kilkawa kenomi omotaya. ²⁵Pero akin amo kilkawa tlan kikaki, iwa moyekketsa itech n yekmilajka tlanawátilli iwa kimopantia, iwa kichiwa tlan kijtoa non tlanawátilli, nochipa paktos ika tlan kichiwa.

²⁶Tla aka kijtoa satlawel kitlakita Dios pero nemi san ika ikamak, san ye inewia mokajkayajtok iwa ireligión amitla ipati. ²⁷N milajka tlaneltokálistli ixpa n Dios ye ni:

matikimpalewihak n iknomeh iwan iknosiwameh ika tlan kimpoloo, iwa matinemihak ika toyolo chipawak iwa amo matechyoiltilana tlan onka itech nin tlaltíkpacktli.

2

Amo san xitechikotlasojtlakah

¹Nokniwah, nomejwah akimeh ya nonkineltokah n Toteko Cristo Jesús, amo san sikimeh xikintlanekilikah iwa oksikimeh amó. ²Matikijtokah, kan nonmoololoah onkalaki se tlakatl iwa kiwika se ianiyo de oro iwa kualitlakentiti, iwa san nima onkalaki ok se tlakatl non semi probe iwa sa tsotsoltik, ³tla tikmopantia n tlakatl non yektlakentiti iwa tikilia: “Xiwiki nika, nika ximoyayanti.” Iwa n tlakatl non probe non sa tsotsoltik, tikilia: “Te nonka ximoketo, noso nika itech tlali ximotlali.” ⁴¿Mach amo kijtosneki san sikimeh nonkintlanekiliah iwa oksikimeh amó? Nomejwah nonkichiwah kemi se teyolsewi, non amo kualitlayejkolis.

⁵Notlasojikniwah, techkakikah tlan nomechilis: Mach amo Dios okimpépenki n próbesteh itech nin tlaltíkpacktli, para makipiakah miak tlaneltokálistli iwa maki-moaxkatikah tlan Dios yokinkakitijka kinmakas akimeh kitlasojtlah. ⁶¿Pero nomejwah nonkintlawelital n próbesteh! Nomejwah kualit nonkimatih akimeh kipiah tomi, kintotojtokah n próbesteh iwa kintsakua. ⁷Noiwa nonkimatih akimeh kipiah tomi, fiero kitenewa itoka n Toteko akin nomejwah ononkiselijkeh.

⁸Ijkó kiné, tla milák nonkijekchiwah tlan kijtoa n weyi tlanawátli: “Xiktlasojtla mokni kemi te timotlasojtla”, yompa tlan nonkichiwah. ⁹Pero tla nomejwah san sikimeh nonkintlanekiliah iwa oksikimeh amó, nonkichijtokeh tlajtlákolli, iwa amo nonkichiwah tlan kijtoa itlanawatil Dios. ¹⁰Tla se tlakatl kintlakita n tlanawátitl, pero kixpanawia san se, ika noni yokinmixpanawi nochteh. ¹¹Porke inewia Dios okijto: “Amo ximomekati”, noiwa okijto: “Amo xitemikti.” Yika maya amo se momekatijtinemi, pero tla se temiktia, ika noni kixpanawia nochi n tlanawátli. ¹²Yika, kualit xikmatikah tlan nonkijtoah iwa kenomi nonnemih. N tlanawatilistli non temakixtia ye tetlaijyowiltiki itech n iksemi tonati. ¹³Dios amo kinmiknomatis akimeh amo teiknomatih. Pero akimeh teiknomatih, nonteh kualit makisaskeh itech iksemi tonati.

Totlaneltokalis iwa tlan se kichiwah

¹⁴Nokniwah tlaneltokakeh, ¿tlan ipati tla sikimeh de nomejwah nonkijtoah nonkipiah miak tlaneltokálistli inawak Dios, pero amitla kualit nonkichiwah?, ¿kox weletis nomechmakixtis non nomotlaneltokalis? ¹⁵Matikijtokah, tla se tokni tlakatl noso siwatl, amo kipia tlan kimokentis nion amo kipia tlan kikuas non tonati, ¹⁶iwa se de nomejwah kilia: “Ximuikati, xio ika kualit, ximotlakenti iwa xitlakua”, pero amo kimaka tlan koniitok kipoloo, ¿mach itla ipati tlan kilia! ¹⁷Ijkó noiwa tla aka kijtoa kineltoka Dios pero amo kichiwa tlan kualit, amitla ipati tlan kijtoa, noni kijtosneki miktok itlaneltokalis.

¹⁸Pero aka weletis mitsilis: “Te tikpia motlaneltokalis, iwa ne nikchiwa tlan kualit.” Techititi motlaneltokalis iwa techititi tlan kualit tikchiwa, iwa ne nimitsititis milák nikneltoka Dios ika tlan kualit nikinchiwilia oksikimeh. ¹⁹Te tikneltoka sanwel se Dios onka, kualiká tlan tikneltoka. Pero xikmati, noiwa n demóntojteh kineltokah sanwel se Dios onka iwa bibiokah. ²⁰Pero te tokni akin amo tikneki titlakakis, amitla ipati motlaneltokalis tla amitla tikchiwa. ²¹Towejkatata Abraham okipakti Dios, ijkuak okitlali ikone Isaac ipan artal para kimiktis. Yika Dios okiseli kemi yolchipawak. ²²Itlaneltokalis Abraham omoteititi ika tlan ye okichi. Yika, ika tlan ye okichi itlaneltokalis omoyekajxiti. ²³Ijkó omochi tlan kijtoa itlajkuilol Dios: “Abraham okineltokak Dios, iwa ika itlaneltokalis Dios okiseli kemi se tlakatl yolchipawak.” Ijkó Abraham omochi itlakaikni n Dios.

²⁴Ijkó kiné, Dios techselia ika tlan tikchiwa, iwa amo ika tlan tikneltokah. ²⁵Noiwa ijko otlamochi iwan awilsawatl Rahab, Dios noiwa okiseli kemi yolchipawak ken okinkaloti iwa okintlaati n ichtakateistlakojkeh itech icha, iwa okimpalewi macholokah itech ok se ojtli. ²⁶Yika, tla se kuerpo amo kipia espíritu, non kuerpo miktok, ijko noiwa totlaneltokalis amitla ipati tla amitla tikchiwah.

3

Tejwah matiktakawaltikah tonenepil

¹ Nokniwah, amo san akin yetos makineki mayeto tlamachti, porke ya nonkimatih, akimeh titlamachtiah moneki kuali matitlamachtikah tla amó, okachi techtlaijyow-iltiskeh. ² Tinochteh kualchiwa titlajtolpanoah, iwa tla onka se tlakatl non amo kimati motlapololtia ijkuak itla kijtoa, non tlakatl yekmilajka iwa weletis kinawatis nochi ikuerpo. ³ Ijkuak tejwah tikkamatepostiah se kabayo techtlakita, ijko tiweletih tiknawatia nochi ikuerpo. ⁴ Noiwa xikinmitakah n wejweyi barkojteh, maya chikawak maejekato iwa makiwiwika n ejekatl, san ika se tsijsikitsi timón se tlakatl non kimati weleti kinnejnemitia san kan ik ye kineki. ⁵ Noijkó timochiwa ika tonenepil. Ye non okachi tsijsikitsi itech tokuerpo, pero ijkuak waltlajtoa, weleti kinmijtoa wejweyi tlajtolteh. Kemi se tletsintli, ¡maya san tsijsikitsi pero weleti kixotlaltia se weyi kuaujyo! ⁶ Tonenepil se tletl, iwa kipia miak weletilistli para kichiwas tlan amokuali. Weletis kijtلاكos nochi tonemilis, iwa nin tletl walewa de miktla. ⁷ N tlaltikpaktlakatl weleti kisewilismachtia nochi yolkatl, n totomeh, koameh, iwa n yolkameh non kateh ijtik weyi atl. ⁸ Pero amaka weleti kitlakawaltia inenepil. Tonenepil satlawel amokuali iwa amo kimotekawilia aka makinawati, tentok ika miak beneno non temiktia. ⁹ Ika tonenepil tikweyijkachiwah Totajtsi Dios, iwa ika tonenepil tikinwikaltiah akimeh Dios okinchiyehi kemi Ye. ¹⁰ San ika se tokamak tikweyijkachiwah Dios noso titlawikaltia. Nokniwah, amo ye tlan tikchiwah. ¹¹ ¿Kox weletis san itech se améyali kisas atl tsopelik iwa atl non chichik? ¹² Nokniwah, ¿weletis se igoskuawitl kitlakiltis tempíxkistli?, noso ¿se uvaskuawitl weletis kitemakas igos? Ijko noiwa, amo weletis kisas atl tsopelik iwa atl pyuk san itech se améyali.

N ixtlamatlistli non Dios kitemaka

¹³ Tla aka semi ixtlamati iwa nochi kajsikamati, makiteititi ika iyeknemilis itech nochi tlan kichiwa. Iwa tla milák ixtlamati, amo mamoweyili. ¹⁴ Tla nomejwah nonkipiah nexikólistli iwa nontekokoliah itech nomoyolo, ayakmo xixankuatikah iwa xikchiwakah tlan milák. ¹⁵ Porke non tlamachtlistli amo walewatok itech Dios, yej san itlamachtilis nin tlaltikpaktli non kitemaka n amokualitlakatl. ¹⁶ Yika kan onka nexikólistli iwa tlanetéwili, ompa xejxelitokeh iwa onka nochi tlan amokuali. ¹⁷ Pero akimeh kipiah n ixtlamatlistli non Dios kitemaka, amo kichiwah tlan amokuali, yej kitemoah yolsekilistli, yejwah tetlakitah iwa kualteh n tlakah iwan nochteh. Yejwah teiknomatkeh iwa kimatih tepalewiah, iwa nochipa kichiwah tlan kuali. Amo san techikotlasojtlah, nonteh de milajka tlaneltokakeh. ¹⁸ Yika, akimeh mochijchikawah mayeto yolsekilistli innawak nochteh n tlakah, Dios kinmakas yolsekilistli iwa kipiaskeh yeknemilistli.

4

Xikmopantikah Totajtsi Dios

¹ ¿Kani walewa n tlájtoli non ika pewa nonmokuakualaniah? Walewa nomotech, itech tlan amokuali kiapisneki nomoelewilis. ² Nomejwah nonkinekih itla, pero mach nonweletih nonkipiah, yika nontemiktiah, nonxikojmikih ika tlan ok se kipia, iwa kemi nomejwah amo nonweletih nonkiseliah, pewa nonmokuakualaniah iwa tlami nonmokuah. Amo nonkipiah tlan nonkinekih, porke amo nonkitlajtlaniliah Dios. ³ Iwa tlan nonkitlajtlaniah amo nonkiseliah. Amo nonkiseliah porke nonkitlajtlaniah san para nonkipaktiskeh nomokuerpo. ⁴ ¡Mekátanjteh! ¿Amo nonkimatih, ijkuak okachi nonkitlasojtlah tlan onka itech nin tlaltikpaktli nonmokopah nontetlawelitakeh inawak Dios? Nochi akin kimoknitia tlan amokuali onka itech nin tlaltikpaktli, iselti mokopa ikokolikni n Dios. ⁵ Yika n tiotlajkuiloli kijtoa: “N espíritu non Dios okitlali totech, satlawel kitlasojtla asta kichawatilia.” ⁶ Pero Dios okachi techpalewia ika iteiknomatilis; yika n tiotlajkuiloli kijtoa: “Dios kintlawelita akimeh moweyiliah, pero kimpalewia ika iteiknomatilis akimeh moiknomatih inawak.”

Pr. 3:34 ⁷ Yika, xikmopantikah Dios iwa

ximochijchikawakah para amo manomechtiani n amokualitlakatl, iwa ye nomechcholilis. ⁸ Xiwalnijkuanikah inawak Dios, iwa Ye mijkuanis nomonawak. ¡Nomejwah akimeh

nontlajtlakolchijtinemih, xikinchipawakah nomomawah de nomotlajtlakolwah. Akimeh amo yektlaxilitokeh, ximoyolchipawakah! ⁹Ximotekipachokah, ximoyolkokokah iwa xichokakah. Nomowetskalis mamokopa chokilistli iwa nomopakilis mamokopa neyolkókoli. ¹⁰Ximoiknomatikah inawak Dios, iwa Ye nomechweyijkatlalis.

Amo matikpojoakah se tokni

¹¹Nokniwah, amo xitepojoakah. Akin kipojpoa se tokni, mochiwa ken kipojpoaskiah itlanawatilis Dios. *Stg. 2:8* Iwa tla tikpojpoa itlanawatilis Dios, ayakmó tiktaklita itlanawatilis, yej tikixnamiki. ¹²Pero sanwel onka se Akin okitemák n tlanawátili, Ye Akin temaxixtia iwa tetlajtlakoltia, ¿akin te non tikijtoa kox kuali noso amo kuali tlan kichiwa se mokni?

Amo ximotekipachokah ken nonpanoskeh mostla

¹³Axa, xikkakikah akimeh nonkijtoah: “Axa noso mostla, tiaskeh itech neká altepetl noso itech ok se altepetl; ompa titlasemanaskeh se xiwitl iwa tiktlaniskeh tomi.” ¹⁴¿Tleka ijkó nonkijtoah, iwa amo nonkimatih tlan tlamochiwas mostla?, ¿tlan ipati nomonemilis?, nomonemilis méxpoktli: porke ijkó kemi monextia, ijkó noiwa san walpoliwi. ¹⁵Okachi kuali ijkí xikijtokah: “Tla Dios kimonekiltia matiyolitokah, tikchiwaskeh nin tekitl noso neká ok se.” ¹⁶Pero nomejwah non moweyitlaliah itech tlan nonkinekih nonkichiwaskeh, iwa nochi nomoweyilis satlawel amo kuali. ¹⁷Porke akin kimati kichiwa tlan kuali, iwa amo kichiwa, tlajtlakolchiwah.

5

Nikinnonotsa akimeh kitlawelpiah tomi

¹¿Kuali xitlakakikah nomejwah akimeh nonkipiah tomi! Xichokakah iwa xitsajtsikah por nochi n tlajjowilistli non nomopah wetsis. ²Nochi tlan nonkipiah palanis, iwa nomotlakenwah kinkuas n tlaxinachi. ³Nomo oro iwa nomo plata yoxawaloak, iwa non xawalo nomechteilis itech n iksemi tonati, iwa nomechpojobolos kemi tletl, porke ononkoololojkeh miak tomi itech iksemi tonatijmeh. ⁴¿Xikakikah! Nomejwah mach ononkinyektlaxtlawijkeh nomotlakawah. Yejwah tlawelchokah inawak Dios. Iwa Dios weletini non kinyakana isoldadojwah de ilwikak yokinkakilih inchokilis nonteh tetlakéwalteh. ⁵Nomejwah akimeh non kipiah tomi, yononmopaxialoltijkeh san kanik nomejwah ononkinekeh, iwa asta yononmotomajkeh kemi torojteh non ya kinwikah kan tlamiktilo. ⁶Nomejwah yononkintlajtlakolmamaltijkeh iwa ononkinmiktijkeh akimeh amitla okitewikilayah, iwa yejwah amo omochijchikajkeh mopalewiskeh.

Xixxikokah n tlajjowilistli iwa ximotiotsajtsilikah

⁷Yika, nokniwah, ximoyekchiakah asta mawiki n Toteko Cristo. Xikchiwahak kemi se non tooka, iwa kineki kipixkas kuali tlakilo, iwa kichia non sikinika kiawitl ijkuak tlaselia iwa non iksemi kiawitl. ⁸Ijkó nomejwah ximoyekchiakah, iwa amo ximosojotlawakah, porke n tonati ijkuak walmuikas Toteko ya walajtsiwiwts.

⁹Nokniwah, amo ximoixtokakah, ijkó Dios amo nomechtlajtlakoltis, porke Dios n teyolsewi, ya walkalakiki. ¹⁰Nokniwah, xikitakah kenomi otlajjowijkeh iwa kenomi otlaxikojkeh n profetas, non otlajtojkeh itech Itoka n Toteko Dios. ¹¹Milák, matikinmitakah kateh ika pakilistli akimeh okixikojkeh n tlajjowilistli: Nomejwah nonkimatokeh kenomi Job okixiko nochi n tlajjowilistli, iwa yononkitakeh tlan okimák sa iksemi n Toteko Dios. Porke n Toteko Dios satlawel tetlasojtlak iwa teiknoma.

¹²Yika, nokniwah, nomejwah amo xikijtokah, “Dios tlachixtok,” noso “n tlaltlákaktli tlachixtok,” ijkuak itla nonkisentlaliah. Tla aka nomechtlajtlania itla nomejwah san xitlanankilikah “ejé” noso “amó”. Amitla xikajaxitilikah para amo nonmotlajtlakoltiskeh ixpa n Dios.

¹³Tla aka motekipachojtinemi, mamotiotsajtsili. Tla aka paki, makiweyili totajtsi Dios iwa makitlakuikili. ¹⁴Tla aka mokokoa, matlatitlani makinnotsatih n tetajmeh non tlayakantokeh kan nonmoololoah iwa makimotiotsajtsilikah, iwa makixawilikah chiawak

itech Itoka n Toteko. ¹⁵ Iwa ijkuak motiotsajtsiliah ika tlaneltokálistli, n kócoxki pajtis iwa Toteko kajkokuis iwa tla itla tlajtlákoli okichi, kitlapojpolwilis. ¹⁶ Ijkó kiné, non nochteh xikinmokitikah nomotlajtlakolwah se iwan ok se, iwa ximosepantiotsajtsilikah para xipajtikah. Porke n tiotsajtsílistli non se tlakatl yolchipawak kichiwa ika nochi iyolo, kipia miak weletílistli. ¹⁷ N profeta Elías okatka se tlakatl kemi tejwah, iwa ijkuak omotiotsajtsili ika nochi iyolo para amo makiawi, amo okiaujki eyi xiwitl iwa n tlajko. ¹⁸ Satepa oksepa omotiotsajtsili para makiawi, iwan ilwikak okitemák miak kiawitl, iwa n tlali miak otlatlaki.

¹⁹ Nokniwah, tla aka tokni kikawa n kualí ojtli, iwa ok se tokni kipalewia mawalmokopa, ²⁰ nikneki xikmatikah, akin kitoktia se non tlajtlakolchijitinemi ayakmó matlajtlakolchiwa, kimakixtia imak mikílistli, iwa kichiwa Dios makitlapojpolwi de miaktijkeh itlajtlakolwah.

Non sikinika iamatlajkuilol San Pedro

Pedro kintlajkuililia n tlaneltokakeh non sentetl xitintokeh

¹Ne, Pedro ni itlatematilti n Cristo Jesús, nomechtlajkuililia nochteh nomejwah, akimeh ononmochantitoh wejka, kan tlali de Ponto, Galacia, Capadocia, Asia iwa Bitinia. ²Totajtsi Dios yowejka onomechpéjpenki iwa ijkó kichiwas nomowah kemi yokimoli kichiwas. Dios ika Iespíritu onomechpéjpenki para xiktlakitakah iwa ijkó ximochipawakah ika iesso n Cristo Jesús. Dios manomechmaka miak tlatiochiwálistli iwa manomechmaka iyolsewilis.

Timoyolchikajtinemih itech tlan ye techmakas

³Matikweyijkatlalikalikah Dios Itajtsi n Toteko Cristo Jesús, porke ika imikilis iwa iyoltililis n Cristo, otechyankuili toyolilis. Ika iteiknomatilis okipatlak tonemilis. ⁴Ye kichiwas xikselikah n tlatliokólili non Dios nomechtlaatilijtok ilwikak. Non tlatliokólili amo ijtlakawis, amo pochewis, nion piliwis. ⁵Kemi nomejwah nonkineltokah Dios, Ye nomechpalewia ika iweletilis para xikajxilikalikah nin temakixtlistli non Ye yokimájmanki para kiteixmatiltis itech iksemi tonati.

⁶Yika, nomejwah xikpiakah pakílistli, porke nontlajjowiskeh kanaj kech tonatih. ⁷Para momatis kox milák nontlaneltokah, kipiáh nonmochiwaskeh kemi n oro. Yika, ken momatis kox milák kuali n oro, trato moyejyekos itech tletl. Akin milák tlaneltoka, kixikoa nochi n tlajjowílistli, iwa okachi miak ipati ke n oro, porke n oro weletis pojpoliwis. Yika, tla nomechyejyekoskeh kox nonkineltokah n Cristo Jesús, iwa tla kuali nonkisaskeh ijkuak nomechyejyekoskeh, nomechtlakitaskeh iwa kuali nomechtenewaskeh itech non tonati ijkuak Cristo Jesús oksepa walmuikas.

⁸Nomejwah nonkitlasojtlah n Cristo, iwa nonkineltokah maya amo nonkitah. Yika, nomejwah nonpakih ika se weyi pakílistli non amo nonweletih nonkitenixtiah, ⁹nomejwah nonnemi ika pakílistli porke ya nonkimatih Dios kimakixtis nomoalma, yika nonkineltokah.

¹⁰N profetas okimomachtijkeh itlajkuilol Dios, porke okinekia kimatiskeh kenomi kajsiskeh n temakixtlistli, iwa otetlapowijkeh tlan Dios nomechmakaskia ika itlasojtlalis.

¹¹Ijkuak ayamó owalaya n Cristo itech nin tlatlákpahtli, Iespíritu okinmachiya n profetas tlan Ye tlajjowiskia itech nin tlatlákpahtli, noiwa okinmachiya nochi tlan kualtsi satepa panoskia. Iwa n profetas okinekia kimatiskeh akin yetoskia n Cristo iwa kemania walaskia itech nin tlatlákpahtli. ¹²Pero Dios okinmajsikamatilti tlan yejwah okitetlapowiyah amo san para yejwah, yej nomejwah noiwa. Ye ni n tlanawatílistli non onomechmakakeh nomejwah akimeh onomechititijkeh n kualí tlájtoli. Iwa okichijkeh ika iweletilis n Espíritu Santo non okitlankeh de ilwikak. ¡Nochi ni n ángelteh kinekiskia kitaskeh!

Totajtsi Dios technotsa matinemikah ika toyolo chipawak

¹³Yika, kualí xitlalnámiktokah, iwa kualí xiijsatokah. Ximoyolchikawakah itech tlan Dios ika itlasojtlalis nomechmakas ijkuak Cristo Jesús monextis. ¹⁴Kemi tepilwah tetlakitakeh, amo xikchiijtinemikah tlan achto ononkichiwayah ijkuak ayamó ononkixmatiah Dios. ¹⁵Okachi kualí xinemikah non yolchipawakeh, porke Dios Akin onomechnotski, Ye yolchipawak. ¹⁶N tiotlajkuiloli kijtoa: “Xiyetokah nonyolchipawakeh, porke Ne niyolchipawak.”

¹⁷Yika, tla nomejwah Dios nonkinotsah “Notajtsi” Akin nochteh kinmixkomakas san akin yetos, moneki nochipa xikiimakajsikah axa ijkuak ok nonyolitokeh itech nin tlatlákpahtli. ¹⁸Dios onomechixti itech nomonemilis non amitla ipati non onomechititijkeh nonmotatawah. Iwa kualí nonkimatih nin temakixtlistli amo omotlaxtla ika tlan ijtlakawi, kemi n oro noso n plata, ¹⁹yej ika iesso n Cristo non okachi miak ipati, se ichkatsi kemi tlamánali, kualí iwa chipawak. ²⁰Nochi ni, Dios yokijtojka kichiwasia ijkuak ayamó okimajmanaya n tlatlákpahtli, iwa Cristo omonextiko sa itech ninteh iksemi tonatijmeh,

iwa ijkó ximomakixtikah nomejwah. ²¹ Ika tlan Cristo okichi nomejwah nonkineltokah Dios, Ye okiyoliti intsalko mikemeh iwa okiweyijkachi. Yika, nomejwah nonkineltokah Dios, iwa kualí nonkimatih Ye nomechmakas nochi tlan oksientlali. ²² Axa nomejwah keman nonkitlakitah n kualitlájtolí non milák, nomejwah yononmoyolchipajkeh iwa nonkinyektlasojtlah nomokniwah tlaneltokakeh. Yika, moneki ximosepantlasojtlakah ika nochi nomoyolo, iwa ika nochi nomochikawalis. ²³ Nomejwah oksepa onontlakatkeh. Onontlakatkeh ika itlajtol Dios non kitemaka yolílistli iwa amo keman tlami. ²⁴ Itlajkuilol Dios kijtoa:

Nochteh n tlaltikpaktlakah kateh kemi xiwitl, iwa inweyilis kemi ixochio n xiwitl.

N xiwitl waki iwa ixochio wetsi,
²⁵ pero itlajtol Toteko nochipa wejkawas.

Is. 40:6-8

Nin tlájtolí ye tlan yonomechmatiltijkeh.

2

¹ Yika, xikkawakah nochi tlan amo kualí.
Amo xitlakajkawakah,
amo xiyetokah nonmixkopteh,
amo xixikojmikakah,
nion xixolopijtinemikah.

² Ijkó kemi n selekkokoneh, non satlawel kinekih inlechi, ijkó nomejwah xiktemokah itlajtol Dios, iwa ika ximoskaltikah iwa xikpiakah temakixtílistli. ³ Nomejwah yononka-jsikamatkeh Toteko teiknomatih.

Cristo n tetl non yolitok

⁴ Xiwalnijkuanikah inawak Cristo, Ye n tetl non yolitok. N tlakah okitlakaltechojkeh, pero Dios okipejpenki non Tetl non miak kijtosneki. ⁵ Ijkó, nomejwah kemi temeh non yolitokah, xikkawilikah Dios manomechtekitilti. Ijkó makichijchiwa se kali non amo mota, iwa por Cristo Dios kiselia ika pakílistli tlan nonkitlamaniliah kemi tiopíxkeh chipawakeh. ⁶ Yika n tiotlajkuiloli kijtoa:

Ne niktalalia itech altepetl Sión,
se tetl non okachi ipati, tlapejpenali iwa kuajkualtsi.
Iwa akin itech tlaneltokas ayik mopijpinatis.

Is. 28:16

⁷ Nomejwah akimeh nonkineltokah Dios, nin tetl miak ipati. Pero akimeh amo kineltokah, mochiwa tlan kijtoa n tiotlajkuiloli:

N Tetl non n kalchijchijkeh okachijkeh,
yomochiwako n tetl non okachi tetlaxxili.

Sal. 118:22

⁸ Noiwa kijtoa n tiotlajkuiloli:

Se tetl non teixxitlanwia, iwa se tetl non kichiwa aka mawetsi.
Yejwah moixxitlanwia porke amo kitlakitah n kualitlájtolí. Ye noni tlan ika owalajkeh.

Is. 8:14

⁹ Nomejwah Dios onomechpejpenki. Nomejwah non tiopixkeh de Dios, nomejwah nonyolchipawakeh, se pueblo non iaxka Dios. Para nonkitematiltiskeh tlan tetlajtlachialti kichiwa, Akin onoméchnotski kan tleyuálistli iwa onomechwík xinemikah itech itlawil tetlajtlachialti.

¹⁰ Achte nomejwah amo iaxkawah Dios, pero axa ya itlapejpenilwah Dios, achto amaka onomechiknomatia, pero axa Dios nomechiknomati.

Nochiba xiktektilikah Dios

¹¹ Notlasojikniwah, nomechtlatlaujtia, kemi akimeh san panoah noso san nejnenkeh itech nin tlaltikpaktli, amo xikkawilikah manomechyoltlan tlan kelewia nomokuerpo, porke noni san nomechixpolos. ¹² Kualí xinemikah inmixpah non amo kineltokah Dios, porke maya axa nomechteiliah kemi non yaskiah amo nonkualteh, yejwah kitaskeh nochi tlan kualí nonkichiwah iwa kiweyijkachiwaskeh Dios itech neká tonati ijkuak Ye kintlaxtlawis kemi moneki.

¹³ Ijkó kemi nomejwah nonkitlakitah Toteko Dios, noiwa xikintlakitakah nochteh n tekiwajkeh itech nin tlaltlfpaktli, iwa amo sanwel non okachi weyijkatitok, ¹⁴ yej noiwa n gobernadores non ye kintlalia para makintlajiyowiltikah akimeh kichiwah tlan amokuali, iwa para makinyekitakah akimeh kichiwah tlan kuali. ¹⁵ Porke Dios kineki xikchiwahak tlan kuali, para nonkinkamatsakuaskeh akimeh amitla kimatih iwa kuamímikteh.

¹⁶ Nomejwah xinemikah kemi non ayakmitla nomechilpijtok, pero amo para nonkichi-jtinemiskah tlan amokuali, yej xinemikah kemi itekitwah Dios. ¹⁷ Xikintlakitakah nochteh, xikintlasojtlakah n tokniwah, xikiimakajsih Dios, iwa xiktlakitakah n weyi tlanawati.

Matikxikokah n tlajiyowilistli kemi Cristo okixiko

¹⁸ Tetlakéwalteh, xiktlakitakah nomoteko. Amo san akimeh kualteh n tlakah, yej noiwa non tetlawelitakeh. ¹⁹ Tla nomechtlajiyowiltiah iwa nomejwah amitla ononkichijkeh xixikokah, Dios kintiochiwa akimeh ijko panoah. ²⁰ Tla nomechtlajiyowiltiah por ononkichijkeh tlan amokuali, iwa nonkixikoah, ¿itla ipati non tlajiyowilistli? Pero tla nomechtlajiyowiltiah por ononkichijkeh tlan kuali, iwa kuali nonkixikoah, Dios nomechtiochiwas. ²¹ Ika ye Dios onoméchnotski. Cristo otlajiyowi topatka, ijko otechititi kenijki tikchiwaskeh. ²² Cristo amayik okichi tlajtlákoli, iwa ayik otlakajkaya. ²³ Keman okiwijwikaltiyah, Ye amo okinnankiliaya, ijkuak okitlajiyowiltiyah, Ye amo okimiliaya kimokopilis, yej nochi okikawaya imak Dios, non teixkomaka kemi moneki. ²⁴ Cristo inewia itech ikuerpo okinwík kan krus totlajtlakolwah. Iwa ijko tejwah ayakmó titlajtlakolch-waskiah, yej tikchiwaskiah tlan kuali. Ye okikojkokeh iwa ijko nomejwah ononpajtikeh.

²⁵ Acho nomejwah ononnemimah kemi ichkameh non omoixpolojtinemimah, pero axa yononwalmokopeh inawak n tlájjpixki non kinmokitlawia nomoyolilis.

3

Kenomi moneki mamoyekuikakah non yomonamiktijkeh

¹ Nomejwah siwameh, xiktlakitakah nomookich. Ijkó, non amo tlaneltokakeh, tlaneltokaskeh ijkuak nomechitaskah kenijki nontetlakitah, iwa mach ok monekis xiktet-lapowikah itlajtol Dios. ² Porke yejwah kitaskeh kenomi nonmoyekuikah iwa nonmotlak-itah. ³ Amo san ximochijchiwahak ik pánixko, kemi n siwameh non saikpanoa mochijchi-wah, noso kimopipililtiah oro, iwa motlakentiah ika kuajkualteh tlakemeh. ⁴ Yej xiyetokah tlakualtsi ik tlajjtik, itech nomoyolo, nochi tlan kuali amo poliwi, yej tikpias se espíritu yámanki ika yowsewílistli, ni tlan okachi ipati ixpa n Dios. ⁵ Porke yowejka, n siwameh yolchipawakeh non okimopantiayah Dios, tlan kuajkualtsi okiapiyah omonextiaya itech inyolo. Yejwah omoyolchikajtinemimah inawak Dios iwa okintlakitayah inmokich. ⁶ Kemi Sara okitlakitaya Abraham iwa okiliaya “noteko”, nomejwah nonmochiwatiweh kemi ye, tla nonkichiwah tlan kuali iwa amaka nonkiimakajsih.

⁷ Noiwa te, teokich, xikajsikamati mosiwa, moneki kuali xikmokitlawi, amo san por kijto amo chikawakeh, yej porke noiwah kiseliskeh n nemílistli kan ilwíkan non Dios yokjto techmakas. Ijkó amitla kitsakuilis nomotiotsajsilis.

Akimeh kintlajiyowiltiah por kichiwah tlan kuali

⁸ Ye ni tlan moneki xikchiwahak: Nochipa ximoyekwikakah, ximoteiknomatikah iwa ximotlasojtlakah kemi nonmiknimeh. Xikmatikah xikintlasojtlakah oksikimeh iwa xiyetokah nonyolyamankeh. ⁹ Tla nomechtoktiah itla amokuali, amo xikmokopi-likah, nion xikwíjwikaltikah akin nomechwíjwikaltia, yej xikintiochiwahak, porke Dios onomechpéjpenki para xikselikah itlatiochiwalis.

¹⁰ Akin kinekis yolitos iwa nochipa paktinemis, makitlakawalti inenepil para amo mapitsotlajtojinemi. Iwa amo matlakajkayajtinemi.

¹¹ Makikawa tlan amokuali iwa makichiwa tlan kuali, iwa makitemo n yowsewílistli iwa amo makikawah.

¹² Porke Toteko Dios kintlajtlatok n yolchipawakeh,

iwa kinkakilia intiotsajtsilis,

pero kinmixnamiki akimeh kichiwah tlan amokuali.

Sal. 34:12-16

¹³ Amaka weletis nomechtoktis tlan amokuali, tla nomejwah nochipa nonkichiwah tlan kuali. ¡Amaka! ¹⁴ Pero tla nomechtlaijyowiltiah por nonkichijtinemih tlan kuali, ¡xipakikah! Iwa amo xikinmawilikah. ¹⁵ Okachi kuali xikweyijkachiwahakah Cristo ika nochi nomoyolo, porke Ye Nomoteko. Iwa xikmatikah kenomi nonkinnankiliskeh nochteh akimeh nomechtlajtlaniah tlan nomechylchikajtok. ¹⁶ Xikpiakah yolyamanílistli, xiki-imakajsikah Toteko. Kuali xiyeknemikah kemi non tlaneltokakeh itech Cristo para akimeh nomechmawistetepewa, mapinawakah ika tlan kijtoah. ¹⁷ Tla Dios kimonekiltia, okachi kuali manomechtlaijyowiltikah por nonkichiwah tlan kuali, iwa amo por nonkichijtine-mih tlan amokuali.

¹⁸ Cristo san se welta omikki iwa okintlaxtla totlajtlakolwah. Tejwah amo tikualteh, Ye okatka kuali tlakatl, okitlaijyowiltijkeh topatka iwa otechwík inawak Dios, omikki itech ikuerpo pero omoyoliti ika espíritu. ¹⁹ Iwa ijko okintlapowito n kualitlájtolli n espíritus non tsaktokoh. ²⁰ Nonteh espíritus amo otelakitakeh itech tonatijmeh ijkuak Noé onemia, Dios omóchixki mamolnamikikah, ijkuak Noé okichijchiwaya n arka. Sanwel chikweyi omomaxitijkeh imak n weyi kiawitl. ²¹ Non atl, okitenextiko n tlakuaatekílistli non axa nomechmakixtia. Ijkuak timokuaatekiah tikteititiah iyolitilis Cristo Jesús non yotechmakixtiko. Amo timokuaatekiah para mamochipawa tokuerpo, yej kichipawa totlalnamikilis. ²² Axa Cristo Jesús kajki ilwikak iyekma n Totajtsi Dios, iwa imak kateh ángeles, nochteh non kipiah tekiwajyo itech nin tlatlákaptli, iwa nochi tlan kipia weletílistli.

4

Matinemikah kemi Dios kipaktia

¹ Yika, ijko kemi Cristo otlaijyowi itech ikuerpo ipan krus, nomejwah noiwa ijko nontlaijyowiskeh. Porke akin yomikki itech ikuerpo, yokika n tlajtlákoli. ² Ijko, ayakmo nonkichiwaskeh tlan kineki nomokuerpo ijkuak nonyolitoskeh, yej nonkichiwaskeh tlan Dios kimonekiltia. ³ Miak xiwitl nomejwah ononkichijtinemih tlan kiwilitah kichiwaskeh akimeh amo kitlakitah Dios. Ononmoixpolojtinemiah iwa ononkichiwayah tlan kelewiah nomokuerpo, onontlawantinemiah, ononmopaktijtinemiah itech ilwimeh pitsotikeh. Iwa tlan okachi tetlajyalti, ononkinweyijkatlalayah diosmeh non san kinmachijchiwah. ⁴ Akimeh inwah ononnemiah, axa motlajtlachialtiah porke nomejwah ayakmo nonkichi-wah tlan achto ononkichijtinemiah inwah, yika axa nomechpojpoah. ⁵ Pero yejwah moteixpantiskeh ixpa n Dios, Akin sa mochixtok kinmixkomakas akimeh yolitokoh iwa non yomikkeh. ⁶ Yika, noiwa okinmatiltijkeh n kualitlájtolli non yomikkeh, porke maya yokinmixkomakakeh kemi kinmixkomakah n tlakah, inmespíritu weletis yolitos inawak Dios.

⁷ Ya walajsi n tonati ijkuak nochi pojpoliwis. Yika, nomejwah xinemikah ika nomot-lalnamikilis chipawak iwa nochipa ximotiotsajtsilijtokah. ⁸ Tlan okachi moneki, ximosepantlasojtlakah, porke akin milák tetlasojtla, kimati tetlapojpolwia. ⁹ Xitekalotikah iwa amo ximotlatlajtolwikah. ¹⁰ Nonnochteh ononkiselijkeh tlatlamantli tekittl non Dios onomechmák, xiktekiltitkah ijkuak nonkimpalewiah nomokniwah, ijko nonyetoskeh non kualteh tekittkeh ika ikualtilis Dios. ¹¹ Akin kitetlapowia itlajtol Dios, makitematilti kemi yetoskia inewia Dios. Akin weleti tlapalewia makimpalewi oksikimeh, makichiwa ika nochi ichikawalis non Dios okimák. Tla ijko kichiwa, kichiwas para oksikimeh makiweyijkatlalikh Dios por Cristo Jesús, porke sanwel Ye iaxka n weyflistli iwan tlanawátli. Ijko mamochiwa.

Xixkikokah n tlaijyowílistli akimeh nonkineltokah n Cristo Jesús

¹² Notlasojikniwah, amo manomechtlajtlachialti keman wits nomopah n tlaijyowílistli, kemi nonmochiwaskiah itla tetlajtlachialti. ¹³ Okachi kuali xipakikah ijkuak nontlaijyowiah ijko kemi Cristo otlaijyowi, iwa ijkuak Cristo walmokopas nomejwah xipakikah

ijkuak kinextis ichikawalis iwa imawistilis. ¹⁴Tla aka nomechwikaltiah por nonkineltokah Cristo, xipakikah, porke iweyijkachiwalis iwa Iespritu Dios nomechkentijtok. ¹⁵Yika, tla aka tlaijyowia, amo matlaijyowi por otemikti, noso por otlachtek, noso por okitechiwili itla amokuali, noso por omokalaki kan amo iteki. ¹⁶Pero tla tlaijyowia por kineltokah Cristo, amo mapinawa, yej mamotlasojkamati inawak Dios por kitenewa Itoka.

¹⁷Porke yoajsiko n tonati ijkuak Dios pewas kinmixkomakas iaxkawah. Tla achto pewas n tlaijyowilistli towah, ¿kenomi tlamitiweh non amo kitlakitah itlajtol? ¹⁸Tla se non kuali tlakatl owi momakixtis, ¿kan tlamiti n tlakatl non amo kuali iwa tlajtlakolchijtinemi? Pr. 11:31 ¹⁹Ijkó kine, tla Dios kitekawilia nomejwah xitlaijyowikah, xikmosenmakakah Akin onomechchijchi, iwa xikchijtinemikah tlan kuali.

5

Xikinnonotsakah akimeh kineltokah Cristo Jesús

¹Axa, ne nikneki nikinnonotsas non nomechyakantokeh. Ne noiwa nitlayákanki kemi yejwah, iwa kuali nikmati kenomi okitlaijyowiltijkeh n Cristo. Iwa kemi yejwah noiwa nikitás itlawilnextilis Dios non kiteixmatiltis: ²Xikinmokuitlewakah ipilwah Dios, kemi se tlájpixki kinmokuitlewá iichkawah. Xikchiwakah ika paklistli, kemi Dios kineki. Amo san por nomechnawatiah noso por nonkitlaniskeh tomi, yej por nomechpaktia nonkichiwaskeh nomoteki. ³Amo ximoweyijkatlalakah innawak akimeh nonkinyakanah, kemi non yetoskiah nontekowajkeh, yej xikchiwakah tlan kuali, para akimeh nonkinyakanah, mak-itakah kenomi nonkichiwah. ⁴Ijkó, ijkuak walmuikas Cristo n Tlájpixki non tlajakantok, nomejwah nonkiseliskeh nomotlaxtlawil kan ilwikak, non ayik ijtlakawis.

⁵Ijkó noiwa, nomejwah telpokameh xikintlakitakah n tetajmeh non tlajakantokeh itech tiopa. Nonnochteh ximosepanyekwikakah. Porke itlajtol Dios kijtoa:

Dios kinmixnamiki non moweyijkatlaliah,
pero kintiochiwa non moiknomatih inawak.

Pr. 3:34

⁶Yika, ximoiknomatikah iwa xikselikah itlanawatilis Dios, iwa Ye nomechweyijkachiwas ijkuak monekis. ⁷Nochi tlan nomechtekipachoah, xiktalalakah imak Dios, porke Ye nomechmokuitlewá.

⁸Xiisatokah iwa kuali xitlachixtokah. Porke nomokokolikni n amokualitlakatl kite-mojtinemi akin kixpolos, kemi yaskia se lío non kitemojtinemi akin kitlankokototsas iwa kikuas. ⁹Amo xikmokawilikah manomechtlani n amokualitlakatl, yej nochipa xikneltokakah Dios. Porke ya nonkimatokeh itech nochi n tlaltípkaktli, oksikimeh nomokniwah tlaneltokakeh tlaijyowijtokeh kemi nomejwah. ¹⁰Satepa keman nomejwah yonontlaijyowijkeh kanaj kech tonati, Dios nomechyekmilawas, nomechyekchikawas iwa nonyektlaxkilitoskeh. Inewia Dios non techmaka nochi tlatiochiwálistli iwa otéchnotski matiyetoka nochipa itech imawistilis por tikateh sansikah iwan Cristo. ¹¹Ye nochipa iaxka n weletílistli, asta matlami n tlaltípkaktli! Ijkó mamochiwa.

Pedro momakawa

¹²Tokni Silvano onechpalewi iwa okimijkuilo notlajtolwah. Ne nikita kuali kineltoka Cristo, iwa itech iweletilis titlaneltokaskeh. Nomechtlajkuililia para nomechnonotsas iwa xikixmatikah ikualtilis Dios non itech tikateh.

¹³Noiwa nomechtlajpaloah n tlaneltokakeh non chanchiwah Babilonia, non Dios yokinpéppenki kemi nomejwah, noiwa Marcos, non niktlasojtla kemi yaskia nokone. ¹⁴Ximotlajpalokah non nochteh iwa ximoixtennamikikah kemi nonmiknimeh ika tlasojtlálistli.

Xikpiakah yolsewílistli nonnochteh akimeh nonkineltokah Cristo Jesús.

N ojpatia iamatlajkuilol San Pedro

Pedro kintlajkuililia akimeh kineltokah Cristo Jesús

¹Ne, Simón Pedro, itetlakewal Cristo Jesús iwa itlatematilti, nomechtlajkuililia nin amatlajkuiloli, nomejwah akimeh nontlaneltokah kemi tejwah, porke Todios iwa Totemakixti Cristo Jesús saikpanoa yekmilajka. ²Niktalajtlanilia Dios miak manomechtlasojtla iwa manomechkawili xiyolitoka ika yolsekilistli, iwa nomejwah kual iya nonkimatih tlan kiwilita Dios iwa n Toteko Cristo Jesús.

Kenomi moneki mayeknemi se non kineltoka Dios

³Dios okitekilti ichikawalis iwa ijkó otechmák nochi tlan techpoloa, iwa ijkó matiyetokah kemi Ye kineki. Dios otechmák nochi noni ijkuak otechixmatilti n Cristo Jesús. Ika Cristo otechpéppenki iwa ijkó tiyetoskeh sansikah kan Ye tlanawatia. ⁴Ijkó Dios yotechmaktili tlan otechilijka techmakas non semi weyi iwa miak ipati, ika tlan otechmák, nomejwah ayakmó nontlajtlakolchiwaskah kemi kichiwah n taltikpaktlakah, porke tlan kelewia inkuerpo nonteh tlakah, kinmixpoloah oksikimeh.

⁵Yika, ne nomechnonotsa iwa nomechilia: xiktlalikalik nochi nomotlaneltokalis itech Dios, ximochijchikawakah por nonkichiwaskeh tlan kual iwa okachi nonkiyekixmatiskah Dios, ⁶iwa xiktlanilikah

tlan amokuali kiyoltilana nomokuerpo,

noiwa san ximokajtokah

iwa ximotemaktikah inawak Dios.

⁷Ximoyekuikakah iwa nomokniwah tlaneltokakeh, iwa ximosepantlasojtlakah.

⁸Tla nomejwah nonkixmatih n Cristo Jesús, nonkichiwaskeh nochi tlan yonomechili, iwa okachi kual nonkichiwaskeh. Iwa ijkó nomonemilis yetos milaktik. ⁹Pero akin amo kichiwa nochi ni, non tlakatl yetos kemi se non ayakmó yektlachia, iwa yokilka noiwa okitlapojpolwijkeh de itlajtlakolwah tlan achto okinchiwaya. ¹⁰Yika nokniwah ken Dios yonomechnotski iwa yonomechpéppenki, ximochijchikawakah iwa xinemikah ijkó kemi yonomechili, ijkó ayik nonwetsiskeh. ¹¹Iwa Dios nomechintlapolis ikaltenwah itekiwayakayo n Toteko iwa Totemakixti Cristo Jesús.

N mlajka tlamachtlistli

¹²Yika, ne nochipa nomechilnamiktijos nochi tlan yonomechili, maya nomejwah ya nonkimatokeh iwa ok nonkineltokah tlan milák onomechmachtijkeh. ¹³Ne nikyejekolia kual manomechnonotsa axa ijkuak ok niyolitok. ¹⁴Porke Toteko Cristo Jesús yonemachmatilti mach ok niwejkawas niyolitos. ¹⁵Pero ne nikchiwas nochipa xikilnamiktokah nochi tlan onomechmacti, maya yonimik.

Akimeh okitakeh iweyilis Cristo

¹⁶Ijkuak otomechmatiltijkeh iweletilis n Cristo iwa kenijki owala, amo otomechpoil-ijtokah se tlapoálistli non san tejwah otikmajmankeh, yej ika toixtololowah otiktakeh iweyilis n Toteko Cristo Jesús. ¹⁷Tejwah otikkakeh ijkuak Dios okimák n Cristo iweyilis iwa okiweyijkachi, iwa ijkuak Dios ika itlajtol non weyixtok okili: “Ye ni Nokone non saikpanoa niktlasojtla, Akin itech nkipia miak paklistli.” ¹⁸Tejwah tonewiah otikkakeh non tlájtoli non owalaya de ilwikak, porke tejwah otikatkah iwan Toteko Cristo Jesús itech neká tepetl non tiochitok.

¹⁹Yika, kual nikmatok, tlan okijkuiolkeh n profetas ye tlan milák, yika, kual xikkakikah nin kualitlájtoli, porke nomechilis kenomi non nemiskeh, asta keman tlanesi iwa pankisa n sítlali non kisa kuinai iwa kitlawilia toyolo. ²⁰Pero kual xikmatikah tlan nomechilis: nion se tlájtoli non kajki itech itlajkuilol Dios, san sikimeh weletis kajsikamatiskeh, ²¹porke n profetas ayik okitenkixtijkeh san tlan yejwah okiyejekoliayah, yej ika iweletilis n Espiritu Santo nochipa okitenkixtijkeh tlan Dios okinekia makitematiltikah.

2

Akimeh kitemachtiah tlan amo milák
(Jud. 4-13)

¹Itech Israel okitemachtiah sikimeh tiotlajtojkeh tlan amo milák, ijkó noiwa yetoskeh tlamachtijkeh tekajkayajkeh nomowah. Yejwah san ichtaka pewas kitemachtiskeh san tlan yejwah kiyejekoliah iwa nomechkuatlapoltiskeh, iwa ika noni kitenextiskeh mach milák kineltokah n Toteko Cristo Jesús non okinmakixti; tlan yejwah kichiwah kitlaxtlawaskeh ika se weyi tlaijyowílistli non innewiah kimotemolijtokeh. ²Miakeh tokniwah kichiwaskeh kemi kichiwah nonteh tlamachtijkeh tekajkayajkeh, kichijtinemiskeh san tlan yejwah kinekiskeh. Por intlajtlakol n tokniwah tlajtoskeh fiero de akimeh kineltokah Cristo, porke kitah kenomi innemilis amokuali. ³Satlawel kiapisnekiskeh tomi, nonteh tlamachtijkeh nomechixpososkeh ika tlakajkayawálistli. Dios yowejka yokinmajmanili intlaijyowilis nonteh tlamachtijkeh tekajkayajkeh, sa kinchixtok.

⁴Dios amo okintlapojpolwi n ángeltech non otlajtlakolchijkeh, yej okualintlamotlak miktla iwa okinka iltitokeh ika kadena kan tleyua para matsaktokah asta maajsiki neká iksemi tonati ijkuak Ye wits kinxexeloki iwa kijtos akin yas iwa, iwa akin amó. ⁵Dios, noiwa amo okintlapojpolwi n tlaltikpaktlakah tlajtlakolchijkeh itech nekateh tonatijmeh, ijkuak Noé okatah itech nin tlaltikpaktli, iwa ika se weyi kiawitl non okwáltitlanki okinaapacho nonteh tlakah tlajtlakolejkeh. Dios okimakixtiko sanwel Noé akin nochipa otlanonotsaya manemikah ika inyolo chipawak iwan oksikimeh chikome non ken kimitah. ⁶Dios noiwa okintlaijyowiltih iwa okimpojobo non ochantitokah itech altepeme de Sodoma iwa Gomorra, okinchichino iwa okinkajteh sa tlekonéxtli, para mamawikah n tlakah tlajtlakolejkeh non satepa nemiskiah itech nin tlaltikpaktli. ⁷Pero Dios okimakixti n Lot, n yekmilaka tlakatl, non satlawel okikuejsoaya, porke okimatiya kenijki otlajtlakolchijtinemiah n tlakah. ⁸Lot ye tlakatl yolchipawak non ochantitoka intlajko nonteh tlakah tlajtlakolchijkeh. Nochi tonati omoyolkokoaya ijkuak okitaya iwa okikakia nochi tlan pitsotik okichiyayah. ⁹Nochi ni technextilia Toteko Dios weleti kinmakixtia akimeh nemih kemi Ye kineki, iwa kinkawa matlaijyowikah non amokualteh, para neká tonati ijkuak Ye tetlajtlakoltis.

¹⁰Dios okachi kintlaijyowiltis akimeh kichijtinemih tlan amokuali kelewia inkuerpo, iwa amo kitlakitah itekiwajyo n Toteko. Yejwah moweyijkamatih iwa amo kimati mawih ijkuak fiero kintenewa n chikawálisteh non witseh de ilwikak. ¹¹Maya n ángeltech kipiah okachi chikawálistli iwa tekiwajyo, amo mixewiah kitenewaskeh itlanawatil Toteko Dios.

¹²Pero ninteh tlakah kemi yolcameh, amo kipia tlanamikílistli, iwa tlakatih san para makinkitsikah iwa makinmiktikah. Yejwah kipojpoah nochi tlan amo weletih kajsikamatih, pero ninteh tlakah yakatlamitiweh kemi yolcameh, ¹³innewiah kijyowiskeh nochi tlan okintlaijyowiltijkeh oksikimeh. Porke ixmostla kiwilital mopaktijtinemiskeh intech tlan amo kuali kelewia inkuerpo. ¡Ninteh tlakah teyolijtlakojkeh iwa teixpolojkeh, porke maya tlakuajtokeh nomowah kan nonmoololoah, kiwilita kichijtoskeh tlan tepinatil!

¹⁴Ninteh tlakah ijkuak kitah se siwatl san nima kelewiah, iwa ayik mosotlawa kinchijtinemiskeh tlajtlakolteh. Kintlatlalwiah non ayamó yektlaneltokah, iwa kimatih kenomi tlakajkayawaskeh san para kitlaniskeh tomi. Ninteh tlakah Dios kintlaijyowiltis. ¹⁵Yejwah yokikakajtejkeh n kuali ojtli iwa yomoixpolojkeh. Kitokatinemih itlamachtilis n profeta Balaam itelpoch n Beor, non okinek kitlanis miak tomi ika tlan amokuali okichijtinemia. ¹⁶Iwa se burra non amo tlajtoa, owaltlajto kemi tejwah iwa okajwak para ayakmó makichijtinemi tlan amokuali kemi se non san kuatlapolojtok.

¹⁷Nonteh tlakah tekajkayajkeh, ken se améyali non amo kipia atl, noiwa ken mextli non ejekatl kiwika. Yejwah yokinsenkajkajkeh iwa nochipa tlaijyowijtoskeh kan okachi tleyua. ¹⁸Porke san xaxankuatih ijkuak tlajtoah, iwa amitla ipati tlan kijtoah, noiwa kintlaneltoktiah makichiwakah tlan yejwah kichiwah, akimeh sa kentsi omoxelojkeh itech tlan amokuali. ¹⁹Yejwah kinmiliah kimpalewiskeh para kikawaskeh tlan pitsotik kichiwah, pero yejwah innewiah iltitokeh itech tlan amokuali. Nochi tlakatl iltitok

itech tlan kiyoltilana. ²⁰ Akimeh yokixmatkeh n Toteko iwa Totemakixti Cristo Jesús, ayakmó makichiwa tlan kichiwah n tlaltikpaktlakah. Tla ijko oksepa kimokawiliah makinkajkayawa tlan okinyoltilanaya, okachi moyolijtlakoa ke achto. ²¹ Okachi kuali amo kixmatiskiah n kuali ojtli, iwa amo axa, ijkuak yokixmatkeh, kikawah n chipawak tlanawáteli non okinmachtijkeh. ²² Pero intech yomochiwako tlan kijtoa neká tlájtoli: “N chichi oksepa kikua itlakopal.” Pr. 26:11 “N pitsotl non sikin okaltijkeh oksepa mokuitlakpewa itech sokitl.”

3

Ijkuak walmuikas n Toteko Jesús

¹ Notlasojikniwah, ika ni ya ome amatlajkuíloli nomechintlajkuililia. Itech ninteh omeh tlajkuilolteh nikneki nomechnonotsas para kuali xitlalnamikikah. ² Xikilnamikikah tlan yowejka okijtojkeh n profetas de itlanawatil n Toteko Cristo Jesús Totemakixti, iwa de n tlatitlaniltih non onomechmachtijkeh nomejwah.

³ Kuali xikmatikah, itech iksemi tonatijmeh monextiskeh tlakah non kiwetskaskeh tlan tejwah tikneltokah, iwa kichijtinemiskeh tlan pitsotik. ⁴ Yejwah kijtoskeh: “¿Kanin kajki n Cristo non onomechilijkeh oksepa walmokopas? Yomijmikeh totatawah, iwa itech nin tlaltikpaktli nochipa san ijko kajki kemi ijkuak opejki.” ⁵ Yejwah amo kinekik kajsikamatiskeh yowejka Dios okichijchi n ilwikak iwa n tlaltikpaktli, iwa ika itlajtol okixelo n tlali iwa n atl. ⁶ Ika atl iwa ika itlajtol Dios, n tlaltikpaktli opojpoliwik itech tonatijmeh de Noé. ⁷ Pero n ilwikak iwa n tlaltikpaktli, Dios kinkajtok para kimpopolos ika tletl itech neká tonati ijkuak Ye kintlajtlakoltis nochteh, iwa kimpopolos akimeh kichiwah tlan amokuali.

⁸ Notlasojikniwah, amo xikilkawakah tlan nomechilis, Dios amo kipoa se tonati kemi tejwah. Para Dios se tonati ken mil años, iwa mil años kipoa ken se tonati. ⁹ Noni amo kijtosneki Dios yokilka tlan oksentlali kichiwas, kemi sikimeh yowejka kiyeyekoliah, yej techchixtok iwa amo kineki aka mamoiXPolo, yej tinochteh matimoyolpatlakah inawak.

¹⁰ Pero ijkuak Toteko Cristo Jesús walmokopas, kalakiki kemi ijkuak se tlachteh kalaki techa. Itech nonteh tonatijmeh tlatekuinis chikawak iwa n ilwikak san walpoliwis, n sítlalteh paatiskeh ika tletl, iwa n tlali iwa nochi tlan onka itech, tlatlas.

¹¹ Iwa tla ijko pojpoliwis nochi tlan onka, imoneki nomejwah sanwel xiktlakitakah Dios iwa xikchiwahak nochi tlan kuali! ¹² Xikchiakah maajsiki n tonati non Dios yokitlali, ijkuak kinxexelos non kualteh iwa non amokualteh itech nin tlaltikpaktli. Non tonati n tletl kipojpolos n ilwikak iwa n sítlalteh paatiskeh. ¹³ Pero tejwah tikchiah tlan Dios yokijto techmakas, se yankuik ilwikak iwa se yankuik tlali, iwa ompa yetos milajkachiwálistli.

¹⁴ Yika, notlasojikniwah, ijkuak nonmochiah nochi ni matlamochiwa, xikchiwahak nochi tlan kuali para Dios manomechajsiki ika yolsewílistli iwa non yolchipawakeh. ¹⁵ Kuali xikmatikah n Toteko techmochialia iwa kineki tinochteh matimomakixtikah; ijko kemi yonomechijkuilili totlasojikni Pablo, kemi inewia Dios okimák ixtlamatílistli. ¹⁶ Itech noachteh itlajkuilolwah n Pablo nochi ni yonomechili, maya siki tlan onomechili achtsi owi moajtsikamati. Yika, non amo kixmatih itlajtol Dios iwa non amo chikawak intlaneltokalis kipatla n kualitlájto iwa innewiah moixpoloah.

Sa iksemi nomechilia

¹⁷ Yika, notlasojikniwah, ken ya nonkimatokeh nochi ni, ximotlachilikah, para amo manomechkajkayawakah n tlajtlalochijkeh, iwa nonwetsiskeh de nomoyeknemilis. ¹⁸ Okachi kuali, ximoskaltikah itech ikualtilis iwa iixtlamatilis n Toteko iwa Totemakixti Cristo Jesús. ¡Iaxka n weyijkachiwalistli n Toteko Cristo Jesús, axa iwa nochipa!

Non sikinika iamatlajkuilol San Juan

N tlájtoli non techmaka yolílistli

¹ Tlan achto yokatka, ijkuak nochi opejki, tlan otikkakeh iwa tlan otiktakeh ika toixtolowah, tejwah otiktakeh iwa otikmajmachilijkeh ika tomawah, ye nin tlájtoli non kitemaka yolílistli. ² Nin yolílistli Dios otechnextili, tejwah otiktakeh iwa axa tiktematiltiah. Tejawh totechmatiltiah nin yolílistli non ayik tlamis, Ye okatka iwan Totajtsi Dios iwa axa otechmonextiliko. ³ Tlan otiktakeh iwa otikkakeh ye tlan totechmatiltiah, ijko nomejwah weletis nonseititoskeh towah, ijko kemi tejwah tiseititokeh iwan Totajtsi Dios iwa Ikone Cristo Jesús. ⁴ Nochi ni totechijkuililia para mayekajsito nomopakilis.

Dios Ye n Tláwili

⁵ Ye ni n tlájtoli non Jesús otechkakiti iwa axa tejwah tiktematiltiah: Dios Ye n Tláwili, iwa ítech, amo onka tleyuálistli. ⁶ Tla tikijtoah tiseititoskeh iwan Dios, pero ok tinemih kan tlatleyua, tixolopijti iwa amo tikijtoah tlan milák. ⁷ Pero tla tinemih itech tláwili, ijko kemi Dios kajki itech tláwili, ijkuako tiseititokeh tinochteh. Ika iesso n Jesús, Ikone n Totajtsi Dios, techchipawa nochteh totlajtlakolwah.

⁸ Tla tikijtoah amo tikpiah tlajtlákoli, san tejwah timokajkayawah iwa amo kajki itech toyolo tlan milák. ⁹ Pero tla tikinmokuítiah totlajtlakolwah, inawak Totajtsi Dios, Ye ke n yekmilajka, techlapojpolwis iwa techchipawas de nochi totlajtlakolwah. ¹⁰ Tla tejwah tikijtoah amitla tlajtlákoli tikpiah, tixxolopijkopah Dios, iwa itlajtol amo kajki totech.

2

Cristo techtlajtolpalewia

¹ Nopilwah, nochi ni nomechijkuililia para amo xitlajtlakolchiwahak. Pero tla aka otlajtlakolchi, tikpiah Akin techtlajtolpalewia inawak Totajtsi Dios, Ye Cristo Jesús, n yolmilajka. ² Cristo Jesús omotemakti iwa okintlaxtla nochteh totlajtlakolwah ika iesso, iwa amo san totlajtlakolwah, yej de nochteh n tlaltikpaktlakah.

³ Tla tikchiwah tlan kijtoa itlanawatil Dios, ijkuako tikkajksikamati ya tikixmatih. ⁴ Pero tla aka kijtoa: “Ne nikixmati Dios”, pero amo kichiwa tlan kijtoa itlanawatil Dios, non tlakatl xolópíjti iwa tlan milák amo kajki ítech. ⁵ Pero akin kiyekchiwa tlan Dios tlanawatia, ye milák kitlasojtla Dios, ijkuako tikmatih milák tiseititokeh iwa. ⁶ Akin kijtoa seititok iwan Dios, moneki manemi kemi Cristo onenki.

Se yankuik tlanawátli

⁷ Notlasojikniwah, amo nomechijkuililia se yankuik tlanawátli, nin tlanawátli yowejka ononkipixtokah. Nin tlanawátli san ye non nomejwah yononkikakeh. ⁸ Pero tlan axa nomechijkuililia se yankuik tlanawátli, porke yomotenexti itech inemilis Jesús iwa itech nononemilis, porke n tleyuálistli yakatlanti, iwa yopé tlawia n milajka tláwili.

⁹ Tla aka kimolia kajki itech tláwili, iwa kikokolia ikni, ok nemi kan tleyua. ¹⁰ Akin kitlasojtla ikni, kajki itech tláwili, iwa amitla weletis kitoktis mawetsi itech tlajtlákoli. ¹¹ Iwa akin kikokolia ikni, nemi iwa kajki kan tleyuálistli, iwa amo kimati kan ik yawi, porke n tleyuálistli amo kikawilia matlachia.

¹² Nopilwantsitsiwah, nomejwah nomechtlajkuililia ken Dios yonomechtlapojpolwi de nomotlajtlakolwah itech Itoka n Cristo Jesús.

¹³ Tetajmeh, noiwa nomejwah nomechtlajkuililia ken yononkixmatkeh n Cristo Akin yokatka ijkuak nochi opéjki.

Telpokameh, nomejwah nomechtlajkuililia ken yononkitlanilijkeh n amokualitlakatl.

Nomechtlajkuililia nomejwah nopilwantsitsiwah, ken yononkixmatkeh n Totajtsi Dios.

¹⁴ Onomechtlajkuililia nomejwah tetajmeh, ken yononkixmatkeh n Cristo Akin yokatka keman ayamitla okatka.

Noiwa onomechtlaajkuilili nomejwah telpokameh, porke nonchikawakeh iwa itlajlot Dios nonkipixtokeh itech nomoyolo, iwa porke yononkitlanilijkeh n amokualitlakatl.

¹⁵ Ayakmó xiktlasojtłakah tlan onka itech nin tlaltłpaktli nion tlan nika mochiwa. Tla aka kiwilita kichijtinemis tlan kichiwah n tlaltłpaktłakah tlajtlakolejkeh, non tlakatl amo milák kitlasojtla n Totajtsi Dios. ¹⁶ Porke nochi tlan onka itech nin tlaltłpaktli tokuerpo kelewia, toixtololowah noiwa kelewiah tlan kita, iwa tikneki matechweyilikah, nochi noni amo wits de Dios, yej san itech nin tlaltłpaktli. ¹⁷ Nochi tlan onka itech nin tlaltłpaktli ya tlanti, iwa nochi tlan pitsotik, pero akin kichiwah tlan Dios kineki nochipa yolitos.

Matimotlachilikah de akimeh tekajkayawah

¹⁸ Nopilwantsitsiwah, ya tikateh itech iksemi tonatijmeh, yononkikakeh wits se akin kixnamikis Cristo. Milák, axa miakeh yomonextijkeh non kixnamiki n Cristo, yika tikmatih ya tikateh itech iksemi tonatijmeh. ¹⁹ Yejwah okatkah towa, iwa omoxelojkeh. Ken amo milák okatkah towah, porke tla milák yetoskiah towah, yejwah mokawaskiah towah. Ijkuak omoxelojkeh omotak amo okatka towah.

²⁰ Nomejwah nonkipiah tlan Cristo onomechtliokoli, iwa nochi nonkixmatih. ²¹ Ijkó kiné nomechtłajkuililia, porke nomejwah nonkimatih tlan milák, iwa akin ya kimati tlan milák, amo weleti tlakajkayawah.

²² ¿Akin non tekajkaya? Ye akin kijtoa Jesús amo ye n Cristo, ye akin kixnamiki iwa amo kineltoka nion Totajtsi Dios nion Ikone. ²³ Nochi akin kijtoa Jesús amo Ikone Dios, amo kipixtok Dios itech iyolo. Pero akin kipixtok Ikone, noiwa kipixtok Totajtsi Dios.

²⁴ Yika, xiktlaatikah itech nomoyolo n kualitłajtoli non achto yonomechmatilijkeh. Iwa tla mokawa itech nomoyolo tlan achto yononkikakeh, noiwa nomejwah nonseititoskeh iwan Tekone iwan Totajtsi Dios. ²⁵ Tlan Cristo okijto techmakas, ye n nemilistli non amo keman tlamis.

²⁶ Nochi ni onomechijkuilili para xikmatikah akimeh kinekih nomechkajkayawaskeh. ²⁷ Pero nomejwah nonkipixtokeh n tlatliokólili non Cristo Jesús onomechmák. Iwa ayakmó moneki aka manomechmacthi, porke inewia n Espiritu nochi nomechmacthia. Iwa nochi tlan nomechmacthia milák, iwa amo san tlakajkayawa. Ijkó kiné, xiseititokah nochipa iwan Cristo, ijkó kemi n Espiritu nomechmacthia.

²⁸ Axa nopilwantsitsiwah, nochipa xiseititokah iwan Cristo, iwa ijkó timoyolchikawaskeh ijkuak monextis, iwa amo matipinawakah ijkuak Ye wits. ²⁹ Iwa kemi nomejwah ya nonkimatih Cristo yekmilajka, noiwa kuali xikmatikah nochteh akimeh kichiwah tlan kuali, yejwah akimeh milák ipilwah Dios.

3

Ipilwah Dios

¹ Xikitakah kenomi satlawel techtlasojtla Totajtsi Dios, asta technotsa ipilwah, iwa milák tejwah titepilwah. Yika, non amo kineltokah Dios amo techixmatih, porke amo kixmatih akin Dios. ² Notlasojikniwah, tejwah ya titepilwah de Dios, iwa maya amo tikmatih kenomi tiyetoskeh satapa. Ejé tikmatih ijkuak Cristo Jesús oksepa techmonextiliki, tiyetoskeh kemi Ye, porke tikitaskah kemi Ye tlachixtok. ³ Nochteh akimeh timoyolchikawah itech Cristo, timochijchikawah timoyolchipawah, ijkó kemi Cristo yolchipawak.

⁴ Nochteh akimeh kichiwah tlajtlákoli, kixpanawia itlanawatil Dios. ⁵ Nomejwah ya nonkimatokeh, Cristo owala itech nin tlaltłpaktli para techinkixtilis totlajtlakolwah, Cristo amo tlajtlakolchiwa nion weletis tlajtlakolchiwas. ⁶ Ijkó kiné, akin moiknitia iwan Cristo, ayakmó weletis tlajtlakolchijtinemis ken seititok iwa. Iwa akin kiwelita tlajtlakolchiwas, amo kitika Cristo nion kixmati. ⁷ Nopilwantsitsiwah, amaka manomechka-jkayawa, nochi akin kitlakita Dios, yolchipawak, ijkó kemi Cristo yolchipawak. ⁸ Iwa akin tlajtlakolchijtinemi moiknitia iwan diablo, porke n diablo tlajtlakolchijtiwits desde ijkuak Dios okichijchi n tlaltłpaktli. Yika, Ikone n Totajtsi Dios, owala itech nin tlaltłpaktli para kipopolos nochi tlan kichiwa n diablo.

⁹Se akin kijtoa ikone n Dios amo tlajtlakolchijtinemi, porke ipilwah Dios ya kipia yankuik nemílistli ijko kemi Dios yeknemi. Yika se ikone Dios amo para tlajtlakolchijtinemis, porke ye ikone Dios. ¹⁰Weletis tikitas akin ikone n Totajtsi Dios, iwa akin ikone n diablo. Akin amo kichiwa tlan kuali, nion kitlasojtla ikni, amo ikone Dios.

Matimotlasojtlakah tinochteh

¹¹Nomejwah yononkikakeh desde ijkuak ononkineltokakeh n Cristo, iwa otechilijkeh: matimosepantlasojtlakah. ¹²Amo matikchiwakah kemi Caín, ikone n diablo, non okimikti ikni. ¿Iwa tleka okimikti? Porke Caín okichiwaya tlan amokuali, iwa ikni oyeknemia.

¹³Notlasojikniwah, amo manomechtlajtlachialti tla nomechkokoliah n tlaltikpaktlakah. ¹⁴Tejwah tikmatokeh mach ok ayik timikiskeh, ken yotikiskeh imak mikílistli, iwa axa tiyolitoskeh nochipa porke tikintlasojtlah tokniwah. Se akin amo kitlasojtla ikni, ye ok miktok. ¹⁵Nochi akin kikokolia ikni, se temikti, iwa nomejwah nonkimatih se temikti amo kypias semijjak yolílistli. ¹⁶Tejwah tikmatih tlanó n tlasojtlálistli, porke Cristo omotemakti makimiktikah topatka, ijko noiwa tejwah tikpiah tiktemakaskesh toyolilis por tokniwah tlaneltokakeh. ¹⁷Tla se non kipia tomi, kita se ikni non kipoloa iwa amo kinknomati, non tlakatl amo tetlasojtla kemi Dios tetlasojtla. ¹⁸Nopilwantsitsiwah, amo matitelasojtlakah san ika tokamak noso tonenepil, yej matimosepantlasojtlakah ika tlan tikchiwah.

Matimoyolchikajtokah itech Dios

¹⁹Ijko tiweletih tikmatih de milajka titepilwah de Dios, iwa amitla techtsakuilis ijkuak timoixpantiskesh inawak, ²⁰tla toyolo techteilia ijkuak itla amo kuali tikchiwah, Dios okachi weyi ke toyolo, iwa nochi kimati. ²¹Ijko kiné, notlasojikniwah, tla toyolo amo techtlajtlakolia, amitla techtsakuilia inawak Dios. ²²Ye techmakas nochi tlan tiklajtlalaniliskesh, porke tikintlakitah itlanawatilwah iwa tikchiwah tlan Ye kiwilita. ²³Noiwa Ye technawatia matikneltokakah Ikone Cristo Jesús, iwa matimotlasojtlakah tinochteh kemi Ye otechnawatih. ²⁴Nochteh akimeh kintlakitah itlanawatilwah Dios, kajki iwan Dios, iwa Dios inwah. Tikmatokeh Ye kajki totech porke tikpixtokeh Iespíritu.

4

Akin kipia Iespíritu n Dios iwa akin amo kipia

¹Notlasojikniwah, amo xikineltokakah akimeh kijtoa kipiah Iespíritu Dios. Acho xikinyeyekokah kox tlan kijtoah wits de Dios. Porke yomonextijkeh miakeh tekajkayajkeh itech nin tlaltikpaktli. ²Nomejwah weletis nonkimatiskesh tla se kipia Iespíritu Dios: Akin tlaneltokah Cristo Jesús omochiwako tlakatl itech nin tlaltikpaktli, iaxka Dios. ³Iwa nochi espíritu non amo kiteilia Jesús omochi tlakatl, amo kipia Iespíritu Dios, yej kipia espíritu akin kikokolia n Cristo. Nomejwah yononkimatiah nin espíritu walaskia, iwa ya kajki itech nin tlaltikpaktli.

⁴Nopilwantsitsiwah, nomejwah iaxkawah Dios iwa yononkintlanilijkeh nekateh teka-jkayajkeh, porke Akin kajki nomowah okachi weletini ke akin kajki iwan tlaltikpaktlakah. ⁵Yejwah san tlaltikpaktlakah. Yika kitemachtiah tlan onka itech nin tlaltikpaktli, iwa n tlaltikpaktlakah kinkakih. ⁶Pero tejwah iaxkawah Dios. Akin kixmati Dios techkaki, pero akin amo de Dios amo techkaki. Ijko kiné, weleti tikinmixmatih akimeh kinyakantinemi n Espíritu de Dios iwa tikinmixmatih non kijtoa tlan amo milák.

Dios Ye n tetlasojtlálistli

⁷Notlasojikniwah matimosepantlasojtlakah, porke Dios iaxka n tlasojtlálistli. Nochi akin milák tetlasojtla, ikone Dios iwa kixmati Dios. ⁸Akin amo tetlasojtla ayamó kixmati Dios, porke Dios Ye n tlasojtlálistli. ⁹Dios otechnextili techtlasojtla, ijkuak okwáltitlanki Cristo itech nin tlaltikpaktli non san Ye se Ikone, para matikpiakah yolílistli por Cristo. ¹⁰Ye n tlasojtlálistli: amo tejwah otiktlasojtlakeh Dios, Ye otechtlasojtlak iwa okualtitlanki ikone para kitemaktis kemi se tlamánali para matechtlapojpolwi de totlajtlakolwah.

¹¹Notlasojikniwah, tla Dios ijko yotechtlasojtlak, tejwah noiwa moneki matimosepantlasojtlakah. ¹²Ayik aka yokitak Dios. Pero tla timosepantlasojtlah, Dios yetos towa, iwa

itlasojtlalis kajki totech. ¹³Kuali tikmatokeh tinemih iwan Dios iwa Ye kajki totech, porke yotechmák Iesprítu. ¹⁴Tejwah tonewiah yotikitakeh iwa tikintlapowiah, Totajtsi Dios okwatitlanki Ikone, para kinmakixtikis nochteh n tlaltikpaktlakah. ¹⁵Nochi akin kiteilia Jesús, Ye Ikone Dios, non tlakatl kajki iwan Dios iwa Dios kajki iwa.

¹⁶Tejwah yotikixmatkeh iwa yotikneltokakeh Dios techtlasojtla. Dios Ye tlasojtlálistli, iwa akin tetlasojtla seititok iwan Dios. ¹⁷Tla milák tikintlasojtla tokniwah, iwa tla timoyekuikah kemi Cristo Jesús omoyekwík itech nin tlaltikpaktli, amo matimawikah itech iksemi tonati keman Ye tlaixkomakakih. ¹⁸Akin kuali tetlasojtla amo mawi. Kan onka tlasojtlálistli amo onka mawílistli, porke n milák tlasojtlálistli kachiwa n mawílistli. N mawílistli kiwika tlaijyowílistli, porke akin mawi ayamó kuali tetlasojtla.

¹⁹Tejwah tiktlasojtla Dios porke Ye achto otechtlasojtlak. ²⁰Pero tla aka kijtoa: “Ne niktlasojtla Dios”, pero kikokolia ikni, ye xolópíjtli. Porke tla amo kitlasojtla se ikni non konitok, kenomi weletis kitlasojtlas Dios non amo kita. ²¹Ye otechmák nin tlanawátli: Akin kitlasojtla Dios noiwa makitlasojtla ikni.

5

Matitlatlanikah itech nin tlaltikpaktli

¹Tla tikneltoka Jesús Ye n Cristo, timochiwah ipilwah Dios. Porke tla tiktlasojtla n Teta, noiwa moneki matikintlasojtlakah ipilwah non Teta. ²Tla tejwah tiktlasojtlah Dios iwa tikintlakitah itlanawatilwah, tikmatih noiwah tikintlasojtlah ipilwah Dios. ³Tejwah tik-tenexthiah tiktlasojtla Dios keman tikintlakitah itlanawatilwah, iwa amo owi se kintlakita. ⁴Milák, nochi akin kijtoa ikone n Dios, tlatlani itech nochi tlan amokuali onka itech nin tlaltikpaktli, iwa nochteh akimeh kineltokah Cristo, nochipa tlatlani itech tlan amokuali. ⁵Sanwel akin kineltoka Jesús, Ye Ikone Dios, tlatlani itech nin tlaltikpaktli iwa itech tlan amokuali.

Aki n Cristo

⁶Cristo Jesús owala itech nin tlaltikpaktli ika atl iwa ika estli. Iwa amo san ika atl noso ika estli. N Espíritu kijtoa tlan milák, porke Ye yekmilajka. ⁷Onkateh eyi akimeh kijtoa tlan milák. ⁸Iwa san ken eyi yomoyekkajkeh, n Espiritu, n atl iwa n estli. ⁹Tla tikneltokah tlan techmatiltiah n tlakah, okachi matikneltokakah tlan Dios techmatiltia, porke tlan Ye techilia, okachi ipati porke techilia Jesús Ikone. ¹⁰Akin kineltoka Ikone Dios, kineltoka tlan Dios yokijto. Pero akin amo kineltoka Dios kita kemi xolópíjtli, porke amo kineltoka tlan Dios inewia yokijto de Ikone Cristo Jesús. ¹¹Ijkó Dios yokijto: tejwah yotechmák toyolilis non ayik tlami, iwa nin yolílistli kajki itech Ikone Cristo Jesús. ¹²Yika, akin kipia Ikone Dios, kipia yolílistli, pero akin amo kipia Ikone Dios, amo kipia nin yolílistli.

Sa iksemi tlanonotsa

¹³Nomechintlajkuililia ninteh tlájtoltel nomejwah akimeh non kineltokah itech Itoka Ikone Dios, para xikmatikah nonkipiah n semijkak yolílistli.

¹⁴Titlaneltokah inawak Dios, porke tikmatih Ye techkaki tla itla tiktlajtlanilia non Ye kipaktia. ¹⁵Iwa ijkó ken tikmatih Dios techkaki ijkuak timotiotsajtsilia, noiwa ya tikmatih Ye yotechmák tlan otiktlajtlanilijkeh.

¹⁶Tla aka kita se ikni kichijtok tlajtlákoli, non amo ika se mikkis, mamotiotsajtsili inawak Dios makitlapojpolwi. Dios kimakas yolílistli non ikni, tla non tlajtlákoli amo tewika kan mikílistli. Pero onka tlajtlákoli non tewika kan mikílistli, iwa amo nomechilia ximotiotsajtsilikah por ye. ¹⁷Nochi tlan amokuali se kichiwa, tlajtlákoli. Pero amo nochi tlajtlákoli tewika kan mikílistli.

¹⁸Tikmatih ipilwah n Dios, mach ok paki tlajtlakolchijtinemiseh, porke tikmatokeh Ikone n Totajtsi Dios kinmokuitlawia, iwa n satanáas amitla weleti kintoktia.

¹⁹Tikmatokeh tejwah iaxkawah Dios, iwa nochteh n tlaltikpaktlakah non amo kineltokah Dios kinnawatijtok n satanáas.

²⁰Noiwa tikmatokeh Ikone n Totajtsi Dios yowala, iwa yotechmák teajsikamatílistli para matikixmatikah non milák Ye Dios. Tejwah tiseititokeh iwa Ikone Cristo Jesús; Ye n milajka

Dios. Ye Akin kitemaka n semijkak yolílistli. ²¹Nopilwantsitsiwah, amo xikinmotiotikah n diosmeh tlachijchíwalteh.

N ojpatia iamatlajkuilol San Juan

Nomechtlajpaloa

¹ Ne Juan, ya ni tetajtsi innawak tokniwah akimeh nikinyakana. Nikintlajkuililia n tlaneltokakeh* non Totajtsi Dios okinpéjpenki, akimeh satlawel nikintlasojtla, iwa amo san ne nikintlasojtla, yej noiwa nochteh akimeh yokixmatkeh tlan milák. ² Tejwah tomechtlasojtlah porke tikpixtokeh tlan milák itech toyolo, iwa mokawas towah nochipa. ³ Niktlajtlanilia Dios n Teta, iwa Ikone Cristo Jesús, manomechmakakah inkualtilis, inteiknomatilis iwa manomechmakakah inyolsewilis iwa yetoskeh nomowah tlan milák iwa nomechtlasojtlaskeh.

Tlan milák iwa n tlasojtlálistli

⁴ Miak onechpakti porke onikinmajsito sikimeh de nomejwah non kichijtokeh tlan kijtoah itlajtol Dios non milák, ijko kemi Totajtsi Dios otechnawatih matikchiwakah. ⁵ Axa, nokniwah† nomechtlatlajtia matimotlasojtlakah tinochteh. Nin tlanawatlistli amo yankuik, san ye non otechmachtijkeh ijkuak otikselijkeh n Cristo. ⁶ Akin de milajka techtlasojtla noiwa kintlakamati itlanawatilwah Dios. Iwa kemi nomejwah ya nonkimatih desde ijkuak ononkiselijkeh n Cristo, Dios technawatia matimosepantlasojtlakah, ijko kemi otechmachtijkeh desde ijkuak opé tikneltokah Cristo.

Ximotlachilikah porke nemi miakeh tekajkayajkeh

⁷ Itech nin tlaltikpaktli nemih miakeh tekajkayajkeh, iwa kijtoah Cristo amo milák owala itech nin tlaltikpaktli kemi se tlakatl kemi tejwah. Akin ijko kijtoah, tekajkaya iwa ikokolikni n Cristo. ⁸ Ximotlachilikah, para amo nonkipoloskeh nochi tlan kualitlotikchijkeh, yej ajsitok xikselikah nomotlatliokolil.

⁹ Nochi akin moixkoyantia iwa amo kitlakita itemachtilis Cristo, Dios amo ka íwa. Pero akin nochipa kimopantia tlan Cristo okitemachtli, Dios n Teta iwa Ikone nochipa yetoskeh íwa. ¹⁰ Tla aka yawi nomocha iwa amo kiwika itlamachtilis Cristo, amo xikkalakikah nion xikselikah nion xiktalajpalokah, ¹¹ porke akin kitlajpaloa noiwa moiknitia ika tlan ye kichijtinemi.

Juan otlayolopacho

¹² Miak nikpia tlan nomechtlapowis, pero amo nikneki san nomechtlajkuililis, porke nikneki nias nomechontlajpaloti iwa timotlapowiskeh tonewiah, ijko niyetos ika miak paklistli.

¹³ Mitsontlajpaloah n tlaneltokakeh non moiknitiah towah.‡

* 1:1 N griego kipia siwatl iwa mopilwah † 1:5 N griego kipia tejwatsi nokni siwatl ‡ 1:13 N griego kipia nokni siwatl akin Dios okipéjpenki

N eyitipa iamatlajkuilol San Juan

Nomechtlajpaloa

¹Ne Juan ya ni tetajtsi, niktalajkuililia n tokni Gayo, akin niktlasojtla.

²Noknitsi, niktlatlautia Dios xiyeto ika kuali, noiwa nochi tlan tikchiwa mapankisa, ijkó ken moalma kajki kuali inawak Dios iwa amo ximokoko. ³Miak onipak ijkuak owalajkeh sikimeh tokniwah kan te timoololoa, iwa onechtlapowijkeh tikmopantia itlajtol Dios non milák. ⁴Amo nikpia okachi pakfistli, keman nikkaki nopilwah kitlakitah itlamachtilis Dios.

Juan tlajtoa kuali de tokni Gayo

⁵Noknitsi, satlawel kuali tlan tikchiwa ijkuak tikimpalewia n tokniwah maya amo tikinmixmati. ⁶Yejwah okinmatiltijkeh n tokniwah non nika moololoah kenijki titetlasojtla. Nimitsontlatlajtia, xikimpalewi ika tlan kimpoloa, para amitla makimpolo itech ojtli, xikinpalewi ijkó kemi Dios kipaktia. ⁷Porke yejwah kitlasojtlan n Toteko Cristo Jesús, yika oyajkeh okitekilitoh, iwa amo okiselijkeh tlan okinmakayah akimeh amo kixmatih Dios. ⁸Yika, tejwah moneki matikimpalewikah nonteh tokniwah, para mamotematilti tlan milák.

Diótfefes amo kineki tetlakitas

⁹Ne yonikintlajkuilili n tokniwah, pero Diótfefes akin kiwilita tlanawatijtos ompa, amo kineki kikakis tlan niknawatia.

¹⁰Yika, ijkuak ne nias nikajwas, porke techpojpojtinemi iwa tlajtoa tlan amo milák de tejwah. Iwa amo san noni, yej noiwa mach kinselia n tokniwah non ompa onkalakih. Iwa akimeh kinekih kinkalotiskeh n tokniwah non ompa onkalakih, mach kinkawilia makinkalotikah iwa san semi kintotoka de kan moololoa.

¹¹Noknitsi Gayo, amo xiktlachichiwili itech tlan amokuali, yej xikchiwa tlan kuali. Akin kichiwa tlan kuali, milák ikone Dios, pero akin kichiwa tlan amokuali, non tlakatl amo kixmati Dios.

Demetrio se tlakatl yekmilajka

¹²Nochteh kiyektenewah tlan kichiwa n Demetrio, iwa milák tlan kijtoah. Tejawah noiwa tikmatokeh tlan ye kichiwa, iwa nomejawah nonkimatokeh milák tlan tomechiliah.

Juan momakawa ika ninteh tlájtolteh

¹³Oniknekia miak nomechilis, pero amo oniknek nikijkuilos, ¹⁴porke nikneki nimitsonitati, ijkuakó weletis timotlapowiskeh tonewia.

¹⁵N yolsewílistli mayeto mowa. Mitsontlajpaloah motlakaikniwah. Xikintlajpalo nocteh n tokniwah non kateh mowa.

Nin iamatlajkuilol San Judas

Judas kintlajkuililia akimeh Dios okínnotski

¹ Ne Judas niktekitilia Cristo, ne nokni n Jacobo. Nikintlajkuililia akimeh Dios n Teta okínnotski iwa okinxelo mayetokah iaxkawah, ken nonseititokeh iwan Cristo Jesús.

² Xikselikah iteiknomatilis Dios, itlasojtlalis iwa iyolsewilis.

Akimeh kitemachtiah tlan amo milák
(2 Ped. 2:1-17)

³ Notlasojikniwah, satlawel oniknek nomechtlajkuililis iwa nomechilnamiktis ika totemakixtilis non tiksepampixtokeh, onikmoli kuali manomechtlajkuilili para ximochijchikawakah por n tlaneltokálistli non Dios okinmajmak iaxkawah. ⁴ Sikimeh yoich-takakalakeh non yowejkah okimpejpenkeh para kintlajjowiltiskeh, tlakah amokualteh non okipatlakeh ikualtilis Dios iwa kijtoah weletis titlajtlakolchiwaskeh iwa amo kitlakitah Cristo Jesús non san Ye n Toteko. ⁵ Nomejwah ya nonkimatokeh pero nikneki nomechilnamiktis n Toteko Dios okinkixti n tlakah de Israel kan tlali de Egipto. Satepa okimpojpolo non amo okineltokakeh. ⁶ Iwa n ángelteh non amo omokajkeh kan Dios okintlali, iwa ayakmó okinekeh otelakitakeh iwa okikakajtekeh incha. Dios okintsak kan sentleyua iwa nochipa ompa kimpixtos asta maajsiki n iksemi tonati. ⁷ Ijkó omochijkeh non ochantitokah Sodoma iwa Gomorra iwa non ik ompa ochantitokah. Yejwah omosenkajkajkeh itech tlan inkuerpo okelewiaya iwa tlan pitsotik. Yika Dios okintlajjowilti iwa okinkajkah ijtik tletl non ayik sewis para ompa matlajjowikah. Nochi ni technejmachtia para amo ijko matikchiwahah.

⁸ Ijkó kiné, ninteh tlakah noiwah kijtlakoah inkuerpo, iwa tejtemikih, amo kitlakitah n tekiwajkeh iwa fiero kintenewah n ángelteh. ⁹ Pero keman arcángel Miguel, omotekilmakatoka iwan diablo okimotlatlanilijtokah ikuerpo n Moisés, amo omixewi kiwijwikaltis. Yej san okili: “Ma Dios mamitstlajjowilti.” ¹⁰ Pero ninteh tlakah, fiero kitenewa asta tlan amo kixmati. Kichiwa kemi n yolcameh kichiwah, nochi tlan onka kixmatih pero amo kajsikamatih yika moyakatlamah san yejwah.

¹¹ ¡Miálmasteh! Ken kichijtinemih kemi okichi Caín. Iwa ken kinekih kitlaniskeh miak tomi, kichiwah tlan okichi Balaam, iwa mikkih kemi Coré porke okinmixnamik itlatlanilwah Dios. ¹² Yejwah kichiwah tlan tepinati keman non moololoah iwan nomokniwah iwa nontlakuah, keman nonkilnamikih imikilis Toteko. Ontlakuah iwa mopaktiah iwa amo kitlakitah Dios.

Yejwah kemi mexkli non amo kualikah kiawitl non n ejekatl san kinwiwikah, kemi kuaujmeh non ya kitemakaskia intlakilo, ninteh kemi yaskiah yomikkeh, yika san semi kinwiwitlaskeh. ¹³ Yejwah kemi wejweyi amemélotleh non tlapak motlatlamotlah iwa kualpankixtiah imposokyo sokitik itempa n weyi atl ika tlan tepinati kichiwa. Noiwa yejwah kateh kemi sítlateh non yokixpolojkeh ojtli, iwa sa kinchixtok n sentleyuálistli kan tlajjowitiweh.

¹⁴ Noiwa Enok non otlákatki ipan chikome tlakatl satepa de Adán,* okinteneh ninteh tlakah iwa ijki okijto: Onikitak n Toteko ompa wits iwa kualinwikah miaktikeh ángeles.

¹⁵ Tetlaxtlawikih iwa kintlajjowiltis n tlajtlakolejkeh akimeh okichijkeh tlan amokuali iwa fiero okitenewayah.”

¹⁶ Ninteh tlakah amitla kimpaktia, sanwel kinekih innewiah mopakilismakaskeh, san xankuatlajtoah, iwa kinyektenewah oksikimeh san para itla kintlajtlaniliskeh.

Judas kinnonotsa n tlaneltokakeh

* 1:14 Lucas 3:37b-38: Enok otlákatki ipan chikome tlakatl satepa de Adán. Enok ikone n Jared, Jared ikone n Mahalaleel, Mahalaleel ikone n Cainán, iwa n Cainán ikone n Enós, Enós ikone n Set, iwa n Set ikone n Adán, iwa n Adán ikone Dios.

¹⁷Notlasojikniwah, nomejwah xikilnamikikah tlan yowejka onomechmatiltijkeh itlatitlanilwah n Cristo Jesús. ¹⁸Yejwah onomechilijkeh: “Itech iksemi tonatijmeh, monextiskeh tlakah non san kiwewetskaskah itlajtlo Dios iwa kinyakanas inmelewilis amo kualí.” ¹⁹Ninteh tlakah kinxexeloh n tokniwah iwa kichiwah ken kichiwah n tlaltikpaktlakah, iwa amo kipiah n Espíritu.

²⁰Pero nomejwah notlasojikniwah, nochipa xikneltokakah Dios. Non tlaneltokálistli miak ipati. Ijkuak nonmotiotsajtsiliskeh xikkawilikah n Espíritu Santo manomechili tlan weletis nonkijtoskeh. ²¹Nochipa ximotlasojtlakah ika itlasojtlalis Dios. Iwa xikchiakah ika pakílistli n iksemi tonati ijkuak n Toteko Cristo Jesús itech iteiknomatilis kichiwas xiyolitokah nochipa kan ilwikak.

²²Xikinmiknomatikah akimeh ayamó chikawak intlaneltokális. ²³Oksikimeh xikinmakixtikah imak tletl, iwa n oksikimeh xikinmiknomatikah ika mawílistli, iwa xiktlamotlakah intlakeh non yomopitsotili ika intlajtlakolwah.

Judas kiweyilia Dios

²⁴Dios Totemakixti kipia weletílistli para nomechmokuitlawis iwa amo xiwetsikah itech tlajtlákoli, iwa ika pakílistli nomechteixpantis non chipawakeh ixpa imawistilis, ²⁵non san Ye se Dios onka non saikpanoa ixlamatini, Totemakixti, mayeto Iwa n mawistílistli, n weletílistli iwa n tekiwajkayotl axa iwa nochipa.

Ijkó mamochiwa.

Tlan Cristo Jesús okititi itlatitlanil San Juan

Tlan Cristo Jesús okititi n Juan

¹Ye ni tlan Dios okinextili n Cristo Jesús, iwa ijko matechnextili tejwah itekitwah tlan ayakmo wejkawas tlamochiwas. Cristo Jesús okititlanki iángel makinextili n Juan akin okitetlapowiaya de itlajtol Jesús. ²Iwa ne akin oniktelapowi nochi tlan onikitak. Nonewia onikseli itlajtol Dios non Cristo Jesús onechmaktiliko.

³Miak mayolpakikah akimeh kiamapoah iwa akimeh kikakih iwa kichiwah tlan Dios kitematiltia, porke mach ok wejkawas mochiwas tlan nika ijkuilitok.

Juan kintlajkuililia n tokniwah non moololoah itech n chikome tiopanmeh

⁴Ne Juan, nomechtlajkuililia nomejwah akimeh nonkateh intech n chikome tiopanmeh* non kateh itech n tlamem de Asia. Dios manomechtiochiwa iwa makichiwa xiyetokah ika yolsewlistli, porke Ye kajki, yokatka iwa wits. Noiwa n chikome espíritu non kateh iyakapa n Dios kan Ye tlanawatijtok, xikselikah tlatiochiwálistli iwa xiyetokah ika yolsewlistli ⁵iwa de Cristo Jesús Akin inewia okitak. Ye akin achto omoyoliti intsalko mikemeh, iwa itlanawatil kimpanawilia itlanawatil n reyes non tlanawatiah itech nin tlatlákaptli. Cristo techtlasojtla iwa ika iesso otechinkixtili totlajtlakolwah, ⁶iwa otechtlali tireyes iwa titiopixkeh para matikweyilikah Dios non Ye Itajtsi. ¡Weyfístli iwa weletfístli makiselijto nochipa! Ijko mamochiwa.

⁷Xikitakah. Cristo wits ipan mextli. Iwa nochteh n tlakah kitaskeh, asta non okikespantopitijkeh; iwa nochteh n tlatlákaptlakah chokaskeh ijkuak kitaskeh. Milák, ijko mamochiwa.

⁸Ne nitlapewaltia iwa ne nitlayakatlamia, (ijko kemi abesedario pewa ika A iwa tlami ika Z,) kijtoa n Toteko Dios Akin nochi weleti kichiwa, Akin kajki okatka iwa oksepa wits.

Juan kita n Cristo akin omochi tlakatl

⁹Ne Juan, nomokni, ne noijko nitlajjowia kemi nomejwah ken niktakita n Toteko Cristo Jesús ijko kemi nomejwah ne noiwa yonikseli n yolchikawálistli non wits de Toteko Cristo Jesús para nixkikos nochi tlan nikijyowia. Ne onitsaktoka kan isla non itoka Patmos por oniktetlapowiaya itlajtol Dios non Cristo Jesús noiwa onechnextiliko. ¹⁰Se tonati pialoni, n Espiritu Santo owala notech iwa se tlájtoli chikawak kemi se tlapítsali, onikak ik nokuitlapa ¹¹iwa onechili:

—Xikijkulo itech se amatlajkuíloli nochi tlan tikita iwa xikintitlanili n chikome tiopanmeh non kateh itech tlamem de Asia, non kateh Éfeso, Esmirna, Pérgamo, Tiatira, Sardis, Filadelfia iwa non de Laodisea.

¹²Animoyakákopki para nikitak akin onechtlapowijtoka iwa ijkuak yonimókopki onikinmitak chikome kandelerojteh de oro. ¹³Iwa intlajkotiah nonteh chikome kandelerojteh onikitak se Akin yomochi tlakatl, itlake weyaktik onajsia asta kan ikxitla, iwa kan ielpa opanotoka se patlawak sinta de oro. ¹⁴Itsonkal istaktik kemi ichkatl noso kemi nieve, iwa itlololowah oxotlayah kemi yaskia tletl. ¹⁵Ikwah otsotlaniah kemi tépostli de bronse ijkuak xoxotlatok itjik orno, itlajtol otekuinia chikawak kemi ijkuak miakeh ameh ijkuayukatokeh. ¹⁶Itech imayekma okimpixtoka chikome sítlalteh, iwa itech ikamak okistoka se espada non ojka oyektentitoka iwa otlatekia. Ixko chikawak otsotlania kemi n tonati.

¹⁷Ijkuak onikonitak, oniwetsito ikxitla kemi nimiktoskia. Pero Ye onechtelko ika imayekma, iwa onechili:

—Amo ximawi. Ne Akin nitlapewaltia iwa nitlayakatlamia. ¹⁸Ne Akin niyolitok; iwa onimiktoka, pero axa niyolitok iwa ayik nimikis. Ne nitlanawatia ipan mikfístli iwa ipan miktla. ¹⁹Xikijkulo tlan otikitak, tlan axa panotok iwa tlan satepa tlamochiwas. ²⁰Ye ni tlan

* 1:4 Tiopanmeh kijtosneki kan moololoah non kineltokah Cristo Jesús.

kijtosneki n chikome sítlalteh non otikinmitak itech nomayekma, iwa ye ni tlan kijtosneki n chikome kandelerojteh de oro: n chikome sítlalteh, yejwah n chikome ángelteh de n chikome tiopannemeh, iwa n chikome kandelerojteh kijtosneki n chikome tiopannemeh.

2

Juan kintlajkuililia n tlaneltokakeh non moololoah Éfeso

¹'Xiktlajkuilili n tlayákanki non kajki Éfeso kan moololoah n tlaneltokakeh: "Ijki kijtoa Akin kimpixtok n chikome sítlalteh itech imayekma, non nemi intlajkotiah n chikome kandelerojteh de oro: ²Ne nikmati nochi tlan tikchiwa. Nikmatok kenomi chikawak titekiti iwa kenomi nochi tikxikoa, iwa noijki nikmatok amo tikxikoa tikinmitas n tlajtlakolejkeh. Ne kualí nikmatok yotikinyejyeko nekateh non motenewah tlatitlánilti pero mach milák, iwa yotikinmitak san tekajkayajkeh. ³Miak tlajjyowílistli yotikxikoa ika n tekittl non techchiwilijitiwits, iwa ayik timosotlajtika. ⁴Pero onka itla tlan ayakmó nechpaktia: Yotikka n tlasojtlalístli non achto otikpiaya. ⁵Xikilnamiki de kan otíwetski, iwa ximoyolpatla iwa xikchiwa tlan achto otikchiwaya. Porke tla amo timoyolpatla, san nima nias monawak iwa nikachiwas mokandelero. ⁶Pero tikpia itla tlan nechpaktia: te tiktlawelita tlan kichiwah n nicolaífas, ye tlan ne noiwa nikkokolia. ⁷Akin kineki kajsikamatis makikaki tlan n Espíritu kinmilia n tokniwah: Akimeh tlatlaniskeh, nikinmakas makikuakah itlakilo n kuawitl non kichiwa se mayolito nochipa, non kajki tlatlajkotia kan ixochitlalpa Dios."

Juan kintlajkuililia n tlaneltokakeh non moololoah Esmirna

⁸'Xiktlajkuilili n tlayákanki non kajki Esmirna kan moololoah n tlaneltokakeh: "Ijki kijtoa Akin tlapewaltijtok iwa tlayakatlamia, Akin omikki iwa oksepa omoyoliti: ⁹Ne nikmati nochi tlan tikchiwa. Nikmatok tlan mitstlajjyowiltia iwa kenijki mitspoloa, maya momatok inawak Dios tiktlawelpia. Noiwa nikmati kenijki fiero mitstlenewah akimeh motokayotiah judíojeteh iwa amo milák judíojeteh, porke yejwah iaxkawah n satanáas. ¹⁰Amo xikmawili n tlajjyowílistli non itech tipanos, porke n diabolo kichiwas manomechtsakuakah sikimeh de nomejwah, ijko nomechyejyekos, iwa nomechtlajjyowiltiskeh májtlakteh tonatijmeh. Nochipa xitlaneltokato asta ijkuak timikis, iwa ne nimitsmakas mokorona ye n yankuik nemílistli. ¹¹Akin kineki kajsikamatis makikaki tlan n Espíritu kinmilia n tokniwah non moololoah itech Itoka Cristo. Nochi akin tlatlanis, mach ok itla weletis kitoktis non ojpatia mikílistli."

Juan kintlajkuililia n tlaneltokakeh non moololoah Pérgamo

¹²'Xiktlajkuilili n tlayákanki non kajki Pérgamo kan moololoah n tlaneltokakeh: "Ijki kijtoa Akin kipixtok n espada yakawitstik non ojka tlateki: ¹³Ne nikmati nochi tlan tikchiwa iwa kan tichantitok. Tichantitok ompa kan satanáas tlanawatijtok, iwa maya ijko te nochipa tikchiwa tlan Ne nimitstnawatia. Ayik tikilajtika Notoka, nion ijkuak Herodes Antipas akin okitematiltiaya notlajtol okimiktijkeh ompa Pérgamo kan chantitok n satanáas. ¹⁴Pero noiwa tikpia itla tlan amo nikwelita: ompa tikimpixtok sikimeh non amo kinekih kikawaskeh tlan Balaam okitemachti. Balaam okititi n Balac kenomi kintlajtlakolchiwalts n tlahah de Israel, iwa okintoktih makikuakah tlan yokinmanilijkah n diostsitsinteh non kinmachijchiwah iwa okintojtopewayaya maawilnemikah. ¹⁵Noiwa mowa kateh sikimeh non kineltokah tlan n nicolaífas kitemachtiah. ¹⁶Yika, ximoyolpatla, porke tla amo, san nima nias nimitsonitati iwa niktntlajjyowiltis ika noespada non kisa itech nokamak. ¹⁷Akin kineki kajsikamatis, makikaki tlan n Espíritu kinmilia n tokniwah non moololoah itech Itoka Cristo: Nochi akin kixikos tlan amokuali, nikmakas n tlákuali non itoka maná, non tlaatitok ilwikak; iwa nikmakas se tetsintli istak kan ijkuilitos se yankuik itoka, non amaka ok se kixmatis, sanwel akin kiselis."

Juan kintlajkuililia n tlaneltokakeh non moololoah Tiatura

¹⁸'Xiktlajkuilili n tlayákanki non kajki Tiatura kan moololoah n tlaneltokakeh: "Ijki kijtoa ikone Dios, non ixtololowah xotlatokeh kemi tletl, iwa ikxiwah tsotlantokeh kemi tépostli non itoka bronse. ¹⁹Ne nikmati nochi tlan tikchiwa. Nikixmati motetlasojtlalis,

motlaneltokalis, iwa kenijki tikimpalewia oksikimeh, noiwa kemi titlaxikoa ijkuak titlajjowia, noiwa onikma axa titekkitok okachi ke achto. ²⁰ Pero onka itla tlan tikchiwa tlan amo nikwelita, ompa tikpixtok n siwatl Jezabel, non kijtoa tetlapowia de itlajtol Dios pero ika tlan kitemachtia kinkajkayawa notekitwah para mamomekatijtinemikah iwa makikuakah n tlákuali non kinmanilia n diostsinteh non kinmachijchiwah. ²¹ Ne yonikmák kech tonati non siwatl para mamoyolkopa pero ye amo kineki kikawas imekatanajchiwalis. ²² Yika niktlamotlas ixko petlatl ika kokólistli iwa noijki nikintoktis mamokokokah iwa matlajjowiwah akimeh íwa kochtinemih itech tlajtlákoli, tla amo moyolpatlah iwa kikawah n tlajtlákoli non ye kichiwa, ²³ nikinmiktis ipilwah non siwatl ika se chikawak kokólistli. Ijko nochteh n tokniwah kitaskeh Ne kualí nikmatok nochi tlan kiyejekoah n tlakah itech intlamachilis iwa tlan kinchiliah ijtik inyolo. Iwa se por se de nomejwah nomechtlaxlawis ika tlan ononkichijtineneh. ²⁴ Pero nomejwah akimeh nonkateh ompa Tiatira, nomejwah akimeh amo nonkichijtinemih tlan Jezabel kitemachtia nion nonkixmatih tlan yejwah kiliah “weyi tlamachtílistli de n satanás non miakeh amo kixmatih”, nomejwah mach ok itla ok se nomechnawatia. ²⁵ Pero ayik xikkawakah tlan ya nonkipixtokeh asta maniwiki. ²⁶ Akin tlatlanis iwa kichijtinemis tlan Ne nikwelita makichiwa asta n iksemi tonatimeh, Ne nikchiwas matlanawati itech nochteh n paísmeh, ²⁷ iwa kinawatjitos kemi akin chikawak tlanawatia ika se tlakotl iwa asta kintlatlapatsas kemi yaskiah xoktsimeh de barro, ijko kemi Notajtsi okichi noiwa Ne manitlanawati. ²⁸ Noiwa nikmakas n weyi sítlali non pankisa kualka. ²⁹ Akin kineki kajsikamatis makikaki tlan n Espiritu kinmilia n tokniwah non moololoah itech Itoka Cristo Jesús.”

3

Juan kintlajkuililia n tlaneltokakeh non moololoah Sardis

¹ Xiktalajkuilili n tlayákanki non kajki Sardis kan moololoah n tlaneltokakeh: “Ijki kijtoa akin kimpixtok n chikome espíritus de Dios iwa n chikome sítlalteh: Ne nikmati nochi tlan tikchiwa, iwa nikmati moespíritu miktok maya tikijtoah tiyolitok. ² Xijsa iwa oksepa xichikawalti motlaneltokalis non yotikpolojtoka, porke yonikitak tlan tikchiwa, ayamó ajsitok inawak Dios. ³ Xikilnamiki n tlamachtílistli non yotikak. Xiktlakita iwa ximoyolpatla inawak Dios. Tla amo tijsatos, san kemi se ichtek nonkisati monawak, iwa nion amo tikmatis tlan oras niwalkalakiti. ⁴ Noiwa nikmatok ompa Sardis tikimpixtok sikimeh non amo okimotchejkeh intlakenwah ika tlajtlákoli. Yejwah nemiskeh nowa ika istaktik intlakeh, porke okimotlanilijkeh. ⁵ Nochi akin tlatlanis kitlaliliskeh istaktik itlake, iwa ayik nikpopolos itoka ompa itech amatlajkuíloli kan machotitokeh akimeh yolitoskeh nochipa, iwa itoka niknextis iyakapa n Notajtsi iwa iyakapa n iangelwah. ⁶ Akin kineki kajsikamatis makikaki tlan n Espiritu kinmilia nochteh n tokniwah non moololoah itech Itoka Cristo Jesús!”

Juan kintlajkuililia n tlaneltokakeh non moololoah Filadelfia

⁷ Xiktalajkuilili n tlayákanki non kajki Filadelfia kan moololoah n tlaneltokakeh: “Ye ni tlan kijtoa akin milák chipawak iwa yolmilajka; akin kipixtok iyabe n rey David, akin ijkuak tlatlapoa amaka ok se weleti tlatsakua, iwa ijkuak tlatsakua, amaka ok se weleti tlatlapoa: ⁸ Ne nikmati nochi tlan tikchiwa. Xikita, oniktlatli moyakapa se kaltentli non tlapotok iwa amaka weletis kitsakuas; porke maya amo tichikawak, otiktlakitak notlajtol iwa ayik otikixtlaati motlaneltokalis non techpialia. ⁹ Xikita, Ne nimitsinmaktilis sikimeh non kinteltokatinemih n satanás, akimeh motenewah judfojteh iwa amo milák. Nikintoktis mamotlankuaketsakah mokxitla para makimatikah kenijki nimitstlasojtla. ¹⁰ Te otikchi tlan onimitsnawati iwa nochi otikxiko, yika ne nimitspalewis ximakisa itech n tlajjowílistli non wits ipan taltikpaktli. Non ora nikinyejyekos nochteh n taltikpaktlakah. ¹¹ Niman niwits. Nochipa xikneltokato notlajtol para amaka mamitskixtili mokorona. ¹² Akin tlatlanis, niktlatlis kemi pilar kan itiopa Nodios, iwa ayik kisas de ompa; itech nikijkuilos itoka Nodios, itoka n yankuik Jerusalén non waltemoa de ilwikak non Ye

ialtépeu, iwa itech nikijkuilos yankuik notoka. ¹³ ¡Akin kimati tlakaki makikaki tlan n Espíritu kinmilia n tokniwah non moololoah itech Itoka Cristo Jesús!”

Juan kintlajkuililia n tlaneltokakeh non moololoah Laodisea

¹⁴ Xiktlajkuilili n tlayákanki non kajki Laodisea kan moololoah n tlaneltokakeh: “¡Jkí kijtoa Akin itoka ‘Ijkó Mamochiwa’, Akin inewia okitak iwa milájka, iwa por Ye Dios okichijchi nochi tlan onka: ¹⁵ Ne nikmati nochi tlan tikchiwa. Ne nikmatok te nion tisekek nion titotonik. ¡Okachi kuali tla tiyetoskia tisekek noso titotonik! ¹⁶ Pero kemi san tiyámanki, iwa amo tisekek nion titotonik, yika nimitstlakopas. ¹⁷ Te tikijtoa tiktlawelpia, iwa tikijtoa amitla mitspoloa. Pero Ne nikijtoa amo tikajsikamati iwa amo tikpia paklistli, amitla mopati, amitla tikpia, amo titlachia iwa tixipetstik. ¹⁸ Yika, xikkaki tlan nimitsilia: nonawak xikkoaki oro chipawak non yokichichipajkeh ijtik tletl iwa ijkó milák tiktlawelpias; techkuili tlakemil istaktik iwa ximotlakenti para ayakmó ximopijpinatijtinemi ijkó kemi tika tixipetstik. Noiwa techkuili pajtl para moixtololowah iwa xikmotlalili itech moixtololowah para ijkó kuali xitlachia. ¹⁹ Akimeh Ne nikintlasojtla, nikinnonotsa iwa nikintlajjowiltia. Yika, ximochijchikawa techweyili ika nochi moyolo, iwa ximoyolpatla nonawak. ²⁰ Techkaki, ne nimoketok mokaltempa, iwa nitlakakalatok, tla aka kikaki notlajtol iwa nechtlatlapolia, ne nikalakis, nitlakuas iwa, iwa ye nowa.

²¹ Akin tlatlanis, nikkawilis mamotlali nowa kan ne nitlanawatijtok, ijkó kemi ne onitlátlanki iwa onimotlali iwa n Notajtsi kan tlanawatijtok. ²² ¡Akin kineki kajsikamatis, makikaki tlan n Espíritu kinmilia n tokniwah non moololoah itech Itoka Cristo Jesús!”

4

Kiweyiliah Dios kan ilwikak

¹ Satepa ijkuak ijkó opanok, oniajktlachixki iwa onikitak otlapotoka se kaltentli kan ilwikak, iwa n tlájtoli non achto onéchnotski, otékuinki chikaktik kemi se tlapítsali, iwa onechili:

—Xiwaltlejko nika, iwa nimitsititis nochi tlan satepa tlamochiwas.

² San nima n Espíritu owala notech, iwa onikitak kan ilwikak se weyi yáyantli, iwa ipan non yáyantli aka ompa oewatoka. ³ Iwa akin oewatoka itech non yáyantli, omotaya kemi se tetl tsotlantok non itoka jaspe noso kornalina. Iwa non yáyantli okiyawalojtoka se kosamalotl non satlawel otsotlania kemi se tetl non itoka esmeralda. ⁴ Non yáyantli okiyawalojtokah sempóali iwa nawi (24) yáyanteh. Iwa ipan nonteh yáyanteh oewatokah sempóali iwa nawi tetajtsitsinteh non istaktlakentitokah, iwa sejse okipixtoka ipan intsonteko se korona de oro. ⁵ Ompa de kan non weyi yáyantli okisaya tlapejpetlanilisteh, otlajkuyukaya iwa otlatejtekuinia, iwa iyakapa non weyi yáyantli oxotlatokah chikome tláwilteh. Nonteh chikome tláwilteh, yejwah Iespíritus n Dios. ⁶ Noiwa iyakapa non weyi yáyantli okatka se weyi atl kemi teskatl.

Tlatlajkotia, iwa ik iyawalojka non weyi yáyantli, okatkah nawi non yolitokeh iwa ik inyapakah iwa ik inkuitlapa okimpiayah miakeh inmixtololowah. ⁷ Non otlapewaltijtoka omotaya kemi se lío; non ipan ome omotaya kemi se torojkonetl; non ipan eyi omotaya kemi se tlakatl; iwa non ipan nawi, omotaya kemi se águila non patlanti. ⁸ Nonteh nawi non yolitokeh okimpiayah chikwase inmajaswah, ik tlajitik iwa ik pánixko okimpiayah miakeh inmixtololowah. Iwa nochi tonati tlajka iwa n yuak okijtoayah:

¡Santo, Santo, Santísimo,

Toteko Dios non semi weletini,

Akin okatka, Akin kajki iwa Akin wits!

⁹ Iwa ijkuak nonteh non yolitokeh kiweyiliah, kimawistiliah iwa motlasojkamatih inawak, Akin ewatok ipan non weyi yáyantli iwa nochipa yolitok. ¹⁰ N sempóali iwa n nawi tetajtsitsinteh motlankuaketsaskeh iyakapa, kiweyiliskah Akin nochipa yolitok semijjak, iwa kintlaliskah inkoronajwah ikxitla n weyi yáyantli, iwa kijtoskeh:

¹¹ Toteko Dios, sanwel Tejwatsi moaxka n

weyílistli, mawistílistli iwa n weletílistli.

Porke Tejwatsi otikchijchi nochi tlan onka,
iwa tejwatsi otikmonekilti mayetokah, yika otikinchi.

5

Juan okitak n amatlajkufloli iwa n Ichkatsi

¹ Ijkuakó, akin oewatoka ipan weyi yáyantli, onikitili itech ima se amatlajkufloli non omemelitoka iwa oijkuilitoka ik tljistik iwa ik pánixko, iwa oyekpepechitoka ika chikome seyojteh. ² Iwa onikitak se ángel weletini non okijtoaya ika chikawak tlájtoli:

—¿Akin okachi yolchipawak makitlapo n amatlajkufloli iwa makintsomoni n seyojteh?

³ Pero nion itech ilwikak nion ipan tlaltípkaktli nion itlampa tlali, omoajsia se non weletiskia kitlapos nion aka omixewiaya kontlajtlatas n amatlajkufloli. ⁴ Iwa ne satlawel nonichokaya, porke amo omoajsia nion se yolchipawak akin weletiskia kitlapos non amatlajkufloli iwa kiamapoa. ⁵ Ijkuakó seme de nonteh tetajtsitsinteh onechili:

—Ayakmó xichoka, n lío non iwejkaixwi n Judá iwa n rey David, yotlátlanki iwa Ye weletis kitlapos non amatlajkufloli iwa kintsomonis n chikome seyojteh.

⁶ Ijkuakó, tlatlajkotia kan kajki n weyi yáyantli, intlajkotiah n nawi non yolitokeh iwa intlajkotiaj n sempóali iwa n nawi tetajtsitsinteh. Onikitak omoketoka se Ichkatsi non omotaya kemi sikin okimiktijkeh. Okimpiaya chikome ikuakuanwah iwa chikome ixtololowah; nonteh ixtololomeh kijtosnekih n chikome espiritus de Dios non Ye okwal-intítlanki ipan nochi n tlaltípkaktli. ⁷ N Ichkatsi omijkuani inawak Dios Akin oewatoka kan iyayan iwa okónanki n amatlajkufloli non okipixtoka itech imayekma. ⁸ Ijkuak okónanki n amatlajkufloli, nonteh nawi non yolitokeh, iwa n sempóali iwa n nawi (24) tetajtsitsinteh owetskeh iyakapa n Ichkatsi. Nochteh okipixtokah sejsen arpa iwa okikitskijtiayah sejsen kopalkaxitl non okinchijchijkeh de oro iwa otentokah ika kópali. Non kópali okatka intiotsajtsilis de akimeh iaxkawah Dios. ⁹ Iwa okitlakuikiliayah nin yankuik tlakufkali:

Sanwel Tejwatsi tiweletis tikonanas n amatlajkufloli iwa tikintsomonilis iseyojwah;
ken omitsmiktijkeh, iwa ika moesso otechko para matiyetokah iaxkawah Dios,
itech nochteh n tlaltípkaktlakah,
itech nochteh akimeh kipiah ok se intlajtol,
itech nochteh n altepemeh iwa oksikimeh wejweyi tlalmeh.

¹⁰ Otechtlali tireyes iwa titiopixkeh inawak Dios,
iwa titlanawatijtoskeh ipan nochi n tlaltípkaktli.

¹¹ Otlanki onontláchixki, iwa onikinmitak miakeh ángelteh okiyawalojtokah n weyi yáyantli, noiwa ompa okatkah n tetajtsitsinteh iwa non nawi non yolitokeh, iwa nochteh otlajtojtokah. Satlawel miakeh miyomah ompa okatkah, ¹² iwa chikaktik okijtoayah:

¡N Ichkatsi non okimiktijkeh
sanwel Ye mayeto weletini,
iwa nochi mayeto iaxka,
noiwa maixtlamati iwa
mayeto chikawak,
noiwa makitlakitakah, iwa
makiweyilikah iwa
kuali makiyekteneuwakah!

¹³ Noiwa nochi tlan Dios okichijchi, tlan kajki itech ilwikak, ixko tlali, itlampa tlali iwa itech weyi atl, iwa nochi tlan intech onka, onikak okijtoayah:

¡Akin ewatok itech n weyi yáyantli iwa n Ichkatsi,
matiktakuikilikah,
matiktlakitakah,
matikweyijkachiwahak,
iwa nochipa makipia weletílistli,
axa, iwa nochipa!

¹⁴ Iwa non nawi, non yolitokeh, okijtoayah:

—¡Jkó mamochiwa!

Iwa n sempóali iwa n nawi tetajtsintsinteh omotlankuaketsayah iwa okiweyiliayah.

6

N chikome seyojteh

¹ Onikatak kenomi n Ichkatsi okitsomoni seme de n chikome seyojteh, noiwa onikak seme de n nawi non yolitokeh, chikaktik otlajto kemi se tlatekuinlistli iwa okijto:

—¡Xiwiki!

² Onontláchixki iwa onikatak se kabayo istak, iwa akin ipa otlejktoka okikitskijtoka se arko. Okimakakeh se korona, iwa okistewak kemi se tlátlanki para okachi tlatlanis.

³ Ijkuak n Ichkatsi okitsomoni non ipan ome seyo, non ipan ome kemi yolkatl, onikak okijto:

—¡Xiwiki!

⁴ Iwa okiski ok se kabayo chichiltik, akin ipa otlejktotiaya okiseli se espada iwa weletlistli para kintoktis san yejwah innewiah mamotekilmakakah iwa mamokechtsojtsontekikah n tlaltikpaktlakah.

⁵ Ijkuak n Ichkatsi okitsomoni non ipan eyi seyo, non ipan eyi kemi yolkatl onikak okijto:

—¡Xiwiki!

Oniontláchixki, iwa onikatak se kabayo tliliwik, iwa akin ipa otlejktotiaya okipixtoka se balansa itech ima. ⁶ Iwa intlajkotiah nonteh nawi non yolitokeh, onikak se tlájtoli non okijtoayah:

—Se kilo trigo noso eyi kilo sebada ipati tlan se tlakéwali kitlani itech se tonati. Pero amo san xikawilti n aseite iwa n vino.

⁷ Ijkuak n Ichkatsi okitsomoni non ipan nawi seyo, non nawi kemi yolkatl onikak okijto:

—¡Xiwiki!

⁸ Oniontláchixki iwa onikatak se kabayo kostik, iwa akin ipa otlejktotiaya omonotsaya Mikílistli, iwa n Miktla okualtokaya. Iwa akin otlejktotiaya ipan non kabayo okimakakeh weletlistli para makinmijmiksi ika espada, ika apisotl, ika kokólisteh iwa ika yolkameh tekuanimeh, se kuarto de akimeh nemi ipan nin tlaltípkaktli.

⁹ Ijkuak n Ichkatsi okitsomoni non ipan mákuili seyo, itlampa n artal onikatak inmal-majwah akimeh okinkechtsontekeh por okitlakitakeh itlajtol Dios. ¹⁰ Yejwah chikaktik otsajtsiah:

—Toteko Dios Yolchipawak Tejwatsi Akin nochipa tikchiwa tlan tikijtoa, ¿asta kermania tikintlajjowiltis iwa tikintlaxtlawaltis akimeh otechmiktijkeh ipan nin tlaltípkaktli?

¹¹ Ijkuakó okinmajmakakeh intlakeh istak, iwa okimilijkeh mamosewikah ok kechmeh tonatijmeh, asta mamoaixitakah inmikniwah akimeh noiwa kitekitiliah Cristo, akimeh ok opoliwah kinmiktiskeh kemi yejwah.

¹² Ijkuak n Ichkatsi okitsomoni n chikwase n seyo, oniontláchixki, iwa chikawak otlalólinki. N tonati otilewik kemi se tlakemitl tliliwik, n metsi ochichilewik kemi estli, ¹³ iwa n sítlalteh owewetsikoh ixko tlali, kemi ijkuak n ejekatl kiwiwixoa se igoskuawitl iwa kitepewilia nochi itlakilo non ok xoxobik. ¹⁴ N ilwikak san owalpoliwik kemi ijkuak moololoa se amatl, iwa nochteh n tepemeh iwa n tlalmeh non pankistokeh itlajko n weyi atl omijkuanijkeh de kan okatkah.

¹⁵ Iwa n reyes non tlanawatijtokeh itech nin tlaltípkaktli, sansikah iwa n wejweyi teachkameh, noiwa non tominyoykeh, n kapitameh, n tekiwajkeh, nochteh n tlakah akimeh tenawak tekith iwa akimeh inselti monawatiah, nochteh oyajkeh omotlajtlaatitoh tepeyo kan kúyokteh iwa intsalko n wejweyijtikeh temeh. ¹⁶ Iwa okimiliayah n tepemeh iwa n temeh non wejweyijtikeh:

—¡Topa xiwetsikah, iwa techpachokah para amo matechita neká Akin ewatok ipan weyi yáyantli, iwa amo matechkualankaita n Ichkatsi, ¹⁷ porke yoajsiko n tonati iwa techtlajjowiltiskeh! ¡Amaka weletis kixikos inkualanilis!

Kinmixkuamachotiah n 144,000

¹ Satepa, onikinmitak nawi ángeltech non omojeketokah itech n nawi itlatenyowah n tlaltíkpaktli, okitsakuilijtokah n ejekatli non ik ompa owalaya, para amo matlaxojpitsa ixko tlali, nion itech weyi atl, nion kan tlakuaujyo. ² Noiwa onikitak ok se ángel non owalaya kan ik kisa tonati, iwa okualikaya non ika Dios tlaixmachotiskia. Nin ángel, chikaktik okintsajtsili n nawi ángeltech non okiselijkeh weletflistli para makikojkokah n tlaltíkpaktli iwa nochi tlan onka itech weyi atl.

³ Iwa okinmili:

—¡Amaka xikkojkokah nion n tlaltíkpaktli, nion tlan onka itech weyi atl, nion n wejweyi kuaujme, asta matitlamikah matikinmixkuaneskayotikah itekitwah Dios!

⁴ Iwa onikak okintenejkeh 144,000 non okinmixkuaneskayotijkeh, nochteh non walewatokeh de Israel. ⁵ Okinmixneskayotijkeh

12,000 iwejkaixwiwah n Judá;

12,000 iwejkaixwiwah n Rubén;

12,000 iwejkaixwiwah n Gad;

⁶ 12,000 iwejkaixwiwah n Aser;

12,000 iwejkaixwiwah n Neftalí;

12,000 iwejkaixwiwah n Manasés.

⁷ 12,000 iwejkaixwiwah n Simeón;

12,000 iwejkaixwiwah n Leví;

12,000 iwejkaixwiwah n Isacar;

⁸ 12,000 iwejkaixwiwah n Zabulón;

12,000 iwejkaixwiwah n José iwa

12,000 iwejkaixwiwah n Benjamín.

Senmiaktikeh otlakentitokah ika intlakeh istak

⁹ Ijkuak yotlanki onikitak nochi ni, onikinmitak senmiaktikeh tlaltíkpaktlakah non ayak-maka oweletia okimpoaya, omoketokah iyakapa n weyi yáyantli iwa iyakapa n Ichkatsi. Yejwah otlakentitokah ika intlakeh istak, iwa itech inmawah okipixtokah siki soyatl; yejwah owalajkeh ik nochteh talmeh itech nin tlaltíkpaktli, de nochi familiajtech, iwa de nochi altepemeh non tlatlamantli otlachixtokah iwa tlatlamantli intlajtol okipiayah.

¹⁰ Nochteh otsajtsiah chikawak:

¡Totemakixtilis wits de Todios

iwa n Ichkatsi,

Akin ewatok ipan weyi yáyantli!

¹¹ Iwa n weyi yáyantli iwa n tetajtsitsinteh iwa non nawi non yolitokeh, okatkah tlatlajkotiah, iwa nochteh n ángeltech okinyawalojtokah. Ijkuakó nochteh n ángeltech owalmoixtlapachojkeh iyakapa n weyi yáyantli. Okiwelijkeh Dios ¹² iwa okijtoayah:

¡Jkó mamochiwa!

Matikyektenewakah, matikweyilikah,

iwa matikmatikah Ye ixtlamati

iwa matimotlasojkamatikah inawak,

iwa sanwel Ye kipia weletflistli iwa chikawálistli.

Yika, matiktlakitakah Todios axa iwa nochipa.

¡Jkó mamochiwa!

¹³ Ijkuakó seme de n tetajtsitsinteh onechtlajtlani:

—¿Akimeh ninteh non tlakentitokeh ika intlakeh istak, iwa kan walewatokeh?

¹⁴ Ne oniknankili:

—Teta, tejwatsi tikmatok.

Iwa Ye onechili:

—Nika kateh akimeh yopanokeh itech n weyi tlajjyowílistli, yejwah yokimpakeh intlakenwah iwa okinmistayaltijkeh ika iesso n Ichkatsi. ¹⁵Yika, kateh iyakapa iweyi iyayan Dios, tlajka iwa n yuak kiweyiliah itech iweyitiopa; iwa akin ewatok ipan weyi yáyantli inwah yetos iwa kimpalewijtos. ¹⁶Mach ok apismikiskeh nion amikiskeh. N tonati ayakmó kintlatis nion kintonalmiktis ¹⁷porke n Ichkatsi, non kajki tlatlajkotiah kan weyi yáyantli, kinmokuitlawis kemi n tlájpixki kinmokuitlawia iichkawah, iwa kinwikas kan améyali non kichiwa se mayolito; iwa Dios kinwajwachilis inmixonochteh yejwah.

8

Non chikome seyo iwa n kopalkaxitl de oro

¹Ijkuak n Ichkatsi okitsomoni n chikome seyo, san owaltlamoka itech ilwikak kemi tlajko ora. ²Otlanki onikimitak n chikome ángelteh non nochipa kateh iyakapan Dios, iwa okinmajmakakeh sejsen tlapítsali. ³Satepa ok se ángel owala omoketsako iyakapa n artal de oro non kajki iyakapa n weyi yáyantli iwa okualikaya se kopalkaxitl de oro. Nin ángel okimakakeh miak kópali para ika matlapopochwi ipan artal sansikah ika intiotsajtsilis nochteh n yolchipawakeh. ⁴Iwa ipokyo n kópali non ika otetlaweyilijtoka n ángel, iwa intiotsajtsilis n yolchipawakeh, sansikah otlejkokeh iwa okalakitoh inawak Dios. ⁵Ijkuakó n ángel okónanki n kopalkaxitl, okitemiti ika tlekúyoli non okatka kan artal iwa okuaultlamotlak ipan tlaltípkaktli. San nima owaltlatejtekuinki chikawak, otlaijkuyukak, otlapejpétlanki iwa otlalólinki.

N chikome tlapítsalteh

⁶N chikome ángelteh non okimpixtokah n chikome tlapítsalteh omoyektlatlalijkeh para tlapítsaskeh.

⁷Non ipan se ángel okípitski itlapítsal, iwa san nima owalmokajka tesiwitl iwa tletl nelitiwits ika estli ipan tlaltípkaktli. Iwa se tercio de n tlaltípkaktli otlatlak. Nochi kuawitl iwa xiwitl xoxobik otlatlak.

⁸Non ipan ome ángel okípitski itlapítsal, iwa okikajkajkeh ijtik weyi atl, kemi se weyi tepetl xotlatiwits, iwa se tercio de n weyi atl omókopki estli.

⁹Iwa se tercio tlan oyolitoka itech weyi atl omikki, iwa se tercio n barkojteh non onemiah ixko atl okinxixititskeh.

¹⁰Non ipan eyi ángel okípitski itlapítsal, iwa se weyi sítlali xotlatiwits owalwetsiko ipan se tercio itech nochteh n rios iwa n améyalteh. ¹¹Non sítlali itoka Chichiktik. Yika se tercio itech nochteh n ameh non kateh ipan tlaltípkaktli ochichiyakeh, iwa miakeh omijmikeh porke okonikeh non atl.

¹²Non ipan nawi ángel okípitski itlapítsal, ijkuakó se tercio n tónati okualok, noiwa se tercio n metsi iwa n se tercio nochteh n sítlalteh oseejseujkeh. Yika, tlajka iwa n yuak mach ok oyektlawijkeh.

¹³Otlanki oniontláchixki, iwa onikitak se águila opatlantínia itlajko ilwikak, iwa chikawak okijtoaya:

—¡Miálmasteh akimeh nemih ipan tlaltípkaktli, porke ok poliwi kipítsaskeh intlapítsal non ok eyi ángelteh!

9

¹Non ipan mákuili ángel okípitski itlapítsal, iwa onikitak se sítlali non owetsiko ipan tlaltípkaktli. Iwa non sítlali okimakakeh n yabe non ika motlapoa non sentlawejkatlantik poso. ²Otlanki okitlapo n sentlawejkatlantik poso, iwa ijtik opé kisa miak poktli kemi ijkuak popoka se weyi orno. Iwa n poktli non itech okisaya, okipoktemiti n tonati iwa n ejekatl. ³Iwa ijtik non poktli okiskeh wejweyi chapulimeh non opatlantínia ipan tlaltípkaktli. Nonteh chapulimeh okinmakakeh weletílistli para matlatepinikah kemi yaskiah kolomeh. ⁴Nonteh kemi chapulimeh, okinnawatijkeh amo makikuajkuakah n xiwitl non onka ipan tlaltípkaktli, nion itla tlan selistok noso itla kuawitl, yej sanwel makintepinikah n tlaltípkaktlakah akimeh amo kipiah ixneskayo Dios itech inmixonochteh.

⁵Pero amo okinkawilijkeh makinmiktikah n tlakah, yej san makinkojkokah mákuili mestli; iwa ijkuak nonteh kemi chapulimeh otlatepiniayah, chikawak otekokoaya kemi ijkuak tlatepinia se kolotl. ⁶Itech nonteh tonatijmeh, n tlakah kinekiskeh momiktiskeh pero mach weletis mikiskeh. Iwa maya kinekiskiah mamikikah, n mikílistli kincholilis.

⁷Ninteh kemi chapulimeh okatkah kemi kabayojteh non kintekitiltiah kan momijmiktilo. Itech intsonteko okiwiwiyah kemi se korona de oro, iwa otlachixtokah kemi yaskiah tlakah. ⁸Intsonkal okatka weweyaktik kemi itsonkal se siwatl, iwa intlanwah kemi se lío. ⁹Iwa innakayo okemelitoka ika se tlakuaktik ewayotl kemi yaskia tépostli. Iwa innajaswah chikawak oijkuyukayah, kemi miakeh karretajteh non motlelojtiwih kan momijmiktilo. ¹⁰Okatkah kuitlapilejkeh kemi kolomeh iwa ika otlatepiniayah. Iwa itech inkuitlapil okipiayah weletílistli para kinkojkoskeh n tlakah mákuili mestli. ¹¹Ninteh kemi chapulimeh okinnawatijtoka n ángel non owalewatoka kan sentlawejkatlantik. Non ángel itech tlájtoli hebreo itoka Abadón, iwa itech tlájtoli griego itoka Apolión, non kijtosneki: Teixpolo.

¹²Iwa opanok nin tlaijyowílistli non otlapewaltijtoka. Pero ok ome sikin witseh.

¹³Non ipan chikwase ángel okípitski itlapitsal, iwa onikak se tlájtoli non okisaya intsalko nonteh nawi kuakuameh non okimpiaya n artal de oro non okatka iyakapan Dios. ¹⁴Nin tlájtoli okili n chikwase ángel non okipixtoka itlapitsal:

—Xikinkajkawa n nawi ángelteh non ilpitokeh inakastla n weyi río Éufrates.

¹⁵Ijkuakó okinkajkajkeh nonteh nawi ángelteh, porke yowejka okintlalijkah para ijkuak ajsiskia non ora, non tonati, non mestli iwa non xiwitl para kinmijmiktiskeh se tercio de nochteh n tlaltikpaktlakah. ¹⁶Iwa onikak okintenejkeh ome sientio miyomeh soldadojteh non omotleloayah ipan kabayo.

¹⁷Ijkó onikinmitak n kabayojteh itech tlan onechmonextili. Iwa non impah otlejko-tiayah oelpantlakentitokah ika se tépostli patlawak kemi tletl, safiro iwa asufre. Iwa inkabayojwah okipiayah intsonteko kemi liomeh, iwa itech inkamak okikisaya tletl, poktli iwa asufre. ¹⁸Iwa se tercio nochteh n tlaltikpaktlakah omijmikeh ika ninteh eyi kokólisteh non okisayah itech inkamak n kabayojteh ika tletl, poktli iwa asufre. ¹⁹Inweletilis nonteh kabayojteh okatka itech inkamak iwa itech inkuitlapil; porke inkuitlapil okatka kemi se koatl non okipiaya itsonteko, iwa ika otekuayah.

²⁰Pero n oksikimeh tlaltikpaktlakah non amo omijmikeh ika ninteh eyi kokólisteh, amo okikajkeh n tlajtlákoli non okichijtinemia; yej okiwilitakeh kinweyilijtinemiskeh n demóniojteh iwa n diosmeh non kinmachijchiwah ika oro, plata, bronse, tetl iwa kuawitl, ninteh amo tlachiah, nion tlakakih, nion weletih nejnemih. ²¹Iwa amo okikajkeh temiktiskeh, tetlajchiwiskeh, momekatijtinemiskeh iwa tlachtekiskeh.

10

N ángel non okipixtoka n librojtsi

¹Ijkuakó onikitak ok se ángel weletini non otemotiwalaya de ilwikak iwa okientijti-walaya se mextli, iwa ipan itsonteko okiyawaloaya se kosamalotl. Ixko otsotlandia kemi n tonati, iwa ikxiwah omotayah kemi ome tlakétsali de tletl. ²Itech ima okipixtoka se amatlajkuífoli tlapotok, iwa ika iyekmaikxi otlaksak itech weyi atl, iwa ika iopochmaikxi otlaksak itech tlali. ³Otlanki chikawak owaltsajtsik kemi se lío, iwa omokakeh chikome tlatekuinílisteh non okinankilijkeh. ⁴Ijkuak nonteh chikome tlatekuinílisteh otlanankilij-keh, ne yonia nijkijkuiloti tlan okijtojkeh. San nima onikak se tlájtoli kan ilwikak non onechiliaya:

—Xiktlaati tlan okijtojkeh n chikome tlatekuinílisteh, iwa amo xikijkuilo.

⁵Ijkuakó n ángel non onikitak moketok ipan weyi atl iwa n tlali, okajkok imayekma ik ilwikak ⁶iwa okimilajkaijto ixpa n Dios Akin nochipa yolitok, Akin okichijchi n ilwikak, n tlaltikpaktli, n weyi atl iwa nochi tlan onka intech, iwa okijto:

—Ayakmó wejkawas n tonati, ⁷ porke ijkuakajsiki n tonati non ipan chikome ángel kipitsas itlapitsal, ijkuakó panos nochi tlan ayamó okimatiah n tlaltikpaktlakah, ijko kemi Dios ya wejkawitl okinmatiltih ika n tiotlajtojkeh.

⁸ N tlájtoli non onechalnotska kan ilwikak oksepa onechtlapowi iwa onechili:

—Xio inawak n ángel non moke tok ipan weyi atl iwa ixko tlali, iwa xikonana n amatlajkufloli tlapotok non kipixtok itech ima.

⁹ Onia kan omoketoka n ángel iwa oniktlatlanili manechmaka n amatlajkufloli iwa Ye onechili:

—Xikonana iwa xikuajtiwetsi. Itech mokamak tikmachilis tsopelik kemi n nékuitli, pero mijtik, chichiyas.

¹⁰ Ijkuakó onikkitski n amatlajkufloli itech ima n ángel iwa onikuajtiwetski; itech nokamak otsopeliak kemi nékuitli, pero ochichiyak ijtik notlax. ¹¹ Satepa onechilijkeh:

—Oksepa moneki xitetlapowi tlan satepa mochiwaskeh n tlaltikpaktlakah, n tlalmeh, iwa non kipiah oksikimeh intlajtol iwa n reyes.

11

Ome akimeh milák nochi okitakeh

¹ Onechmakakeh se oatl kemi se tlakotl non ika se tlatamachiwa, iwa onechilijkeh:

—Ximoketsa iwa xiktamachiwa n Weyi Tiopa de Dios iwa n artal, iwa xikimpoa kechmeh non ompa kiweyiliah. ² Amo xiktamachiwa n atrio non kajki ik ikaltempanyo n Weyi Tiopa de Dios, ken yokinmaktlijkeh non amo judójtch, iwa yejwah kitlajtlaksaskeh n chipawak altepetl ome póali iwa ome (42) mestli. ³ Ne nikintitlanis ome profetas. Yejwah tlakentitiaskeh ika intlakeh wapawak, para matetlapowikah de notlajtol se mil iwa ome sientio iwa n eyi póali (1,260) tonatijmeh.

⁴ Ninteh ome profetas yejwah n ome olivos noiwa n ome kandelerojtch non moke tokeh iyakapan Totajtsi Dios Akin tlanawatijtok ipan nin tlaltikpaktli. ⁵ Tla aka kineki kinkojkos ninteh ome profetas, yejwah kixixtiah tle tl itech inkamak, iwa kinmiktiskesh akimeh kinkoliah. ⁶ Yejwah noiwa kipiah weletflistli ken kitsakuaskeh n ilwikak, iwa ijko amo makiawi itech nonteh tonatijmeh ijkuak tetlapowijtinemiskesh itlajtol Dios. Noiwa kipiah weletflistli kenomi n atl kikopaskeh estli, iwa kenomi kitlajiyowiltiskesh n tlaltikpaktli ika miak kokólisteh, san kech welta kinekiskesh. ⁷ Iwa keman yotlankeh okitematiltijkeh itlajtol Dios, n yolkatl temojti non walkisas ijtik poso sentlawejkatlantik, motekilmakas inwah, kintlanis iwa kinmiktis. ⁸ Inkuerpojwah wilantoskeh itlajko n sókalo kan altepetl de Jerusalén kan Toteko Cristo Jesús okikrusifikarojkeh, kan noiwa kitokayotiah Sodoma noso Egipto. ⁹ N tlakah itech nochteh n altepemeh, non amo san se intlachialis okipixtokah, noiwa non amo san se intlajtol oki piaya itech nochteh n tlalmeh, eyi tónati iwa n tlajko konimitoskeh ompa wilantoskeh inkuerpojwah iwa amo kitekawiliskesh makintlalpachokah. ¹⁰ Iwa akimeh chantitokeh ipan tlaltikpaktli, pakmiskesh iwa miak mopajpaktiskesh ijkuak kimatiskesh yomikkeh, asta kinmomamakaskeh tlatliokóiltch, porke nonteh ome iprofetajwah Dios, satlawel okintlajiyowiltiyah. ¹¹ Satepa ijkuak yopanokeh eyi tonatijmeh iwa n tlajko, Dios okinyoliti iwa oksepa omokeketskeh, iwa nochteh non okimitakeh, satlawel omomojtijkeh. ¹² San nima nonteh ome tlajtol tlatematiltijkeh okikakeh kan ilwikak se tlájtoli chikawak non okimiliaya:

—¡Xiwaltejkokah nika tlakpak!

Iwa owaltlejkokeh ilwikak ijtik se mextli, iwa nochteh akimeh okinkokoliayah okimitakeh tlejkotiwih. ¹³ Ijkuakó owaltlalólinki chikaktik, iwa n májtlaktli itech se sientio de nochteh n kalmeh owejwetskeh, iwa chikome mil tlakah de nin tlali omijmikeh. Iwa nochteh non amo omijmikeh satlawel omomojtijkeh, iwa opé kiweyiliah Dios non kajki ilwikak.

¹⁴ Non ipan ome tlajiyowiltli yopanok, iwa san nima ompa wits non eyi.

Non ipan chikome tlapítsali

¹⁵ Non chikome ángel okípitski itlapitsal, ijkuakó owalmokakeh sikimeh tlájtoltel kan ilwikak, non okijtoayah chikawak:

Axa nochteh n altepetlakameh non okinnawatijtokah n tekiwajkeh,
yopanokeh imak Toteko Dios iwa Cristo Jesús;
iwa Ye Akin tlanawatijtos axa iwa nochipa.

¹⁶ Ijkuakó n sempóali iwa n nawi (24) tetajtsitsinteh non oyayantitokah iyakapa n Dios, omoixtlapachojkeh iwa okiweyijkachijkeh Dios. ¹⁷ Iwa okijtojkeh:

Timotlasojkamatih monawak Toteko,

Todios weletini,

tejwatsi Akin axa timuistika,

yotimuistikatka iwa tiwalmuikas,

ken yotikonanki weyi moweletilis

iwa yopé titlanawatia.

¹⁸ Nochteh n tlaltikpaktlakah okualankeh.

Iwa yoajsiko n tonati ijkuak pewas titetlajjowiltis,

noiwa n tonati ijkuak Tejwatsi tikintlajtlakolmakas non yomikkeh.

Tikintlaxtlawis motekitwah n profetas non okitetlapowijkeh motlajtol.

Nochteh akimeh Tejwatsi moaxkawah iwa kiweyiliah Motoka,

tsitsikitikeh iwa wejweyi,

yoajsiko n tonati ijkuak tikimpojpolos akimeh kijtlakoah n tlaltikpaktli.

¹⁹ Ijkuakó iweyi Tiopa Dios non kajki kan ilwikak, owalmotlapo, iwa ompa okatka n kaxa non ijtik okimpixtoka n májtlakteh itlanawatilwah. Iwa opé tlapejpetlani, tlajikuyuka, tlatejtekuini, tlalolini iwa chikaktik opé tesiwi.

12

N siwatl iwa n dragón

¹ Ijkuakó owalmonexti se weyi neskayotl kan ilwikak: onikitak se siwatl okimokentijtoka n tonati, n metsi okatka ikxitla, iwa ipan itsonteko okipixtoka se korona non okimpiaya májtlaktli iwa ome sítlalteh. ² Nin siwatl yokatka kócoxki de konetl, iwa otsajtsia ken ya tlakatsiskia ikone. ³ Otlanki itech ilwikak owalmonexti ok se neskayotl: onikitak se weyi dragón chichiltik non okimpiaya chikome itsontekonwah, májtlaktli ikuakuanwah iwa sejsen korona ipan itsontekonwah. ⁴ Ika ikuitlapil okinmixtlánki se tercio de nochteh n sítlalteh non kateh ilwikak iwa okualintepe ipan tlaltikpaktli. Nin dragón omoketsato iyakapa n siwatl iwa kikualis ikone san nima ijkuak tlakatsiskia.

⁵ N siwatl okípixki se ikone chokotsi akin kinnawatijtos nochteh n tlaltikpaktlakah ika chikaktik tlanawátili. Iwa san nima okikixtilijkeh ikone iwa okiwikakeh inawak Dios kan yayantitok. ⁶ Iwa n siwatl omotlaatito kan amaka chanti, kan Dios okitlamajmanijka para ompa makitlakualtijtokah se mil iwa ome siento iwa n eyi póali (1260) tonatijmeh. ⁷ Satepa omotekilmakalok itech ilwikak. N ángel Miguel iwa iangelwah omotekilmakakeh iwa n dragón. Iwa iangelwah n dragón omotekilmakakeh iwa iangelwah n ángel Miguel. ⁸ Pero n dragón iwa iangelwah otlapolojkeh iwa ayakmó okinkawilijkeh mamokawakah ilwikak. ⁹ Ijkó okiwalkixtijkeh n weyi dragón, n koatl non yowejka kajki, non noiwa itoka diablo iwa satanás, ye akin kinkajkawah nochteh n tlaltikpaktlakah. Ye iwa iangelwah okualintlamoatlakeh ipan nin tlaltikpaktli.

¹⁰ Ijkuakó onikak kan ilwikak se tlájtoli chikawak non okijtoaya:

—Yoajsiko n tonati ijkuak nochteh iaxkawah Dios kinmakixtiskeh, yoneski iweletilis n Totajtsi Dios iwa yopé tlanawatia. Iwa n Cristo noiwa yokiseli tlanawátili; ken yokiwalkixtijkeh akin tlajka iwa yuak okinteliaya tokniwah inawak Totajtsi Dios. ¹¹ N tokniwah yokitlanilijkeh n diablo ika iesso n Ichkatsi iwa ika itlajtol Cristo. Iwa yejwah

amo omaujkeh mikiskeh, wej okimosenmakakeh otetlapowijтиненkeh maya makinmik-tikah. ¹²Yika, jmayeto miak pakilistli ilwikak, iwa xiyolpakikah nomejwah akimeh ompa nonchantitokeh! Pero jmiálmasteh akimeh chantitokeh ipan tlaltikpaktli iwa itech weyi atl! N diablo yotemok kan nomejwah iwa kualankamiki, ken kimatok mach ok wejkawitl nentinemis.

¹³Keman n dragón okitak yokualtlamotlakeh ipan tlaltikpaktli, opé kitotojtokatinemi n siwatl non okípixki ikone. ¹⁴Pero n siwatl okimakakeh ome wejweyi ijaswah kemi se águila ijkó maweleti makicholili n dragón wejka kan tlaltejtéyinki, kan yokitlamaj-manilijkah, ompa kan kitlakualtijtoskiah eyi xiwitl iwa n tlajko. ¹⁵N dragón okitlakopki miak atl iwa non atl omókopki kemi se aweyatl iwa makiwika n siwatl. ¹⁶N tlali okitlapo ikamak iwa okitolo n atl non okitlakopki n dragón, ijkó okipalewi n siwatl. ¹⁷Yika n dragón okachi okualankamik iwan siwatl, iwa oyajki omotekilmakato iwa n oksikimeh ipilwah n siwatl, akimeh kichiwh tlan Dios tlanawatia iwa kineltokah tlan milák, tlan Cristo Jesús okinmächti.

¹⁸N dragón omoketsato ipan xali itempa n weyi atl.

13

N ome yolcameh temojtjkeh

¹Iwa onikitak opankiski ijtik atl se weyi yolkatl temojti non okimpiaya chikome itsontekonwah iwa májtlaktli ikuakuanwah. Intech ikuakuanwah okipiaya seje n korona, iwa seje itsontekonwah omachotitoka se tlájtoli fierotik non ika okiwikaltiaya Dios. ²Nin yolkatl non onikitak, omotaya kemi se weyi yolkatl temojti. Okimpiaya ikxiwah kemi se oso, iwa ikamak kemi se lío. Iwa n dragón okimák iweletilis, iyayan iwa weyi itekiwayjo. ³Seme de itsontekonwah non yolkatl omotaya kemi satlawel okikojkolijkah iwa ya mikiskia, pero san nima owalpjatik kan okikojkojkah. Iwa nochteh n tlaltikpaktlakah omotlajtlachialtijkeh iwa opé kitlakitah non weyi yolkatl. ⁴Iwa okiweyilijkeh n dragón porke ye akin okimák itlanawatil n yolkatl temojti, iwa okiweyilijkeh noiwa nin yolkatl temojti. Okijtojkeh:

—¿Akin ok se kemi nin yolkatl temojti, iwa akin weletis motekilmakas iwan ye?

⁵Nin yolkatl noiwa okikawilijkeh matlajtolpano iwa matlajto fiero de Dios, noiwa okikawilijkeh matlanawatijto ome póali iwa ome mestli. ⁶Iwa nin yolkatl temojti, ijkó okichi, owalmokamatlapo iwa opé fiero kitenewa Dios iwa Itoka, iwa de ıweyi Tiopa iwa de nochteh akimeh kateh ilwikak. ⁷Noiwa okikawilijkeh mamotekilmakakah iwa n tokniwah yolchipawakeh asta makintlani. Satepa okitlalijkeh makinnewati nochteh n tlaltikpaktlakah de nochteh n altepemeh, non okiapiyah oksikimeh intlajtol, iwa nochi n tlaltikpaktli. ⁸Nochteh akimeh intokah amo oijkuilitoka itech iamatlajkuilol n Ichkatsi non okimiktijkeh desde ikuak omochi n tlaltikpaktli, okiweyilijkeh non yolkatl temojti. Yejwah akimeh intokah amo machotitok kan nestokeh akimeh yolitoskeh nochipa.

⁹¡Tla aka kineki kajsikamatis, kuali makikaki!

¹⁰Akin moneki motsakuas, kitsakuaskeh. Iwa tla moneki makimiktikah ika tépostli, noiwa kimiktiskeh. Yika, akimeh iaxkawah Dios, moneki makixikokah nochi tlaijowilistli iwa san matlaneltokakah.

¹¹Satepa, onikitak ok se weyi yolkatl temojti, non owalpankisako ixko tlali. Nin yolkatl okimpiaya ome ikuakuanwah kemi ikuakuanwah se ichka, pero otlajtoaya kemi se dragón. ¹²Iwa chikawak otlawatia, kemi otlawatia n yolkatl temojti, iwa chikawak otlawatia ikuak okitekiliaya n yolkatl temojti. Nin yolkatl, okintokti nochteh n tlaltikpaktlakah makiweyilikah non yolkatl temojti, non san nima opajtik kan okikuakojkojkah. ¹³Noiwa okinchiwaya wejweyi milagros, asta okichiwaya mawetsiki tletl de kan ilwikak itech tlali inmixpah nochteh n tlakah. ¹⁴Iwa ika nochteh ninteh milagros non okikawilijkeh makinchiwaya ixpa n yolkatl temojti, ika noni okinkajkaya n tlaltikpaktlakah iwa okinnawati makichijchiwahak ika tetl se estatua non matlachixto kemi neká yolkatl temojti non okikuakojkojkah iwa amo omikki. ¹⁵Iwa non ipan ome yolkatl non omotaya

kemi se ichka, okimakakeh weletlistli para makiyoliti iestatua n yolkatl temojti, para maweleti matlajto iwa makinmijmikti nochteh akimeh amo kiweyiliskeh. ¹⁶Nin yolkatl noiwa okintokti nochteh n tlakah, tsitsikitikeh iwa wejweyih, próbesteh iwa akimeh kitlawelpiah tomi, akimeh tenawak tekutih, iwa akimeh inselti monawatiah, nochteh makinmixneskayotikah. ¹⁷Iwa amaka weletis tlakoas noso tlanemakas, sanwel akin ipan ixkuak noso itech ima ixmachotitos ika itoka noso ika inúmero non yolkatl. ¹⁸Nika moneki se non ixtlamati. Akin milák ixtlamati, makiyejyekoli inúmero n yolkatl temojti, porke non número iaxka se tlakatl. Iwa non número ye chikwase n siento iwa n eyi póali iwa n chikwase (666).

14

Intlakuikal n 144,000 judíojtēh

¹ Satepa onontláchixki iwa onikitak n Ichkatsi omoketoka ipan Siontepetl. Ompa iwa okatkah se siento iwa ome póali iwa n nawi mil (144,000) tlakah non okipixtokah ijkuilítok Itoka n Ichkatsi iwa Itoka Itajtsi kan inmixkuak. ² Onikak se tlájtoli kan ilwikak kemi ijkuak ijkuayuka miak atl noso ijkuak chikawak tlatejtekuini. Omokakia kemi miakeh tlatsonkeh kintsontoskiah inmarpajwah. ³ Iwa okitlakuikatokah se yankuik tlatlakuikali iyakapa n weyi yáyantli, inyapah n nawi non yolitokeh iwa inyapah n tetajtsinteh. Amaka oweletia okajsia non tlatlakuikali, sanwel non se siento iwa ome póali iwa n nawi mil tlakah (144,000) non okintlaxtlawilijkeh intlajtlakolwah itech nochteh n tlatlaktlaklah. ⁴ Ninteh akimeh omomalwijkeh iwa amo omonamiktijkeh, yawih iwan Ichkatsi san kan ik Ye yawi. Yejwah non okinkojkeh itech nochteh n tlatlaktlaklah para mayetokah non achto tlamana inawak Dios iwa n Ichkatsi. ⁵ Amo ayik okijtojkeh itla tlan amo milák, iwa nion se tlatlálakoli kipiah.

Tlan okijtojtinemia n eyi ángelteh

⁶ Ijkuakó onikitak ok se ángel opatlantinemia itlajko ilwikak. Non ángel okiwikaya n kualitlájtoli de Dios non techmakixtia. Oyaya kinmatiliti nochteh akimeh chantitokah ipan tlatlaktlakli, itech nochteh paismeh, innawak nochteh non tlatlamantli tlachixtokeh, innawak nochteh akimeh tlatlamantli tlajtoah, iwa itech nochteh n altepemeh, ⁷ Iwa chikaktik okijtoaya:

—Xitlakitakah Dios iwa xikweyilikah, porke yoajsiko n ora tetlajiyowiltis. Xikweyilikah Ye akin okichijchi n ilwikak iwa n tlatlaktlakli, n weyi atl iwa n améyalteh.

⁸ Ok se ángel onikitak okualtokaya, iwa okijto:

—Yowetski, yowetski n weyi Babilonia, ken okinwijwinti nochteh n tlatlaktlaklah, iwa ika ielewilis amokuali okinyoltlanki para matlajtlakolchiwakah.

⁹ Otlanki onikitak ok se ángel non ipan eyi, owala iwa chikaktik okijto:

—Tla aka kiweyilia n yolkatl temojti iwa iestatua noso kimokawilia makiixneskayotikah itech ixkuak noso ipan ima, ¹⁰ Dios satlawel kualankamikis iwa chikawak kitlajiyowiltis. Dios yokimájmanki se tlajiyowilistli ika tletl iwa ika asufre non xotlatok. Iwa iangelwah iwa n Ichkatsi kitaskah kenijki tlajiyowis. ¹¹ N poktli non kistos kan kintlajiyowiltijoskeh, ayik tlamis kisas. Iwa nochi tonati tlajka iwa yuak kintlajiyowiltijoskeh nekateh akimeh kiweyiliah non yolkatl noso iestatua, noso akimeh kimokawilia makimixkuamachotikah ika itoka. ¹² Yika, akimeh ya iaxkawah Dios iwa kichiwah nochi tlan Ye tlanawatia, iwa milák kineltokah n Jesús, moneki makixikokah nochi tlajiyowilistli, iwa ayik makilkawakah Dios iwa nochipa makineltokakah n Jesús.

¹³ Ijkuakó onikak se tlájtoli kan ilwikak, non onechaliliaya:

—Xikijkuilo tlan nimitilia: “Axa ik tlajakapa Dios kintiochiwas akimeh mikiskeh iwa okineltokakeh n Toteko Cristo Jesús.” —Milák, kijtoa n Espiritu—, yejwah mosewiskeh de intekih non satlawel okinsotlawaya. Iwa tlan kualit okichijkeh yas inwah kan ilwikak.

Motlaoolola ipan tlatlaktlakli

¹⁴ Otlanki onontláchixki, iwa onikitak se mexтли istak. Iwa ipan non mexтли oewatoka Akin omochi tlakatl. Ipan itsonteko okonakijtoka se korona de oro iwa okimakitsijtoka se

os satlawel tlateki. ¹⁵Iwa ijtik tiopa owálkiski ok se ángel non okitsajtsilijtiwalaya chikaktik non oewatoka ipan mexтли:

—¡Xikonana moos iwa xikoololo n tlakilo, ken yoajsiko n tonati para motekis, iwa yotlachikawak ipan nin tlaltípkaktli!

¹⁶Ijkuakó non oewatoka ipan mexтли okipanolti ios ixko n tlaltípkaktli, iwa okitek nochi itlakilo n tlaltípkaktli.

¹⁷Ijkuakó onikitak owálkiski ok se ángel ijtik n Weyi Tiopa non kajki ilwikak, noiwa okipixtoka se os non satlawel otlatekia. ¹⁸Iwa kan artal onikitak owálkiski ok se ángel non okinawatiaya n tletl, iwa onikak okualtsajtsili chikawak n ángel non okipixtoka ios non satlawel otlatekia, iwa okili:

—¡Xiktekilti moos, iwa xikintejteki n uvas non kateh ipan tlaltípkaktli, ken yoiksikeh!

¹⁹Iwa n ángel okipanolti ios ixko n tlaltípkaktli, iwa okitejteh nochi n uvas non okatka ipan nin tlaltípkaktli, iwa okintlali ijtik se tanke para ompa makimpatskakah. Noni kixnextia ikualanilis Dios non ika tetlajiyowiltiki. ²⁰N uvasteh okinwikakeh ikaltempa n altepetl iwa ompa okimpatskakeh. Iwa ijtik tanke kan okimpatskakeh, owálkiski miak estli non omajkok asta kan infreno n kabayojteh. Iwa non estli wejka omotlelo, kemi eyi siento kilómetro.

15

N chikome ángelteh iwa n chikome kokólisteh

¹Otlanki onikitak kan ilwikak ok se weyi iwa tetlajtlachialti neskeyotl: onikimitak chikome ángelteh non okwalinwikayah iksemi chikome kokólisteh, non ika otlajtlamia ikualanilis Dios.

²Noiwa onikitak kemi se weyi atl non otsotlantoka kemi teskatl nelitok ika tletl. Inakastla non weyi atl omoketokah akimeh Dios okinmák inmarpajwah; ninteh akimeh okitlanilijkeh n yolkatl iwa itlachijchiwal, iwa ayik omotlankuaketskeh nion okimokawilijkeh makimixmachotikah ika itlapoalis itoka n yolkatl. ³Iwa okitlakuikatokah itlakuikal n Moisés itékiki n Dios iwa itlakuikal n Ichkatsi, non ijki okijtoaya:

Saikpanoa weyi iwa kuajkualtsi nochi tlan otikchijchi,

Totajtsi Dios Akin nochi weleti tikchiwa,

nochi tlan tiktemachtia kuali iwa milák,

tejwatsi Tirey de nochteh n tlaltípkaktlakah.

⁴¿Akin amo mitsmawilis Toteko Dios?

¿Akin amo mitsweyilis?

Sanwel Tejwatsi tichipawak,

iwa nochteh n tlaltípkaktlakah witseh monawak iwa mitsweyiliskeh,

ken kuali yomotak nochi tlan tikchiwa, yekmilajka.

⁵Satapa ijkuak yopanok nochi ni, oniontláchixki kan ilwikak iwa onikitak kenomi owalmotlapo ichipawak Weyi Tiopa Dios, kan otlatitokah n temeh patlawakeh non intech oijkuiltitoka itlanawatil Dios. ⁶Ompa ijtik non chipawak iweyi Tiopa owalkiskeh chikome ángelteh non okualinwikayah n chikome kokólisteh. Otlakentitokah ika intlakenwah de lino chipaktik iwa tsotlantok, iwa oelpanilpitokah ika se sinta non okichijchijkeh ika oro.

⁷Ijkuakó seme de nonteh nawi non yolitokeh, okinmajmák nonteh chikome ángelteh sejsen kopa patlawak ika oro non otentokah ika ikualanilis Dios Akin nochipa yolitok. ⁸Iwa n Weyi Tiopa otenki ika poktli non okikisaya itech iweyilis iwa iweletilis Dios, iwa amaka oweletia okalakia ompa, asta ijkuak tlamiskiah panoskiah nonteh chikome kokólisteh non okualinwikakeh n chikome ángelteh.

16

N chikome kópajteh non otentokah ika ikualanilis Dios

¹Ijkuakó onikak se tlájtoli chikawak non omokakia owalaya kanik Weyi Tiopa, iwa okimiliaya n chikome ángelteh:

—Xiwiah xikinnokitih ipan tlaltíkpaktli nonteh chikome kópajteh patlawakeh non kiwikah ikualanilis Dios.

²N ángel non tlapewaltia oyá okinokito ikopa patlawak ipan tlaltíkpaktli, iwa nochteh n tlaltíkpaktlakah non oixmachotitokah ika ineskayo n yolkatl iwa okiweyiliayah itlachi-jchiwal n yolkatl, opé pankisah itech inkuerpo sikimeh sawameh non opatitokah iwa saikpanoa otekokoayah. ³Non ipan ome ángel okinoki ikopa patlawak ipan weyi atl, iwa nochi n atl omoéskopki kemi iesso ijkuak aka kimiktiah, iwa nochteh non yolitokeh iwa onemiah ijtik weyi atl, omijmikeh.

⁴Non ipan eyi ángel okinokito ikopa patlawak intech nochteh ríos iwa n améyalteh, iwa nochi n atl omoéskopki. ⁵Otlanki n ángel non kinawatia n atl, onikak okijto:

—Dios, Yolchipawak, Non yokatka, iwa kajki. Tiyekmilajka ken titetlajjowiltia kemi moneki. ⁶Mokokolikniwah okinmiktijkeh miakeh yolchipawakeh iwa profetajteh, iwa Tejwatsi yotikinmoniti estli, ¡porke yejwah okimotemolijkeh!

⁷Noiwa onikak se tlájtoli non owalaya de kan artal, iwa okijtoaya:

—¡Milák, Noteko Dios nochi weletini, kuali otitetlajjowilti, iwa nochi tlan tikchiwa, yekmilawak!

⁸Non ipan nawi ángel okinoki ikopa patlawak ipan tonati, iwa n tonati okiseli weletlistli para kintlatis n tlaltíkpaktlakah ika itleyo. ⁹Iwa nochteh n tlaltíkpaktlakah satlawel otonaltlatlakeh, iwa amo omoyolkopkeh nion okiweyijkachijkeh Dios, yej okachi fiero okitenejkeh neká Akin kipia weletlistli impah nonteh kokólisteh.

¹⁰Non ipan mákuili ángel okinoki ikopa patlawak kan ewatok n weyi yolkatl temojti, iwa nochi kan ye otlanawatiaya owaltlasejseujki. N tlakah omonenepitetexoayah ken ayakmó okixikoayah n kualólistli. ¹¹Maya otlajjowiyayah, amo okikajkeh tlan amokuali okichi-jtinemiah, yej okiwiwikaltiyah Dios tleka okintlajjowiltiayah ika chikawak kualólisteh iwa okinkawili masawatemikah.

¹²Non ipan chikwase ángel okinoki ikopa patlawak ipan weyi río Éufrates, para mawaki non awayatl iwa mamotlapo se ojtlí kan ik panoskeh n reyes non witseh kan ik kisa tonati.

¹³Ijkuakó, kan ikamak n dragón, iwa kan ikamak n weyi yolkatl temojti, iwa kan ikamak n profeta tekajkaya, onikimitak owalkiskeh eyi espíritus amokualteh non omotayah kemi sapomeh. ¹⁴Ninteh espíritus okatkah espíritus n demoníoijteh. Yejwah okinchiwayah wejweyi milagros, iwa okoninmoololoayah n wejweyi reyes non otlanawatijtokah ipan nin tlaltíkpaktli, para mamotekilmakakah iwa n Dios nochi weletini itech neká weyi tonati non Ye yokitlali. ¹⁵“Xikakikah, ne san niwalkisaki kemi se ichtek. Miak pakílistli kípías neká akin kuali ijsatos iwa tlakentitos, para amo maxipetsitinemi iwa nochteh makitakah tlan kimopinawilia.” ¹⁶Iwa okinmoololjkeh nochteh n reyes itech se weyi tlali non itech tlájtoli hebreo itoka Armagedón.

¹⁷Non ipan chikome ángel okinoki ikopa patlawak ixko ejekatl, iwa itech yáyantli non kajki ijtik tiopa omokak se chikawak tlájtoli, non okijtoaya:

—¡Nochi yotlanki omochi!

¹⁸Ijkuakó otlapejétlanki, otlajjukuyukak, otlatejtékuinki, iwa otlalólinki chikawak, kemi ayik tlalolintika desde ijkuak oneskeh n tlakah ipan nin tlaltíkpaktli. ¹⁹Ijkuak otlalolinki omotlajtlapo n tlali itech eyi, iwa miakeh kalmeh owejwetskeh. Dios amo okilka kitlajjowiltis n Babilonia, iwa okoniti ikualanilis. ²⁰Nochteh n tlalmeh non opankistokah itech weyi atl iwa n tepemeh opojpolikeh. ²¹Noiwa owetski wejweyi tesiwitl impa n tlaltíkpaktlakah. N tesiwitl onesia kemi wejweyi temeh, sejsen tesiwitl okiapiaya kemi ome póali kilo. Iwa n tlaltíkpaktlakah okiwiwikaltijkeh Dios ken okintlajjowilti ika non weyi tesiwitl.

17

Dios kitlajjowiltia n weyi mekatanajsiwatl non itoka Babilonia

¹Seme de n chikome ángelteh non okimpixtokah n chikome kópajteh patlawakeh, owala iwa onechili:

—¡Xiwiki, nimitsititis n tlaijyowílistli non ika niktalaijyowíltis n weyi mekatanajsiwatl non ewatok ipan miaktikeh ameh! ²N wejweyi tlanawatijkeh itech nin tlaltípkaktli, okimomekatijkeh n Babilonia, iwa omotlawantijkeh ika tlan pitsotik keman okinweyijkachijkeh diosmeh tekajkayajkeh non kinmachijchiwah, iwa n oksikimeh tlaltípkaktlakah noijkó okichijkeh.

³Satepa n Espíritu notech owala, iwa onechwik kan tlaltejtéyinki. Ompa onikitak se siwatl otlejketoka ipan se yolkatl chichiltik non okimpiaya chikome itsontekonwah iwa májtlaktli ikuakuanwah. Iwa ipa oijkuilitokah miakeh tlájtoltch fierotikeh non okiwikaltiaya Dios. ⁴Nin siwatl otlakentitoka ika itlake chichiliktik iwa mojmorado, iwa ochijchitoka ika miak oro, tetsitsinteh non mimilinih iwa ika perlas. Itech ima okipixtoka se kopa de oro non otentoka ika tlan pitsotik. Noni kijtosneki nochi tlan amokuali okichi keman okinweyijkachi diosmeh non kinmachijchiwah. ⁵Iwa itech ixkuak oijkuilitoka se tlájtoli non amaka okajsikamatia: “N weyi Babilonia ye n tena de nochteh n siwameh non momekatijtinemih iwa nochi tlan pitsotik mochiwa itech nin tlaltípkaktli.” ⁶Satepa onikajsikama non siwatl owintitoka ika innesso akimeh iaxkawah Dios, iwa akimeh okinmiktijkeh ken otetlapowiyah de Jesús. Saikpanoa onimotlajtlachialti ijkuak onikitak nochi ni. ⁷Ijkuakó n ángel onechili:

—¿Tleka timotlajtlachialtia? Ne nimitsajsikamatiltis tlan kijtosneki non siwatl, iwa tlan kijtosneki non yolkatl non kimpia chikome itsontekonwah iwa májtlaktli ikuakuanwah non ipa ewatoti non siwatl. ⁸N yolkatl non otikitak, ye achto yokatka, axa ayakmó onka. Pero oksepa walpankisas de kan sentlawejkatlantik, iwa yas milaktik kan kipojpoloskeh. N tlaltípkaktlakah non amo machotitokeh itech iamatlajkuilol Dios, desde ijkuak opejki n tlaltípkaktli, motlajtlachialtiskeh ijkuak kitaskeh n yolkatl non yowejka onemia iwa yomikki, iwa oksepa wits.

⁹Akin ixtlamati, kajsikamatis: N chikome tsontekomeh kijtosneki n chikome tepemeh non impah ewatok n siwatl, noiwa n chikome tsontekomeh kijtosneki chikome reyes. ¹⁰Mákuilteh reyes yowetskeh, seme de nonteh chikome reyes axa tlanawatijtok iwa non ok se ayamó wits. Pero non sa iksemi wits, amo wejkwaw tlanawatijtos. ¹¹N yolkatl temojti non yowejka oyolitoka iwa axa kajki, ye seme de n chikomeh tlanawatijkeh. Walmokopas iwa tlanawatis oksepa, iwa yetos n chikweyi tlanawati, pero kixpoloskeh sansemi.

¹²N májtlaktli kuakuajmeh non yotikinmitak, yejwah májtlaktli tlanawatijkeh non ayamó pewa tlanawatiah. Pero sanwel se ora kipiaskheh weletilistli sansikah iwan non yolkatl temojti. ¹³Ninteh májtlakteh tlanawatijkeh moyekkawaskeh iwa kimakaskeh inweletilis iwa intekiwajyo non yolkatl temojti. ¹⁴Motekilmakaskeh iwan Ichkatsi, pero n Ichkatsi kintlanis. N Ichkatsi kintlanis porke Ye n okachi Weyijkatitok iwa Ye n tekowa non okachi Weletin de nochteh n tlanawatijkeh. Iwan Toteko yetoskeh nochteh itlaneltokawah porke nochipa kitlakita.

¹⁵N ángel noiwa onechili:

—Nonteh ameh non te otikimitak, non impah ewatok n mekatanajsiwatl, kijtosnekih miakeh altepemeh, tlakah, wejweyi tlalmeh iwa tlájtoltch.

¹⁶Iwa n májtlaktli kuakuajmeh non otikimitak kimpixtok n yolkatl, kikokoliskeh n mekatanajsiwatl, kixixtiliskeh nochi tlan kipia iwa kikawaskeh sa xipetstik. Kikualiskeh inakayo iwa kontlamotlaskeh ijtik tletl.

¹⁷Dios yokitlali itech inyolo n májtlaktli tlanawatijkeh ijko makichiwakah. Yika, motlapowiskeh iwa moyekkawaskeh ken kimaktiskeh n yolkatl intlanawatilis iwa matlanawatijto impatka, asta mamochiwa nochi tlan Dios yokijto kichiwas. ¹⁸N siwatl non te otikitak kijtosneki n weyi altepetl non kinnawatia nochteh n wejweyi tlanawatijkeh itech nin tlaltípkaktli.

¹ Satepa ijkuak nochi yopanok, onikitak ok se ángel owaltemoaya de ilwikak ika miak tlanawátili, iwa okitlawili n tlaltíkpaktli ika itlawilnextilis. ² Iwa chikaktik okijtoaya:

—Yowetski, yowetski n weyi Babilonia, axa ompa yomochachantijkeh n demóniojteh, ompa motlaatia n espíritus amokualteh, ompa motepajsoltia nochteh n totomeh non tikinkokolia kemi tsojpilomeh. ³ Nochteh n tlaltíkpaktlakah yomotlawantijkeh ika imekatanajchihwalis pitsotik. N tlanawatijkeh non tlanawatijtokeh itech nin tlaltíkpaktli omomekatijtinenkeh iwa nin mekatanajsiwatl. Iwa n tlasemankeh de nin tlaltíkpaktli yomotojtomintijkeh iwa.

⁴ Ijkuakó onikak ok se láltoli kan ilwikak non okijtoaya:

—Nomejwah akimeh onomechpejpenki, xikisakah de Babilonia, iwa amo xitlajtlakolchikawah iwa non mekatanajsiwatl, para amo mawetsi nomopah n tlaijyowílistli non ipa wits. ⁵ Ijkó kiné, itlajtlakolwah yomonepanojkeh iwa yoajsito asta ilwikak, iwa Dios nochipa kinmilnamiktos itlajtlakolwah. ⁶ Xiktlaxtlawikah kemi ye okitlaxtla, iwa xikojpatilikah tlan ye yokitlaxtla. Xikchijchihwilikah se tlaónili ojpa chikaktik non ye okinmoniti oksikimeh. ⁷ Xiktlaijyowíltikah iwa xikchochoktikah ijko kemi ye omoweyiljtinemia iwa omopaktijtinenki itech tlan satlawel pitsotik, ken ye okimoliaya itech iyolo: “Nika niewatok kemi se Reina. Ne amo niiknosiwatl, nion ayik nichokas.” ⁸ Ika noni, san itech se tonati nochi nin tlaijyowílistli wetsiki ipa: mikílistli, neyolkókoli iwa apisotl. Kichichinoskeh ijtik tletl, ken weletini n Toteko Dios, iwa yokitlajtlakolmák.

⁹ N tlanawatijkeh de nin tlaltíkpaktli akimeh iwa omomekatijtinenkeh iwa omopajpak-tijtinenkeh iwa nin mekatanajsiwatl, moyolkokoskeh iwa kichokiliskeh ijkuak kitaskeh n Babilonia sa popokatok. ¹⁰ San wejka konitoskeh porke kimawiliskeh makintlaijyowíltikah noiwa, iwa kijtoskeh:

—¡Ay! ¡Ay! ¡Timalma Babilonia non otikatka tiweletini! Porke san itech se ora mopa owetsiko nochi motlaijyowilis.

¹¹ N tlasemankeh de nochi n tlaltíkpaktli chokaskeh iwa kinyolkokos tlan omochi non altepetl, ken ayakmó yetos akin kinkuilis tlan yejwah kinamakah, ¹² n oro, plata, tetsitsinteh non tsotsotlakah, perlas, tlakemítl de lino, de seda, non chichiltik iwa mojmorado. Noiwa okatka san miak kuawítl ajwiak, noiwa okatkah tlachijchihwalteh de marfil, de kuawítl non satlawel patio, de bronce, de tépostli iwa de mármol; ¹³ kanela, ajwiak xiwitl, kópali, mirra, iajwiaka n xiwitl, oktli, aseite, arina iwa trigo. Noiwa okoninnamakayah yolkameh non tlamamah, ichkameh, kabayojteh, karretajteh, iwa asta tlakah non okinnamakayah.

¹⁴ Babilonia, nochi tlan moyolo okipaktiaya mach ok ayik tikpías, san semi opojpoliwik nochi tlan kualtsi de te iwa nochi tlan otiklawelpiaya!

¹⁵ N tlasemankeh non omotlawelomintijkeh ika tlan okwalnamakiltiayah non weyi Babilonia, san wejka konitoskeh ken kimawiliskeh noiwa makintlaijyowíltikah; chokaskeh, moyolkokoskeh, ¹⁶ iwa kijtoskeh:

—¡Ay! ¡Ay! ¡Mialma Babilonia! Kualtsi omotaya kemi se siwatl non otlakentitoka ika lino non kualti. ¡Okinmonakiaya itlakenwah non chichiltikeh iwa mojmoradojteh, iwa omochijchiwaya ika oro, ika tetsitsinteh non tsotsotlanih iwa ika perlas! ¹⁷ ¡Iwa axa san itech se ora owalpoliwik nochi tlan okitlawelpiaya!

Nochteh non kinnejnemítiah n barkojteh, nochteh non oyayah itech barkojteh iwa nochteh non otekítiah itech weyi atl, san wejka omokajkeh, ¹⁸ iwa ijkuak okitakeh n poktli non okisaya itech n weyi Babilonia non otlatlatoka, otsajtsikeh:

—¡Mach okatka ok se altepetl kemi nin weyi altepetl!

¹⁹ Iwa omokuatlekonexwijkeh; ochokayah, omoyolkokoayah iwa okijtoayah:

—¡Ay! ¡Ay! ¡Mialma Babilonia! Ika nochi tlan okitlawelpiaya, omotomintijkeh nochteh non okimpiayah inbarkojwah itech weyi atl; ¡iwa itech se ora nochi san owalpoliwik!

²⁰ Xipakikah nomejwah akimeh nonkitlakitah Dios, akimeh non kateh ilwikak, ken Dios okipojpolo n weyi altepetl.

Xiyolpakikah nomejwah akimeh non tlapejpénalteh
iwa nomejwah n profetas,
ken Dios yokitlajiyowilti n Babilonia
Ika nochi tlan amokuali yokichi.

²¹ Ijkuakó se ángel weletini okajkok se weyi tetl, kemi non ika tlakuechoah n molinojteh, okontlamotlak ijtik weyi atl, iwa okijto:

—¡Ijkí chikawak kitlamotlaskeh n weyi altepetl de Babilonia, iwa ayik oksepa kitaskeh!

²² Ayik oksepa motech mokakiskeh makintsotsontokah arpajteh, akatlapítsalteh, noso tlapítsalteh, nion motas aka non matekitito, nion mokakis ijkuuyukatok n tetl kan otlakuechoayah molinojteh. ²³ Ayik oksepa motech motas maxotlato se tláwili, iwa ayik ok mokakis mailwichiwakah kan monamiktilo, maya motlasemankeh okatkah non okachi okipiyah tomi ipan nin tlaltfipaktli, iwa nochteh n tlaltikpaktlakah otikinmixtlapoloiti ika motetlajchiwilis.

²⁴ Porke motech, Babilonia, omajsik inmesso n profetas, inmesso n nochteh akimeh iaxkawah Dios, iwa de nochteh akimeh okintoskatsontekeh itech nin tlaltfipaktli.

19

¹ Ijkuak yopanok, onikak se chikawak tlájtoli kan ilwikak, miaktikeh tokniwah otlaj-toayah chikawak:

¡Matikweyilikah Dios!,
ken Ye techmakixtia.

Matikweyilikah ken Ye kipia weyílistli.

² Ye tlaixkomaka ika imilajkachiwalis.

Yika, yokitlajtlakolti neká weyi mekatanajsiwat!
non ika ipitsotilis okinyolijtlako nochteh n tlaltikpaktlakah.

Yika ika tlan okijyowilti Dios yokitlaxtlawalti inmikilis itekitwah.

³ Otlanki oksepa okijtojkeh:

—¡Timitsweyiliah Tejwatsi Todios! Porke n weyi Babilonia ayik tlamis popokas.

⁴ Iwa nonteh sempóali iwa n nawi (24) tetajtsitsinteh, iwa non nawi non yolitokeh omotlankuaketskeh asta okitelkojkeh n tlali ika inmixkuak iwa okiweyijkachijkeh Dios Akin yayantitok, iwa okijtoayah:

—¡Timitsweyijkachiwah Tejwatsi Todios Non Timoisttika itech moyayan! ¡Ijkó mamochiwa!

⁵ Ijkuakó onikak se tlájtoli non owalaya de kan oyayantitoka, iwa okijtoaya:

¡Nonnochteh xiktakuikilikah Todios
nochteh n tlaltikpaktlakah makitlakuikilikah,
akimeh kitlawelpiah iwa non próbesteh,
akimeh kitekitiliah iwa akimeh kitlakitah!

N ilwitl ijkuak monamiktia n Ichkatsi

⁶ Noiwa onikak kemi yaskia miakeh otlajtojtokah, noso kemi ijkuuyukatoskia miak atl iwa chikawak otlatejtekuinia, iwa okijtoayah:

¡Timitsweyiliah!, ken yopé titlanawatia Tejwatsi Toteko, Todios weletini.

⁷ Matipakikah, matiyoltemikah ika miak paklistli iwa matikweyilikah Todios, ken yoajisiko n tonati monamiktis n Ichkatsi.

Isiwa yomotlatlali iwa sa mochixtok.

⁸ Iwa yokikawilijkeh mamotlakenti ika tlakemilt de lino non kualí, chipawak iwa tsotlani. N lino non kualí, kijtosneki inyeknemilis nekateh akimeh iaxkawah Dios.

⁹ Ijkuakó n ángel onechili:

—Xikijkulo: “Mayolpakikah akimeh yokintlalwijkeh matlatlakuatih kan monamiktia n Ichkatsi.”

Iwa onechili:

—Nin tlájtoli milák, itlajtol Dios.

¹⁰ Ijkuakó onimotlankuaketski ikxitla n ángel para nikweyilis, iwa ye onechili:
—Amo ijko xikchiwa. Ne san niktematiltia itlajtol Dios ijko kemi te iwa nochteh mokniwah akimeh kiteixmatiltiah tlan Jesús okitemachti. Sanwel Dios xikweyili.
Porke akimeh kiteixmatiltiah tlan Jesús okitemachti, kimatih tlan satepa tlamochiwas.

Non tlejkoti ipan kabayo istak

¹¹ Ijkuakó onikitak n ilwikak otlaplotoka, iwa owalmonexti se kabayo istak. Iwa non otlejkotiaya ipan non kabayo, omonotsaya Milajkatlakatl iwa Kichiwa Tlan Kijtoa, Ye Akin ika tlan milák tlaixkomaka iwa tlanawatia, iwa motekilmaka kemi moneki. ¹² Ixtolowah oxotlayah kemi tletl, itech itsonteko okinmonakijtoka miakeh koronajteh, iwa okipiaya ijkuilitok itoka non sanwel ye okixmatia. ¹³ Itlake non okonakijtoka okatka ejestik, iwa omonotsaya Itlajtol Dios. ¹⁴ Miakeh soldadojteh de ilwikak okwaltokayah. Otlejkotiwalayah impah inkabayojwah istakeh, iwa otlakentitokah ika intlakeh de lino non kual, istak iwa chipaktsintli. ¹⁵ Itech ikamak owalkisaya se espada, non ika kinkojkos nochteh n taltikpaktlakah, iwa chikawak kinnawatijtos kemi yaskia kimapixtok se basto. Iwa kintlaxtlawaltis ijko kemi ijkuak kintlajtlaksah n uvas para kimpatskaskeh, iwa kintoktis makonikah n temojti tlaijyowilistli non Dios weletini kinwaltitlanilis itech ikualanilis. ¹⁶ Itech itlake iwa ipan imets, oijkuilitoka nin tlájtoli: “Ye n tlanawati non kinnawatia nochteh n tlanawatijkeh iwa Tekowa itech nochteh n tekowajkeh.”

¹⁷ Otlanki onikitak se ángel non omoketoka ipan tonati, iwa chikaktik okintsajtsiliaya nochteh n totomeh non patlantinemih itech ilwikak:

—¡Xiwikih!, ximoololokah nika kan Dios nomechmakas ximotlamajsewukah, ¹⁸ iwa xikinkualikah innakayo n tlanawatijkeh, n soldadojtlayakankeh iwa tlakah non amitla kinmojtia, innakayo n kabayojteh iwa n tlakah non impah tlejkotiwih, innakayo miakeh taltikpaktlakah akimeh tenawak tekutih iwa akimeh inselti monawatiah, non tominyojkeh iwa non próbesteh.

¹⁹ Ijkuakó onikitak n yolkatl temojti, iwa n tlanawatijkeh akimeh otlawatijtokah ipan nin taltikpaktli iwa insoldadojwah. Omoololokah para motekilmakaskeh iwa Akin otlejkotiwalaya ipan ikabayo istak iwa isoldadojwah. ²⁰ N yolkatl okikitskijkeh, sansikah iwa n profeta tekajkaya non okinchi milagros iyakapa non yolkatl temojti. Ika nonteh milagros non okinchi non profeta, miakeh okinkajkaya para makimotekawilikah mamoixmachotikah iwa okiweyilijkeh iestatua non weyi yolkatl, non otlawatia makichijchwilikah ijko kemi ye. Iwa n yolkatl temojti iwa n profeta tekajkaya, okonintlamotlakeh yolitokeh kan kuakualakatok tletl ika asufre. ²¹ Iwa non omokajkeh, okimiktijkeh ika espada non owalkistoka itech ikamak de Akin otlejkotiwalaya ipan ikabayo istak. Iwa nochteh n tsojpilomah oijxwikeh ika innakayo non okimijmiktijkeh.

20

Panoa májtlaktli siento (1000) xiwitl

¹ Satepa onikitak se ángel otemotiwalaya de ilwikak iwa okualikaya n yabe non tlatlapoa kan sentlawejkatlantik, iwa itech ima okualikaya se kadena. ² Nin ángel okijilpi n weyi dragón, neká koatl non yowejka nemi, ye n diablo non kinotsa satanás. Iwa n ángel okijilpi ika kadenajteh iwa ompa okika mailpito májtlaktli siento xiwitl. ³ Otlanki okontlamotlak kan sentlawejkatlantik, okitenkamatsak iwa kual okitakatso iwa okitlalili se seyo ijko ayakmó makinkajjayajtinemi n taltikpaktlakah asta mapano májtlaktli siento xiwitl. Pero satepa, oksepa kikajkawaskeh kech tonati.

⁴ Otlanki onikimitak miakeh yáyanteh, iwa itech nonteh yáyanteh oewatokah akimeh okintekiwajtlalijkeh para makijtakah akimeh tlajtakolejkeh iwa akimeh amó. Noiwa onikimitak akimeh okinkechtsontekah ken noiwa otetlapowiyah itlajtol Dios. Yejwah amo okiweyilijkeh n weyi yolkatl temojti nion itlachijchawal, nion okimotekawilijkeh makinmixmachotikah nion makinneskayotikah itech inma. Oksepa omoyolitijkeh iwa

otlanawatijtokah iwan Cristo májtlaktli siento xiwitl. ⁵Yejwah ninteh non achto omoyolitijkeh de nochteh non yomikkeh. Iwa n oksikimeh akimeh noiwa omiktokah, amo omoyolitijkeh asta ijkuak yopanok májtlaktli siento xiwitl.

⁶¡Saikpanoa yolpakilisojkeh iwa yolchipawakeh nekateh akimeh achto moyolitiskeh!, porke non ojpatia mikílistli ayakmitla weletis kintoktis. Iwa yetoskeh itiopixkawah Dios iwa n Cristo, iwa tlanawatijoskeh iwan Cristo májtlaktli siento xiwitl.

Tlapoloa n satanás

⁷Ijkuak yopanokeh májtlaktli siento xiwitl (mil años), n satanás kikajkawakeh de kan tsaktok. ⁸Iwa kisas kinkajkawawati nochteh n tlaltikpaktlakah ik tlakpawik, tlatsintlawik, kan ik kisa iwa kan ik kalaki tonati. Kinkajkawawati n Gog iwa n Magog. Iwa kinseitilis insoldadojwah non satlawel miaktikeh sa kemi xali non kajki itempa n weyi atl. ⁹Ijkó kiné, yejwah nenemiskeh itech nochi n tlaltikpaktli, iwa kinyawaloskeh nochteh akimeh iaxkawah Dios kan chantitokeh. Iwa owaltemok tletl de ilwikak iwa nochteh kintlatish. ¹⁰Iwa n diablo akin okinkajkawajtoka, kitlamotlaskeh kan kuakualakatok tletl iwa asufre, ompa kan noiwa okontlamotlakeh n yolkatl temojti iwa n profeta tekajkaya. Tlajka iwa n yuak tlajjowijtoskeh nochipa.

N iksemi tlaixkomakálistli

¹¹Ijkuakó onikitak se weyi yáyantli istak, iwa Akin ompa oewatoka, ixpa opoliwik n tlaltikpaktli iwa n ilwikak, iwa ayakmakah oksepa okinmitak. ¹²Iwa onikinmitak nochteh non yomikkeh, non tominyojkeh iwa non próbesteh, omoketokah iyakapan n yáyantli. Ijkuakó okintlapojkeh n amatlajkuífolteh kan ijkuilitok nochi tlan se okichi. Noiwa omotlapo n amatlajkuífoli kan machotitokeh nochteh akimeh yolitoskeh nochipa iwan Dios. Non yomikkeh okinmixkomakakeh ika tlan okichijkeh ijko kemi machotitok itech amatlajkuífolteh. ¹³N weyi atl okintemák non omikkeh ijtik, iwa omoteixpantito iyakapa n Dios para kinmixkomakas, noijkó okichijkeh akimeh okatkah itech inniketokochwah. Nochteh n mikemeh okinmixkomakakeh ijko kemi yokichijkeh. ¹⁴Satapa n mikílistli iwa n miktla, okintlamotlakeh kan mextok tletl. Nin tletl ye n ojpatia mikílistli. ¹⁵Iwa akin amo omachotitoka itech n amatlajkuífoli kan machotitokeh non nochipa yolitoskeh, okintlamotlakeh kan mextok tletl.

21

N yankuik ilwikak iwa yankuik tlaltikpaktli

¹Satapa onikitak se yankuik ilwikak iwa se yankuik tlaltikpaktli, porke n ilwikak iwa n tlaltikpaktli non achto okatkah, opojpolikeh, iwa ayakmó okatka n weyi atl. ²Ne Juan onikitak n chipawak altepetl, n yankuik Jerusalén, non otemotiwalya de ilwikak, kan moitstika Totajtisi Dios. Kualtsi ochijchitoka kemi ijkuak se novia sa kichixtok akin konanas. ³Iwa onikak se tlájtoli chikawak non owalaya ik ilwikak, iwa okijtoaya:

—Xikita, axa Dios yochanchiwato iwa n tlakah. Dios chantitos inwah; iwa yejwah yetoskeh iaxkawah nochipa, iwa Ye inewia yetos non sanwel se Dios. ⁴Ye kinmixay-owajwatsas nochteh, iwa ayakmó yetos mikílistli, nion chokílistli, nion neyolkókoli, nion tekipanólistli, porke nochi tlan yowejka okatka, nochi yotlatlajtlanli.

⁵Ijkuakó Dios non oyayantitoka okijto:

—Xikita, ne nochi nikyankuilis.

Noiwa okijto:

—Xikijkuilo tlan nimitsilis, porke tlan nimitsilijtok milák iwa kuali se kinneltokas.

⁶Satapa noiwa onechili:

—Nochi yomochi. Ne nitlapewaltijtok iwa Ne nitlayakatlamia, kemi Alfa iwa Omega. Akin amikis, ne nikatlitis kan améyali non kichiwa se mayolito nochipa, iwa san niktliokolis. ⁷Akin tlatlanis ipan nochi tlan amokuali, nikaxkatilis nochi ni, iwa Ne niyetos Idios, iwa ye yetos nokone. ⁸Pero n majmawiskemeh, akimeh amo tlaneltokah, akimeh kichijtinemih tlan pitsotik, n temiktijkeh, akimeh momekatijtinemih, akimeh tetlajchiwiah, akimeh kinweyiliah diosmeh non kinmachijchiwah, iwa nochteh non amo kijtoah tlan milák,

yejwah kiseliskeh kemi yaskia intlaliookolil, kan kuakualakatok tletl ika asufre. Ompa kajsiskeh n ojpata miklilstli.

N yankuik Jerusalén

⁹ Ijkuakó seme de n chikome ángelteh non okimpixtokah n chikome kópajteh patlawakeh non otentokah ika n iksemi chikome tlaijyowilisteh, owala onechajsiko iwa onechili:

—Xiwiki, nimitsititis n novia, non yetos isiwa n Ichkatsi.

¹⁰ N Espírиту onechmokemi, iwa ne onikitak n ángel onechwikak ipan se weyijtk iwa wejkapantik tepetl. Ompa onechititi n chipawak altepetl de Jerusalén non owaltemotiwalaya de ilwikak kan Dios moitstika. ¹¹ Non altepetl otsotlania ika itlawilnextilis Dios, iwa itsotlanilis omotaya kemi itsotlanilis se tetl kuajkualtsi, kemi se tetl de jaspe, chipaktik kemi teskatl. ¹² N altepetl oyawalitoka ika se tepamitl weyi iwa wejkapa. Okimpiaya májtlaktli iwa ome kaltemeh, iwa itech nochteh n kaltemeh okatka se ángel. Iwa intokah nonteh májtlakteh iwa ome ipilwah n Israel oijkulitokah intech sejsen kaltentli. ¹³ Eyi kaltemeh okatkah kan ik kisa tonati, eyi ik tlakpawik, eyi ik tlatsintlawik, iwa eyi kan ik kalaki tonati. ¹⁴ N tepamitl non okiyawalojtoka n altepetl omotlakxilijtoka ipan májtlakteh iwa ome temeh, iwa intech nonteh temeh oijkulitokah intokah n májtlakteh iwa ome iapóstoles* n Ichkatsi.

¹⁵ N ángel non onechtlapowijtoka okipixtoka se kuawitl de oro non ika kitamachiwaskia nochi n altepetl, ikaltenwah iwa n tepamitl non okiyawalojtoka. ¹⁶ N altepetl okatka cuadrado, ijko ken weyak okatka, ijko patlawak okatka. N ángel okitamachi n weyi altepetl ika ikauu non de oro, iwa okitamachi ome mil iwa ome siento kilómetro. Ijko kemi okatka weyak, ijko okatka patlawak, iwa ijko okatka wejkapa. ¹⁷ Satepa n ángel okitamachi n tepamitl non okiyawalojtoka n altepetl, iwa onikitak okipiaya eyi póali iwa n nawi (64) metro. Non ángel otlatamachi ika ikauu kemi tejwah titlatamachiwah.

¹⁸ N tepamitl non okiyawalojtoka okichijchijkeh ika tetl non itoka jaspe. Iwa nochi n altepetl ochijchitoka ika ajsitok oro, senchipaktik kemi teskatl. ¹⁹ N májtlakteh iwa ome itlatenyo non okitlakxilijtokah n tepamitl non kiyawalojtok, okichijchijkeh ika nochi tetsitsinteh kualtsitsinteh. Non tlatsintla omantoka, okichijchijkeh ika jaspe; non ipan ome ika safiro; non ipan eyi ika ágata; non ipan nawi ika esmeralda; ²⁰ non ipan mákuili ika ónise; non ipan chikwase ika kornalina; non ipan chikome ika krisólito; non ipan chikweyi ika berilo; non ipan chiknawi ika topasio; non ipan májtlaktli ika krisopraso; non májtlaktli iwa n se ika jacinto; iwa non ipan májtlaktli iwa ome ika amatista. ²¹ N májtlakteh iwa ome kaltemeh okatkah májtlakteh iwa ome perlas, sejsen kaltentli okichijchijkeh san ika se perla. Iwa n ojtli non okachi weyi, ochijchitoka ika ajsitok oro, senchipaktik kemi teskatl.

²² Itech nin altepetl amo kanaj onikitak se tiopa, porke n Toteko Dios weletini iwa n Ichkatsi, yejwah innewiah totiopa. ²³ Itech non altepetl amo moneki nion tonati nion metsi matlawikah, ken itlawilnextilis Dios tlawilnextia, iwa n Ichkatsi, Ye itlawil. ²⁴ Itlawilnextilis non weyi altepetl kintlawilnextilis nochteh n tlakah de nochi n tlaltlfpaktli, iwa n reyes non tlanawatijtoskeh ipan nin tlaltlfpaktli kiwikiliskeh nochi inweyilis iwa kiweyiliskeh. ²⁵ Iwa tlajka, ayik kintsakuaskeh ikaltenwah, ken itech non altepetl ayik tleyúas. ²⁶ Inweyilis iwa inkualtsinyo nochteh altepemeh kikawatiweh itech non altepetl. ²⁷ Ayik kalakis itla tlan amo chipawak, nion se tlajtlalochi nion se tekajkaya. Sanwel kalakiskeh akimeh machotitokeh itech n amatlajkuiloli non kipixtok n Ichkatsi, kan machotitokeh akimeh yilotoskeh nochipa.

22

¹ Ijkuakó n ángel onechititi se awayatl chipawak kan opanotoka n atl non kichiwa mayolitokah nochipa. Non atl omextoka kanik iyayan Dios iwa n Ichkatsi. ² Non atl omotlelojtoka itlajko n weyi altepetl, iwa itejtempa non awayatl, otooktoka n kuawitl non kichiwa se mayolito nochipa. Non kuawitl kitemaka májtlaktli iwa ome mestli

* 21:14 apóstoles kijtosneki tlatlanilith iwa tlatematilijkeh

itlakilo itech se xiwitl. Nochi mestli kitemaka itlakilo, iwa ixiujoyo kuali motekitiltis para kimpajitiskah n tlaltikpaktlakah. ³ Ompa ayakmaka kimawispolos Dios. Ompa yetos iyayan Dios iwa n Ichkatsi, iwa itekitwah kiweyijkachiwaskeh. ⁴ Ompa nochteh kiixtlajtlataskeh Dios, iwa Itoka ijkuilitos inmixkuak. ⁵ Ompa ayakmayik tleyúas, iwa akimeh ompa chantitoskeh amo monexis mamotlawilikah ika tláwilteh nion ika tonati, porke Dios kintlawilis, iwa yejwah tlanawatijtoskeh semijjak.

Cristo Jesús totoka wits

⁶ N ángel onechili:

—Ninteh tlájtoltel yekmilajkameh, iwa teyolchikawah. Iwa n Toteko Dios, Ye Akin kintlajtolmaka akimeh kitematiltia itlajtol, iwa yokitflanki iángel makinmatilti itekitwah tlan totoka tlamochiwas.

⁷ —¡Sanima niwits! ¡Miak pakílistli kiplas akin kichiwa tlan ijkuilitok itech nin amatlajkufloli!

⁸ Ne, Juan, onikitak iwa onikak nochi tlan nomechilijtok. Ijkuak nochi yonikitak iwa yonikak, onimotlankuáketski ikxitla n ángel non onechnextili nochi tlámantli iwa nikweyiliskia, ⁹ pero n ángel onechili:

—Amo ijko xikchiwa, ne noiwa san ni tékitki inawak Dios, ijko kemi te iwa n mokniwah n profetas, iwa nochteh akimeh kineltokah iwa kichiwah tlan ijkuilitok itech nin amatlajkufloli. Sanwel Dios xikweyijkachiwa.

¹⁰ Noiwa onechili:

—Amo san te xikmato itlajtol Dios non ijkuilitok itech nin amatlajkufloli, ken ayakmo wejkawas mochiwas tlan nika ijkuilitok. ¹¹ Yika, tla aka kichijtinemi tlan amokuali, ijko makichijtinemi; tla kiwilita moyolijtlakojtinemis, mamoyolijtlakojtinemi. Iwa akin kichijtinemi tlan kuali, nochipa makichijtinemi tlan kuali, iwa akin Dios yokiyolchipa, okachi manemi ika iyolo chipawak nochipa.

¹² —Xikkaki, Ne sannima niwits, iwa non sejsemeheh nikmakaki itlaxtlawil non okimotlanili ika tlan okichi. ¹³ Ne niachto iwa Ne niiksemi, Ne Akin nitlapewaltia iwa Ne Akin nitlayakatlamia, ijko kemi n Alfa iwa n Omega.

¹⁴ Dios kintiochiwas, akimeh kikawah iwa ayakmo kichiwah tlan amokuali. Dios kinkawilis makikuakah itlakilo n kuawitl non kitemakah n semijjak yolflistli. Yejwah weletis kalakiskah kan ikaltenwah n weyi altepetl. ¹⁵ Pero mokawaskeh kala, non saken chichimeh iwa kichijtinemih tlan pitsotik, akimeh kinneltokah nontetlajchiwah, akimeh momekatijtinemih, akimeh temiktiah, akimeh kinmotiotiah noso kintekichiwiliah tlamachijchiwaldiosmeh non amitla impati, iwa nochteh non nemih ika inpitsokamak.

¹⁶ —Ne Ni Jesús, oniktítlanki noángel makinmatilti nochi nin tlájtoli, nochteh n tlaneltokakeh akimeh moololoh itech Itoka n Totajtsi Dios. Ne ni walewatok itech n rey David. Ne n sítlali non tsotlantok nochi kualka.

¹⁷ N Espíritu Santo iwa isiwa n Ichkatsi kijtoah:

—Xiwiki Noteko Jesús.

Nochi akin kikaki, noiwa makijto:

—Xiwiki Noteko Jesús.

Iwa nochi akin amiki, mawiki; iwa akin kinakis sanijki makoni nin atl, non kitemaka semijjak yolflistli.

¹⁸ Nochteh akimeh kikakih itlajtol Dios non ijkuilitok itech nin amatlajkufloli; kuali makikakikah tlan nikinmilia: Tla aka kajxitilia itla tlájtoli non ya ijkuilitok itech nin amatlajkufloli, Dios kitlajiyowiltis ika nochteh tlajiyowiltis non ijkuilitok itech nin amatlajkufloli.

¹⁹ Iwa tla aka kikixtilia itla tlájtoli non yayjkuilitok itech nin amatlajkufloli, Dios ayakmo kikawilis makonana itlakilo n kuawitl non kitemakah n semijjak yolflistli, nion kikawilis machanchiwa itech altepetl chipawak, ijko kemi yomijto itech nin amatlajkufloli.

²⁰ Akin kitetlapowia nochi nin tlájtoli, kijtoa:

—Milák, Ne sanima niwits.

Ijkó mamochiwa. ¡Xiwalmuika, Toteko Jesús!

²¹Iyekchiwalis n Toteko Jesús mayetia iwan nochteh nomejwah.